







37614/Δ T. ps. with engr. vignettes

U







JO. BAPTISTÆ  
MORGAGNI

P. P. P. P.

OPUSCULA  
MISCELLANEA  
QUORUM

Non pauca nunc primum prodeunt ,

*TRES IN PARTES DIVISA.*

PARS PRIMÆ.



VENETIIS,

MDCCLXIII.

~~~~~

EX TYPOGRAPHIA REMONDINIANA:

*SUPERIORUM PERMISSU, AC PRIVILEGIO.*



TO BAPTIST  
MORAGANI


B. P. P.

OPUSCULA  
MISCELLANEA  
O. O. O. O.

Non posse habere quodammodo.

THESE

PARIS



1811

LIBRARY

THE

LIBRARY

LIBRARY





ILLUSTRI VIRO  
ANATOMICO ET BOTANICO SUMMO  
PHYSIOLOGO DOCTISSIMO ET EXPERIENTISSIMO

V. ALBERTO  
HALLER

PRÆSIDI SOCIETATIS REG. SCIENT. GOTTING.  
SODALI ACAD. REG. SCIENT. PARIS. REG. CHIR. GALL.  
IMPER. BEROLIN. SUEC. BONONIENS. BAVAR.  
SOCIET. SCIENT. BRITANN. UPSAL. BOT. FLOR. HELVET.  
IN SENATU SUPREMO BERNENSI DUCENTUMVIRO

OB TANTA IN REM PHYSICAM ET IN SE MERITA  
GRATO OBSEQUIOSOQUE ANIMO

D. D.

JOANNES BAPTISTA MORGAGNUS.







# P A R T E H A C P R I M A

## C O N T I N E N T U R

|                                                                                                 |         |
|-------------------------------------------------------------------------------------------------|---------|
| <b>N</b> Ova Institutionum Medicarum Idea.                                                      | pag. 1  |
| De via atque ordine in tradenda publice Medicina , & Anatome servato Epistola.                  | pag. 8  |
| Proœmia quædam Anatomicarum Prælectionum.                                                       | pag. 10 |
| De Anatomicis Eustachii Tabulis Epistola.                                                       | pag. 19 |
| De Glandulis Epistola.                                                                          | pag. 24 |
| De Lacrymalibus Ductibus, eorumque Obstructione Epistola.                                       | ibid.   |
| De Lumbricis Epistola.                                                                          | pag. 25 |
| De Acu intra Vesicam intrusa , & de Excrementia Membranæ Adiposæ Epistola.                      | pag. 27 |
| De Calculis Felleis Epistola.                                                                   | pag. 28 |
| De Venæ Cavæ Varicibus Epistola.                                                                | pag. 31 |
| De Vesicæ Calculis a Fr. Jacobo Beaulieu Patavii exsectis , & de Casu Cornelix Bandix Epistola. | ibid.   |
| In locum Vitruvii Medicum Epistola.                                                             | pag. 33 |
| De iis quæ a Valsalva in Bononiensi Academia Instituti Scientiarum recitata fuerant , Epistola. | pag. 35 |
| Experimenta circa Aquam calcis vivæ.                                                            | pag. 36 |
| Responsum Medico-Legale circa Obstetricum iudicium de Mulieris Virginitate.                     | pag. 37 |
|                                                                                                 | Re-     |



Responsum Medico-Legale alterum super feminis  
emittendi impotentia. pag. 43

Responsum Medico-Legale tertium. An post septem  
a conceptione menses infans nasci possit vitalis,  
& perfectus? pag. 45

In A. Corn. Celsum, & Q. Ser. Samonicum Epi-  
stolæ decem. pag. 47





JO. BAPTISTÆ  
MORGAGNI

N O V A

INSTITUTIONUM  
M E D I C A R U M

I D E A.



FOR BAPTIST  
MORAGANI

NO. 10


INSTITUTION  
MURRAY  
H. D. R. A.



ILLUSTRISSIMIS, ATQUE EXCELLENTISSIMIS VIRIS  
HIERONYMO VENERIO  
EQUITI, AC ÆDIS D. MARCI PROCURATORI,  
MARINO GEORGIO,  
JOANNI FRANCISCO MAUROCENO  
EQUITI

*Senatoribus Amplissimis, & Triumviris Litterariis*

Joannes Baptista Morgagnus S. P. D.



Quod facere Architecti neque inconsiderati, neque indociles solent; antequam ædificia, præsertim magna, & longi temporis, atque laboris, exstruere incipiant, ut eorum formam in publico expositam, meliorem, dum adhuc licet, ex aliorum reddere judiciis conentur, idem ego & paucis ante mensibus feci, & nunc quoque facio, VIRI AMPLISSIMI. Cum enim Institutiones quasdam Medicas olim animo concepissem novas illas quidem, & nisi fallor, formando illi perfectò Medico quem omnes optamus, apprime utiles, sed easdem tantæ operæ, & tam diuturnæ, vix ut illis perscribendis tota hominis vita sufficere posse videatur; ne ad eas, inexploratis aliorum sententiis, aggrederer, quo primum die mihi licuit AUGUSTISSIMI SENATUS, atque adeo Vestro Beneficio in hoc Florentissimo Gymnasio verba facere, in magna hominum doctissimorum frequentia earum ideam & quasi formam proposui. Et quanquam per temporis quo scripsi, ac multo magis quo dixi, necessariam brevitatem, partim quoque per ipsam formæ naturam atque rationem neque omnia exponere quæ sentio, neque ea ipsa quæ exposui, ita exprimere potui atque explicare, ut non sine aliquo timore essem, ne alicubi in rebus, alicubi in rerum causis mancus quodammodo, & subobscurus, præsertim minus attentis, viderer, sæpius item aut vanus promissor rerum, nemini, nedum mihi, possibilitium, aut eorum qui laudandi hic illic Auctores fuerant, dissimulato ingratus; ea tamen fuit universæ illius Concionis cum in diligenter audiendo benignitas, tum in judicando æquitas, ut ea omnia necessaria esse brevitatis illius incommoda, non futuri Operis vitia, existimaverit. Quinimmo ex præstantissimis illis hominibus, quorum ut doctrinæ, sapientiæque, ita prudentiæ, atque candori plurimum tribuo, non pauci fuerunt qui me non semel hortati sint, ut eandem Orationem typis mandarem, credo quo, non hujus tantum Gymnasti, sed omnium Eruditorum antequam Operi adnoverem manum, sententias perspicerem. Quorum ego hominum consiliis non modo deesse nolui, sed ut satis spatii habeam & ad cognoscenda aliorum judicia, & ad formam hanc quam propono, judiciorum eorum ope, meisque ulterioribus meditationibus,

Morgagni Opusc. A bus,



<sup>2</sup>  
bus, hoc addendo, istud demendo, illud immutando, perficiendam, constitui initium Operis in quintum, vel sextum annum differre: quo intervallo ( ne omnia inchoare videar, nihil absolute ) in Adversaria Anatomica Altera subscipi temporis partem impendam, ut eorum editio, de qua annis superioribus, occupatus in medicina facienda, ne cogitare quidem potui, paulo ante primos Institutionum libros habeatur. Atque hæ sunt, VIRI AMPLISSIMI, rationes omnis ejus temporis quod mihi a Munere assignato vacabit. Quas si cæteris, & imprimis si VOBIS probari intelligam, eas porro sequar, & constanter servabo; sin minus, alias quas magis VOBIS placere sentiam, inibo. Nam qui ab SENATU AUGUSTISSIMO, atque adeo a VOBIS in hanc sim nobilissimam Sedem honestissimis conditionibus vocatus, homo sim omnium ingratissimus necesse est, si quidquam aliud dies noctesque quam satis VOBIS, & Reipublicæ facere contendam. Quæ etiam causa est cur me a Vestris Laudibus vel in hoc aptissimo contineam loco, quod eas nimirum VOBIS scio mereri quidem placere, audire autem non placere. Itaque sermonem omitto quo neque illustrior, neque uberior, neque optatior contingere mihi potest, de Magnificentia, de Consilio, de Gravitate, de Constantia, de Fide, de Innocentia, de Magnitudine Animi, deque istis cæteris summis atque incredilibus Virtutibus quibus magno usui Reipublicæ & privati, & in Magistratibus, domi, forisque & sæpe fuistis, & assidue estis, quasque ob Virtutes Vestra ista, ut Maxima, & Sapientissima, sic eadem Justissima cæterarum RESPUBLICA cum in vos Honores amplissimos contulit, tum majores conferre meditatur. Tantum per eximiam Vestram in tuendis, augendisque Litteris Curam, atque Prudentiam, ac singularem istam, dignamque & VOBIS, & Familiis Vestris Inclytis illis, ac Vetusstissimis Benignitatem illud vos oro, ut quo me vultu ( quæ Vestra fuit Humanitas ) excepistis, eodem & meum hoc litterarium munusculum excipiaris. Valere.

Patavio Postridie Kalendas Junias M DCC XII.







# JO. BAPTISTÆ MORGAGNI

## O R A T I O

Habita in Gymnasio Patavino XVI. Kal. April. A. CIO IDCC XII.  
cum primum ad Theoricam Medicinam Ordinariam  
publice profitendam accederet :



**S**I ad tradenda Medicinæ Præcepta Magistorum valet auctoritas, in celeberrimo hoc Gymnasio ab nobilissimis Viris traduntur; si usus, a peritissimis; si ingenia, ab solertissimis; si facundia, ab eloquentissimis; si studia denique, ab diligentissimis, & cum omnia suis Auditoribus officia, tum maximam sedulitatem præstantibus. Quæ sunt igitur meæ partes? auctoritatis tantæ quantam vos pro vestra humanitate in me esse, volueritis, usus mediocris, ingenii vero, & si ulla est in me, facundiæ minime voluntati parium; nam Auditoribus quidem meis si minus reliquis facultatibus satisfacere potuero, at officiis certe, & sedulitate me spero satis esse facturum. Quæ hic & semper habitæ fuerint, & nunc habeantur cum de Scientiis cæteris, atque Artibus, tum de Re Medica Prælectiones, qua gravitate, qua facultate, qua copia, neque dico, neque si maxime vellem, dicere tamen pro dignitate satis possem; hoc tantum dico, nihil me unquam legisse, nihil audivisse quod mihi de Theorica Medicina subtilius dici videretur, nihil de Practica peritius, nihil illustriore auctoritate de exemplis, nihil de controversiis gravius, nihil acutius, nihil de tota re medica ornatius. Quo mihi difficilius contingit impositum hic Medicinæ tradendæ munus; nam & post eos, & inter eos tradenda est Præceptores ex quorum Prælectionum recordatione plus utilitatis, & voluptatis, quam non modo ex meis, sed ex cujusquam Prælectionibus capere possitis. Sed mos est gerendus, non modo Amplissimis Rei Litterariæ TRIUMVIRIS, quorum magnitudinem erga me meritorum nulla unquam delebit oblivio, sed etiam omni Augustissimo VENETORUM SENATUI, cujus ego honestissimo de me judicio, benignissimoque Consulto nullo modo deesse possum; deesse autem? immo vero etiam non ea ratione respondere, ut omnes intelligant, me summis opibus eniti, & quam maxime possim, contendere, ut Beneficia in me Sua recte posita, & ratione collocata esse videantur. Et cogitanti quidem mihi, ac omnes animo ad novum aliquod utilissimum opus, atque pulcherrimum vias, aditusque repetenti nihil denique visum est dignius novo quodam genere Medicarum Institutionum, quod antequam planius quale sit, dico, necesse est quemadmodum olim in ejus venerim cogitationem, proponere. Quod quidem sic faciam, ut tria illius præcipua capita, itemque eorum utilitates, difficultates, auxilia eadem operâ edisseram. Id cum breviter fecero, atque ita quæ de illis Institutionibus generatim sunt dicenda, exposuero, tum longiorem aliquanto, & tripartitam orationem ingressus, quæ

Morgagni Opusc.

de ipsis sigillatim, sed per summa capita, tradi possunt, explicabo.

2. Cum in quavis Facultate nemo possit perfectus existeret qui id ipsum non spectet, & ad summa contendere non labore, tum vero idem in Medicina contingere necesse est. Non hic pono, liberum esse humano ingenio ad consummatam, & numeris omnibus absolutam medendi artem pervenire; hoc enim alias in loco videndum est; sed qui ad eandem se conferant, illis ad summam essetendendum, id pono. Cum enim vel ex hisce ipsis qui in quavis arte primas appetunt, raros videamus ad secundas, tertiasque proventus, in hac certe cui non minus difficultatis, quam utilitatis, dignitatisque, insitum esse confitemur, in imo subsistat necesse est quisquis ad summa non enitatur. Hac de causa illud primum visum est mihi, esse Medicum ad spem summam instituendum, talemque informandum qualis adhuc fortasse fuerit nemo. Præterea animadverti, qui Medicas Institutiones scripserunt, quos mihi quidem videre contigerit, eos ita omnes ordiri quasi perfectis omni alio genere doctrinæ summam in arte medica manum imponent, sive contemnentes tanquam parva quæ prius discimus, studia, sive non ad suum pertinere officium opinati, quando divisæ professionum vices essent, seu, quod proximum vero, nullam ingenii sperantes gratiam circa res, quamvis necessarias, procul tamen ab ostentatione positas, ut operum fastigia spectantur, latent fundamenta. Mihi vero nihil arti Medicæ alienum existimanti sine quo optimum Medicum non posse fieri, fatendum est, nec ad ullius rei summam, nisi præcedentibus initiis, perveniri, visum quoque est oportere ad minora illa, sed quæ si negligas, non sit majoribus locus, descendere, nec aliter quam si Medicus traderetur educandus, studia ejus ab infanzia formare, & per omnes quæ modo aliquid Medico futuro conferant, artes ad ejus operis summam perducere. Illud novissime occurrebat, satis esse non putandum eximio inprimis quem instituendum posuimus, Medico ægotantium lectulis assidere, sed præterea inserviendum esse posteritati, quæ is scire potuerit, quæque artis gratia inquirere, candide illa, atque simpliciter in omnium sæculorum notitiam proferendo, tum Reipublicæ obtemperandum, in Scholis modo atque in Gymnasiis artis rationem aperiendo, in foro alias atque in judicio de beneficiis, de prodigiis, de vulneribus, de aeris, ciborumve salubritate respondendo. In quibus, atque in aliis pariter hujusmodi rebus cum nemo queat recte atque ordine se se gerere qui ad easdem non sit institutus, hæc quoque omnia Medicis Institutionibus comprehendenda esse videbantur. Sic igitur colligebam, & perfectum Medicum, & per cun-

A 2

Sta



Et ab infantia usque studia; & ad omnia quæ in ipsum cadere possunt, officia diligenter esse informandum.

3. Quæ cum colligerem, non ego istas quæ sunt in usu, Institutiones abjiciebam (probo enim; ne quis forte secus existimet; & valde utiles esse, profiteor) retinebam potius, retentisque omnia quæ dixi, addebam, ut Medicus tandem institueretur ille perfectus, & quo ne cogitatione quidem & mente excellentior confingi possit. In quo non multum illud verebar, ne si id quod vellem, efficere, eumque Medicum quem cupio, instituere valerem, retardarem studia multorum, qui desperatione debilitati, experiri id nollent quod se assequi posse diffiderent. Nam par est, omnes omnia experiri qui res magnas, & magnopere expetendas concupiscunt. Quod si quem aut natura sua, aut illa præstantis ingenii vis forte deficeret, dum teneret modo eum cursum quem posset, non evaderet ille quidem in summum, multos tamen infra se videret.

At summa assequi arduum est, & nemo est assecutus. Ante omnia, sufficit ad exhortationem studiorum, non capere id rerum naturam, ut quidquid non est factum, ne fieri quidem possit; namque omnia quæ magna sunt atque admirabilia, tempus aliquod quo primum efficerentur, habuere, & quidquid est optimum, ante non fuerat. Accedebat, tot nos præceptoribus, tot adiumentis instructos esse, ut possit videri nulla forte nascendi ætas felicior, quam nostra, cui docendæ cum tota antiquitas, tum vero inprimis novissima tempora elaboraverunt. Quibus nunc addere æquam est vestrum istud acre, & excellens ingenium, & egregiam istam, ac præclaram indolem, Adolescentes studiosissimi, quos propterea uno ex omnibus ad bene medendum maxime natos aptosque reputo, ut vel ex vobis summus ille quem opto, Medicus, vel ex nemine fortasse omnium expectandus esse videatur.

4. Sed cum illud, ut dico, minus timerem, ne ab aliis magna nimium exigere judicaret, illud contra verebar maxime, ne nimio plus de me polliceri, & jactare me intolerantius viderer, si forte susciperem tradere tantam rem, quantam, non modo facultate consequi, sed etiam animo complecti longe esset difficilimum. A quo quidem consilio etsi ego tam aberam, quam qui maxime, ut qui de me, meisque viribus, ut a principio dixi, semper ita senserim, & adhuc sentiam, ex quo tamen die allatum est, me summa hujus Immortalis Reipublicæ liberalitate in hoc omnium locupletissimum optimarum Artium, atque Scientiarum Domicilium vocari, ex eo die mihi sum visus id posse eniti, non perficiendi quidem spe, sed adumbrandi voluntate. Quod ipsum profecto magnum erat onus, & perquam grave, atque adeo non hisce humeris suscipiendum, nisi illud occurrisset, nusquam tot Socios, nusquam tales consiliorum Adjutores, qui tantum onus magna ex parte verbis, exemplisque allevarent suis, quot, qualesque in doctissima hac, & ornatissima Civitate, me esse reperturum. Cum enim Medicus sit mihi educandus eloquentia excultus, in dialecticis eruditus, in mathematicis, & philosophia exercitatus, juris divini, atque humani non inscius, rei anatomicæ, rei herbariæ, omnisque materiæ medicæ scientissimus, universæ demum medendi rationis peritissimus, mihi propterea cum Magistris earum Artium, Doctrinarumque nobilissimis multi sint sermones conferendi, multa sint ab illis postulanda, multa sumenda; ubi hæc omnia commodius quam in hac Urbe, consequi possim, non video. Ubi enim terrarum eloquentia ornatius, dialectica acutius, mathesis nervosius, philosophia probabilius, divina, atque humana jura incorruptius? ubi corporis humani, ubi stirpium, ubi rerum naturæ historia diligentius? ubi denique cautius, ubi præclarius, ubi felicius omnis Medicinæ ratio, viæque traduntur?

5. Quo magis confidentiæ notam, & offensionem effugere posse videor, præsertim cum tot præter tantosque Socios atque Adjutores, Duces Auctoresque summo judicio, & auctoritate nactus sim duos, quorum vestigia, non pressa leviter, persequenti apparent, sed fixa atque alta se se ita ostendunt, ut aberrare non sinant. Quid? quod, non certam modo, apertam, directam, sed munitam quoque viam hi duo reliquerunt, verba nempe, sententias, præcepta instituti mei tam propria, tractandisque rebus tam apta, ut ego iisdem

non solum verbis, atque sententiis, sed perpetua interdum oratione, parce ad materiam hanc meam detorta, non uti non possim: quod vel in hac ipsa Præfatione non latere vos, certo scio. Cujus a me facti non est expectanda deprecatio (quanquam quis hanc ultro consentienti negaret veniam?) sed gratia potius habenda est, quod non commiserim, ut vel minus idonea oratione, vel compellationum inepta, atque odiosa assiduitate uterer, in quorum alterutro peccandum alioquin erat, optimis videlicet occupatis. Nam ut institutum animo complexus sum meum, nullas paulo notiores aliarum quoque Artium Institutiones omitenti, quin excuterem, & cum meis contenderem, brevi post tempore usu venit, ut M. T. Ciceronis, & M. F. Quintiliani libros oratorios in manus sumerem, & diligentius considerarem. Dicit non potest, quantum ipse mihi sim gratulatus, quantumque id gavisus, quod in tantorum Præceptorum vestigia incurrissem; uterque enim (quod vos minime ignoratis) Oratorem omni ex parte perfectum instituunt, alter vero etiam ad ejus studia prope ab incunabilis formanda, atque regenda se se demittit. Itaque cum in binis instituti mei capitibus eos Auctores nactus essem, quorum gravissima auctoritate tueri illa possem, modo, atque ordine luculentissimo exponere, oratione autem locupletissima etiam ornare; tertium, quod relinquebatur, caput de Medico ad cuncta quæ in ipsum cadere possunt, officia informando, hoc vero adjectum cæteris videbatur tum eorum gratia, & suæ utilitatis admitti posse, tum eadem ratione tractari, quam in tradendis illis prioribus didicissem. Quod quidem & cœpi facere, & porro quantum mea valebit infirmitas, sum facturus.

6. Exposui quod primum pollicitus sum, Auditores, quidquid generatim ad institutum pertinet meum; nunc sequitur, ut quale sit, per singula rerum capita edisseram sic quidem, ut quæ nostri Alumni sint partes antequam Medico Præceptor tradatur, postquam erit traditus, & ex quo eidem ægrotantes tradentur; oratione tripartita proponam: quæ si me intelligitis ut brevissime possum, planissimeque præstare, vos, quæso, benigne, ut facitis, & diligenter attendite. Postquam principio demonstravero, quæ puer animi, quæque corporis debeat bona præ se ferre, quo de puero spem Medici capere quam optimam possint, hanc vero tantam spem & expectationem neminem posse, nisi virum bonum, explere, illud primum consequetur, ut puerum doceam frangendis cupiditatibus, & conformandis moribus operam dare, sine sibi proposito, cujus causa nihil non faciat, & quo omnem rationem referat, DEO. Strictim deinde attingenda erit cum istis omnium communibus, contritiisque præceptis homine ingenuo, liberaliterque educato dignis prima illa puerilis institutio, qua sic satis græce, luculenter autem sciat latine. Hic fere de Præceptorum electione sermo erit aliquanto longior instituendus, deque eorum moribus, atque officiis, utque his mutuo discipulum deceat respondere. Non illos pudeat fateri nescire quæ nesciant; pudeat potius quæ unos se existiment scire, ea non candide communicare. Perspicue doceant, atque distinge. Ingeniorum discrimina intelligant, & ut cujusque natura feret, in hoc frenis, in eo calcaribus uti sciant. Discipulos sive domi, sive in publico exercent, jejuna concertatione verborum digladiari, nunquam sinant, neque eos educent contentionis cupidiores, quam veritatis. Hæc, & alia hujusmodi quæ in Præceptorum delectu spectari cupio, cum satis ostendero, tum quæ ipsos Præceptores prima omnium præstare discipulis malim, demonstrabo. Quorum hæc fere summa est. Ut infantia falsas opiniones, & præjudicia ex animo evellant. Ut fallaciis sensuum detectis, & erroribus maxime omnium communibus & pervagatis, contra hos inpolterum muniant. Ut nullius in verba, ne in sua quidem, jurare doceant. Non vetustatem, non novitatem, non consuetudinem admirari & sequi, sed unam, ubi ubi fuerit, veritatem. Hanc illos facile non assequi qui facile & e vestigio pronunciant, quique potius argumenta numerant, quam expendunt. Attamen non esse homini turpe se deceptum fateri; turpe esse, cum monitus fuerit, non fateri. Sed cum multo quidem & sapius, & facilius promptissimi homines, & præfidentes labantur, quam dubitantes, & hæ-



& hæsitantes, esse tamen ubi in hanc quoque partem peccetur, vel nimia videlicet cunctatione, vel scientiæ omnis, & veritatis desperatione.

7. His cum præceptis discipuli animus imbutus fuerit, tum auctor ero, ut ea tradantur axiomata, quæ possint pluribus addiscendis postea Facultatibus inservire. Quorum non pauca cum sint penitus in media Mathesi reclusa atque abdita, ad hanc ut primus gradus fiat, hortabor. Cujus quidem elementa, arithmeticam deinde, & geometricam partem, mechanicam quoque, & staticam, tum geographicam, hydrostaticam, opticam, dioptricam, & astronomicam præ cæteris commendabo. His autem sic erudiri puerum velim, ut quæ ad ipsas attinent, experimenta, quasque haberi in ipsis observationes continget, illo semper comite, atque adjutore habeantur. Idemque in Chymicis, idem in Botanicis, atque Anatomicis etiam laudabo, quarum nempe elementa artium jam tum puero tradenda censeo, ejusque avidæ, & prope vacuæ memoriæ eam vim nominum innumerabilem qua absterri solet adulta ætas, mature ingerendam. Et illa quidem puer ratione non observationes modo, & experimenta addiscet, sed quæ præterea in hisce excogitandis solertia, in capiendis dexteritas, in confirmandis sedulitas, in tradendis fides requiratur. His tot instructus adjumentis utilis multo, atque facilius cognoscet quæ ab acutissimis hominibus in tota sunt naturali Philosophia cogitata; quorum quæ probabilia magis fuerint, verique simillima, ea demum sub rerum historiis cumulatis, & ut fieri poterit, accuratis ita proponantur, ut liberum sit probabiliora indies, ut sit, occurrentia reponere, neque tamen philosophica illa commentatio idcirco invertatur, & commutetur universa. Neque interea admoveere aurem negligat divinarum Legum, & humanarum peritis: quos si palam audire non audeat, quod eorum Facultatibus nostra hæc medendi vis ne minima quidem societate conjuncta esse videatur; subauscultando tamen mihi excipiat eorum voces, & procul quid ajant, attendat; multos enim Medico incidere casus in quibus id juvet non neglexisse, cum ante a me indicatum est, tum alio loco demonstrabitur. Jam vero Dialecticis, & Rhetoricis dare operam licebit: quas a me doctrinas neque inconsulto, nec sine Auctore gravissimo in hoc tempus differri, tum planum fiet, cum quam illas emendatas velim, quam serias, quam actuosas, declarabo. Sed ut homines labore assiduo, & quotidiano assueti cum festorum dierum causa, aut voluntate sua ab opere interdum feriantur, ad pilam se, aut ad discum, aut ad metulas conferunt, aut etiam novum sibi ipsi aliquem excogitant in otio non inertem ludum, sic noster cum ab severioribus illis studiis quasi colligere se se volet atque reficere, subciviva hæc tempora haud aliâ in re utilius posuerit, quam in Philologia, & in Critica Facultate.

8. Locus hic erit nonnullorum querelis, & monitionibus occurrendi: me jam jamque memoraturum, quam multa & magna, & difficilia sint medentibus necessaria, horum industriam in plura studia non bene distraxisse, vel si mea ratione ad alia ista persequenda satis spatii relinquatur, me tamen nimis duras leges primis ætatibus imposuisse sic ut a me potius absterriat a Medicina cognoscenda, quam excitata, voluntatem discendi simul cum spe perdiscendi abjecturæ esse videantur. Quibus ego monitoribus sic respondebo: qui vulgari ista & quotidiana facultate sit contentus, eum nostras Institutiones nihil onerare, nihil distingere, nihil morari, quin quantum ex ipsis videbitur, sibi sumat, cætera eximio illi Medico & absolutissimo quem informamus, relinquat. Hujus interesse maxime qua mentis acie medicam rationem sit aspecturus, eadem rerum omnium vim naturamque prævidisse. In his tamen artibus non doceri a me tantum temporis, & laboris impendere, quantum ii qui ipsarum tractatione delectati nihil in vita sint aliud acturi; sed ex iis tantum arripere, & cursim gustare, quantum illi satis sit qui ad alium usum sit translaturus. Nec tempus illi nimis breve futurum, qui parce ipsum, ut nos docebitur, & sapienter dispensaverit, præsertim neque tardi, neque segnis ingenii, qualem quidem instituimus, juveni, neque uno utenti, sed pluribus eodem tempore Præceptoribus. Nam illud quoque

demonstrabimus, non confundi animum, ac fatigari quibusque in diversum tendentibus disciplinis, sed sicut in cibis, horum apta diversitate reficimur, unius assiduitatem fastidimus, ita in uno eodemque studio ingenium languescere, plurium certa mutatione recreari.

9. Quæ cum ita esse, ostenderimus, nihil, opinor, erit causæ cur non id quoque Medico futuro præcipiamus, ut inter hæc ipsa diversa studia, jam nunc ea omnia ex ipsa Medicina prædiscent quæcunque poterunt illis cum studiis non difficile copulari. Nam cum illis quos ante diximus, Philologis, Mathematicis, Grammaticis operam dabit, quid prohibet, aut ab his libros utriusque linguæ explicari qui sint de re medica præclare, & eleganter conscripti, aut ab illis alteris in Opticis, atque Dioptricis quæ ad oculorum pertinent morbos, paulo uberius exponi, aut denique ab illis prioribus Antiquorum pondera, atque mensuras, balnea, artemque gymnasticam potillimum indagari? Hæc ergo, & hujusmodi alia quæ nostro liceat quasi aliud agenti de rebus Medicis prænovisse, a me diligenter indicabuntur.

10. Post quæ velut novum erit sumendum exordium, & ( quæ altera hujus orationis pars est ) ad Medici officia transeundum, ac primum quando tradendus Medico Præceptor sit adolescens, dicendum. Secundum hoc, breviter disquiretur, an summo protinus optimoque sit tradendus. Monebimus, ne quis se allici patiatur magnificis eorum Magistrorum pollicitationibus, qui intra sex mentes, ( quod olim Thessalum illum Medicum, & huic propioremem memoriæ Paracelsum fecisse, accepimus ) medendi rationem se tradituros universam, promittant. Porro qui empiricam Artem, non rationalem, profiteantur, hos quoque minime titonibus esse audiendos. Quinam deinde Scriptores, & qua singuli sint ratione prælegendi. Quis in unaquaque Artis dictanda regula, præceptisque sit modus; neque enim quasi quasdam leges immutabili necessitate constrictas medendi studiosis esse ferendas, sed ex quibus pro variis causis, temporibus, ætatibus, & cæteris quæ sunt hujusmodi, conditionibus aliqua mutare usus, studium, consilium, & quod est caput, prudentia possit. Illud vero etiam atque etiam monebimus, ut diligentissime Præceptor videat quo sua quemque natura maxime impellere videatur; operæ namque pretium faciet, si ad cujusque ingenium ita suam institutionem accommodet, ut de prædidenti audacique animo tantum detrahat, quantum diffidenti, & nimis timido adjiciat.

11. Hic tandem ad Institutiones istas communes & pervagatas aggrediemur. Quæ quidem perquam breviter a me perstringentur, non quo illa non probem quæ tot, tantique medendi Artifices, & Doctores reliquerunt; sed cum illa pateant, in promptuque sint omnibus ( extant enim innumerabiles de iisdem libri neque abditæ, neque obscuri ) neque ea tractatione meâ aut copiosius explicari, aut planius exprimi possint, nemo a me expectabit, ut opinor, ut in re nota & pervulgata multus velim & ineptus audire. Siqua igitur in illis Institutionibus aut addenda, aut mutanda, aut vero omittenda, præsertim de expertorum Magistrorum consilio, videbuntur, hæc paulo uberius memorabimus, reliqua perbreve attingemus. In quibus profecto erit Medicinæ etymon, & quid illa sit, aut quis ejus finis, atque utilitas, sitne ars, & ex quo genere, & quæ sit ei subjecta materies. Sed plura aliquanto verba faciemus de illius origine, factisque progressibus, deque spe futurorum, de primis Auctoribus, & de Sectis, & qui in unaquaque familiam ducant.

12. Postea vero quam res illas, deque theoreticis methodis nonnulla tradiderimus, Artemque omnem Medicam in quinque divisam esse partes, cum ex his primam percurreremus, tum quædam ad Anatomen, utilitatemque ipsius spectantia non reticebimus. Hinc alteram, quæ de Morbis est, partem dialectice tradendam esse, negabimus; medice vero, & firme, & perspicue sic ut melius tertiæ, quæ est de Signis, inservire possit, docebimus. Quartæ autem, quæ Servatrix est, parti cum historiam medicam ventorum accurate scriptam, tum de vita producenda libellum commode adjungenda commemorabimus. Sed in nulla tandiu quam in ea quæ Curatrix est, quinta parte im-

morabi-



morabimur. In qua primum de medendi methodo verba faciemus, illi nempe capitibus unde omnia ad omnem curationem præsidia ducuntur. Tum de re herbaria, de pharmaceutica, de chymica: quo in loco non pauca hortabimur, & aliqua ex parte suscipiemus: Ut tironibus præcepta, cautionesque tradantur, quæ in quibus dandis medicamentis sint attendenda, quæ prospicienda, quæ vitanda; tum vero quæ quibus mixtis novæ, & inexpectatæ vires oriantur. Ut genere indicationum universo nova quadam methodo in species certas partito, ut nulla, quantum fieri licebit, aut omittatur, aut redundet, sua singulis speciebus remedia assignentur & simplicia, & permixta, & prompta, & conquisita, quanquam simplicia, & prompta magis, sed tamen permixta etiam, & conquisita, omnia autem usu probata, sic ut simul ac posita sit indicatio, habeant tirones quo se referant unde statim expetita possint medicamenta depromere. Ut neque de specificis, quæ vocant, remediis, quæ utinam tot haberemus quot haberi dicuntur, neque de novis, & incognitis fileatur, sed viæ rationesque tradantur quibus utrorumque natura & vires investigentur. Postremo ut de medicamentorum numero, deque ponderum ratione finienda, hoc est, de formulis remediorum scribendis fideliter, ac dilucide præcipiatur.

13. Hæc in tradendis Institutionibus proponemus. Erunt & quæ in tradendis cujusque Morbi Curationibus proponamus. Et primum quem ordinem præstet servare, & quam viam tenere. An longiorem hanc, sed celebratam magis & tritam. An breviorē illam, & compendiarīam, in qua plerisque morbis in certa genera contractis, ut puta Doloris, Inflammationis, Defluxionis, & hujusmodi aliorum, tum communia in genus unumquodque, non vero in morbos singulos singula medendi genera præcipiuntur. Deinde negabimus, ullius morbi naturam, & causas sine respondentibus cadaverum dissectionibus, curationem vero sine cautionibus, præceptisque peculiaribus esse proponendam. Præterea dispiciemus, facturi ne operæ pretium sint qui separatim tradere instituunt de morbis qui fluidas tantum afficiunt partes, quique tantum solidas, & qui utrasque; tum de acutis, & longis; tum de penitus alicui parti insidentibus, & distantia ac diversa membra in consensum trahentibus; tum de ingentis, & in his hereditariis; de implicitis, & in his inter se pugnantibus; de se se in morbos alios vertentibus; de redeuntibus; de vernis, æstivis, autumnalibus, hibernis; de senilibus tandem, virilibus, juvenilibus; nam pueriles quidem, itemque muliebres jamdiu separatim tractari video; artificum autem morbos, & cuique vitæ generi peculiare ab reliquis neque ita pridem, & magna cum laude junctos esse, cum uspiam, tum vero hic potissimum non ignoratur. Nec dubium est, eos quoque morbos qui ab animi affectibus oriuntur, seorsum esse proponendos, omnes vero qui ad Chirurgiam pertinent, longe est evidentissimum. Sed ut de his morbis omnibus tradendum erit, sic de rebus etiam duabus, quarum altera illos præcedere, altera subsequi non raro solet, minime erit reticendum, de parvis morborum initiis, horumque remediis, & de illis qui tarde ex morbis convalescunt, quam mature confirmandis.

14. Quoniam vero cuncta hæc medicinæ præcepta sicut cognitioni sunt necessaria, ita non satis ad vim medendi valent, nisi illis firma quædam facilitas, seu medicus habitus accesserit; hunc autem consequimur legendo, audiendo, observando, colloquendo, cogitando, scribendo, imitando, & quod unum tandem plurimum potest, medendo; idcirco de his omnibus ex ordine præcipiemus. Et primum qua in parte medicinæ quis præter cæteros seu vetustus, seu novus Auctor excellat: quid in hisce ipsis cavendum; ut æquus animus, ut liber non minus ad lectionem, quam ad reliqua quæ percurreremus, sit afferendus. Hinc quos audire, quos sectari conducat. Quid, & qua ratione, & quo etiam in loco observandum. Urbes namque celeberrimas malim pharmaceuticis, chymicisque tabernis instructissimas, & in quibus publice a medicis, non tantum pluribus, sed alia aliis in facienda medicina sequentibus, alia vitantibus, ægrotantium corpora manu, pharmacis, victus ratione curentur, denatorum cadavera incidantur. Neque his modo, etsi

magna, & permulta sunt, esse tamen contentus poterit summus ille quem formo, Medicus, nisi præterea longe lateque peregrinetur, in castris versetur, & cum hæc omnia legerit, audiverit, observarit, doctis cum amicis, & æqualibus conferat, atque ita se exerceat, ut quæ sibi mox agenda sint ad ægrorum lectulos, jam nunc exercitatione quasi ludicrâ prædiscat, & meditetur. Cujus ita exercitationis præcepta dabo, ut eam maxime comprobem in qua ex Hippocraticis morborum popularium, aliisque hujusmodi accuratis historiis cujusque ægrotantis casum uno sociorum articulatim proponente, medicam cæteri, ut mos est, consultationem instituunt, tum quæ ipsi præceperint, atque prædixerint, cum Auctoris tandem curatione, & ægrotationis illius exitu studiose contendant: quod cum in morbis plerisque omnibus, tum in his præcipue quorum vi subita ante æger confici, quam imparatus Medicus meditari sat possit, etiam atque etiam commendabo. Dies præterea nullus sit cujus certa pars in acerrima atque attentissima cogitatione non ponatur. Ea cogitatione pridie lecta, audita, observata, disputata versare atque agitare, ex versatis autem atque agitatæ dubia excipere, & memoranda oportebit, illa ulterius excutienda, hæc penitus memoriæ tradenda, utraque continuo in adversaria conjicienda.

Post hæc de optimo medendi genere tantum dicere conabimur, quantum nostro adolescenti satis sit ad unum aliquem tum ex iis qui fuerunt, tum ex his qui sunt adhuc, Medicis quem imitetur, eligendum. Quem tamen quoniam ita sibi proponere ad imitandum debet, ut longe illum multumque superare nitatur, idcirco protinus de cauta imitatione verba faciemus.

15. Quibus absolutis, ac nonnullis hoc loco interjectis de Assistentis Medici officiis, de medendi Potestate, ac ejus Insignibus promerendis, & de prudentia, cæterisque virtutibus ad artis usum necessariis, aliquando ad curandos ægros (quæ postrema hujus orationis pars erat) mittemus illum quem instituimus, Medicum sic tamen, ut certas quasdam admonitiones, quali comites, adjungamus. Et illud primum videntum erit: quod sit incipiendi medicinam facere tempus, ad medicum quidem quod attinet, num illud quod ætas denique affert, an illud potius quod obstudium, & diligentiam interdum quoque præcurrit ætatem; quod autem ad morbos pertinet, illud certe quo morbi faciles, & tutissimi dominantur. Hinc quæ in suscipiendis curationibus sint observanda, quæ in excogitandis, quæ in adhibendis. Non ea mihi convellere adoriatur quæ non possint removeri; levamen tantummodo hic promittet, & interitus prolationem. Non plures mihi ægrotantes suscipiet, quam quibus singulis summa cura possit consulere. Nihil in his paulo notabilius dimittet quod non suæ meditationi subiciat, nihil quod in ephemeridem suam non referat. Nunquam ægrotantes, atque domesticos aptis, cautissime prædictionibus, Chirurgorum autem famulos, obstetrices, pharmacopolas, cæterosque ministros, artis, & muneris quemque sui eminenti præstantique peritia in officio non retinebit. Hæc præterea admonetur. Ne quid noceat. Ut ab levioribus, quandoque liceat, auxiliis ordiatur. Ut perraro ad remedia vehementia decurrat, annis præsertim primis; sed quam poterit mitioribus, atque paucioribus sit contentus. Ne statim plerumque mutet, si quæ non statim profuere; contra aliquando aliud continuo, atque aliud experiatur. Quoniam quiescere præstet tempore; quoniam movere. Quoniam imitari, aut sequi naturam; quoniam morari, vel anteire. Quoniam sit, aut non sit tritis Artis præceptionibus utendum. Quid agendum in novis morbis, quid in latentibus, & ad tempus incognitis. Quando denique, & qui sint in consilium adhibendi, & quemadmodum Consultationes & coram, & per litteras instituendæ.

16. Hæc cum fuero exsecutus, non hic Medicum quem fingo, deferam, sed per omnia quæ quidem cadere in ipsum possunt, munera atque officia deducam. Non de Medici Conducti, non de Archiatri, non de Collegiis adscripti, non de Professoris publici officio ac partibus reticebo. Quanquam ita hoc loco interpellari me posse intelligo, quasi hæc omnia ut complexurum me verbis spero, sic facultate esse jam complexum existimarem. Ego vero, cujus tantum ab omni



omni arrogantia ingenium, voluntasque abhorrent, quantum debent; debent autem maxime; etsi ab nemine æquo, & intelligente homine ita interpellari me posse, scio propterea quod & quo, & quibus fretus adjumentis intendam, satis est ante declaratum; tamen si quis forte sic interpellat, is sibi hoc persuadeat, velim, me non multo secus facturum, cum de Medico absolutissimo, cunctisque ejus partibus disputabo, ac facerem, si esset mihi de Pictore dicendum: negarem enim, posse eum satisfacere in tabulis, nisi recte lineamenta describere, nisi cui pigmento quod pigmentum deceat apponere, didicisset; neque ea cum dicerem, me esse pictorem necesse esset, sed fortasse non stultum alieni artificii existimatorem. Similiter ea cum attigero, non quid ego, sed quid ille possit eximius, quem cupio, Medicus, si modo quis esset, aut si etiam unquam fuisset, aut vero si esse posset, haud scio an feliciter, certe diligenter adumbrabo.

17. Nunc ad vos, Auditores æquissimi, doctissimi-que, & ad institutum revertens meum; quoniam usu Medicis non raro venit, ut non modo a privato quoque homine, sed a Magistratibus utriusque Fori consulantur partim de superstitione, de miraculis, de fascinatione, de mutilatis, de monstris, de notis virginibus, de jejuniis, & sacrarum precum ex formula recitandarum, vel audiendarum, & conjugalium tandem legum observandarum potestate; alias de aere, aquis, rebusque cibariis, de peste, & contagione, de legitimo partus tempore, de amentia, de icibus, & vulneribus, de veneficiis, de morbis denique vel simulatis, vel redhibitioni locum facientibus, vel tormenta questionisque prohibentibus; quoniam, inquam, de his omnibus sæpe Medici responsum quaeritur, Nostrum ego, ut scite illud dare, & prudenter possit, certis quibusdam præceptionibus informabo: quas si ignoret, alterutrum, quandocumque consultus fuerit, necesse erit, aut tempus habeat cognoscendis non solum rebus quæ in questione versentur, sed multis præterea, & variis, & ab nostra penitus Facultate sejunctis, aut videatur sibi in novum terrarum orbem esse delatus.

18. Sed hæc omnia quæ nostro hæcenus laudavimus Medico, ut multa sint, ut præclara, ut reipublicæ conducibilia, finibus tamen angustis sane & exiguis continentur, si cum ea laude utilitateque conferantur quam scientia affert, digna, & profutura tradendi litteris, ac memoriæ cunctorum hominum sempiternæ. Quamobrem non ante nostris Institutionibus finem faciemus, quam diligenter videamus, quæ sint Medico potissimum, & quemadmodum scribenda. Illud autem primum ponemus: cum minime possit is quem sæpe diximus, Medicus perfectus & absolutus existere, nisi Medicina, quantum valent hominum vires, ipsa perficiatur, illius maxime interesse, quæcumque egerit, nedum scripserit, huc tendere & spectare universa, ut ea quæ Arti desunt, cumulatissime adjiciantur. Namque, ut propositum non assequatur, falsa tamen deprehendendo, & vera detegendo, multa Arti, multa sibi & subsidia addet, & ornamenta comparabit. Sed cum illi primum removenda sint omnia quæcumque obstant, & impediunt, hæc a me diligenter indicabuntur, & in his universalium, abstractarumque ab rebus meditationum velut præcox, & multo major quam utile sit rebus publicis, consecratio, propter quam laudabilis ille mos, & aphorismos, & historias, & observationes simplices, ac nudas scribendi longo est intervallo prætermittitur, tum imprudens illa ratio res longe abstrusiores, aut etiam majores investigandi, quam ut hominum possint sensu, aut cogitatione comprehendere, quarum utinam notitiam aliquam habere possemus; sed domina Natura est.

Porro cum ex hisce rebus quarum tractationes desideramus, non paucas ante indicaverimus, ubi de vulgaris Institutionibus, deque Morborum Curationibus locuti sumus, nonnullas hic addere satis erit, & primum rectam causarum quibus morbi continentur, inquisitionem. Quæ quoniam nulla aptius via, quam morborum & cadaverum sectionibus, & fluidorum observationibus indagantur, de his recte instituendis, seligendis, digerendis verba faciemus: quas cum ad cæteras, tum vero imprimis ad cognoscendas infantium ægrotationes commendabimus, ut quibus natura suos posse indicare morbos negavit, illos ars, quasi oppor-

tuna, & amica interpretes, ne deficiat. Hæc præterea desiderabimus. Ut Medicus quisque det operam, ne in civium suorum morbis, patriæque idoneo mendi genere hospes sit, & si qua valetudinum, si qua præsidiorum genera cum rara sint, aut pene ignota cæteris gentibus, suæ tamen regioni sint frequentissima, ea litteris prodat, & memoriæ posteritatis propaget. Ut in ea quam institui posuimus, de longis morbis tractatione, in quibus quidem curandis multo plus sane quid Medicus, quam quid valeat fortuna, perspicitur, quod in morbo quæ sit aptior ægrotantibus regio, diligenter commemoretur. Ut non minus de novis remediis, quam de novis morbis, deque his inclinatis, utque sic dicam, senescentibus, de non ita bene tractatis, de neglectis, atque omissis, de abditis, & cognitu difficilibus non difficulter cognoscendis, de illis demum qui vulgo insanabiles existimantur, & eorum tamen, quandocumque successerint, curationibus tradatur. Quibus, atque aliis præterea hujusmodi quæ in Institutionibus enumerabimus, si diversarum, & pugnantium, in Artis præsertim activa parte, sententiarum conciliatio accedat, interea possit ferri tolerabilius cumulata Artis perfectionis desiderium.

19. Sed quidquid Medicus scribere instituet, mihi quidem & latina, & eleganti, & pressa moderate, non redundante ac superflue, oratione conscribet; latina, ut pluribus longe lateque intelligatur; eleganti, ut vel fastidii, vel melioris alieno sub nomine paraphrasis; non superflue, ut vel tædii, vel epitomes metuenda Auctoribus pericula effugiat. Et hæc quidem generatim. Sigillatim vero trademus de scribendis Medico Præceptionibus, Meditationibus, Historiis, deque his sæpe utili, aptaque delineatione Figurarum, de Criticis, & Apologeticis Scripturis, de bonis libris ex peregrina, aut barbara in linguam latinam convertendis, de antiquis denique tum incertis dignoscendis, tum mendosis restituendis.

20. Postremo quod cessandi tempus capere, & quæ, hoc capto, præstanti summoque Medico novissima studia convenient, in extrema Institutionum nostrarum parte disputabitur. Sed, ut ego ante dicendi finem faciam, quam vos me benigne, attenteque audiendi; quid in tota hac parte sim habiturus, malo in vestris cogitationibus relinquere, quam in oratione mea ponere.

21. Atque de eximio Medico instituendo edidi quæ potui, non ut volui, sed ut me temporis angustia coegerunt. Quæ tametsi strictim quasi per transennam prætereuntes aspexistis, primum nihilominus vos hortabor, diligentissimi Adolescentes, ut si illam præclaram, & eximiam speciem Perfecti Medici adamasitis, tantum illi consequendæ, operæ studique navetis, quantum me sedulitatis, & officiorum omni tempore in vos conferre, sentietis. A vobis autem, quos & singulos, & universos præcipuo semper honore prosequar, Collegæ Sapientissimi, illud majorem in modum peto, ut, si arduum quod institui, & perdifficile Opus non improbatis, mecum suscipere non gravemini. Sin vos, alios longa vita, & in studiis consumpta, partim usus rerum maximarum docet, me ab impari onere absterere, vestris monitis, consiliisque parebo, contentus, ideam Operis primis tantum lineis descriptam exhibuisse, quam alii olim me longe meliores, non (quod ego polliceri possem) paulo distinctius adumbrare, sed implere, informare, & numeris omnibus absolvere fortasse conentur. Quod superest, a TE etiam atque etiam quæso, JOANNES CORRARI, Generis Splendore, & Virtutum omnium quæ in Virum Principem cadunt, Præstantia Ornatissime, hujusque Præclarissimæ Urbis Præfecte, ac Proprætor Meritissime, ut pro Tua ista patria, & domestica Humanitate orationi des veniam meæ, quod cum Tua tempora, tum publica, quibus ea tribuis, commoda paulo diutius sit morata. DEUM vero Optimum Maximum precor, ut si Augustissimo VENETORUM SENATUI, Amplissimisque Rei Litterariæ TRIUMVIRIS, a quibus hoc mihi est Munus honestissimum, gravissimumque concreditum, si iis, inquam, me videt gratias quidem agere tantas non posse, quantas debeo, sed tamen quantas maximas possum capere, & nunc habere, & esse habiturum, dum vivam; tum faxit, ut mihi dignæ Munere, dignæ TRIUMVIRIS, dignæ SENATU hæc, quas hodie cœpi, Perfecti Medici Institutiones proveniant.



J. O. BAPT. MORGAGNI  
DE VIA ATQUE ORDINE AB SE IN TRADENDA  
PUBLICE MEDICINA ET ANATOMIE SERVATO  
E P I S T O L A.

Joannes Baptista Morgagnus Antonio Larber, nuperrime ad dignitatem Archiatri Bassanensis erecto, S. P. D.

**Q**Uando non fatistibi est, carissime Antoni, quæ five in Nosocomio, five in Theatro doceo, assidue annis superioribus, cum hic degeres, audivisse, sed & ea cognoscere cupis quæ, antequam nascereris, de Re Medica primum, tum de Anatomica hic publice tradere consueffem; utinam satis facere possem voluntati tuæ. Verum quæ possim? cum ex tempore, ut probe nosti, dicere solitus, vix summa quædam Exercitationum capita scriptis commiserim. Dices, at viam saltem, atque ordinem quem tenebas, fac sciam. Si hoc es contentus; paucis accipe.

Qui libri hic essent more Majorum a Theoricæ Medicinæ Doctoribus interpretandi, non ignoras, Prima Fen Primi Canonis Avicennæ, Galeni Ars Medica, Hippocratis Aphorismi. Duos ego primos non tam mihi esse traditos ad interpretandum, censebam, quam ad argumenta capienda eorum quæ ab homine veri, & auditorum utilitatis studio tractanda essent, & expendenda. Itaque ubi illius, & hujus Auctoris sententiam breviter, & quantum fieri per me posset, perspicue exposueram; continuo illuc transibam, ut fufius inquirerem, de iisdem quas olim Avicennas, aut Galenus scripserat, rebus quid ille, aut hic alter esset post nova tot inventa, & experimenta sensurus,

*si foret hoc nostrum fato dilatus in ævum.*

Sic mihi occasio dabatur quæ posteris fecus, & cur docuissent, proponendi, & ex pluribus, variisque inter se collatis sententiis quæ veri similior videretur, ingenue, modesteque indicandi. Ex Avicennæ igitur libro argumenta hauriebam, ut singula Physiologiæ capita, ex Galeni autem libello, ut reliquis exponerem Institutionum Medicarum Partes. In quibus memini, cum de Signis agerem, & de Urinis præsertim, ac Pulsibus, sic me instruxisse discipulos, ut quæ sunt ante illarum inspectionem, aut horum explorationem scienda, & quæ dum inspiciuntur, aut explorantur, animadvertenda, & quæ demum post inspectionem, aut explorationem deducenda, partite, accurateque docerem. Sed neque in cæteris Institutionum Partibus quod in ipsa potissimum Physiologia feceram, alios quosdam, non longos quidem, sed dilucidos, utilesque tractatus interfere non omittebam. Itaque efficiebam, ut cum denique ad eum annum venissem, quo erant Aphorismi Hippocratis interpretandi, brevis esse possem in theoricis explicationibus, quippe ab iis quæ super Galeno, & Avicenna jam tradideram, pendentibus, ut paucis indicare verbis, atque applicare ad Hippocratis doctrinam liceret: unde, cohærente docendi ordine, simul per illa hæc illustraretur, simulque per hanc illa confirmarentur.

Sed cum sicuti in duos illos Auctores, ita in Hippocratem jam præfatus, de singulis tria ostendissem, quis fuisset Scriptor, qualis esset liber, & qua ratione interpretandus; de hac præsertim, quod ad Hippocratem attineret, sic statueram, primum omnium videndum esse, quo ad ejus fieri posset, ut quæ revera ejus essent, aut non essent verba, variantibus interdum lectionibus, dignosceremus. Qua in re non parum quidem, post Galenum, doctissimis illis Interpretibus tribuebam, qui avorum nostrorum tempore florere, sed multo plus Cornelio Celso, ut cui in Romanis Bibliothecis vetustiorum codicum fuisset copia, nec diligentia in latine reddendis aphorismis quam

plurimis defuisset, nemini tamen plus, quam ipsi Hippocrati, quotiescumque aliis in libris (id quod sæpe accidit) eadem quæ in hoc, & fufius aliquando, clariusque, proposuisset. Quin etiam in hoc ipso libro, nec raro, accidere censebam, ut Auctoris sententia, alios cum aliis aphorismis conferendo, eluceret. Quam non modo ob causam, verum insuper ut interpretatio brevior fieret, institueram uno proposito aphorismo, cæteros qui ad genus idem rerum spectarent, quasi corollaria, subjicere. Quod faciendi ut Sectio ipsa Prima commode mihi occasionem præbebat; sic ex ejus aphorismis continuo tibi exempla dabo.

Cum enim secundus de alvi fluxibus sit, & vomitibus; illo explicato, quicumque toto libro de illa, aut de hac evacuatione sunt, primum spontanea, tum a Medico instituta, quo meliori poterant ordine a me dispositi, proferebantur. Sic & tertius aphorismus, ut est ad missionem sanguinis referendus, ita alios de effusione sanguinis non a Medicis solum, sed etiam ab natura ipsa facta, ut porro proponerem, suadebat. Cum vero ad quartum perveneram, qui de tertio quasi fonte remediorum, victus ratione, scriptus est; reliquos producebam ad eandem pertinentes. Nec deerant in secundo, & decimo tertio quæ de ætatibus, & quæ de anni temporibus mentionem injiciendo, ad Sectionis tertiæ aphorismos explicandos viam aperirent, ut neque in duodecimo quæ urinas, & sudores memorando, alios atque alios exponendi ansam præberent, & cum his jungendi qui ad crises æstimandas attinent, & qui ad prædicendas. Jam vero intelligis, cum in aphorismum inciderem, qui ad bona, aut mala in morbis indicia, aut ad morborum durationem, recidivam, successiones, curationem, aut ad certum quoddam morborum genus spectaret, quid mihi de cæteris ejusdemmodi aphorismis faciendum censerem. Reliqua addere omitto, quippe ad eandem normam.

Interea autem dum hæc in Gymnasio, & domi auditores docerem meos, si quid forte daretur otii, aut illas, quas needum vulgaveram, anatomicas observationes cum Veterum, & Recentiorum Scriptis conferre pergebam, aut Novæ (quod pariter promiseram) Institutionum Medicarum Idææ non oblitus, quæ me ad earum libros perscribendos juvare possent, colligebam, donec quarto anno in tradenda Medicina insumpto, docere Anatomen jussus sum, vix mensium trium spatio dato, non tam ad me, quam ad alia, in primisque ad Profectorem assidua exercitatione, meoque exemplo, ut plura quæ hic ostendi, aut sic ostendi non consueverant, administrare posset, diligenter parandum. Itaque procæmium illud, a te aliquando apud me lectum, quo sum prima die in Theatro usus, non magis procæmium fuit, quam veracissima excusatio. Eamque continuo, & postridie demonstrationes sunt consecutæ Elementorum Anatomies illas ob causas quas in Alteris Adversariis (a) indicatas vides. Id institutum semper deinceps retinui, ut quotannis, si non in Theatro, at domi, aut in Nosocomio antea ostenderem, explicaremque Elementa illa, quam totius humani corporis anatomen docerem. Illis præterea post demonstrata cursim ossa, doctrinam de articulis addebam, & vasorum, nervorumque, ut per collum, thoracem, ventrem feruntur, suis in sedibus ostensionem, haud ignorans, quantum præstet simul universa demon-



demonstrare priusquam aut truncata, & divisa in partes, suis cum visceribus proponantur, aut, si non divisa, tabulæ, uti solebant, agglutinata, & sicca, ut neque singulorum sedes, neque situs, neque habitus insipientibus appareat. Sed hæc omnia, quippe a me ad hoc usque tempus nunquam omissa, vidisti ipse, atque alia insuper, nempe cum veritus, ne quædam satis possim in Theatro ostendere, in Nosocomio præmonstro.

Ordinem quoque in Anatome tradenda animadvertere potuisti a me ferme conservari Veslingianum. Accidit tamen prioribus illis annis aliquando, ut propter idoneorum cadaverum inopiam coactus sim, ne tempus lege præfinitum elaberetur, longe alium ordinem sequi, sic tamen, ut omnia connexa atque apta inter se viderentur. Itaque ab Ossibus nonnunquam, interdum a Fœtu, non semel a Capite initium duxi. Quin secundo anno cum prospicerem, tempus mihi ad docendum datum tot non suffecturum Exercitationibus, quot habere consuevi; experiri volui, an breviori ordine possem omnia comprehendere. Igitur a Cerebro, & Spinali Medulla incipiens, per nervos ad singula tum organa sensuum, tum motus instrumenta ducebar, hæcque non externa solum, verum etiam interna, ut quæ edendæ voci, quæ sanguini in gyrum agendo, quæ conficiendis, diducendisque alimentis, quæ recrementis eliminandis, quæ hominum generi propagando inserviunt; quid multis opus est? ad singulas partes, atque adeo particulas totius corporis novo hoc neque ineleganti, neque ita prolixo, sed laborem non mediocrem, nimiamque animi attentionem requirente, hoc, inquam, ordine perveniebam. Quamobrem eo semel usus, alterius illius qui a corde per arterias ad partes singulas ferret, periculum facere nunquam volui. Sed cum denique nec angustia temporis, nec cadaverum inopia me amplius prohibuerunt quem tum auditoribus faciliorem, tum mihi etiam commodiorem esse ordinem, censerem, eum sequi; ab illo quem dixi, hic post Veslingium usitatiores, non discessi.

Neque eandem tamen in ejusdem argumenti Exercitationibus rerum distributionem quotannis placuit instituere, neque easdem ex earundem Partium historia animadversiones, eademque monita seu theórica, seu practica deducere; sed quantum quidem potui, semper nova quasi veste historiam indui: historiamque ipsam auxi subinde, aut illustravi. Quæ ut præstarem, magno mihi adjumento fuerunt non meæ dumtaxat observationes, verum etiam alienæ. Has enim, ex recens editis libris depromptas meis auditoribus proponere consuevi, Auctoribus diserte indicatis, atque laudatis; quamvis non omnes semper probare, aut accipere possem observationes, vel quod repetitæ non respondissent, vel quod necdum satis spatii ad repetendum habuissem. Assensum autem cohibuisse, me nunquam pœnituit, cum annis insequentibus tutius aut confirmare liceret, aut non meis tantum, sed & aliorum iteratis frustra experimentis, deferere.

Ex his omnibus intelligis, quid factum sit, ut cum de eodem quotannis humano corpore idem ego, eodemque in Theatro septies jam, & quadragesies sermonem habuerim; frequens semper Theatrum fuerit, iis quoque, ut nosti, ad audiendum redeuntibus, quorum non pauci annis jam multis continenter interfuissent. Intelligis pariter, cur nunquam mihi grave, imo potius gratum fuerit, quod illorum plures, alii aliis annis, singula conati sint verba scribere docentis; non, ut prudentiores, sibi res tantummodo, sententiamque adnotare. Nam etsi illorum sedulitas hunc habuit exitum, ut cum persæpe non a verbis modo, sed ab sententia quoque aberrassent, eorum scripta, quæcunque mihi oblata sunt, pro approbatione quam speraverant, ingenuum a me iudicium illud retulerint, quod mea manu eorum chartis Virgilii verbis usus, allinendum esse, censui,

*Non sum adeo informis; nuper me in littore vidi,  
Cum placidum ventis flaret mare;*

etsi, inquam, res ipsis ex voluntate non successit; omnibus tamen quæ alio anno scripta fuerant, cum scriptis cæterorum annorum conferentibus manifestum esse potuit, quanto aliter singulis annis meas habuerim Exercitationes.

Quod ut fieret, haud raro insuper causæ accedebant quæ ex parte id poscerent, ut puta, alia ac plerumque solet, viscerum, muscutorum, vasorum sedes, aut alia forma, aliæve numerus: in quæ nunquam incidebam, quin mihi, aut aliis an idem videre, an sæpe, & quibus in corporibus accidisset, continuo referrem, & siquid forte deesset, unde id suppleri potuisset in viventibus. Neque aliter me gerebam, si non ab ortu, sed a morbo aliquo, rariore præsertim, mutatae Partes occurrebant. Verum hæc partim, cum adesses, audivisti, partim in libris invenies meis. Alia autem fortasse in schedis extant, ut quæ præfanda, aut attexenda iis Exercitationibus fuerunt quibus interesse placuit Amplissimis Viris qui pro Augusta Venetorum Republica huic præerant Civitati. Ea vero, quantum memini, cum vix aliud sint, quam meritæ aut laudationes, aut gratiarum actiones; minime ad id pertinent quod ex me quæris curiosene magis dicam, an amanter? quam nimirum viam in docendo tenuerim. Utcunque autem illæ scriptiunculæ se habent meæ; veniens huc aliquando poteris, si forte volueris, in magno, quem apud me sæpe vidisti, acervo chartarum quærere, in quibus videlicet quidquid pro re nata properanter scriptitavi, nec relegi unquam, nec amplius relegam. *Annus enim octogesimaus*, ut olim M. Varronem (b), ita nunc admonet me, ut longe alias sarcinas colligam ante quam proficiscar e vita. Quam dum tibi hac mea longiorem precor, simul precor & feliciorem. Vale.

Dabam Patavii Kal. Martiis CIO MDCC LXI.



JO. BAPT. MORGAGNI  
QUÆDAM PRÆLECTIONUM ANATOMICARUM  
PROEMIA.

*Cum primum ad Anatomen tradendam in Theatrum venisset XII. Kal. Februarii CIO DCCC XVI.*

**A**Ntequam de Re Anatomica ostendam ea, quæ ante omnia ostendenda arbitror, satisfaciam iis, qui forte ex voce, vultu, gestu, toto habitu corporis nunc mirantur, quid causæ sit, quamobrem initio dicendi commovear etiam vehementius, quam mea ferre consuetudo videatur.

Primum hæc novi loci nova species terret oculos, tum vero magis terret animum illa cogitatio, in eo me Gymnasio ad Anatomen tradendam aggredi, quo in Gymnasio Andreas Vesalius, Realdus Columbus, Gabriel Fallopius pene intermortuam apud omnes multis ante sæculis Doctrinam Anatomicam non modo in pristinam dignitatem restituerunt; sed ad multo etiam ampliorem provexerunt: Ex ea ipsa sede ingredi me dicere de Anatome, ex qua sede Hieronymus Fabricius, Julius Casserius, Adrianus Spigelius Anatomici Nobilissimi non minus hoc Theatrum laudatissimis Dissertationibus, quam universum terrarum orbem gloria magni nominis impleverunt; Ex ea, inquam, sede, ex qua, forte adsunt aliquot grandes natu, qui Joannem Veslingium audiverint, at quem Virum! Ex qua denique; ut de intermediis Professoribus Clarissimis fileam; audiverunt omnes eum qui me proxime antecessit, Michaelum Angelum Molinetum eruditissimum, ac disertissimum Virum, & ad hunc locum apprime factum; ut plus voluptatis ex sola ejus orationis ornatissimæ recordatione, quam ex omni meo sermone, capi queat.

Porro me illud etiam perturbat, quod cum his tot, tantisque, quibus succedo, Anatomicis non modo ætate, ingenio, auctoritate, gratia, sed ne ipsa quidem exercitatione sim comparandus. In hac enim Re primum mediocriter sum versatus: deinde siquem usum habui, dum intermissis dissectionibus, medicinam aut apud Cives meos facio, aut hic doceo, tot me anni non minus quam scalpellorum meorum aciem, retusum atque hebetem reddiderunt.

Accedit id quo gravius afficior, atque adeo vehementius angor, quæ res mihi, & cæteris ab omni alio adjumento destitutis, incredibili subsidio una solet esse, diligentia, nec ea quidem me juvari in præsentia posse. Nam cum diligentia, nisi tempus, & spatium datum sit, nihil valeat; tum ego neque satis habui temporis, & quantulumcunque habui, id prope omne coactus sum aliis atque aliis, & necessariis quidem, rebus tribuere.

Quibus ut omnibus valde sollicitor, sic illo demum conturbor maxime, Anatomen, non ut olim, esse adhuc paucarum scientiarum Partium, atque magnarum, ut vel sine assidua exercitatione, sine justa diligentia tradi possit; sed ex illis certis, & pervulgatis finibus nostra potissimum, & patrum memoria, tenuissimis, sed iisdem utilissimis, incrementis quotidie adauctam, prope in immensum excrevisse; ut si Vesalius iterum, & Fallopius existant, si Fabricius, si Casserius huc redeant, non possint tamen, nisi usu quotidiano freti, datoque longo ad comparandum se tempore, tantam vim novarum & particularum, & utilitatum pro

dignitate hujus loci, & recentioris Anatomæ edocere.

Hæ omnes causæ si, ut notissimæ sunt, ita mihi uni cognitæ, cæteris autem essent ignotæ; non modo perturbarer magis; sed oratio me ipsa deficeret. Nunc illud me recreat, atque confirmat, quod & in hunc locum adduxit, hæc quæ exposui, omnia omnibus nota, testata, manifesta & esse, & fuisse. Itaque siqui nihilominus me hortati sunt (hortati sunt autem plures & Proceres Summi, & Professores Gravissimi) ut vel in his tantis angustiis temporis huc venire ne dubitarem; si nihilominus de hac re Amplissimi Litterarii Triumviri ad Senatum referre voluerant; si nihilominus Augustus Senatus ita censuit; perspicuum, opinor, est, non ea demum in præsentia a me expectari quæ deberem; sed ea tantum quæ possum.

Quo magis æquum verumque est Benignitati erga me Publicæ, tribus intra quatuor hosce annos honestissimis Senatus Consultis, hoc autem præsertim novissimo testatæ, non modo immortales gratias & agendo, & habendo, sed prompte, ut jubeor, alacriterque parendo, respondere.

Siquid tamen perturbationis reliquum est, id omne paulatim eximit præsentia eorum a quibus tam benigne, attenteque audior. Agnosco enim (quod a principio haud satis poteram) agnosco, inquam, magis magisque ora, oculosque singulorum. Intueor Professores, doctrina multum, & eloquentia, non minus tamen humanitate præstantes. Intueor Viros, intueor Adolescentes & Cives, & Exteros qua sanguine, qua dignitate, qua litteris, qua virtutibus ornatissimus. Hi quod in Gymnasio hoc florentissimo assidue versantur, homini favent, cujus, si minus reliquas facultates, at sedulitatem certe, & officia in se perspexere. Cæteros autem qui in hac Nobilissima, & Præstantissima Urbe orti, educatique sunt, & Viros, & Juvenes honestissimos eadem, ut accipio, esse voluntate & benevolentia in exterum, & prope adhuc ignotum hominem, nihil certe aliud cogit, nisi vis quædam, & consensus incredibilis insitæ, vel potius innatæ benignitatis: quam ut sponte sua Patavini Cives erga me susceperunt, sic ut semper retineant, cunctis grati, & obsequentis animi significationibus operam dabo.

Quod superest, Sapientissimum humani corporis Conditorum veneror Deum, ut si me non Novitatem, non Vetustatem, sed unam, ubi ubi invenero, Veritatem secuturum; si rejectis inanibus, & historica divini ejus Operis enarratione indignis, verborum calami stris, perspicua, & omnium, horumque in primis Juvenum captui accommodata oratione, & methodo usurum; si neque in longis, & hæc supervacuis controversiis tempus contriturum, neque ulla alia in re quidquam ostentationi, sed omnia publicæ utilitati, quæ ex una fidei, & plana subtilissimi ejus Operis demonstratione existit, daturum; si ita, inquam, animatum me videt; tum faxit, ut quod nunc incipio, bene, fauste, fortunate, feliciter absolvam.



*Proœmium ad Prælectionem de Oculo*

*eadem anno habitum postridie Idus Februarii coram Viris Amplissimis JOANNE A LEGE  
Prætoris & JOANNE PISAURO Equite Præfetto Patav.*

**Q**uando ita erga me benefici estis, Moderatores Amplissimi, ut quod pro officio, cujus omnes partes in hac Nobilissima Civitate gubernanda sancte, & diligenter expletis, præstare aliis mei Ordinis hominibus consuevistis, id pro vestra summa benignitate largiri mihi volueritis; oro, atque obsecro, ut quantum interfit inter me, atque eos ad quos audiendos alias in hoc Gymnasium venistis, vobiscum ipsi reputetis. Primum enim cum eorum nonnulli ætate, omnes ingenio, & eloquentia longe superiores sint; tum ego in eas angustias temporis compulsus sum, tot simul, tantisque aliis rebus, & iis quidem necessariis, distentus, novissime hoc tot dierum continenti labore defessus, ut si vel par illis essem, inferior tamen viderer, necesse foret. Accedit, quæ in eorum orationibus summopere placuerunt, ea mihi nē imitari quidem licere. Aliud enim est in Scientiam aliquam, Facultatemve præfari; aliud est eandem tradere. Illic decet genus orationis ornatum illud, & comptum, ad laudandum, ad hortandum, ad dele-

ctandum accommodatum. Illic sive novum mavis, sive elegans, sive grave, sive contractum, sive amplum, id licet argumentum seligere. Hic vero si quis eadem consecraretur; ineptis gratum fortasse faceret: sani quidem homines longe alia requirerent, primum ne ab demandato officio discederet, tum ut lucido ordine, perspicuis verbis, minus quoque interdum latinis, modo traditæ Scientiæ propriis, commendatis sibi Adolescentibus inserviret, postremo ut suam potius Facultatem novis observationibus, quam placendi artem novis rationibus auget. Quæ quoniam vobis, Gravissimi Senatores, quantum pro vestro ingenti utilitatis publicæ studio grata atque accepta, tantum pro vestra eximia Sapientia cognita & perspecta esse, scio; idcirco non confirmare verbis, sed re ipsa, quoad mediocritas quidem hæc mea poterit, præstare conabor.

Igitur de Organo Visus dicturus, ejus omnes partes in exteriores divido, & interiores, utque ordo, quem sequor, dissectionis postulat, incipio primum a primis.

*Proœmium ad Prælectionem de Corde*

*habitu anno MDCCXVIII. coram Viro Amplissimo FRANCISCO GARZONIO  
Præfetto, & Propatore Patav.*

**Q**uod Theatrum hoc Anatomicum præsentia tua, atque adeo illius, cujus geris personam, Principis majestate non indignum censueris, id Summo Viro Parenti tuo, Moderator Amplissime, acceptum refero. Ab illo enim, ut non modo Gravissimus Senator est, verum etiam Historicus, si quis alius, hac nostra ætate eruditissimus, haud semel acceperis; Pompejum quoque, & Tiberium, in sua Republica principes, audire Athenienses, & Rhodios Professores, tum etiam Romanos Consules Severum, atque Boethium adesse iis quæ a Galeno in Urbe habebantur, dissectionibus consuevisse. Quod autem eo potissimum die huc venire volueris, quo de Corde dicendum esset; hoc vero a tui animi magnitudine esse, video, qua domi forisque, ut Veneti, ac Bergomen-

ses præclare norunt, ut hæc modo Nobilissima Civitas experitur, nihil unquam, nisi optimum, nisi eximium, nisi præstantissimum, es consecutus. Et tanta quidem inter cæteras Partes Corporis præstantia, atque utilitas cordis est, ut si illæservari, si nutriri, si vivere, si denique suis quæque fungi muneribus debent; corde procul dubio carere non possint, a quo videlicet sanguinem, jugiter compulsus, & in gyrum actus per vias ab ipso corde in omnes, ut inquit Tullius, partes corporis pertinentes jugiter accipiant. Quem admirabilem circuitum, eximiamque adeo cordis utilitatem ut clarius breviusque cognoscas, illis de viis, hoc est de arteriis, & venis primum, tum de ipso corde verba faciam.

*Proœmium ad Prælectionem de Conformatione Fætus*

*habitu anno MDCCXIX. coram Viris Amplissimis DANIELE DELPHINO Equ. Prætoris, &  
FRANCISCO MAUROCENO Equ. Præfetto Patav.*

**Q**uod multum, ac sæpe optaveram, ut quando Augusto Venetorum Senatui pro ejus summis in me beneficiis coram, publiceque gratias agere non possem, at iis saltem quibus plurimum deberem, Senatoribus aliquando possem; id mihi cum Præstantissimæ hujus Urbis felicitate, tum ipsorum benignitate incredibili contigisse, maxime lætor. Nam tuo primum, Daniel Delphine, Eques, Senator, ac Prætor Amplissime, consilio, gratiæ, auctoritati non ea modo omnia debeo quæ Munificentissima vestra Respublica in me contulit ex quo in Florentissimum hoc Gymnasium vocavit; sed hoc ipsum quoque debeo quod vocavit.

Tibi vero, Francisce Maurocene, Eques, Senator, ac Præfecte Amplissime, quantum debeam, hinc facile intelligitur, quod ex quatuor intra hos paucos annos Senatus Consultis perhonorifice de me factis, cum

*Morgagni Opusc.*

postremum propter singularem; atque adeo inusitatam munificentiam longe sit omnium honorificentissimum; de eo faciendo ad Senatum retulit, quod per se est magnum, & antequam de re alia referret, quod est majus, & sua ipse sponte, quod est maximum, Michael Maurocenus Frater tuus, Vir Gravissimus, Triumphator Litterarius. Gratias igitur ago, quæ agi unæ possunt pro tantis in me beneficiis, publice, & quanta maxima possum voce prædicando, per quos acceperim: Quanquam id dum facio, non tam vobis gratias agere, quam gratificari mihi videor. Neque enim magna accepisse magnum est; sed per Magnos, & magni judicii Viros accepisse, id vero magnum est. Quod quidem iudicium, omnibus maxime verendum, ego præ cæteris, ut par est, in præsentia formidarem, si in me ornando augendoque ingenium, aut doctri-



nam, aut eloquentiam forte spectassent. Sed cum omnibus, mihiq; in primis manifestum sit, nihil in me aliud, nisi id quod est, laborem, diligentiam, studium, & promptam semper, ac supra vires paratissimam hisce optimis Adolescentibus inserviendi voluntatem Summos hujusmodi Viros, Publici Commodi, siqui alii, studiosissimos permovere potuisse; non est mihi dubitandum, quin satis ipsis facturus sim hodierna, cui perbenigne interesse voluerunt de conformatione Fœtus Dissertatione. In hoc enim longe o-

mnium abditissimo, ac difficillimo argumento id unum a me spectari, & cunctis viribus quæri, perspicient, ut quæ certa, quæ probabilia, quæ incerta, quæ falsa sint, ea & scire, & distinguere in posterum Adolescentes nostros, tum perspicua oratione, tum fideli demonstratione doceam.

Principio Dissertationem hanc divido in partes tres. In quarum prima de initio, in altera de progressu, in tertia de complemento conformationis Fœtus loquar.

### *Proœmium ad Prælectionem de Aure*

*habitu anno c13 1300 xxvi. coram Viro Amplissimo DOMINICO RUZZINO  
Pratore, & Proprafecto Patav.*

**P**ræsentia quidem tua, Moderator Amplissime, mihi semper jucundissima, atque honorificentissima, tantam lætitiæ voluptatem affert, quantam hæc tam benigna erga me voluntatis significatio debet afferre. Sed hoc mecum doleo, quod inopinatus adventus tuus nullam mihi facultatem relinquat ea pro dignitate præstandi quæ omnino debere me, sentio. Primum ut tibi immortales gratias agam, quod adventu hoc tuo me, & Anatomicum Theatrum mirifice honestaveris. Deinde ut tuam istam eximiam adversus omnes, & hoc præsertim Gymnasium, clementiam, beneficentiamque maximopere dilaudem, qua nimirum proxime ad illum accedis Deum, quem non religione modo, verum etiam vitæ integritate, justitia in omnes, providentia, istisque cæteris virtutibus colis, quæ cum antea in longe gravissimis, amplissimisque Reipublicæ administrationibus spectatæ, probatæque sunt, tum modo in hac Præstantissima Civitate gubernanda mirum quendam, &, nisi experiremur, incredibilem in modum elucent. Novissime, ut de

Summo Viro, cujus ipse imago es, Carolo Ruzino Equite, atque Ædis D. Marci Procuratore, Patruo tuo illa non omitam vel quæ tot, ac tam variæ Nationes, apud quas in maxime illustribus legationibus fuit, unanimes fatentur, vel quæ Gymnasium hoc nostrum & sæpe alias, & nunc feliciter ejus Prudentiæ, Sapientiæque commissum, una omnium voce deprædicat, vel quæ ipse præ cæteris debeo, qui; ut alia, neque ea mediocria, fileam; gravissimo in primis ejus iudicio in hac sum nobilissima sede collocatus. Cui si unquam iudicio aliqua ex parte respondere me posse cupii, se audiente potissimum cupio, si non ingenio, eloquentia, doctrina, quæ omnia in me sentio quam sint exigua, at industria, studio, diligentia huic mihi commendatæ studiosissimæ Juventuti inserviando: cui quam heri pollicitus eram, elegantissimi, ejusdemque utilissimi Organi Auditus anatomicam historiam, te annuente, ac auspiciis tua semper fausta, & felicia præbente, protinus exponam.

### *Proœmium ad Prælectionem de Oculo*

*habitu anno c13 1300 xxviii. coram Viro Amplissimo ANTONIO LAURETANO  
Patav. Pratore & Proprafecto.*

**M**orientibus oculos operire, rursusque in rogo patescere, Quiritium magno ritu sacrum fuisse, litteris a C. Plinio mandatum est: ejusque ritus causas cum ipse quasdam indicavit, tum alias alii homines eruditissimi quæsierunt, in primis autem VII Nobilissimus, & domi forisque maximis in magistratibus spectatissimus, idemque Patriciorum nemini sua tempestate doctrina, aut ingenio inferior, Avus tuus, Moderator Amplissime, Joannes Franciscus Lauretanus, qui eas est causas iusta Academica Disputatione persecutus. Immortalis verò Respublica vestra, quæ Romanæ quantum diuturnitate imperii, tantum sapientia, & institutorum gravitate antecellit, multo potioribus causis permota, ritum illum veterem ad communem, quam ipsa unice spectat, utilitatem traduxit, cum Rei Anatomicæ Professoribus imperavit, ut quotannis publice in hoc suo celeberrimo Gymnasio cùm cæteris corporis par-

tibus mortuorum oculos aperirent. Nulla in nostro hoc ritu superstitio; imo vero omnia ejusmodi, ut illius, quem ipsa unum sui dominum agnoscit, Dei religio sanctissima confirmetur, cum tam exiguis in particulas tanta solertia, ac providentia tot, tamque admiranda concludere nemo, nisi Deus ipse, potuerit. Summa autem in his cognoscendis jucunditas, & par denique jucunditati conjunctum est emolumentum. Nam si cuique nihil est oculis carius, nihil utilius; certe ea perspicere, quibus incognitis, neque a morbo defendi, neque curari oculi queant; id vero longe utilissimum censeatur, necesse est. Quæ omnia ita, an secus se habeant, facile erit ex nostra hac Exercitatione dijudicare, sive eæ spectentur exteriores partes, quas, referendo oculos, primo; sive interiores, quas, dissecando, secundo loco demonstrabimus.



*Proœmium ad Prælectionem de Corde*

*habitu anno c13 13cc xxix. coram Viris Amplissimis PAULO DONATO Prætor, & FRANCISCO CORRARIO Præfetto Patav.*

**D**Ecimus septimus est annus ex quo aggredienti mihi tum primum ad docendum in hoc Gymnasio, benigne affuit, & Publica, ac sua felicissima Auspicia præbuit is qui Inclytæ huic Urbi Præfectus, Proprætorque tunc præerat, Senator Gravissimus, atque omnibus, quæcunque in Virum principem cadunt, virtutibus ornatissimus, Socer idem, ac Frater vester, Moderatores Amplissimi, Joannes Corrarius. Cujus ego ut eximiam atque incredibilem erga me benignitatem memori animo semper recolam, sic acerbam omnino jacturam ut moderatius jam ferrem, hujus fecit fortuna Civitatis, vos Rectores natæ, Summo illi Viro non tantum affinitate, & cognatione quam proximos, sed Prudentia quoque, Justitia, Constantia, Religione, Magnanimitate quam simillimos, in hoc autem Gymnasium, in studiosam hanc Juventutem, in me ipsum, quod res ostendit, sic animatos, ut pro uno mihi duo revixisse Patroni, atque adeo Patres benignissimi videantur. Quo fidentius, atque alacrius exponam ea quæ de Corde audire voluistis, argumento vobis illo quidem auditoribus dignissimo, si modo ipse ejus gravitatem doctrina, utilitatem ingenio, pulchritudinem eloquentia adæquarem. De quo tamen ut saltem dilucide sermonem habeam; principio hanc Exercitationem tres in partes distribuo. In quarum prima de natura cordis, in altera de structura cordis, in tertia de effectu cordis verba faciam.

De natura cordis tres vetustissimas, easdemque maxime inter se discrepantes doctissimorum hominum sententias invenio, Stoicorum, Medicorum, Anatomicorum. Stoici enim fere omnes, in primisque Chrysippus, naturam cordis in eo positam esse, censebant, ut ipsum animus esset, aut certe animo sedem præberet. Hos; ut de Græcis aliis fileam; secuti Latini, sapientes homines cordatos appellabant, ut Ennius, qui *Egregie* inquit, *cordatus homo catus Ælius Sextus*, insipientes autem contra excordes, & vecordes, ut Tullius docuit Tusculanarum Quæstionum libro primo. *Aliis*, inquit, *cor ipsum animus videtur: ex quo excordes, vecordes, concordesque dicuntur*. Hinc illud Juvenalis Satyra septima --- *lava in parte mamillæ Nil salit*. Hinc Cæsar acute, haruspice tristitia, & sine corde exta nunciante, negavit, ut apud Suetonium est, *pro ostento habendum, si pecudi cor defuisset*. Verum adversus hosce, atque alios, quos sciens præter-

eo, & res ipsa pugnat; neque in corde, sed in cerebro ea Medici, atque Anatomici animadvertimus, quæ sedi convenient mentis animi, & diu est, cum Hippocrates id a vero alienum esse, præmonuit in extremo libro qui inscribitur de Morbo Sacro. *Dicunt quidam, quod corde sapimus*. --- *Verum hoc non ita se habet*. --- *Cor quidem, & præcordia angorem, & gaudium maxime sentiunt; sapientia tamen non participant; sed omnium horum cerebrum causa est*. Hæc Hippocrates, aut certe priscus, ac gravis Auctor, & dignus qui pro Hippocrate habitus sit.

Medici autem plerique omnes fere ad patrum nostrorum memoriam, non animi, sed vitalis caloris sedem, & fontem cor esse, docuerunt, vere illi quidem in parte, si cordis effectum spectemus. Sed fateri cogimur, quamvis propemodum inviti, Galeno, incomparabili alioquin Magistro rerum complurium optimarum, plus æquo tribuisse scribenti, si in cor viventis bestię digitus inferatur, eximium quendam, atque adeo urentem calorem percipi, nec veteres Doctores modo, sed etiam ex novis haud ita paucos, qui cætera ejus, confidentius persæpe, dogmata contemnentes, flammulam tamen nescio quam, aut fermentum quoddam, sanguinis concitans ebullitionem, in cordis penetralibus commenti sunt. Nam hæc de cordis natura inculcantes manifestissimo in errore deprehendit Joannes Alphonsus Borellus, non Galenum ingenio vincens, sed certioribus, quibus Galenus uti non potuit, ad dimetiendum calorem instrumentis, thermometris. Hisce enim in viventium animalium corda immisissis, nihilo majorem ibi, quam in cæteris visceribus, calorem invenit, quod testatur præclari Operis de Motu Animalium Parte altera, Propositione 96, & 221.

Denique tertia est de natura cordis sententia, ea quoque multo vetustissima, ut quæ primum fuit aut ab Hippocrate ipso, aut a perantiquo illo ac diligenti Anatomico proposita, cujus inter Hippocratis Scripta liber extat de Corde. *Cor*, inquit, *musculus est valde fortis*, confirmata autem est ab Latinorum Hippocrate, Cornelio Celso in contracta illa anatome, quam libro quarto de Medicina capite primo nobis reliquit. *Cor*, inquit, *est natura musculosum*. Ab hac discedere sententia mea me Facultas non finit, Anatome.

Nam &c.

*Proœmium ad Prælectionem de Aure*

*habitu anno c13 13cc xxxii. coram Viro Amplissimo ANDREA DELPHINO Prætor Patav. & Propæfetto*.

**D**ionyfium illum majorem, Syracusanorum tyrannum, ferunt, latoriis, quas ad inclusorum civium custodiam, & poenam habebat maximas, ita suas ædes inædificandas curasse, ut cuniculus, auris instar singulari opere, artificioque perfectus, ex eo carcere in suum usque cubiculum pertineret, ne qua vox, ne quis gemitus adeo submissus edi a miseris posset, quin continuo ipse præclareque inaudiret, eodem ad hominum calamitates augendas elaboratissimo opificio abusus, quod natura invenerat ad allevandas. Quanto aliter in dominatu utuntur qui se non tam dominos esse, quam patres, atque, ut Homerus loquitur, pastores populorum, meminerunt! Hi quando aure illa

carent Syracusana, per quam omnes miserorum ærumnas audiant; at aures suas perbenigne cunctorum inopum querelis præbent; sic tamen præbent, ut adjuvare velint omnes, neminem lædere. Itaque, ut verius dicam, ita alteram aurem querenti præbent, ut alteram ei vicissim de quo quis queritur, servant integram. Quem quoniam sapientissimum aurium usum si usquam alibi, certe in hac tanta clementia, & mansuetudine Veneti Imperii, eximia semper cum justitia conjuncta, admiramur; lator plurimum, Prætor, & Propæfecte Amplissime, Andrea Delphine, sic accidisse, ut ejus potissimum præstantissimi humani corporis organi, quo tu in primis in hujus Nobilissimæ Civi-



Civitatis gubernatione; si quis unquam alius, egregie uteris, admirabilem pulcherrimamque structuram, te pro tua summa erga me, & hoc Gymnasium benignitate audiente, & spectante, demonstrarem. & cæt.

**H**Æc de Organo in postrema quidem hujus mei curriculi Exercitatione proposito, inter pulcherrima tamen, atque utilissima non postremo, habui quæ dicerem. Cum autem multis jam annis humani corporis anatomen in hoc Theatro docuerim; jure videor posse contendere, nunquam felicius incepisse, quam anno quarto, nunquam felicius, quam hoc decimo septimo, absolvisse. Nunc absolventi ipse pro tua eximia benignitate adesse voluisti, Moderator Amplissime. Tunc incipienti, pro sua erga me nihilo minori beneficentia adesse voluit Vir Summus, Parens tuus Daniel Delphinus: quem si sapientissimum Senatorem, Equitem Splendidissimum, Legatum, & Oratorem eloquentissimum, Prætorem æquissimum, eundemque vigilantissimum fuisse, dixero; me multa ta-

men, & magna omisisse, non modo nihil audienti tibi gratificatum esse, fateantur omnes qui aut ipsum viderunt, aut qualem in te imaginem sui reliquerit, vident. Et quanquam ad hanc tu imaginem tam pulchram, tamque præstantem, jam tum ornamenta maxima addideras, eaque tua, scientiæ illius ac virtutis, quæ, Tullio auctore, *præstat cæteris omnibus*, --- *Rei militaris*, cum bellator fortissimus, cum Præfectus navium constantissimus toties Inclytam Patriam, atque adeo Italiam omnem, non consilio tantum, sed dextra quoque, & strenuis factis juvisses; tamen non tuam magis, quam Patris gloriam tuis ipse laudibus, atque honoribus amplificaveras; ut dubium sit, plus splendoris ex eo Parente in te Filium, an ex te Filio in eum Parentem redundaverit. Tanto igitur Viro, & de me, si quis alius, omni tempore præclare merito, dolebam tum pro ejus tot, tamque illustribus in me beneficiis pares agere gratias non posse. At quanto magis doluissem, si animo prospexissem, quam nova, quam multa vel mortuo essem in dies magis, magisque debiturus. Ut enim quæ ab illo accepi, ipso terris erepto, debeo tibi, sic quæ a te, illi.

### *Proœmium ad Prælectionem de Fœtu*

*habitu anno c1910cc xxxiv. coram Viro Amplissimo NICOLAO VENERIO  
Præfecto Patav. & Propratore.*

**C**UM multa, & magna sunt quæ Anatomicæ Facultati debet genus humanum; tum illud fortasse est maximum, quod sæpe fœtum, jam jam in mortua parente immoriturum, hujus ventre, uteroque, illa præmonstrante, aperto, sibi præter spem conservatum, in communem vitæ societatem acceperit. Veneratissimum, ut ego opinor, hoc Anatomæ donum est, atque heroicis notum temporibus, quibus Æsculapium filium ex interemptæ Coronidis utero Apollo extraxisse ferebatur. Neque enim Medicum qui id primus præstitisset, alium esse potuisse, quam Deum, in animum inducebant: quin etiam omnes sic in lucem deinceps eductos eidem Numini consecrabant, quod & erudite, ut solebat, Virgilius his versibus significavit,

*Inde Lycum ferit, exectum jam matre perempta,  
Et tibi, Phœbe, sacrum, casus evadere ferri  
Quod licuit parvo,*

& diserte in eum locum confirmavit Servius: qui & illud addidit, *Cæsarum etiam familiam ideo sacra retinuisse Apollinis, quia qui primus de eorum familia fuit, execto matris ventre procreatus est; unde etiam Cæsar dictus est: quanquam, quod Servius minime ignorabat, placuit aliis, & in his Sexto Pompejo Festo, non inde Cæsares dictos esse, sed Cæsones, utrolibet autem modo C. Plinio, qui duos summos Viros ea ratione servatos Romanæ Reipublicæ scripsit, Scipionem Africanum priorem, & Manlium qui Carthaginem cum exercitu intravit. Quod si prisca illi homines pro Deo habuerunt qui princeps viventem fœtum ex secto mortuæ parentis utero in lucem protraxit; quo tandem honore afficiendos censuissent qui extrahere vivum ex viva, & post cæsum uterum nihilominus victura, instituerunt! Factum id primum sub initium sæculi XVI. & deinceps, ut Francisci Rosseti, & Caspari Bauhini conjuncta Scripta commonstrant: & cum matri pariter, ac filio moriendum aliter fuisset; utriusque interdum, aut certe, idque sæpius, alterius vitæ ea ratione consultum est. Sic legi, Eduardum VI. Anglorum Regem ex viva parente fuisse exsectum, quem tamen non huic modo, quæ post duodecim interiit dies, sed & patri Henrico fuisse superstitem, constat. Mirum! Sed id mirum magis, tam sero humanitatis causa fuisse tentatum, quod immanitas tot ante sæculis ausa fuerat. Namque ut mittam, monstrum illud scæminæ quam Aristoteles in Ethicis memorat mulierum gravidarum ventres rescindere, atque inde fœtus comedere consuevisse; certe non incognitum Lucano*

fuit, Veneficas id in Thessalia factitasse quod his versibus descripsit,

*Vulnere sic ventris, non qua natura vocabat,  
Extrahitur partus, calidis ponendus in aris.*

Quid? quod, sicuti legisse memini, ejusdem sceleris apud Eusebium accusatur Maxentius, nec minus impius Cæsar, Julianus apud Cassiodorum, & Tribunus ille Pollentianus apud Marcellinum, qui omnes scilicet, dissecto vivæ mulieris ventre, fœtuque extracto aut manes excire, aut in jecore infantis (horrendum hostiæ genus!) futura quærere, malis instigantibus genitiis, conati sunt. Sed nos quantum teterrimas artes detestari, atque execrari, tantum salutare commendare, atque excolere debemus: & ea fœtum cadavera, quæ ab his ipsis, dum prodesse hominibus niterentur, accepimus, ita rimari, & scrutari singula, ut vicissim optimas artes aut promovendo, aut certe illustrando, quantum in nobis est, adjuvemus. Quod cum sæpe alias, tam in hac præsertim de Fœtu Dissertatione dabo operam ut faciam, cui tu, Moderator Amplissime, pro tua singulari erga me, & hoc Gymnasium benignitate interesse voluisti.

**H**Æc habui quæ de Fœtus conformationis initio; progressu, & complemento proponerem. Quod argumentum etsi ob maximam difficultatem, & laborem, perraro in Theatris Anatomicis tractari soleat; ego tamen tuis fretus, Moderator Amplissime, auspiciis semper faustis ac felicibus, non formidavi. Pro quibus, cæterisque Benefactis in me tuis quantum debeam, non est, ut verbis explicare me posse, sperem. Hoc tamen dicam. Ego Hieronymi Venerii, Equitis, ac Templi Marcii Procuratoris, Summi domi, forisque Viri, Patru tui eximiæ erga me cum semper, tum præsertim cum Literarius Triumvir fuit, Benignitati, ac Munificentiæ tantum deberi a me, sentiebam, ut nemini unquam me plus esse debitum, putarem. Attamen ex quo tu ad hanc Præfecturam integerrime, magnificeque gerendam, ex quo ad hoc Gymnasium fovendum, ornandumque, ex quo denique ad Theatrum hoc præsentia ipsa tua illustrandum venisti; utri plus debeam, non video: hoc video, utrique me quoad vivam, tantum esse debitum, quantum alii, prope dixerim, præterea nemini.



*Proœmium ad Prælectionem de Anatomæ Elementis.*

Cum duæ sint Methodi quibus Doctrinarum Magistri utuntur, Analytica, & Synthetica; illud inter omnes constat, in Doctrinis quidem inveniendis Analyticam, in tradendis Syntheticam esse adhibendam. Hoc usque adeo verum est, ut vel hæc Facultas nostra, quæ, ut nomen ipsum ostendit, in resolvendo versatur; recte tamen, ut ego animadverti, atque ordine tradi nequeat, nisi a Compositum Methodo initium ducamus. Nam si Partes humani corporis, ut ex fibrillis omnes constant, ita ex fibrillis ad unum eundemque modum dispositis omnes constarent;

non tamen antea quid Partes quæque essent, intelligi posset, quam quid ipsæ fibrillæ sint, expositum esset. Quanto ergo minus quid sint Partes intelligatur, cum fibrillæ haud una, sed multiplici ratione disponantur! Itaque sive hanc ob causam, sive ob eam quam anno illo proposui quo primum ad Anatomem tradendam aggressus sum, non prius de ulla humani corporis Parte, quam de Anatomicis Elementis idest de Simplicioribus Particulis, dicendum est, quæ videlicet nihil aliud sunt, nisi fibrillæ aliæ, atque alio modo dispositæ.

*Proœmium ad Prælectionem I. de Fœtu.*

Esse mos, atque adeo institutum meum postulat, ut ab Anatomæ Elementis initium ducere; ne tamen humani Fœtus cadaver, frustra annis superioribus perquisitum, hesternæ autem die ne opinanti quidem oblatum, interjecto aliquot dierum spatio forte putrescat, ab ejusdem Fœtus anatome invitatus propemodum incipio: Quanquam hoc initium ejusmodi est, ut non modo non esse omnino præter rationem; sed quodammodo etiam optandum fuisse videatur. Nam sive Naturæ vestigia sectamur; inde laudabile est incipere, unde & ipsa incipit: sive aliarum Doctrinarum respicimus methodum; nonnullæ, in primisque Geographia, tunc recte atque ordine traduntur, cum quæ singula mox diligentius ostendenda sunt, ea principio in exigua tabellam contracta ante oculos statuuntur.

Sed cum Partium quæ ad Fœtum pertinent, aliæ

sint extra Fœtum, aliæ intra Fœtum; nos qui dissectionis ordinem sequimur, dicemus primum de primis. Atque utinam prægnantis mulieris uterum, & cum hoc integra humani Fœtus involucra dissecare liceret; sic enim longe facilius & mihi esset dicere, & vobis intelligere. Sed quando eo subsidio destituimur; juvabit saltem Veteres illos Facultatis nostræ Parentes imitari, quos ex ipsis nominibus quæ Partibus, ad Fœtum extrinsecus attinentibus, imposuere, satis constat, prægnantes animantium brutarum uteros, & nominatim ovillos, dissecare consuevisse. Quod ita quidem faciemus, ut subinde tamen moneamus, quid inter hunc ovillum, & humanum conceptum intersit. Sic neque omnino ea desiderabitis ad quorum normam cogitationes vestras conformetis, nec tamen propterea cum iis errabitis qui multa in hac præsertim Anatomæ parte temere a brutis ad homines transtulere.

*Proœmium ad Prælectionem I. de Ossibus.*

Si qui sunt qui forte mirentur, me ne hoc quidem Anno a communibus corporis integumentis, ipsoque abdomine, unde cæteri Dissectionum Magistri solent, tradendæ Anatomæ initium ducere; ii, quæso, tandem aliquando suam istam admirationem auferant, & idoneum, si possunt, cadaver præbeant. At si illud forte mirantur, me donec ejusmodi cadaveris copia fiat, non potius domi sedere, quam huc ad ea quæ possim, de Re Anatomica ostendenda venire; sane aut incredibilem eorum quæ demonstranda sunt, numerum, aut angustias temporis mihi ad docendum publice dati animadvertere non videntur. Ego vero hæc mecum assidue reputans, non modo plura, quæ in hoc quidem loco quotannis omnia demonstrare perdifficile est, & in his Anatomica Elementa Tironibus quibus necessaria omnino sunt, superiori mense in meis ædibus præmonstravi; verum insuper quo primum die huc prodire mihi more institutoque Majorum

concessum est, hunc ipsum diem amittendum esse, non censeo, ut si minus vobis, Auditores humanissimi, meam, quam vix mediocrem esse sentio, facultatem probare possem, at promptissima ad interveniendum voluntate satisfacerem. Igitur quæ Partes deesse Anatomico nunquam possunt, ab iis Partibus Ossibus videlicet, initium capio, idque eo minus il libenter, quod hanc quoque viam tradendæ Anatomæ neque utilitate, neque ratione, neque magnis potissimum exemplis carere, video. Siquidem nonnullis inter Recentiores, plerisque autem inter Veteres Summis Anatomicis, & in his Decessoribus etiam meis Præstantissimis, Andrea Vesalio, Realdo Columbo, & si intime rem spectes, Adriano Spigelio eadem methodus, incipiendi nimirum ab his fulcris, & fundamentis reliquarum Partium usque adeo placuit, ut ab ipsis suis quisque libros anatomicos sint exorsi.

*Proœmium ad Prælectionem I.*

Longe aliud Anatomicis, atque Pictoribus, describendi humani corporis initium est. Hi enim a capite; nos autem a corporis centro incipimus, a Ventre nimirum, in quo centrum corporis est statuendum. Et Galenus quidem libro secundo de Hip-

ocratis, & Platonis Decretis centrum corporis in umbilico agnoscendum esse, censebat: quod & Latinorum Doctissimis videtur placuisse; nam Tullius Enam urbem, quæ in centro Siciliae est, Siciliae umbilicum, & Plinius lacum Reatinum, qui in centro Italiae est,



est, Italiæ umbilicum nominarunt. Marcus tamen Varro libro sexto de Lingua Latina centrum corporis ad pubem constituere malebat: recte, ut puto, omnes, si illos figuræ, Varronis autem assecras gravitatis centrum spectasse, ponamus. Gravitatis enim centrum, in humano corpore experimento habito, pubem inter, & clunes ab Joanne Alphonso Borello inventum est, ut tradit Parte prima egregii Operis de Motu

Animalium. Figuræ autem centrum in homine, manibus pedibusque expansis, resupino ab Joanne Riolo, ope magni circini in ipso umbilico deprehensum est. Utcunque id est; semper humani corporis centrum in ipsius Ventrem cadit, ut ex hujus finibus, & partitionibus quas a priore facie, & ab opposita exponam protinus, omnes planissime cognoscetis.

### *Proæmium ad Prælectionem III.*

**Q**uibus verbis Lactantius undecimum suum de Opificio Dei caput, iisdem ego hodiernam Disertationem exordior. „ Sequitur necessario, ut „ de internis quoque visceribus dicere incipiam: quibus non pulchritudo, quia sunt abdita; sed utilitas incredibilis attributa est. „ Hoc ideo exordio utor, ut siquis forte ex Tironibus novum hunc vi-

scerum aspectum horreret; proponendæ utilitatis expectatione retineatur. Nam cibus, potusque quo primum descendant, quo in loco ex iis chylus conficiatur, qua via demum, atque ratione aut hic confectus, aut quod superest, disjungantur, & seorsum meent; nimirum hæc omnia ex ventriculi, intestinorum, & mesenterii anatome perspicue cognoscuntur.

### *Proæmium ad Prælectionem I. A. CIO DCCC XLIV.*

**D**iogenem ferunt, cum inhumatum se projici, juberet, Amici autem id eo se facturos negarent, ne ab avibus, ferisve laceraretur; at vos hunc baculum propter me ponite, dixisse, quo illas abigam, & cum illi at qui poteris? neque enim senties, tum ipsam, quid igitur mihi earum laniatus oberit, nihil sentienti? Mihi vero etsi Diogenis propositum non durius modo, ut M. Tullio hæc referenti visum est, sed etiam inhumanum; jure tamen derisus Amicorum timor videtur. Atque utinam metus ejuscemodi e vulgi animis evelli posset, ne inepte adeo vel nobis obltaret divinam humani corporis fabricationem ostensuris, nec cogeret in his tantis angustiis temporis ob idonei cadaveris defectum, illius Partem initio

proponere præcipuam quidem ex octo illis, in quas cum de Ossibus universis in Nosocomio ageremus, non ita pridem divisimus; sed unam dumtaxat Partem, eamque, si daretur optio, in alium locum rejiciendam: Quanquam dabo operam, quantum poterō, ne ordinis hæc necessaria mutatio Doctrinæ officiat, atque ideo hodierno die eadem unde, cum licet, incipere solitus sum, vel in capite demonstrabo communia totius corporis integumenta. Quæ meo quidem judicio omnino sunt duo, Cutis, & Membrana Adiposa. Nam quod Celeberrimus objecit Amicus, ne Cuticulam rejiciamus; id qua ratione dissolvatur, alias a me vobis ostensum est.

### *Proæmium ad Prælectionem de Cerebro A. eodem.*

**D**iu multumque olim inter Philosophos est disputatum, quamnam potissimum corporis partem mens incoheret. Nam Xenocrates, Platonis discipulus, per totum corpus sparsam discurrere, contendebat. Chrysippus autem in Corde habitare, censebat. Alii vero malebant in Cerebro, Platonem sequentes. Hæc tamen disputatio non ita demum abstrusa, ac difficilis erat, ut si non verum, at veri certe similitudinem, siquis paulo acrius attenderet, huic attingere non liceret. Itaque Lactantius Firmianus cum eorum qui pro Cerebro stabant, rationes expendisset, eamque potissimum „ quod sensus omnis, idest „ audiendi, & videndi, & odorandi minima membra „ in capite sint locata, eorumque omnium viæ non „ ad pectus, sed ad cerebrum ferant; hi, inquit,

„ aut non multum, aut fortasse non errant. „ At longe difficilior est his temporibus inter Anatomicos alia hac de re disputatio. Cum enim Cerebrum potissimum esse animæ locum, non negent; in quam præsertim Cerebri particula is videatur statuendus, disquirunt. Et mihi quidem, non uni tamen, nec primo, in ea præ cæteris parte videtur posse statui quam appellant Corpus Callosum. Huic conjecturæ (neque enim; ut Lactantii ejusdem verbis utar; rem „ sic esse affirmo, quod est insipientis in re dubia facere „ ) huic, inquam, conjecturæ quantum tribuendum sit, existimare omnes poteritis, si quæ de Cerebro, de Medulla, de Nervis continuo ostendam, diligenter, ut vestra est consuetudinis, attendatis.

### *Proæmium ad Prælectionem de Lingua &c. A. eodem.*

**G**ustandi facultatem multi, inprimisque ex Venteribus, aliis ac Linguae, Partibus, & nominatim Palato tribuerunt. Hinc illud Horatii,

*Fervida quod subtile exsurgant vina palatum.*

Hinc illud Ovidii,

*Sic nova Dulichio lotos gustata palato.*

Hinc alia & Tullii, & aliorum, quæ non vacat referre. Sed contra is, cujus sæpe verbis hoc annotor, Lactantius. „ Quod attinet, inquit, ad saporem „ rem capiendum, fallitur quisquis hunc sensum pa-

„ lato inesse, arbitratur. Lingua est enim qua sapor „ res sentiuntur, nec tamen tota. „ Haud sane potuit melius. Nam facili, at certo constat experimento, frustra sal ipsum non modo palato, verum etiam inferiori linguae faciei affricari; quod hujus superiori faciei impositum, dummodo non sicca sit, continuo sentitur. Erit igitur nobis in hac tantum linguae facie gustus organum inquirendum; si prius tamen, ut soliti sumus, & par est, docuerimus &c.



*Proœmium ad Prælectionem I.*

Cum multæ, & magnæ hominibus ex Re Anatomica utilitates existunt; tum nulla præstantior, quam quod esse Deum, ejusque providentiam, confirmat. Sensit id olim ille in primis qui sæpius locos graves ex Philosophia egregie tractavit M. Tullius. Itaque in altero eorum voluminum quæ inscripta sunt de Natura Deorum, Quintum Lucilium induxit satis multa verba facientem de ea quæ tum nota erat, humani corporis fabricatione, quo sic *facilius*, ut ait, *intelligeretur, a Diis immortalibus hominibus esse provisum*. Idemque senserunt alii alia ætate, sed hæc nostra præsertim Eruditissimi Viri, qui ut longius provectam Anatomen invenerunt, sic multo & plura, & mirabiliora indidem sumpserunt, per quæ apud

suos quisque cives male natas in quorundam intimis mentibus de Deo immortalis, deque ejus providentia dubitationes evellerent. Cujusmodi medicinæ etsi nulla, ut opinor, apud nostram, pluresque Nationes alias necessitas est; vos tamen juvabit, optimi Juvenes, Anatomæ cognitionem quasi antidotum præcepisse, quo mature vestros istos religiosos animos adversus externa insandarum opinionum venena magis magisque firmetis.

Principio, eximium opus humani corporis quibusdam quasi velis obiectum est. Quæ continuo sic detrahentur, ut singulorum natura, atque utilitas ostendatur, &c.

*Proœmium ad Prælectionem I.*

Siqui forte adsunt qui ignorent, quot ab Summo Opifice Deo intra humanum corpus abdita sint, aut quam mirifica structura, & quam multiplici usu præstantia; ii nunc ista ipsa quæ extrinsecus circumposuit, integumenta, eorumque fabricationem, &

causas attendant: facile conjicient, quot, & quanta expectare in interioribus illis debeant, cum horum quæ extima sunt, admirabilem constructionem, & prope innumeras utilitates cognoverint. Hæc autem sunt &c.

*Proœmium ad Prælectionem I.*

Si quam frequenter Hippocratis doctrinam, & facta laudamus; tam diligenter utraque scrutari, imitarique vellemus; profecto in Re Medica ut nihil Studiis Anatomicis antehabendum agnosceremus, sic nullam horum partem esse negligendam, confiteremur. Nunc etsi Hippocrates in eo libro qui inscribitur de locis in homine, disertè docuit, *naturam corporis esse principium sermonis in arte Medica*; fuerunt tamen qui scriberent, non ad structuram, sed ad temperaturam corporis id attinere; non mehercule scripturi, si vel ea solum attendissent quæ continuo subjecit Hippocrates. *Natura corporis*, inquit, *principium sermonis in arte Medica*, *primum perforata est qua parte audimus*. --- *Quidquid autem per membranam in cerebrum pervenerit, id liquido & clare auditur*. --- *In naribus mollis laxitas, velut spongia*. --- *In oculis venulae tenues -- ex cerebro per ambientem membranam feruntur*. --- *Membranae autem tres sunt quæ oculos custodiunt*. *Superna quidem crassior, media tenuior, tertia tenuis*. Nolite expectare ut referam cætera quæ de cerebri meningibus, quæ de venis in omne corpus pertinentibus, quæ de tendinibus, quæ de ossibus, quæ de articulis perpetua oratione persequitur. Satis ea sunt quæ retuli, ut intelligatis, structuram corporis, Hippocrate auctore, esse principium sermonis in arte Medica.

Verum, credo, in eo uno loco, & ea dumtaxat quæ indicavi, ex universa Re Anatomica nobis commendavit Hippocrates! Ipse vero in libris de genitura, de natura pueri, de carnibus, de octimestri partu, de natura ossium vel multo plura de Anatomæ tradidit, quam ex inscriptiones polliceantur. Atque ut libros alios sciens præteream; quid egit in libro de corde, quid in libello de corporum refectione, nisi ut Anatomen sæpe etiam diligentius, quam iis temporibus sperandum videbatur, doceret? Quin etiam scripsit librum de glandulis, ut mirari non oporteat, cur duo summi nostra memoria Medici, verique ejus imitatores Malpighius, & Boerhaavius *spongiosam*, quam

Morgagni Opusc.

ipse tradiderat, glandularum naturam suis illustrare opusculis, & confirmare perrexerint. Quod si Bellinus, vel potius Fallopius noster, & Eustachius, magni & ipsi Medici, glandiformes in renibus papillas proposuerunt, nempe sunt Hippocratem secuti, qui *habere etiam renes glandulas*, scripserat. Nec vero is qui iterum, ac sæpius mihi merito est laudandus, Malpighius, cum aut glandulosam cerebri, aut vesiculosam pulmonis, aut denique fibrosam lienis & celulosam structuram ostendit, sua potius, quam Hippocratis, inventa vulgavit. Hic enim cerebrum inter alias glandulas retulerat, pulmonem *antrosam*, & veluti *spumam* esse, dixerat, lienem vero esse *fibrosam*, & *spongiformem*, affirmaverat: & nisi in subtilissimis dissectionibus fuisset versatus; nunquam certe tanta asseveratione id quod verum esse in Elementorum Anatomæ explicatione ostendimus, docere potuisset, *minimam corporis partem omnia habere quæcunque & maxima*. Quid? si nunc de ovo incubato, si de comparata reliqua avium, atque etiam quadrupedum confectione, si de ipsa plantarum anatome eadem olim inchoasse Hippocratem demonstrarem quæ denique absolvit Malpighius. Sed nimirum temperabo orationi meæ, quippe cui nihil aliud in præsentia propositum est, nisi ut appareat, nullam iis qui Hippocratis exemplum sequuntur, Anatomæ humani corporis partem esse prætermittendam, totque illos, tantosque Medicos, qui nihil in ea sibi negligendum putarunt, aut cum Hippocrate insimulandos, aut cum Hippocrate esse laudandos.

In quorum ego, ut soleo, vestigiis insistens, Anatomicam Doctrinam, quod Superi bene vertant, tradere aggredior. Principio humanum corpus divido in partes octo, caput, collum, thoracem, ventrem, artusque superiores, & inferiores. Nec me moratur plerorumque consuetudo, collum in divisione corporis non ponentium, sed capiti, aut thoraci tribuentium. Satis enim mihi est vetustissimos sequi Anatomicos, & in his Hippocratem, & hunc imitatum Aristotelem,

C



lem, qui collum, ut ego, a capite, & thorace dividerunt. Enumeratae autem Partes cum alia singulae peculiariora habeant, alia universae communia; ego peculiariora in hac quidem prima schola non attingam; communia expediam. Communia sunt praeter ea quae pau-

lo ante commemorabam, Anatomes Elementa, vobis in Nosocomio praemonstrata, ista corporis totius involucra, Cutis, & Membrana Adiposa. Cutis ipsa quoque *membrana* est, auctore Hippocrate libro de Carnibus. Facta autem est ad hunc modum &c.

### *Prooemium ad Praelectionem I.*

**P**artes ex quibus constructa sunt animantium corpora, aut vivas, aut mortuas Anatomici dissecamus; mortuas autem vel morbo vitiatas, vel secundum naturam se habentes. Vivas incidimus, cum in canibus lymphæ, & chyli vias ostendimus, aut cum, secto nervo, illico perire in membris quæ adibat, movendi, ac sentiendi facultatem, demonstramus, aut alia agimus ejusmodi: Mortuas autem, & morbis vitiatas, ut cum in Nosocomio hoc ipso mense viri, fortissima apoplexia confecti, cerebrum viessusi, ut conjeceramus, sanguinis dilaceratum patefecimus: Denique & secundum naturam se habentes: quod cum ibi in partibus quibusdam fecimus corporis humani, tum hic faciemus in omnibus. Primi illius Anatomes generis utilitas est usus, actionesque Partium, & quod consequitur, symptomatum in ægrotantibus significationes deprehendere. Alterius morborum loca, causasque ipsos continentes. Tertiis hujus non solum vitæ, & sanitatis sedes ex mirifico Sapientissimi Conditoris opificio cognoscere; verum insuper doctrinam

haurire, sine qua duo illa superiora Anatomes genera non possunt institui: quis enim usum, & actionem quærat earum quas ignoret, Partium? aut quis vitiatas esse, intelligat, qui ut secundum naturam sint, non didicerit? Quamobrem si utilia sunt duo illa priora genera, quæ certe sunt perutilia; utilissimum hoc tertium erit, quo non prævio, nulla eorum esse possit utilitas. Quo magis omnes decet, eos autem qui Medicis studiis se addixerunt, oportet attente ac diligenter quæ ad hoc attinent genus, accipere. Id quo facilius fieri a vobis possit, optimi, mihi que carissimi Adolescentes; polliceor, me ordine omnia traditurum, & ex nimio, ut sunt apud quosdam, numero ad quam pauciora potero, contracturum. Itaque communia ipsa, a quibus continuo incipiendum est, universi corporis Integumenta cum haud pauci dissectionum Magistri quatuor esse, docuerint, nonnulli etiam quinque; ipse primo loco duo, haud amplius, esse ostendam: tum de Cute dicam: postremo de Membrana Adiposa.

### *Prooemium ad Praelectionem I.*

**E**t si ea quam tradere aggredior, Doctrina Partium humani corporis nullam afferret utilitatem, nisi ut morborum sedes peculiares cognosceremus; esset tamen a vobis in primis, optimi Juvenes, qui Chirurgicis, Medicis, Physicis studiis operam datis, maxime expetenda. Nec vero abstergere vos debet ingens noscendarum Partium numerus. Namque ut hæc quamplurimæ sint; non plures denique, imo pauciores sunt, quam ipsi morbi; neque enim ulla unius, sed unaquæque complurium morborum est sedes. Quod si res etiam contra se haberet, Partiumque numerus vel stellarum quæ distincte hætenus cognitæ sunt, numerum adæquaret; num propterea minus alacri animo vos esse deceret in iis addiscendis quæ intra vos sunt, quam Astronomiæ studiosi in iis quæ longe adeo sunt disjuncta? Illi vero comprehensas animo ac memoria habent stellas; ut alias quæ post

Flamsteedii Catalogum sunt animadversæ, omittamus; minimum ter mille, nullo alio subsidio adjuti, quam ordinis. Eorum enim Magistri omnem illum qui initio abstergere poterat, stellarum numerum in errantes, & cælo infixas dividerunt, tum has in quinquaginta quas vocant, constellationes tribuerunt, denique constellationes ipsas distinxerunt in partes, quarum singulis plures sive primæ, sive alterius magnitudinis stellas certa lege ac distributione assignarunt, tantum difficultatis detrahentes, quantum ordinis addiderunt. Quos si ego partiendo, ordinandoque imitabor; non dubito, quin vos quoque pari in multo minori rerum copia adjumento instructi, illorum auditores facile percipiendo, & fideliter retinendo æmulemini. Igitur, quod bene vertat, primum omnium humanum corpus divido in partes octo; &c.

### *Prooemium ad I. Praelectionem.*

**F**acultatem tradere aggredior, evidentia, utilitate, dignitate ipsa præstantem. Nihil enim docet quod non oculis subjiciatur, quod non plurimum juvet sive ad philosophandum, sive ad medendum, quod denique non Divini operis pars sit longe elegantissimi, atque absolutissimi, humani corporis. Hoc Sapientissimus ille Fabricator, vel in ipsa extrema superficie continuo agnoscendus, involucris omne circumtextit

iis, unde mihi protinus incipiendum est. Quæ vos singulari attentione, atque adeo summa admiratione esse digna, ob hanc etiam causam censebitis, quod cum homini non tegumentum modo præbeant, sed commoda afferant insuper re magna, genere varia, numero multiplicia; duo tamen, ut ostendam, haud amplius, sunt, Cutis, & Membrana Adiposa.



*Proœmium ad I. Prælectionem.*

**E**tsi vulgo ab indoctis, utinam ne ab nonnullis quoque Doctis, nihil requiri aliud video ad Anatomem perficiendam, nisi ut quæcunque in humano corpore adhuc latent, ea tandem omnia retegantur, in lucemque proferantur; tamen longe alia mihi sententia est cogitanti, haud melius de hac Facultate esse meritos qui vera, & necessaria addiderunt, quam qui falsa, & supervacanea detraxerunt. Namque ut ad eam accedat quam optamus omnes, & quærimus, absolutionem perfectionemque; scilicet ad verum ac-

cedat oportet; ad verum autem perinde accedit; siue aliquis adjiciat vera, seu demat falsa: quorum ut alterum sæpenumero felicitatis est, alterum sagacitatis, sic utrumque singularis etiam industriæ est, ac diligentia. Sed nos rerum Inventores suis quemque laudibus postea ornabimus. Nunc utrosque, sed eos primum qui a vero aliena, aut certe supervacua rejecerunt, in istis ipsis, unde initium nobis tradendæ Anatomies ducendum est, communibus revera totius corporis integumentis sequamur. Hæc &c.

## DE ANATOMICIS EUSTACHII TABULIS

*AD ILLUSTRISSIMUM, ET CELEBERRIMUM VIRUM***D. JO. MARIAM LANCISIUM**

Intimum Cubicularium, &amp; Archiatrum Pontificium

**J. O. BAPTISTÆ MORGAGNI****E P I S T O L A.**

**V**EL triginta octo Tabularum conspectu, quas ab Eustachio olim promissas, nunc vero post multorum irritas perquisitiones, CLEMENTIS XI. Pontif. Max. Beneficio a tua solertia demum repertas, ad me (quæ tua est humanitas) mittis, vel quod eas tuis auctas, ornatasque Adnotationibus exituras esse, scribis in Bibliothecæ, quam selectissimorum voluminum copia in publicum commodum instruxisti, imminente sub proximas Kalendas dedicatione, magno me, Doctissime Lancisi, gaudio, & incredibili quadam voluptate perfundis. Quod autem addis, cupere Te vehementer, ut quæ in his Tabulis propria Eustachii, & peculiaris (sint licet ab aliis post ipsum prodita) extare cognovero, de his omnibus Te diligenter, nullaque interposita mora certiore faciam, utrum difficilius sit negare, an efficere, multum dubito. Nam & negare ei, quem plurimum colam, cuique me obstrictissimum esse, confitear, ea præsertim cupienti, quæ, sicuti ad Historiæ Anatomies ex hisce Tabulis illustrationem, ita ad beneficii celebrationem pertineant, per se collati in publicum ab eo Principe, cujus non modo geminæ, amplissimæque potestati, sed & summa erga me, meosque omnes beneficentiæ longe plus debeam, quam hominem homini debere fas sit, durum id mihi, & quod nequaquam possim, videtur: & id suscipere in his temporis angustis, atque in his tot, & domi urgentibus, & in publico impendentibus occupationibus, quod intra justum tempus, & otio affluens pro dignitate præstare non possem, & præterea quæ hujus, aut illius Anatomici inventa creduntur, ea ad Eustachium referre aggredi, hoc vero perdifficile esse sentio, eique maxime, qui, cum non possit prodesse omnibus, neminem saltem velit offendere, & qui, ut jamdiu nosti, haud mediocriter vereatur

*Laudes Egregii Principis, & tuas**Culpa deterere ingeni.*

Quoniam tamen sapienti cuique homini pulchrum potius, atque optandum videri debet, eadem quæ Eustachius, sublata omni plagii suspitione, observasse, ac cum tanto Anatomico divisam inventionis gloriam habere; & quoniam vestrum, Lancisi ornatissime, beneficium, si, qui digne possunt, his solis celebrare liceat, timendum est, ne, quod ab omnibus laudan-

*Morgagni Opusc.*

dum esset, id nullum habeat laudatorem; idcirco statim, ut jubes, morem gero, non omnia, quæ alias possem, sed præcipua eorum, quæ hæc Tabulas inspicienti in mentem nunc veniunt, ad Te scribens, nullam aliam habitura gratiam, nisi celeritatis.

Sed antequam incipio, quo tempore, & in quem potissimum finem hæ fuerint Tabulæ æri incisæ, constitutuere necesse est. Hæc enim duo non modo ad eas intelligendas, verum etiam ad ea, quæ in ipsis peculiaris Eustachii sunt (sicut Tu cupis) dignoscenda plurimum adjuvant. Igitur quicumque sunt in ejus Opusculorum lectione versati, ii certe non ignorant, id sibi Eustachium in omni sive hominum, sive brutorum dissectione præ cæteris proposuisse, ut ostenderet, magis in Galeni Accusatores, quam in Galenum ipsum reprehensionem cadere, eo maxime tempore pervulgatam, quod non hominis, sed brutorum anatomicam descriptionem tradidisset. Nimirum tunc omnium manibus terebantur Andrea Vesalii de humani Corporis fabrica libri, accusationem illam tertio quoque verbo non sine acrimonia ingeminantes; & in iis propositæ & descriptiones, & Tabulæ, ut eleganter traditæ, & assabre delineatæ, sic passim diligenter quoque, & fideliter ad humani corporis normam exactæ judicabantur. Etsi vero post annos circiter viginti, ex quo Vesalii Tabulæ prodire cœperunt, extitit Romæ Realdus Columbus, qui nonnullos in eo ipso, quod memoravimus, genere Vesalii errores in suis libris de Re Anatomica reprehendit, & paulo post Gabriel Falloppius, Gynasii hujus nostri decus, & lumen, edito aureolo Observationum Anatomicarum libello multo plura Vesalii errata deprehendit; ab neutro tamen eorum ullæ Tabulæ editæ sunt, quæ pro fallacibus illius Tabulis sufficerentur. Quæ cum ita sint, quæcunque in Vesalii Tabulis, aut desiderata, aut perperam efficta, in his Eustachii Tabulis addita, & emendata invenimus, primæ horum omnium delineationis honorem esse ad Eustachium referendum, neminem puto negaturum, ut qui duobus post editas Falloppii Observationes annis, atque adeo ante novas cujusque Tabulas testatus est in Opusculorum Anatomicorum Præfatione, has suas editioni paratas habere.



An vero, ut delineationis, sic quoque inventionis eorum omnium primam liceat Eustachio gloriam adjudicare, diligentius est inquirendum. Non enim propterea quia duobus, ut dictum est, annis post vulgatum egregium illum a Falloppio libellum testatus sit, se suas Tabulas absolvisse, continuo credendum est, non absolvisse multo antea & illas, & Anatomica Scripta, sive edita, sive adhuc desiderata. Nam quo anno Falloppius Observationes edidit, eodem Pinus ad librum de Renibus Adnotationes colligebat, & scripsit Eustachium non modo de Renibus, verum etiam de cæteris aliis humani Corporis partibus asserere, ut in ejus ad lectorem Epistola, & initio statim Adnotationum habemus, Præterea examen Ossium, eique adnexum de motu Capitis Opusculum, eo tempore fuisse perscripta, quo necdum Falloppii Observationes videre Eustachius potuisset, ex adscripto die facile colligitur. Sed quoniam Epistolam de Auditus Organis post Falloppii Observationes scriptam esse, non modo ex adscripto item die, verum quoque ex non uno ejus loco, de Stapede videlicet, ac de Cochleâ, satis constat; in libello autem de Dentibus (ut modo cap. 32. de Renibus prætermittam) attestante etiam Pino in Adnotationibus, Falloppii sententiæ nec semel, nec obscure impugnantur, & præterea Falloppius in Præfatione ad Observationes, has ante annos quatuor a se scriptas ad Petrum Mannam, testatur; his de causis unice ad annum, quo Tabulæ sunt æri incisæ, inquirendum veniamus; nam & de his potissimum quærimus, & si constabit, has ante scriptas a Falloppio Observationes fuisse paratas, plerorumque etiam, quæ & Scriptis, & Tabulis communia sunt, inventorum gloria Eustachio asseretur.

Itaque mitto quod in Præfatione ad Opuscula hic affirmat, *sex, & quadraginta Tabulas areas multo prius se editurum fuisse, nisi ab ætate, valetudine, & fortunarum inbecillitate fuisset prohibitus*. Mitto etiam, quod in Præfatione ad suas in Erotianum Adnotationes, & ad Libellum de Multitudine scribit, se suas Observationes, & inventiones Anatomicas jam pridem se incidendas mandavisse; edere autem superfedere, quia nonnullos (idest Vesalium, ut liquet ex iis, quæ sequuntur) Opusculis a se anno proximo superiore publicatis vehementer audiverit commotos fuisse, ideoque se aliquandiu expectare, donec ipsi, si quid velint, rescribant, ne novas subinde appendices suis scriptis adjungat. Neque locum afferam ex Epistola de Auditus Organis, ubi de Stapedis inventore disserens, se, inquit, neque edoctum, neque monitum ab aliquo, *multo antequam ipsi scribant*, id officulum novisse, Romæque non paucis ostendisse, *atque in æs incidendum curasse*. Qui autem id scripserat, ex collatis utriusque locis apparet, Falloppium fuisse in Observationibus, ubi negat, anno 1548. fuisse Romæ quemquam, qui Stapedis notitiam haberet. Igitur multo ante hunc annum altera saltem Tabularum, in quibus hoc Officulum ostenditur, fuisse videtur incisa. Locum potius afferam, in quo & de Tabulis nuper inventis, & de his quidem universe Eustachius ita loquatur, ut annum simul, quem quærimus, diserte prodatur. Is, quantum modo memini, unicus extat in in libro de Renibus cap. 16. *Hujusmodi, inquit, dispensatio, unioque venarum* (nempe venæ sine pari cum emulgente altera, aut cum proxima aliqua vena) *qua ratione, quovis modis a me sit observata, Tabulæ huic tractationi annexæ* (idest octo, quas tunc edidit) *apertissime ostendent; & nisi fallor, non secus eas inspicienti ante oculos ponent, ac si dissectioni nostræ interesset; in qua harum venarum consensum ita consuevi ostendere: quippe qui multis ante annis perspectus mihi sit, & cognitus, quemadmodum nostræ Anatomica Tabulæ* (idest hæ, quæ sunt nunc inventæ, & in his XXVI., & XXVII., nam si easdem illas, de quibus modo dixerat, innuisset, non nostræ Anatomica, sed eadem Tabulæ dixisset; hæ igitur) *anno salutis millesimo quingentesimo quinquagesimo secundo ære incisæ patefaciunt: ut dicere audeam, non minus memet mihi in ea, quam præsentibus, spectantibusque omnibus satisfacere*. Esse autem has nuper inventas Tabulas multo ante illas octo æri incisas, petito ex XIII. Tabula argumento infra confirmabo. Si ergo anno 1552. hæ Tabulæ fuerunt incisæ, prima laus Eustachio de-

ferri potest non tantum delineationis, sed & inventionis eorum omnium, quæ in Vesalii supplementum, vel emendationem, ut in his Tabulis, ita in Falloppii Observationibus, immo & in Columbi libris, ad eundem modum occurrunt; ut quæ Opera aliquot annis post illas Tabulas perfecta sunt, illæ quidem annis post quinque, hi vero ut minimum tribus, ut ex Columbi ad Paulum IV. Pont. Max. Epistola colligo.

Quod si aliquis ex Falloppii Præfatione argumentum capiat, nonnulla ejusdem inventa, ut ad quamplurimos, sic & ad Eustachium potuisse multo ante illius Observationum editionem permanere; ego quoque ex Eustachii Opusculo de vena sine pari Antigram. XI. argumentum vicissim capiam, nonnulla hujus inventa perferri ad Falloppium potuisse, per eorum videlicet sermones, aut scripta, quibus, ut Eustachius inquit, *studium erat aliorum inventa pro suis edere . . . exploratoribus* (apud hunc) *etiam stipendio conductis*: ad quem locum recte intelligendum, haud scio, an juvet illud Antigramma conferre cum his, quæ in Falloppii Observationibus, & in harum Examine a Vesalio edito, occasione Venæ sine pari narrantur; illud quidem scio, hunc Vesalii locum Fabricio ab Aquapendente e memoria excidisse, cum in Opusculo de Venarum Ostiolis mirari se, scripsit, *quomodo hæc ad suam usque ætatem tam priscos, quam recentiores Anatomicos adeo latuissent, ut non solum nulla prorsus mentio de ipsis facta esset, sed neque aliquis prius hæc vidisset, quam A. D. 1574*. Sed hæc obiter. Ad Eustachium nostrum redeamus: cujus, ut vides, Lancisi Ornatissime, ego gloriæ plurimum faveo; sic tamen faveo, ut multa pro Falloppio nostro reponi posse, non diffitear; primum quod, cum nemo negare possit, ejus observationes anno 1561. prodixisse, num Eustachii Tabulis ante hoc tempus summa imposita fuerit manus illi ipsi possunt in dubitationem vocare, quibus mecum illi credere placeat, A. 1552. easdem incisas fuisse; deinde quod ex Epistola Eustachii de Auditus Organis proclive sit conicere, quod ab eo de Cochleâ, & de Canalibus Semicircularibus in II. Figura XLV. Tabulæ pictum est, id post lectas Falloppii Observationes eidem Tabulæ, qua locus vacabat, adjectum esse. Verum cætera mittamus, & tandem aliquando ad has Tabulas inspiciendas veniamus.

Quarum tres priores quoniam si quid habent, in quo moremur, id infra opportunius commemorabimus, idcirco has interim seponentes, ad XII. statim pergamus. In qua cæteris Figuris prætermittis, iisque præfertim (ut semper) quæ in octo Tabulis vulgatis occurrunt, III. potissimum, atque VII. contemplemur. Igitur in III. & vesiculas seminales, & deferentium vasorum cum iisdem conjunctionem, & duos seminis in capite, ut vocant, gallinaceo meatus, omnia perspicue quidem, atque eleganter picta conspiciamus, quæ sane frustra in Vesalii Tabulis perquiruntur, ut qui has vesiculas primum vidit in Falloppii Observationibus descriptas. Cæterum ad vesicularum sedem ostendendam ab anteriore quidem parte undecimam XI. Tabulæ Figuram, a postica autem VII. hujus Tabulæ Eustachius instituit. In qua præterea Figura eas vesicæ fibras monstrare voluit, quas cap. 19. de Renibus conspicuas, crassas, ac fere carneas, dixit, *quæque adeo variæ quoquoersum distribuuntur, ut intuitibus multarum tunicarum speciem habere videantur*. Sed & in Tabulæ X. Figura I. exteriori pariter sublata ventriculi tunica, ita ejus circulares fibras ostendat, ut Willisii industriam in Tabula III. ventriculi concinnanda præverterit.

In Tabula vero proxima XIII. illud primum dissimulare non possum, vasis urinarii intra renem dexterum ramificationem tum dimensionibus, tum figura non ita ad verum accedere, ut quæ in pervulgata Tab. V. delineatur; ex quo nimirum in ea opinione confirmor, longe prius has Tabulas esse incisas, quam octo vulgatas: quarum si ejusdem V. Tabulæ Figura I. idem ostendi credis, quod XI. Tabulæ Figura X., hanc quoque multo rudiorum, atque ideo priorem esse confiteberis, Cæterum & his ramificationibus, sive, ut alii vocant, pelvis tubulis, & renum canaliculis, & horum in papillas iis tubulis exceptas unione fuisse ab Eustachio & Bellinum, & Malpighium occupatos, non est opus hic memorare. Illud potius addam: hæc eadem,



eadem, quæ Eustachius, Falloppium quoque in Observationibus attigisse. Clitoridem vero, & ejus crura, atque musculos, quæ similiter Falloppius in eodem libro descripsit, primum certe delineata, & in hac XIII. Tabula, & in sequenti conspiciamus. Sed quod ad ligamenta uteri rotunda attinet, quæ Vesalius musculos, Falloppius autem processus nerveos esse docuerunt; Noster in hac Tabula non modo ab utroque diffidet, sed Swammerdamii nihil fere aliud, nisi minutissimas arteriolas, & venulas illa esse tradentis, & Figuram, & explicationem prævenit, addens præterea ex cruralibus nonnullos ramusculos, ut & in sequentis Tabulæ Figura I. ad quam priusquam transeo, in hac XIII. illud denique observandum judico: vel spermaticorum, & hypogastricorum vasorum ad latera cervicis uteri unionem minime Nostrium latuisse.

In Tabulæ XIV. Figura I. nequaquam partium exiguitas Eustachium prohibuit, quin se illud quoque scire satis ostenderet, ab ani sphinctere fibras per cuncta latera deduci versus hujus summam partem, atque clitoridem. In Figuris autem III., & IV. cum ipsius cavæ uteri longe accuratior figura observanda est, quam ea, immo & consequentia tempora propemodum ferrent; tum vero in primis manifestum Tubæ Falloppianæ in uterum transitum spectare oportet. Figuræ autem ad fœtum, & ejus involucra pertinentes, collatis homine, & brutis, Vesalii in his rebus lapsum evidenter coarguunt.

Verum his, aliisque prætermis, recta ad Tabulas XVII. & XVIII. veniamus. Et primum in illius Figura II. præter medullaris substantiæ per cerebellum in arboris, & ramorum modum dispositionem, juvat observare duo saltem genera processuum cum cerebello commissorum, nempe & eos inferiores, ex quibus Varolius postea a se primum, ut credebatur, animadvertis, spinalem medullam ex parte componi, monstravit, quod ex hac Tabula non latuisse Eustachium, constat; & eos superiores, qui a Testibus in cerebellum, ut Willisio videtur, protenduntur. Ad horum initium origo Patheticorum nervorum, de qua a Vesalio ignorata Falloppius quoque in Observationibus locutus est, hic evidenter conspicitur. Eam noster in examine ossium, antequam Falloppium legere potuisset, jam scripto, Fabio Amicio indicare voluerat, dum inter eorum commemorationem, quæ ut admirabilia ipsi ostenderat, *excitare, inquit, te nervi etiam debebant, nam ut mittam nunc illos, qui prope cerebri nates oriuntur* (nempe hos, quos hic delineat, Patheticos) & *alios, qui juxta spinam procedunt, ac tres quoque propagines sexti jugi nervorum cerebri a medulla spinali principium sumentes* (quos porro esse in sequenti Tabula delineatos, mox ostendam) *nonne soluto, &c.* Denique in hac eadem II. Figura operæ pretium est observare, medullam spinalem, non ut a Vesalio, semper magis, atque magis quo magis a calvaria recedit, attenuatam proponi, sed ibi crassiorem, atque plenioram, unde magni artuum oriuntur nervi: quod item a Falloppio animadvertum, & ante hunc in Caroli Stephani libris pictum, nunc passim in accuratiorum Recentiorum figuris spectatur. Figuram vero IV. dum inspicimus, proderit ante oculos habere Anatomie Cerebri Clar. Ridley cap. 7., in qua plexum choroidem tradit *ab utroque latere esse duplicem, quod hæc a nemine fuerat observatum*; ponit scilicet (ut hic Eustachius, qui hæc ad posteriora reflexa pingit) alteram plexus partem a latere, alteram autem in medio instar latæ expansionis nates, & testes, & glandulam pinealem obvolventem. Quod autem Ridleyus in eodem cap. præter venas a Willisio descriptas, duas semper se dicit reperisse *anterioribus* ejusdem plexus extremitatibus occurrentes, fortasse id est, quod in III. hujus Tabulæ Figura monstratur. Figuram vero VI. Tabulæ XVII. si videre homines potuissent, cum Varolius suum de circumductione, seu reflexione Opticorum nervorum, & vera eorundem origine inventum proposuit, non id ad Fabricium ab Aquapendente pertinere, odiose contendissent, sed Eustachio deberi evidenter ostendissent.

Quid porro, Lancisi Doctissime, de Tabulæ XVIII. Figuris omnibus dicemus, in quibus nihil fere est, quod non nostra hæc potius, quam Eustachii deceat tempora? Diligentiam sane, qua sunt paratæ, accura-

tissimam vel minimam res testantur, & in his duæ illæ, ut Willisius appellat, candicantes glandulæ pone infundibulum constitutæ, quæ in nulla harum quinque Figurarum desiderantur. In I. autem, & III. Figura (ut singulas consideremus) occurrunt illæ, quas supra Eustachium vocasse diximus *tres propagines sexti jugi nervorum cerebri a medulla spinali principium sumentes*, nos vero juxta communes his temporibus appellationes, quas in hac Epistola retinemus, radices vocamus nervi Spinalis ad par vagum accessorii: quem ante Willisium *jampridem* (inquit Ridleyus cap. 16.) observaverat, imo delineaverat, atque descripserat Vidus Vidius. Cæterum ex his Eustachii Figuris & cui debeatur, & Vieussenium in prima ejus origine describenda magis, quam Willisium, aut Ridleyum, ad Eustachii observationes accedere, facile colligitur: quis autem ad verum magis accedat, hic quidem non judico. Ut vero mittam de nervorum, & in primis quinti paris ramificationibus, quæ in hac Tabula proponuntur, dicere; facere tamen non possum, ut in I. Figura præteream non modo portionem duram paris Auditorii a Vesalio ignoratam, sed & hujus primum post inflexionem, quam in Aquæ ductu subit, cum chorda tympani a pari quinto proveniente unionem, & demum cum hoc eodem pari conjunctionem (de qua alii aliter) delineari, de quibus plerisque rebus ut noster in Epistola de Auditus Organis verba fecerat, sic quod speciatim ad memoratæ chordæ originem, & finem attinet, multo quam Falloppius, diligentius proposuerat. Nunc missis cæteris, in Figuræ II. consideratione moremur, & in ea nervos vulgo intercostales dictos inspicimus, qui nescio an sint illi, qui, ut supra dictum est, *juxta spinam procedere* ab Eustachio admirabiliores suas observationes Amicio commemorante dicebantur. Nam etsi iidem nervi superioribus, & æqualibus Anatomicis non erant ignoti ad vertebrarum thoracis, & lumborum latera; ad latera tamen vertebrarum cervicis eosdem Vesalius videre non potuerat; itaque ceu ab octavo pari infra cervicem enatos proposuerat. Ipse autem Falloppius etsi videtur ubi olivare suum corpus, sive plexum describit, aliquam majorem gemini prædicti nervi habuisse notitiam; non tamen ejus veram cognovit originem. Imo Willisius in Nervorum descriptione cap. 5. *Origo, inquit, ejus nondum satis detecta fuit; nam a plerisque Anatomicis pro ramo paris vagi perperam sumitur.* Hæc autem origo ex ea saltem parte, quæ ad nervum sexti paris attinet, manifestissime in hac Figura II. demonstrata est. In qua præterea & plexus plures, & origines, ac distributiones nervorum observantur, quas sane res non dico ex Vesalii solum Tabulis, sed & aliorum, qui sunt illum ad recentiorum usque tempora consecuti, partim nullo modo, partim non satis licebat addiscere. Quæ sigillatim recensere nunc mitto, quoniam sentio, in his duabus Tabulis considerandis (quæ alioquin omnium videntur consideratione dignissimæ) aliquanto, quam vellem, me prolixiorē fuisse.

Sed vicissim breviorē multa esse me cogunt in sequentibus usque ad XXXVIII. Tabulis considerandis; primum quod in earum aliis nulla quidem nunc occurrunt ita digna consideratione; deinde quod de aliis, & nominatim de illis duodecim, quæ musculos exhibent, Te minus sollicitum esse, scribis: denique quod earum aliqua haud pauca habet, quæ in octo jamdiu editis Tabulis etiam sunt. Attamen ut intelligas, has quoque, de quibus nunc loquor, Tabulas me inspexisse, pauca in paucis considerabo. Igitur in Tabulæ XXVII. Figuris II., & IV. eæ mutæ vasorum mesaraicorum ad modum arcuum communicationes ita perspicue, & eleganter expressæ, ut nunquam meminerim melius, satis testantur Eustachii in his quoque valis exercitationem, quam in Antigram. 8. de Vena sine pari subindicaverat. Ad ea autem, quæ in pluribus suorum Opusculorum locis de nonnullarum venarum, & in primis venæ sine pari distributione, variisque communicationibus tradidit, facilius intelligenda, & nonnullæ hujus Tabulæ Figuræ, quæ in octo prioribus Tabulis aut nullo modo, aut ob loci angustias decurtatæ proponuntur, & ipsa quoque superior Tabula XXVI. vehementer utiles sunt.

In Tabula autem XXIX. primus omnium Eustachius Occipi-



Occipitales musculos pinxit, ut quos Falloppius a reliquis omnibus Anatomicis scribit esse prætermislos. Eisdem quoque pingit in XXXI. XXXII. & XXXIV., in quibus ut & in XXX. musculos præterea exhibet, qui supra, & qui pone auriculam sunt constituti, de quibus Falloppius idem pariter animadvertit.

Tabula XXXV. Mastoideos musculos & duplicem singulos habere originem, & sic in duos utrinque dividi posse, ut Eustachius adversus Vesalium in Opusculo de Motu Capitis scripserat, dilucide ostendit; quemadmodum ea, quæ adversus eundem de duobus Capitis musculis, quos Complexos vocant, in proximis superioribus periodis attulerat, a Tabula XXXVII. confirmantur. In qua Tabula exiguus ille, qui ex anteriore ani ora dependet, musculus num is sit, qui musculus urethræ sine pari a nonnullis Recentioribus appellatur, alii viderint.

Porro Tabula XXXVIII. præterquam quod de musculis intercostalibus interioribus illud ostendit, quod Eustachius Antigrammate ultimo de vena sine pari indicavit, quod scilicet, *ad radices costarum non pertinent*, si cum Tabulæ XLI. Figuris VIII. & XIII., ut par est, jungatur, ea præsertim demonstrat, quæ de duplici utrinque musculo, quem Longum colli vocitant, hujusque in caput implantatione, & de duobus præterea, vel tribus prætermislos a Vesalio musculorum paribus, quæ caput movent, post nuper indicatum Opusculi de Motu Capitis locum ab Eustachio tradita fuerunt. Quæ quidem omnia una cum his Tabulis, unaque cum illis, quæ paulo supra de capitis, & primarum vertebrarum ligamenti docuerat, conferri diligenter velim cum iis, quæ de duobus earundem partium ligamenti, & de quinque paribus musculorum diversis capitis motibus inservientibus a Dupræo Chirurgo Gallo proposita sunt, quorum summa una cum Epicrisi, & quasi Vindictis Cl. Cowperi, & Figuris utriusque in Actis Eruditorum Lipsiensibus A. 1699. exhibetur. Sic enim scio fore, ut nonnulla ex iis, quæ ibi, ut ignota omnibus sunt proposita, Eustachium non latuisse intelligatur.

Tabulæ XXXIX. inferiores Figuræ primum omnium Eustachium emendavisse testantur id, quod a Vesalio in oculorum musculis ostendendis peccatum fuerat.

In XL. autem Tabula ea inprimis exhibentur, quæ Eustachius in Examine Ossium a se præstita commemorabat. Nonne, inquit, *soluto prius oculo in singulas sui membranas, quod vix animus capere potest, foramen nervi visorii Tibi, & aliis, vel multis reclamantibus, ante oculos sexcenties exposui?* Ostenditur quoque id, quod in libri de Multitudine cap. 32. affirmaverat, nempe venas, & arterias a cerebro per intimiorem nervi visorii substantiam trajici, ac inde in retinam oculi tunicam dispensari, tum accuratam sectionem, tum firmam rationem ostendere. Illud præterea in Figuris II. III. VI. XI. observandum est, vasa per choroidem, non ut in retina anteriora versus, sed posteriora versus prorepentia, & fibrosam ipsius choroidis structuram monstrari.

Sed ad Tabulas XLI. & XLII. transeamus, in quarum plerisque Figuris inspicendis dicere non possum, Lancisi ornatissime, quantam ceperim voluptatem, dum & eorum, quæ in pristinam in Anatomica historia sedem restituere, & eorum, quæ inter diversas Anatomicorum descriptiones seligere ante hos septem annos in meis primis Adversariis Anatomicis conatus sum; in quæcunque, inquam, eorum in duabus hisce Tabulis Eustachius incidit, idem mecum vel de rerum dignitate, vel de historię selectu censuisse evidenter intelligo. Atque utinam per magnarum rerum tunc adhuc inveniendarum copiam, & quarum magnam ipse partem detexit, ad ea descendere tam accurato Anatomico licuisset, quæ nobis quasi ex magna messe perpaucae spicæ, non neglectæ quidem, sed elapsæ, improboque adeo labore raris, & plerumque abstrusis in locis legendæ, relicta sunt: profecto non dubito, quin ex iis quoque, quæ a me non tanquam restituta, aut selecta; sed ut primum inventa proposita sunt, plura essent, quorum inventionis divisam cum tanto Anatomico gloriam haberem. Nunc ex his, quæ deprehendisse visus sum, unum ex omni-

bus, & levius quidem, est illud, quod de veris hyothyroidum, & sternothyroidum musculorum terminis monui; quos passim fere ut in Vesalii Figura, in Tabula XLII. num. 3. ab Eustachio, ut cum suis conferri posset, allata, pictos, descriptosque animadvertam. Itaque meam & descriptionem, & Figuram cum Eustachii V. & XII. in Tabula XLI. satis convenire, vehementer gaudeo. Cum autem mihi & cricoidis cartilaginis capitula, & mediam epiglottidis ligamentum, & præsertim laryngis ventriculos, de quibus passim Recentiores silebant, & observare contigisset, & restituere placuisset; mirum nunc in modum gaudeo, a gravissimo hoc Anatomico nihil horum esse prætermisum, ut qui prima in VII. XLII. Tabulæ, alterum in V. facile adumbrat: ventriculi autem dexteri orificium certe in XI. Figura demonstrat. Cumque pariter inter diversas Anatomicorum sententias, & circa epiglottidis musculos depressores, & circa cricoarytænoidæorum posticorum ortum, atque tendentiam, & circa arytænoidæorum structuram, & in primis circa Thyroidæ glandulæ duplicatam id mihi seligendum visum esset, quod dissertationes propriæ docuissent; admodum lætor, Eustachium mecum facere, qui in XLII. Tabulæ Figura I. nullos epiglottidis depressores agnoscat, qui in eadem, & in II. cricoarytænoidæos, & arytænoidæos juxta meam descriptionem delineat, & qui demum in V. & VIII. Figura XLI. Tabulæ, non modo unam mecum thyroidæam proponat, sed in cunctis ejus conditionibus ita conveniat, ut ne illam quidem appendicem omittat, quam ab ea sursum per thyroididis faciem persæpe protendi adnotaveram. Ad quas Eustachii figuras, suas, si adhuc viverent, emendare illi demum possent, qui ad meas emendare neglexerunt: quanquam plura, etiam ubi maxime dissimulant, a me sumpserint, & plura ad mea Adversaria emendaverint; ut eorum Anatomie utramque editionem conferentibus planum erit, quæ utinam semper bene intellexissent. Sed nolo cum umbris hominum, præsertim & laude alioquin dignorum, & mihi non omnino ingratorum luctari. Itaque præstat in his ipsis V., & VIII. Eustachii Figuris, quemadmodum & in XI. illud præterea observare, ut Vesalii in linguæ musculis defectus egregie emendetur; utque præterea in sequentis Tabulæ Figura V. linguæ glandulæ, sicut in hujus VIII. nonnullæ trachæ glandulæ non omittantur. Porro si Cl. Amicissimoque Valsalvæ & XI., & XIV. hujus Tabulæ Figuras, & præterea IV. & VI. sequentis Tabulæ cum laudatissimis suis V. & VI. Tabulis comparare placuerit, non dubito, quin sicut intelligat, præcipuum in his suum Uvulæ, & Pharyngis continuitatis inventum Eustachio ipsi ignotum fuisse, ita agnoscat lubens, nonnulla tamen ex reliquis eundem quoque non omnino latuisse; illam vero, quæ a me in Epistola ad ipsum data restituta ex Falloppio est, Stylopharyngæi musculi in cornua ossis hyoidis, & in supernam oram cartilaginis scutiformis implantationem in XLI. Tabulæ Figura XI. subindicari.

Porro quæ in proximis Tabulis ad sceletorum pedes ex organo auditus ostenduntur, eorum ab Eustachio nonnulla inventa, fere omnia primum fuerunt delineata. Cæterum in scelecto Tabulæ XLIII. contextus ille elegantissimus, quem spuriarum costarum cartilagine invicem efficiunt, & quem a Vesalio oscitanter prætermitti, Eustachius dixerat in Ossium Examine, conspici potest. Hic ipse est, quem, quamvis passim ab aliis omissum, Verheyenius in altera Anatomie suæ editione diligenter memoravit, atque depinxit. Illud quoque in scelecto hujus, & proximarum Tabularum observatione dignum est, quod os sacrum, non ut a Vesalio, sex partibus constans, & quinque ante, & retro foraminibus utrinque pertusum pingitur; sed quinque constans partibus, & quatuor utrinque foraminibus pervium, quale scilicet magna ex parte in hominibus esse solet, ut in eodem Opusculo animadvertit Eustachius. Hæc tamen, & ille, quem modo diximus, cartilagineum contextus in Tabulis etiam Caroli Stephani utcunque rudibus, & antiquis occurrunt.

De his tandem, quæ sunt postremæ, duabus Tabulis, illud primum in universum censemus, plerasque earum



earum Figuras, ut & XIII. Tabulæ XLI. iis potissimum illustrandis inservire, quæ in memorato nuper Opusculo pro Galenō contra Vesaliū ab Nostro asferuntur: quod (ut cætera prætermittam) primo statim aspectu in ultima quidem Tabula Figura XVIII., tresque illi proximæ satis monstrant; in quibus illæ, quæ in eodem Libello traduntur, ossium sterni, ejusque cartilaginis varietates accurate exhibentur: in Tabula autem XLVI. idem plures illæ, dissimilesque calvariæ attestantur. In quarum porro plerisque observo peculiare illud Foraminulum pro vena a Falloppio cum duræ matris sinibus egregie descripta, quam nunc Occipitalem recte appellant, non desiderari.

Hæc habebam, de quibus Te, Vir Doctissime, statim ut iussisti, certiorē facerem, Sus, ut ajunt, Minervam. Erant præterea in his Tabulis dubia quædam, & subobscura, de quibus aliquid scribere fortasse poteram; sed nolui divinare. De his vero, atque aliis, quæ aut scientes prætermisimus, aut forte etiam in his tantis angustiis temporis haud satis vidimus, fortasse olim, si quid otii dabitur, in ea, quam concepimus, Anatomicorum Inventorum Historia scribemus. Quam quoniam ea scripta Eustachii adjuvare plurimum possent, quæ adhuc latent, oro Te, obtestorque, ut sicuti has Tabulas, ita & ea scripta elatebris eruere, atque producere aggrediaris. Ea namque Eustachius cum in Opusculorum Præfatione *propediem se esse editurum* promississet, anno proximo in Præfatione ad suas in Erotianum Adnotationes, & in Libellum de Multitudine, *parata esse*, & in ejusdem Libelli cap. 15. *jam absoluta esse*, indicavit. Quæ vero de ipsis, deque sua in illis diligentia speranda essent, cum iisdem in locis, tum in Præfatione ad opuscula docuit, his *multo illa utiliora* pronunciare non dubitans. Magnitudinem quoque Operis eodem in loco satis ostendit, dum *ne tantum Opus multo prius aggrediretur ad imprimendum, a fortunarum suarum imbecillitate se deterritum* scribit: quod sane de Tabulis potissimum non esse accipiendum, illud probat, quod ostendimus, jam ante annos decem illas æri incisas fuisse. Quanquam & ejus Operis magnitudinem, & servatam in eo scribendi rationem ex eo quoque æstimare licet, quod ea Syngrammata, & Antigrammata, quæ de duabus tantum venis, sine pari, & profunda brachii, edidit, non pauca quidem, sed parvam tamen, si reliquis omnibus respondere debent corporis partibus, totius Anatomies particulam, ea, inquam, *ex eo libro, quem de Diffensionibus Anatomicis scripserat, accepisse se*, dicit in ea, quam illis præfixit, Epistola. Eum autem Librum illa ipsa scripta esse, quæ nunc quærimus, memorati superius loci aperte significant. Neque aliquis credat, nihil in iis scriptis contineri, quod ab his Tabulis, quæ una videlicet prodire debebant, non ostendatur. Non enim his Tabulis omnia Eustachium complexum esse, quæ ex infinitorum pene hominum, atque animantium sectione didicerat, multa indicio esse possunt. In quam earum, quæso, extat *mirum* illud *naturæ artificium*, ab aliis *Anatomicis* (quod sciret) *minime animadversum*, in plerisque *duræ cerebri membranæ sinibus* ipsi notum, ut innuit cap. 14. lib. de Multitudine? In quamam satis extant *quædam corpora permixta, in multis animalis partibus, præsertim vero in*

*cruribus occurrentia, quæ in aliquot nervorum, venarum, atque arteriarum surculos, detracta membrana eos succingente, facile solvuntur, quæ a se in gratiam Galeni publice ostensa ibidem scribit cap. 32.?* In quamam innumerabiles pene nervorum propagines: quæ quidem ut visum sibi esse, ibidem dicit cap. 33. in corporibus secandis observasse, in cutem non ita frequenter inferuntur, ut quispiam fortasse arbitratur; sed ut plurimum in tenuissimas fibras dissectæ, adipis substantia terminantur? Quænam porro Tabula satis monstrat quæ de duplici peritonæo, & de vasorum seminalium in scrotum ingressu (longe aliter profecto atque Vesalius) docuisse se, dicit in Ossium Examinatione? Quænam denique, ut alia nunc omittam, aut nervum visorium in eo animali (quod Malpighius postea manifestavit) in innumeras rugas complicatum, & incisa tunica ambiente in amplam membranam totum explicatum, aut thoracicum ductum luculenter in equo descriptum Antigram. 13. de vena sine pari; quænam, inquam, Tabula (nam quædam earum etiam ex brutis nonnulla exhibent) hæc ostendit? Est ergo sperandum, si ea scripta tandem aliquando proferantur in lucem, multa alia in iis inveniri posse, quæ hæ Tabulæ non complectantur. Quæ cum ita sint, Optime Lancisi, perge porro, & quod præclare cœpisti, feliciter perfice. Apud eosdem Pini hæredes quemadmodum Tabulæ delitescabant, ita quoque hæc Scripta latere posse conjicio. Fuit enim ab Eustachio Pinus ita in societatem laborum vocatus, ut aliqua ex parte, quæ in iis etiam Scriptis consignatæ erant, Observationes ad ipsum pertinerent. Itaque Pinus ut in Epistola suo in Hippocratem præmissa Indici eas Tabulas (quemadmodum solertissime observasti) promittere potuit, quasi ut suas; sic in Adnotationibus ad cap. I. Libri de Renibus, vivente, & vidente Eustachio, nonnulla de renum sinibus a nobis animadversa; aperte scribere non dubitavit. Sed sive hæc, sive alia placeat inquirendi via, quæ Tibi & spectatæ solertiæ, & non vulgaris eruditionis Viro vel multiplex deesse non potest, noli, quæso, in aliud tempus differre; sed quo die tuo, atque adeo meo CLEMENTISSIMO DOMINO tuam istam novam Bibliothecam ingredienti Eustachii Tabulas offeres tuis Adnotationibus exornatas, ne dubita commune hoc alterum litteratorum hominum votum pro ea, qua eosdem, & litteras, litteratissimus ipse respicit, dignatione, & pro ea, qua Tu polles & gratia, & eloquentia, aperire. Ego, si Nostrum novi DOMINUM, spe bona, certa que sum plenus, ultrò ipsum sua auspicia, & auctoritatem esse iterum promissurum. Quibus, si, ut nuper in Tabulis, ita nunc in Eustachii Scriptis inveniendis feliciter, sicut voleo, uteris, non plus ille, dum viveret, aut Divo Cardinali Borromæo, qui suo favore non indignum putabat, aut Amplissimo Urbini Cardinali, cui inserviebat, & cujus domi alebatur, non plus, inquam, vivens illis debuit, quam SANCTISSIMO PONTIFICI, & ejusdem Præstantissimæ Urbis decori maximo, atque immortalis, nunc mortuus erit debiturus. Vale.

Dabam Patavii XIII. Kal. Novembris MDCCXIII.



D E G L A N D U L I S  
E P I S T O L A.

CLARISSIMO, ATQUE ERUDITISSIMO VIRO

P E T R O A N T O N I O M I C H E L O T T O

Joannes Baptista Morgagnus S. P. D.

**Q**Uod scribis, celebrem illam Experientissimi Littrii de Renum fabrica Observationem explicari ita posse, ut iis qui cum Malpighio *vesicularum* structuram in Glandulis non agnoscunt, minime adversetur, si videlicet ovales illos membraneos sacculos a quibus prima secretoria vascula exoriebantur, quippe quos sanguine turgentes ipse Littrius describit, pro arteriarum extremis accipiamus; ea de re quid ego vicissim sentiam, vel potius alios sentire putem, sic habeto. Primum minima diversi generis vascula, quod Littrius idem adnotavit, ad eos sacculos perveniebant; igitur ipsæ quoque arteriolæ. Num igitur veri esse similes, existimabimus, minimarum arteriarum extrema multo suis surculis majora, hoc est sacculos ipsos fuisse; an vero hosce nihil fuisse aliud nisi ovales membraneas vesiculas, hoc est Glandulas, in quarum cavum in eo rerum statu facile demum sibi viam vi cruor fecisset? Ponamus tamen, eos sacculos reapse extrema arteriolarum fuisse, incredibilem in modum dilatata. Nempe prima illa secretoria vascula ex arteriis, nulla interjecta vesicula, exoriebantur. Attamen cum illa in majores vesiculas confluerent, ex his autem alia vascula ad papillas pertinentia, atque ideo vere excretoria prodirent; illud semper relinquitur, inter excretoria Glandularum vasa, atque arterias, vesiculas interponi. Hic fortasse inquis, Vir Clarissime, id alii viderint qui negarunt; nos autem, hoc seposito, illud unum attendamus: si vascula illa prima secretoria ex arteria-

rum extremis in istas vesiculas humorem convehunt; igitur sine vesicularum ope secretionem haberi. Ego vero ut istud concederem; non illud tamen continuo darem, ad Glandularum structuram vesiculas non requiri. Movent enim me, ut par est, gravissimi Anatomi Malpighii innumeræ, eademque semper sibi constantes observationes; movet ista luculenta Cl. Littrii confirmatio, qui Glandulas sine vesiculis non invenere. Hæ igitur in Glandulis requirantur, necesse est. Sive enim alios humores decuit non continenter, sed per vices ex Glandulis excerni, quemadmodum lotium videmus haud jugiter e corpore expelli, ejusque rei causa urinariam vesicam esse constructam; sive alios oportuit intra Glandulas mora perfici, quamobrem videlicet multi censent, vesicam felleam creatam esse; nimirum interjectis, intra ipsas Glandulas, vasa inter secretoria, atque excretoria vesiculis obtineri id facile potuit. At enim hæc structuræ pars in glandulis est, inquis, secundaria, non potissima; non enim humores secernit; sed secretorum asservationi, aut perfectioni subservit. In hoc vero, ubi eos sacculos reapse id fuisse, crederemus, quod hujus disputationis causa posuimus, me, atque adeo etiam illos a quorum partibus hætenus locutus sum, non difficile, ut opinor, astipulantes haberes. Hoc, inquis, mihi satis est. Ego autem gaudeo. Vale.

D. Patavii VIII. Kal. Octobres CIO IDCC XVIII.

D E L A C R Y M A L I B U S D U C T I B U S E T E O R U M O B S T R U C T I O N E  
E P I S T O L A.

J. B. Morgagnus S. D. Dominico Anelio Chirurgo Experientissimo.

**Q**Uod meam & amicitiam, & tuo super libro sententiam quæris; primum sic habeto, me natura, & institutione ita esse factum, ut honestos, solertesque homines, in quibus te esse video, ultro & mea sponte, non modo provocatus, amare soleam. Tum libri tui cum duæ potissimum sint partes, altera in tollendæ Lacrymalis Fistulæ ratione posita, altera in Ductuum Lacrymalium descriptione; ego vero ex iis sum qui cum Hippocrate primam laudarent vel quando successu caruisset; ita enim illa excogitata, & proposita est, ut dum conatum agnoscis veterem curandi rationem cum cæteris rebus, tum in primis lenitate vincendi, & institutum probes, & prudentiam non desideres. Nam quis eum non probet qui instituit, non viam quidem Naturæ ignotam, ut solent, & novam parare; sed ab ipsa Natura apertam, a morbo autem obstructam referare? Quis item ejus prudentiam non commendet qui id ipsum suadeat ubi intelligatur, huic esse instituto locum? Sunt enim præter eos quos excipis, casus interdum eæ viæ ita occlusæ, ut ego in muliere olim viderim alterum de duobus meatibus in quos puncta lacrymalia producun-

tur, & eum quoque in quem ambo illi meatus defluunt, majorem tubum conglutinatis a summo ad imum parietibus penitus clausos, ut non jam ductus, sed solida ligamenta esse viderentur.

Igitur tuam curandæ lacrymalis fistulæ rationem laudo. Descriptionem etiam lacrymalium ductuum laudarem tuam, nisi cum te laudarem, me ipsum laudare credi possem, qui ante hos septem annos in Adversariis Anatomicis, eandem, aut certe (quando omnia rursus perquirere, & conferre non vacat) ferre eandem proposui. Imo quæ in datis ad te litteris non hemo scripsit, *Ductus lacrymales in homine, eorumque usus, & operandi modum vel ipsi pridem Galeno perspectos, & a priscis pridem Italiae Anatomicis descriptos, & a Recentioribus elucidatos fuisse*: --- Galenum hujusmodi canales, & puncta minime latuisse: --- Fuisse qui post Galenum longo tempore puncta illa, & canales lacrymales non observarint, ut crediderint a Ste. nonio primum inventa: --- In hisce canalibus nullam esse valvulam, nullum impedimentum; esse ita liberos in toto decursu suo, ut collyria ab oculis in nares, imo & in oris cavitatem percolasse; Galenus observaverit ( licet



( licet exiguo, vel nullo id foret ad lacrymalium ulcera interna emolumento) famumque ab oris cavitate, compressis naribus, ad canales lacrymales compelli, indeque per puncta lacrymalia emitti, præsertim a tabaccisugis, observent nonnulli: --- Ductum ad nares parentiorem, esse angustiore duntaxat in ipso suo extremo fine, & orificio; hæc nimirum pleraque omnia ex meis sunt Adversariis desumpta.

In quibus postquam adscriptis Galeni, & Falloppii verbis ostenderam, neque illum puncta lacrymalia, & horum usum, eumque aditum qui ab illis est ad nares usque perpetuus, latuisse; & Falloppium præterea meatus ab illis punctis in communem sinum convenientes, aperte, & nominatim proposuisse, atque ideo non oportuisse, Stenonem vix plura tradentem, & eos qui illum sequuntur, hæc inter noviter inventa connumerare; tum, quoniam neque hæc plerisque Anatomicis satis visa, & ab iis omnibus quos memoravimus, potius indicata, quam diligenter descripta esse, animadverteram; his de causis non verbis tantum, sed & iconismo (quod ante me, quod sciam, fecerat nemo) ita eorum descriptionem institui, ut singillatim quæ de lacrymalibus punctis, quæ de duobus meatibus in quos ea producuntur (quos tu videlicet limacis cornua appellas) quæ de ampliore tubo in quem ambo desinunt, & quæ demum de tubi ejusdem contracto fine, atque orificio (quod tu ductus lacrymalis punctum excretorium vocas) in pluribus cadaveribus observaveram, ea qua summa potui, brevitate, perspicuitate, & fide exhibuerim. Præterea cum non modo errorem coarguissem eorum qui puncta lacrymalia omnino in cadaveribus sensum fugere, docuerunt; verum etiam tradidissim, præter extremorum angustias nullam valvulam esse qua per hanc

omnem quæ a punctis lacrymalibus ad nasum est; viam sursum, deorsumve permeantia impediatur, quamobrem videlicet observationem Galeni de collyriis emunctis, aut excreatis, aliamque de tabaccisugis explicavi; hoc statim adjeci monitum, quarum rerum meminisse haud omnino inutile fortasse erit his, qui earum viarum affectionibus medicinam facere studuerint. Igitur vides, me tuam laudare non posse descriptionem, quin laudem meam.

Tollendæ vero fistulæ rationem laudo, ut quam tuam vere totam agnosco. Illud ego quidem ex eadem anatomie eruam monitum ex qua tu rationem tuam eruiisti. Sed præterquam quod libens fateor, me de specillis, deque siphunculis curationis gratia immitendis nihil unquam cogitasse; neminis admonitione egeo, ut intelligam, nisi tu solertia, & dexteritate singulari, exemplo primus prævisisses, moniti illius mei exiguum, vel nullum hæcenus futurum usum fuisse. Itaque tibi gratias ago tum meo nomine, cujus tu monitum non omnino fuisse inutile, ostendisti, tum eorum quoque omnium qui tenuissimarum particularum anatomen, etsi nonnulli recentioribus Medicis (quasi vero a celeberrimis inter veteres Medicis, & nominatim, ut supra indicatum est, a Galeno, & a Falloppio exculta illa non fuisset) ceu inutilem obijciunt, & si Superis placet, exprobrant, mecum tamen consent, vel ad opem ægris præstendam non modicam utilitatem afferre. Quod reliquum est, velim tibi persuadeas, significationem benevolentiae, & opinionis de me tuæ mihi fuisse jucundissimam, idque ut intelligas, me operam omni tempore daturum. Vale.

D. Patavio XIII. Kal. Februar. CIO MDCCXIV.

D E L U M B R I C I S  
E P I S T O L A.

*Clarissimo Doctissimoque Viro*

A N T O N I O V A L L I S N E R I O

P. P. P.

Joannes Baptista Morgagnus S. P. D.

Quod serius ad Te mittam alteram Lancisii Illustrissimi Viri de Lumbrico Lato Dissertationem, duabus de causis factum est. Nam qui libenter apud te legerim illam ejus primam in rem eandem Dissertationem, quæ cura est tui, imo nostri Antonii Pachioni Clarissimi Homini ad te allata, multo libentius hanc legi alteram, & relegi, quam mecum ipse Auditor voluit, ut est erga me summe humanus, & perbenignus, communicare. Qua in Dissertatione cum illa me tenuerunt, quæ in Scriptis cæteris Viri Celeberrimi tenere solent, quod in tantis ejus occupationibus sic præclare tamen, sic copiose, & docte conscripta sit, tum illud mirifice me illexit, quod in ea super Lati Vermis natura, non quod Medicorum prope omnium consensus docet, sed quod anatome, quod ratio, & major veri similitudo, confirmetur. Eo si more, institutoque Majores uti voluissent in tot aliis, quæ de reliquis etiam Vermibus mirifica, & singularraria tradidere; num putas, Ornatissime Antoni, Scriptorem ex illis gravem, & diligentem (ut modo cæteros prætermittam) serio fuisse testaturum (a), se quatuor lumbricos teretes spithamæ unius longitudine in ipso trunco venæ Portæ comperisse; quo scilicet per angusta venarum mesaraicarum orificia ex intestinis usque olim, ut ipse arbitrabatur, prorepserant, eos Morgagni Opusc.

que se Clarissimo Viro Præceptori suo monstrasse; hunc autem postero die in publico Theatro anatomico omnibus Medicinæ Doctoribus, & Studiosis pro miraculo aspiciendos proposuisse? Tales ego vermes (si vermes forent) in nulla non vena, arteriave reperissem; quin & in præcordiis quorundam equorum multiplices laceratas vidissem; nam & videbantur, neque deerant qui de abdito equorum morbo, & subito interitu earum morsus causarentur. Quantum igitur Malpighio debeamus, aliisque solertibus, qui de Cordis polypo scripserunt, Viris, vel quantum tibi, qui sicuti es Naturalis Historiæ consultissimus, quæ in quibus locis vivere animantia nequeant, docere soles, quod a falsis vasorum sanguinis vermibus non fallamur, tantum posthac Lancisio debebimus, quod a vermiformibus intestinorum polypis non amplius decipiemur.

2. Neque vero nos solum Medici, qui rerum nempe naturam ex hac parte melius scrutati, possumus idcirco majores Medici, ut Celsus (b) quidem arbitratur, existere; sed ægri quoque Lancisio debent, quibus videlicet ob eam rem medicinam fieri multo aptius posse, scio, te, & Medicos plerosque alios certis de causis non dubitare. Quibus animadverti causis hanc etiam addi rationem posse, quod si quis modo aliquam deiciat ejusmodi Fasciam, & nihil in ea sit quod vermis.

D

(a) Spigel. de Lumbr. Lato c. 5. (b) De Medic. in Præfat.



mis caudam, vel caput, vel extremam certe utramque partem repræsentet; nunc quidem non est profecto necessarium, ægrum propterea terreri, aut valentiore medicina vexari, qua scilicet relictæ intus lumbrici partes ejiciantur: quod utrumque fieri necesse erat, cum Fascia certi generis animal, certæque formæ, non con- crescens fortuito corpus, esse credebatur. Quo etiam tempore Medici (c) non deerant nobilissimi, qui Fasciarum aliquot latitudine cum longitudine earum collata, ex ea quam invenerant, proportionem, hujus postea exortæ Fasciæ, vel illius latitudine inspecta, quanta pars intus restitisset, colligere docerent, ex hoc vero quanta pharmacorum vi eas oporteret reliquias ex intestinis deturbare, scite illi quidem, & ingeniose, sed non sine ægrotantium periculo, certe non sine molestia, quæ ut esse supervacanea, ut non habere usum possit, nunc arguere ex tuis, & Lancisii Dissertationibus licebit.

3. Hic inquires, tu ergo præter polyposa ejusmodi corpora alios Latos Vermes agnoscis nullos? vel nihil ea te movent, quæ passim apud Medicos Auctores super Latis Vermibus scripta inveniuntur, quare non quidem inaniti, sed motu, vitæque præditi credendi sint? Ego vero, Antoni Doctissime, primum illud scire me, fateor, super natura Lati Lumbrici sententias circumferri potissimum duas, vel quod is vermis unus sit, vel quod series sit vermiculorum, catenatim inter se cohærentium: quarum sententiarum sicuti primam longe aliam esse, atque alteram, agnosco; ita longe aliud de hac quam de illa, & ipse sentio, & te arbitror sentire. De Lato igitur uno Vermine plures quidem extant observationes; sed quæ partim ab ejusmodi Auctoribus habitæ sunt, quorum imperiti oculi superiorem uteri cervicem a vagina, & quæ sunt similia, discernere, nedum vermis unus sit, an plurimorum series, internoscere non valent; partim vero ita proponuntur, quantum ego quidem legi, & in præsentia memoria teneo, ut ex earum lectione id colligere necesse non sit quod ab earum Scriptoribus intenditur, eos & vermes, & vermes simplices, non vero pluribus coagmentatos, extitisse. Multa enim eorum quæ afferri solent, quamobrem & vermes, & vermes simplices fuisse videantur, cum per Lancisium ostenduntur vel polypo, vel intermixtis etiam polypo vermiculis convenire, tum vero idem proclive est & de illis confirmare, & de aliis insuper ostendere quæ in rem eandem proferri possent: quo in numero præsertim sunt (d) sonitus natantis quasi piscis, & cauda aquam diverberantis, eminens quoque de ventre ægrorum exauditus, manu autem ventri imposita perceptus motus sicuti fœtus in utero conclusi, exeuntis denique Fasciæ, jamque adeo dimidii cubiti longitudine extra intestina propendentis, facta eodem unde prodierat, reversio, quod tamen factum quamvis Hippocrates indicaverit, vel potius quicumque ille fuit qui librum de Morbis quartum (e) conscripsit, Spigelius (f) quidem tradidisset constanter, vellem, non vero alibi ab se visum, alibi a quadam muliercula narratum. Earum itaque rerum causæ afferri tot possunt, & tam diversæ, sive intus conclusorum statuum motui, sive motui inverso convulsorum intestinorum, sive demum cohærentium vermiculorum seriei id omne placeat assignari, nihil ut cogat vel vivam propterea, vel unum certe lumbricum agnoscere. Quod porro addit Spigelius (g) ejus Fasciæ partem acetario sumpto dejectam esse, itemque ab esu acetarii Fasciæ ejusdem frustra depelli annis insequentibus consuevisse; id vero necesse non est factum dicere propterea quod acetum lumbricis, ut indicatum est a Majoribus, adversetur, cum acidi liquoris spicula, calore præsertim acta, & concitata, polyposa queant corpora perrumpere, atque dissolvere, quod commodum ab Lancisio in hac quam mitto, Dissertatione positum est.

4. Erit vero ita ego sentio, Latos plerosque Lumbricos aut non veros, aut non simplices vermes existere; cave tamen credas, Vir Clarissime, fieri meo judicio non posse, ut Latus aliquis Lumbricus qui verus, idemque unus sit, inveniatur. Nam neque est quidquam quod me ita cogat existimare, & certos quos-

dam planos ac oblongos vermes aliquando in canibus adnotavi: quorum vermium quoniam te scio descriptionem expetere; hanc verbis quam potero paucissimis adscribam. Itaque intra canum intestina corpora observavi quædam, ex substantia flexili quidem, sed densa, & compacta, lævia, albida, exanguia, palmum circiter longa, digiti auricularis dimidium lata, crassa autem perparum, sed qua etiam parte latiora sunt, tenuia, plana, depressa. Sunt enim in medio latiora, utrinque autem magis magisque quo propiora extremis fiunt, extenuantur sic, ut in acumen quasi desinant. Lateris utriusque ora crebris est, ac paribus utrinque incisuris sulcata, relictis intervallis majoribus qua corpora latiora sunt, minoribus qua extenuantur, idque tam certa lege atque ordine, ut cum quodvis corpus plurimorum quasi triangulorum series esse videatur, quorum sit vertex singulorum proximæ singulorum basi commissus, quodvis certissime triangulum quanto majus est, tanto latiori corporum parti, quanto minus, tanto extremis sit propius. Quamobrem si per notam aliquam & vulgatam lumbricorum imaginem hæc velim corpora qualia sint, monstrare, & ob oculos ponere; non per aliam facere id aptius possim, ac per eam parvulam quam ex Cornelio Gemma Spigelius (h), ex Spigelio autem cum alia insuper imagine, rebusque per pluribus Sennertus (i) descripsit. Cum qua tamen imaguncula nolim putare ea corpora ex omni parte convenire, multo minus hæc seriem esse vermiculorum inter se cohærentium, aut esse denique non lumbricos, sed polypos. Nam neque uspiam mihi corpus quodquam tam esse unum visum est, quam hæc corpora visa sunt: & quamvis viva, & se moventia invenire adhuc non potuerim; plures tamen, eaque graves, sunt causæ, quamobrem esse polypos, non existimem. Primum quod catellus in quo illa primo observavi, cum incredibili quadam siti, & fame correptus, iteratis demum subitis quibusdā paroxysmis, & veluti deliquis (quæ sunt sane omnia inter vermium notas) peremptus esset; mihi illius viscera, & omne corpus quam potui diligenter scrutanti, præter ingentem eorum corporum in Tenuibus intestinis congeriem, aliud mali exhibuit nihil. Præterea constans ille ordo, atque certissimus, quo & incisuræ, & intervalla disponuntur, & in singulis corporibus peculiaris eadem conformatio non motui quidem intestinorum peristaltico, non interioribus eorum anfractibus, quemadmodum incerta, rudis, & pene informis Fasciarum plurium adumbratio, satis recte, si quid ego hic judico, assignari possent. Quæ enim certa, & constantia sunt, ea certam quoque, & constantem habeant causam, necesse est; causæ autem prolatae duæ vel recrementis, præsertim durioribus, interlabentibus, vel polyposis aliis corporibus interjectis, dici non potest, quam crebro queant frustrari, & quam facile prohiberi, quo minus eadem lege, atque ordine describant & incisuras, & intervalla, & definitum versus corporum utrumque caput latitudinis decrementum, eaque non modo ab uno corporum latere, sed pariter, & convenienter ab utroque, non modo aliquot in corporibus, sed in universis, non modo uno in cane, sed in cunctis; nam certe in cunctis, quotquot scilicet ea corpora inesse vidi, consimillima observavi. Quibus omnibus de causis, aut ego quidem plurimum fallor, aut nihil vero propius est, quam quod ea corpora certa eadem, & præfinita ratione, qua lumbrici quoque cæteri, pronascantur.

5. Hæc ut rudia sint, & imperfecta, tamen quoniam tibi placuit ut haberes, morem gessi, & scriptitavi, eo quidem segnius, quo minus digna videbantur quæ in tuas manus pervenirent. Hæc enim (ut ad initium revertar) altera mihi causa exitit serius mittendi egregiam Lancisii Dissertationem, quacum scripseras scilicet, te super his rebus quas tecum Patavii locutus eram, longas a me litteras expectare. Tu primum da operam, ut valeas, deinde, ne Dissertationes laudatissimi Viri, ne tuas Vermium expectatissimas Observationes diutius publicæ invidere utilitati videaris.

D. Venetiis Postrid. Kal. Septembr. CIO DCCC VIII.  
DE

(c) Spigel. l. cit. (d) Idem ibid. c. 7. & 15. (e) n. 27.

(f) libro cit. Confer diligenter cum c. 17. caput 15. & 7. in primis. (g) Ibid. c. 15. & 14. (h) libro cit.

(i) Pract. l. 3. P. 2. S. 1. c. 5.



DE ACU INTRA VESICAM INTRUSA,  
ET DE EXCRESCENTIA MEMBRANÆ ADIPOSÆ  
EPISTOLA.

*Illustrissimo atque Amplissimo Viro*

D. D. LUCÆ SCHRÖCKIO

CÆSARÆ NATURÆ CURIOSORUM ACADEMIÆ PRÆSIDI MERITISSIMO

Joannes Baptista Morgagnus S. P. D.

**I**Mpositum nobis gravissimum ex hac Prima Sede Anatomæ tradendæ munus, non modo Novas Institutiones Medicas, sed ipsa quoque Adversaria Anatomica altera, & quidquid scriptitare cœperamus, de manibus excussit. Hinc factum est, ut quamvis nuperime per Melchiorem Otthum Scaphusianum, & nunc item per Casparem Mullerum Hamburgensem, egregios Viros, meique amantissimos Auditores, quosque adeo ambos, cum ille pro Syndico, hic autem pro Rectore, nostro Gymnasio præfuissent, manu mea Philosophicis, & Medicis Insignibus ornavi; ut quamvis, inquam, occasio mihi oblata sit aliquot ad te nostras

Observationes mittendi; feligendi tamen, scribendique tempus non habuerim. Attamen cum Mullerus, a quo tibi hæ reddentur Litteræ, alique ex Inelyta hac mea Natione Germanica mihi in memoriam reducerint Observationes duas, non ita pridem, nonnullis eorum inspectantibus, a me habitas, atque ut has saltem scribam, hortati sint; eas ex tempore huc adscriptas habebis. Quas si æqui bonique facies, complures alias, cum plus otii dabitur, mittemus. Vale.

D. Patavii XVII. Kal. Aug. M DCC XVI.

OBSERVATIO

Acus intra vesicam intrusæ.

**A**Nte hos duos annos Puella, tum primum pubescens, crinalem acum ex orichalco intra vesicam intruserat. Hæc non, ut pleræque solent, commenta est, devoratum imprudenter acumeo descendisse, sed quod erat, simpliciter facta est, incassum tamen, quia serius. Postea enim quam incredibili, præsertim in reddenda urina, dolore, & difficultate cruciata fuerat, tumor in altero Ilium accesserat, maturuerat, ruptus erat, jamque satis patentem fistulam reliquerat, per quam purulenta urina ita magis magisque in dies ferebatur, ut demum fere nihil lotii de meatu urinario egrederetur. Itaque Puella extrema tabe consumpta est.

Hæc cum mihi, & Antonio Vallisnerio, Viro Clarissimo, meique amicissimo, Puellæ Chirurgus narrasset, facile impetravit, ut sibi Cadaver dissecturo adesse vellemus. Discisso abdomine cum nihil effusi humoris in ventre appareret, ut vesica penitus in conspectum daretur, jussi, commissuram ossium pubis deduci, & alterum specillum per fistulam demitti, alterum per urethram subdi: utrique, & præsertim inferiori, quo minus vesicam subirent, prædurum corpus obstabat. Quod, dissecta vesica, grandem, & oblongum Calculum esse vidimus, hinc urethræ inhærentem eamque obstruentem, inde vesicam, ut erat contracta, & ut videbatur, crassefacta, propemodum opplentem. Nec tamen Calculo acus, ut solet, secundum longitudinem inerat; sed eidem acumine, & tertia quasi parte e transverso infigebatur; reliquæ partes duæ cum

præfixo capitulo intra fistulam, de qua supra dictum est, hiantem in latere vesicæ, delitescabant. Calculo exempto, animadversum est, purulentam subesse materiam, hujusque partem compressis visceribus superioribus in vesicam ex ureteribus defluere, ita dilatatis, ut Aortæ truncum facile æquarent. Eadem materia ureteres, eadem renes quoque redundantes disseccando invenimus, & subnigro colore infectos, quo colore tum vesica, tum fistula intrinsecus fœdabantur.

Illud hic potissimum admirationem habere potest, quod factum sit, ut cum altero acus extremo vesica pertundenda fuerit, non tenuiore, & acuminato, sed crassiore, atque adeo capitato pertusa sit. Crediderim, acum ad eundem modum in hac Puella sitam fuisse, ad quem in Dubliniensi illa, a Probyo curata (\*), nimirum ut acumen ad os ischium spectaret, quo osse obstante, & renitente, capitulum per vesicæ se contrahentis latus, & proximi abdominis imam partem sibi viam vi fecerit, eodem ferme loco, quo Probyus ad extrahendam acum sectionem instituit. Quod si quis idem hic facere priusquam accrevisset calculus, aggressus esset, nullo is quidem negotio per ipsam fistulam acum educere potuisset; non facile tamen, ut opinor, Puellam servasset, cujus vesicam, ureteres, & Renes diutius, & sæpius inter initia cohibitæ Urinæ copiam ea vi dilatando, diltrahendoque lacerasse, existimo, ut ex illo tempore semper tabo, ac pure maverint.

(\*) Vide Transact. Angl. Mens. Januar. 1700. pag. 455. vel Acta Erudit. Lips. A. 1701. Mens. Maj. pag. 230.



## O B S E R V A T I O

## Excreſcentiæ Membranæ Adipoſæ.

**M**ulieri quinquaginta, opinor, annos natæ, prægrandis tumor omoplatam dexteram occupabat. Is ante annos quatuordecim in ipsis communibus corporis integumentis sine ulla manifesta causa ex parvulo inceperat, & diu paulatimque sic increverat, ut post abſciſſionem pondo librarum quasi novem inventus sit. Nec durus quidem erat, neq̃ alio colore, ac reliquæ partes forent, nisi qua Venæ vehementer tumidæ sub ipsa cute discurrebant. Quarum una cum noctu dirupta forte eſſet, magnam vim sanguinis, dormiente Muliere profudit. Eo autem facilius dirupta eſt, quod proxima deorsum pendentis tumoris pars ima jam exulcerari sponte cœperat. Cum igitur dolori, quo ad mediam tantum claviculam, tumore cutem deorsum trahente, fatigabatur, ulceris molestiæ, & puris, cujus defluxu minime tumor decreſcebat, graveolentia accessissent, Mulier Chirurgum, ut sibi adjutrices manus præberet, exoravit. Hic vero cum non ignoraret frustra a quodam ante aliquot annos eundem tumorem alte apertum fuisse, ne gutta quidem humoris effluente, totum sibi tumorem ad ipsam basim excidendum eſſe, facile intellexit. Qua re non minus caute, quam feliciter perfectâ, non ita longo pro ſectionis amplitudine interjecto tempore, cicatricem induxit.

Cum ad me, qui abſciſſionis auctor fueram, tumorem detuliſſet, vix baſi inſpecta, quod ante conjectura præſagiveram, oculis ipsis uſurpavi: nihil tumore, nisi adiposos ſacculos, comprehendi. Cute craſſefaſta, cum ſubnexis Vasis ſanguiferis, detracta, undique in conſpectum venere membranei ſacculi, digiti pollicis craſſitudine nonnihil inflexi, ſed tamen ſecundum tu-

moris longitudinem poſiti, cylindri figuram; magnam partem referentes, & ab incluſa pinguedine ex albo flaventes, quorum parietes vaſcula ſanguifera perreptabant. Eos ſacculos proclive erat reſolutis digito membraneis vinculis ſejungere, itemque ſingulos in plures alios minores diducere, hos autem denique in minimos, intra quos exiguæ, & innumera veſiculæ adipe diſtentæ, adhibito præſertim microſcopio, facile apparebant. Hæc erat omnis tumoris ſtructura. Cujus cum partem ſuppoſito igne liquari juſſiſſem, perpaucis membranis colando abjectis, ejuſdem rationis adipem habuimus, cujus ex ſaniſſimi cujuſque hominis Adipoſa membrana habere ſolemus.

Hæc cum ita ſint; haud difficile eſt intelligere, hunc tumorem ab Adipoſæ membranæ ſacculis excitatum eſſe, primum cedente (quæcunque ea cauſa fuerit) cute; laxatis, deinde juvante ipſo, quo diſtrahebantur pondere, mirum in modum diſtentis. Neque huic *Excreſcentiæ Adipoſæ Membranæ* admodum diſſimilem (ſi duritiem excipias) tumorem illum fuiſſe, crediderim, quem Scapulæ alterius Mulieris innatum Blaſius deſcribit in *Observationum Medicarum Rariorum Parte I. Obſerv. III.* vel quem Jo. Philippus Ingraſſias in calce libri ſui de *Tumoribus ſe*, inquit, *in Scapulis dumtaxat ortum vidiffe, nec vere carnem, ſed adipem in eo contentam inſpexiſſe.* Ego tamen memoria teneo, A. 1704. cum Bononiæ eſſem, ejuſdem generis, ac ſtructuræ tumorem vidiffe, de nate Viri cujuſdam a Cl. Valfalva exciſum. Figura iſ, & magnitudine pueri caput æquabat, nec lata quidem baſi, ſed arcto, ejuſdemque tamen ſtructuræ petiolo cum Adipoſa membrana cohærebat.

D E C A L C U L I S F E L L E I S  
E P I S T O L A.

## A D E U N D E M.

**Q**uod munuſculum iſtud meum Tibi gratiſſimum fuiſſe, ſcribis, agnoſco tuam, Vir Ampliſſime, humanitatem, cum illa etiam ex meis Scriptis, quæ non a me quidem, ſed ab Amicis publica luce non indigna credita ſunt, minime contemnis, ſed qua ſoles benignitate excipis, eoque mihi animos addis ad nonnulla augenda, atque illuſtranda, quæ in duabus illis *Epistoſis Anatomicis* edita fuerunt, ad Rem noſtram potiſſimum Naturalem, ac Medicam pertinentia; velut ea quæ in I. *Epistola de calculis ſcripſi veſiculæ felleæ.* Igitur ut præclariuſ intelligas, quanti referat id, quod monui, in experimentis circa ipſos capiundis non eſſe omittendum animadvertere, veteres ſint, an recentes; accipe quid ſemel, iterum; tertio acciderit mihi: inde enim patebit, non modo inter veteres, & recentes, ſed vel inter recentes, ac recentiſſimos magnum intercedere diſcrimen poſſe.

Ante hos duos annos III. Kal. Decembres in hujus Urbis Noſocomio Cadaver Mulieris incidebamus egregii coloris, atque habitus, quam ſexageſimum ferme annum agentem thoracis inflammatio ſuſtulerat. In fellea cyſti multo quam ſoleat, brevior, intra paucam, flavamque bilem lapilli inerant, minimum, triginta ſupra trecentos: ex quibus ſeptem & viginti majuſculi, ſic tamen ut maximus ſit infra Ciceris magnitudinem, reliqui minores, atque adeo plerique minimi. Majorum color iſ eſt qui ſaponis vilioris, cæ-

terorum qui minus vilis, ut cum omnes ad ſubviridem inclinent colorem, eo magis ad atrum vergant, quo majores; eo magis ad pallidum, quo minores: Sed & quaſi unguinoſum quendam ceu confricati ſaponis lævorem, quantum in nullis aliis vidiffe memini, ad hunc uſque diem retinent: ac bini, terni, quaterni, plures adhuc inter ſe leviter cohærentes ſpectantur. Quas ob res, aliasque, ipſorum peculiareſ, non ita miratus ſum, quod vel tunc, bile adhuc madentes, vel paucis poſt diebus, vel tribus jam interpoſitis menſibus in aquam dejecti, continuo ad imum laberentur, neque inde ſe ſe attollerent. Menſe tamen fere jam quarto animadverti, ex majuſculis duos neque ſtatim, & multo tardiore motu a ſumma ad infimam aquæ partem delapſos. Anno exinde interjecto, placuit quinque ſeligere alios alia magnitudine, quos in aquam projicerem: Hi ſtatim ad fundum univerſi corruerunt. Inde protracti, cum poſt horas admodum duodeviginti idem tentarem, tres quidem, duo videlicet majores, & minimus conſeſtim ſubſedere; ſed ex reliquis duobus, qui mediocri erant magnitudine, alter in ſummo pauliſper ſubſtitit, alter etiam paulo diutius, donec aqua digito commota protinus ad imum deſcendit, hos poſtremos ſingulos ſingulæ deorſum comitatæ ſunt bullulæ, quas eorum lateri adhærentes, vidi ex quo primum aquam tum attrigerunt. Denique hiſ ipsis diebus viſum eſt ex qualibet magnitudine alios in aquam projicere, alios

nulla



nulla addita vi projectionis, leniter in summa aqua collocare. Ex his ne unus quidem inventus est qui descenderet; sed omnes tandiu in eodem loco perstiterunt, quamdiu sicca fuit eorum suprema facies. Ubi vero digito depressos aqua semel operuerat, vel aquæ gutta, aut desuper projecta, aut etiam sine projectione admota supremam faciem attigerat, extemplo ad imum decidebant. Ex illis autem, quos in aquam dejeci, minimi omnes illico fundum petierunt, sed majorum quidam posteaquam aliquanto spatio descenderant, inde emissæ bulla, cum hac ad summum recurrebant, mox vel ipsa evanescente, vel arcte semper cohærente ad fundum ruebant. Tunc etiam, si aquam manu in gyrum agerem, ita ut omnes dimoverentur, ex majoribus unus potissimum, cui paulo grandior bulla adhærebat, præ cæteris ascendere nitabatur, & tardissime omnium subsidebat. Quæ si non cuncta, certe aliqua ostendunt, esse inter veteres, ac recentes Calculos non leve discrimen posse.

Id vero manifestius cognoscere ex his, quæ protinus subjiciam. Nonnulli enim ex meis Discipulis superiore anno XII. Kal. Januarii Virum dissecantes nequaquam ictericum, sed ob fractam cervicem femoris ante duos menses in idem Nosocomium delatum, ibique ex superveniente catarrho mortuum, cum in vesicula ipsius fellea, crassioribus tunicis compacta, calculos quatuor deprehendissent, non ita parvos, eosque prorsus nigricantes, nisi quod aliquot in locis, unde extrema abscessisse quam tenuissimam lamellam videbatur, medius inter viridem & cæruleum, quem in aliis calculis vidisse non memini, apparebat color, cumque ad me domum postridie attulissent, integros duos, jam ruptos reliquos, ego vero illico in plenam aquæ pelvim jecissem; tunc quidem sine mora ad fundum omnes collapsi sunt. Verum mensibus inde vix tribus, cum integri illi duo forte sub manum redissent, eosque in aquam conjecissem; eodem illo vestigio temporis se in summum ambo restituerunt, ibidemque ad duodecimam horæ partem constiterunt: quo spatio bullulis emissis pluribus, tandem in imo subsederunt. Non est meæ fidei dissimulare, inde tum extractos, horisque interjectis fere viginti in aquam iterum projectos, quamvis nihilo tardius se in supremum locum retulerint, in hoc tamen longe brevior, immo quam brevissimo tempore substituisse. Verum illud est attendendum, cum in hoc quoque experimento & priusquam fundum peterent, & dum peterent, bullas edidissent, mox de aqua protractos altas utrumque fissuras ostendisse, ab altero etiam fragmentum abscessisse; ut quantumvis sine ullo effervescentiæ sonitu, idem utrique accidisse videretur, quod lapidibus in calcem excoctis, cum in aquam dejiciuntur. Quod multo evidentius nuper fuit, cum eum videlicet qui unus restabat utcunque integer, ad alia, atque alia experimenta adhiberem. Nam cum summæ aquæ ita imposuissim, ut facie qua fissus erat, aquam non attingeret, cumque ibi tandiu perstitisset, donec re satis spectata, totum ipse digito mergerem, ac tum deum subsedisset, mox autem extractus, & vel aquæ ad eundem modum impositus, vel postquam extrinsecus madorem absterferam, in illam projectus, semper sine mora descendisset, bullasque ex ima ad summam aquam emergentes dedisset; animadverti in omnibus jam faciebus fissuras tot novas, ut qui antea paulo etiam rudiorum attrectationem ferebat, jam jamque ad levem attractum in fragmenta abiturus, ut reapse mox abiit, videretur.

Sed postremo loco eam, Vir Clarissime, observationem adscribam, ex qua constet, quantum vel recentes calculi possint ab recentissimis differre. Anno eodem XVI. Kal. Aprilis in sæpe memorato Nosocomio fœminam secabamus annos aliquot natam supra sexagesimum. Ne hæc quidem, regio erat infecta morbo, neque undecim totos quos ibi egerat, dies ulla alia fuerat de re conquesta, nisi de gravi capitis ictu, ob quem ipsum ex hac vita migravit. Cum ea quæ in I. Epistola Anatomica, cum aliis de rebus, tum præsertim de jecinore, ejusque vesicula tradita erant, nova (id quod sæpe fecimus) demonstratione confirmaremus; in eadem vesicula, bile semiplena, quæ vivida quasi auri pigmenti flavedine quæcunque attingeret inficiebat, lapillos invenimus decem

alios aliis minores, sed omnes sic satis magnos: qui ibi continuo in aquam projecti, extemplo ad fundum universi deciderunt, in eoque permanserunt. Neque id nobis permirum accidit, quippe qui singularem quandam in ipsis colorem spectabamus (qualem etiamnum ostendunt, ubi quis eorum superficiem mader faciat) subnigrum videlicet, aureis hic illic maculis, lineisque distinctum, atque ita eleganter splendidum, ut nihil magis, quam res peculiari artificio pictas, & vernice, ut vocant, Sinarum perlitas repræsentarent. Illud potius mirum fuit, quod postridie ejus diei cum amplius non maderent variumque illum (nisi quod minime splendent) referrent colorem, quem in tegumentis videmus librorum, quos ita uti apud Gallos solent, compingunt, in aquam conjecti, nonnulli quidem non secus ac pridie, in imo manserunt, plerique autem e vestigio ad summum redierunt: neque tantum ibi consistebant, verum etiam quantumvis manu ad imum compellerem, statim atque amovebam manum, supremum locum repetebant: eoque id magis mirum erat, quod inter eos, qui innatabant, & qui subsidebant, nullum seu coloris, seu figuræ animadverti discrimen poterat, sed ne magnitudinis quidem, cum in utrisque majores, minoresque promiscue conspicerentur. Proximis diebus idem experiri non vacavit, donec post septimum jam diem cum forte periculum facerem, ne unum quidem invenire calculum qui ad fundum usque descenderet, sed universi e medio ipso descensu victa projectionis vi, sese in summum referebant: neque manu cogi poterant ut sub aqua diutius essent, quam manus ipsa, qua sublata, illico in pristinum locum se agebant. Eadem anno post toto, eadem his ipsis diebus quotiescunque experiri placuit, spectavi. Ex his calculis egredi bullas nunquam videram, cum diligentius, ac propius attendens in iis quæ anno exacto, & quæ novissime cepi, experimentis, longe plurimas, sed visum ob parvitatem ferme effugientes bullulas animadverti, calculorum superficiei quæ sub aqua natabat, adhærentes, interque has, nonnullas aliquanto majores. Quas tamen cum omnes absterfissim, sic ut nulla amplius bullula iterum mergendo conspiceretur; non minus quam antea, in summa aqua perstabant calculi, neque minus prompte, cum manu deprimerentur, eodem redibant. Visum tunc est eos omnes seu flavescere, seu plumbeos, seu fuscios, seu demum nigros, quos in I. Epistola commemoravimus, in aquam projicere. Et omnes quidem in summum ut semper alias, se se illico restituerunt, ibidemque permanserunt; bullas tamen non omnes, sed aliqui dumtaxat, easque longe paucissimas sibi adhærentes ostenderunt. Quæ etsi leviora videri possunt, tamen nolui prætermittere, si cuiquam forte pertinere existimarentur, vel ad causas cur alii aliis calculis facilius, aut difficilius innateant, vel ad singulorum structuras, & augescendi rationes penitus indagandas.

Has vero ipsas ob causas quidquid in propositis generibus tribus sive extrinsecus, sive intrinsecus spectando, sive ad flammam admovendo observavi, reticendum esse, non puto, præsertim cum in hoc quoque experimento nonnulla aliter in recentibus, aliter in antiquis observaverim. Igitur de tot Calculis ne unus quidem formam habuit regularem, neque ad ovalem, aut ad sphericam accessit, sed magna pars ad eam potius, quam in Epistola indicavi; immo ex minimis illis primi generis, quos fuisse plurimos, scripsi, plerique nil magis referunt, quam communis salis particulas, sic, ut non longe abesse a cubi, nedum a cuboidis figura videantur. Ex iisdem minimis, ut plures inter se leviter, cohærentes vidi, ita querere placuit nuper, an forte arctius juncti majusculos illos, quos una reperi, composuissent: quæ res ad calculorum generationem, aut certe incrementum intelligendum prodesset. Verum majusculis dissectis, nulla ejusmodi compositionis vestigia deprehendi; quin immo hunc certum vidi structuræ modum, ut sub perpetuo, firmoque cortice obscurioris coloris, stratum succederet flavum, ipsum quoque perpetuum, nisi quod ex innumeris constabat, ac confertissimis lineolis, centrum versus contententibus, quod denique non durius aliquod corpusculum, sed nucleus non ita parvus occupabat ex concreta bile, quæ flavo qui-



vo quidem illo strato obscurior, non cortice erat, cortice autem mollior. Quod si lapilli majusculi nihil nisi minimi fuissent inter se nexi; eam certe quam descripsi structuram, hic illic interruptam vidissem faciebus, ac duro cortice minimorum: quem videlicet cum secarem, satis crassum pro mole inveni, & facile; ut siccatus humor oculi crystallinus solet; in lamellas circumjectas nucleo dissilientem; nucleum autem ipsum propter parvitatem non licuit, nisi subobscurè conspicerè, neque flavum illud ex lineolis stratum agnoscere. Quæ tamen cum in aliis pluribus præclare viderim, ut in III. etiam *Adversariis* (a) indicatum est, immo in iis quoque calculis quam luculentissime pateant quos supra tertio loco proposui; illis enim amplissimum id stratum est, oblongisque lineolis ab alba corticis lamina quæ extimæ subest ad nucleum usque biliosum pertinet, qualem in iis *Adversariis* descripsi; profecto ob hanc, aliasque præterea causas haud alienum est a veri similitudine, easdem fortasse ne in minimis quidem calculis omnino deesse, præsertim cum in iis, quos inter majusculos, & minimos media magnitudine inveni, calculis biliosus jam sese nucleus satis ostendat, nonnullis hic illic quasi punctis distinctus splendentibus, quibus ut majusculi, & tertii generis calculi secus atque illi quos in *Adversariis* commemoravi, suos quisque nucleos habent distinctos. Huc illud addendum est, me in aliis omnibus, si nigros excipias, quos ad hanc diem secui, cystitis felleæ calculis, biliosum nucleum, singulorum molire respondentem, invenisse minorem in parvis, in grandioribus magnum, in mediis inter utrosque mediocrem, eumque (id quod magnopere est attendendum) molliorem, dum recentior esset, ac plane humidum.

Quæ omnia vereor, ne quem forte illuc impellant, ut cogitet, per cortices, quantumvis impervii videantur, bilis fortasse particulis satis patentes, atque adeo per eadem illa aut alia eorum non absimilia, unde aer in bullas prodit, foramina novam usque, & usque bilem grandescere calculo, sese immittere, ac corticem primum, deinde inter lineolas illas trajectam, has quoque deinceps, novissime in centrum corripata, nucleum etiam ipsum, eodem universa tempore, in dies augere: neque enim fortasse corticis firmitatem, ac duritiem vel minimis in calculis deprehensam, vetare, quominus hic novis sese insinuantibus, ipsumque augmentibus bilis particulis dilatetur, nucleoque magis, magisque augefcenti locum det, quando puerorum quoque, & adolescentum ossa non teneriora illo sunt, & novis tamen intrusis ossibus additamentis ita laminas distendunt suas, ut crescenti in dies medullæ ampliorem intra se caveam parent. Hæc etsi mihi, nihil hic, nisi quæ vidi, affirmanti, neque refutare, neque probare necesse est; hoc tamen dicam, mea quidem scripta ipsa per se satis indicio esse, me ex quo primum in felleis calculis laminas laminis circumjectas adnotavi, in eam opinionem venissem, has extrinsecus aliam post aliam superinduci ab adhærentibus in dies novis ex bile particulis nucleo videlicet primum, laminis deinceps singulis, ut quælibet a nucleo ad superficiem ex ordine consequuntur: quam augefcenti rationem ea nimirum indicabat, quæ, ut tute scis, Vir doctissime, non absimilis iis in calculis apparet, qui in aliis animantium cavis, ac nominatim ventriculo, vesicaque urinaria, circum vel herbæ cauliculum, vel intrusam, relictamque acum, aut turundam, aut aliud ejusmodi lamellatim concrevere. Ab hac opinione etsi non sum temere discessurus; non tamen facile adduci possum, ut credam, cum intra hos ferme triginta annos tot calculos viderim e tot vesiculis felleis, sive meis, sive Amicorum manibus exemptos; fuisse omnes recens genitos, antiquum nullum. vel si alii antiqui fuerint, alii novi, neque sint perviæ humori lamellæ singulæ, nec recentibus incrementis dilatabiles; non quærendum esse, quæ causa igitur alia sit, qua nucleus in novis pariter, & antiquis calculis, mollis, atque adeo humidus conservetur, & quare iis nucleis, qui magni sint, plures pro rata portione, crassioresve laminæ accrescant, iis vero pauciores, tenuioresve qui parvi. Quod quidem

an repetendum ex eo sit; quod grandescuntibus fortasse calculis lamellæ hic illic diffingantur (ut certe in majoribus non paucis, fere ad extimum usque corticem diffractas vidi, concreta bile, qualis in nucleo est interstitia fracturarum opplente) lamellæ autem diffractæ & bili vias ad augendum nucleum, & huic locum ad crescendo amplificent, atque ea lamellarum infractio an bilis ipsius effectus sit se se prius per lamellarum foraminula insinuantis, & augere nucleum nitentis; non ante ausim constituere, quam occasionem nactus sim, sæpius, ut soleo, in multis aliis præterea calculis, & grandioribus præsertim, quam quos ad hoc tempus inciderim, has omnes, aliasque insuper observationes iterandi, & quid constans, quid frequentius, quid rarius sit, animadvertendi.

Nunc vero; ut illuc jam redeam unde videor divertisse, etsi paulo ante nigros calculos excepi, non ideo feci, quod non iisdem ferme rationibus hos crescere existimem, sed quod nucleum contineant, qui habitu, & colore minus evidenter biliosus esse videatur; Nam ut alios olim, ita hos etiam quatuor, de quibus supra dictum est, sub nigro cortice nihil nisi materiam complecti video taram, ac friabilem, ipsoque cortice in his saltem quatuor nigriorem, nonnullisque hic illic punctis splendentibus distinctam. Quam una cum cortice recentem adhuc cum ad flammam apposuissem, ardere quidem, & levius crepitare, sed neque scintillare, neque in guttas liquari, neque flammam fervare, & quod pennæ combustæ olent, redolere, animadverti: quæ ad eundem modum omnia his quoque diebus comperi, nisi quod concepta flamma, quam brevissimum tamen ad tempus, servabatur. Ex iis autem calculis, quos primo loco descripsi, eadem hodieque & majores, & mediocres, & minimi observanda præbent, quæ unus ex majoribus olim præbuit, cum vix e vesicula extractus, a me flammæ esset admotus. Scilicet crebro cum crepitu scintillas edunt, resinofum haud ingratum odorem effundunt, toti in guttas colliquefunt; flammam tamen non concipiunt, neque in flamma ipsa ardent; quod in nullis aliis cystitis felleæ calculis, non recentibus præsertim, ad hoc tempus observavi. Nam eorum quos tertio loco proposui, fragmentum memini postridie quam de vesicula educti fuerant, quatenus ad flammam crepitando scintillaret, in guttasque, ingrato cum odore, liquefere, flammam tamen eo quidem tempore non concepisse. Verum cum hæc scriberem, quælibet illius ejusdem calculi fragmenta alia, cum reliqua omnia, de quibus modo dixi, ad eundem adhuc modum præstarent, non tantum flammam conceperunt, sed præclarissimam, si quod aliud unquam, & ad finem usque constantissimam aluerunt.

Quæ si omnia perpendere, & conferre inter se voverimus; nimirum magis, magisque apparebit, usque adeo verum esse quod in I. *Epistola* (b) scripsimus, sub consimili calculorum facie, & colore dissimilem posse compositionem latere, ut hanc uni iidemque calculi spatio temporis interdum mutent. Sive enim aqueis particulis magna ex parte evanescentibus, sive alia id nova interna causa ferente; nigri illi certe aliquanto, hi autem postremi longe magis idonei facti sunt tempore ad alendam flammam, eademque ratione minus etiam facti sunt graves, ut nigri sic satis diu, hi postremi semper in ejus aquæ summo innataverint, cujus olim continuo ad fundum ruebant. Hoc autem posito, minus mirum est, illos contra, quos primo loco descripsimus, vel longiore interjecto spatio in aquam projectos, non æque innatare potuisse, cum flammam alere nunquam potuerint: quam certe nondum vidimus ab ullo calculo non servari, quem constanter in aqua natare videremus.

At cum sint tamen innumeræ compositiones ut morbosæ bilis, sic calculorum, qui ex ea gignuntur; nihil facile de hisce in universum pronuntiabimus; sed quod ad hanc diem fecimus, id porro facere pergemus, ut quidquid in singulis observaverimus, hoc satis sit nobis cum aliis communicare, sperantes, fore ut sic ipsi, eorumque natura magis, magisque dignoscantur, neque Medicis, qui hæc norint, accidat, ut ob



# DE VENÆ CAVÆ VARICIBUS.

31

ob unum; aut alterum, quod nonnunquam forte desit, nec diu fortasse defuturum, indicium, quantumvis maxime celebratum, biliosos aliquos, dejectos ex alvo calculos, temere negent esse biliosos; sed cæteras, idcirco a nobis semper adjectas, attendant notas, & nimis præceps iudicium cohibeant. Hanc si

spem nostram haud prorsus inanem Tu, Vir sapientissime, esse censueris; tum hæc in medium proferre poteris: sin autem; apud Te premes, neque minus me tamen amabis, & valebis.

D. Patavio Idibus Decembris CIO IDCC XXVIII.

## DE VENÆ CAVÆ VARICIBUS EPISTOLA.

ERUDITISSIMO VIRO  
ANTONIO COCCHIO  
MEDICO EXPERIENTISSIMO

Joannes Baptista Morgagnus S. P. D.

Utinam is essem, Vir Doctissime, quem Tu pro singulari Tuâ humanitate facile putas, ut triste Tibi, ac bonis omnibus Consultissimi Lancisii desiderium meis possem responsis lenire. Haud equidem inficias iverim, me in quærendis per Anatomen ut bonæ, ita etiam adversæ valetudinis causis non levem ab ineunte ætate operam posuisse. Veruntamen hic noster mediocris usus neque est cum longa Experientissimi Viri exercitatione comparandus, & si vel maxime esset, non ea tamen nobis incredibilis vis ingenii, non ea summa eruditio, non denique tot alia suppetunt quæ ille ad habitas ab se observationes in abditis retrusisque rebus vestigandis adungebat. Quæ sane omnia, si qua alia, certe a te proposita disquisitione postulat, atque adeo flagitat. Cavæ namque venæ penitissime latent, & cum dilatantur, eæ facile affectiones vel antecessere, vel (quod tu egregie observasti) subsequuntur, ut minime omnibus proclive iudicem ipsam illarum dilatationem aut in ægrotantibus per propria ac peculiaria signa ab reliquis internoscere, aut in denatis inter tot alia, quæ Anatomici oculos, manusque morantur, vitia animadvertere.

Quamobrem factum esse, existimo, ut quamvis morbus iste fortasse rarus adeo non sit; perraræ tamen ejusdem Observationes legantur: quæ cum præterea non ea diligentia qua opus esset, conscriptæ sint; vix nobis usui esse possunt. Quo magis in tantis tenebris tuos, Vir Eruditissime, præclaros conatus admiror, atque commendo, auctorque sum, ut observando, meditandoque rem tandiu obscuram magis magisque il-

lustrare pergas. Fructum sane capies istius operæ non contemnendum. Cum enim homines plerique in gulam, cæterasque voluptates multo sint brutis animalibus propensiores, magnisque præterea curis, animique affectibus obnoxii; quas videlicet ob causas sanguifera vasa tum multo, & erodente sanguine opplent, tum eodem sæpius remorante distendunt; neque tamen circum extremos venarum Cavarum truncos tam validum circumvolutum habeant musculum, quam bruta nonnulla, in quibus rubicundi insignisque sphincteris instar esse, observavi; nihil hercules facilius fieri videtur posse, quam ut trunci illi, ad quos quidem (ut recte animadvertum abs te est) effœtus, crudisque adhuc, & crassioribus succis onustus sanguis appellit, in magnos interdum varices dilatentur. Quos si Medici persanare nequeant; at eos ut dignoscere saltem, & diutius a ruptione per institutam, quoad licet, phlebotomiam, per blanda, & in his vulneraria, medicamenta, per aptamque in primis victus rationem tueri possint, maximopere optandum est.

Vides igitur, Experientissime Cocchi, quantæ susceptum a te laborem utilitati fore, censeam, quantoque propterea opere a te petam, ut quod egregie incepisti, præclare absolvas. Mihi sane, quod me potissimum selegeris quicum tua ista optima studia communicares, gratissimum fuit: idque ut intelligas, omni erga te officio omni tempore curabo. Vale, & me, quod facis, ama.

D. Patavii Postridie Kal. Julias CIO IDCCXX.

## DE VESICÆ CALCULIS A FR. JACOBO BEAULIEU PATAVII EXSECTIS, ET DE CASU CORNELIÆ BANDIÆ EPISTOLA.

Clarissimo Regiæ Parisiensis Academiæ Scientiarum Sodali

SALVATORI MORANDO

Joannes Baptista Morgagnus S. P. D.

Cupienti mihi quacunque in re possim, præstare me gratum non modo universis, sed etiam singulis Regiæ istius Academiæ Sodalibus, nihil facere jucundius potuit Petrus Antonius Michelottus Medicus Doctissimus, meique amantissimus, quam mihi per litteras significare quæ Tu, Vir Clarissime, scire

averes de vesicæ calculis, Patavii exsectis a Jacobo Beaulieu, quotnam videlicet, ac quo exitu, atque id genus alia. Proclive est mihi ex parte aliqua in re hac, utinam æque in cæteris, satisfacere. Memoria enim teneo, cum Venetiis essem anno 1708. venisse illuc Patavio Dominicum Gulielminum, quocum Præ-

stant-



stantissimo Viro magna mihi erat amicitia, eumque in sermonibus, ut fit, narrasse, reliquisse se graviter ex vesicæ calculo ægotantem Variscum Zambellium Patricium Venetum, affecta ætate hominem, febricitantem, attritis viribus, eoque corporis habitu, ut Thomas Alghisius, nobilis ea tempestate apud Florentinos Lithotomus, curari posse, desperasset. Alghisio autem domum reverso, advenisse nuper ex Insubria Eremitam quendam Gallum, qui desperatam ab Alghisio curationem se suscepturum promitteret. Num, inquam, ille est Eremita de quo Doctos Homines alios aliter scribentes legimus, nimirum hinc Joannem Meryum in peculiaribus Observationibus, inde vero Mauritium Reverhorstium in Epistola quæ apud Ruyschium inter Problematicas est XIV.? Qui hæc non locus atque ego, perlegisset, facile rediit in memoriam Gulielmus, pollicitusque est, si is esset quem suspicarer, ubi Patavium redisset (rediturus autem erat posttridie) me continuo certiorum facturum. Quid quæris? Is ipse erat. Quo diligentius quid ageret, & quo exitu ageret, inquirendum existimavimus. Nam et si Zambellii Consanguinei, Amicique quis esset edocti, multoque etiam magis Medici vehementer timebant; contra Ager, dolorum, & vigiliarum pertæsus, animum obfirmaverat, ut Eremitæ manibus se se committeret. Curationis exitum, qui longe felicissimus fuit, probe memini. Cætera quæ tunc Gulielmus ad me scripsit, & coram postea confirmavit, longa dies facit, ne pariter queam singillatim meminisse.

Aloysius tamen Martinius, quo Zambellius Pharmacopola utebatur, cum sectioni interfuerit, & quæ Eremitæ medicamenta suppeditaverit, adscripto quibusque die, ex officinæ suæ libris præclare sciat, priusquam hæc ad te scriberem, a me diligenter interrogatus, pro certo affirmavit, Eremitam neque Aegrum vixisse, neque dolore ullo, qui animadversione dignus esset, cruciasse, nisi cum antequam secaret, catheterem in vesicam demisit. Sulcatus hic esset, an non, haud potest meminisse. Sed horum meminisse se, dicit, ad medium potius, & recta, quam ab latere, & oblique sectionem factam majori scalpello ancipiti, & magna ex parte fasciola obducto, secundum catheteris ductum adhibito: ex eaque sectione vix aliquid sanguinis effluxisse; tum forcipe immissa, arreptum lapidem cito, nec sine vi quadam, fuisse extractum, magnum, & cui firmiter caruncula quædam adhærebat: tamen intra quindecim circiter a sectione dies vulnus ad cicatricem fuisse perductum, neque Aegrum amplius, quo ad vixit (vixit autem ad quinquennium) molestiæ, aut incommodi quidquam ad vesicam esse passum; sed longe alio morbi genere decessisse. Quæ ut magis mireris; scias, supra sexagesimum annum fuisse natum cum ei calculus exsecutus est, colorem autem vulneris (id quod ad me Gulielmum scripsisse, memini) primis diebus ad lividum inclinasse, magno cum omnium metu.

Si forte quæ remedia adhibita sint, quæris; accipe fideliter descripta ab die quo sectio instituta est, qui dies fuit X. Kal. Junias ad diem usque earundem Kalendarum; neque enim postea quidquam a Pharmacopola petitum est: quæ res ipsa curationis celeritatem confirmat. Sic igitur ejus libri habent.

Die 23. Maji An. 1708. Ungu. rosat. Mesues lbj. Terebinthina Ven. lbj. Boli Armen. Orient. p. p. ʒj. 5. Spir. vin. rectif. ʒx.

Die 24. Ol. hyperic. ʒij.

Die 25. Cerati Diachyl. ʒijj. Aloes, & Myrrhæ pulveris. ʒiv. Spir. vin. rectif. ʒx.

Die 27. Cerati Gratia Dei ʒvj. Ol. hyper. ʒviij. Terebinth. Ven. ʒviij. Aloes, & Myrrhæ pulveris. ʒvj. Ungu. ros. Mes. lbj.

Die 30. Myrrhæ pulveris. ʒj. 5. Aloes pulveris. ʒj.

Die 31. Cerati Diachyl. ʒiv.

Die 1. Jun. Cerati Diachyl. ʒijj.

Quibus remediis Eremitam ad vulnus quoque pauperis pueri circiter septennis, quem biduo post Zambellium in hujus ædibus eadem omnino ratione secuisse, & mediocri educto calculo, pari felicitate persanasse, & tunc audivi, & idem qui huic quoque alteri sectioni interfuit, Pharmacopola confirmavit.

Præter has duas, aliam nullam, quod sciam, in hac, aliisve proximis habuit Urbibus, ut in quibus credo ob certam vinorum, & aquarum naturam rarius calculo homines laborant: quæ etiam causa fortasse fuit, cur cito hinc Eremita discesserit. Habes de ipso quæcunque scio.

Est vicissim quod scire ipse ex te velim. Thomas Bartholinus in primum Actorum Hafniensium Volumen quandam conjecit Observationem sub num. cxviii. de scæmina Parisiensi, quæ ex spiritus vini abusu *flammam* ipsa per se conceperit, ex qua tota in fumum, & cineres abierit, excepto cranio, & digitorum extremis. Quod ego quidem eo difficilius credebam, quod is cujus verbis illud Bartholinus retulit, Matthæus Jacobæus pronior ad credulitatem videbatur, cum vel eas legebam quæ sub ipsius nomine proximæ præcedunt, Observationes. Sed quoniam Eruditi ex nostratibus Viri, qui Cornelie Bandiæ, Cæsenatis Matronæ, nuperum casum a primo incredibilem, re autem vera istius, ut videtur, non ita dissimilem, vulgatis Opusculis explicare sunt conati, ista Jacobæi Observatione, quasi certissimo exemplo altero nituntur; quam gratissimum mihi feceris, si forte istic aliqua vestratæ casus memoria superest, quidquid veri de ipso inveneris (quod tuo commodo quærere poteris) rescribendo (\*). Nam aut verus fuit, aut ab iis qui Jacobæo narrarunt, confictus. Conficti novum mihi argumentum erit, si Docti omnes apud Vos Homines ignoraverint; neque enim simile veri est, rarissimum, ne dicam incredibilem, ejusmodi casum in Litteratissima Civitate accidisse, & neminem animadversione dignum, & quod consequitur, litterarum monumento aliquo censuisse. Si contra verus; minus hunc nostrum, quem ut verum fuisse, inter omnes constat, sic quæ causa effecerit, non constat; minus, inquam, hunc nostrum mirabor, quando abs te certior factus fuero, jam pridem apud Vos quoque non multarum horarum spatio incogniti cujusdam ignis vi mulieris corpus ferme totum, atque adeo ipsa ossa in cinerem fuisse conversa. Vale, Vir Clarissime, & meis verbis Sodales omnes Præstantissimos avere jube.

D. Patavii posttridie Kal. Januarias CIO DCCC XXXII.

Cum hæc scripsissem; forte accepi, Eremitam in hoc Nosocomio Chirurgis junioribus exsecandi calculi rationem in cadavere virili ostendisse. Ex eorum qui interfuerunt, numero spectatus nunc Chirurgus Philotheus Thomasius, a me interrogatus, affirmat, sulcatum catheterem immisisse, & secundum hujus sulci ductum rectam, & valde oblongam sectionem cultello non ancipiti peregissee. Quam antequam inchoaret, cutem alterius lateris perinæ in medium vi protraxisse, & in sic protracta sectionem instituisse ita, ut postea remissa cute, & in suum locum redeunte, vulneris orificium fere sesquidigiti intervallo a medio perinæ distaret. Hoc quoque voluine nescires. Iterum Vale.

IN LO-

(\*) Et mensibus aliquot interjectis, diserte rescripsit, ab se tum gallicos libros pervoluendo, tum Eruditissimos Viros interrogando frustra esse quæsitum, & nihil prorsus quod Jacobæo astipularetur, inveniri usquam potuisse.



IN LOCUM VITRUVII MEDICUM  
EPISTOLA.

JO. BAPTISTA MORGAGNUS

S. P. D.

ORNATISSIMO DOCTISSIMOQUE VIRO MARCHIONI

JOANNI POLENO

MATHESEOS PROFESSORI CELEBERRIMO.

**M**ittis ad me, Vir Clarissime, M. Vitruvii locum ex Libro I. de Architectura Cap. VI. in quo postquam plateas & angiportus improbavit ventorum flatibus ita patentes, ut apud multos, & Mitylenæos nominatim, animadverterat, tum nonnullis interjectis, hæc subjicit, ut ab Iocundo quidem edita habemus: *Vitia autem sunt, quæ difficulter curantur, in regionibus quæ sunt supra scriptæ, hæc, gravitudo, arthretis, tuscis, pleuritis, phthisis, sanguinis ejectio, & cætera, quæ non detractionibus, sed adjectionibus curantur.* Qua de lectione quid mihi videatur, quæris eo diligentius, quod aliter scripta plerorumque istorum vitiorum nomina in principe editione, atque adeo in codicibus calamo exaratis legisti. Ego vero ut obsequar voluntati tuæ, quo nihil mihi esse potest jucundius, illud primum censeo, in quatuor postremis nominibus, unum modo, idque manifestum, typographi quidem esse erratum, quod *tuscis* pro *tussis* descriptum. Sic etiam quod editio princeps habet *pleuresis*, *thsis*, codices autem *tiphsis*; nimirum evidentius est, quam ut cuiquam, non modo tibi Viro Eruditissimo, ostendi debeat, hæc indoctis atque oscitantibus librariis accepta esse referenda, sive *phthisis* cum Iocundo, sive *ptysis*, de quo mox videbimus, scribendum credas.

II. Verum ut in postremis nominibus Iocundum probo, aut certe non improbo; sic contra vereor, ne cum *arthretis* rescripsit, quantum a vestigiis codicum, primæque editionis, tantum a Vitruvii sententia recesserit. Quid enim *arthretis*, sive, ut scribere voluit, *arthritidis* loci habeat inter vitia ista cætera, ad thoracem, pulmones, asperam arteriam, & proximam, ad summum, pituitariam membranam attinentia, eademque sæpe inter se adeo connexa, ut Cælius Aurelianus libro *Morborum Chronicorum* II. (a) *influxioni* ex ordine subjiciat *Tussiculam*, *Sanguinis fluxionem*, & *Phthisicam Passionem*? Influxionis autem nomine & *coryzam*, & *branchon*, & *πύσιν* complectitur, hoc est & gravedinem, & raucitatem, & ad pulmones factam defluxionem; cum Aretæus (b) quidem *πύσιν* nomine *sputionem* acceperit, ut sanguinis, guttatim, aut non ex partibus saltem quæ infra os sunt, erumpentis: nam si ex his erumperet; tum *ἀναγνώσθαι*, id est *rejectionem* vocabatur. Quam sanguinis ejectionem cum Vitruvius diserte memoret; a veri similitudine non abhorret, *ptysin* quoque, hoc est ejus exsputionem memoravisse, aut; si hanc vocem, ut Aurelianus, intelligas; ad pulmones factam defluxionem. Utravis certe non modo ante sanguinis ejectionem melius ponitur, quam *phthisis*; sed præterea ejusmodi est, ut in certis quibusdam regionibus difficulter curetur; nam *phthisis*, vel inter initia, utique in omnibus difficulter curatur: quamquam in iis multo difficilior quas Vitruvius describit. Cave autem credas, si *phthisin* scripsit, inveteratam confirmatamque designavisse; quis enim, aut qua in regione curaret?

Morgagni Opusc.

Sed quamvis illis in civitatibus ea vitia ideo difficulter medicari, dixerit, *primum quod ex frigidis concipiuntur: deinde quod defectis morbo viribus eorum, aer agitatatus ex ventorum agitationibus extenuatur, unaque a vitiosis corporibus detrahit succum, & efficit ea exiliiora*; tamen defectas vires intellige non a *phthisi*, sed ab alio aliquo cæterorum morborum, qui, ut fit, & sua ipse enumeratione indicat, *phthisis* initium anteverterit, diuque ægros maceraverit. Sane priores illos morbos quam non recentes intelligat, illud argumentum est, quod eos, id est ipsam quoque pleuritidem, non *detractionibus* ait, sed *adjectionibus* curari.

III. Cæterum sive *ptysis* rescribas, sive *phthisis* cum Iocundo retineas; utralibet vox quam istum in locum conveniat, vides. Contra, *articularis* morbus, sive ut is edidit, *arthretis* neque ita convenit, & a vulgata ante ipsum scriptura discrepat. Nam princeps editio sic habebat: *gravitudo arteriarum, ac tussis*; codices vero alii quidem: *gravitudo arteriace, tussis*; alii *gravitudo arteriace tussis*. Erat autem *arteriace*, sic sine alio quopiam nomine positum, recentioribus quidem Medicis, *arteriæ medicamentum*, ut Galenus docet initio libri VII. de *compositione medicamentorum localium*, quo in libro plurimas ejusmodi *Arteriacas* describit: eaque significatione ab latinis quoque Rei Medicæ Scriptoribus *Arteriace* usurpata est, ut apud Scribonium (c), Celsum (d), Plinium (e), Marcellum (f) videmus. Quo quidem modo cum in proposito Vitruvii loco non posse accipi, constet; querendum esset, an pro raucitate posset, quo intellectu mirifice conveniret, si modo exemplum aliquod idonei Auctoris haberemus qui sic accepisset. Verum ne *Arteriæ* quidem sic a Paulo absolute, ut ajunt, positum credo; tametsi Prosper Alpinus (g) Vir cæteroquin doctissimus id videatur significare. Si *humor distillans ex capite* (Paulo auctore) in nares decumbat, affectum facit, qui Græcis *νόσος*, & Latinis *gravedo* dicitur: si in fauces & palatum, Græcis *κατάρσος*, & nostris *destillationem* vocatam inducit: si guttur & asperam arteriam, ut etiam membranam internam, quæ hanc integrit, exasperaverit, *βράγχον*, inquit, & *ἀσπρίαν* Græcis itidem vocatum, atque Latinis *raucitatem*: demum si in asperam arteriam, & in pulmones fluxio irruat, *tussim* excitat. Favere utique Alpino videtur Andernacus, qui illa Pauli verba ex libro VII. de Re Medica cap. XXVIII. latine sic reddidit: *rauca vox efficitur, vocaturque malum Græce βράγχον, & ἀσπρίαν, Latinis raucitas*. Janus tamen Cornarius, qui tuam Pauli interpretationem post Andernacum emisit, sic potius credidit interpretanda: *raucosa vox fit, & raucedo, & arteriaca affectio appellatur*. Ac certe Joannes Goræus (h), & Joannes item Scapula (i), cum hunc eundem uterque locum ex Paulo indicent (hujus enim græco exemplari, cum hæc ad te continuo rescriberem, carebam) neuter; sine

E

adjuncto

(a) Cap. 7. (b) De Caus. & Sign. Acut. Morb. l. 2. c. 2. (c) Composit. Med. 74. & 75.  
(d) De Medicina l. 5. c. 25. n. 17. (e) Natur. Hist. l. 20. c. 19. & l. 33. c. 7. (f) De Medicam. c. 14.  
(g) De Medicina Method. l. 10. c. 12. (h) Defin. Med. ad Ἀσπρίαν. (i) Lexic. Græco-Lat.



adjuncto nomine appellativo; ἀρτηριακὸν, sed ambo pariter ad hunc modum scribunt ἀρτηριακὸν πάθος.

IV. Igitur si arteriace, aut arteriaca per se arteriæ asperæ affectionem non significat, sed aut medicinam, aut indefinite rem quampiam, ad arteriam hanc atinentem; illud sequitur ut videamus, an cum alterutra earum vocum conjuncta, quas inter in Vitruvii loco posita est, commodam possit significationem habere. Et primum, si legamus *arteriaca tussis*, aut *arteriaca tusses*; erit sententia haud aliena ab iis quæ olim quoque de tussis discriminibus Medici non ignorabant. Nam & tussire quibus a jecore aqua intercutem incepit, animadvertit Hippocrates (k), Galenus autem (l), id repetendum esse, duxit ab *jecoris mole incidente præcordiis*, ac *faciente angustiam in pulmone*, & nonnulli fuerunt, eodem testante Galeno (m), qui *lumbricos intestinorum*, cum ad ostiolum ventriculi repentes, ipsum mordeant, *aridas tusses excitare*, dicerent; ut vel hinc pateat, non omnino accipiendæ esse quæ ab Ettmüllero (n), multæ alioquin lectionis Viri, scripta sunt, negante, de *Tussi ex stomacho orta ullum Practicorum aliquid habere, præter Lindanum*. Sed hæc alias; nunc vero quod dicere institueram, cum veteres etiam Medicos, ex iis aliisque ejusmodi locis appareat, quædam cognovisse tusses, quarum præcipua causa in arteria aspera non esset; apparet simul, quarum causam in illa arteria potissimum esse constaret, eas vero arteriacas tusses, ut ab hepaticis, stomachicisque, atque aliis ejusdemmodi distinguerentur, vocari potuisse.

V. Quod si tibi hæc forte paulo subtiliora quam pro capto, non Medici, sed Architecti, esse videantur; age, *gravitudo arteriaca* lege, aut potius quod ipsa habet princeps editio, *gravitudo arteriarum*, id est *gravedo asperæ arteriæ*, Solent enim, id quod Turnebus (o) admonuit, & Latini quædam efferre interdum non infuso rusticoque sermone numero multitudinis, quæ frequentius singularia sunt, ut *arterias pro arteria aspera dicunt*, non tam, ut aliquis videtur credere, quia reapse plures sunt, cum mox truncus dividatur in ramos, quam quia sic ipsi amant loqui, ut cum M. Cato (p), quem etiam Turnebus produxit, si *lienes*, inquit, *turgent*, & si *cor dolet*, & si *secur*. Sed Latinos *arterias*, pro *arteria aspera* dixisse, prolatis Plinii locis ostenderem, ut puta cum scripsit (q): *mentam arterias humidas siccare, siccas astringere*, nisi idem Turnebus occupasset productis ex Tranquillo (r), & ex eo quem duodecim in versibus quater sic locutum animadverti, Auctore ad Herennium (s) hisce; *astante Phonsæ, qui moneret, parceret arteriis: & ictus fit, & vulnerantur arteriæ acuta atque attenuata nimis acclamatione*. Gravitudo autem idem, opinor, Vitruvio fuit quod *gravedo*, qui pariter cum acedinem fortasse & falsedinem dicere potuisset, maluisse videtur dicere (t) *acritudinem*, & (u) *falsitudinem*, quorum hoc deinde Plinio in isto ipso capite quo de menta verba fecit, illud vero placuit A. Gellio eo in loco quem mox producemus. Porro *gravedinem* non modo absolute dictam invenio, ut apud Celsum (x), atque adeo apud optimos Scriptores latinos, verum etiam *gravedinem capitis*, *gravedines oris*, *gravedinem ventris* apud Marcellum (y) quidem, & iis in locis ubi nonnunquam sensum potius, ut fere apud Aurelianum (z), ponderis cujusdam significare videatur, non tamen semper; ut mirum admodum non esset, si *arteriarum quoque gravitudinem*, id est *asperæ arteriæ gravedinem* Vitruvius scripsisset.

VI. Quod si hæc sententia non scripsit; alterutrum relinquitur, ut aut alia scripserit, aut aliam vocem. Quanam autem alia gravitudinem significatione dixerit, quam gravitatis? Hoc enim licuisse indicat A. Gellius (a). Sicut, inquit, nihil quicquam interest, *suavitudo dicas, an suavisitas, sanctitudo, an sanctitas,*

*acerbitudo, an acerbitas, acritudo, an (quod Accius in Neoptolemo scripsit) acritas; ita nihil rationis dici potest, qui necessitudo & necessitas separentur*. Et sane Apicius (b) *gravitudinem* dixisse videtur pro *gravitate*, cum rationem docuit qua sine ructu, & *gravitudine teneriores sentiantur cucumeres*, qui aliter, ut Plinius (c) ait, *vivunt hausti in stomacho in posterum diem, nec perfici queunt*. Attamen ut persæpe de stomachi, aut capitis, interdum vero & de pectoris, sive pulmonum gravitate ægrotantes queri audias; ita aut perraro, aut nunquam audies, legesve de ipsius arteriæ asperæ gravitate querentes. Quid, inquiet aliquis, si totius corporis gravitatem intelligamus? Minime id vero. Hæc enim inter signa potius futuræ ægrotationis a Medicis, & nominatim a Galeno (d), quam inter ægrotationes ipsa numeratur: aut si ægrotatio est; non ita diuturna est, nec difficilis curatu: denique a Galeno eodem (e) inter eas corporis affectiones refertur quæ vacatione indigent. Vitruvius autem, ut supra memoratum est, sermonem istuc habet de morbis qui & *difficulter*, nec *detractionibus*, sed *adjectionibus curantur*. Huc illud accedit quod si *gravitudo* pro totius corporis gravitate accipiat; non amplius apparet, quid voce illa proxima faciamus *arteriace*, aut *arteriarum*.

VII. Igitur ad illud alterum redeundum est, ut quæramus, num forte non *gravitudo*, sed vox alia quæpiam a Vitruvio posita sit, quam librarii depravarint. Petrus Victorius (f) cum *gravidinosos* pro *gravedinosos* apud Nonium, ut etiam in scriptis libris melioribus M. Tullii, in Catulli autem, *gravidio* pro *gravedo* animadvertisset; videtur, inquit, *gravidio dicta esse, ut libido, formido, cupido*. Quod si ita est, sique etiam Vitruvius non *gravedo*, scripsit, sed *gravidio*; intelligis, quam proclive librariis fuerit, quid *gravidio* esset, non assequentibus, reponere *gravitudo*.

VIII. Aut si neque hoc, neque omnino id totum placet *gravedo arteriarum*; videamus tandem, an ex ista codicum, primæque editionis scriptura; hæc: *gravitudo arteriaca*, aut *arteriarum*, extundi aliquid possit quod minus displiceat. Quid igitur, si ita legamus: hæc: *raucitudo arteriæ*, aut *arteriarum*? Quid, si: hæc: *ravitudo*, nulla propemodum scripturæ mutatione, eademque tamen sententia? Ravim enim, ut Festus (g) est auctor, dicebant pro *raucitate*, unde & verbum *ravio*: quo Plautus in *Pænulo* (h) usus est: & *ravus* etiam, ut Barthius (i) in Sidonio interpretatur *ravos cantus*. Idem Barthius in Eligii verbis: *linguam meam raviditatis ligatam nexibus absolvit*, legendum conjiciebat *raviditatis*: quanquam verum fortasse fuit *tarditatis*, præsertim cum illa antecedant: *more infantium balbutientium quasi imperfecta verba formare*. Itaque, ut ad propositum redeam, *ravitudo arteriæ* idem Vitruvio esset quod Scribonio (k) *raucitas arteriæ*; si modo illam vocem *ravitudo* probare audeas sine idonei Scriptoris auctoritate: quanquam ut *mollire* habemus, & *mollitudo*: *parire* (nam & sic Veteres, atque in iis Ennius, declinabant (l) & *paritudo*, sic non est adeo fortasse absorum, ut cum Plautinum verbum extet *ravire*, *ravitudo* quoque dici potuisse videatur: aut si quis malit, derivari a *molli mollitudinem*, non secus atque a *gravi gravitudinem*; vel certe ab *ampli amplitudinem*, a *magni magnitudinem*; idem pariter ab *ravi* poterit *ravitudinem* derivare.

VIII. Sed dum tibi, Vir Doctissime, obsequi studeo, jam satis pro mediocritate hæc mea in omnem partem videor propositum Vitruvii locum versasse. Tu singula acerrimo examinabis judicio tuo. Ego, siquid forte in his inveneris quod non omnino displiceat, gaudebo. Vale, & me, ut amas, ama.

D. Forolivii Kalendis Sextil. CIO IDCC XXXVII.  
DE IIS

(k) Prognost. n. 8. (l) Comment. 2. in Progn. n. 3. (m) Comment. in l. 6. Epid. Sect. 2. n. 17.  
(n) Prax. l. 1. Sect. 14. c. 3. art. 3. (o) Adversar. l. 10. c. 19. (p) De Re Rust. c. 157. n. 7.  
(q) Nat. Hist. l. 20. c. 14. (r) In Neron. c. 25. (s) L. 3. (t) L. 8. c. 3. (u) L. 1. c. 5.  
(x) De Medicina l. 4. c. 2. n. 4. & alibi. (y) De Medicam. c. 1. 14. & 16.  
(z) Acuror. Morb. l. 2. c. 24. l. 3. c. 20. & Chronicor. l. 2. c. 14. l. 5. c. 10. (a) Noct. Attic. l. 13. c. 3.  
(b) De Re Culin. l. 3. c. 4. (c) Nat. Hist. l. 19. c. 5. (d) Arr. Medicin. c. 82.  
(e) De curandi rat. per sangu. miss. c. 4. (f) Var. Lect. l. 4. c. 8. (g) De verbor. veter. signific. l. 16.  
(h) Act. 3. Sc. 5. (i) Adversar. l. 29. c. 4. (k) Compos. Med. 74. (l) Apud Priscian. de octo partib. orat. l. 10.



DE IIS QUÆ A VALSALVA IN BONONIENSI  
ACADEMIA INSTITUTI SCIENTIARUM  
RECITATA FUERANT  
AD CELEBERRIMUM AC PRÆSTANTISSIMUM VIRUM  
A SECRETIS ACADEMIÆ EJUSDEM  
EPISTOLA.

Joannes Baptista Morgagnus Francisco Mariæ Zanotto Suo S. P. D.

**Q**uod & recens vestrum ( nec sane id primum ) perhonorificum de me judicium, & mea perpetua atque constans in vos, & Valsalvam nostrum observantia, ac potius pietas flagitabant, diligenter feci, mi Zanotte, ut mihi a vobis commissa præclarissimi Viri Scripta perlegerem, & cum cæteris ejus schedis, cumque iis, quæ ipse in hominum, bestiarumque dissectionibus observata habeo, semel, atque iterum, ac sæpius conferrem. Id facienti haud una causa visa est, quamobrem ea scripta nec sine aliis ejusdem schedis, nec sine multis annotationibus, nec sine expolitione aliqua divulganda esse, existimarem. Quæ quoniam res quantum temporis & singulæ, & universæ postulent, vides; intelligis nimirum id unum restare, ut illud alterum interea conficiam mandatum vestrum, ut quæ nunc perficere scripta non possum, eorum saltem brevem quamdam, & contractam epitomen ad vos mittam, quam in actis edatis.

Tres omnino sunt Dissertationes, quas apud vos habuit Valsalva. Prima in partes quatuor est distributa. Quarum cum prior ligamentorum coli intestini numerum, fines, naturam, usus persequatur; hæc autem aliorum etiam Anatomicorum, meaque præsertim opera satis hoc tempore vulgata sint; protinus ad alteram partem transeo, qua; ut in reliquis; minus adhuc nota describuntur, *sinus* videlicet, *arteriæ magnæ*.

Hoc nomine Valsalva appellat certas quasdam illius arteriæ partes, quibus in partibus extrorsum magis ejus parietes curvari animadvertit. Hæ quatuor sunt. Tres in ipso arteriæ initio, singulæ singulis semilunaribus valvulis, quibus fere opertæ sunt, respondentes. Quarta his major, in toto illo tractu est, qui inter supremos priorum fines, & commune initium dexterarum arteriarum subclaviæ ac carotidis intercedit.

Tertio loco ea proposuit, quibus trahebatur ad suspicandum, nervos, quos cæteri credunt, & vocant a *spinali medulla ad par vagum Accessorios*, esse, & vocari oportere, a *pari vago ad medullam spinalem Recurrentes*. Illa autem sunt ab his petita, quæ ad eorum nervorum utrosque fines conspexit: hinc videlicet continuatos esse cum pari vago; illinc vero eos esse ultimam eorum propaginum ( si cum ortis ex medulla nervis conferantur ) naturam, figuram, insertiones, ut hæ propagines rami potius, quam radices, esse videantur.

Novissime docet, eos, qui intra oculorum orbitam sunt musculos, omnes; si minorem obliquum demas; interiore extremo nervo optico sic affigi, ut non modo in ipsum inferantur, sed præterea suis inter se junctis, ac circumductis fibris anulum efforment, quo arcte eundem nervum circumcirca complectantur. Eum *anulum* vocat, *nervi optici moderatorem*: ut alterum *nervi oculorum motorii anulum moderatorem* appellat; videlicet qui ab nonnullis ex iis musculis factus huic alteri est nervo circumjectus; quamquam luculento structuræ modo non est cum prior anulo comparandus.

Alteram Dissertationem de quibusdam oculorum affectionibus scripsit & secundum, & præter naturam, sed potissimum præter naturam. Primum quidem exposuit, quæ sibi viderentur causæ, cur ii de quibus modo dictum est, musculi sic nervo optico sint affixi. Cum enim exteriores fibras recta in ipsum inse-

*Morgagni Opusc.*

rant nervum, hujus, inquit, longitudinem contracti minuent, remissi augebunt, atque ita ipsum vel laxabunt, vel tendent, motumque spirituum vel languidiorem, segnioremque, vel contra vehementiorem efficient, & celeriores. Cumque interioribus fibris, quasi anulo quodam non modo tendineo, sed etiam carneo eundem nervum arcte comprehendant; ut anulo modo constricto, modo relaxato nervum magis, minusve compriment, sic minor, majorve Spirituum copia in nobilissimam irruet oculi tunicam. Quam etsi retinam appellant, fibris tamen non in retis modum implicitis, sed radiorum instar a centro ad ambitum discurrentibus docet esse compactam. Pro varia autem illa Spirituum affluentia variam quoque esse retinæ tensionem, & hanc variis conspiciendarum rerum conditionibus accommodari oportere existimat.

Quod si anulus nervi optici moderator communibus cæterorum musculorum morbis tenetur, ut puta resolutione, aut distentione; gravia inde in retinam vitia provenire, non dubitat, in his amaurosim, & rerum, quæ nusquam sunt, quasi ante oculos obversarentur, perceptionem. Utriusque exemplum, & a distentione quidem, haberi censet in duabus, quas producit, observationibus.

Hinc eo transit, ut judicium interponat suum in celebri controversia de natura, ac sede ejus suffusionis, quæ vulgo acu deprimi solet. Negat, se ullam unquam potuisse dissecando invenire membranam, quæ pupillæ opponeretur. Præterea, si ejusmodi membrana suffusio esset; neque ita facile, nec sine vehementi dolore, nec sine magna oculi ipsius læsione acu deprimi posse, contendit, propterea quia iridi, ac ciliariis adhæret processibus: Sed & illud incommodi ut plurimum consequi oportere, ut brevi iterum renasceretur, ad eundem videlicet modum, quo renasci membranas cæteras *excrecentias* videmus, quarum omnes fibras proximis partibus adhærentes penitus extirpare non liceat. Denique haud satis intelligi, cur suffusionis maturitas esset a Chirurgo expectanda, nam certe membrana quo plus temporis daretur, eo durior, atque compactior fieret, ac minus facile acui cederet.

Contra autem si humorem crystallinum morbosum factum suffusionem esse statuas; proclive esse intelligere, quanti referat maturitatem expectare. Nam ut alia morbosa facta atque inutilia ipsa denique natura a sano separat, sic illum humorem omnino inutilem redditum, suis tandem nexibus ita solvere, ut acu facillime, tutissimeque dejici queat. Nimirum sibi in ejusmodi oculorum dissectione aliquando accidisse, ut ad levem contrectationem crystallinus humor secederet. Minimo quoque negotio secessisse, cum oculum vel recte se habentem aliquot dies in aqua macerasset. Quæ cum ita sint; ipse quidem sicuti in curatione auctor est, non modo ut maturitas expectetur, sed ut pluribus ante depressionem diebus subinde oculus emolliente aliquo latice foveatur, sic in suffusionis sede constituenda cum iis facit, qui in crystallino humore omnino esse ponendam, censuerunt, præsertim cum suæ quoque observationes cum his, quæ illi deprehenderunt, consentiant. Scilicet in viro, cui suffusio levissima adhuc erat, nihil aliud vitii comperit, nisi levissimam humoris utriusque crystallini cum flavo colore opacitatem conjunctam. In altero autem, cui dexteri oculi suffusio satis deprimi



non potuerat; eundem humorem invenit a superiore tantum parte solutum, opacum, & palleſcentis margaritæ colore, nullum autem in oculo ſiniſtro, in quo cum ſuffuſio nullo pacto deprimi potuiſſet, acu fuerat dirupta, hoc quidem exitu, ut ſiniſter oculus haud prorsus inutilis tandem fieret, quippe dirupto, dimotoque, ut potuit, humore illo opaco; contra oculo dextero, in quo is dimotus non fuerat, omnino inutili. Quoniam autem in huius viri oculo dextero, & in prioris utroque humorem cryſtallinum opacum quidem, & hoc vel illo colore infectum, duriorẽ tamen non invenit, propterea ut in ejus opacitate, alienoque colore ſuffuſionem, ſic in duritie cum colore glauco, & opacitate conjuncta glancoma eſſe ponendum, exiſtimabat.

Denique in tertia Diſſertatione conatus eſt rem diu ab omnibus Anatomicis fruſtra optatam, perquiſitamque, videlicet *Renum ſuccenturiatorum excretorios ductus*, horum ſinem, & quod conſequitur, illorum uſum retegere. In multis igitur avium generibus, ſed luculentius in gallo tum gallinaceo, tum indico reperiſſe ſe, ait, ſingula, quæ ſemen deferunt vaſa ante e ſingulis renibus ſuccenturiatis, quam e ſingulis teſtibus enaſci. In vipera autem, & fluviali teſtudine eos eſſe inter eoſdem renes, & teſtes nexus membraneos, ut veriſimile ſit, per hos ſimilia decurrere vaſcula ab illis renibus exorta. Sed & olim in virili quodam grandiore Cadavere, vidiffe ſe, & præſtantiffimum Medicum Hippolytum Franciſcũ Albertinum propagines quaſdam a ſæpius memoratis renibus ad teſtes demiffas, quæ neque nerveæ, neque ſanguiferæ, neque lymphaticæ, ſed potius alius cujuſdam naturæ eſſe canales videbantur. Et hæc quidem in Maribus.

In eorum vero, quæ ſupra commemoravi, animantium, & murium fœminis non modo connexa inter ſe ovaria, & renes ſuccenturiatos ſe comperiſſe, verum inſuper, nexus hoſce in gallinis quidem, fluvialibus teſtudinibus, ac muribus inſtar filamentorum, propaginum, vel corporum vaſiformium vidiffe. Itaque cenſere ſe, renes ſuccenturiatos inter generationis organa eſſe referendos. Huc autem pertinere tum quæ de lumborum, & naturalium conſenſu a Medicis ſunt adnotata, tum habitum a ſe olim in Cane experimentum. Huic enim paucis ab ortu menſibus cum hinc teſtem dexterum, inde vero ſiniſtrum renem exſecuiſſet, aptamque vulnerum curationem adhibuiſſet; laxum ſemper corporis habitum fuiſſe; neque unquam catellas iniſſe, ſed ne catullientibus quidem blanditum eſſe animadvertit. Nimirum ut a dextris evulſus teſtis, ſic a ſiniſtris ren ſuccenturiatus, aut cum rene exſectus, aut certe in nervis, vel ſanguiferis, aut excretoriis ductibus læſus, ut putabat, ſterilitatem attulerat.

Hæcenus, mi ſuaviſſime, ac doctiſſime Zanotte, priori parti ſatiſfecĩ epistolæ tuæ. Nunc illud reſtat ut porro alteri ſatiſfaciam, in qua amantiſſimis, & honorificentiffimis æque ac in priore, verbis oſtendis, quam gratum vobis futurum ſit, huic ſi epitomæ Diſſertationum Valfalvæ quidpiam addam de meo, quod

pariter actorum veſtrorum libro inferatis. Ego vero, niſi totus in eo eſſem, ut quidquid temporis a publicis, privatiſque occupationibus eripio, id omne in Valfalvæ noſtri pene innumeris, ut noſti, iſdemque cum inter ſe maxime diſjunctis, tum ſæpe mancis, & perobſcuris ſchedis ſeligendis, digerendis, expolendis, illuſtrandis collocarem; libentiſſime darem operam, ut tantæ iſti, ac tam benignæ voluntati veſtræ ſi minus doctrina, atque ingenio, at ſtudio certe, & diligentia, quibus quidquid poſſum, ſi quid tamen poſſum, me debere, fateor, reſponderem. Quod ſi hoc erga amicum mortuum ſupremum officium, aut minus eſſet per ſe honeſtum, aut non vobis quoque gratiſſimum, aut non plures, quantum animo proſpicio, annos me eſſet occupaturum; ſane vel ipſum intermittere, vel eo abſoluto, vobis ſatiſfacere tamen poſſem. Verum cum hæc omnia contra ſe habeant, neque aliud aut nunc inchoare, aut brevi polliceri mihi liceat; neceſſe eſt, ut quam olim, atque adeo peradoleſcens de pluribus Uvulæ & pharyngis muſculis ad Valfalvam epistolam ſcripſi, hanc (neque enim aliud iſtiusmodi in præſens habeo) ad vos mittam, vel potius remittam. Hæc enim illa ipſa epistola eſt, quam cum prima Adverſaria apud vos recitarem, quam cum altera, quam cum tertia ſcriberem, commemoravi, quam ſæpe a me haud pauci Anatomici cum Itali, tum externi requiſiverunt, quam Valfalva unus habebat, & ſi ſua perficere potuiſſet, cum ipſis erat editurus, quam denique, eo vita functo, mox inter ejus ſchedas diligenter quaſitam invenit vir egregius Fauſtus Stagnius J. C. Sororis ipſius filius, ac Joanni Antonio Stancario rei medicæ, atque anatomicæ profeſſori conſultiſſimo utriuſque, ut ego petieram, ſubſcripto nomine tradidit ad me mittendam. Eam ipſam igitur, qualiſcumque eſt, ad vos remitto, quam cum veſtris actis divulgetis, ſi tamen idem vobis de ea videbitur, ac Valfalvæ videbatur. Hoc unum te oro, ut omnes, quicumque eam epistolam, aut hanc epitomen lecturi ſunt, etiam, atque etiam moneas, ſi qua in alterutra, aut in utraque forte videantur vel non ſatis perſpicua, vel non ſatis abſoluta, ne ſtatim nos arguant, ſed judicium in illud uſque tempus ſuſtineant, cum univerſa Valfalvæ Scripta, meis aucta neque paucis, neque brevibus adnotationibus, edentur. Sunt enim, & vero, ut probabimus, jam diu ſunt, quæ ipſi per nos addamus, ſunt quæ illuſtremus, ſunt quæ in medio relinquamus, ſunt etiam quæ revocemus. Quod reliquum eſt, abs te, mi Zanotte, majorem in modum peto, ut præclariffimis, doctiſſimiſque Sodalibus, quantas maximas poteſ meo nomine gratias agas, & cum tibi perſuadeas, me ipſis, tibiſque pro iſtis veſtris erga me ſingularibus ſtudiis obſtriſtiſſimum fore, dum vivam, tum omnibus confirmes, ſi meam obſervantiam, pietatemque conſtantiſſimam ad hunc diem perſpectam habent, ut paria, aut eo ampliora in reliquum tempus officia expectent. Vale.

D. Patavio VIII. Kal. Februar. MDCCXXIV.

## MORGAGNI EXPERIMENTA CIRCA AQUAM CALCIS VIVÆ

ut Volumine I. Commentariorum de Bononiensi Scientiarum Academia referuntur  
a Cel. Viro Francisco Maria Zanotto.

**L**Egerat Morgagnus commentarium Burleti, qui extat in Pariſienſis Academia actis anni milleſimi ſeptingentefimi, ubi Burletus tradit, aquam calcis vivæ lacti admixtam, impedire, ne lac coaguletur. Animadverterat pariter, Ettmüllerum editionis Venetæ noviffimæ, ubi de lapide calcario agit, contra ſic ſcribere: aquam calcis vivæ lacti inſuſam brevi poſt hoc ipſum coagulare, atque ad grumeſcentiam

diſponere. Placuit ergo ei in hac tanta ejuſmodi hominum diſſenſione rem ad experimenta revocare; præſertim quia Burletus ſummopere agris commendat aquæ calcis potionem, quæ cum lactis æquali pondere commixta ſit. Immo in his ipſis, in quorum ſtomacho periculum eſt ne lac cogatur, caveri id docet, ſi lac eidem aquæ admixtum propinetur.

Itaque anno milleſimo ſeptingentefimo ſexto menſe  
Janua-



Januario aquam calcis sibi diligenter parari jussit, voluitque ut calx in aqua communi horas ad viginti relinqueretur, eaque esset harum proportio, quam Burletus aliquando, Batavi fere semper sequuntur; ut quater aqua, aut quinquies calcem pondere superaret. Triginta post diebus cyathos tres sumpsit: in uno aquæ, quam dixi, pauxillum justæ vaccini lactis, ejusque recentis, portioni adjecit, in altero pares ex utroque partes commiscuit, in tertio denique lac merum conferendi postmodum gratia adservavit. Hos cyathos horas tres ipsas immotos, atque in temperato aere tenuit. Post singulos invertit leniter, si quid grumefactum haberent: nihil habebant: immo vel nullum prorsus discrimen observatum est, vel si quod est observatum, id certe fuit, quod cum Burleto maxime faceret; quippe illud lac liquidius visum est, cui aqua calcis, & potissimum cui plus aquæ calcis admixtum fuerat. Cum id experimentum Morgagnus cepisset in ea, quam dixi, aquæ & calcis proportionem, voluit idem rursus capere etiam in proportionem alia. Pridie ejus diei, cum experimentum quod diximus, sumtum est, aquam calcis parari jusserat ea proportionem, ut septies aquæ pondus calcem superaret, hanc namque proportionem ut plurimum Burletus tenet. Cum ergo hanc aquam haberet in manibus, protinus in uno cyatho æquas hujus lactis portiones commiscuit, in altero unam lactis, & binas aquæ. Cumque experimentum eodem modo, ut ante fecisset; res pariter cessit eodem modo.

Non his contentus Morgagnus, quoniam experimenta hæc sumserat in liquoribus, ut erant, frigidis, constituit periculum facere etiam in tepidis. Aquam ergo calcis utrumque genus cum paribus lactis portiones tepidam cum tepido admiscuit. Post unam & dimidiam horam cyathos invertens leviter, labentes inde liquores diligenter inspexit. Idem qui ante, exitus. Nec vero cum mixta hæc singula in suos quæque cyathos post rursus invertisset, discrimen in his ullum intra quatuor, immo neque intra duodeviginti horas animadvertere licuit Laurentio Bonazzolio præstanti Anatomico, & Physico diligentissimo, apud quem tum adolescentem, sibi que amicissimum, experimenta hæc omnia Morgagnus ceperat.

Videbantur hæc vel diligenti cuivis Philosopho posse satisfacere. Sed ut morosi sunt docti homines, & ipsi sibi permolesti; Morgagno non satisfaciebant, nisi experimentum sumisset etiam in aqua calcis eo modo parata, quem Ettmüllerus uno in loco proponit, ubi aquam calcis describens, fieri eam dicit per calcis decoctionem. Paucis ergo interpositis diebus,

calce in communi aqua, eousque decocta, dum hæc, quæ septupla affusa erat, quintupla fere evalisset; post horas circiter vigintiquatuor decentis vaccini lactis, & aquæ hujus portiones æquas in una ampulla, in altera ejusdem aquæ unam, lactis quatuor partes commiscuit. Idem fuit qui ante exitus. Namque cum has ampullas in temperato aere collocasset, & horas fere quatuor immotas tenuisset; nullum coagulum observatum est, immo ne octo quidem ipsis post horis mutatio ulla facta, observantibus id præter Bonazzolium, duobus etiam Academicis aliis, qui pro singulari necessitudine assidue cum Morgagno erant, Heraclito Mansfредio, & Beccario.

Morgagnum utique non fugit varium calcis, & aquæ, & lactis genus, & variam pariter miscendorum proportionem, nec non & ipsum diversum aerem in causa esse posse, ut alia aliis observentur; sed quis est tamen, qui in illorum, quæ diximus, experimentorum constantia tenere se possit, quin de Ettmüllerii sententia nonnihil dubitans, ad Burletum potius inclinetur? Cui cum Morgagno, ut cæteris de rebus convenit, sic etiam de aquæ calcis sapore, quem, singulas, quas adhibuit, aquas Morgagnus gustans, primo acrem invenit, tum stypticum, postremo dulcem, quemadmodum Burletus ipse tradiderat.

Non hic illud prætermittam, quod gustanti Morgagno accidit, quodque ne ipse quidem in eo sermone quem super hac re in Academia habuit, censuit prætermittendum; nam quamvis primum nullius fere momenti videatur, si diligenter tamen consideretur, erit re ipsa non inutile. Cum primo digitum in aquam immersum, uti sit, ad eam gustandum ori admovisset, atque linxisset; nullum, aut ferme nullum saporem sensit, sic ut aquam dilutam nimis atque inertem paratam esse, judicaverit. Sed cum negarent qui præparaverant, in suspicionem verissimam adductus est, idest tantulam illam aquam, quæ extremo digito adhæresceret, saliva fortasse ita dilui potuisse, ut sapor ejus prorsus obtunderetur. Protinus ergo ex cochleari justam ejusdem aquæ gustavit portionem; continuo illi, quos dixi, sapores & manifesto, & valide se prodiderunt. Id Morgagnus illorum causa dictum voluit, qui in liquorum judicandis saporibus proclivi ista, & consueta in digito gustandi ratione utuntur, quæ ratio & illos facile in errorem inducere potest, qui liquores describunt, & illos, qui expositos ab aliis sapores negant, & illos demum, qui in praxi variam liquorum vim, & efficaciam gustu æstimant. Videant ergo hi omnes, ne quid temere interdum judicent.

## JOANNIS BAPTISTÆ MORGAGNI

suo, & Collegarum nomine scribentis

### RESPONSUM MEDICO-LEGALE

#### *circa Obstetricum Judicium de Mulieris Virginitate.*

**Q**uæritur ex Nobis in universum, & pro veridumtaxat studio, sit ne incertum admodum Obstetricum judicium de Virginitate Fœminæ, cujus naturalia recognoverint vel post usum Balnei aquæ calidæ.

Nos itaque, post maturam deliberationem, pro veritate respondentes, illud principio constituimus, secundum maxime communem a longo jam tempore inter Doctores nostros Sententiam, nullum certum Virginitatis signum vel in ipsis Fœminarum locis inveniri. Nam Paulus quidem Zacchias in *Quæstionibus Medico-Legalibus*. ante hos centum annos editis cum lib. 4. tit. 2. quæst. prima num. 14. statueret Virginitatis nullas dari certas, & inseparabiles notas, jam tum affir-

mavit; acceptissimam esse hanc conclusionem Recentioribus omnibus; & cum plures nominatim, indicatis eorum locis, laudasset; *quamplurimos alios doctissimos Medicos data opera præterire se*, dixit. Eorum autem qui post Zacchiam floruerunt, quæ Sententia fuerit, satis ostendit Gaspar a Rejes, qui in *Elysio Jucundarum Quæstionum Campo* quæst. 39. num. 39. eandem illam, quam & ipse probavit, *Conclusionem omnium Medicorum Votis confirmatam* esse, scripsit. Denique ætate hac nostra Jo: Bohnius, cujus verba profert Martinus Schurigius in *Congressus Muliebris Consideratione Physico-Medico-Forensi* sect. 2. cap. 1. n. 23., cum vel recentissimos, quibus idem placuit, addidisset, alios infinitos se omittere professus est, qui cum his sentiant.

Et



Et nobis liceret plures addere: Sed duorum, qui ante Zacchiam scripserant, in eademque Sententia fuerant, malumus quædam tantummodo verba producere, præsertim cum ambo in Gymnasio hoc nostro summa cum laude Medicinam docuerint, alter vero non suo tantum, sed & universi Collegii Medicorum Patavini nomine, in hac ipsa controversia responderit. Igitur Hieronymus Capivaccius brevissimum Tractatum, quem de signis Virginitatis inscripsit, ita conclusit: *Quamobrem defloratio, vel natura tegi, vel arte ita occultari potest, ut interdum etiam Periti Medici, & Obstetrices fallantur. Hieronymus autem Mercurialis suo illi, atque adeo Collegii responso, quod in Consultationum Medicinalium tom. 2. consult. 66. finem in hunc modum fecit: Quamobrem omnino putamus, nulla usque adeo certa utriusque sexus Virginitatis haberi indicia, quin possint tam Vir, quam Fœmina vitiosi Virgines apparere tum concumbentibus, tum Medicis, atque Obstetricibus. Utriusque Sententiam, & ex parte rationes majori emphasi secutus est alter, qui & ante Zacchiam scripserat, gravissimus apud Bononienses Rei Medicæ Professor Julius Cæsar Claudinus. Hic enim in Responsonibus Medicinal. inter ea, quæ interjecit quadragessimæ, & quadragessimæ primæ, diserte pronuntiavit, tutam Virginitatem astruere tum Medicis, tum Mulieribus Obstetricibus, nisi Divino Spiritu suffultis, fuisse denegatum: Adeo perspicue illud probaverat, quod ostendendum suscepserat, nimirum iis Fœminas artificiiis circa Muliebres partes uti posse, quæ sapissime sunt in causa, ut undequaque Periti Medici, ne diceret imperita Obstetrices, nullis, nisi nugis innixæ, ea ratione decipiantur, ut eas, quæ deflorationem multis ab hinc mensibus (annis dici poterat) passæ fuerunt, hanc non subisse dependant, atque hoc eo magis, quoniam malitiosis Mulierum artibus natura ipsa favere potest.*

Ex his, quæ hætenus prolata sunt, illud evidentissime conficitur secundum auctoritatem quidem tot, tantorumque Doctorum, si certa Virginitatis signa nulla sunt, neminem, & ne peritissimum quidem Medicum pro certo agnoscere ipsam posse. Quanto erga minus id poterunt Obstetrices neque solertia, neque doctrina, neque anatomica exercitatione, neque usu ipso ullo pacto cum Medico istiusmodi comparandæ? Nec enim idcirco usu saltem præstare credendæ sunt, quod Fœminarum genitalia quotidie tractent. Tractant utique, ut laudatus Bohnius admonet (apud eundem Schurigium in Parthenologia sect. 3. cap. 7. num. 3.) sed gravidarum, & parturientium tantum, & quidem negligenter satis, non Virginum, ut Excellentes Medici, in Re Anatomica, & Chirurgica exercitati. Quod si ne usu quidem sunt cum his conferendæ, tanto minus solertia sunt, & doctrina, quæ aut nihil unquam de incertitudine signorum Virginitatis legerunt, aut si quæ forte aliquid legerunt, quot tamen, & quam varias ob causas incerta, & fallacia sint, propter scientiarum ignorancem satis assequi non potuerunt: & ne ipsa quidem fortasse, quæ duo præ cæteris laudantur, & inculcantur, signa ambo intelligere valuerunt.

Sunt autem hæc, angustia ad orificium vaginæ, & membrana, quæ peculiariter Hymen appellatur. Causæ vero ob quas esse hæc signa fallacia possint, a Nobis quidem in tria genera dividuntur. Aliæ enim sunt ab arte, aliæ a morbo, aliæ a natura. Quæ singula genera dum exemplis illustrabimus, simul id, quod auctoritate probatum est, ratione, & observationibus confirmabitur, non posse a Medicis Virginitatem, ne per hæc quidem, quæ præcipua sunt, duo signa cognosci, simul alterum elucebit, multo minus ab Obstetricibus, vel post usum balnei aquæ calidæ.

Angustia igitur ad orificium vaginæ; ut primum de primo signo dicamus; sublata etiam ab aliis causis, ut a partu, non modo a Virili concubitu, restitui arte potest, iis videlicet adhibitis, quæ vim habent adstringendi. Quæ propterea cum Ludovicus Mercatus proponit de Mulierum affection. lib. 4. cap. 14., hoc caput ad hunc modum inscribit: *De Virginali adstrictione a partu comparanda. Avicenna autem (nam & veteres, & recentiores puerperarum causa, multa ejusmodi ostenderunt) inter alia, quæ proponit lib. 3. Canonis en. 20. tract. 1. cap. 47. unum habet, quod facit, in-*

*quit, redire Virginitatem constringendo. Nec vana esse pollicitos, observationes docent, Philippi Hoechstetteri in primis, qui Observationum Medicinalium Decade 3. in Scholio ad casum 5. testatur, cum Mulier inscia, in aqua insedisset, in qua radix fuerat decocta symphyti majoris, ejus Maritum ipsam, jam Matrem, subito Virginali Claustro recepisse, miratum esse. Quin Zachias Quæst. citatar. lib. 3. tit. 2. quæst. 7. num. 1., & alibi agnoscit, ope ejusmodi auxiliorum eam angustiam restitui, quæ non modo naturalem coherentiam ante violatam Virginitatem adæquet, sed etiam longe exuperet, cujus rei videmus apud Rodericum a Castro de universa Muliebrium Morborum Medicina part. 1. lib. 1. cap. 3. Nicolum esse auctorem, visas nimirum jam esse Mulieres, quæ post partum, iis adhibitis remediis, ita clausæ redditæ sint, ut non potuerint coitum exercere. Sed præter adstringentia medicamenta, a Medicis accepta, causa est quarundam Fœminarum malitia id, quod ob ea, quæ infra dicentur, hic prætermitti non potest, aliis etiam uti, quæ non adstringendo, sed tumefaciendo coarctent. Aliqua, inquit Fortunatus Fædelis in Medico-legalibus rebus Auctor gravis de Rei Medicor. lib. 3. cap. 1. Aliqua etiam Tithymalli lacte, aut alterius non absimilis plantæ, panno lineo excepto, atque in cervicis uteri collum imposito internam illius superficiem adeo in tumorem attollunt, ut non solum arctas Veneris vias amatoribus præbeant, sed sanguinem etiam educant.*

Sed & morbus; quod erat alterum causarum genus; dilatatum vaginæ orificium, adeo contrahit, ut vix, ac ne vix quidem a Viro amplius pervadi queat. Severinus Pinaus de Virginitatis notis lib. 1. cap. 5. in pluribus, ait, id se vidisse Mulierculis propterea quia rhagades, dura, & magna cicatrix, aut scirrhus in ambitu vaginæ orificii supervenerant, a quibus quidem hoc angustius redditum fuerat. Quod sane multo ante Pinæum, Medici viderant, & in his Cornelius Celsus, qui lib. 7. de Medicina cap. 28. Fœminarum naturalia nonnumquam, inquit, inter se glutinatis oris concubitione in his partibus facta, & per malam curationem his oris sanescendo junctis. Exulcerationem autem hanc sæpius his quidem sæculis, ex venerea lue, alias ex variolis, combustione, vulneribus, urinæ, aut muliebris fluoris acrimonia, aliisve ejusmodi causis originem ducere, etsi male curetur, angustiores locos relinquere, neminem latet, qui Medicorum, Chirurgorumque aut munus objerit, aut saltem observationes versaverit. Nihil autem prohibet, quominus angustia hæc ad ipsum vaginæ orificium contingat, & tanta dumtaxat relinquatur, quanta in virginibus solet, vixque, ac ne vix quidem ab ea, quæ naturalis est, interno-sci queat. Hæc quadantenus indicat Hippocratis locus lib. 1. de Morbis Muliebribus, qui locus etsi de exulceratione sit, quæ difficilem partum consequitur, tamen & ad alias exulcerationes transferri jure optimo potest: Si vero, inquit, puerperæ aliqua pudendi pars obturata fuerit: Jam enim etiam hoc cognovi: si ulceratum fuerit os pudendi, ubi sane ulceratum fuerit, in partu a pueri exitu violatum, & lic ad extremum concludit: Ea ulcera sanare oportet veluti in reliquo corpore, & ad cicatrices perducere. Locus autem levis, & concolor reddatur.

Denique si quid aliud, natura ipsa, quod tertio loco ostendendum est, multifariam sane efficit, ne in vitiata Muliere vaginæ orificium dilatatum unquam fuisse videatur. Et primum per constitutionem a primordiis, five per ipsum quoque in hac controversia attente spectandum, totius Corporis, uterive temperamentum. Sic enim in Antartico solo fœminas etiam post plurimos partus, non modo post plurimos concubitus, integrum virginalique Corpus præferre, itaut puerperæ nulla re differant ab ipsis Virginibus, ex Americo Vesputio refert Riolanus Anthropographia lib. 2. cap. 35., qui cum illud vix posset credere; attamen inquit, cum ex Toupinambutorum regione (ea quoque est in Brasilia, hoc est in eadem America Meridionali, quæ omnis a Petro Bertio in Breviario totius Orbis Terrarum vocatur Antartica) cum ex ea igitur regione Fœmina annos 25. nata valde impudica, quæ viros ad coitum invitaret, in hanc Urbem Parisiorum adducta fuisset, post ejus obitum Pudendi orificium admodum



*modum angustum deprehendi.* Verum non de solis Americanis, sed de Mulieribus in universum loquebatur Zacchias, cum diserte affirmavit *consil. 41. numer. 3.*, nonnullas ex Fœminis utero tam angusto, & exucco dotari, ut etiamsi millies in die exagitentur, tamen ne vestigium quidem compressionis servare soleant. Marcus autem Antonius Ulmus in Libro, qui inscribitur: *Uterus Muliebris, sect. 1. cap. 11.* generatim inter notas Uteri calidi, & sicci non minus posuit appetentiam Veneris, & quidem acrem, & conceptionem non adeo facilem, & strigosa, hoc est gracilia, Corpora, & alia huiusmodi, quam pudendum Calens, angustum, sed non multæ Carnis, Breve, neque Humectum. Quod si igneo, & sicco temperamento natura certam insuper addat ætatem, tanto aptiores Fœminas reddit, ut vel sæpius repetita Veneris vestigia ne servant. Ætas enim, quod idem Ulmus *sect. 2. cap. 5.* Guainerii auctoritate confirmat, quemadmodum facit, cæteris paribus, ut Puellæ, sive quæ sunt in prima menstruationis ætate, calidæ dicantur, & humidæ; esto magis humidæ; sic facit, ut Adolescentiores, & Consistentes, sive, quæ sunt in secunda, & tertia menstruationis ætate, illæ quidem calidæ, & siccæ; Calidæ tamen magis; hæ vero frigidæ, & siccæ; siccæ quamvis plus habeantur; ut constet, temperamenti etiam uteri, siccitatem secundum dogmata in iis, quæ magis adoleverunt, intendi.

Hæc autem secundum recentiorum quoque Medicorum doctrinam, fere omnia vera inveniuntur. Nam quo minus feri a primordiis in sanguine redundat, eo minus deinceps illius restat, quo magis a plena adolescentia, & matura juventute particulæ explicantur activæ, & fervidæ, humidæ aqueasque dissipantes. Quamobrem genitalia quoque non tenera, sed firma, fibræque eorum non flaccidæ, aut laxæ, sed robustæ magis, magisque, & valentes, neque dilatationi facile cedunt, & si quando forte aliquantum cesserint, quiete postea interjecta, ad pristinam redeunt contractionem. Constat autem ex Anatome, vaginæ orificium cingi fibris carneis illius musculi, quem ab ejus constringendi officio sphincterem vaginæ appellamus: qui quidem musculus, etsi non in cunctis, adeo prævalidus sit, ut quod Michael Alberti (apud Schurigium *Parthenolog. sect. cit. cap. 5. num. 8.*) veraciter scripsit = Fœminarum quadam illa facultate gaudeant, ut mediante musculo sphinctere vaginæ, sub clitoride sito, rigidius vaginam constringere possint; In adultis tamen, vividioribus præsertim atque siccioribus, satis utique, ut reliqui earum musculi, validus est: quin nulla fere mulier est, in qua nisi, aut plurimi, aut difficiles partus laxaverint, ita non vigeat, ut longi temporis quiete interposita, suas iterum in constringendo vaginæ orificio vires exerat. Post diuturnam enim a Veneris abstinentiam (id, quod in hac controversia peculiari animadversione dignum est) ita solet vaginam contrahere, ut propterea Joannes Benedictus Sinibaldus *Geneanthropeia lib. 4. Tract. 1. cap. 14.* diserte hæc scribere potuerit = Videre est Viduas, quæ fidem Viris post funera servant, adeo circa muliebria coarctari, ut si alteri deinde socientur, vas præ angustia, & symphyssi fere virginæ præsent. Quin Zacchias citato *consil. 41. num. eod. 3.*, non idem modo jam docuerat, sed & ejusmodi Viduarum quasdam non secus ac si tum primum devirginarentur, sanguinem in coitu effundere = non obstante etiam, quod plures filios fuerint enixæ, haud temere affirmaverat, quando apud laudatum Gasparem a Rejes *quest. 41. num. 9.* habemus, vel = Post partum aliquibus evenire, ut desinentibus lochiis rursus virginalem arctitudinem etiam naturaliter acquirant. Quod si hæc in iis, quæ filios ediderant, quanto facilius, ut infra commemorabimus, in iis, quæ nunquam pepererunt? Et si desinentibus lochiis, hoc est paucas post hebdomadas, virginalis arctitudo restituta est; quanto magis poterit, mensibus, & annis post venereos congressus interjectis restitui?

Hactenus, quæ causæ, sive ab arte, sive a morbo, sive a natura profectæ, fallax reddere possint primum virginitalis signum, quod ab angustia orificii vaginæ repetitur, ostensum est. Nunc signum alterum, quod ab Hymene desumitur, quæ causæ efficere incertum possint, eo brevius indicaremus, quod hæc fere omnes

ad unum genus, hoc est ad naturam referuntur, nisi prius quid non sit Hymen, & quid sit, tum deinceps quot, qualesque secundum naturam varietates patiat, necessario esset demonstrandum. Neque enim cum Obstetricibus errandum est, quæ pro Hymene, ut adversus illas Paræus animadvertit *Operum lib. 23. cap. 42.*, membranam habent quamdam (id quod ipsæ ignorant) præter naturam, cui sedem nonnullæ affingunt primo in pudendi limine, aliæ in media cervicis uteri via, aliæ in extrema ad uteri interius orificium. Qui hæc illas primum docuerant, videntur utique Pauli Æginetæ loco perperam intellecto, se atque illas mirum in modum decepisse. Nam cum initium capitis 72. lib. 6. sic vertendum non dubitarent, quemadmodum postea Andernacus convertit: Genitales Mulierum partes clauduntur interim ex natura, interim ex accessorio, morbo quodam præcedente, alias in imo, alias in summo ore, sæpe etiam in medio spatio, idque aut secundum naturam, aut ex obstructione. Quod autem foramen intersepit intercluditque, vel caro, vel membrana est: Cum igitur sic acciperent, neque de quibusdam tantum Mulieribus, neque de morbo per chirurgiam curando Auctorem loqui, animadverterent; ex perpauca morbo structuram omnium secundum naturam commenti sunt, cum tamen Paulus non κατὰ φύσιν hoc est non secundum naturam, sed κατὰ σύμψυον, hoc est ex concretionem, scripsisse videatur, ut Cornarius monuit in *Dolabell.* in hunc locum; aut si scripsit secundum naturam, haud aliud, quam a nativitate significet, quemadmodum apud Aetium, ab eodem Cornario latine redditum, hæc eadem, quæ Paulus, docentem habemus *lib. 4. serm. 4. cap. 95.* Ea ut putamus, prima triplicis ejusmodi erroris, tamdiu, & tam pervagati causa fuit.

Quamvis autem Realdus Columbus, Professor exercitissimus de re *Anatom. lib. 11. cap. 15.* monuerit, istiusmodi membranam raro adesse, & *lib. 15.* inter ea, quæ raro in Anatome reperiuntur, post innumera Corpora cum alibi, tum in hac, & Pisana, Romanaque Academia a se dissecta, ter dumtaxat, illam invenisse se, scripserit: Quamvis Paræus Chirurgus celeberrimus, citato capite testatus sit, ipsam semel tantum licuisse sibi observare, quam alioquin frustra in plerisque virgunculis omnis fere ætatis a trimatu ad duodecimum usque annum, quarum sibi ex Nosocomio Parisiensi plena copia erat, studiose exquisiverat: Quamvis Andreas Laurentius *Histor. Anatom. hum. Corporis lib. 7. cap. 12. & quest. 13.* prodiderit, puellas se, & abortivos fœtus vidisse quamplurimos, in quibus membrana illa non aderat, quin etiam trimestres, & trium, quatuor, sex, septem annorum Virgines diligenter observasse, & specillo ad Uteri os internum usque immisso, nihil quod resisteret invenisse: quamvis M. Antonius Ulmus libro, & *sect. citatis cap. 7.* confirmaverit, cum in ejusmodi abortivis fœminis, & in natis a partu usque ad septennium diligentissime quæsisset, se nullam unquam animadvertere potuisse Membranam huiusmodi, Hymen vocatam, quin ejus neque vestigium: grandiores etiam dissecuisse Virgines; nihil promovisse: denique ut alios brevitatis causa omittamus; quamvis Jo. Bapt. Silvaticus in egregio libro, quem inscripsit de iis, qui morbum simulant deprehendendis *cap. 9.* memoriæ litterarum mandaverit, cum ad quamdam ejusmodi gravissimam in Principe Fœmina controversiam dirimendam ex pluribus Italiæ Urbibus plures accersiti Illustres Medici eo devenissent, ut sensus tactus medio rem plane determinandam esse sancirent Virginibus Xenodochio, expositis diversæ ætatis multis, propriis digitis exploratis; nequeunte in tanto Virginum numero rem plane non manifestari, absente præsertim omni fraudis, ac malitiei suspitione, & ex improviso facta exploratione; ex hac nihil quicquam in iis omnibus Virginibus, earumve aliqua adesse, innotuisse, quod talem membranam, vel etiam obscurius representaret: Quamvis igitur hæc omnia ita se habeant, & meridiana luce clarius sit, ejusmodi membranam, & in quam paucissimis inveniri, & cum invenitur, esse omnino præter naturam, & quod consequitur, si Obstetrices, illa quam jactare solent periticia, atque experientia essent in Virginum, quas numquam fere, & in Mulierum, quas raro extra partum inspiciunt, naturalibus internoscendis; turpes il-



los errores, primas omnium abjicere debuisse; tamen & apud Paræum affirmabant, posse se certo Virginem a corrupta dignoscere, hujus membranula integræ, vel ruptæ, & violatæ argumento. Quamobrem citato ipse capite hæc continuo subjecit: harum obnunciationibus, dum nimium creduli Judices fidem adhibent, sæpe in errorem impelluntur: Et Vincentius Alfarius Crucius de quasitis per Epistolam in arte Medic. centur. 4. cum post illos, quos modo laudavimus, scriberet, ne idem Italæ Obstetrices facere pergerent, verebatur. Si, inquit, Obstetrices Mulieres ad hanc solam membranam vim proprii Judicii dirigunt, quam recte id faciant, & quanta ob id Judicibus sit illis adhibenda fides, ex hac usque discussis unicuique constat.

Et sane si Parisienses illæ, quæ tamen in obstetricandi arte censentur doctiores, adeo in errore versabantur; quid de Nostratibus non erat timendum? Quarum de plerisque jure meritoque illa dici possent, quæ leguntur apud Schurigium in laudatæ Parthenologiæ sect. 3. cap. 7. num. 4. & 5. = Antiquiores quidem Obstetrices Medicæ fuerunt, & scientificæ, quæ non solum insistebant in obstetricatu, sed omnes Mulierum curabant morbos, & Philosophiam, & medicinam discabant, & libros intelligendi, & componendi compotes evaserunt. Nunc autem solum sciunt fœtum ab utero recipere, umbilicum abscindere, & fasciis puerum involvere, quia sic videntur. Itaque nunc in Germania ob tantam Obstetricum ignorantiam fidemque ideo suspectam, ipsis solis numquam a Magistratu inspectio Mulierum, atque relatio committitur, sed tantummodo Medicis ideo associantur, ut ipsorum jussu partes pudendas dilatent, aliaque mandata faciant. Quod si plerasque nostratum Obstetricum relationes legamus, aut potius, quoniam his sæpe ab aliis aut correctis, aut dictatis utuntur, si cum plerisque earum loquamur, & quid in ejusmodi inspectionibus observaverint, paulo attentius percunctemur; mirum quæ sapius monstra, & portenta audiamus. Virginitatis quidem claustrum, partesque ipsum constituentes integras, illibatas, intactas, coherentes, connexas, unitas, clausas invenisse se, dicunt. At si quid, aut ubi illud Claustrum, & quæ, qualesque hæ partes sint, roges; tunc enim vero aut nihil præterea respondent, aut ea respondent, unde aut veteres illos, aut alios, interdum etiam graviores, de natura, & sede Hymenis, errores ipsarum facile intelligas. Nam quæ antiqua illa somnia de clausis Virginum locis, aut altius, aut inferius per panniculum, sive illiusmodi membranam nonnunquam inaudiverunt, aliæ quidem ex vaginæ tubo superius concluso Virgineum Claustrum comminiscens, hoc quemdam, si superis placet, tubum sive canalem esse ajunt; aliæ autem secundum pervulgata olim verba, quæ Ulmus citato cap. 7. retulit, & confutavit, Nicolî Florentini, ante deflorationem Os Matricis est velatum Panniculo, pannum, aut centonem, aut etiam velum quoddam esse, distant: quod velum aliquæ, sive ut sagaciores appareant, sive ut aliquid Anatomicæ doctrinæ, (sed commentitiæ, atque obsoletæ) audivisse videantur, rarum esse instar retis confirmant; neque enim aliter in hac tanta Anatomies luce adhuc intelligunt, qui per illud Virginibus menstrua penetrent.

Quæ vero non ex auditu, sed ex lectione sibi magis sapere videntur, quid Hymenis nomine, & quanto cum errore intelligant, ex Zacch. colligere est lib. cit. 4. tit. 2. q. 2. n. 3. Hymenem, inquit, etiam se observasse aliquando testatur Mercurius in libro della Commare 1. cap. 2., qui tamen valde errat in ejus Membranæ descriptione; vult enim per illam Nymphas simul conjungi, quod adeo absurdum est, ut nihil supra, quemadmodum ex Doctorum Anatomicorum scriptis facile legenti patere potest. Et certe si hoc aliquando est; præter naturam omnino est. Huc tamen potius referenda crediderimus, quæ de annexis alligatisque Claustro Virginali Membranis, sive pelliculis, & de earum integritate, & unione sæpe solent Obstetrices dictitare, quam ad Membranulas, Severini Pinai Carunculas conjungentes. Mercurium enim suum interdum legunt, italico sermone hæc de Nymphis, aut Hymeneo capite indicato affirmantem: mentre stanno congiunte insieme, sono segno della Virginità, e quando nella congiunzione con l' homo si rompono, o separano, spesse volte con molto sangue, danno segno della Virginità perduta. Pinai

autem librum de Virginitatis Notis nec viderunt; nec, si vidissent, intelligere potuissent: quamquam ne ipsius quidem de Hymene Sententia accuratiori respondet Anatomia; nam, ut nostrum aliquis dilucide alias ostendit, Caruncularum ad vaginæ orificium aliæ nullæ sunt, antequam Hymen dirumpatur, ut quæ ejus fortuitæ reliquæ sunt; aliæ vero sunt quidem, sed ultra Hymenem locatæ, ut ab hoc differant, ipsoque præsentate ab extrinsecus insipientibus videri non possint. Verum; ut ad Obstetrices redeamus; mirandum non est, si quæ non esse probavimus, ea pleræque videre se, ajant; nam & Zacchias laudatæ consilio 41. num. 1. sua etiam tempestate id consuevisse animadvertit. Quo ad disgregationem, inquit, pellicularum Uteri, ut illæ ajebant, certum est illa potius, ut secundum communem muliercularum modum quid dicerent, quam ut quicquam in Virginia in rei veritate circa eas agnoscerent, sic fuisse loquutas; cum pateat, pelliculam illam Hymenem dictam, de qua multa Obstetricula delibenterant, in Virginibus naturaliter constitutis nullo modo reperiri.

At si illa, ut ostensum est, nullo modo secundum naturam reperitur, num forte nulla præterea alia reperitur? Reperitur vero; nisi quid vitiaverit; secundum ordinariam naturalis structuræ normam in eodem semper loco, hoc est in ipso vaginæ orificio, ex eademque interna duplicata ejusdem Vaginæ tunica fere circumcirca ita se attollente, ut foramen, per quod sanguis menstruus, atque adeo crassiora, prodeant, relinquatur, nec obducti panni, aut veli, sed annuli fere, aut semilunulæ similitudo repræsentetur. Ejusmodi autem figura diserte descripta, aut luculenter delineata est magno consensu a Summis Anatomicis, ab aliisque, qui iisdem lectis, aut inspectis, accuratius quæsierunt, primum videlicet a celeberrimis Scriptoribus, qui in hac nostra Academia diligentissimi fuerunt dissectionum Magistri, Gabriele Falloppio in Observationibus Anatomicis, Julio Casserio in Tabul. Anatomic., quæ ad uterum gravidum, & Fœtum spectant VIII. ad Litt. Q. Adriano Spigelio de hum. Corpor. Fabrica lib. 8. cap. 19., Francisco Plazzone de Partibus generationi inservientib. lib. 2. cap. 5. Joanne Veslingio Syntagm. Anatom. cap. 7.; aliisque, deinde ab iis, qui horum observationes propriis confirmarunt, Joanne Riolano Anthropograph. cap. cit. Dominico Pannarolo Jatrologismor. Pentec. 5. Obs. 50. & in adjunctis figuris ad litt. I. Q. & T. Joanne Swammerdamio in Uteri Muliebr. Fabrica adjunctisque Iconibus II. & III. ad litt. G., & IV. ad A., Isbrando Diemerbroeckio Anatomia lib. 1. cap. 26., atque aliis pluribus: novissime ab omnibus, quicumque, & hoc tempore, & paulo ante apud quaslibet eruditiores Nationes in re Anatomica magis clauerunt, ut apud Batavos a Frederico Ruyschio in Observat. Anat. Chir. Obs. 22. & 23., respondentibus Figuris ad litt. D. apud Anglos a Guiljelmo Cheseldeno Anat. Of. the humibody lib. 4. cap. 2; apud Gallos ab Jacobo Benigno Winslowio Exposit. Anatom. traité du bas Ventre num. 653., apud Germanos a Laurentio Heistero Compend. Anatom. num. 234. & Not. 30., & denique apud Nostrates; ut alios in præsentia fileamus; ab Joanne Dominico Santorino Observat. Anatom. Tab. 2. Fig. 1. ad litt. E. Cum his nostræ omnes, longo annorum cursu persæpe, & diligenter habitæ, observationes consentiunt.

Quæ igitur causa fuit, cur ab illis, quos antea memoraveramus, Doctissimis Viris non fuerit hic verus Hymen animadversus? Non una videlicet causa, sed plures, duæ autem præcipue, altera, quod non omnibus Virginibus, neque omni ætate, ut postea dicemus, æque aut magnitudine, aut firmitudine conspicuus est; altera, quod pannum illi, & occludens velum quærebant; non annulum: cujusmodi animi dispositiones quanto impedimento sint verum inquirentibus, nihil ostendere magis potest, quam quod propterea accidit Regnero Graafio Anatomico alioquin solertissimo, structuræque Muliebrium genitalium Scriptori celeberrimo. Cum enim animo imbibisset eorum Sententiam, qui Hymenem docuerant in sola Orificii Vaginæ coarctatione consistere, tametli membraneus annulus, aut Semilunula in Virginibus, quas disseccuit, non desiderabatur; quandoquidem id satis ambæ ejus Tabulæ; huic rei dicatæ, commonstrant II. quidem ad litt.



E. E. E. & IV. ad b. b. b., & ipsi in Virgine secundum naturam se habente *membranofus quidam circulus tantum*, videndum se præbuit, tamen in eodem, in quo hoc scripserat *cap. 5. Tractatus de Mulier. Organis generationi inservientibus*, quod caput est de *Hymene*, ex suis ipse Observationibus, & Tabulis conclusit, præter *Vaginæ Orificii coarctationem naturaliter nullum reperiri Virginitatis munimentum*: usque adeo in observando inter se differunt videre, & agnoscere! Quod si aliqui igitur Anatomici exercitissimi verum Hymenem, ab aliis antea descriptum, ipsi vident, nec tamen præ opinione præjudicata eundem agnoscunt; num forte Obstetrices, quæ nec describentes legerunt, nec ostendentes viderunt, verum ipsas Hymenem sine ulla dubitatione agnitas censebimus? Quid si huc ea aliquando accedant, quæ etiam veri Hymenis præsentiam fallax reddere Virginitatis signum possint? Nonne laudati Crucii verba æquum erit nostra facere: *Nostri igitur Sententia est in casu proposito, nullam prorsus adhibendam esse fidem Mulierculis illis, quando licet Medici doctissimi idem sentirent, lente nihilominus, & nisi magna cum præmeditatione eorum opinio amplectenda esset. Signa etenim, quæ ab arte eliciuntur, & per quæ aliquis Virginitatem seu præsentem, seu jam ablatam dignoscere posset, adeo incerta sunt, atque fallacia, ut qui ex illis solis quicquam certi asserere contendat, crassæ ignorantie, ac temeritatis notam subiturus omnino sit.*

Causæ autem cur vel Hymen ipse fallere aliquando insipientes possit, & quamvis Peritos in errorem inducere, ab alia ejus, quam paulo ante indicabamus, in aliis Fœminis secundum naturam magnitudine, aut firmitudine sunt repetendæ. Namque ut primum de magnitudine dicamus; manifestum est, ut cæteræ partes corporis, partiumque foramina, nasi exempli causa, aut oris, non omnibus ad eundem modum, sed aliis angustiora, aliis latiora contigerunt, sic & Hymenis foramen pluribus a natura amplius obtigisse. Illud quoque non minus evidens est, ut foramina cætera proportionem, dum augetur corpus, & ipsa augeri, ita hoc etiam, de quo loquimur ætate crescente amplificari: quæ res tum communi inspectione anatomica, tum etiam Hymenis Iconibus ex Puellis, & maturis Virginibus accurate descriptis confirmatur. Sic in laudatis *Graafii Tabulis* videre est, quanto id foramen jam majus sit in Puella sexenni, quam in recens nata, & quanta postea amplitudine pateat in Virgine 24. annorum. Si igitur hæc utraque in quibusdam Fœminis causa conveniat; fieri utique poterit, ut sine Hymenis, aut ulla, aut notabili laceratione ineantur, præsertim si Viri penis non sit ex crassioribus, nec Vir ipse in congressu ex violentioribus: qualia de hac ipsa re idem sentientes, attenderunt *Claudinus*, & *Spigelius Respons. & cap. citatis*, atque ante ipsos *Capivaccius Tractatu memorato*, ubi ait, *maxime si virile pudendum non admodum vastum, muliebre autem per amplum sit*, & hunc sequutus *Zacchias lib. & tit. citatis quæst. 1. num. 31.* Accedere præterea potest alia amplitudinis causa, certum ab ortu, aut ab ætate temperamentum, quo Virgo acrius in Venerem feratur. Quam causam *capite citato Graafius* subindicat. Ostensus enim, cur non omnes Virgines primo coitu sanguinem emittant, hinc incipit, quod *Vaginæ osculum*, hoc est, ut vidimus, non agniti ab ipso, Hymenis foramen præ avido coeundi, concipiendique desiderio in grandioribus successu temporis debiscat. Amplitudo igitur faciet, ne laceretur, & quod consequitur, ne sanguinem, lacerationis signum, effundat. Sed & *Riolanus capite indicato*, ætate præsertim, atque aliis quæ paulo ante innuimus, spectatis, effusuram sanguinem tunc negavit, si *Virgo sit paulo annosior, utpote annum 20. supergressa*: quod ipsum ante docuerat *Zacchias sæpius citata quæst. 1. num. 20.* quæstione autem proxima 3. n. 9. & 10., minus conspicua esse in Virginibus concubitus signa post eum annum, asseveraverat.

Itaque etiam *Gaspar a Rejes laudata quæst. 39. nu. 22. inter præcipuas causas*, cur sanguis haud raro tunc a Virginibus non emittatur, primo loco ætatem posuit, rationemque insuper addidit, utpote quæ (ætas) & partes illas laxiores reddit, & duriores. Sed quando de laxitate, hoc est de foraminis ampli-

tudine jam vidimus, de annuli ipsius, in quo foramen est, duritie, sive firmitudine videamus. Quamquam cum supra ostenderimus, quid naturalis constitutio, atque ætas valeant in circumjectis Orificio *Vaginæ* fibris, siccioribus, eoque firmioribus, & robustioribus reddendis, ea protulimus, unde intelligi ultro liceat, quantum eadem causæ facere ad majorem quoque annuli duritiem, & firmitudinem possint; separatim tamen de causis istis singulis quædam adjiciamus. Et primum minime dubitandum est, quin ab naturali constitutione aliis firmior, aliis mollior, aliis crassior, aliis tenuior, ut cæteræ quoque partes, obtigerit. Quare non difficile est conciliare *Falloppii*, & aliorum dissensum. Ille enim membranam hanc, *nerveam, non autem carneam esse in citat. observ.* docuit; *Vesalius autem de hum. corporis Fabrica lib. 5. cap. 15.*, quem in primis sequitur *Riolanus capite citato*, carneam esse, affirmaverat. Nimirum, & nos in aliis annulum ad nerveam magis, quam ad carneam Membranæ naturam accedentem, in aliis contra; itemque in aliis magis, in aliis minus compactum, crassumque deprehendimus: in nonnullis etiam est adeo crassus, atque compactus, ut vel Chirurgica sectione, quemadmodum apud *Zacutum Lusitanum lib. 2. de Praxi Med. Admir. observ. 143.*, & *Ruyschium laudata Observ. 22.*, atque alios, instante partu, sit aperiendus, vel certe viris crassiore præsertim pene instructis, non leve, antequam subeatur, negotium facessat. Igitur si quando & foramen amplum mediocri Viri genitale non difficile admittat, & annulus insuper ex crassiore, & compactiore substantia sit, & quæ ad nerveam accedat; non facillime utique lacerationem patietur. Quorum utrumque, atque alia præterea complexus est *Mercurialis*, cujus verba ex *cit. Consultatione*, hic juvat producere. *Contingere potest, inquit, ut foramen illius membranæ natura, sive arte amplum effectum, penem saltem sine ruptura, & sanguinis profusione admittat: quod Virgo similiter facere potest adstrictoriis medicamentis, quippe quæ membranam illam condensantia, duram, & fractu difficilem præstant. Quinimo haud inconvenit, ut ab ortu naturæ ejusmodi velamen sit densum, atque contumax effectum.*

De ætate autem (quæ si quid aliud in tota hac quæstione semper maximopere attendenda est) quod Hymenem crassiores faciat, & magis renitentem, cum ratione intelligitur, tum observatione ostenditur, *Spigelii* in primis, qui *cit. cap. Hymenem se in maturis Virginibus crassiorem reperiisse: in junioribus debiliorem, mollioremque*, testatur. Ejusmodi, credimus, certissimæ observationes, & quod ex ipsis ultro consequitur, jure meritoque fecerunt, ut quemadmodum *Michael Bernardus Valentinus in Novellis Medico-Legalibus. casu 8. refert apud Schurigium sect. 3. Parthenologia cap. 6. in quodam casu responderit Facultas Medica Lipsiensis*, quod nonnulla quidem aut læsa, aut integræ Virginitatis signa a Medicis allegantur; attamen cum eadem in Adultis valde dubia, & incerta sint, hinc ad quæstionem, an per inspectionem infallibilia, vel ad minimum valde probabilia indicia inveniri possint? Nil certi determinari, & decidi possit.

Quod si repetitis sæpius congressibus tandem aliquando Hymen ex parte aliqua rumpatur; num forte ita ab ullo demonstratum est, numquam amplius resarciendi spem remanere, ut, velimus, nolimus, *Sinibaldo* hoc contendenti *cit. lib. 4. tract. 2. cap. 2.* manus dare necesse sit? Certe id ipse non probavit auctoritate sive Hippocratis, discissum nervum consolidari; sive Galeni, foramen membranæ coalescere, negantis. Nam neque hujus locus *lib. 1. de Semine cap. 6.* inspicendus, de membranis est disruptis, sed de naturaliter perforatis; Neque Hymen proprie nervus est: imo, ut supra indicavimus, membrana est ad carneam haud raro accedens naturam. Membranam autem, si quæ alia, proprie dictam, quæ Tympani Auris nuncupatur, vel ipsam *Valsalvæ* experimentis constat *Tract. de Aure Hum. cap. 5. num. 5.*, si perumpatur, nullo adhibito medicamento, in pristinam integritatem restitui, & quidem sine levissimo ductæ cicatricis signo. Quanto ergo hanc magis, quæ Hymenis annulum efficit, coalescere posse, quis credat, cum videlicet, *Diemerbroeckio cap. citato* id docente, fibris carnosissimis intertextis, additis præsertim remediis, quibus *Silvaticus cap. su-*



pra indicato facillimum existimabat partium illarum symphysim, sive coalescentiam recuperare, sive quibus Agrippa; ut in sæpius memorato Capite Riolani legimus; scribit cap. 6. Libri de vanitate scientiarum, Virginitatem reparari posse resarcinato Hymenæo, aut remedio adhibito omnium præstantissimo, longa a venere abstinencia; Natura enim (verba sunt ipsius Sinibald. tract. 1. cap. 14.) dum quiescit, partium unitatem restituit. Huic eidem remedio tantum tribuebat Severinus Pinæus præcitati Opusculi lib. 1. cap. 6., ut hæc scriberet: quia sic accedit quies Partium, si earum quadam ab invicem recenter solutæ parum dissideant, eadem procul dubio reperiuntur, & integritati pristinae restituntur, itaut gravis esse possit, cui etiam virginitatis notæ iterum appareant. Pinæo autem non modo astipulatur Zacchias tit. cit. quæst. 3. num. 5., verum etiam sanguine, qui ex laceratis partibus effluit, mediante adeo invicem temporis spatio denuo coalescere, affirmavit, ut majorem interdum angustiam præ se ferant, quam ante amissam virginitatem facerent. Et sane qui in Viduis, quæ longo post tempore ad secundas Nuptias accedunt, si non majorem, at eandem saltem cum Gaspare a Rejes cit. quæst. 41. pudendarum partium clausuram aliquando inveniri ponat; multo is facilius, quam in illis, quæ etiam peperisse supra dicebantur, viduis tum credet, tum intelliget, qui fieri potuerit, ut in duabus aliis Mulieribus, quæ peperisse non dicuntur, & in quibus dolus nullus subesse poterat, hæc adnotaverit idem Zacchias superiore quæst. 1. num. 26. Vidi ego, inquit, quæ a coitu diu ob Marti absentiam, vel infirmitatem abstinens, cum de novo concumberet, sanguinem effunderet; & pudicissimam Viduam novi, secundonubentem, sanguinem effudisse; cum primum secundo Viro conjungeretur: biennio autem viduitatem, & cælibem vitam servaverat: ut verisimile aliquibus videri possit, in his laceratum antea Hymenem firmissime tam longo intervallo, biennii præsertim, coaluisse. Verum hæc dicta volumus, ne Sinibaldi Sententiam quispiam, nisi antea diligenter examina-verit, temere, & pecudum more sequatur.

Nam alioquin, satis nos supra ostendisse, credimus, posse hymenem, aliquando veneris usu non rumpi propterea quia a Natura amplius foramen annuli substantia renitens, & durior comprehendat. Quid vero, si cedens, & mollior? Ne sic quidem semper necesse est, ut rumpatur. De quinque enim casibus, in quibus sine Hymenis disruptione posse Virgines notitiam Virorum habere, Plazzonius noster citato capite statuebat, primum eo referri posse, censemus, ut annulus cedat. Si Virgo membranam obtineat transverse incisam, non foramine rotundo præditam; tunc, inquit, non fit ruptio, sed tantum dilatatio. Nimirum quia sic Membranæ (tunc minus quam solet, annuli similis) partes ambæ, per rimam, dummodo hæc sit longior, divisæ, facilius peni permittunt transitum. Quod si etiam rima non in transversum, sed in longum ducta sit; non minus idem accidere videtur posse: quin res insuper confirmari Observatis Anatomico-Præcificis Gerardi Blasii, qui cum Hymenem qualem in deflorata non una observavit fig. IX. Tab. II. exhibeat; in ea Membrana, non foramen rotundum, sed oblongam rimam, repræsentat.

Sed quæcumque observationum Blasii causa fuerit, illud certum est, quod maxime attendi volumus, in deflorata non una Hymenem ab ipso inventum esse. Quod si Hymen, qualis ab eo delineatur ex hujusmodi Mulieribus, comparatur cum Hymene, qualem ex Nubili Virgine, & Infantibus Veslingius V., & VII. figura indicati cap. proposuerat; continuo apparebit, ne Peritum quidem Anatomicum, nedum rudem Obstetricem, vitiatæ Mulieris Hymenem ab Hymene Virginis in ejusmodi casibus posse internoscere. At enim Blasius rem satis sua illa figura non expressit: certe enim monuit, in defloratis inæqualem admodum esse circulum Hymenis, & quasi serratum; quod ea figura non ostendit. Vero. At si vel maxime inæqualem, serratumque delineasset; num forte magis inæqualem, magisque serratum potuisset, quam in memoratis Graafii Tabulis delineatum videmus? Harum tamen Icones, ex Virgine, itemque ex Puellulis sunt omnes, ut diximus, descriptæ. Manifestum est igitur, in defloratis quibusdam Hymenem sic remanere, ut possit,

tum Medicos, tum Chirugos, tum Obstetrices decipere; nisi quis forte illis credat has Mulierculas antefendas ob exercitationem, quam sæpe jactare non dubitant suam in Virginum quoque ipsarum Naturalibus inspiciendis; quasi vero Medici, & Chirurgi non multo sæpius, atque accuratius, & in viventibus ad curationem, & in mortuis præsertim ad anatomen illa inspicerent. Sed quanta in Obstetricibus hujusmodi exercitatio, & peritia sit, cum multa alia, tum illud in primis commonstrat, quod Fœminei Sexus Fœtus pro maribus quotidie habent clitoridem pro pene, turpissimo errore, accipientes, quodcumque illi aut antea per abortum ejiciuntur, quam ex naturæ instituto prominere clitoris desinat, aut quamvis maturi, hanc eandem tamen etiam tum habent extantem, quos ipsos non dubitant (id, quod ob consequentia gravius est, & sæpius accidisse omnes sciunt) in Sacro Baptismo Masculorum nominibus appellandos, cum Fœminæ sint, Ecclesiæ exhibere. Quod utique non contingeret, si vel levem particularum, ex quibus loci Fœminei constant, notitiam haberent.

Verum, ut ad cæteros Plazconi casus redeamus, quos supra fere omnes attigimus; ultimus restat, qui ad mollitudinem attinet, lubricitatem, & laxitatem, qua ipsa Hymen in concubitu integer, illæsusque servari potest, tempore videlicet Menstruorum, aut non longe post; tunc enim partes illæ relaxantur, & penis facile intromittitur. Hunc autem modum a Pinæo olim, citato cap. 6. animadversum, & duabus observationibus comprobatum, eorum videlicet, qui Virgines Uxores eo tempore ineuntes facillime, eadem, reliccatas partibus, vix tandem post magnos, repetitosque conatus inire potuerunt; hunc igitur modum, etsi facile esset aliis confirmare observationibus, Zacuti in primis memorata observ. 143. nec difficile rationibus illustrare; Nobis tamen hic satis fuerit indicavisse, cum quia notior est, ut qui eventu frequentior esse soleat, quemadmodum vere Zacchias loquitur lib. & tit. sæpius cit. quæst. 3. num. 5. tum præsertim quia æquo longiores esse nolumus, quando & plura hactenus scripsimus, & quædam alia necessario addere jam debemus.

Cum enim, vel hac dumtaxat indicata, aliisque prætermittis, satis multas produxerimus causas, quibus duo præcipua Virginitatis signa, nimirum angustia ad orificium Vaginæ, & membrana Hymen, apud peritissimos etiam Medicos dubia, apud obstetrices autem, quæ plerasque illarum, ne audiverunt quidem unquam, fallacissima reddantur; ostendendum adhuc superest, vel post usum Balnei aquæ calidæ; de quo cum quod satis sit in hanc Sententiam subjecerimus, scribendi finem faciemus. Nos quidem non præterit, quam antiquus sit ejus balnei usus ante muliebrium Genitalium inspectionem, & quem in finem institutus. Neque id ignorari a quoquam potest, qui vel sextam dumtaxat Sac. Rotæ Romanæ Decisionem legerit in illa earum Decisionum Centuria, quæ ob materiæ affinitatem in calce Operum Zacchiæ Medico-legalium addita est. Sub illius enim Decisionis num. 9., commemoratur, Hostiensem voluisse, quod mulier debeat prius lavari cum aqua calida, & ibi diu retineri ad dissolvendum medicamenta, quæ essent apposita, ut ibi dicit Abbas. In ea autem aqua, quid præterea sit incoquendum ad locorum angustiam arte factam, vel facilius relegendam, alii postea docuerunt, & in his Codronchius in extremo cap. 11. Methodi testificandi, hisce verbis: Conniventia vero, & adstrictio medicamentis facta, poterit deprehendi, si cum quibusdam laxantibus, & calefacientibus muliebria loca foreantur. Quibus in verbis Zacchias, qui Codronchium sequitur, pro calefacientibus legisse videtur, nec ab re quidem, emollientibus, qualia etiam enumerat lib. 3. tit. 2. quæst. 7. num. 5. ut Malvam, Bis-malvam, Violas, Brancham Ursinam, Betam, Fœnugracum, Semen Lini, Melilotum, & hujusmodi: recte quoque admonet, animadvertendum esse, quod non illico a lotionem, veritatis experimentum sumendum est, sed post convenientem locorum exsiccationem, quoniam immediate post fomenti adhibitionem, absque dubio loca relaxata, & patentia comperientur: Sed si exsiccari permittantur, si Virgo Fœmina sit, invicem coherent, & naturalis constitutio evidenter apparet, sin simulata sit Virginitas, a collutione ariditas, contractio, & corruga-



tio locorum cessat, & ea potentia remanent manifeste corruptionem demonstrantia. Illud tamen est de hoc Zacchia loco diligenter attendendum: quod ait, si Virgo Fœmina sit; id ita non accipiendum esse, quasi absolute diceretur: alioquin egregius auctor sibi non constaret, quippe qui postea lib. 4. tit. 2. quæst. 1. præter illam Conclusionem quam initio laudavimus, hanc etiam constituit num. 24. Quibuscumque signis, quæ Virginitatem incorruptam attestari possunt, præsentibus, Virginem esse incorruptam, certo firmari non potest. Illo igitur modo citata quæst. 7. loquutus est, cum ad illud dumtaxat respiceret, de quo Sermonem ibi instituerat, medicamentis adstringentibus, quantumvis validis, ac potentibus ad Virginali angustiam ementendam non eam usam esse Mulierem, in qua post illud experimentum loca invicem coherent, & naturalis constitutio evidenter appareat.

Et sane nihil aliud ostendi eo experimento potest, dummodo tamen, ne aqua, & illuc, & tandiu pervenire Muliebri aliqua non difficili fraude prohibeatur, quo quidem nisi perveniat, atque id tandiu donec alte impactas diuturno, & sæpius iterato usu, validissimorum medicamentorum adstringentium particulas penitus solverit, atque eluerit, frustra id tentamen susceptum sit. Quid vero si paulo ante balneum usa esset Mulier adstrictoriis medicamentis, aut oleosis, aut oleis quibusdam exceptis? Videmus enim Sinibaldum eodem, quod antea laudaveramus, cap. 14. tract. 1. lib. 4. inter cætera, quæ ad Mulierum naturalia adstringenda commendavit, optima insuper fore dixisse linimenta ex oleo masticis, cotoneorum, & myrtillorum. Neque ignoramus, qua ratione certa quædam unguenta, sive ut vulgo appellantur Manteche apparari possint, quæ loca, quibus adhibentur, restringant. Num forte adstringentes particulas aqua, aut incocta aquæ emollientia auferre tunc poterunt, quas oleum protegat, & pinguedo? Sed, & Symphyti majoris eximias in coarctando vires, quas ex producta Hoechstetteri observatione supra confirmavimus, ex eadem novimus, non aqua, sed aceto fuisse victas. Quid? Quod non omnes adstringentibus, sed quædam etiam, ut ex Fortunato Fideli ostendimus, tumefacientibus se coarctant, quorum vis non superficie tenus se continet, ut prompte aqua possit elui. Verum faciamus causas omnes per quas ars constringit, tolli aqua posse; at certe illas per quas morbus constringit, ut scirrhum, aut duram, magnamque cicatricem, aqua non tollet. Nec vero eas angustias tollet, quas natura ipsa, vel tuta est, vel mox, aut longo saltem post intervallo restituit per siccius a primordiis, itemque ab ætate tem-

peramentum, adjectasve Sphincteris vires sive per se majores, sive, quod frequentius, diuturna a veneris usu abstinencia corroboratas, nullo autem unquam partu laxatas. Denique nec Hymenis tollet integritatem, quam nec certum est longissima quiete non posse a natura, vel sine ullo cicatricis vestigio reparari; certum est autem, posse a natura in concubitu ipso servari, propterea quod Hymen, sive a peculiari Corporis constitutione, sive ab ætate, sive a temperamento, foramine sit ampliori, atque etiam ex substantia sit ob durtiem, densitatem, crassitiem magis resistente, vel foramine sit insculpto ad modum oblongæ rimæ, ut propterea, aut etiam ob adjectam interdum lubricitatem cedendo, facilius sine ruptura potuerit medicrem penem transmittere. Quales enim in Virgine incorrupta, post ejusmodi balneum, convenientemque exsiccationem, & Hymen, & angustia apparent, tales quoque in ea, quæ sic quidem, ut diximus, corrupta sit, eadem appareant, necesse est. Neutra enim eas habet ab adstrictoriis medicamentis, sed utraque ab ipsa natura.

Quæ omnia, cum ita sint: primum illud plane intelligitur, quæ factum sit, ut obstetrices, quippe horum pleraque, non modo non attendentes, sed prorsus ignorantes, persæpe in Virginitate dignoscenda & olim deceptæ sint, & adhuc decipiantur. Quapropter in Juris Pontificii libris a Gaspare a Rejes laudata quæst. 39. num. 31. productis, illud diserte scriptum est: Sæpe fallitur oculus, & manus obstetricum. Sacra autem Romana Rota apud Zacchiam quæstione illa sæpius a Nobis citata 1. ante num. 1. obstetricum judicium esse fallax, testatur: atque; ut omittamus, quæ de incertis fallacibusque ipsarum relationibus admonuerunt Fidelis, & Paræus locis cit., & hic insuper in Tractatu de renunciationibus; Scharigius certe in sæpius memoratæ Parthenologia sect. 3. cap. 7. num. 5. ex Teichmeyero, & Augenio certissima exempla profert tum peritæ olim creditæ obstetricis, quæ Magistratui testata est illibatam illam atque integram esse Virginem, quæ post aliquot hebdomadas peperit, tum sex probatæ famæ seu peritæ obstetricum, quæ juvenculam quamdam, quæ septem antea mensibus puerum pepererat, Virginem intactam judicarunt.

Deinde ex illis omnibus, quæ supra a nobis producta sunt, hoc evidentissime consequitur, ut sine ulla prorsus dubitatione, unanimes censeamus, obstetricum judicium de Virginitate Fœminæ, cujus naturalia, vel post usum Balnei aquæ calidæ recognoverint, admodum incertum esse.

J O. B A P T. M O R G A G N I

*Super seminis emittendi impotentia*

R E S P O N S U M

M E D I C O - L E G A L E A L T E R U M.

M Andatis obsequens Reverendissimi Propriæfulis attente perlægi primum quidem Positiones Dom. Mariæ . . . . ., & Responsiones Dom. Hieronymi . . . . .; deinde Relationem Præstantium quatuor Medicorum, eamque accurate perpendi. Nunc restat, ut juratus sententiam, qualis ea cunque sit, aperiam meam de impotentia Viri, I. an ipsa existat. II. an perpetua, vel medicabilis. Quod sicuti faciam eo veri studio, quo natura, & institutione solitus sum, & quod Deo, & Ecclesiæ semper, ac præsertim in gravissima Causa, debeo; ita eo brevius rem expediam, quo copiosius Docti isti Medici, omnia diligenter persequentes, exposuerunt.

Et sane quod ad I. attinet, ex ipsis Viri quo de Morgagni Opusc.

loquimur, Responsionibus adeo perspicue ostenderunt, nescire ipsum, quid viris accadat cum semen emittunt, & quod consequitur, nunquam emisisse, ut jure hinc conficere potuerint, absolutam seminis impotentiam in ipso existere, eamque a natura. Quid enim responderi ad hæc possit? Num ideo nescire, quid cæteris accadat, quia ex illis sit quibus semen effluit cum nulla, ut Zacchias loquitur, voluptate? At ex illis non esse, demonstrat eorum descriptio apud eundem Auctorem Quæst. Med. Leg. 1. 9. t. 3. q. 2. p. 10. (negantem præterea, eum affectum remediabilem ullo modo esse, si a natura sit). In illis enim nulla erectio fit, aut modica, & quæ ad opus non sufficiat, & cum qua semen, & quidem ex se effluit; in



nostro autem illa non deficit; sed nihil effluit, ne tot quidem, ut ipse fatetur, *extra vas*. adhibitis incitamentis. At enim de eo ambigit, an saltem effluerit *intra vas*. Verum hoc minus facile fuisse, ostendunt laudati Medici: quibuscum facit Romanus Archiater, Sinibaldus Geneanthropiæ l. 3. tr. 3. cap. 7. ego autem addo, me quidem legisse, esse aliquos, ut citata quæst. n. 20. ipse quoque refert Zacchias, *qui in venere exercenda semen emittere non possunt, quod tamen vel in somnis, vel in masturbacione emittunt*; sed contra de iis qui cum in prima possent, in secunda non possent, a me quidquam esse lectum, non meminisse.

Multo autem minus responderi potest, esse nostrum ejus viri similem, qui etsi nihil quod sub sensu caderet, emittebat, feminis tamen partem maxime necessariam qua virginem gravidam fecisse, opinabantur, hoc est spirituum ingentem vim copiamque emittebat. Namque, ut omittam, hanc opinionem, quam ingenii, credo, ostentandi causa quidam postea aliqua defensione non indignam putarunt, fuisse a Romano, Bononiensi, & Mediolanensi Medicorum Collegiis reprobata; dicebatur vir ille post tantam spirituum emissionem *sensibus fere omnibus destitutus, humi concidere, & post unam venerem, per mensem libidinis incitamentis & carnis igniculis vacare consuevisse*, ut in memorato Sinibaldi Opere legitur l. 1. tr. 3. cap. 6.: quarum rerum nullam in nostro casu esse video.

Atque hæc non aliam ob causam attigi, nisi ut apparet, nihil solidi adversus illa posse regeri, quæ ab laudatis quatuor Medicis assumpta sunt, ut inde, & recte quidem, concluderent, absolutam feminis emittendi impotentiam esse in isto Viro, eamque a natura. Recte, inquam: neque enim si ea impotentia absoluta, & a primordiis non esset, sed *respectiva*, ut appellant, adventitia, & ex accidenti, fieri potuisset, nullo prævio ante pubertatem accidentis ejus indicio, ut ad annum usque circiter trigésimum nunquam semen vel post tot, ac tanta, ac tam diuturna incitamenta emisisset.

Ex hac ipsa impotentia ejusmodi confirmatione, de cuius *impotentia existentia* I. loco videndum fuerat, illud quoque elucescit quod II. loco sequitur examinandum, sitne ea futura *perpetua*, an *medicabilis*. Nam quæ spes nobis esse possit illam tollendi, quam tot anni, & variæ, ac meliores ætates, ac talia denique incitamenta, non dico tollere, sed ne imminuere quidem ex parte aliqua potuerunt? Humores certe, & partium quoque ipsarum nonnulla debilitas temporis longitudine, ætatumque varietate, ac partium exercitatione mutantur. Non igitur in humoribus, aut in levi partium debilitate pervicax ista, & constantissima impotentia consistit. Reliquum est igitur, ut in partium aliquarum, aut saltem particularum, ipsis necessario inservientium, defectu, aut prava figura, situ, occlusionem, aut aliis ejusmodi vitiis consistat. Quæ si vitia sub sensu caderent; alicujus, & occlusionis præsertim tollendæ spes esse posset. Sic qui ob pupillam imperviam, aut ob suffusionem cæci nascuntur, aut surdi ob auditorium meatum ea quæ demi possit, materia obsessum; hac solertis, & Rei Anatomicæ non ignari Chirurghi auxilio detracta, suffusione autem deturbata, pupilla denique, id quod in Anglia perfectum est, idoneo intra oculum immisso instrumento adaperita, audiendi, videndique ingenta impotentia solvuntur. Neque aliter qui podice, aut urethræ orificio occluso in lucem eduntur, apta incisione eam qua carebant, obtinent recrementa egerendi potestatem. In isto autem Viro cum vitium nullum exterioribus in partibus occurrat; necesse est, interiores teneat, aut si exteriores, ad harum particularum spectet intimas illas, minimasque, sed eo magis officientes, quo minores sunt; minimis enim, & sensum fugientibus structuris maxima pleraque opera nostris in corporibus perficiuntur. Eas autem structuras mutare, aut partes quæ desint, supplere unus est qui possit Præpotens nostri Conditor Deus: Ars certe ulla non potest.

Et vero quæ possit quæ ne structuras quidem illas ultimas cognitæ habeat, imo quæ nesciat, in qua potissimum de tot partibus, & quod vitium

sit unde ista existat impotentia? *Cujus autem rei non est certa notitia*, ut in Præfatione ad libros Medicinæ suos agebat Cornelius Celsus, *ejus opinio certum reperire remedium non potest*: in isto autem usu ne probabile quidem, cum partes in quibus procul dubio res ea est, neque paucæ sint, & pateant simul plures, paucioresve tot vitiis, tamque inter se discrepantibus, in eoque tamen convenientibus, ut istam asserre impotentiam valeant, ideoque faciant, ut quæcunque conjectura veniat in mentem, continuo alia, atque alia se offerant, quarum cui plus tribuas, minime videas; illud videas, prudentis esse hominis, id quod Docti isti Medici fecerunt, sequi, ut assensum omnem cohibeas.

Nec vero sola ratio indicat, impotentiam istam esse insanabilem, sed & auctoritas idem confirmat Medicorum, passim, ut notissimum est, fatentium, *Organicos* morbos vel adventitios, nedum congenitos, vinci non posse. Quin imo gravissimus in his rebus Auctor Paulus Zacchias in eadem quam semel atque iterum supra laudavimus, Quæstione n. 13. de ipso hoc morbo, de quo scribimus, verba faciens, discrete docet, tunc etiam quando non ab organorum structura, sed a frigiditate pendet, si quidem a natura sit, in prima juventute, calore in vigorem properante, fortasse aliquod remedium, licet non sine difficultate, esse admissurum; sed post corporis totale augmentum si perseveret, extra omnem spem sanationis fore.

Præterea ipsa quoque experientia, quantum ego novi, necdum ostendit, hunc quo de agimus, morbum posse humana Arte superari. Non pauca vidi, multa audiui, plurima legi: nec unquam tamen accidit, ut quæ a natura esset, emittendi semen impotentiam fuisse victam, cognoscerem. Plura quidem scripta sunt a Medicis exempla eorum qui emittere semen non poterant. Sed alii, ut supra quoque indicatum est, extra concubitum emittebant, quales a vetustioribus Medicis Aetio, Rhasi, atque Avicenna, & ab eo insuper qui hos citat, Marcello Donato de Medica Hystoria Mirab. l. 4. cap. 18. proponuntur. Alii in concubitu, si non semen, at flatus sive per urethram, sive per anum extrudebant, quorum hos Aetius, & Amatus Lucitanus describunt, ab Donato ibidem laudati, illorum autem unum Zacutus de Praxi Medica Admirab. l. 2. Obs. 121. Alii, quos memorat Petrus Forestus Observationum Medicinal. l. 26. Obs. 18. in Schol. cum nuper a nuptiis *utrum nimis concalfacti, vel nimio amore incitati, semen minus ejaculari possent, postea animo sedatiores, id optime fecerunt*: præterea autem neque hi, neque illi de quibus proxime dictum est, id impedimenti a natura habuisse scribuntur, & si vera fateri volumus, non videntur.

Nec certe habuerunt alii, quos recensent Paulus Ammannus Miscellan. Nat. Cur. Dec. 1. An. 2. Obs. 185.; Frider. Christianus Cregutus eorund. Miscellan. Dec. 3. An. 5. & 6. Obs. 287.; & Nicolaus de Blegny Zodiac. Medic. Gallic. An. 2. M. Mart. Obs. 4. Nam Scriba de quo hic loquitur, plurimos antea suscepit liberos, cum denique propter carunculam seminalem tumefactam, & induratum, semini, quod ipsum quoque postea induruit, omnino exitus præclusus est. Scriba autem alter, de quo Ammannus, hanc impotentiam per integrum annum dumtaxat pertulerat, cum semen suis in vasis cohibitum, sibi per tria foraminula exitum aperuit in ima dextera ventris parte, credo ex vase quod illac transit, semen ipsum a teste ad Vesiculam deferente. Vir denique a Creguto propositus, cum in adolescentia semen emittere potuisset, id posse desierat post immatrem, quam sæpiissime perferre coactus fuerat, frigoris vehementiam. Nec tamen ab impotentia hac, quantumvis adventitia, eorum quisquam potuit liberari; quanquam omnes per veneream palæstram in qua erant assidui, aliquis etiam ultra annos undecim id conarentur, & ultimus, in prima adhuc virilitate, remediis insuper; nam de causa externa constabat; uteretur. Sed minime hoc loco omittendum est sapientis Medici Creguti judicium, qui affectum esse incurabilem, quia per longas nimis moras invaluerat, statim pronunciaverat. Quod si hoc in adventitio; quanto in eo magis qui sit a natura?

Adven-



Adventitium pariter fuisse, existimo in utroque illorum, qui a Casparo Wolphio memorantur apud Schenckium Observation. Medic. l. 4. ubi de Coitu Obs. 6. si *testium durities*, propter quam primus *semen nunquam excreverat*, post ortum; sic enim fere solet; advenerat, sique alterius *similis* in ea quoque duritie *casus* fuit: quemadmodum & in eo de quo legisse olim videor in Disquisit. Corp. Hum. Jo. Maur. Hoffmanni, ob scirrhum testium confirmatum ne tantillum quidem seminis ejaculante. Verum live in aliquo horum durities testium a primordiis fuit, live non fuit; neminem ipsorum ob sua ista impotentia solutum legimus.

Una ex omnibus, quas vidisse meminerim, istius generis historia restat; nam altera quæ ex Felice Platero profertur Observation. l. 1. ubi de Actus Veneri Defectu, ne id quidem certum proponit, an verax esset querela uxoris de marito se *citra spermatis effusionem* exercente. Una igitur illa est Georgii Wolfgangii Wedelii apud Thomam Bartholinum in Act. Medic. Hafn. Vol. 2. Obs. 44. Textor erat in venereo congressu validus vel præter modum, nulla tamen, licet maxime urgeret, subsequa ejaculatione.

Huic tandem post quendam morbum interjecto quodam tempore, & post ingentem conatum ea impotentia sublata est. Igitur nisi ille morbus fortuito intervenisset; ne hic quidem sanatus esset. Nec tamen constat, impotensne esset a natura, cum illud tantum constet, per quinque annos sic fuisse.

Quæ cum ita sint, exemplisque omnibus, quæcunque mihi ad hoc tempus cognita sunt, diligenter perpensis, nullum occurrat, quo absolutam, & quæ certe a natura esset, emittendi semen impotentiam, aut per se, aut Medicæ Artis ope victam fuisse, cognoscamus; imo sæpius etiam adventitiam, quæ ad longum durasset tempus, fuisse insanabilem, perspicimus; profecto non video in casu proposito quæ spes esse possit sanationis.

Quapropter, ut eandem concludam; sicut ipsis Dom. Hieronymi Responsionibus innixus, semen emittendi impotentiam, eamque absolutam, & a natura, in eo existere, ita ratione, auctoritate, & experientia fretus, eandem perpetuam fore, nec humana Arte medicabilem, juratus respondeo, quatenus Medicæ Facultatis natura finit, & mea in hac Facultate mediocritas.

## J O. B A P T. M O R G A G N I R E S P O N S U M

### M E D I C O - L E G A L E T E R T I U M

*An post septem a conceptione menses infans nasci possit vitalis, & perfectus?*

**Q**Uæritur ex me sic in universum, num fieri nullo modo possit, ut post septem a conceptione menses infans nascatur non vitalis modo, sed & numeris omnibus absolutus. Ego vero neque rationem, neque experientiam obstat, respondeo, quin posse, affirmemus.

Non rationem. Neque enim in tanta horum temporum luce anxie attendunt sapientissimi Medicorum aut numeros quosdam Pythagoricos, a quibus *Antiquos illos celebres nimis falsos fuisse*, jam tum diserte agebat Fortunatus Fidelis, cum sub initium præteriti sæculi de septimestri, & octimestri partu scriberet libro 3. de Relationibus Medicorum; aut ægrotationes nescio quas certis gestationis temporibusatribus, & foetibus communes; aut, ne longum faciam, alia ejusmodi: quæ omnia cum alii antea, tum præsertim nostra memoria nervose confutavit Vir Cel. Heisterus in ampla Dissertatione Medico-Forensi, qua contra Zacchiam, & qui cum eo faciunt, ostendit, hominis partui nullum certum tempus in universum tribui posse: quod a Vetustissimis traditum, & ab Augenio duobus libris de eodem argumento editis comprobatum, Gaspar quoque a Rejes in Elysio Jucundar. Quæst. Campo quæst. 90. n. 9. & Diemberbroeckius Anatom. l. 1. cap. 25. Franciscus Verde in Observationib. Physicolegal. Obs. 4. alii que censuerant.

Pro causa autem, atque ratione celerioris, aut senioris secundum naturam partus cum spectandum potissimum sit celerius foetus incrementum, & robur, & quod hujus varietatis causa præcipua est, parentum quoque, & matris imprimis vigor varius & constitutio; nihil prohibet, quin si parentes juventute, & viribus floreat, & multa vel extrinsecus faventia convenient, ex tot foetibus aliqui aliquando possint maturi jam esse partui post mensem septimum, vivacesque, & numeris omnibus absoluti prodire. Et sane Fidelis libro citato quid ipse diligenter observasset, in medium proferens, qui septima mense utcumque nati sunt, fere omnes, inquit, exiguo, & nisi bene valida formatrix facultas fuerit, quasi imperfecto corpore eduntur, quique nondum justum naturæ robur assecuti fuisset

se videri possent. Si fere omnes; non omnes igitur; sed ii quibus non bene valida formatrix facultas fuit; non quibus fuit, hoc est, ut supra primus hic Medico-Legalis Doctrinæ Magister loquitur, non quibus validum fuit parentum robur, certa que locorum fecunditas. Possim huc alios supra laudatos Auctores addere, iisque adjungere quæ Mauriceau in Traët. delle malattie delle donne gravide, ubi & præcocium pro solis, & soli varietate fructuum exemplo utitur, & quæ edidit in Pandectis Medico-Legalibus Parte 1. Sect. 1. Casu 26. Mich. Bern. Valentinus sub litt. D. Sed satis est Gasparem a Rejes cit. quæst. n. 10. indicare; qui insuper ex analogis causis repetendum, egregie sentit, nec magis esse admirandum, quod aliqui interdum pueri ante consuetum tempus gignere, & puellæ aliquæ tenellæ adhuc concipere potuerint.

Nec vero nobis magis obstat, imo vel magis favet ipsa Experientia. Non me quidem fugit, Aristotelem solitum esse objici, quasi, ut quidam, & in iis Zacchias Quæst. Medico-Legalium l. 1. tit. 2. quæst. 3. n. 64. mancos omnes, mutilos, imbecillos, aut certe signum aliquod habentes imperfectionis septimestres nasci, docuisset. Sed nec vacat hic quærere, num omnes omnino comprehenderit, neque illi graviolem hac in re, & contrariam Hippocratis auctoritatem opponere, qui sub initium libri de Septimestri Partu, eorum quosdam omnium participes esse, scripsit, quorum etiam perfectissimi participes existunt, live, ut fidelissimus ejus Interpretes loquitur Prosper Martianus in adnotatione ad eum locum, omnium sunt plenissimi, & robustissimi, sed ejusmodi perfectionem etiam hi participant magis, qui superstites manent, & educantur. Ultro concedam cum Heistero Dissert. cit. cap. 3. n. 1. & 4. septimestres plures esse imbecillos, quippe a matribus morbo affectis, pluresque imperfectos, quippe non eodem & proprio, & parentis robore auctos quo ii de quibus nobis sermo est, expressosque, & ejectos potius, quam editos: nec mirum, cum etiam ex novimestribus minime desint ob easdem causas aut imbecilli, aut minus perfecti. Verum cum hæc concessero; vicissim negari mihi non patiar id quod in præsentia satis est, & experientia convincit, esse



esse tamen aliquos contrariis, de causis post septimum mensem & robustos, & undique absolutos. Valentinus Sect. cit. Casum producit 31. infantis, quem juvenis virgo nupta die 4. Novembris pepererat die 17. Junii insequentis partibus, & numeris absolutum omnibus. Quem tamen consulta Facultas Medica Lipsiensis pronuntiavit, omnino pro sobole legitima mariti, & in specie pro partu septimestri habendum esse. Præterea Martinus Schurigius in *Embryologia Historico-Medica* Sect. 4. cap. 1. §. 18. profert Cl. Viri Goelickii *Medic. Forens. Specim.* locum, in quo pro certissimo refertur, matronas honestissimas, famæque integerrimæ tempore puerperii de novo imprægnatas, ut nullus subesse possit in mensium computatione error, septimo mense partum omnibus numeris absolutum, & successive ad virilem consistentiam erectum, in lucem edidisse. Huc adde quæ idem Schurigius ibidem protulerat ex Sylvii, & Valentini observationibus, fuisse familias, ipsis probe notas, in quibus omnes liberi erant septimestres, & præsertim unam in qua hoc in tertio gradu Sylvius observavit factum. Quæ res in tertium gradum protrahi non videtur facile potuisse, nisi proles & robusta, & perfecta edita esset. Sciens præterea alia vel multo antiquiora exempla, apud eundem, aliosque legenda. Nam satis mihi est, id non semel factum fuisse, quod ostendendum suscepî fieri posse.

Facilius autem posse fieri, intelligetur, quo diutius fœtus in utero manserit. velut ii de quibus quæritur, post septem menses in lucem editi. Sive enim sic accipiamus uti hætenus accepimus, ut ad finem septimi mensis sint nati, sive, idque multo magis, inchoato jam octavo; minor, atque minor difficultas se obji-

ciet, quo plus temporis causis datum fuerit fœtum perficientibus. Et sane in citata Valentini Sectione Casu 32. Responsum producit Facultatis Medicæ Lipsiensis, in quo hæc leguntur, *unanimitè Medici tradunt, quod quo magis infans circa finem septimi nascatur, eo quoque sit perfectior.* Præter cæteros autem diserte id tradiderat Sennertus *Institution. Medicina* lib. 1. cap. 10. cujus verba si diligentius perpendantur; præclare intelligetur, cum quosdam septimestres vitales agnoscit, nec eos tamen ex ipsis qui *quocunque modo aliquid imperfectionis adhuc obtineant*; sequi igitur necessario, ut ipse quoque nonnullos septimestres admittat, in quibus nulla omnino perfectio, atque absolutio desideretur. Idem vel illis temporibus quantum jam accederet ad intelligendum, inanes causas proferri, cur octavo mense editus infans vitalis esse non posset, ex iis quæ deinceps subjicit, manifesto apparet. Nostra autem ætate quantum id, olim pervulgatum, dogma apud Doctissimum quemque abjectum jaceat, laudati supra Auctores ostendunt Diemberbroeckius, Valentinus, Heisterus, Schurigius; ut nihil attineat aut contra ea quæ initio indicavimus, infirma ejus quoque dogmatis fundamenta indicare, aut magnum veterum, & recentium exemplorum numerum, quæ contraria experientia pro nobis sufficeret, apud Augenum de *hominis partu* lib. 1. cap. 16. aut apud Schenckium *Observation. Medicar.* lib. 4. ipsumque Diemberbroeckium, & Schurigiū indicare, præsertim cum scribentibus nobis Tabellarii discessus inllet, nec plura liceat, in his tantis angustiis temporis hoc responsum a mediocritate nostra Quærentibus adjicere.





JO. BAPTISTÆ  
MORGAGNI

I N

A. CORN. CELSUM,

E T

Q. SER. SAMONICUM

EPISTOLÆ DECEM

AD JO. BAPTISTAM VULPIUM

PUBLICUM IN PATAVINO GYMNASIO PROSECTOREM, ET DEINDE  
ANATOMES PROFESSOREM EMERITUM.



*Doctissimo, atque Ornatissimo Viro*  
**D. LAURENTIO**  
**HEISTERO**  
 ANATOMICO NOBILISSIMO,

*Antea in Altorfina, nunc vero in Regia atque Ducali Julia  
 Helmstadiensi Academia*

PROFESSORI CELEBERRIMO

Joannes Baptista Morgagnus S. P. D.



**V**IDE, amor quid possit, PRÆSTANTISSIME LAURENTI. Cum Jo. Baptista Vulpus duos, inter Latinos, vetustissimos, atque eruditissimos Medicinæ Scriptores, A. Cornelium Celsum, & Q. Serenum Samonicum quam emendatissime, ornatissimeque edere statuisset; in animum induxit, ut in ea quoque re meis consiliis, & monitis uteretur; quasi vero quantum in Medicina, atque Anatome, in quibus fateor mediocriter me esse versatum, tantum pariter in Philologia, cujus excōlendæ ne tempus quidem unquam habui, studii, atque operæ posuissem. Ego vero qui illum propter suavissimos mores, summam adversus me pietatem, & eximios quos in Re Anatomica, & quæ ab hac, magna ex parte, pendent, Chirurgica, ac Medica habet progressus, quantum ipse me amat, tantum redamo, ubi video, conceptam de me opinionem ex ejus animo evelli non posse, morem denique me gesturum, & quidquid per angustias temporis, ceterasque occupationes meas possim, in duas Epistolas, singulas in Auctores illos singulos scriptas, & ad ipsum datas, conjecturum esse, polliceor. Quas postquam ipse perlegit, ecce tibi altera amantissima illa quidem, sed gravissima, atque inexpectata, efflagitatio. Quæ enim ita ad illum scripseram, ut siquid forte minus inutile judicaret, hoc uteretur, reliqua premeret; ille contra, omnia non dubitavit tanquam egregia (sic enim pro suo in me studio loqui solet) ac luce dignissima prædicare; edi ut permitterem, instare; simul Jo. Antonium Fratrem suum Virum Cl. & ejusmodi quidem rerum aestimatorem elegantissimum, sed tamen eodem erga me amore transversum actum, adhibere. Quid verbis opus est? in eum denique locum adductus sum, ut vel utrumque minus amare, hunc etiam non tanti facere, quanti merito ejus magno facio, viderer, vel ut manus ipsis dare, & quod flagitabant, promittere cogerer. Vix id promiseram, cum Tuorum erga me Meritorum, VIR CELEBERRIME, venit in mentem, quæ tanta nimirum, atque ita omnibus nota sunt, ut siquid hoc tempore in manus hominum emitterem, quod in Tuo Nomine non appareret, ingratus omnium non injuria existimarer. Itaque constitui, ut quando a Vulpio meas edi Epistolas illis cum Scriptoribus necesse esset; eæ ante a me, seorsum ederentur, Tuoque Inclyto Nomini inscriberentur. Equidem scio, quantum, & quid a Te acceperim; quantulum autem, & quid Tibi referam, video. Verum cum subit, Te in primis ex iis esse qui mihi tantum tribuerint, quantum ipse nunquam agnoscam; facile in eam spem venio, ut quoniam me; quæ Tua Humanitas est; non minore, quam Vulpii Fratres, amore prosequeris, non minus amanter de his Epistolis; quales eæ cunque sunt; judices, quam ipsi judicaverint. Vale, VIR DOCTISSIME, & veteris illius quem ne nominare quidem volo, Obtreçtatoris securus, Nobilissimam istam Academiam, atque adeo omnes omnium Medicorum, Chirurgorum, Anatomicorum Scholas egregiis, quod facis, voluminibus ornare perge.

D. Patavio X. Kal. Quintiles. MDCCXXI.

SUM-



SUMMO EIDEM VIRO  
D. L. HEISTERO

SERENISS. BRUNSVIC. ET LUNEBURG. DUCIS CONSILIARIO  
AUL. ATQUE ARCHIATRO, ET MEDICINÆ, CHIR.  
AC BOTAN. PROFESSORI EXIMIO

Joannes Baptista Morgagnus S. P. D.



UÆ me causæ ante hos underriginta annos impulerunt, ut priores illas in A. Cornelium Celsum, & Q. Serenum Samonicum Epistolas scriberem, scriptasque edi tandem sinerem, antea vero quam cum iis Auctoribus prodirent, seorsum in Tuo Illustri Nomine apparere vellem; eadem causæ fecerunt nuper, ut Epistolas alias adderem, & quamvis non ut exirent; id quod ipsæ non uno loco ostendunt; conscriptas, vulgari tamen ad extremum vetare non possem: eademque causæ nunc faciunt, ut quando in omnium manus hæ quoque Epistolæ venturæ sunt, in Tuas prius venire velim, VIR CELEBRIME, ne hoc alterum, quantumvis leve, publicum certe, & ingenuum desit meæ constantissimæ amicitiae, & Tuorum tot erga me Meritorum non immemoris animi testimonium. Igitur quam libenter olim primas; quæ Tua fuit Humanitas; accepisti; nunc accipe universas. Hoc a Te: ab DEO autem Immortali illud peto, ut Te mihi Amicum Optimum, Cultoribus vero utilissimarum Facultatum, quas tantopere egregiis libris auxisti, & augere pergis, eximium Magistrum quam diutissime servet incolumem.

D. Patavio Postrid. Non. Quinctil. MDCCL.





## A. CORN. CELSUM

## EPISTOLA PRIMA.

Jo. Bapt. Morgagnus Jo. Bapt. Vulpio S. P. D.

Quamquam te deficere nihil, puto ad A. Cornel. Celsum, & Q. Serenum Samonicum pari industriæ, & diligentia laude edendos atque a V. Cl. Fratre tuo Corn. Nepos, & C. Valerius Flaccus non ita pridem editi sunt; tamen quando meam quoque sententiam, & monita assidue postulas, atque adeo flagitas, non committam, mi Vulpi, ut tanto isti desiderio tuo ipse videar defuisse. Et primum quod ad Celsum attinet (nam de Sereno alias scribam) illud recte statui, ut eam præ cæteris editionem sequaris quam Vir, dum viveret, Eruditissimus procuravit Th. J. Almeloveenius. Cujus mei hac de re judicii rationem afferam, si prius de iis quæ in illa editione proposita sunt, tum Vita, tum Elogiis Celsi pauca admonuero. Cum Joannes Rhodius, a quo Vita illa scripta est, ignorare non deberet, Epistolas duas, alteram ad J. Callistum, alteram ad P. Natalem immerito in Marcelli volumine, Corn. Celsi præferre nomen propterea quia prior certe Scribonii est, quod luculenter ab eodem ipso Rhodio in alio (a) est libro demonstratum; utraque autem vel ipso (ut nunc cætera omittamus) dictionis genere ita a scriptis Celsi discrepat, ut id qui non videat, nihil ille prorsus videat; cum hæc, inquam, ita essent; non intelligere me, fateor, qua tandem ratione sibi licere crediderit Rhodius, Vir alioqui pereruditus, illarum Epistolarum, perinde ac si Celsi essent, testimonio passim uti ad ea quæ de hujus vita proponit, comprobanda. Qua de Rhodii inconstantia, atque adeo prolapsione tantum abest ut Almeloveenius Lectores monuerit; ne Amanuensium quidem Rhodii, aut Typographorum Hafnienfium in illo Opusculo describendo gravia quædam ac manifesta correxit errata, ut ubi Largii Designationi (ejus videlicet cujus Epistolam Marcellus exhibet) nomen in *Largii designationi* non sine totius sententiæ incredibili depravatione mutavere, vel ubi Celsum Roma oriundum aperte monstrare, scribunt ipsius lib. 5. cap. 21; in lib. autem 7. cap. 26. ipsum prodere, pharmacorum (eorum, inquam, pharmacorum quæ præbuisse dicitur) artificiosam missionem se accurate intellexisse: quæ nempe capita licet ita diligenter perlegas, ut ne littera quidem una te fugiat; quod tamen ad propositum faciat; reperies nihil. Hos autem locos, & præsertim postremum eo magis emendare oportebat, quod nullum præterea aliud verum ac luculentum Celsi ipsius testimonium protulit Rhodius, quo illud saltem, ipsum non legendo tantum (quod plures putarunt) atque exscribendo, sed observando etiam, suumque judicium interponendo, in re medica versatum esse, probaret: mirum sane in eo qui tot annos in relegendo Celso consumpserit, cum H. Casaubonus tres ejusmodi locos in Scholiis annotaverit suis, quæ Scholia edidit (b) Almeloveenius, aliosque ipse animadverterim, de quibus totidem, exempli causa proponere satis est: (c) *Ego sic restitutum esse neminem memini*: & (d) *Neque audiendi sunt, qui osse nudato, diem ter-*

tium expectant, ut tunc excidant: ante inflammationem enim tutius omnia tractantur: & (e) *In omni fisso fractove osse, protinus antiquiores medici ad ferramenta veniebant, quibus id exciderent. Sed multo melius est ante emplastra experiri.*

Elogia autem, & Testimonia de Celso nulla potius afferri oportuit, quam aut ita concepta, aut ita pauca, ut in ista editione allata sunt, tanquam illud quod Egnatio (f) excidit, certissimum esset: *Cornelii Celsi Fabius, quod sciam, ex veteribus tantum meminit.* Quid enim? An non Columellæ proferri plures poterant loci, unde intelligeretur, & quam late fusa rerum scientia, & qua elegantia, & qua auctoritate, & qua fama, & quibus temporibus, & quot etiam, ex parte, volumina Celsus scripsisset? velut ubi (g) *Cornelium Celsum vocat non solum agricolationis, sed universæ naturæ prudentem virum*, aut ubi (h) de Apibus negat quicquam præcipi posse elegantius quam a Celso jam dictum sit, aut ubi (i) his verbis utitur: *quamvis doctissimi Viri (Celsi) auctoritatem reverebar, tamen ambitione submota, quid ipse censerem, non omisi*: aut his (k): *Julius Atticus, & Cornelius Celsus ætatis nostræ celeberrimi auctores*: itemque (l): *Celsus, & Atticus, quos in re rustica maxime nostræ ætas probavit*: denique (m): *ut Carthaginensem Magonem rusticationis parentem maxime veneremur*; nam hujus octo & viginti memorabilia illa volumina ex senatusconsulto in latinum sermonem conversa sunt; non minorem tamen laudem meruerunt nostrorum temporum viri Cornelius Celsus, & Julius Atticus. Quippe Cornelius totum corpus disciplinæ quinque libris complexus est.

Quos quidem libros quinque ad rei tantum rusticæ disciplinam pertinuisse, tum ea ostendunt quæ antecedunt, ac subsequuntur, tum id confirmat quod in Vita Celsi tradidit Rhodius, videlicet antiquorum quæ calamo scripta sunt, ejus de re medica exemplarium hanc communem esse inscriptionem; *A. Cornelii Celsi Artium Liber VI.* quam quidem & in Gudiano observavit Vir Cl. Jo. Alb. Fabricius (n), & Manutii suis in editionibus fideliter repræsentarunt, quos nimirum secutus est H. Stephanus, sed his verbis: *Operis ab eo scripti de artibus pars sexta*. Et quintam quidem fuisse eos libros de re rustica, ex primis ipsis sextæ versibus satis intelligi, recte ab eruditissimis hominibus est adnotatum. Quo autem ordine essent partes reliquæ locatæ, & quot in libros distributæ, & num sexta ultima esset, de his nihil videor legisse quod pro certo habere possimus. Conjectura enim esset, neque illa satis firma, si quis id jungens quod modo dictum est, cum ordine in pervulgato eo (o) Fabii loco observato: *Corn. Celsus rei militaris, & rustica etiam, & medicina præcepta reliquit*, colligeret, quartam Operis partem fuisse de re militari, Conjectura quoque est docta hæc quidem, & quam cum altero (p) Fabii loco, de iis quæ Celsus ad Scepticorum exemplum non parum multa scripsit de Philosophia, valde consentire, animadver-

to;

(a) Not. in Scribon. pag. 11. (b) ad pag. 118. lin. 22. (c) lib. 7. cap. 7. p. 426. l. 16.  
 (d) lib. 8. c. 2. p. 509. l. 24. (e) lb. c. 4. p. 517. l. 6. (f) in Epist. Dedic. Celsi.  
 (g) de Re Rust. lib. 2. c. 2. (h) lb. 9. c. 2. (i) lb. c. 6. (k) lb. 3. c. 17. (l) lb. 4. c. 8.  
 (m) l. 1. c. 1. (n) Suppl. Biblioth. Lat. lib. 2. c. 4. & Bibl. Ibid. (o) Instit. Orat. l. 12. c. 12.  
 (p) Ibid. l. 10. c. 1.



to; sed tamen conjectura est, quam laudatus Fabricius proposuit, cum ( q ) de hoc nostro Celso videtur, inquit, accipiendum quod S. Augustinus præf. libri de hæresibus ait, opiniones omnium Philosophorum qui varias sectas condiderunt usque ad tempora sua sex non parvis voluminibus Celsum quendam absolvisse. Ad quatuor autem quas nominavimus, partes de re rustica, medica, militari, & philosophica, ut sine dubitatione aliæ duæ doctis ab hominibus adduntur, de arte videlicet rhetorica, & de jure civili; ita suspicari aliquos posse, video, an non aliæ insuper adjici debeant. Neque hoc tamen dico ob librum de herbis jure ac merito longe alii Scriptori attributum, aut quod Celsum peculiares libros scripsisse censeam de arte veterinaria, quanquam Rhodius in ejus Vita postquam libros cæteros memoravit, hæc habeat: Veterinariam quoque conscripsisse autor est Mercurialis lib. 4. cap. 2. Moveret quidem me mei eruditissimi Civis auctoritas; si locum quem ad istum modum indicavit Rhodius, alium esse putarem ac illum qui in Prælectionibus Patavinis, lib. 4. cap. 3. sic legitur: Scripserat enim Celsus de medicina brutorum. Nam hoc negare potest nemo qui modo Celsi verba legerit ( r ): amurca ad tertiam partem decocta, vel sulphur pici liquida mistum, sicut de pecoribus proposui, hominibus quoque scabie laborantibus opitulatur. Quintilianus Columellam pluribus in locis ( s ) ad varios boum, oviumque morbos proposita a Celso remedia laudantem invenio. Veruntamen ut Robertus Constantinus ( t ), atque adeo noster Almeloveenius ( u ) eo Celsi loco nihil aliud significari, docuerunt, nisi quod tradiderat in libris de re rustica; ita ex his etiam Columellæ non video quæ confici possit, peculiares alios de medicina veterinaria libros a Celso fuisse conscriptos, cum ea omnia inter rei rusticæ præcepta ( quod & ipse Columella, & Cato fecerunt ) opportune tradi potuerint, neque aliter accipere necesse sit verba Mercurialis. Non veterinariam igitur peculiaribus libris complexum esse Celsum, suspicor, sed alias ex iis artibus quas indicat Quintilianus ( x ). Marcus, inquit, Censorius Cato idem orator, idem historiae conditor, idem juris, idem rerum rusticarum peritissimus. -- Quam multa, imo pene omnia tradidit Varro? Quod instrumentum dicendi M. Tullio defuit? Quid plura? cum etiam Cornelius Celsus mediocri vir ingenio, non solum de his omnibus conscripserit artibus, sed amplius rei militaris, & rusticæ etiam, & medicinæ præcepta reliquerit. Notti quot, & quam varia argumenta tractata sint a Varrone; nam etsi libri ejus plerique perierunt, inscriptiones tamen sunt nobis ab antiquis Scriptoribus conservatæ, quas tanquam in tabella Cl. Fabricius ( y ) exhibuit: in primis, ut totius erat antiquitatis peritissimus, rem historicam esse Varronem persecutum, nemo ignorat: quod Catonem quoque illum Censorium fecisse, constat, & Quintilianus isto in loco diserte confirmat. Num ergo Celsum, etsi nihil præterea aliud scripsisset, Historiam saltem actigisse, non suspicabimur? Sed ne diutius in his quæ minus sunt certa, hæreamus; ad ea quæ certissima sunt, reliqua de Celso Columellæ Testimonia, atque Elogia redeo: quæ inter, eo magis quæ protinus afferam, omissa adhuc ( quod sciam ) fuisse miror, quod deperditorum ejus de re rustica librorum Fragmenta quædam in nonnullis præsertim eorum videntur esse servata. Nam lib. 1. cap. 8. Ejusmodi, inquit, villicum ( illiteratum, sed tenacissimæ memoriæ ) Cornelius Celsus ait, sapiens numos domino, quam librum afferre, quia nescius literarum vel ipse minus possit rationes confingere, vel per alium propter con-

scientiam fraudis timere. Lib. 2. cap. 9. Nam, quod ait Celsus, ubi mediocris est fructus, optimam quanque spicam legere oportet, separatimque ex ea semen reponere. Lib. 3. cap. 2. Albuclis ( vitis ) utilior, ut ait Celsus, in colle, quam in campo: in arbore, quam in jugo: in summa arbore, quam in ima, ferax & materiæ frequentis, & uvæ: atque iterum: Prudentis magistri est -- illud in totum præcipere, quod & Celsus ait --: Nullum genus vitium censerendum esse, nisi fama; nullum diutius conservandum, nisi experimento probatum. Lib. 7. cap. 2. Igitur id pecus ( ovillum ) quamvis mollissimum sit, ut ait prudentissime Celsus, valetudinis tutissima est, minimeque pestilentia laborat. Capite autem 3. ejusdem libri: Nam melior est ( agnus ) autumnalis verno, sicut ait verissime Celsus. Lib. 8. cap. 13. Anser autem non ubique haberi potest, ut existimat verissime Celsus, qui sic ait: Anser neque sine aqua, nec sine multa herba facile sustinetur, neque utilis est locis confitis, quia quicquid tenerum contingere potest, carpit. Sicubi vero flumen, aut lacus est, herbæque copia, nec minus juxta satæ fruges, id quoque genus nutriendum est: quod etiam nos facere censemus, non quia magni sit fructus, sed quia minimi oneris. Lib. 9. cap. 1. Quam rationem ( reparandi apes ex juvenco perempto ) diligentius prosequi supervacuum puto, consentiens Celso, qui prudentissime ait, non tanto interitu pecus istud admitti ( an amitti? ) ut sic requirendum sit. Sed cum ex aliis præterea Columellæ locis, ac præsertim ex fine memorati novissime capitis & sententias Celsi, & quid de his Columella censuerit, cognoscere possimus; tamen eos quos protuli, dignos præter cæteros judicavi qui minime in Almeloveenii editione omitterentur.

Porro neque Plinius silentio erat prætereundus, qui toties Celsum inter Auctores ( & quidem non Externos ) quos secutus est, retulit in primo Naturalis Historiæ libro, atque alibi etiam, ut libro 10. cap. 53. & ( quod Almeloveenius non ignoravit ) in calce capitis quarti, libri 20. ubi ex Celso diserte nominato remedium adversus podagram attulit, quod in libro hujus habemus quarto, cap. 24. Nam alium quendam Plinii locum ex lib. 14. c. 2. Græcinus, qui alioqui Cornelium Celsum transcripsit, non contemno quidem; sed tamen non tanti, quanti facere Eruditi nonnulli Homines videntur, facio. Etsi enim Julium hunc Græcinum ( hunc, inquam, ipsum Justum etiam Lipsii ( z ), atque Henrici Savillii ( a ) judicio ) & ab Seneca ( b ) haud semel laudatum, & a Corn. Tacito ( c ) insigni illo elogio ornatum invenio: pater Julii ( Agricolæ ) Julius Græcinus senatorii ordinis, studio eloquentiæ, sapientiæque notus, iisque virtutibus iram Caji Cæsaris meritis; namque Marcum Sillanum accusare jussus, & quia abnuerat, interfectus est; ut ad Celsi laudem non mediocriter pertineat quod ab ejusmodi Viro credatur esse transcriptus; haud facile tamen censuerim, aliud voluisse Plinium significare, nisi quod super helvenaca, de qua ibi loquitur, vite Celsi ille judicium descripserit. Neque enim, aliter si esset, aut Plinius ipse ( d ) inter eos Scriptores quorum auctoritatem in libris 14. 15. 17. 18. secutus est, præter Celsum, Græcinum quoque nominasset, atque adeo in libri 16. Indice hunc, Celso omisso, memorasset, aut Columella ( e ) sæpe adeo sententiam Julii Græcini nominatim laudasset, atque ipsa, ut videtur, verba, quæ pro Græcini Fragmentis haberi fortasse possunt, plerunque retulisset; imo ipsum, non Julii Attici, quod facit, ( f ) sed Cornelii Celsi velut discipulum, scripsisset, duo volumina similium præceptorum de vineis edidisse. Utcunque id est;

G 2

hæc

pag.  
238.  
lin. 27.

( q ) loc. cit. ( r ) l. 5. c. 28. p. 338. l. 31. ( s ) l. 6. c. 5. 12. 14. & l. 7. c. 5. ( t ) in Adnotat. ad Cels.  
( u ) in Scholiis in Cels. ( x ) Instit. Orat. lib. 12. c. 11. ( y ) Biblioth. Lat. l. 1. cap. 7.  
( z ) Hi numeri, & qui pariter in margine deinceps apponuntur, paginas, & lineas designant in Celsi editione Patavina, & cæteris quæ ex Almeloveeniana descriptæ sunt. ( z ) & ( a ) in Agric. Taciti.  
( b ) De Benef. l. 2. 21. & Epist. 29. ( c ) in Jul. Agricola Vita.  
( d ) Nat. Hist. l. 1. ( e ) de Re Rust. Vid. l. 3. c. 2. 3. 32. & l. 4. c. 3. 28. ( f ) Ib. l. 1. c. 1.



hæc veterum Auctorum testimonia antiquam Celsi famam, atque etiam (quod vel ex iis intelligi potest quæ de Græcino modo attigimus) ætatem ipsam indicantia, illuc omnia prætermittuntur.

Unus Quintiliani locus, cum proponi plures possent, & in his aut ubi (g) Celsum de eloquentiæ præceptis accurate scripsisse, iudicat; aut ubi (h) eundem eruditum appellat virum; aut ubi (i) inter paucissimos eloquentes, quos in philosophia literæ Romana tulerunt, ipsum dilaudans, scripsisse, ait, non parum multa, scepticos secutum, non sine cultu, & nitore; unus, inquam, proferatur Quintiliani locus, isque Cello cum haud multum æquus, tum qui etiam quam reuera sit, multo passim iniquior videatur non attendentibus videlicet, mediocri virum ingenio ibi (k) Celsum dici, ubi contentione quasi quadam facta, Scriptores omnium longe ingeniosissimi, & in his Homerus, Plato, Aristoteles, M. Tullius, collaudantur.

Quid vero de iis dicemus quæ multa ex Verderio sine ulla animadversione proponuntur? In aliquo Celsus Hippocratis verbo latine reddendo aliquid interdum humani passus sit; num propterea continuo pronunciandum erat, Hippocratem, & Græca pene omnia parum feliciter vertisse? An non erat potius animadvertendum, quanto ille, quam nos, Hippocratis ætati propior fuit, tanto fidelioribus atque integrioribus Hippocratis exemplaribus usum esse? ut nisi quid aliud omnino obftet, non ex nostris exemplaribus Celsi versionem reprehendere, sed ex Celsi versione nostra emendare exemplaria iis præsertim in locis deceat qui aliter in aliis antiquis codicibus scripti sunt; quod me quidem, cum Hippocratem publice interpretarer, aliquando, & fortasse haud incommode, facientem annis superioribus audivisti. Sed denique apud Celsum, inquit, observationes quadam sunt ludicræ. Quæ tandem? Si nimirum agrotus summis digitis extrema parietum evellat, hoc est lapillos ex muro exradicet (Celsus (l) ita habet: si qua minuta eminent, carpat) signum mortis esse; quasi vero istiusmodi observationem aut Celsus de Hippocrate (\*), de illo, inquam, Hippocrate, quem feliciter (si Diis placet) vertisse oportebat, non accepisset; aut qua ratione, causaque vera esse possit, explicare Medici prorsus nescirent. Sed jam ad ipsos Celsi libros veniamus.

Hos cum ego libros ante multos annos ruri diligenter perlegerem, exemplari usus parvulo ex iis Lugdunensibus quorum uno ipsum quoque Josephum Scaligerum usum esse, ex Lindenio cognosces; memini me ducentos minimum locos ex iis quos corruptos esse, intelligebam, conjectura (neque enim aut ulli, calamo, aut alii, formis descripti, quos conferrem, ibi erant libri) conjectura, inquam, ductum emendare, vel ut verius dicam, quo emendari modo possent, interlegendum divinare voluisse. Quas divinationes cum postea aliquando cum exculis libris conferrem, non ante sensi, me actum egisse, quam libellum a Lindenio procuratum in manus sumerem. Hic enim Vir diligentissimus, & magnis ad Celsum restituendum subsidiis instructissimus quæ ego suspicione attigeram, ea prope omnia ex veterum librorum auctoritate, & Virorum Summorum conjecturis selectissimis reposuerat. Quorsum hæc? inquires. Nempe ut intelligas, me Almeloventii, qui Lindenium fere secutus est, editionem probantem, non temere, sed facto periculo, atque instituta cum aliorum libris comparatione iudicare. Et vero ut certis in locis, quorum aliquot in hac Epistola indicabo, minime de ea Lindenii editione Thomæ Bartholini (m) iudicium improbem; in plerisque tamen eorum qui a me sunt

diligenter perpenſi, non video esse cur verear ne non sit cæteris anteferenda. Huc adde quæ Almeloventii sedulitas, ac solertia adjunxit, & in his quæ ad locos vel incertæ scripturæ commonſtrandos, vel obſcuros illustrandos, vel memorabiles indicandos, comprobandosve in calce tum singularum pagellarum, tum libri universi adscriptæ. Quibus omnibus in rebus etſi hominis exercitatissimi eruditionem, diligentiam, egregiamque de studiosis lectoribus bene merendi voluntatem jure laudo, atque commendo; noli tamen credere, sic illum, meo quidem iudicio, peregiſſe omnia, nihil ut reliquerit industriæ tuæ. Imo sic habeas, velim: prope innumera adhuc superesse quæ adjici possint, hujusque rei conjecturam facias ex iis quæ has mihi litteras alia inter studia, atque occupationes scribenti in memoriam vide-riſſe redacta.

Nam ut a postremis incipientes, ad priora demum revertamur; hæc memorabilia, ac digna sunt certe quæ extenso quasi digito Lectoribus ostendantur: jam tum Celsum lib. 3. cap. 19. primum fortasse ex omnibus quos nunc de re medica habemus; Scriptoribus (quæ enim huc Rubeus (n) profert ex Hippocrate, ne aliter accipienda sint, vereor) primum, inquam, nutrientium, ut vocant, Clyſterum usum, & opportunitatem litteris mandaviſſe; *Ultimum*, inquit, *auxilium est*, 158, 1. *in album ptisanæ vel alicæ cremorem ex inferioribus partibus indere, siquidem id quoque vires tue-tur*; Jam tum lib. 6. cap. 7. in *gravis auditus* 376, 2. curatione monuisse, *aurem ipsam considerare oportere*, si forte appareat *sordium coitus*: hæcque, ante, ubi opus sit, emollitas, auriculari specillo *eximendas esse*: Jam tum; idque paulo infra; scripsisse; *purgare aurem oportere, & spiritum* 377, 7. *continere, donec inde humor aliquis exsparet*: Jam tum lib. 7. cap. 26. id in urethræ incisione præcepisse, quod & alibi, velut in jugularium venarum sectione, aliquando haud inutile esse posse, animadverto: scilicet primum cutem *quamplurimum attrahendam*, deinde urethra incisa, & hærente in ea calculo exempto, *tum cutem remittendam*; sic enim fieri, *ut incisum colem integra pars cutis contegat, & urina naturaliter profluat*: Jam tum eodem in libro, capite autem 16. docuisse, tum crassius intestinum perforatum *interdum glutinari*, tum *si angustius vulnus abdominis est*, 452, 15. *quam ut prolapsa intestina commode refundantur*, & 27. *incidendum esse, donec satis pateat*; quod quidem innotum meministi ut præ cæteris inculcaverit hac ætate nimium lentis, ac meticulis Chirurgis Experientissimus Vir Abr. Cyprianus (o). His locos adde quos Reditus (p) confirmavit, atque illustravit sive de Serpentum veneno, sive de Hirundinibus, & chelidonia. Celsus namque in extremo sexto capite libri sexti earum quas ibi memorat, *Avium acies*, inquit, *extrinsecus læsa*, 369, 23. *interposito tempore in antiquum statum redit, celerrimeque hirundinis. Unde etiam locus fabula factus est, per parentes id herba restitui, quod per se sanescit*. Idemque lib. 5. cap. 27. *Venenum*, inquit, *serpentis -- non gustu, sed in vulnere nocet*. 309, 22. *-- Ergo quisquis exemplum Psylli secutus, id vulnus exuxerit, & ipse tutus erit, & tutum hominem præstabit*. Illud interea ante debet attendere, ne quod in gingivis, palato, aliæve parte oris ulcus habeat. Neque tandem is prætermittendus est locus, quo nos uti consuevimus, ut quid prisca Anatomiçi intestini cæci appellatione significarint, Celsi etiam auctoritate ostendamus. Nimirum lib. 4. cap. 1. crassius, inquit, *intestinum a dextra parte incipiens, in sinisteriorem pervium & longum est, in dexteram non est; ideoque cæcum nominatur*. 184, 31.

Atque hi quidam sunt ex multis locis quos ut memo-

(g) Instit. Orat. l. 3. c. 1. (h) l. 9. c. 1. (i) l. 10. c. 1. (k) l. 12. c. 11. (l) l. 2. c. 6. p. 55. 9.  
(\* ) Præn. n. 4. (m) Dissert. IV. de libris legend. (n) Annot. in Cels. (o) Epist. ad Millington.  
(p) Ollery. int. alle Vipere, & Esper. int. a cose natur.



memorabiles indicare poterat Almeloveenius; nunc duos ( haud amplius ) ex non paucioribus ascribam, quos quidem poterat declarare. Nam quod lib. 3. cap. 18. scriptum est: *Confert etiam aliquid ad somnum silanus juxta cadens*, quot tandem ex studiosis Adolescentibus putas intellecturos quid sit iste *silanus*, cum eruditus Vir Jo. Cæsarius ( *q* ) vocis insolentia permotus, se pro ipsa *salientis rivus* repositurum fuisse, fateatur, nisi in ea verba forte incidisset unde incipit Sex. Pomp. Festi ( *r* ) liber secundum Aldi partitionem duodevicesimus: *Tullios alii dixere esse silanos, alii rivos*: quæ & G. Valla viderat, ac Silanum pro rivo exposuerat. Et Rossæus ( *f* ) quidem eadem quæ Cæsarius, habet: idemque senserat, ac tradiderat Pantinus ( *t* ). Ego vero cum Festi verba relegerem: *Tullios alii dixere esse silanos, alii rivos, alii vehementes projectiones sanguinis artuatim* ( Jol. Scaliger, aliique legunt *arcuatim* ) *fluentis, quales sunt Tiburi in Aniene. Ennius in Ajace. Ajax misso sanguine tepido Tullii efflantes volant*; ut suspicor, quædam librorum incuria esse omiffa, aut saltem vel depravata, vel in non suum locum transposita; quid enim illa: *quales sunt Tiburi in Aniene*, ad sanguinem? ita minus miror, R. Constantinum ( *u* ) legere, non *Tullios alii dixere esse silanos*, sed *Tubulos alii dixerunt esse salientes*, & *salientis* in Celfo scribendum credere pro *silanus*. Porro Josephus Scaliger in suis in Festum Castigationibus hæc notat: *Silani; Glossario silvani. Silvanus, Κρουνός*, hoc est fons aquæ salientis: ac pariter in iis Notis quæ ex editione Festi Romana, Castigationes Scaligeri consequuntur, hæc habentur: *In antiquo Lexico Latino Græco, Silvanus exponitur Κρουνός, & ita fortasse legendum tum hic, tum apud Cornelium Celsum*: quæ in opinione Jacobum quoque Cujacium ( *x* ), & Hieronymum Columnam ( *y* ) fuisse, non ignoro: & certe in Philoxeni Glossis: *Silvanus, vel Silbanus, Κρουνός* se etiam legisse, ostendunt Gerardus Joannes Vossius ( *z* ), & Robertus Keuchenius ( *a* ). Hæc etsi ita sunt; tamen illa vicissim haud sunt ignoranda, non modo hos duos quos novissime laudavimus, Viros, & præterea Jo. Jacobum Hofmannum ( *b* ) pariter censere, in Glossis, atque adeo in Festo legendum esse *Silanus*, & *Silanos*; sed & reapse Turnebum ( *c* ) in Petri Danielis Aureliani latino Onomastico perantiquo, in membranæ scripto, sic invenisse: *Silanus tubus*; ac Lambinum ( *d* ) in Vocabulario Latino-græco cuius ipsi Puteanus copiam fecerat: *Silanus, Κρουνός*. Neque Constantinus ( *e* ) ipse negat, *Tullios* etiam, & *silanos* in Festo legi; imo hæc scriptura in omnibus quæ adhuc viderim, excusis Festi exemplaribus habetur. Huc adde ex iis Fabulis ( *f* ) quæ sub C. Julii Hygini nomine circumferuntur: *cum ( fuscina ) eduxisset, tres Silani sequuti sunt, qui ex Amymones nomine Amymonius fons appellatus est*; quin etiam ex divina illa Athenientis Pettilentia descriptione Lucretiana ( *g* ):

*Multa siti prostrata viam per, proque voluta Corpora silanos ad aquarum strata jacebant Interclusa anima nimia ab dulcedine aquarum;* sic enim post Aldum, ut probe nosti, rejecta Marulli emendatione, & Pii scriptura, qui sic *amnis*, & *sola amneis* pro *silanos* poluerant; vetustis, emendatisque libris auctoribus, Viri Doctissimi edidere, ex quibus Lambinus, ( *b* ) Gifanius ( *i* ), Creechius ( *k* ) hunc etiam ipsum de quo agimus; Celfi locum in eandem sententiam produxerunt, nec Munckerus ( *l* ) in allatis Hygini ver-

bis exponendis, aut Vossius in Etymologico Linguae Latinae ( *m* ) ( ubi, ut opere in longo, haud miror quod pro Mythologico Hygini citet P. Astronomicum ) prætermittit. Neque vero omiffus est ab iis quos supra nominavi, Hofmanno ( *n* ), & Keuchenio ( *o* ), aut denique a Samuele Pitisco ( *p* ): quinimodum ab his duobus diserte adscriptum est, *silanum* esse hic a Celfo positum pro *rivulo susurrante decidentium leniter aquarum*; ut mihi illud Virgilianum ( *q* ) in memoriam reduxerint:

*-- levi somnum suadebit inire susurro, multoque etiam magis illos Poëtarum aliorum locos ad quos Celfus potuit respexisse; ut hunc Horatii: ( r )*

*Fontesque lymphis obstrepunt manantibus*

*Somnos quod invitet leves,*

illumque inprimis Ovidii ( *s* ), qui in Somni ipsius domo, ac penetralibus describendis, nullo modo sibi esse *rivum* prætermittendum existimavit,

*-- per quem cum murmure labens*

*Invitet somnos crepitantibus unda lapillis.*

Verum ante eos omnes a quibus ut nonnulla alia quæ supra indicavi, ita hunc Celfi locum in istiusmodi sententiam productum esse, comperi, produxisse invenio L. Gr. Gyraldum in eo *Dialogismo* ( *t* ), in quo a Barbulejo suo ex se quaesitum esse, proposuit, *quid sibi vellent hæc inaudita vox Silanos*; ipse vero antiquam vocem esse Latinam, & *tubos aquarum significare, & fistulas*, ostendit. Cæterum ad hujus vocis antiquitatem comprobendam fuit aliquando cum pertinere fortasse, crederem, *Silanorum* cognomen, Romæ in Junia Gente celeberrimum; sed postea vidi, tum Antonium Augustinum ( *u* ) id ipsum deducere a *Silo*, Sergiorum; & Liciniorum cognomine, significante, ut Festus ( *x* ) est auctor, *nasum sursum versus repandum*, tum nostræ hujus vocis originem ex arabica *Silan*, quod est *fluxus aquæ*, a Thoma Erpenio ( *y* ), quocum faciunt Hofmannus ( *z* ), & Vossius ( *a* ), derivari. Quæ omnia cum ita sint, neque aliquis; quod sciam; in antiquis Celfi codicibus aliud quam *silanus*, legisse se, scripserit, quam quidem vocem in primis, ac præterea in optimis quibusque editionibus constanter video esse servatam; ut nihil in Celfo mutandum, ita Lectores monendos cenfeo quid eruditissimi Homines de hoc vocabulo, ejusque significatione tradiderint.

Non ita difficile, nec tamen æque omnibus facile erit conjicere quid sibi Celfus voluerit libro 5. in fine capitis 21. quod est de Pessis. *Si concidere*, inquit, *vitio locorum mulier solet, cochleæ cum testis suis comburenda, conterendaque, deinde his mel adjiciendum est. Si non comprehendit, adeps leonina ex rosa mollienda est. Si enim hæc ita juncta; ut in plerisque editionibus; legantur, tanquam aut unum ad morbum, aut unum ad pessum spectarent; cogitare potest quispiam num forte ea verba si non comprehendit hoc significant: si mulier quæ vitio locorum concidit, nihil percipit; vel an sic etiam sint accipienda; si mel contusis cochleis adjectum eas non satis, ut alibi Celfus loquitur, cogit; quo videlicet modo tum Scribonius ( *b* ), hæc omnia, inquit, *sive contusa, sive creta diligenter, melle Attico despumato comprehendantur; & alio in loco ( c ), deinde cæteris miscentur, quæ & ipsa recipere debent tantum mellis, quantum satis erit ad comprehendenda & continenda ea; tum Vegetius ( d ), quæ diutissime trita, melle optimo adjecto comprehendantur:**

271, 18.

( *q* ) Comment. in Cels. ( *r* ) de Verbor. Signific. ( *s* ) Enarration. Cels. ( *t* ) Annotation. in Cels. ( *u* ) Adnot. in Cels. ( *x* ) Observation. l. 11. c. 2. ( *y* ) in Ennii Frag. ex Ajace. ( *z* ) loca infra cit. ( *a* ) In Frontinum de Aquæd. ad illa verba: compluribus salientibus aquis instruxit urbem. ( *b* ) Lexic. Universal. ad vocem Silani. ( *c* ) Advers. l. 28. c. 6. ( *d* ) Comment. ad Lucr. lib. 6. ( *e* ) loc. cit. ( *f* ) Fab. 169. ( *g* ) De Rer. Nat. l. 6. ( *h* ) loc. cit. ( *i* ) Conlectan. Lucret. ( *k* ) Not. ad Lucr. l. 6. ( *l* ) Not. ad Hygini Fab. 169. ( *m* ) ad vocem Silanorum. ( *n* ) ( *o* ) loc. cit. ( *p* ) Lexic. Antiquit. Roman. ad vocem Silanus. ( *q* ) Bucolic. Eclog. 1. ( *r* ) Epod. 2. ( *s* ) Metamorph. l. 11. ( *t* ) Dialogism. 18. ( *u* ) De Familiis Roman., in Junia. ( *x* ) De Verbor. Signif. l. 17. ( *y* ) Annot. in Lexic. Arabic. Raphaeleng. ( *z* ) ( *a* ) locis cit. ( *b* ) Compos. Med. Comp. 70. ( *c* ) Comp. 106. Sic & 83. & 227. ( *d* ) Art. Veterin. l. 4. c. 27.



tur : vel denique erit fortasse qui sic opinetur : fecisse hic Celsum quod ubi ( e ) præcepit de extrahendis calculis foeminarum, aperte fecit, ut ad Virgines etiam respiceret; his igitur non eos pessos, quos nimirum non comprehenderent, sed tantummodo e leonina adipe, rosa mollita, inunctiones, vel si mavis, quæ nunc vocitant *nasalia* imperavisse. Ego vero ut duas illas priores explanationes multis de causis quas enumerare necesse non est, minime probare me posse, fateor; sic ne hanc quidem tertiam tueri velim, propterea quod si id Auctor spectasset; certe ( ut alia fileam ) in superioribus quoque pellis nonnullis adversus morbos cunctis foeminis pariter communes proponendis, Virginum rationem habuisset: neque vero habendam ipsi fuisse in toto hoc capite, is intelliget qui pessorum nomine nihil hic nisi *nasalia* præcipi, animadvertet. *Eorum*, inquit, *hæc proprietas est: medicamenta composita molli lana excipiuntur, eaque lana naturalibus conditur.* Quoniam igitur sic connexorum ut proposuimus, Celsi verborum nulla satis placet sententia; an melior possit existere videndum est ex iisdem in duas, ut ab Lindenio, & Almeloveenio factum est, particulas ita sejunctis, ut singulæ ad singulos tum morbos, tum pessos indicandos pertineant. Cumque omnis vel in sic disjunctis obscuritas oriatur ex illo verbo *comprehendit*; etsi hoc non satis illustratur synonymo quod in ora libri sui adscriptum R. Constantinus, *συλλαμβάνεται*, propterea quia non pauciora ferme significat hoc apud Græcos, quam *comprehendit* apud Latinos; mihi tamen causam præbuit suspicandi, an ut apud illos non tantum significat *complectitur*, *capit*, *percipit*, &c. verum etiam interdum *concepit*, quæ videlicet ratione ab Aristotele positum invenitur lib. 2. de Generat. Animalium; sic Celsus, Græcos hic imitatus, eadem scribat significatione, *comprehendit*; ut hæc ejus sententia sit: Si mulier non concipit; adeps leonina, oleo rosaceo emollita, ac lana molli excepta, subjicienda est: quæ sane explicatio magis probabitur ab iis qui cum meminerint, non modo apud recentiores aliquos Auctores, pinguedinem leonis ad juvandam venærem commendari; verum ipsum quoque Aetium ( f ) ex eodem oleo in fellis vesicula leonina servato pessum, seu potius *nasale* ad conceptionem adjuvandam proposuisse: tum minime ignoraverint, æqualem ferme Celso Scriptorem Columellam ( g ) in re quidem haud ita absimili scripsisse: *brumæ temporibus aliquando insita vitis comprehendit*; & vitis truncus insitus cum *comprehendit*; hoc est cum indito furculo coaluit intime sic ut ipsum jam alat: quæ omnia eo fusius exposui quod ex iis quæ adhuc consului, Lexicis, aliisque ejusdemmodi libris plane intelligerem, quosdam hujus verbi significatus ex iis esse quæ doctorem huius alioqui Hominum, & in his rebus versatissimorum magnam quantumvis diligentiam fugerunt.

Jam vero ex innumeris prope locis quorum incertam scripturam commemorare poterat Almeloveenius, hos paucos habet. Lib. 2. cap. 29. in quo cibi, ac potiones quæ alvum movent, traduntur, me non præterit, Nicolai illius qui Florentiæ primus omnium quos non ego modo, sed & Viri noverint longe Eruditissimi Thomas Bartholinus ( h ), Almeloveenius noster, & Jo. Albertus Fabricius ( i ), primus, inquam, Celsum descripsit formis, atque etiam L. Ant. Junta, ac Manutiorum libros post mulsam, vinumque dulce, vel falsum hæc habere: *aqua: tenera omnia tepida: dulcia: pingua*: hancque scripturam hætenus probare Almeloveenium, ut cum Lindenio scribat: *aqua, omnia tenera, tepida, dulcia, pingua*. Attamen in proximo capite 30. quod propter Operarum incuriam apud Almeloveenium inscribi-

tur 25. in quo contra, quæ alvum adstringunt, proponuntur, nunquam ego post asperum & vinum, & defrutum legi: *aqua vel tepida vel præfrigida, dura, id est; ea quæ tarde putescit, ideoque pluvialis potissimum, omnia dura, macra*: hæc, inquam, superiori loco perspicue opposita nunquam legi, quin vehementer dubitarem, an non magis in ipso probanda esset altera scriptura, quam Cæsarius, Pantinus, Stephanus, Rubeus, atque alii sequuntur: *aqua tenera, omnia tepida, dulcia, pingua*; ut aqua videlicet *tenera* opponatur *duræ*, sicut a Rubeo ( k ) explicatum est; aut certe utramque scripturam; quod factum video a Constantino, & Ronseio; esse censerem proponendam. Initium quoque sectionis 16. capitis 28. libri 5. cum hoc habeat Nicolaus: *Scabies vero est durior cutis rubicundus*; Junta autem, Cæsarius, Pantinus, Stephanus, aliique tria postrema verba ita scribant: *durior cutis rubicundior*; Manutii vero: *humor cutis rubicundus*; Constantinus denique ad libri oram: *tumor durior cutis*. Alii, *durities cutis*; Ronseus autem: *al. humor durior c. r. al. durities cutis*; cum igitur usque adeo hic varient codices; equidem haud improbaverim quod Almeloveenius, missis cæteris aut manifeste vitiosam, aut minus probabilem sententiam habentibus, ultimum cum Lindenio selegerit, & scribere maluerit: *Scabies vero est durities cutis rubicundior. ex qua pustula oriuntur*; erat tamen de tanta ista varietate Lector monendus tum ne pro certo crederet, Celsum ita scripsisse, tum ut inquireret, quo igitur modo scripsisset, an sic, exempli causa: *Scabies vero est asperitudo cutis rubicundior, ex qua pustula oriuntur*. Ut enim mittam, verbi *asperitudo* vestigia quædam fortasse in illo *durior* relicta esse, quod pleræque, & in his vetustissima, editiones servarunt; certe in ejus quæ proxime antecedit, sectionis principio cum hæc de pustulis Celsus scripsisset: *Earum plura genera sunt. Nam modo circa totum corpus partemve asperdo (asperitudo ex optimis, vetustisque exemplaribus quæ Rhodius ( l ), & Constantinus ( m ) nominant, legendum est) quædam fit, similis his pustulis &c. eaque modo rubent, modo colorem cutis non excedunt*; cum, inquam, Celsus hæc scripsisset; a veri similitudine non prorsus abhorret, jungere cum illa sectione hanc quæ sequitur, eo quod exempli causa proposuimus, initio voluisse, eoque magis quod paulo post id initium, *Quo asperior est, inquit, quoque prurit magis, eo difficilius tollitur*. Verbis autem opus non est, ut intelligatur, aut libro 6. cap. 14. ( quod perperam Almeloveenii Operæ 16. fecere ) in quo de Uvæ morbo sermo est, omittere non decuisse, veterem librum a Constantino, & Ronseio in suorum margine descriptum, cujus auctoritate, proxima iis quæ afferemus protinus, verba in suam sedem restituta sunt; non succo habere, sed *succus* in hoc loco: *Chelidonia quoque succo per cochlear illita uvæ maxime prodest*: Aut libro eodem, cap. 6. in extrema fere sectione 1. cum illis verbis: *In ipsum vero oculum primo die, nisi immodica inflammatio est, nihil recte conicitur*; alteram quoque, librorum videlicet Nicolai, Junta, Manutiorum, Stephani, Constantini, scripturam, quæ a Ronseio, aliisque præterea saltem in ora adscripta est, proferre convenisse: *nisi modica inflammatio est*; præsertim cum hæc continuo sequantur: *sæpe enim potius concitatur eo pituita quam minuitur*: Aut lib. 7. cap. 2. ad illa verba: *si ægrum fluxus alvus exercuit, neque per alimenta quicquam corpori accedit*; indicandum fuisse: Manutios tamen; quos cum dico, Egnatium quoque ipsum dicto; pro *exercuit*, legisse *exhaurit*, Stephanum autem *exhausit*; quam quidem scripturam, magis profecto cum proximis quæ modo allata sunt, verbis

( e ) l. 7. c. 26. p. 481, 27.

( f ) Tetrab. 4. Serm. 4. c. 32.

( g ) de Re Rustic. l. 4. c. 29.

( h ) Dissert. IV. de libris legend.

( i ) Bibl. Lat. l. 2. c. 4.

( k ) Annot. in Cels.

( l ) in Lexic. Scribon.

( m ) Annot. in Cels.



bis ipso loquendi genere congruentem, Constantinus quoque, ac Ronsseus adnotavere: Aut eodem libro 7. cap. 12. sect. 1. quæ est inscripta de *Dentibus*, post ea verba quibus docemur tum cognoscere, in eorumne evulsione aliquid ex osse cui inhærent, fractum sit, tum fracti ossis particulam, incisa etiam, si opus sit, gingiva, vulsellæ ope esse extrahendam; quæ porro subi-  
 444, 16. ciuntur: *Quod si fractum statim non est, sed intumescit extrinsecus maxilla, ut os hiare non possit*; non sine iis legi oportuisse quæ ipsorum loco sunt tum in pervetusto Nicolai libro, tum in illis quos Junta, & Cæsarius ediderunt; quorum quidem verborum præcipua pars est a Constantino, Ronsseo, aliisque in margine proposita: *Quod si factam statim non est, indurescit extrinsecus maxilla, ut is hiare non possit*; hoc est, si fracti ossis particulaeducta statim non sit: Aut denique libro 8. cap. 10. ubi de membris, ut reponantur ossa, extendendis, hæc habentur: *Sub qua ( inflammatione ) & difficile, & periculose vis nervis adhibetur. nam distentionem nervorum vel cancer sequitur; vel certe, cum mitissime agitur, pus; duo fuisse non omittenda, alterum, plerumque libros non habere: cum mitissime agitur, sed ut diutissime alatur, Manutiorum: ut mitissime alatur, Constantini scriptum calamo: agatur; ut proclive sit suspicari, scripsisse Celsum: ut mitissime agatur; alterum, in iisdem omnibus, imo iptius quoque Lindenii libro non distentionem nervorum legi, sed distentio.*

Verum in hisce aut omnibus, aut certe fere omnibus locis erunt fortasse qui minus necessarium fuisse judicent variantem scripturam indicare. Quid vero de iis censebunt quos protinus memorabo, in quibus, nulla alia monstrata scriptura, eam Lindenius, atque Almeloveenius sine ulla dubitatione unam ediderunt quam aut nullo pacto, aut minus profecto laudabiliter tueri possimus? Libro enim 3. sic capitis 18. initium proposuerunt: *Et febrium quidem curatio exposita est. Supersunt vero alii corporis affectus, qui huic superveniunt, ex quibus eos, qui certis partibus assignari possunt, protinus jungam. Incipiam ab infania.* Ego vero qui in aliis omnibus quæ adhuc videre licuit, Celsi exemplaribus constanter legirim: eos, qui certis partibus assignari non possunt; vixque meminerim, Constantinum, atque Ronsseum, nullo tamen antiquo codice citato, & in ipso tantum margine suorum librorum, istud non esse delendum, indicavisse; quæ Nostri & reapse deleverint, & delevisse se, reticuerint, plurimum miror. Nam si quis forte dicat; quid ergo? Num infania, lethargus, apoplexia, paralytis, comitialis, cardiacus, aut regius morbus ( de quibus videlicet sermonem habendi ab istis verbis Corn. Celsus initium capit ) affectus igitur sunt qui certis partibus assignari non possunt? ego etsi illum ad Pantini Annotationes possem rejicere, ex quibus qua ratione id negare Celso licuerit, intel-  
 143, 14. ligeret; non tamen faciam; sed hoc unum respondebo, non quid aliis, & his nostris potissimum, sed quid Celsi, aliorumque latinorum rei medicæ Scriptorum temporibus apud ipsos in usu esset, ac consuetudine, esse spectandum. Serenus certe Samonicus ( n ) lethargi, & comitialis, ac regii morbi; Plinius autem Valerianus ( o ) & horum, & cæterorum qui sunt paulo supra nominati, curationes seorsum, extraque aliorum qui certis partibus assignantur, ordinem proposuerunt, quanquam uterque a capite orsus, & deinceps thoracem, imum ventrem, artusque ipsos perlustrans, ante poterat in suis quemque sedibus, siquæ eorum certas esse, censuisset, nullo negotio collocare. Quorum Scriptorum aliquis forte auctoritatem contemnat; ipsius autem Celsi contemnere qui possit? Hic vero si, ut Lindenius, atque Almeloveenius proponunt, eos de

quibus loquimur, affectus certis partibus assignari posse, scripsisset; qua tandem ratione statim atque ipsorum tractationem cum libro tertio absolverat, hoc uti libri quarti initio ( quod quidem omnes ad eundem pariter modum exhibent, & in his Lindenius etiam, ac Almeloveenius ) potuisset: *Hactenus reperiuntur ea genera morborum, quæ in totis corporibus ita sunt, ut iis certæ sedes assignari non possint: nunc de his dicam, quæ sunt in partibus.* Operæ quoque pretium est animadvertere quomodo ipsi eodem in libro quarto capitis 21. finem ediderint: *Neque alienum est, fovere inferiores partes aqua, decocta ex verbenis comprimentibus, ex iisdem aliqua cataplasmata imo ventri inguinibusque circumdare; præcipueque ex aceto. Vitare autem oportet rutam, & ne supinus dormiat.* Nempe igitur Celsus in nimia feminis profusione ( de hac enim agit in eo capite ) rutam quam cæteri laudarunt Medici, ipse improbaverit? Vi enim sua; in Scholiis inquit Almeloveenius; nimium extinguere semen posset. At quanto veri similia scripsisset, si indicata plerorumque librorum scriptura: *præcipueque ex aceto rutam vitare, etiam ( alii habent: & ) ne supinus obdormiat*; Lectores monuisset, paulo aliter duntaxat interpungendo & librarios potuisse hunc locum corrumpere, & nos posse restituere, si videlicet ( quod factum esse, nuper vidi etiam in Constantini editione, & ad eundem fere modum in Ronssei Enarratione ) scribamus: *Neque alienum est cataplasmata imo ventri inguinibusque circumdare, præcipueque ex aceto rutam: vitare etiam, ne supinus obdormiat.* Non difficilior est, præsertim alia aliorum librorum scriptura animadversa, locum restituere, quem libro 5. in capitis 27. initio comperies: *Sequitur, ut de his ( vulneribus ) dicam, quæ morfu fiunt, interdum hominis, interdum simiæ, sæpe canis, nonnunquam ferarum, aut aliorum animalium, aut serpentium. Omnis autem feræ morsus habent quoddam virus.* Quæ postrema verba cum in libris editis ab Nicolao, itemque a Manutiis ad hunc modum scripta sint: *Omnis autem fere morsus habet quoddam virus*, imo a Manutiis scriptum sit fere; miror, Almeloveenium hos potius non esse secutum, præsertim qui hic laudet Panaroli Pentec. 2. Observationem 32. ( legendum est 42. ) quæ est de *Mulieris morfu venenato*, cui addere ex Hildano ( p ) alias potuisset idem ostendentes, morsum videlicet hominis aut esse virulentum, aut certe; ut Plinii ( q ) verbis utar; *inter asperrimos non injuria numerari.* Quæ etiam si non ita se haberent, neque Serenus Samonicus ( r ) qui respexisse ad hunc Celsi locum videtur, scripsisset:

*Sive homo, seu similis turpissima bestia nobis  
 Vulnera dente dedit, virus simul intulit atrum;*

Celsum tamen ipse per se istam sibi scripturam assereret. Cum enim post ea de quibus agimus, verba, hæc continuo subjecerit: *Itaque si vehemens vulnus est, cucurbitula admoveenda est; hæcque, ut tota reliqua prima sectio, de omnibus universe moribus sint necessario accipienda; neque enim alioqui de hominis, ac simiæ moribus, velut est pollicitus, in toto hoc capite verba faceret; necesse profecto est, ut non modo omnis feræ, sed etiam omnium animalium morsum fere virus quoddam inferre, posuerit, quod videlicet cucurbitula sit extrahendum.* Idem quoque Celsus quid de duobus aliis locis censendum sit, satis superque demonstrat. Nam quod ab Nostri editum est libro 8. cap. 1. *Primo vero duo, radii & brachii, ossa juncta paulatim dirimuntur, rursusque ad manum coeunt, modo crassitudinis mutato. Siquidem ibi radius plenior, cubitus admodum tenuis est; non sine vitio esse iis omnibus apparebit qui paulo ante, hæc scripta esse, animadverterint: Quæ res sedem brachio præstat. quod constat ex ossibus duobus, iis nimirum quæ*

( n ) de Medicina Præc. ( o ) l. 2. c. 58. & seq. & l. 3. c. 7. & seq. ( p ) Cent. 1. Obs. 84. 85 & Cent. 4. Obs. 87.  
 ( q ) Natur. Hist. l. 28. c. 4. ( r ) De Medic. Præc. cap. de Hominis, ac Simiæ morfu.



quæ illico nominat; ut in eo quoque de quo sermo est, loco, ac describit Celsus, radio videlicet, ac cubito; ut manifestum sit, cum brachium ipsum constet ex radio, non oportuisse scribere: duo radii, & brachii, ossa; sed vel satis fuisse: duo brachii ossa, vel si nominanda erant: duo, radii & cubiti, ossa, omnino scribere oportuisse: utrum enim a Celso reapse scriptum sit, haud satis liquet ex scriptura, in aliis omnibus quæ adhuc vidimus, exemplaribus in hunc unum modum depravata: duobus radiis brachii ossa. Alter locus in eodem pariter libro occurrit, capite autem 5. quod de Naso fracto est, ubi & Lindenius, & Almeloveenius hæc edidere; Sin, quod intus inditum est, lædit; sicut maxime fit, ubi interior cartilago perfracta est, exercitata nares eadem tantummodo habena continendæ sunt. Ubi tamen, non exercitata, sed excitata nares, ipse Celsus indicat, esse legendum, ut qui non modo alibi, atque adeo etiam paulo infra eodem verbo eadem significatione est usus, sed & paulo supra de fracta nasi cartilagine in suam sedem reponenda verba faciens; quicquid, inquit, e cartilagine concedit (libentius legerem: concidit, cum ceteri quos consului, libri constanter habeant: Quicquid in cartilagine incidit) excitandum leniter est, aut subiecto specillo, aut duobus digitis utrinque compressis: mox quæ in nares injicienda sint, docet, quæ desiderare cartilaginem, non sinant, item quæ extrinsecus habena circundanda sit quæ nares sic excitatas, contineat: post quæ videlicet ea continuo subjicit de quibus loquimur, verba. Sed & in cunctis quos ad hoc tempus inspeximus libris, non exercitata, sed excitata nares scriptum est: quod utinam significasset Lectoribus Almeloveenius; hac quippe scriptura demonstrata aut illam alteram rejecissent, aut saltem quid Celsus revera scripsisset, amplius sibi in ejusdem, ut nos fecimus, aut in aliorum etiam scriptis statuissent esse querendum. Quod quidem in locis nonnullis facturos scio in quibus Vir ille ad istum alterum modum se gessit, ut puta cum lib. 234, 3. 4. cap. 21. ad illa verba: Id faciunt etiam alba viola, hæc adnotavit: Mercurialis Variar. Lect. L. 1. c. 3. videtur olivas legisse. Illud tantummodo minus placet, quod hæc ita adnotet, quasi vero præter Mercurialem nemo omnium id legisset: cum ego contra in nullo adhuc libro: alba viola, sed in omnibus invenerim: alba oliva: quæ quoniam; ut ibi ostendit Mercurialis meus tum ex ipsarum natura, tum ex Medicorum auctoritate; adstringendo utiles sunt; sane hic videntur convenire ubi & gummi, & passum laudantur, quocum videlicet Celsus ipse oleas albas in eo capite (f) conjunxit in quæ alvum adstringunt, proposuit. Multoque etiam minus dubito, quin doctus Lector nostri conjecturam non sequatur quam ad initium adscripsit capitis 5. libri 3. Cum enim Celsus de Diaria Febre sermonem instituens, hæc habeat: Igitur si (febris) semel tantum accessit, deinde desit, eaque vel ex inguine, vel ex lassitudine, vel ex æstu, aliave simili re fuit, sic, ut interior nulla causa metum fecerit; Almeloveenius, pro inguine, malim, inquit, sanguine, vel ingluvie, quomodo enim ex inguine posset oriri febris? dein (Celsus) enumerat causas externas, quas inter inguen censerì non potest. Verum enimvero si has inter censerì inguen non potest; quæ, quæso, ratione sanguis ipse censeretur? Certe autem inter causas externas censeretur ictus, vel alia ejusmodi ipsi etiam pedi vis illata a qua & inguinis tumor, & hujus socia diaria febris existit: sic enim ex inguine diariam oriri febrem, ita manifestum est, ut minime oportuisset, Almeloveenium querere, quomodo ex inguine posset oriri febris? præsertim cum ipse Hippocrates in Epidem. (t) scripserit: Ex bubonibus febres omnes malæ, præter diarias: ean-

demque prorsus in Aphorismo (u) sententiam retulerit, cujus postremam partem a Galeno (x), Oribasio, (y), Philotheo (z), Liebautio (a), Heurnio (b) ad eundem atque a me modum explicatam esse, scio, per externas scilicet, evidenterve causas, inguinis tumorem, ac diariam febrem excitantes. Recte igitur illud fecit Almeloveenius, quod in hoc loco nihil in Celsi verbis mutavit: quod utinam in pluribus aliis facere; quamvis ipso præeunte Lindenio; nolisset: dici enim haud potest, mi Vulpi, quoties, & quot Viri longe etiam doctissimi, & in restituendis Veterum scriptis exercitatissimi, cum medicinam afferre se crederent, quantum ex integro, sanoque refecerint.

Hoc autem quod in aliis improbo, ne ipse admittam; etsi postremo hoc loco dubitationes, quin etiam divinationes quasdam communicare tecum statui in aliquot Celsi locos, in quibus Almeloveenius nihil quidquam subesse vitii, judicare se, ostendit; hæc tamen velim sic accipias, ut ad te, aliosque quibus præsertim codicum Celsi vetustiorum copia est, ad inquirendum, conferendumque excitandos, non ad aliquid in Celso præmature immutandum a me adscripta esse, existimes. Et primum libri 3. caput 27. nunquam me perlegere potuisse, fateor, quin mirarer vehementer, in illud unum idemque caput, in quo de apoplexia, paralyti, aliisque nervorum affectionibus actum esset, ea quoque ad extremam conjici quæ ad Suppurationes pertinent, quæ in aliqua interiori parte oriuntur, atque adeo suspicarer, postrema hæc omnia aut alicunde avulsa, eodem esse reponenda, aut saltem in peculiare, ac penitus divisum caput secernenda. Libris autem Celsi, editisque in ipsum Commentariis, quæ adhuc licuit, consultis omnibus, non modo vestigium ullum antiquæ divisionis, sed ne unum quidem reperire Scriptorem potui qui in eadem dubitatione fuisset, præter Ronseum (c), qui, addubito, inquit, vehementer num quæ hic subsequuntur, antedictis cohæreant: mihi certe sint 22. capitis annexenda videntur, quod eodem capite de tabidis, & pulmone suppuratis agit. Neque minus propemodum dubito; quamvis nec Ronseum, nec alium aliquem habeo præeuntem; quin pariter in libri 4. caput 20. quod est de Vulva, hoc est de Uteri, Morbo, temere a librariis contrusa fuerint quæ in illius calce leguntur de Nimia Urinæ Profusione; quasi vero hoc mali viros nunquam, sed mulieres tantum corripere, ut propterea inter peculiare earum morbos ita præsertim, nulla scilicet de viris mentione facta, a Celso referri potuisset. Verum ad alia, ut puto, errata librariorum veniamus. In libri ejusdem 4. capite 1. scriptum est: atque hæc quidem juncta sunt. Renes vero divisi: qui lumbis sub imis coxis inhærent, a parte earum refimi, ab altera rotundi. Mitto, pro divisi alios omnes quos inspexi, libros, & recte fortassis, habere diversi; duo vero quorum primum vix tandem in Manutiorum libris, alterum in nullo adhuc reperi, prætermittere non possum; sic enim legendum credo: qui lumbis sub imis costis inhærent, a parte earum rotundi, ab altera refimi: qua in lectione, tibi præsertim adeo in Anatome exercitato, probanda, non est sane cur laborem; quid enim esse manifestius potest, quam Renes ne ima quidem sui parte summas coxas, hoc est innominata ossa, attingere; sub imis autem costis positos esse: neque ea refimos esse parte qua coxas, vel costas spectant, sed rotundos; contra qua alter alteri obvertuntur, non rotundos esse, sed refimos? In capite ejusdem libri quarto sect. 2. ubi inter ea quæ asthmæ, atque orthopnææ communia sunt, hoc primum legimus: quod propter angustias, per quas spiritus exadit, sibilum elidit; videndum censeo, an non potius oporteat legere: sibilum edit. Nam

(f) l. 2. c. 30. p. 107. 27. 31.

(t) l. 2. sect. 3.

(u) sect. 4. aph. 55.

(x) Commentar. 2. in Aph. Hipp.

(y) Comment. in Aph. H.

(z) Comment. in Aph. H.

(a) Schol. in Aph. H.

(b) Enarrat. Aph. H.

(c) Enarrat. Celsi.



Nam quid sit *spiritum elidit*, quomodo vel ipse alibi ( *d* ) locutus est Celsus, satis id quidem; quid autem sit *sibilum elidit*, haud satis videor intelligere. Quod si igitur legamus: *sibilum edit*; commentarii loco esse poterit quod Cassius Medicus ( *e* ) in Problemate habet 22. Cur, inquit, *difficulter spirantes sibilu non absimilem vocem reddunt? Quoniam morbus ipse est præclusio, atque compressio inanum pulmonis fistularum: per angustum autem foramen dum fertur spiritus, talis redditur sonus.* Velim etiam hæc attente consideres in ejusdem libri capite 24. Quidam ( podagrici, chiragrici ) cum toto anno a vino, mulso, venere sibi temperassent, securitatem totius vitæ consecuti sunt. idque utique post primum dolorem servandum est, etiamsi quieverit. Quod si jam consuetudo ejus facta est, potest quidem aliquis esse securior his temporibus, quibus dolor se remisit: majorem vero curam adhibere debent hi, quibus id revertitur. quod fere vere autumnove fieri solet. Quanam, quæso, ratione postrema hæc accipiemus? Num hi quibus id revertitur, ii sunt quibus dolor reverti solet? At quid attinebat his majorem curam imperare, quasi ille aliquis quem securiorem esse jussit, non pariter ex iis esset quibus consuevit reverti dolor? Certe de utrisque dicit: *si jam consuetudo ejus facta est.* Num igitur hi quibus id revertitur, erunt ii quos jam nunc revertens dolor reapse invadit? At multo minus id attinebat monere; nam quis, reapse invadente dolore, majorem nescit curam esse adhibendam? Quid ergo est? Una ego litterula omissa has tantas huic loco offusas tenebras esse, puto. Si enim legamus, non *hi*, sed *his*, aut etiam ( nam ii lego in vetustissimo libro ab Nicolao typis descripto, quem porro secutus est Junta ) *iis, quibus id revertitur*; perspicua profecto, & Celso digna, & cum superioribus, ac consequentibus verbis apta, & cohærens existit sententia, hæc videlicet: Quibus dolor primus decessit, ii sibi diu, atque omnino temperent, necesse est, ut ne amplius revertatur. Quibus autem sæpius dolor reversus est, eorum aliquis minus quidem sibi temperet, licet his anni temporibus quibus dolore solutus esse consuevit; at contra iis temporibus quibus solet redire, id est vere ut plurimum, atque autumnno, iis, inquam, temporibus sibi podagrici omnes magis temperent, necesse est; nimirum quia nisi majori temperantia consueto morbo occurratur, majus tunc periculum est ne redeat. Sed ut hoc in loco unam a librariis omissam litteram; sic in altero unum, aut plura esse ab ipsis addita verba, crediderim. Libro enim 5. cap. 25. ubi legimus: *Quinetiam silvestris papaveris, cum jam ad excipiendam lachrymam maturum est, manipulus, qui manu comprehendi potest, in vas demittitur, & superinfunditur aqua, quæ id contegat, atque ita coquitur: existimasse forsitan, Cellum ita scripsisse, ut Scribonius Largus ( *f* ) : fasciculus, quantum manu comprehendi potest; nisi continuo primum illud verbum rursus posuisset: Ubi, inquit, jam bene manipulus is coctus est. Itaque cum papaveris manipulus idem sit ac quod manu comprehendi potest, ideoque & Ovidius ( *g* ), & Plinius ( *h* ), & Palladius ( *i* ), ut manipulum significarent, ille quidem dixerit:*

*Arentisque rosæ quantum manus una prehendat; alter vero: Mercurialis herbæ quantum manus capiat; postremus autem: buxi folia, quantum manus ceperit; videtur profecto Celsus post illa: papaveris, cum jam ad excipiendam lachrymam maturum est; vel scripsisse: quantum manu comprehendi potest, in vas demittitur, vel potius: manipulus in vas demittitur; sic ut ea verba: qui manu comprehendi potest, explicationis causa in ora alicujus veteris libri adscripta, imperitia librariorum inter ipsius Celsi verba recepta sint: quod quidem Morgagni Opusc.*

& in aliis describendis Auctoribus haud raro accidisse, notum est, & sæpe in nostro hoc contigisse, cum Lindenius ( *k* ) animadvertit, tum Rhodius ( *l* ), nonnullis prolatis exemplis, indicavit. In loco autem quem protinus afferam ex ejusdem libri 5. capite 28. sect. 2. quæ est de Carcinomate, nihil quidem aut additum, aut omissum est; & verborum tamen solum mutata distinctione, sententia misere depravata est. Postquam enim ejus de quo ibi agitur, morbi plura genera, vel plures, si mavis, gradus sunt memorati, hæc subjiciuntur: *Tolli nihil, nisi κακόνδεσ 317, 57. potest: reliqua curationibus irritantur. Et quo major vis adhibita est, eo magis quidam usi sunt medicamentis adurentibus.* Sic autem verba hæc distinguenda sunt: *Tolli nihil, nisi κακόνδεσ potest: reliqua curationibus irritantur; & quo major vis adhibita est, eo magis. Quidam usi sunt medicamentis adurentibus.* Distinctionem hanc comprobant quæ continuo sequuntur: *quidam ferro adusserunt: quidam scalpello exciderunt. neque ulli unquam medicina profuit: sed adusta protinus concitata sunt, & increverunt, donec occiderent: & reliqua, quæ eo nimirum omnia pertinent, ut ostendant, vitia ista curationibus, sicuti positum est, præsertim vehementioribus, adhibitis exasperari. Res ut perspicua, ut facilis sit, vides; tamen ex omnibus quos ad hunc diem hujus distinctionis confirmandæ gratia consului, libris, vix unum, Roberti videlicet Constantini, invenire potui in quo ad eundem fere modum distincta sint verba.*

Haud multo gravior in describendo Celso plethorumque error hujus pariter sententiam mutat in lib. 7. cap. 18. ubi inter cæteras notas quibus Enterocelen dignoscamus, hæc quoque sic proponuntur: *frigore omni ( tumor ) contrahitur, calore diffunditur; estque tum scrotum & rotundum, & tactu leve.* Hic vero esse scribendum: *tactu leve*, ipse per se Auctor indicat, qui paulo supra inter signa quibus nos docuit Epiplocelen ab Enterocelen distinguere, *tactu vero*, inquit, *tumor inæqualis est.* Hujusmodi autem errorem haud notassem; sed ut Operarum Almeloventii, sane vel in ipsa A. 1713. editione, quam correctiorem esse, in libri fronte confirmant, & qua mihi una ad hoc tempus datum est uti, non valde diligentium, sicuti multis in locis collato Lindenii exemplari ( quod a te sedulo fieri, velim ) animadverti; ut Operarum, inquam, Almeloventii, fortuitum lapsum prætermissem, nisi etiam in Lindenii; Lindenii autem? imo vero Juntæ quoque, Manutiorum, Cæsarii, Stephani, Constantini, Ronssæi, aliorumque exemplaribus animadvertissem, cum tamen in primo illo, Nicolai videlicet, itemque in Pantiniano scriptum sit: *leve.* Sed & in his, & in cæteris omnibus, quos modo memoravi, libris frustra quæsi vi qua ratione intelligere melius possem quod legimus in proximo capite 19. *Minister autem sinistra manu comprehenso scroto, sursum versus eum debet extendere, & quam maxime ab inguinibus abducere; omnes enim ii libri pariter habent: eum, vix Constantino, sed in ora, scribente: eam, aut id, quam videlicet posteriorem vocolam, aut aliam nullam in vetustiorum librorum aliquo me invenire posse, speraveram. In aliis autem verbis quæ in ejusdem 6. libri capite occurrunt 26. sect. 1. Nonnunquam etiam prolapsus in ipsam fistulam ( id est urethram ) calculus, qui subinde ea extenuatur, non longe ab exitu inhærescit; in his, inquam, verbis ne Constantinus quidem id exhibuit quod quærebamus. Nam quod in margine ad vocem *ea* adnotavit: *urina, vel subaudi*, nimis id longe petatum videtur, cum vox *urina* non ita prope posita sit: neque præterea *urina* extenuat hærentem calculum, sed auget; vel si extenuat, cur igitur extenuatus sic inhærescit? Ego vero*

H pro

( *d* ) l. 5. c. 28. p. 316. 10. ( *e* ) Med. Quæst. & Probl. ( *f* ) Compos. Med. Comp. 83. ( *g* ) de Medicam. Faciei. ( *h* ) Nat. Hist. l. 25. c. 5. ( *i* ) de Re Rust. l. 11. tit. 14. ( *k* ) Epist. ad Lect. ( *l* ) in Scribon. Compos. 4. & 104.



pro qui sperabam vel quia, vel quā in libro aliquo posse inveniri, ut Celsus hoc diceret: quia; vel qua parte subinde urethra extenuatur; propterea; vel ea in parte calculus inhærescit. Videndumque esse, censēbam, num forte huc pertineret quod Aretæus (m) vidisse se, dicit; postquam enim scripsit: *Secunda porro calamitas est, cum per colem calculus transmittitur. Nam si amplior sit, quam urinæ iter (Græci urethram vocant) capere possit; in eo multum temporis hæsit, &c.*; tum hæc subjicit: *Ægerrime autem tortuosi calculi exeunt: quosdam enim & hamatos vidi, in meatibusque adnatas quasdam duritias.* Sed & secundum naturam solere urethram contrahi in ipso primo; sive exteriori suo orificio in ipsis etiam, ut nosti, fœminis observavimus (n): quod eo potissimum memoramus, quia ubi Celsus in proxima hujus capitis sectione 4. de minori fœminarum calculo verba facit, cum ceteri quos inspeximus, libri; nisi prorsus memoria nos fallit; omnes sic habeant: *Ergo & per se sæpe excidit, & si in primo quod est angustius inhæret, eodem tamen unco sine ulla noxa educitur;* ibi Almeloveenii, ac Lindenii exemplaria, omnino abjecta (quam bene alii viderint) illa voce: *primo, hæc exhibent: & si in urinæ itinere, quod est angustius, inhæret.* Porro ambo; ut ad alium locum veniamus; in ejusdem capitis sectione 2. quæ est de calculis e vesica extrahendis, hæc in ipso fine habent: *Quocunque autem modo cervix ea parte secta est, leniter extrahi, quod asperum est, debet.* Haud equidem diffiteor, hunc locum in aliis omnibus quos consului, libris manifestum esse vitiatum; sic enim in cunctis legitur: *Quocunque autem modo cervix ea parte facta est;* Attamen cum proxime scriptum fuerit, non qua parte, sed quo & ferro, & modo cervix vesicæ sit aperienda; semper ego, potius in ea parte, quam in facta subesse vitium existimavi, & hac propterea ratione esse tollendum: *Quocunque autem modo cervix patefacta est;* præsertim cum supra Auctor de ejusdem cervicis sectione ad hunc ipsum modum locutus sit: *Cum vero patefacta est* (hoc est cervix; hæc enim proxime antecedunt: *rupta cervice, quam habuisset incisa*) in conspectum calculus venit. Non me præterit, Almeloveenium, quamvis omnibus quos vidi, libris, atque adeo ipsius etiam Lindenii, repugnantibus, qui nempe constantissime habent: *Cum vero patefacta est;* scribere eo in loco maluisse: *Cum via*

perfecta est; tamen & ipse, idem locutionis genus in eadem re ante paucos versus in Celfo servavit; nam post illa: *- plaga facienda est, qua cervix aperiatur; donec urinæ iter pateat sic, ut plaga paulo major, quam calculus sit;* continuo hæc subdit: *Nam qui metu fistulæ (quam illo loco ἰσχυρὰ Græci vocant) parum patefaciunt; &c.*

Essent alii loci in quos meas; quales eæ cunque sunt; divinationes proferre possem; sed quia jamdudum sentio, me justum longe esse prætergressum epistolæ modum; unum tantummodo, eumque ad rem nostram anatomicam pertinentem, attingam, quem locum ne ipsi quidem Paawio (o), Anatomes, ut tute scis, haud ignobili Doctori suspectum fuisse; mirum est. Libro igitur 8. cap. 1. in maxillæ inferioris descriptione hæc habentur: *Verum ipsius maxillæ partes extremæ quasi bicornes sunt. Alter processus intra latior, vertice ipso tenuatur, longiusque procedens sub osse jugali subit, & super id temporum musculis illigatur. Alter brevior, & rotundior &c.* Et si in nullo eorum quæ ad hoc tempus vidi, exemplarium aliam quam hanc ipsam inveni scripturam; non possum tamen non credere; Celsum potius ita scripsisse: *Alter processus infra latior, vertice ipso tenuatur.* Si enim res id pateretur, ut scribere potuisset: *Alter processus intra latior, extra tenuatur;* nihil immutandum esse, censerem; nunc igitur cum & res ipsa, & quod non obscure oppositum est: *vertice ipso tenuatur,* requirant, ut illud ante posuerit: *infra latior;* non video cur unius litterulæ mutatione ut vitari hic locus a librariis, ita a nobis restitui non possit. Hanc tamen, aliasque omnes quas in hac epistola proposuimus, sive divinationes, sive dubitationes; velim tibi persuadeas, nihili nos & in præsentia facere, & semper esse facturos, nisi ab Doctissimis Viris, & longe magis quam nos Anatomici, in emendandis scriptis Veterum exercitatis probentur. Quod si forte unam modo, aut alteram haud prorsus censerent esse improbandam; satis magnum nobis videremur earum fructum cepisse, cum quæ de Xenophonte, cujus e libris quædam menda auferebat, Muretus (p), ea nos de Celfo etiam dicere, nequaquam dubitaremus: Nihil est tam pusillum quod non avide accipi debeat, quod quidem ad tam politum, tamque utilem Scriptorem pertineat. Parvum est, quod asserimus; sed magnus is, quem adjuvamus. Vale.

Patavii Postrid. Idus Decembr. MDCCXX.

## E P I S T O L A A L T E R A.

Jo. Bapt. Morgagnus Jo. Bapt. Vulpio S. P. D.

**S**I vales, bene est; ego quidem valeo. In hac vetusta Alexandri Paduanii, Medici olim Doctissimi, Bibliotheca Celsi nostri exemplar inveni, calamo in membranis descriptum. Quod ut paulo attentius inspexi, cœpi suspicari, haud veram fortasse esse additam illam ab Henrico Stephano inscriptionem: *Aurelii Cornelii Celsi de re medica libri octo, operis ab eo scripti de artibus, pars sexta.* In fine enim IV libri in hoc quidem codice scriptum est: *Artium Aurelii Cornelii Celsi liber. VIIII. Idem medicina liber. IIII. explicit feliciter;* hisque numeris proportionem respondent qui ad plerorumque insequentium librorum calcem adscripti sunt; ut si hanc rationem sequamur, manifestum appareat, octo hos de re medica libros, quos, ut alias ad te scripsi, quinque de re rustica antecederant, non sextam operis ab eo scripti de artibus, verum secundam omnino partem fuisse.

Ex illis autem quæ rîdem meis ad te litteris

ostendi, minus mihi in Almeloveenii editione probari, nonnulla sunt in quibus hunc etiam codicem inveni ab ea discrepantem, mecumque facientem. Neque enim ut illa habet (pag. 148. lin. 17.) assignari possunt; sed assignari non possunt: non (234, 3.) *albæ violæ*, sed *albæ olivæ*: non (307. 11.) *feræ morsus habent*; sed *fere morsus habet*: non (350, 30.) *nisi immodica inflammatio*; sed *nisi modica inflammatio*: non (410, 5.) *fluens alvus exercuit*; sed *fluens alvus exhaurit*: non (444, 16, 18.) *Quod si fractum* -- ut os; sed *Quod si factum* -- ut is: non (474, 27.) *qui subinde ea extenuatur*; sed *quia subinde ea extenuatur*: nec denique (522, 23.) *exercitata nares*, sed *excitata nares*.

Verum hæc omnia etsi minime contemnenda sunt; nullo tamen pacto videntur mihi cum eo uno quod continuo exponam, comparanda. Memoria, opinor, tenes quod ad te scripseram, non modo de Almeloveeniana, sed de omnibus quas vidis.

(m) De Sign. Diut. Morb. l. 2. c. 3.

(p) Var. Lect. l. 3. c. 15.

(n) Advers. Anat. IV. Anim. 24.

(o) Comment. in Cels. l. 8.



vidissem, Celsi editionibus verba faciens, minime videlicet a me dubitari, quin in libri 4. caput 20. quod est de Vulvæ, hoc est de Uteri, Morbo, temere a librariis contrusa essent quæ in illius calce leguntur de nimia urinæ profusione; quasi vero hoc mali viros nunquam, sed mulierestantum corripere, ut propterea inter peculiares earum morbos ita præsertim, nulla scilicet de viris mentione facta, a Celso referri potuisset. Accipe nunc quid ex hoc codice didicerim; intelliges enim, non solum conjecturam illam meam (quod levius est) veram fuisse, sed hoc insuper quod gravissimum, & inexpectatum omnino est, in his Celsi libris, quos nemo (quod sciam) non integerrimos unquam putavit, unum aut alterum caput deesse. Igitur in eo quod diximus, capite, ubi Lindenii, & Almeloveenii editiones hæc habent (pag. 234. lin. 1.) *Si maligna purgatio est, subjicienda sunt \* coercentia. Id faciunt etiam albæ violæ, nigrum &c.*; codex post illa verba, *subjicienda sunt*, non modo ingentem habet lacunam quidquid reliqui est in ea pagina obtinentem, & in proximæ demum paginæ initio, *coeuntia. id faciunt etiam albæ olivæ: & nigrum &c.*; sed contra eam lacunam eadem manu in ora scriptum est: *Desunt in vetustissimo exemplari duofolia.* Hic ex me quæres, in iis duobus foliis quid scriptum a Celso fuisse, existimem. Ego vero etsi nequaquam dubitarem, quin absoluto primum quem instituerat, sermone de morbis qui cum ad uterum spectent, sunt mulierum peculiares, tum ad eos tractandos venisset quos ad proximas, sed utrique sexui communes partes, & nominatim vesicam referret, de cujus videlicet doloribus omnes, quantum memini, editiones, iis dumtaxat quas Lindenius, & Almeloveenius procurarunt, exceptis, hic ipsum exhibent ante loquentem quam de nimia urinæ profusione verba faciat; etsi, inquam, hæc conjectura assequeretur; tamen hujus ipsius codicis adjumento comperi quæ essent hic a Celso reapse tractata. Cum enim libris singulis singulos peculiares Indices præponi, animadvertissem, capitum argumenta ex ordine commonstrantes, subiit eum consulere qui libro huic quarto præfixus est, si forte in ea parte integer esset quæ pars in libro desideratur. Hæc igitur, quam quidem ex minime interrupta numerorum serie integerrimam judicavi, ad hunc modum se habet.

CX. Vulva exulcerata est.

CXI. De Vesica.

CXII. De calculis in vesica.

CXIII. In omni dolore vesicæ.

Quæ cum ita sint, cumque numerus CX. in ora codicis eo in loco adscribatur, ut respondeat illis verbis (apud Almeloveenium pag. 233. lin. 26.) *Si vero vulva exulcerata est*; numerus autem CXIII. contra hæc ferme scriptus sit (p. 234. l. 7.) *Præter hæc in omnibus vesicæ doloribus (vesicæ enim in codice legitur; non, ut apud Almeloveenium, vulvæ) hinc præclare, quot, & quæ desiderantur, intelligis, in eo loco, in quo aut nihil, aut unum, vel pauca certe verba deesse, Viri Exercitatissimi, atque Doctissimi existimabant. Is enim qui primus Celsum formis descripsit, Nicolaus, & Lucas Ant. Junta sic ediderunt: subjicienda sunt coeuntia; Joannes autem Cæsarius, Gulielmus Pantinus, Henricus Stephanus, & Balduinus Ronseus: subjicienda sunt coercentia. Vix Manutii in utraque editione, interjecta ad hunc modum lacuna, proposuerunt: subjicienda sunt,*

Quæ lacuna sic contracta deinde fuit a Roberto Constantino, ut non aliquot, sed unum fere verbum desiderari, ostenderet, hoc videlicet modo: *subjicienda sunt* \* *coercentia*, præsertim cum hæc in libri margine apposuerit \* *mensæ evocantia*, quasi ita nihil deesse, crederet, postremumque verbum *coeuntia*, ab aliis in *coercentia*, ab ipso in *evocantia* mutatum, ad sermonem de uteri vitiis pertineret, quod reapse ad caput pertinet vel de vesicæ doloribus, vel de calculis in vesica, enatisque inde noxis per medicamenta vi-

Morgagni Opusc.

delicet, ac victus rationem, & frequentiora Chirurgiæ auxilia oppugnandis; nam quæ curatio aut iis a quibus urina non redditur, aut calculosis, cum aliter, ut Celsus ipse ait, succurri non potest, a Chirurgo adhibenda sit, libro docet 7. capite 26.

Nunc illud, opinor, expectabis, ut scribam, an conjecturam aliam aliquam meam ejusdem codicis auctoritate comprobaverim. Neque enim ignoras, præter ea quæ in mea ad te Epistola attigi ut inter scribendum succurrerunt; plura adhuc esse quæ mihi quidem in Almeloveenii editione displiceant. Igitur cæteris in aliud tempus rejectis, unum in præsentia memorabo quod simul ad latinam linguam, simul ad rem nostram anatomicam pertinet. Almeloveenius in libri octavi capite primo (pag. 504. lin. 22.) Lindenium, ut solet, secutus, hæc edidit: *Superius autem humeri caput rotundius, quam cætera ossa, de quibus adhuc dixi, verticillati scapularum ossi inseritur, ac majore parte extra id situm nervis deligatur.* Manutii autem in utraque editione ad hunc modum proposuerunt: - *verticillatis scapularum ossibus parvo excessu inseritur: ac majore parte ex transitu nervis deligatur.* Cum his Constantinus fecit; quanquam in margine adnotavit: *parvo excessu deesse in antiquo Codice, aliosque legere in excessu.* Et Joannes quidem Cæsarius, atque ante hunc Lucas Ant. Junta duas illas voces omiserant, cætera ut Manutii, edentes; nisi quod pro *verticillatis* posuerant, *verticulatis*. Qua in re socios habuerunt Gul. Pantinum, Henr. Stephanum, Bald. Ronseum, qui tamen *parvo excessu* non omiserunt; etsi Ronseus in libri ora, esse qui omitterent, & qui non *verticulatis*, sed *verticillatis* scriberent, indicavit. Ronseus scripturam secutus est Paavius, qui in commentario ad hunc locum suo vocare Celsum, ait, *scapularum ossa verticulata, aut quia cervicibus prædita: aut a verticillis exstantium coracoidis & spinosi processuum*; verum enim vero quænam in his processibus partes sint quas *verticilla* vocemus, non docuit. Hanc ego tantam in eodem loco describendo varietatem cum attenderem; pro ea qua solet peritia prudentiaque facere existimavi V. Cl. Jacobum Facciolum, cum se vehementer dubitare, mihi ostenderet, essetne inter latinas voces facile recipienda *verticillatus*, quam nimirum qui Lexicis inserueret, hoc uno Celsi loco incertissimæ procul dubio scripturæ niterentur. Cum vero idem miraretur, cur Almeloveenius *verticillati scapularum ossi*; non *verticillato*, aut *verticillatis scapularum ossibus*; edidisset; ac præterea ex me quæreret, an potius *vertebratis* (quæ Pliniana vox est libro 11. c. 37.) *scapularum ossibus* hic legendum esse, censerem; memini me in ea quæ paulo superius (pag. 503. lin. 23.) de scapularum ossibus scripta sunt a Celso; hunc enim in manibus habebamus; continuo oculos conjecisse, & Viro Doctissimo respondisse, mihi vero omnino videri, *vertici lati scapularum ossis* esse legendum. Hæc enim illis de ossibus tradiderat Celsus: *a cervicæ duo lata ossa utrinque ad scapulas tendunt: nostri scutula operta; ὠμωπλάτας Græci nominant. Ea in summis verticibus sinuata, ab his triangula, paulatimque latescunt ad spinam tendunt: ex quibus licet intelligi, eam horum ossium partem, quam Anatomici solent scapula cervicem vocitare, Corn. Celsum nomine verticis appellavisse, sive quod eam summam esse illo in osse, crediderit; sive quod ut in triangulo osse oppositam basi, vel ut locum spectaverit in quo humeri caput vertitur, qua videlicet ratione Polorum uterque (quos alii pariter cardines vocant ab eorum similitudine circa quos valvæ convertuntur) a Virgilio I. Georgic. vertex est dictus. Cum igitur scapulæ, sive ut Celsus loqui mavult & in hoc capite (pag. 504. l. 3. ac l. 11.) & ad finem tum septimi (p. 526. l. 6.) tum octavi (pag. 528. l. 6.) & sub initium tum undecimi (p. 542. l. 33.) tum quintidecimi (pag. 548. l. 22.) lati scapularum ossis sinuatam cervicem paulo ante appellaverit verti-*



cem; quid veri esse similis possit, quam ut porro traditurus, cui parti ejusdem ossis, humeri caput inseratur, ad hunc modum scripserit: *vertici lati scapularum ossis inseritur*; præsertim cum in eo Librarii, dictata verba excipientes, persæpe labi consueverint, ut ex duabus vocibus unam facerent, & primam consequentis vocis litteram ad præcedentis etiam postremam addentes, duplicarent, unde facillime nova hæc vox *verticillatis* effingi potuit. Nunc quam in codice scripturam offenderim, tibi fideliter describam; *parvo excessu vertici latis scapularum ossibus inseritur. ac majore parte: & transitu nervis deligatur*. Illud quidem minime est dissimulandum, in versuum intercapedine ausum esse aliquem nonnulla addere, videlicet super ultimam *vertici* litteram, litterulam *s*, & super *&*, particulam alteram *ex*: quod de utroque additamento si forte quæris, quid ego suspicer; sic habeto. Primum mihi tum codicem, ac supra descriptas & Almeloveenii, & cæterorum lectiones, tum ipsam anatomen respicienti veri simillimum videri, ita a Celso scriptum fuisse: *vertici lati scapularum ossis parvo excessu inseritur, ac majore parte extra situm, nervis deligatur*; neque enim (quod tu optime nosti) summa pars humeri ita in scapulæ cervicem, ut summa pars femoris in ossis innominati acetabulum conditur; sed *parvo* tantum *excessu*, idest ejus capitis quod ab interiore latere extuberat, portione immissa, *majore parte extra sita* est, quam etiam ob rem *nervis*, idest ligamenti atque tendinibus, ne facile excidat, *deligatur*. Cum ergo Librarii voces illas *extra situm* describendo, ita vitiaissent, ut alii *& transitu*, ut Scriptor codicis, alii *ex tran-*

*situ*, ut plerique, quibuscum facere codicis Emendator maluit, scriptum reliquerint; nonnulli denique, in quibus Lindenius, & Almeloveenius, integro ea in parte exemplari usi, priores voces restituerunt, nisi quod perspicuitatis addendæ causa, minus, ut puto, necessariam voculam *id* interjecere. Verba autem illa, *parvo excessu* etsi ad rem fideliter tradendam, necessaria sunt, iisque perbelle respondent quæ sequuntur, *majore ex parte*; cum tamen aliquo in codice, ut supra diximus, omissa essent, minus mirandum est quod in hoc invenerim alium in locum transposita, unde Emendatori occasio data est existimandi, ea cum insequentem voce *vertici* esse conjungenda, quam propterea in *verticis* mutare maluit, haud animadvertens, unde factum esset, ut pro *lati* scriptum esset *latis*, & ne vox hæc minime cohereret cum voce *ossi*, hanc in *ossibus* esse mutatam; cum tamen non modo alii codices, quibus auctoribus Lindenius, & Almeloveenius ediderunt, *verticillati scapularum ossis*, aliquanto meliorem in parte indicare possent scripturam; sed ipse etiam Celsus, cum videlicet non de utroque, sed de alterutro osse humeri hic loquatur, insitum scribere non *latis ossibus*, sed *lato ossi*, vel; quod eodem recidit; *vertici lati scapularum ossis*, debuerit. Verum meas hæc conjecturas tanti facies, quanti volueris; illud mihi satis est a te diligenter attendi, in hoc codice non *verticillatis*, sed evidentissima certissimaque divisione legi *vertici latis*. Hac de re V. Cl. Jac. Facciolatum certiore facito, & meis verbis salvere jubeto. Vale.

Dabam Kal. Sextilib. MDCCXXI. Forolivii.

## EPISTOLA TERTIA.

Jo. Bapt. Morgagnus Jo. Bapt. Vulpio S. P. D.

Quæ nudiustertius duo tibi pollicitus sum, alterum ut quæ nuper Venetiis animadverti, superiorem Epistolam meam cum manu exarato Celsi exemplari conferendo, significarem, alterum ut V. Cl. Jacobi Facciolati ad quosdam Scriptoris ejusdem locos Animadversiones XV. longe doctissimas cum meis nonnullis exiguis illis quidem, sed tamen a te efflagitatis, additamentis mitterem; ea his ipsis litteris ambo præstabo. Igitur exemplar id Celsi chartaceum est, illudque ipsum est quo apud Clericos Regulares (Tolentinos ibi vocant) se usum esse, tradidit Rhodius (a); nam alterum, idque membraneum (b), quod ibidem in Divi Antonii Bibliotheca, plurimis vetustissimis codicibus instructa, versaverat, in hujus incendio periit; quem casum hoc ægrius fero quod quæ illo ex codice excerpserat Rhodius, ea pariter cum Th. Bartholini (c) Bibliotheca conflagnarunt. Itaque cum Veneto hoc codice quidquid ex Forolivienfi adnotaveram, cum diligenter contenderem, etsi loca sane haud ita pauca inveni discrepantia; ea tamen octo quæ superioribus descripsi litteris, usque adeo (si demas septimum, cujus mihi lectio dubia fuit) mirifice vidi in his quidem verbis in quibus ab Almeloveenio dissensi, inter se congruentia, ut cum in postremo, quem non satis accurate exscriptum forte ad te miseram, pro *excitata* perperam in illo codice scriptum sit *excitat*, sic in Veneto quoque sit scriptum; verba autem illa ad tertium locum pertinentia: *omnis autem fere morsus habet quoddam virus*, vetusta quidem, sed non eadem tamen manu, pariter (quod observatione dignum censeo) utroque in codice addita sint.

Sed jam illuc transeo quo properare te, scio,

ad eam videlicet ingentem lacunam libri IV. Quid quæris? Longe ea in Veneto codice major est. Nam inter illa: *Si maligna purgatio est, subsicienda sunt*, atque hæc: *coeuntia*. Id faciunt &c. quæ nimirum verba tot Editiones conjungere, albæ grandes paginae relictæ sunt quatuor cum dimidio. Et ne quis casu intermissas putet; hic quoque in margine eadem quæ cætera, manu scriptum est: *Desunt in vetustissimo exemplari duo folia*; Indicis autem huic libro præpositi quæ pars lacunæ respondet, ac iis quæ proxime antecedunt, & consequuntur, ita nimirum se habet.

CII. Vola (legendum Vulva, vel Volva) exulcerata est.

CIII. De Vesica,

CIIII. De Calculis in vesica,

CV. In omni dolore vesicæ.

Vides, mi Vulpi, in iis quæ præcipua hic sunt, ut mirum in modum utrumque conveniat exemplar.

Restat locus ille de humeri, & scapularum ossibus. Sic autem inveni scriptum: *parvo excessu vertici latis scapularum ossibus inseritur: ac majore parte extranatu nervis deligatur*. Non est meæ fidei quidquam, tecum præsertim, dissimulare: quin etiam Perhumanum ac Eruditum Virum, amplissimæ eorum Clericorum Bibliothecæ Præfectum, qui mihi hæc omnia inspicienti describentique officiosissime aderat, rogavi, ut id recognoscere mecum vellet quod protinus subjiciam. Scilicet inter *vertici*, & *latis* subobscurum quoddam (qualia in eo exemplari alibi quoque deprehenduntur) veteris lituræ vestigium est, quasi litterula fuisset erasa; eo tamen illud in loco est, ut littera *l* fuisse omnino non possit, sed brevior quæ-

(a) Vid. Catalog. Auct. ad Rhodii Scribonium. (b) Ibid. & in Notis ad Compos. 20. Scriban.  
(c) Vid. Dissert. Th. Bartholini de Bibliotheca Incendio.



quædam instar litteræ s, ut mihi, verticis in hoc etiam codice scriptum facile fuisse; verticillatis certe non fuisse videatur.

Venio nunc ad eas de quibus initio dixi, Animadversiones, quæ quidem a Viro Doctissimo scriptæ sunt cum ut aliquot Celsi loca illustrentur, tum vero maxime ut dictiones aliquæ expendantur, quas optimi latinitatis Magistri tanquam certas Cello tribuunt, ejusque auctoritate in linguam latinam inducunt. Has quoniam ante quatuor hos menses mihi perlegerat, cum Foroliviensi, & Veneto codice plerasque contuli, quot videlicet memoria comprehenderam, collaturus omnes, si quod nuper, atque adeo modo venit in mentem, id principio venisset, ut earum omnium exemplum ab Humanissimo Viro peterem, quod tecum in eorum commodum qui sive Cornelli nostri, sive linguæ latinæ sunt studiosi, communicarem. Eas huc fideliter adscribam, & fere singulis quæ mihi adnotata sint in Codicibus, probatisve Editionibus, aut Enarratoribus, subjiciam.

I. Lib. 1. Præfat. pag. 7. l. 11. Eorum posituram, colorem, figuram, magnitudinem, ordinem, duritiem, molliem, lævorem, contractum. Loquitur hic Celsus de partibus corporis humani: nec video, quem locum habeat Contractus, quæ vox, si Latina est, fracturam significat. Quinque editiones longe optimæ, quæ apud me sunt, Florentina princeps 1478. utraque Aldina 1528. & 1547. Gryphiana 1542. & Henrici Stephani 1567. habent contractum, quæ vox certissima Latinitatis est, & sensum reddit idoneum. Non dubito, quin Almeloveenius, præstanti judicio vir, probatis codicibus usus sit: sed hic aliquis diligentiam saltem illam desiderabit, quæ variantes lectiones complectitur, & ceteroquin Transalpinis ingeniis familiarissima est. Hanc si quis ex nostris damnavit unquam, in quo accusari solemus, ideo damnavit, quod sæpe vertitur circa lævia. Ceterum cum aliquid hujusmodi contra vulgatas editiones in libros inducitur, tum vero non utilis modo, sed prorsus necessaria est; præsertim siquid inducatur ita novum, ut nullo præterea locupletis Auctoris testimonio confirmari possit. Talia enim non ad unum aliquem Scriptorem pertinent, sed ad communem totius linguæ rationem, qua de agitur. Exemplo esse possunt cum aliæ voces, quas deinceps recensabo, tum hæc ipsa Contractus, quæ Celsi auctoritate in egregium Basilii Fabri Thesaurum allata est, & reliquis Latinis fidei non dubiæ adnumerata.

Editiones aliæ quinque, idest Juntæ, Cæsarii, Pantini, Constantini, Ronseii, habent contractum; manifestum enim Operarum errorem puto quod in Juntina legatur contractum. Illud mirum est, Ronseum in libri margine addidisse: Per lævorem, & contractum, asperitatem intelligit, & quod illi est contrarium; quando Constantinus hæc adnotaverat: Contractum (lege Contactum) exponunt asperitatem vel scabritiem. Sed quis unquam ita usurpavit? in manuscripto legitur contractum. Itaque contractum pro aspero & confragoso (quod lævigato opponitur) repono. Hieronymus autem Rubeus in suis ad Celsum Annotationibus, cum hæc ferme ipsa Constantini verba, Auctoris nomine dissimulato, retulisset, istiusmodi emendationem atque interpretationem satis sibi probabilem videri, negavit, hæcque subjunxit: Forte autem quia quod contractum est, explicato & ob id lævi opponitur, per contractum poterit asperum intelligi. Videtur igitur maluisse contractum, quam quidem vocem in Veneto etiam codice invenimus. Hæc tamen eo dumtaxat protulimus, ut tu, mi Vulpi, intelligeres, Constantinum non veterum exemplarium auctoritate, sed conjectura ductum, ex contractum illam qua de agitur, vocem eliciuisse, & huc primum induxisse, contractum.

II. Lib. 1. c. 3. sect. 2. pag. 28. l. 15. Somnus plenus, & non multum nimis longus. Celsi ipsius ἀνρόρρεος producat oportet, qui velit nobis persuadere, hoc genus constructionis latinum esse. Quin-

que Editiones modo allatæ ita habent: Somnus & plenus, & non nimis longus.

Idemque omnino habent aliæ præterea quinque Editiones quas supra memoravimus.

III. Ibidem sect. 7. pag. 31. l. 30. Humidant autem corpus labor &c. Hic quoque in quinque Editionibus meis aliter legitur: Humidant autem corpus efficit labor, &c. Miror autem, ex quo codice verbum hoc Humido exierit, & non modo in Celsum, sed & in Basil. Fabri Thesaurum irrepsit ad augendum latinum sermonem. Ego vel inter barbara, vel inter dubia referendum crediderim.

In hoc etiam loco nostræ Editiones nihil discrepant a quinque illis quæ in Animadversione indicantur.

IV. Lib. 3. c. 21. pag. 163. l. 34. Utilis quotidianus, aut altero quoque die post cibum vomitus est. Quinque Editiones meæ habent: Alterno quoque die. Itaque Petrus Danetius in suum Lexicon ad Usum Delphini novam hanc vocis Alternus Constructionem inducit. Sed latino ingenio satis apparet legendum altero, undecumque tandem Almeloveenius acceperit.

Ne hic quidem nostræ discrepant Editiones. Constantinus tamen, atque Ronseus in libri ora adscripserant, altero. Idque receptum est a Lindenio, cujus nimirum Editionem cum plerisque aliis in locis, tum in iis certe omnibus qui hinc Animadversionibus XV. expenduntur, fideliter expressit Almeloveenius.

V. Eodem lib. 3. c. ult. sect. 2. pag. 180. l. 1. In lectulo leniter satis diu corpus perfricandum est; deinde retento spiritu in ipsa exercitatione potius superiores partes movendæ. In omnibus libris duo hæc membra ita dividuntur, sed vereor, ut satis recte: nam spiritus retentio non videtur locum habere in ea exercitatione, qua superiores partes moventur, cujusmodi est pilæ ludus, & similia, ut colligitur ex hoc eodem Celsi capite sect. 3. Pila, similibusque superiores partes dimovendæ. & ex lib. 1. cap. 6. Opus est pila, similibusque superiores partes exercere. Igitur aliter dividendum puto, & ita legendum: In lectulo leniter satis diu corpus perfricandum est, deinde retento spiritu: in ipsa exercitatione potius superiores partes movendæ. Id est lenis fricatio satis diu adhibenda est, deinde vehementior per spiritus retentionem, qua uti athletas consuevisse, cum fricationibus intercepto spiritu obnitebantur, scribit Plutarchus de tuend. Valet. Hujus fricationis meminit etiam Cælius Aurelianus de tard. pass. l. 3. c. 1. In lenimento vero si passio tardaverit, erit adhibenda resumptio gestatione, vocis exercitio, deambulatione, unctione, fricatione corporis retento spiritu. Etiam verba In ipsa laborant mendi suspitione; nam in omnibus editionibus meis est Ab ipsa; quod genus constructionis aliquanto rarius est, sed tamen latinum. Sic Cicero in Bruto c. 16. Græcus ab omni laude felicior. Idem ibid. c. 43. A Philosophia, a Jure Civili, ab Historia instructior. Avienus fab. 31. Ausus ab exiguo fallere dente bovem. Sensus igitur est; per exercitationem, seu in ipsa exercitatione curandum esse, ut superiores potius partes, quam inferiores agitentur. Porro autem superiores partes, quæ pila exercentur, sunt cervix & brachia. Hinc Athenæus δειπν. l. 1. c. 12. in hoc ludo maxime commendat τὸ κατὰ τὰς τραχηλίσμους ῥωμαίων, id est robur cervicis, quod acquiritur per multiplicem ejus flexionem.

In verbis Celsi supra allatis ex sect. 3. hujus capituli, in quo hætenus versati sumus, animadvertendum est verbum Dimoveo pro simplici moveo, agito, exerceo: neque enim similia exempla facile occurrunt.

Foroliviensis codex proposita verba sic dividit: perfricandum est; deinde retento spiritu ab ipsa exercitatione &c. Venetus autem sic: perfricandum est: deinde retento spiritu ab ipsa exercitatione &c. Illum Juntæ Editio repræsentat; hunc, Pantini. Sed quas Cæsarius, Constantinus, ac Ronseus procurarunt, eæ vero sic habent: perfricandum est; deinde retento spiritu, ab ipsa exercitatione &c; quod



quod nisi casu atque incuria factum est; dubium iis Viris fuisse, ostendit, ad perfricationem, ane ad exercitationem illa esset retentio spiritus referenda. Quamvis enim Cælius Aurelianus in libro etiam 4. *Chronion*, c. 7. *fricationem cum retentione spiritus* imperet, imo noster quoque Celsus, etiam in hoc ipso libro 3. c. 21. ( pag. 162. lin. 14. ) *superiores maxime partes sic*, ajat, esse *perfricandas*, ut *- spiritum æger ipse contineat*, in proximo autem capite 22. ( p. 172. l. 1. ) *ipsum se, suppresso spiritu perfricare*, jubeat; tamen & idem Cælius lib. 3. c. 2. non modo *unctionem ac defricationem*, sed & *eos motus imperat*, qui *magis humeros valeant exercere*, retento spiritu, & idem Celsus lib. 4. c. 2. sect. 3. ( p. 190. l. 24. ) *exerceri*, jubet, retento spiritu, capite autem 4. ( p. 201. l. 8. ) *spiritu retento currere*. Quid ergo est? Mihi quidem totum hunc locum, & quæ consequuntur, perpendenti, vel ipso ( ut cætera prætermittam ) aurium judicio multo magis placet ita dividere, uti in Animadversione propositum est.

Voces autem illas, *ab ipsa*, non modo in Codicibus, ut ostensum est, verum etiam in meis omnibus Editionibus inveni. Ronseus quidem in margine admonuit, esse oblitterandas, secutus, opinor, Constantinum, qui tamen id dumtaxat de præpositione *ab* monuisse videri potest. Sed, in ipsa, nemo; quod sciam; aut scripsit, aut scribendum esse, docuit ante Lindenium.

Cæterum quo rariora apud alios idoneos Scriptores exempla occurrunt verbi *dimoveo* pro simplici *moveo*, *agito*, *exerceo* usurpati, eo crebriora apud Celsum videor invenisse. Nunc tria quæ succurrunt, adscribam; tu alia perquires. Lib. 1. c. 6. ( pag. 37. lin. 20. ) *neque ambulatione quamvis leni dimoveri*. Lib. 2. c. 14. ( p. 90. l. 11. ) *manus dimovendæ sint*. Lib. 4. c. 7. ( p. 212. l. 8. ) *ægrum intra domum tantum dimovere*.

VI. Lib. 4. c. 16. pag. 226. l. 15. Quidquid assumptum est, inconfectum protinus reddunt. *Animadversione digna est vox Inconfectus*, quæ elegantem hoc loco significationem habet; sed tamen non debuit in Juncherianum Latinitatis Theatrum cum certis referri; nam nec alibi occurrit, & hic Editiones meæ magno consensu habent Imperfectum. Quæ quidem lectio non admodum mihi probatur; attamen est hujusmodi, ut indubitata postulantis negotium exhibere debeat.

Meæ quoque omnes Editiones habent, imperfectum. Quod in Codicibus etiam vidi; non inconfectum.

VII. Lib. 7. c. 7. sect. 1. pag. 422. l. 1. Superinungi collyrio debet ex iis aliquo, quo lippientes oculi superinunguntur. *Ad verbum Superungo in Theatro Juncheriano, & Fabri Thesauri affertur locus hic*. Revera codices variant; & siquidem Scribonius Largus compos. 29. scripsit *superinactum*, non est temere huic verbo auferenda Romana Civitas. Tutius tamen adhibetur *superinungo*, quod hic habent meliores libri, quod repetitur a Celso l. 6. c. 6. sect. 1. quod usurpat etiam Largus compos. 27. Non est prætereundum, verba hæc Celsi, quæ duo membra complectuntur, in Theatro Juncheriano partim ad Celsum, partim ad Largum referri, ut verbum *Superungo* bina auctoritate nitatur. Sed vix credibile est, quam multa in lexicis excudendis peccentur ab Operis.

Editiones omnes meæ & *superungo*, & *superinungo* exhibent in hoc uno loco. Sic enim proponunt: *superungi collyrio debet ex iis aliquo, quo lippientes oculi superinunguntur*. Juntina tamen, quam utraque Manutiorum imitata est, sic habet, *super ungi - - super inunguntur*. Codices quos in altero forte loco inspexi, quem Animadversio quoque memorat ( l. 6. c. 6. sect. 1. ) in eo quidem congruunt quod ambas voces in unum jungunt; sed hoc tamen discrepant quod Foroliviensis habet, *superinungi*; Venetus, *superungi*. Pariter apud Largum, ut non modo Compos. 27. lego *superinunguntur*; sed etiam Comp. 26. *superinungere*; sic Comp. 29. in quatuor meis Editionibus, &

his quidem Cratandri A. 1529; Manutiorum A. 1547; Stephani A. 1567; Rhodii A. 1655. constanter lego, *superunctum*.

VIII. Eod. lib. 7. c. 7. sect. 8. pag. 428. l. 1. Sub ipsis pilorum radicibus angulo immittenda est, ut ea tertiam partem palpebræ transvehat. Non puto, vocem hanc ultimam retineri posse, quamvis etiam in Fabri Thesaurum postrema editione recepta fuerit. In Gryphiana, & aliis quibusdam legitur transuat, quod consonum est verbis paulo post sequentibus: Quidam ajunt, acu transui juxta pilos exteriorem partem palpebræ oportere. *Acus autem, & quodlibet instrumentum acui simile transuere dicitur, quoties perforat, tametsi filo careat*. Siquis pro transvehat pugnare velit; is ostendere debet, verbum hoc neutrorum more usurpari posse. In eodem Fabri Thesauri habetur & *Traveho*, quod firmatur Varronis auctoritate tanquam certa ex lib. 2. R. R. c. 7. *Flumen travehundum est*. Verum in Editione Veneta principe, & in Aldina leg. *Trajiendum*.

In Foroliviensi codice legimus, *transvehat*; in Veneto, *transueat*. Illius scripturam habent Editiones Juntæ, Cæsarii, Stephani; hujus ambæ Manutiorum. Pantinus tamen, Constantinus, Ronseus ediderunt, *transuat*; hic etiam, in margine adscripsit, *transfat*.

IX. Eod. lib. 7. c. 9. pag. 440. l. 8. Quod et si in levi mutilatione &c. Per hunc unum Celsi locum vox mutilatio inter latinas obrepit, & in Juncheri Fabrique Thesauri sine ulla controversia sedem posuit. At mihi dubia erit, donec certiore auctoritate firmetur. Hic enim quinque Editiones meæ habent: Quod in levi mutatione &c.

Idem habent quinque aliæ meæ; quanquam Constantinus, atque Ronseus in libri ora scripserunt, *mutilatione*. Quam ego vocem in neutro codice inveni; sed in utroque, *mutatione*.

X. Eod. lib. 7. c. 12. sect. 2. pag. 445. l. 14. *Αντιάδες* autem a Græcis appellantur. Græci dicunt *Αντιάδες* ( vel *παρίσθμια*, ut est apud Pollucem lib. 2. c. 4. sect. 201. ) *faucium tumores post hypoglottida utrinque prominentes*, ab *ἀντιάζω*, *adversus sum*, quod hic morbus rebus glutientis adversetur, vel ut docent Grammatici, *ἀπὸ τῆς φαίνοσθαι ἀντίας ἀλλήλαις κατὰ τὴν διάνοιν τῆς σόματος*, quod appareant invicem oppositæ aperto ore. Basilii Fabri Thesaurus recepit hanc vocem inter latinas, fortasse quod in Florentina Celsi Editione 1478. latinis literis scripta sit. Verum Typographus ille Græcis typis carebat, ideoque non hanc solum, sed omnes Græcas voces latinis formis expressit. Affertur etiam in eo lexico lex 14. tit. 1. lib. 21. Digest. Sed ibi quoque optimæ Editiones, imo omnes, quas ego vidi, habent *ἀντιάδες* per Græcas litteras.

Idem dicendum de voce *Rhizagra*, quæ in superiore hujus capituli sectione græce scribitur, sed in Fabri Thesauri latinam formam induit. Est autem *ρίζα* *forceps* ad evellendas dentium radices a *ρίζα* *radix*, & *ἄρρα* *captura*. Cælius Aurelianus *dentiducum* appellat de tard. pass. cap. 4. prope finem. Quidam codices pro *ρίζα*, habent *ρίζα*.

Eadem, opinor, causa, quæ Nicolaum in Ed. Florentina, coegit Juntam in Veneta A. 1524. edere, *antidyades*, idque non sine manifesto errore, & *rizan*, Cæsarius tamen, Pantinus, Constantinus, Ronseus cum primam illam vocem græcis litteris proposuissent, hanc latinis scribere, *rhizan*, quanquam duo postremi in margine græcis litteris addiderunt, *ρίζα*.

XI. Eod. lib. 7. cap. 27. pag. 486. l. 6. Idemque humor clystere intus adigetur. Hic & Auctor Thesauri linguæ latinæ, & Petrus Danctius cum legissent adjicietur, quemadmodum sæpe habent quinque Editiones meæ, retulere inter latinas construtiones Adjicere intus: qui quidem modus indiget certiore auctoritate. Fortasse confirmari potest ex Columel. de Arbor. c. 24. *Truncum findito*, & in fissuram cuneum pineæ tedæ adjicito. Verum cum eandem sententiam iisdem pene verbis expressam repetat Columella l. 5. c. 10. *moneta*, Aldinos & Gry-



& Gryphianos Codices in hoc secundo loco habere adigito; quod placuit & Commelino. Attamen in Veneta principe 1472. utrobique legitur adjicito.

In Junta, Cæsarii, & Pantini Editionibus est; adjicietur. Idemque est in ea quam procuravit Ronseus, qui tamen in margine appoluit, injicietur. Hoc ante ipsum fecerat Constantinus, qui edidit, adjiciatur.

XII. Lib. 8. c. 1. pag. 504. l. 24. Verticillati scapularum ossi inseritur. Veneta princeps, & utraque Aldina habent: Verticillatis scapularum ossibus inseritur. Gryphiana, & Henrici Stephani Verticulatis, alia Vertibulatis. Quam varietatem idcirco significandam existimo, quia Verticillatus affertur tanquam vox certæ fidei in Lexico ad Usum Delphi. & in Juncheriano Latinitatis Theatro. Hanc ego cum ferre non possem, nec tamen rationem ejus ablegandæ satis idoneam invenirem, adfuit opportune Jo Baptistæ Morgagnus, Vir cum in Anatomicis, tum in omnibus litterarum studiis præstantissimus, mihiq; omnem sollicitudinem exemnit, morbo detecto, remedioque adhibito, de quo Vid. ejus II. in Celsum Epistolam.

XIII. Eodem lib. 8. c. 3. In capite hoc describitur Terebra illa, quæ Abaprista Terebella dicitur ab Interprete Galeni. Hinc deceptus Auctor Calepini Passeratiani, & eo duce Andreas Stubeilius, vir ceteroquin mirifice industrius, & de postrema Thesauri Fabri Editione meritis optime, duas has voces Abapristus, & Terebella interlatinas receperunt. Uterque autem affert Celsum lib. 3. c. 23. ubi hac de re prorsus nihil.

Ad hanc quidem XIII. Animadversionem non est quod addam. Sed ex superiore erat quod demerem, si aliis hæc missurus fuisset quam tibi, qui ut eodem es animo adversum me, ita quod Vir Doctissimus, Amicissimusque de me, benevolentia, opinor, deceptus, scripsit, non difficile approbabis. Equidem etsi talem esse me, valde cuperem, qualem vos creditis; æque tamen gratum est usque adeo a vobis amari, ut is vobis esse videar. Sed ad rem ipsam redeamus.

XIV. Eodem lib. 8. c. 4. pag. 520. l. 3. Collocandusque is loco intepido. Si ita legendum esset, novam vocem Intepidus in latinis numerare oporteret, & quidem numeratur in Thesaurio Fabri 1717. At Gryphii, & Stephani Editio præpositionem in separat a tepido. Et sane non video, quomodo qui calvaria fractura laborat, collocandus sit in loco non tepido, cum tepor fracturis omnibus, maxime vero iis, quæ caput lædunt, saluberrimus sit. Qua de re legendus hic noster hoc eodem libro cap. 10. sect. 7. & Hippocrates aphor. 17. & 18. sect. 5. Non est igitur tanta vis inferenda simul Medicinæ, simul latinæ linguæ, sed reponendum cum Gryphio, collocandusque is loco in tepido; vel cum Stephano, collocandusque is in loco tepido.

Gryphio adde Cæsarium, Pantinum, Ronseum, Paawium, qui ad eundem modum ediderunt; Stephano autem Constantinum. Non me fugit, in Junta, & Manutiorum utraque Editione legi, intepido. Sed non ratio modo, atque experientia, verum etiam Codices ambo adversantur. Nam Forolivienfis habet, is loco in tepido; Venetus autem, loco is in tepido.

XV. Eod. lib. 8. c. 7. pag. 526. l. 2. Intra quod quæque ossa confervent. Verbum Conferveo quod alioqui latinum est, & usurpatur a Palladio de re rust. lib. 1. tit. 35. apud Celsum tamen non ita bene habitat, ut oppugnantibus careat. Hic enim quinque Editiones meæ habent conferuntur. Rursus repetitur eodem libro c. 10. sect. 1. Quo os quodque confervet. Et sect. 7. Inter se ossa confervere. Sed hoc secundo loco alii legunt cohærere, alii

coalescere, ut ipse quoque Almeloveenius monet; in priore autem reliquæ Editiones meæ habent confervet, non sine aliqua ceterorum verborum varietate. Ego quidem malo confervet, idque omnino retineo; sed tamen locus non vacat turbis. Basili. Faber in suo Thesaurio cum posuisset verbum Conferveo tanquam certum, verbis item certis confirmare conatus est ex eodem cap. ductis Confervent ossa mota aut soluta: quæ quidem ipsissima in Celso non sunt; attamen apparet ex illis conflata esse, si quando vero ossa non conferbuerunt, quia sæpe soluta, sæpe mota sunt. Verum præteritum conferbui, & similia non magnam tribuunt auctoritatem ceteris temporibus eorum verborum, ex quibus oriuntur, cum fere sola in usu sint, ut inchoativis inserviant, cujusmodi est Confervesco, & alia idgenus.

Cum quatuor Celsi loca in Animadversione proponantur; accipe quemadmodum pleraque in Codicibus, omnia autem in meis Editionibusprehenderim. In primo uterque Codex pro confervent habet conservantur; Editiones meæ omnes conferuntur, nisi quod Constantinus in libri ora hæc apponit: συμφορται, confervent l. 2. c. 10. ubi legendum l. 8. Alter autem locus in Codicibus ita scriptus est: quod quoque os confervet. In Junta, & ambabus Manutiorum Editionibus ad eundem proponitur modum. Nec cæteræ discrepant, nisi quod ante quoque habent os, & Constantinus hæc in margine adnotat: quo os quoque confervet; ubi legendum est; confervet (ut & cap. 10. Si ossa non conferbuerint) pro quo dixit c. 7. ossa conferuntur, i. quasi ferrumine conglutinata coalescunt. Porro tertius locus, quem in Codicibus inspicere oblitus sum, ab Junta quidem, a Manutiis semel atque iterum, ab Stephano ipso sic editus est, ut habeat, conservere; Cæsarius autem, ac Pantinus scripserant, cohærere, quod a Ronseo quoque, & Constantino factum est. Sed cum Cæsarius ad oram adjecerit, coalescere, Ronseus etiam, conservere; Constantinus (id quod maxime est animadvertendum) sic adjecit; conservere, Cod; significans nimirum, se id in Codice aliquo comperisse. Locus denique ultimus non modo in cunctis Editionibus meis habet, conferbuerunt, verum etiam in Codice Forolivienfi; nam in Veneto scriptum est, conservere, in margine autem sic omnino: aliter, confrebruerunt. Quem quidem ad locum nomen posses addere spongiæ illius, ut Plinius ait, aquarum dulcium, quam Conservam appellabant Latini, propterea quia fractis ossibus conferruminandis utilissimam experiebantur, ut idem Plinius conscripsit lib. 27. c. 8. nisi quæ de verbo Confervesco in Animadversione admonita sunt, utriusque vocis originem dubiam redderent.

Habes sedulitatis meæ specimen, quale id cunque est; in hisce levibus, & ex tempore fufis Aditamentis. Sed in XV. Animadversionibus specimen habes summæ peritiæ, atque solertiæ quam multo plures ejusdemmodi Animadversiones ad singulos fere Latinos Scriptores Vir Cl. confecit. Quo instituto ut nihil utilius est ad barbaras a latinis vocibus, dubias a certis distinguendas; ita ipsum hortari, orare, flagitare par est, ut Animadversiones illas universas quamprimum edat: quod etsi cum modestiam ejus, & occupationes plurimas specto, haud ita facile existimo; attamen cum vicissim incredibile juvandi studium attendo quo incensus & præclaras omnes Artes, & Latinam linguam, qua illæ ferme continentur, si quis alius, hæc ætate exornavit, tum vero facilissimum puto. Vale.

Patavii Prid. Nonas Decembr. MDCCXXI.



## E P I S T O L A Q U A R T A.

Jo. Bapt. Morgagnus Jo. Bapt. Vulpio S. P. D.

**Q**UOD Horatius (a) patrono suo,  
*Spektatum satis, & donatum jam rude, quaris;*  
*Mæcenas, iterum antiquo me includere ludo.*  
*Non eadem est ætas, non mens;*

idem si Amico dicerem tibi, undetrigesimo post anno iterum a me flagitanti, ut super Cornelio Celso, & Sereno Samonico aliquid scribam; ignoscere, mi Vulpi, huic ætati, hisque occupationibus deberes meis. Nam quæ olim fudi, si forte laudata sunt, ut ais, ab laudatissimis Viris, si alibi recusa, si aliis addita illorum Auctorum editionibus; nempe gratia habenda est eorum qui fecerunt, humanitati; mihi autem satis esse oportet, in alienis magna ex parte studiis periculo facto; rem quondam non prorsus infelicitè cessisse. Hæc igitur quæ commemorasti, me tardant; non movent. Illud movet potius quod adjecisti, si scribere nolim adsciscendæ laudis causa; at causa scribam injustæ cujusdā & tuæ, & meæ reprehensionis depellendæ. Extitisse enim quosdam eruditissimos quidem illos, sed in re unā apertissima clarissimaque adeo caligantes Viros, ut reos nos faciant alienæ culpæ, & quæcunque in Celso; & Samonico edendis, Almelveenius, & Constantinus peccarunt, aut peccasse illis videntur, eorum omnium rationem a nobis repetant: quali vero aut tu in libri fronte quorum editionem repræsentares, siluisses, sed cura, & studio tuo de integro concinnatam promisisses, aut ego hoc forte pollicitus essem, vel potius recepissem. E quidem, quod ad Celsum attinet; nam de Samonico necdum vidi; memini ipse, magna, ut in re minime expectanda, admiratione obstupefactum, duobus & viginti ab hinc annis in Exercitatione quadam Schulzii (b) hæc legere: *adscribam singula loca, ut se in Celsi editionibus recentissimis, cura Almelveenii, Wedelii, & Morgagni in lucem publicam datis ea offerunt.* Narrabo tibi: somnare primum mihi videbar, minime intelligens, quæ posset a Viro docto id mihi tribui, quod omnes scirent non esse meum. Mox autem cum ita tribui, animadverterem, ut prolatis ex superioribus editionibus iisdem locis, non obscure mihi quoque dica scriberetur, quæ Lindenio scribitur, cujus editionem secutus est Almelveenius; enimvero censui, rem tacite non esse ferendam, præsertim cum iis de locis quid mihi esset visum, nusquam aperuissem; imo III. in Celsum Epistola (c) ante Schulzium, id reticentem, ostendissem, quemadmodum in prioribus editionibus, atque adeo in manu scriptis codicibus ii loci legerentur, aliumque Plinii de Conserva, quem locum Schulzius (d) produxit postea, indicare non omissem. Veruntamen cum hæc ante omnium oculos proflarent, nec fugere quendam posset, quid tu in Epistola ad Lectorem tua, quid ipse in I. ad te mea scripsissemus; multo magis Schulzio, quam mihi, cogitandum esse, intellexi, quid in sua illa Exercitatione posuisset, satisque mihi esse duxi oblata forte occasione (e) amice hominem commonefacere. Nunc vero quando tu ais, non defuisse post illum qui rationem Patavinæ editionis a me reposceret, jamque a Celso ad Samonicum quoque, non dissimilem, nostrum accusationem esse traductam; faciam vel tua causa, vel mea quod facile alioquin non eram facturus, & de utroque Auctore ita scribam, ut nemo in posterum dissimulare jam

queat, scire se, quid in nobis possit, & quid non possit jure improbari.

Atque ut a Celso initium ducam; nescio quo adverso Rei Medicæ, & bonis litteris fato acciderit, ut cum tot homines doctissimi, & diligentissimi suos in eum labores contulerint; nemo unus adhuc extiterit a quo ejus editionem numeris omnibus absolutam haberemus. Quid Scaliger, Walæus, Mentelius, Holstius, Vorstius, Dacquetus aggressi essent, minime ignoras, qui singulos, ubi de promissis Celsi editionibus in Prolegomenis verba fiunt, ibi iterum commemorandos curasti: neque te fugit, quid in suis, ibidem reculis, Præfationibus tum Lindenius, tum Almelveenius se præterea habere, significaverint, quod Celso addi posset, sive observationum, sive variantium lectionum, sive Lexici præsertim, adeo ab omnibus desiderati. His vetustiorum Paviacensium accense, qui, ut pauca edidit capita, sic totum Celsum eadem ratione explicatum, locisque plurimis emendatum ab se editum iri, spem fecerat (f), non secus ac Lommius (g) antea, cum librum Celsi primum Commentariis ornasset. Sed, ut Nicolaum Blancardum (h), eique surreptas adnotationes omittam; Rhodium præcæteris addito, & Thomam Bartholinum, quos non sine magno dolore propterea nominamus, quod incendio absumptorum utriusque laborum venit in mentem: qui cujusmodi fuerint, ea satis indicant quæ hic in Dissertatione de Bibliotheca Incendio, ille autem in Præfatione attingit ad Scribonium, & vel magis quæ in calce ejus libri sive in Lexico Scriboniano, quod similis in Celsum desiderium refricat, ad plurimas voces adnotavit, sive in Catalogo commemoravit restitutorum Auctorum (i), unde emendationes Celsi plures colligere is poterit qui jacturam illam tantam nobis reparandam suscipiat. Susceperant autem duo nostra ætate egregii Viri, Jo. Henr. Schulzius, cui, ut ut meritis est de me, doctrinæ, & eruditionis laudem libens tribuo non vulgarem, & ante illum Jo. Jacobus Bajerus, qui edito in eam rem Schediasmate sex potissimum, in ejusmodi editione summo opere optanda, capita, in quibus sibi esset elaborandum, proposuit. Sed utroque e vivis erepto, quis illis in pulcherrimi, & utilissimi, sed ejusdem diuturni, & difficillimi, operis procuratione successerit, adhuc ignoramus.

Quæ cum ita sint; quamquam interea Celsi editione uti poterunt studiosi adolescentes? Num veterum illarum aliqua, ubi semibarbara ipsa litterarum forma, & vocum compendia creent legentibus difficultatem, creberrimi autem sive librorum, sive typographicarum operarum errores tertia propemodum quaque linea obtruserint ea quæ aut intelligi nequeant, aut, si intelligantur, nihil quod ad rem faciat, significant? Atenim in istis ipsis erroribus vestigia nonnunquam restant unde vera conjiciatur scriptura. Fateor: sed a sagacibus, & doctis, & ea in re exercitatis viris; non ab adolescentibus, de quibus est a nobis sermo institutus. His enim si loci occurrant in quibus, exempli causa; ne ab iis quos Schulzius protulit, omnino recedamus; habent priores editiones *os conservet*, aut *ossa cæperunt*; aqua ibi hæreat, necesse est, minime assequentibus, *os conservet*, aut *ossa conserbuerunt* esse legendum. Apparet igitur, fore ipsis longe utiliores editiones illas

(a) l. 1. Epist. 1. (b) de Offib. Conserventib. §. 1. (c) n. XV. (d) §. 22. (e) Epist. Anat. 9. n. 30.  
 (f) Præf. in Comment. ad ea capita. (g) & (h) Vid. Fabric. Bibl. Lat. Supplem. P. 1. l. 2. c. 4.  
 (i) ad vocem C. Celsus.



illas quæ nitide ac perspicue exhibeant verba, ut sunt ab hominibus eruditissimis restituta. Qui certe quo diutius, quo plures, quo majoribus subsidiis instructi in id operam contulerint suam, eo credibilis est, propius ad verum accessisse. Atqui Lindenius præeuntibus tot Viris doctissimis qui longo annorum spatio, alii edendo, alii illustrando, alii emendando, omnes aliquid præstiterant unde Celsi libri meliores fierent, ultimus successit, eorumque omnium usus laboribus, ad hos strenue adjunxit suos. Quæ igitur esse causa poterat, cur tu aliam adolescentibus nostris, quam Almelveenii, editionem dares, qui Lindenianam non modo, ut diximus, secutus est; sed & alia insuper adjecit? Certe idem quod tibi, Germanis quoque consilium fuit, qui semel, atque iterum, præfante Viro Cel. Georgio Wolfango Wedelio, idemque Batavis, qui non solum antea, sed, ut audio, etiam postea quam tu fecisti, Almelveenii exemplar, ut Helvetii quoque, recuderunt.

At Lindenius nimis audax in Celsi refingendo, conjecturas in textum temere intulit, sana & bellissima sæpe veteri scriptura eliminata: sic enim Schulzius (k) temerarias, ut loquitur, Lindenii mutationes exagitat. De quo tandem homine hæc scribuntur? Nempe de illo qui; ut nunc mittam dicere, qua doctrina, diligentia, auctoritate fuerit; certe quot, & quibus in Celsi emendando sive calamo exaratorum, sive typis descriptorum codicum adjumentis usus sit, diserte, & sigillatim exposuit, in quibus nec quæ Walæus paraverat, nec Scaligeri ipsius emendationes, adnotationesque defuere. Quid igitur? si codices illi vetustiores eam quam reposuit, scripturam habuere; num temere conjecturas intrusisse propterea censendus est, quod in sex editionibus quas Schulzius consuluit, aliter legatur? Atenim quæ Constantinus in margine suæ editionis adnotaverat sive scriptis codicibus, sive conjectura ductus, sive declarandi auctoris causa, in textum recepta sunt. Num omnia? an ea quæ codices alii confirmabant? Quod cum dico, non id volo, nunquam Lindenium nimis suis, aut doctorum hominum conjecturis indulgisse; sed hoc volo, nisi codices quibus ille est usus, antea inspiciamus; idem ab eo factum esse in omnibus in quibus nobis forte videatur, locis pronunciari non oportere. Interea autem credere æquum est spectatissimo Viro profitenti, se quædam, sed admodum pauca, idque cum res aperte postularer, ex ingenio tentavisse: in cæteris, ubi sui sibi libri & ingeniosæ summorum virorum conjectura non prælucere (vide, quæso, ut conjecturas cum libris conjungit) nihil mutasse: glossmata offendisse plura; nullum tamen præter unum, ausum esse de medio tollere; quia nullum huc præeuntem habebat librum. Quod si dum Celsum plusquam bis mille locis; sic enim ad Patinum scripsit; corrigeret, in multis; aut, si quis malit, etiam in plurimis libri ipsum, & conjecturæ fefellissent; non erat tamen de audacia & temeritate libere adeo accusandus. Sed quos locos egregie restituerat; bene multos autem, ut alias ad te scripsi, restituit; illi erant grato animo accipiendi: in quibus autem humani aliquid passus videretur; hos vero satis erat sine contumelia indicare. Quod & nos alias fecimus ad te scribentes, & nunc faciemus, & ab aliis fieri cupimus; ut studiosi juvenes interea sciant, ubi minus tum Lindenii, tum Almelveenii editionibus fidendum sit, donec, collata multorum opera, illa tandem existat absolutissima, quam omnes optamus, & quam hilce libenti animo præferemus.

Unum est utique in Lindenio minus probandum, quod fortasse ne ipse quidem erat facturum, nisi parva coegisset, quam omnino voluit, libri forma. Scilicet aut nihil in Celsi contextu Morgagni Opusc.

tandum erat, sed quid, & quomodo mutandum crederet, in ora dumtaxat libri adnotandum: aut saltem, si mutare mallet, in eadem ora, quid antea legeretur, significandum. Quarum tu rationum longe meliorem, id est primam, in Patavina editione, flagitantibus nobis, secutus es, etsi erant forte in nostris Epistolis nonnulla quæ tibi pro tua erga nos benevolentia non indigna viderentur quæ in textum acciperes. Quod tuum, meumque adeo factum, & quidquid præterea in ea editione a te præstitum Lectoribus indicasti, & quæ ego in eas Epistolas conjeci, sicui improbanda existimentur; non dubito autem, quin multa in meis deprehendi possint jure improbanda; æquo animo feremus: nostra enim sunt illa; non editio, quæ sive bona, sive mala est, Almelveenii certe est.

Nunc quando æquis, & iniquis satis esse factum, puto; ut non horum tantummodo causa, sed tua in primis has Litteras aggressum esse scribere, intelligas; meam I. ad te Epistolam in manus sumam, ejusque conservato ordine, primum quidem de Celsi ipso nonnulla, deinde vero de his ejus libris multo plura adjiciam, quæ & tibi satis esse nunc possint, & evidentius ostendere, num is sim qui in Lindenii, aut Almelveenii verba juraverim, an is potius qui antiquos codices seu calamo, seu formis descriptos observem, ubi cum ratione consentiant.

Aurelius, an Aulus Cornelii nostri prænomen fuerit; si veterem, neque ejus temporibus ita ut postea, facile neglectam, attendas Romanorum consuetudinem, duarum gentium nomina in uno homine haud conjungentium, neque ex nomine prænomen facientium; haud difficile videbitur judicare. At si libros fere omnes sive excusos, sive scriptos inspicias; hærebis, cum Aurelium magno consensu habere videris. Nam quod Daniel Clericus (l) affirmat, inveniri in omnibus manu scriptis hunc titulum, A. Cornelii, Celsi, & unam dumtaxat esse editionem, eam, quæ Aldi Manutii, quæ mutet Aurelium in Aulum, hæc nescio quomodo Viro alioquin diligentissimo exciderint, Rhodium ibi præsertim laudanti in Scribon. Larg. Compos. XCIV. & in Celsi Vita. Etsi enim in hac, aliud spectans, Rhodius esse veterum codicum communem hanc inscriptionem, ait, A. Cornelii Celsi, non secus ac modo vel magis in compendium illam contrahens, esse, dixerat, in vulgatis Lugdunensibus omnibus A. C. C., at certe ad Compositionem illam Scribonii diserte hæc scripsit: Celsi libri hætenus Aurelii nomen ubique præferunt: quod initio unica littera A. Prænominis nota signatum, diversa ratione exprimi potuit. Inde quidam ad V. C. Caroli Moroni editionem Aldinam Celsi præfixit Auli appellationem. --- Quis vero ille fuerit, quare id factum auctoritate, incertum est. Aldum Manutium characteris indicio putat multisquis noster Leo Allatius: cui pariter sic emendandum, ut Josepho quoque Scaligero, visum esset. Itaque intelligis, quod Celsi librarii primum scripsissent A. ex hac littera posteriores fecisse Aurelii: nec Manutii editionem a typis, sed ab Aldi manu in illo Moroni exemplo habuisse Auli. Hieronymus tamen Rubeus, qui suas in Celsum Adnotationes absolverat anno 1607., hoc earum initium fecit: Vetus codex Vaticanus manuscriptus inscriptionem libri sexti sic habet. Auli Cornelii Celsi liber sextus, idemque Medicinæ primus. Quod Auli prænomen, eo magis in Cornelio Celso placet, quod Aurelii Romanæ familiæ nomen fuit, Aulus autem Cornelie prænomen: quod sicuti ex Livio in illustribus quibuldam Corneliis ostendit, sic ex Fastis producto L. Cornelio Celso Consule, ne Celsi quidem cognomen in gente Cornelia fuisse inusitatum, commonstrat. Vides igitur, quot, & quales



les auctores habeas, si *Auli* forte prænomen præferas. Nam quod nonnulli, præeunte Viro cæteroquin eruditissimo, legendum putant apud Cassiodorum ( *m* ), non *Cælii Aurelii de medicina*, sed *Celsi Aurelii*; te ibi, credo, cum aliis potius, & nominatim cum Daniele Clerico ( *n* ), *Cælii Aureliani* esse lecturum.

Et si vero ex Romanis gentibus familiæ plures ab Urbe in Colonias migrarunt; ego tamen nihil prohibere, imo pleraque convenire, video, ut Celsum nostrum Romæ potius, quam alibi, & natum esse, & vixisse, opiner. Sic autem loquor propterea quia si alterutrum petas ut ipsius, aut aliorum idoneo testimonio confirmem; non facile possim. At Romanum, id est non externum fuisse, non Plinii solum alias indicata auctoritate, aut geminata M. Fabii ( *o* ) testificatione, sed & Celsi ipsius compluribus locis ostendam, ut ubi ( *p* ) *nostri*, inquit, *anginam vocant; apud Græcos nomen, prout species est*, aut ubi ( *q* ), *nostri scutula operta; ὀμπλάταις Græci nominant*. Idemque confirmant quæ initio posuit cap. 18.

392, 29. l. 6. atque; ut alios alibi omittam; tres loci uno  
456, 11. in capite pariter 18. lib. 7.  
28.

Non eodem autem sæculo scripsisse quo vivebat Asclepiades ( floruit hic ætate Magni Pompeii ( *r* ), & suprema in senectâ obiit ( *s* ) ) illa indicant ex cap. 12. lib. 2.: *quod ab Asclepiade quoque sic vituperatum, ut tamen servatum sit, video plerumque seculo nostro præteriri*. Scripsisse tamen, ut tardissime, ante Claudii imperium, ex iis intelliges quæ alias ( *\** ) de Julio Græcino attigimus, qui Celsum transcripserat, a Cajo autem Cæsare interfectus est. Quot autem scripserit ante Claudium annis, conicere poterunt qui forte sciant, quo anno Gallio pater, sive is ad quem ab L. Seneca fratre liber missus est *de Vita Beata*, sive alius fuerit, sua de eloquentia præcepta emisit; priorem enim *pater Gallione* sua Celsum edidisse, auctor est M. Fabius ( *t* ), aut certe quo anno Medici nobiles Cassius, & Themison, aut quo non mediocres Chirurghi Tryphon pater, & Evelpistus, & Meges, quos omnes Celsus ( *u* ) *nuper* extitisse agebat, e vita migraverint. Quod vero Paavius ( *x* ), aliique, & in his aliqui etiam qui ætate nostra scripserunt, Celsum Neronis quoque temporibus vixisse, non dubitant; ut potuisse, concedam; non tamen, nisi antiquorum auctoritate probatum videam, pro certo affirmabo. Sed quod major, ut est apud Rhodium ( *y* ), *eruditorum pars usque ad Trajani tempora vitam produxisse*, censent; veniam mihi dabunt Viri cæteroquin eruditissimi, qui non plurimis ab hinc annis id sine ulla dubitatione acceperunt, si dixerò, M. Fabium ( *z* ), qui Domitiano imperante, ut ipsi egregie norunt, scribebat, ne inter ætatis quidam suæ Auctores, nedum inter *viventes*, quorum se *parcere*, ait, *nominibus*, Celsum posuisse: ut verear, ne plus æquo dederim, cum Celsum potuisse in vivis esse Neronis temporibus, paulo ante non negavi.

Medicusne fuerit, an non fuerit, adhuc apud aliquos dubium esse, video. Qui, si hoc volunt, non ita exercuisse medicinam, ut qui mercedis causa solent, sed tamen ut in gravioribus casibus ab amicis, & a pauperibus se pateretur adiri, & consuli; Rubeum ( *a* ) secum, & Lindenium ( *b* ) facientes habebunt, atque adeo, velut ego animadverto, Celsum ipsum. Qui si quæstum secutus, huc illuc cursare consuevit, non facile pronuntiasset ( *c* ), *ab uno medico multos non posse curari, eumque, si artifex est, idoneum esse, qui non multum ab agro recedit*. Sed qui quæstui ser-

viunt, quoniam is major ex populo est, libenter amplecti ea præcepta, quæ sedulitatem non exigunt. Hæc si ponant; vix aliquid invenient cur Medicum fuisse, non credant. Quod enim tot alia, & tam varii argumenti ediderit; non inde conficitur, *universæ naturæ*, ut ipsum Columella ( *d* ) vocabat, *prudentem Virum* Medicinam præcæteris non adamasse; de qua profecto accurate adeo scripsit, ut cum cætera ejus opera ætatem non tulerint; hoc unum sagax posteritas conservavit. Quin ex illa multiplici, variaque scriptione visum Rubeo ( *e* ) est, responsionem esse petendam adversus grave alterum eorum argumentum qui Medicum fuisse, inficiantur; permoti videlicet Plinii ( *f* ) auctoritate, qui in Auctoribus non externis etsi Medicos seorsum non ponit; tamen cum Medici nomen adjungat pluribus, Cornelio Celso nunquam adjungit. Scilicet ideo non adjunxisse, Rubeus credidit, quia non de Medicina tantum Celsus scripsisset. Quod ut non contemno, sic illud potissimum addendum censeo, fortassis non tam Plinium spectasse quod quisque scripsisset, quam quod, & quatenus exercuisset. Sic igitur cum ( *g* ) Opilium, exempli causa, & Granium, & Cæcilium *Medicos* dixit, Celsum autem, iisdem locis nominatum, non magis dixit, quam Catonem Censorium; non ideo fecerit quod hi rogati de medicina non responderent, sed quod eam non, ut illi, vulgo exercerent qui propterea apud omnes Medici erant appellationem consecuti. Sed neque hanc Plinius unquam addit iis quos sæpe adeo simul nominat ( *h* ), Sextio Nigro, & Julio Basso, quos tamen Auctores inter asseclas Asclepiadis memorat Daniel Clericus ( *i* ), qui nihil, quantum memini, habet de aliis illis tribus Medicis Scriptoribus Opilio, Granio, & Cæcilio. Quod sive Plinius fecit, quia Niger, & Bassus non magis quam Celsus, essent in medendo occupati; rationem veram invenerimus, cur Celsum non appellaverit Medicum; sive casu & incuria quadam fecit; non est igitur, cur ex simili ejus silentio Celsum non fuisse Medicum, inferatur.

Quamquam silentium Plinii obstare non potest, cum Celsus quis ipse fuerit, per se loquatur. Diu est cum gravissimi Viri, & in his Rubeus ( *k* ), animadverterunt, inter discrepantes illustrum Medicorum sententias suam, nisi Medicum, non potuisse interponere, qui non doctrina modo, sed usu & observatione excelleret. In eamque rem quosdam Celsi locos produxit Rubeus, quorum aliquo usus est etiam Casaubonus in Scholiis quæ alias laudavimus. Tunc quoque alios addimus: quorum primum quoniam occupaverat Clericus ( *l* ), cujus Historia non erat in manibus, cum scriberemus; idcirco pro uno apponemus plures. ( *m* ) *Itaque istud ( de vomitu loquitur ) luxuriæ causa fieri non oportere, confiteor: interdum valetudinis causa recte fieri, experimentis credo. Commoneo tamen, ne quis, qui valere & senescere velit, hoc quotidianum habeat*. ( *n* ) *Neque ignoro, quosdam dicere, omne auxilium necessarium esse incrementibus morbis, non cum jam per se finiuntur. Quod non ita se habet. Potest enim &c.* Sic etiam in aliis controversiis, ubi dissidentes cæterorum consuetudines proposuerat, hæc subjecit: ( *o* ) *Ego tum hoc puto tentandum, cum parum cibis, semel & post febrem datus, prodest*.

( *p* ) *Tutius tamen est &c.* ( *q* ) *Quid igitur est? Multa in præcipiti periculo recte fiunt, alias omittenda*. ( *r* ) *Sed id suppressere sanguinem potest; ulcera ipsa sanare non potest. Melius huic rei licium est*. ( *s* ) *Ego experimentis quemque in se credere debere existimo, calida potius, an frigida*  
uta-

( *m* ) *Divin. Lect. c. 31.* ( *n* ) *l. cit. S. 1. c. 5.* ( *o* ) *Instit. Orat. l. 3. c. 1. & l. 10. c. 1.*  
( *p* ) *l. 4. c. 4. p. 196, 6.* ( *q* ) *l. 8. c. 1. p. 503, 24.* ( *r* ) *Vid. Plin. Nat. Hist. l. 26. c. 3.* ( *s* ) *Ibid. l. 7. c. 37.*  
( *\** ) *Epist. 1.* ( *t* ) *cit. c. 1. l. 3.* ( *u* ) *Præf. p. 18. 23. & p. 4. 2. & l. 3. c. 4. p. 119, 18. & l. 7. Præf. p. 406, 7.*  
( *x* ) *ante cit. Comment. initium.* ( *y* ) *in Celsi Vita. ( 2 ) loc. cit.* ( *a* ) *loc. indic.* ( *b* ) *Epist. ad Patin.*  
( *c* ) *l. 3. c. 4. p. 120, 21.* ( *d* ) *de Re Rust. lib. 2. cap. 2.* ( *e* ) *loc. cit.* ( *f* ) *Hist. cit. l. 1.*  
( *g* ) *Ibid. ad l. 28. & 29.* ( *h* ) *Ibid. ad l. 20. & seqq.* ( *i* ) *Hist. cit. P. 2. l. 3. c. 11.* ( *k* ) *loc. cit.*  
( *l* ) *P. 2. l. 4. f. 2. c. 4.* ( *m* ) *l. 1. c. 3. p. 30, 9.* ( *n* ) *l. 2. c. 14. p. 89, 6.* ( *o* ) *l. 3. c. 11. p. 140, 23.*  
( *p* ) *Ibid. c. 14. p. 144, 4.* ( *q* ) *Ibid. c. 18. p. 150, 12.* ( *r* ) *l. 4. c. 4. p. 200, 10.* ( *s* ) *Ibid. c. 19. p. 230, 15.*



utatur. ( t ) Sed nihil melius est, quam &c. Quis sanus hæc, atque alia istiusmodi pronuntiaret, quem lecturi scirent usu & observatione non pol- lere? Certe Medici quoque hæc sunt: ( u ) Alvi lumbricos interdum latos, qui peiores sunt; inter- dum teretes videmus. ( x ) Et plerique quidem eorum, quibus, ut loqui possint, linguæ frænum incisum est, ubi consanuerunt, loquuntur. Ego autem cognovi, qui, succisa lingua, cum abunde super dentes eam promeret, non tamen loquendi fa- cultatem consecutus est. ( y ) Si cutis integra est, & os læsum esse, ex dolore colligimus, &c. & ( z ) majore cura in calvaria perterebranda agendum est, --- ut quandocunque os perrumpitur, sentiamus. Quis enim sentiamus, & colligimus, & alia ejusdemmodi, nisi Medicus, diceret? aut quis alius an lingua satis succisa esset, ex facili, sed certo, indicio cognovisset? aut latos inter- dum videre consueffet vermes, quos non pauci Medici, etiam valde exercitati, nunquam vide- runt?

Hæc, atque alia de eodem genere ( ut rerum aptissimum ordinem ( a ), & sibi ubique consen- taneum scriptorem omittam ) non illi, opinor, attenderunt qui nihil esse hos Celsi libros existi- mant, nisi præcepta ex Græcis Medicis collecta, & ab ipso, ut loquuntur, consarcinata, decepti fortasse una vocula, qua nonnunquam usus est, ut cum propositurus non omnes, quas posset, Compositiones, ( b ) contentus his ero, inquit, quas accepi velut nobilissimas, & alibi ( c ), ubi de obscurarum partium vitiis scripturus, ut om- nia, quæ salutaria accepi, comprehenderem; qua- si vero accipere nunquam id quod capere, id est etiam eligere, significare posset, aut qui suum inter varias aliorum sententias interponere judi- cium soleret, nihil quidquam ab aliis deberet ac- cipere! Quanto aliter egregii medendi Magistri de Celso judicarunt! quorum plures in ejus Vita nominavit Rhodius, initio ducto a Minadoo, qui Celsum, dedita opera, ab aliis prætermissa profer- re ac illustrare voluisse, censuit. Ad illos omnes, alios adde, in his Paawium ( d ), qui præstan- tem Medicum fuisse, Anatomicum, & Chirur- gum, hos ejus libros testari abunde, confirmat; Hilda- num ( e ) autem in primis, qui ex ipsis Celsi accuratis, & perspicuis descriptionibus satis ap- parere, non dubitat, vel eam quæ manu auxilia- tur, medicinam exercuisse; fieri enim non posse, ut tam difficilia ad describendum non ante per- fecerit qui sic describeret. Mihi vero etli Cel- sum Chirurgorum operibus attente interfuisse, & credibilis videatur, & satis sit; ex isto tamen Hildani judicio mirari subit quandam aliorum de his Celsi libris opinionem, ab ea quidem quam modo rejeci, longe diversam, sed non minus a veri similitudine abhorrentem. Cum enim ex iis quæ supra indicata sunt, plane perspexissent, non exscriptoris, sed Medici eximii hæc esse volumi- na; eo animum induxerunt ut dicerent, græce ab aliquo conscripta, latine a Celso fuisse reddi- ta, minime animadvertentes, res difficillimas ex- plicatu non nisi ab egregio doctrinæ ejusdem ma- gistro, tam proprie ubique, tamque dilucide ex una in alteram linguam potuisse converti: ut quam scientiam tribuere Celso nollent, nihilomi- nus in ipso agnoscere cogantur. Quanquam tan- tus ille Medicus quem comminisci malunt aucto- rem, quonam modo uni Celso notus, cæteris in- cognitus esse potuisset eo tempore? neque enim priscus aliquis, tot Medicorum qui modo vixerant, instituta, sententiasque nominatim commemorasset. Quod pariter adversus illos dictum puta qui ab Latino quopiam Medico scriptum Opus sibi Cel- sum subjecisse, vel magis illiberaliter existima-

Morgagni Opusc.

rent: quam fraudem stylus insuper coarguisset dis- similis ejus quo antea editos scripserat libros, ut puta de Re Rustica, quorum quidem fragmenta eundem utrobique ostendunt scriptorem. Denique istas omnes quas attigimus, opinionationes una fun- ditus convellit animadversio, non potuisse vide- licet in hominem sanum cadere, ut se eorum, quæ facile constare posset non sua esse, auctorem inscriberet, non Medicus præsertim in Re Medi- ca; de qua continuo ab doctis, indoctisque, ut fit, interrogatus, suam simul inscitiam, simul impudentiam retereret.

Celsum professione fuisse Scepticum, idque di- xisse Quintilianum, Paawius ( f ) credidit. Sed Quintilianus eo loco ( g ) quem Paawius indi- cat, cum paucissimos illos memoraret qui latinis litteris eloquenter tractaverant Philosophiam, ibi quidem scripsisse, ait, non parum multa Cornelium Celsum, Scepticos secutum, non sine cultu ac ni- tore. Ubi autem quæ de Rhetorica ediderat Cel- sus, attingit, aut ubi hunc, dicit ( h ), rei quoque militaris, & rusticæ etiam, & medicinæ præcepta reliquisse; hinc vero nec quos secutus sit, indicat, & Lindenius ( i ) vere in hos de Me- dicina libros meliora quæque cujusque Sectæ, de- lectu habito, congestisse, &, quod consequitur, Eclecticum egisse, censet. Sed neque in cæteris il- lis scriptis fuisse Scepticum, credo, cum rerum quas in iis tractavit, naturam, & capiendum ex præceptis fructum attendo, qui nullus in rheto- res, aut duces, aut denique agricolas ex perpetua dubitatione provenisset, aut cum librorum Celsi fragmenta relego, qui ad rhetores, aut ad agri- colas attinebant; nam in ea quæ ad duces spe- ctabant, necdum incidi, legitima quidem & cer- ta. Ut enim legitima sint quæ in suos de Re Mi- litari libros retulisse Vegetium, non dubito, quippe professum, ( k ), fidelissime se dicturum quæ Cato --- scripsit: quæ Cornelius Celsus, quæ Fron- tinus perstringenda duxerunt; tamen, sicut aliquis hinc conjiciat, summatim illa attigisse Cornelium, ita quisnam possit quæ Vegetius ex eo descripse- rit, pro certo internoscere? Incerta igitur præ- termitto. Spuria autem nihil moror. Cujusmodi in primis erat ille mutilus de Arte dicendi libel- lus, quem non tam miror visum olim Sixto Poppæ, aliisque postea, & in his Danieli Cleri- co ( l ) opusculum esse Celsi nostri, quam a Viro Eruditissimo, qui iterum edidit hoc sæculo sub ejusdem Celsi nomine, haud agnitum esse vel ex ipsis primis verbis non modo ad Celsum referri non posse, sed illa eadem esse Julii Seve- riani præcepta artis Rhetoricæ, quæ modo ex edi- tione Rhetorum Antiquorum Pithœi, ex aliisque recensuerat. Ea igitur fragmenta dico, qualia ex rhetoricis Celsi libris, exempli gratia, apud Fa- bium ( m ) sunt, aut qualia, præter illud quod a Philargyro ( n ) servatum videbis, ipse tibi apud Columellam alias ( \* ) indicavi ad rem rusticam pertinentia: cujus disciplinæ totum cor- pus Celsum quinque libris complexum esse, tunc ( \* \* ) satis ostendi; ut nihil jam attineat lon- ge aliam Clerici ( o ) interpretationem discute- re. In veris igitur utrorumque Celsi librorum fragmentis nihil quod Scepticum oleat, a me adhuc inventum esse, confirmo. Invenio qui- dem in his de Medicina libris, præsertim auctem in Præfatione, haud prorsus immemorem eorum quæ, Philosophum agens, docuerat, hætenus a Scepticis stare, ut rerum obscuras causas scientia comprehendi posse, neget: quæ res in Quintiliano eam quam paulo ante pro- duxi, lectionem comprobant adversus illos ( p ) qui, mendosis codicibus usi, legerunt ibi Sex- tius pro Scepticos. Sed in aliis, vel Præfatio-

I 2

nis

( t ) l. 6. c. 4. p. 345, 14. & l. 7. c. 7. p. 437, 32. ( u ) l. 4. c. 17. p. 227, 21. ( x ) l. 7. c. 13. p. 446, 17.  
( y ) l. 8. c. 8. p. 528, 22. ( z ) Ibid. c. 3. p. 512, 11. ( a ) Vid. Lommii Præf. in Cels.  
( b ) l. 5. c. 17. p. 248, 27. ( c ) l. 6. c. 18. p. 393, 5. ( d ) loc. cit. ( e ) Præf. ad Lithotom.  
( f ) loc. cit. ( g ) Instit. Orat. l. 10. c. 1. ( h ) Ibid. l. 12. c. 11. ( i ) in Præf. ad Cels. ( k ) l. r. c. 8.  
( l ) c. 4. cit. ( m ) Instit. cit. l. 2. c. 15. ( n ) ad Virgil. Georg. l. 4. v. 1. ( \* ) Epist. I.  
( \* \* ) Ibid. 24. ( o ) c. 4. cit. ( p ) Vid. apud Burmann. ad eum Fabri locum.



13, 17, 18, 20, 6. nis ejusdem, locis; rationi, & sensibus Celsus fidens, adeo non dubitat; ut rerum naturæ contemplatione aptiores fieri, majoresque Medicos, arbitretur, mortuorum autem dissectionem esse ipsis necessariam, pronunciet; quarum utramque Empirici esse supervacuum, dictitabant. Quid autem magis Scepticum decuisset, quam illam Empiricorum dubitationem tueri, num interiora videlicet corporis per dissectionem notiora sint, quia possit fieri, ut patefacta, & detecta mutantur? Utor autem ipsis apud Ciceronem illorum verbis in eo libro qui inscribitur *Lucullus*: quanquam & Celsus istam eorum, quam repudiavit, opinionationem bono in lumine collocaverat, eadem fide, qua Medicos Rationales paulo ante induxerat summis laudibus Anatomen exornantes: quorum verba qui ætate hac protulit, ut quo in pretio apud Celsum esset Facultas nostra, intelligeretur, is minime attendit, non ibi suam a Celso, sed in extrema demum Præfatione proponi sententiam, ut Eclecticum decebat, utrinque seligentem ea quæ sibi magis probarentur.

Eandemque rationem secutus, universam Medicinam, quæ seu victu, seu medicamentis, seu manu auxiliatur, primus omnium, quod Vir eruditissimus Lindenius (q) sciret, redegit in systema, & corpus methodo constitutum, summo verius studio, summaque prudentia, & æquitate. Verum amorem satis ostendit laudata ab ipso (r) in Hippocrate simplex veri erroris confessio, præcipueque in Re Medica, ne qui decipiantur eadem ratione, qua quis ante deceptus est: prudentiam autem, & æquitatem cum illa (s): verisimile est, id a quoque prætermisum, quod ipse non cognoverat: a nullo id quod non viderat, fictum, tum hæc (t): oportet autem neque recentiores viros in his fraudare, quæ vel reppererunt, vel recte secuti sunt; & tamen ea, quæ apud antiquiores aliquos posita sunt, authoribus suis reddere. Omitto de eodem genere alia, ad conformandos cum legentium, tum scribentium mores spectantia; ne plura contra ac pollicitus sum, de Celso, quam de his ejus libris, videar scribere: quanquam intelligis, quæ de illo memoravi, non parva ex parte ad hos quoque pertinere.

Ex quibus cum alias observatus ordo postulet, ut jam de plurimis locis aliquos indicemus, peculiari sive mentione, sive illustratione dignos; id eo libentius faciendum est, quo minus illorum pœnitet quæ de duabus tunc (\*) scripsimus vocibus, *filanus*, & *comprehendit*. De illa enim postea vidimus doctissimum etiam Virum Petrum Victorium (u) idem vel in Celso statuisset; Marcum autem Ciceronem quid altera non modo in stirpibus, sed in ipsis quoque animalibus interdum significet, ibi satis docuisse ubi (x) de semine utrorumque scripsit, si incidit in concipientem, comprehendentemque naturam. Nunc, si quis alius, tum mentione, tum illustratione dignus occurrit ille Præfationis locus: ætate nostra quadam, ex naturalibus partibus carne prolapsa & arente, intra paucas horas expiravit; sic ut nobilissimi medici neque genus mali, neque remedium noverint. Quid enim memorabilius, quam morbus, ut ipse ait, novus, id est quem si alii ante Celsum Scriptores adnotassent, novus ejusmodi Medicis non accidisset? Quid autem magis declarationem requirat, quam morbus hic, de quo apud Celsi Interpretes, quotquot vidisse meminerim, si unum excipias Rubeum, altum silentium est, apud reliquos autem Medicos varia, & discrepans explicatio? Cui dissidio ansam fortasse dederit scriptum in nonnullis editionibus quidam pro quadam, & adnotatum a quibusdam in libri ora hærente pro arente, cum multo plures tamen, & antiquiores ex meis, & cum ipsis membraneus

codex Foroliviensis haud aliter habeant atque ex Almeloventio proposui. Sed & naturales partes, sive, ut alibi Celsus loquitur, (y) *naturalia*, aut (z) *naturale*, ipsi quidem id quod fœminæ sunt, significant, rarius autem, sed tamen aliquando (a) etiam viriles partes, nunquam vero, quod meminerim, ea loca per quæ non aliud ejicitur, quam alvi excrementa, ut neque Columellæ; in avibus enim hæc genitalibus quoque communia sunt; & si quando in jumento (b) pro obstructo Recto intestino obseffos naturales exitus dixit; non aliter, opinor, dixit, ac de obstructis naribus dicere potuisset. Præterea, si per anum, aut per inguen aliqua intestini pars splendidæ illi personæ procidisset; neque novus, neque incognitus fuisset morbus. Vides enim; ut alia præteream; de procidente ano, & de intestini devolutione in ipsa inguina, & deorsum, tanquam de pervulgatis morbis, verba suo loco (c) a Celso esse facta. Vides simul, ubi de ano prolapsa, ibi quoque de ore vulvæ procidente, & de utriusque fungo eundem scripsisse; ut neque de ullo ani vitio, neque ita extrorsum prolapsi, ut carnis specie appareret, intestini, neque de prolapsu uteri in vulgus cognito, neque de aliqua ejus vaginæ, ut appellant, excrescentia propositus casus, præsertim intra paucas horas funestus, posse accipi videatur. Quod ultimum Rubeo (d) quoque objicio, molam fuisse, censi, multoque illud magis; ut alia sileam; quod quem morbum ab Hippocrate, nec sine curatione, ait, fuisse descriptum, hunc, ejusque remedia prorsus ignorare nec Medici illi nobilissimi, nec Celsus potuisset, in Hippocratis lectione mirum in modum verlatum. Quid ergo est? Aut ego quidem plurimum fallor, aut non aliud fuit, quam uteri inversio, quemadmodum olim hunc Celsi casum a me, Anatomen docente, explicatum esse, memineris. Inversus enim uterus, ex naturalibus prolapsus, nihil magis, quam carnem, refert: brevique, ob commemoratas ab Ruyschio (e) causas, gangrænam concipit. Hoc fuit, cur aruisse, Celsus dixerit, qui in gangræna (f) siccam & aridam carnem descripsit. Gangrænam autem inversi uteri mors, ut Ruyschius ait, statim subsequitur, id est, ut Boerhaavius (g) explicat, intra tres horas ab inversione: quod cum eo convenit quod Celsus dixit, intra paucas horas. Remedium, ut nosti, unum est, si illico uterus suam in sedem blande reponatur: neque sic tamen omnes servantur. Quo magis fortunatam, quæ adhuc vivit, Matronam fuisse, censeo, cui statim ab difficili partu cum se invertens uterus procidisset, Chirurgus autem qui adstabat, tibi probe notus, incognitæ rei novitate perculsus, continuo ad me, consilii causa, accurrisset, ego vero ipsi ostensam illico Ruyschianam inversi uteri præclaram delineationem (h) audirem suo casui tam similem esse, quam ovum ovo; recurre, inquam, sed quanto ocius potes, ad mulierem, si forte servari adhuc possit, cauteque ad hunc modum age. Fecit ille, ut solet, diligentissime, & quamvis horulam circiter extra suam sedem fuerit uterus, fœmina tamen generosissima persanata est. Non sic felici esse licuit puerperæ, ab Lentilio (i) descriptæ; neque enim dubito, quin propendens ex naturalibus globosum corpus sanguinolentum uterus fuerit, quippe saccus ex carne spongiosa, sesquipollicem crassa, glabra intus vestitus tunica, id est membrana secundum naturam exteriori, quacum non miror si annexa uteri vincula non invenit, ut quæ in puerpera inferiora tenent, & quod consequitur, inverso utero, superiora, quo usque nec Chirurgi ferum, nec digiti, prohibentibus mortuæ con sanguineis, potuerant pervenire. Nec vero mirandum

(q) Epist. ad Patin. (r) l. 8. c. 4. p. 515, 7. (s) l. 7. c. 14. p. 448, 11. (t) l. 2. c. 14. p. 88, 2.  
 (\*) Epist. I. (u) Explic. suar. in Ciceron. Castig. ad Epist. l. 3. ad Q. Fr. p. 599. (x) De Nat. Deor. l. 2.  
 (y) l. 4. c. 20. p. 233, 8. l. 5. c. 21. p. 270, 17. l. 7. c. 26. p. 481, 28. ibid. c. 28. p. 488, 26.  
 (z) ibid. c. 26. p. 474, 22. (a) l. 4. c. 21. p. 235, 5. l. 7. c. 18. p. 455, 21. (b) de Re Rust. l. 6. c. 30.  
 (c) l. 6. c. 18. p. 402, 31. l. 7. c. 17. p. 456, 23. & seqq. (d) Annot. in hunc Celsi locum.  
 (e) Obs. Anat. Chir. 10. (f) l. 5. c. 26. p. 301, 8. (g) Prælect. ad Instit. Med. n. 685.  
 (h) Obs. cit. Fig. 12. (i) Eph. N. C. D. 2. A. 2. Obs. 151.



dum est, quod doctus ille Vir; quanquam rem conjecit; aut quod alii Medici, nedum Chirurghi, ut Ruyschius ( *k* ) narrat, id quod erat, continuo non agnoverint, sed pro mola, aut tumore alio acceperint. Aspectus enim inversi uteri nimis est rarus. Quod si hæc in tanta Anatomies luce; quid Celsi tempore? Cujus meam interpretationem eo minus a vero alienam esse, putaverim, quod non aliam esse video quam nuper attigit Vir Illustris Albertus Hallerus ( *l* ).

321, 15. Quanto longior fui in primo Celsi loco explicando, tanto ero brevior in altero, qui in extremo est capite quarto libri 8. Omnibusque pertusæ calvariæ locis cicatrix commode inducitur, excepta frontis ea parte, quæ paululum super id est, quod inter supercilia est. Ibi enim vix fieri potest, ut non per omnem ætatem sit exulceratio: quæ linteolo, medicamentum habente, contegenda erit. Almelveenius, qui nihil ad superiorem locum, ad hunc adnotavit, post ut deesse non in editione Pantini. Deest vero & in aliis nostris, etiam antiquioribus. At minime deest in membraneo codice, quem quoties indicabo, tu Foroliviensem intelligito. Neque in illis, opinor, deerat unde accepit Lindenius: quem qui redarguunt, hic nobis commode sine illa particula Celsum interpretentur. Cæterum illam hujus observationem Almelveenius poterat lectoribus explicare, Paawio ( *m* ) saltem, quem alioquin sæpius nominat, indicato. Causam enim vidissent recte ab hoc conferri in respondentes ei frontis loco Sinus Pituitarios: qui tamen cur id faciant, non recte declarat. Satis autem declaravit postea Verheyenius ( *n* ) propter aerem, cum spiritus ducitur, redditurque, illac ultro citroque meantem, aut certe illuc tendentem, præclaro etiam exemplo addito, quo infelix Celsi prædictio non confirmatur modo, sed augetur.

Facta calvariæ, & Paawii mentio Celsi quoddam locos quos Paawius ( *o* ) explicavit, in memoriam redigit, & eos primum qui attinent ad futuras. Harum, Celsus ait ( *p* ), neque certum numerum esse, sicut nec locum quidem. Et de loco, præter quam quod Hippocratem ( *q* ) secutus est, diserte id docentem, mox quoque suo peculiari exemplo ( *r* ) confirmat, Sagittalis videlicet; sic enim vocant; aliquando ad nasum usque productæ. De loco autem simul, & numero vel ea tantummodo satis ostendunt, quæ indicavit Paawius, officula prope occiput interdum conspicua, peculiaribus futuris conclusa, Wormiana appellant; sed antiquioribus adeo cognita, ut olim Eustachius ( *s* ) delineaverit. Quæ cum ita sint, cumque ne varietates quidem futurarum Celsum fugerint; quid fuisse dicemus causæ, cur in earum quæ ut plurimum sunt, enumeratione, & descriptione obviam omnibus futuram Coronalem prorsus omiserit? Ego, si quid judico, in Paawii sententiam eundem arbitror, existimantis, nonnulla hic periisse. Multo autem facilius fieri potuit, ut perpauca versus, post quartæ futuræ descriptionem, quintam proponentes, librarii temere transilierint, quam ut aliquot capita libri IIII. ut alias ( *\** ) ostendi, tota interciderint injuria temporum. Sed ut Paawii judicio, de quo fuerant ab Almelveenio admonendi lectores, facile in hoc loco assentior; sic in aliis vellem pariter posse assentiri, velut in futura tertia. Hæc, Lambdoides nominata, sic antea apud Celsum legebatur descripta ( *t* ): tertia ad aures per verticem tendens, occipitium a summo capite diducit. At Paawius, non ad aures, sed ad latera, judicat esse legendum; post Lindenium altipulante Almelveenio. Ego vero cum in meis reliquis decem editionibus, si unam Cæsarii exci-

pias, in qua, errore operarum evidentissimo, legitur ad naves, idem inveniam quod in membraneo codice, ad aures; assensum sustineo: quem, etsi codex alius proferretur qui haberet ad latera, nihilominus sustinerem. Neque enim alterum illud rejicere necesse est. Tendere enim ad aures futura dicitur; non pervenire; quemadmodum lata scapularum ossa infradicentur ad spinam tendere, quam certe, ut nosti, non assequuntur: & si tendere non aliud hic quam pervenire, significaret; plura non deessent capita in quibus ea futura ubi ad temporum ossa ventum est, se quasi dividere, & in unguem exterius commissa, inter processus Mastoidis radicem, & os syncipitis ad auriculam pergere videatur. Is processus; ut alterum longe aliter ac Paawius, interprete Celsi locum; est crassissimum illud in capite os quod post aurem est, qua capillus, ut verisimile est, ob id ipsum non gignitur, crassitudine videlicet ossis satis muniente eam partem capitis, quæ, ut jam ad posteriora accedit, sic protegi magis debuisset, quam anteriora. Verum, utcumque id est; scio enim, a priscis etiam aliter; quod & Paawius indicat; potuisse explicari; illud in quo dissentire ab ipso cogor, hoc est quod os de quo Celsus loquitur, eam esse credit ossis temporum partem, quæ adeo tenuis est, etiam transparent uti sit; quasi Celsus, id quod Paawius miratur, crassissimam non dixisset, tum sine capillis, & post aurem.

Non obscure quoque paulo infra miratur Paawius. Ubi enim Celsus ait: Foramina, intra caput, maxima oculorum sunt; deinde narium; tum quæ in auribus habemus; ille ad hæc ultima hoc adscribit: multo tamen capacius quod occiput ostendit foramen. Fateor. Sed Celsus, qui hanc ossium descriptionem non ob aliam causam suscepit, nisi quo facilius accipi possent quæ de agendis a Chirurgo circa ossa erat protinus scripturus, alia hic foramina sibi attendenda, diserteque memoranda esse, non censuit; diserte, inquam: nam sicuti quæ de futuris omnibus dixit, satis esse, credidit, ut inde ossa, quæ non sigillatim nominabat, intelligerentur; ita ex eo quod de spinæ medulla cerebro commissa attingere mox debebat, foramen per quod e capite hæc intra vertebra descenderet, intellectum iri, non dubitavit. Atque ut perspicere omnes possent, quæ foramina prætermitteret, ea sibi non esse incognita; idcirco fortasse illa interjecit de multis & tenuibus intimorum ossium capitis foraminibus, per quorum alia olfaciendi, per alia autem audiendi facultas est, eaque interjecit verborum vi, ut vetustius subvisorum canalium auris Semicircularium monumentum non habeamus, quemadmodum a me alibi ( *u* ) animadvertum est.

Sunt in thoracis etiam ossibus quædam alia adversus Paawii sive accusationes, sive dubitationes explicanda. Os pectoris, quod *σ' πρσν*, Græcos ( *x* ) secuti, vocitamus, & quod Celsus aliis in locis ( *y* ), græcam vim latine imitatus, pectus dixit; quanquam hanc pectoris significationem necdum in Lexicis adnotatam video; id igitur os cum Celsus ( *z* ) ajat a faucibus incipere; ibi Paawius, nisi legamus a jugulo, non video, inquit, quæ erroris excusari possit Celsus, quid enim sternum cum faucibus intercedit? universa colli longitudo intermedia visitur. Non attendit profecto Paawius, fauces ad imam usque laryngis cartilagine pervenire: quæ cartilago in eo qui secundum naturam frequentissimus, & prope assiduus est, capitis, & colli positu fere summæ respondet parti ossis pectoris, aut certe non multo supra est. Non est igitur cur verba in quibus meæ punctæ editiones, & codex omnino consentiunt, pro-

( *k* ) Obs. cit. ( *l* ) ad cit. Boerh. n. not. lib. ( *m* ) Comm. in Cels. in fin. ( *n* ) Anat. corp. hum. l. 1. tr. 4. c. 16. ad fin.  
 ( *o* ) Comm. ad c. 1. l. 8. ( *p* ) l. 8. c. 1. p. 499. 12. ( *q* ) de Cap. Vuln. n. 2. ( *r* ) p. 499. 20.  
 ( *s* ) Tab. 36. Fig. 3. ( *\** ) Epist. II. §. Verum hæc. ( *t* ) p. 499. 15. ( *u* ) Epist. Anat. l. n. 92.  
 ( *x* ) Vid. Ruff. Ephes. de corp. hum. part. Appellat. lib. alter. 1. c. 11.  
 ( *y* ) l. 3. c. 7. p. 526. 6. & c. 8. p. 528. 6. ( *z* ) Ibid. c. 1. p. 503. 13.



propterea mutemus? Consentiunt quoque in  
 503, 23. proximo loco ubi legimus *a cervice duo lata ossa utrinque ad scapulas tendunt*, Paavius autem legendum propemodum censet *ad claviculas*, haud animadvertens, scapulas ibi accipi pro corporis regione: quas autem scapulas nunc vocitant Anatomici, duo illa esse lata ossa, quorum descriptionem Celsus recte incipit a superiore, non, ut Paavius facit, ab inferiore, & reliqua illa parte qua *velut innatant; quoniam nisi in summo nulli ossi inhærescunt*: quæ Celsi verba eo tibi libentius commemoro, quod peculiarem horum fere dumtaxat ossium proprietatem designant, quæ fundamenti instar ex parte iis est quæ de horum ossium motibus scite Recentiores exposuere.

Noli tamen credere, me in illis pariter a Paavii sententiâ recedere, quæ in Celso non injuria notavit, ut cum posteaquam metacarpo *quinque ossa tribuit ad digitos tendentia*, continuo ipsos digitos, ab illis ortos, *ex ossibus ternis constare*, docuit, *omniumque eandem rationem esse*. Scilicet hæc, atque alia ejusmodi, etiam quæ Paavius non advertit, ut exempli causa, cruris os quod vocamus fibulam, altero quod tibiam dicimus, *brevius esse*, hallucinationes sunt, magno Viro, & iis temporibus scribenti, eo facilius condonandæ, quod plurima simul recte tradidit, & in iis quædam, velut obiter indicatum est supra, non iis temporibus expectanda; ut illud mihi satis cum Clerico (a) non conveniat, nihil in hoc Celsi capite primo libri 8. nisi generalia, reperiri.

Quod caput tantummodo, indicari a quibusdam, miror, ut rationem reddant, cur Celsum inter Anatomicos Auctores ponant; quasi alterum, de interioribus, caput non scripsisset, & nihil præterea tradidisset de oculis, nihil de testiculis; quæ plerique silent, de anatomica illius scientia verba facientes; qui autem memorant, quo in numero Enarratores quoque sunt, aut non satis explicant, aut quædam, etiam immerito, ut opinor, redarguunt, velut cum de testium natura scribens (b), *dependere hos*, ait, *ab inguinibus per singulos nervos, quos κρημασθηρας Græci nominant*. Hic Rubeus (c) *animadvertendum est*, inquit, *nervos non esse, e quibus ab inguinibus testes dependent, sed musculos*. Confirmat Clericus (d), quem Celsus appellat *nervum*, esse *musculum*,. Nempe utrique imposuit Anatomicorum posterior consuetudo, tenuem quandam musculosam expansionem qua Vaginalis tunica comprehenditur, cremasterem testis musculum appellantium; cum Celsus, temporum suorum morem secutus, non eum musculum, sed, nisi me omnia fallunt, vas indicet semen deferens, quod crassiusculo nervo simile, intra illam tunicam cum arteriis & venis ad testem pertinet. Possum id non una ratione ostendere. Rufus enim Ephesius, quem sub Trajano vixisse, Clericus (e) agnoscit, etiam tum scribebat hæc (f) quæ a Crasso nostro in hunc modum latine reddita sunt: *nervus quoque cum arteria concavus ad testem pervenit, qui Suspensor a nostris dici potest: Cremastera Græci nuncupant*. Quin Columella, qui ipsis temporibus Celsi floruit, cum memoravit (g) *testium nervos, quos Græci κρημασθηρας ab eo appellant, quod ex illis genitales partes dependent*, nisi id quod nos diximus, intellexisset, non iussisset certe, in vitulorum castratione *extremam partem testium adhaerentem prædictis nervis relinqui*; neque enim testes, ut illis feminis vasis, ita cremasteribus adhærent musculis. Quid? quod Celsus ipse satis per se docet, quid illo nomine significet. Nam primum, ni vasa hæc voluit, quæro abs te, quo ergo alio nomine hæc indicavit? omisisse enim haud potuit qui præter tunicas, *vel multas illas membranulas diligenter proposuit, quæ venas, & arterias, eosque nervos com-*

*prehendunt*. Deinde ea quæ de his nervis infra dicit; multa autem dicit, & sæpenumero, ut tanto magis scire intersit de quo loquatur; omnia cum explicatione conveniunt nostra, plura autem evidentissime discrepant ab aliena, ut puta cum *sub ima*, id est Vaginali, *tunica circa ipsum testiculum nervumque ejus*, aut cum *inter imam tunicam & ipsum testiculum, nervumque ejus, ramicem*, ait (b), *oriri*, aut denique cum (i) *testiculum, curationis causa, tantisper e scroto, dum ea perficitur, digito depromptum, mox ubi de tunica & media, & ima tantum sit abscissum, quantum est opus, eundem, inquam, testiculum purgatum docet per ipsam plagam cum venis, & arteriis, & nervo suo demittendum esse in pristinam sedem*. De oculorum autem anatomie cum quædam explicare conatus sim in Epistolis Anatomicis (k), in quibus nonnullos quoque attigi (l) ex iis locis quibus mox Celsus quæ sentiret de insanabili, aut sanabili Suffusione, proposuit; nihil eorum hic repetam. Sed protinus adea transibo quæ de humani corporis interioribus ab eodem tradita sunt.

Quamquam illud initio dubium est, ex humanorum revera corporum, an ex bestiarum dissectione hæc quæ scribit (m), deprompta sint. Ex hominum credas, si totum relegas quem in extrema Præfatione indicavimus, locum. *Incidere mortuorum corpora, inquit, discentibus necessarium. Nam positum & ordinem nosse debent. Quæ cadavera melius, quam vivus & vulneratus homo, representant. Sed & cetera quæ in vivis cognosci modo possunt, in ipsis curationibus vulneratorum --- usus ipse monstrabit*. Nulla hic certe, neque supra, nisi de homine, mentio est, ne tum quidem cum de iis pariter sermo est quæ in vivis dumtaxat quæri possunt: adeo illo tempore vereri Medici, quod aliqui hoc nostro non sunt veriti, videbantur, ne a dissimilibus bestiarum corporibus deciperentur. Sed contra, ubi morum ejus & insequentium diu sæculorum veniat in mentem averforum adeo ab humani cadaveris incisione; non facile existimabis, quæ Celsus tradidit, si quidem ab intima non discrepent hominis structura, aliunde quam ex vulneratorum inspectione, multo autem magis ex Herophili, & Erasistrati librorum, qui tunc extabant, lectione fuisse deprompta. Si vero ex ipsis Celsi descriptionibus dignoscere aveas, hominum, an belluarum interiora proponat; rursus ibi, nec semel, hæreas. Hominis enim hæc, exempli causa, videntur: *lien longitudinis crassitudinisque modicæ; & vulva in mulieribus, nisi ubi gravida sunt, non multo major, quam ut manu comprehendatur*. At bruti alicujus animantis illa: *jecur in quatuor fibras dividitur: & orbes tenuioris intestini per membranulas singuli cum interioribus connectuntur*: neque enim, nisi ex obvia animante aliqua, canis simili, melaræum spectasset, *membranulas* dixisset, aut certe adipem, unde crassescerent, his innasce, non filuisset, qui id in omento non erat taciturus. Apparet igitur, ex bestiis quædam esse deprompta: quibuscum tamen alia ex homine videntur admixta. Nam si ejusdemmodi animalis cujus proposuit melaræum, lienem quoque proposuisset; certe *modicæ esse longitudinis*, non scripsisset. Cujusmodi animal respexerit oportet Balduinus Konseus (n), qui ad eum Celsi locum hæc adnotavit: *Vide, ne non hic mendum sit, atque legendum latitudinis crassitudinisque modicæ. siquidem cum splenis innata figura sit oblonga, non dixeris eam longitudinis crassitudinisque modicæ*. Longior certe vel in homine est lien, quam latus; sed tanto brevior, si cum quadrupedum plerisque compares; ut laudandus, non emendandus, sit Celsus, qui *modicæ in homine longitudinis* scripsit.

Quod vero ad alterum attinet, quod produximus,

(a) Hist. de la Medec. P. 2. l. 4. S. 2. c. 5. (b) l. 7. c. 18. p. 455, 29. (c) Annot. in hunc loc.  
 (d) cap. cit. not. 25. (e) Hist. cit. P. 3. l. 2. c. 3. (f) Oper. cit. l. 1. c. 32. (g) de Re Rust. l. 6. c. 26.  
 (h) c. 22. p. 470, 1. (i) c. 19. p. 461, 4. & 27. (k) Epist. 17. n. 23. (l) Epist. 18. n. 33. & Epist. 19. n. 7.  
 (m) l. 4. c. 1. (n) Enarrat. in Celsi libr.



186, 1. ximus; uteri exemplum, et si Cl. Vir Noortwykius ( o ) optaret, ut figuram Celsus descripsisset, quo certius sciremus, humanum ab eo uterum fuisse propositum; non tamen, humanum proposuisse, inficiatur. Doctissimi autem Viri, qui de egregio Noortwykii libro in Eruditorum Actis ( p ) retulere, satis indicii dant, quo eorum inclinet sententia, in proximis Celsi verbis illa attendentes, vulva, recta tenuataque cervice, quam canalem vocant, --- super rectum intestinum progressa. Quod enim cervix tenuata sit, ajunt, humanae magis, quam brutorum, vaginae convenire: multo autem magis quod super, non, ut in brutis, sub recto intestino progrediatur: quanquam in brutis quoque idem posse dici, fateantur, si supino, ut fit in dissectionibus, corporis situ spectentur: & Noortwykius admonuerit, non tenuataque, ut ab Almelveenio editum est, sed continuataque in tribus antiquioribus editionibus scriptum esse. Sane & in meis omnibus, & in codice ad hunc modum scriptum erat; ut is sit unus ex iis locis in quibus Lindenium decuisset variantem scripturam commemorare. Sed et si mihi totum hoc Celsi caput legenti pleraque videntur potius ut in stante homine, quam ut in supino, posse intelligi, praestat tamen ut ab his de quibus dubitare licet, jam ad certiora transeamus.

Et primum linguam nostram anatomicam vocibus aliquot augeamus, quæ ea significatione qua apud Celsum in hoc capite, aut alibi sunt, in meis quidem latinis Lexicis non reperiuntur. Quam in mulierum genitalibus vaginam appellamus, eam canalem vocatam esse, paulo ante visum est. In virilibus autem quam glandis coronam dicimus, hæc a Cello lib. 7. c. 25. *circulus glandis* nominabatur. Quod frænum ibidem vocitamus, recte a nobis dici, productis ex eodem capite locis, proclive est demonstrare, nec minus recte, inclusum in utero fœtum posse qui velit, vocare *infantem*, non Poeta, aut Scriptore alio inferioris temporis, sed Cello ipso auctore cap. 21. lib. 5. & toto capite 29. lib. 7. ( q ). Sed cum utrumque horum in aliquod tandem Lexicon relatum esse, animadvertam; illud potius addam, quem nos funiculum umbilicalem, Lexica autem quædam cum Tertulliano umbilicalem nervum appellant, eum a Cello capite eodem 29. *umbilicum* nominari. *Sinistra manu*, inquit, mortui in utero infantis extractionem perficiens Medicus *leniter trahere umbilicum debet ita, ne abrumpat, dextraque eum sequi usque ad Secundas*. Verum, ne longius te abduci, dicas, a proposito capite I. libri quarti; alias voces alio differo, & ad caput illud redeo, ut in eo quasdam consideremus. Pulmo, ne, corde, jecinore, liene, renibus descriptis, *Ac viscerum quidem hæc sedes sunt*, inquit. *Stomachus vero &c.* atque hinc incipit ventriculi, intestinorum, vesicæ, & uteri descriptionem. Non igitur hæc; sed illa tantum viscera sunt? An post *viscerum* vox aliqua deest, ut puta *superiorum*? sic enim alibi ( r ), *septum id, quod transversum a superioribus visceribus intestina discernit*. Sed num renes viscera sunt ventriculo superiora? Huc adde, præter ea quibus in Præfatione usus est, verba: *qua parte quodque viscus, intestinumve sit*; huc, inquam, adde, quod cum illarum quas primo loco nominavimus, partium curationes absolvit ( s ), *A visceribus ad intestina veniendum est*, inquit, sicque ad reliquarum curationes progreditur. Manifestum est igitur, has reliquas noluisse Celsum accipere viscerum nomine. Cur autem noluit? Id vero est obscurum, nisi forte, ut alios olim, in ea quis comminiscatur fuisse sententia, quam ex veteri Scholiaste protulit Riolanus, ( t ) *extra vitalia esse septem, lin-*

guam, cor, hepar, lienem; pulmonem; & duos renes. De præcordiorum autem vocabulo; si nulum, nisi hoc, caput spectemus; satis in Lexicis, superque dictum videri potest. Sin plerisque alios Celsi locos; significatio apud nos frequentissima, & a Plinio Valeriano ( u ) diserte exposita, hypochondriorum, aut plane desideratur, aut minus dilucidis, quam Celsi, comprobatur exemplis, ut cum ait ( x ): *si præcordia ejus sine ullo sensu doloris æqualiter mollia in utraque parte sunt; quod si paulo tumidiora sunt, tamen digitis cedunt, & non dolent*; aut cum ( y ) *ad spinam reducta præcordia*, aut ( z ) *præcordia sursum contracta*, aut; ne in re apertissima longior sim; cum quæ Hippocrates de hypochondriis scripserat, ea ipse non obscure in latinum sermonem convertens, de præcordiis scribit.

Contra, si plerisque alios Celsi locos attendamus; arterias ab ipso quoque, ut fere a priscis solebant, venarum dumtaxat nomine designatas fuisse, existimabimus: at si hoc, aliaque ejusdem capita, in primisque quintum libri 7. & decimum libri 2. perlegamus; non id ipsi magis, quam Hippocrati, perpetuum fuisse, perspicimus. Nam & in eo de quo satis vidimus, capite *circa guttur venas grandes memorat, itemque arterias*, & in illo quinto magnopere cavendum dicit, *ne nervus, ne vena major, ne arteria incidatur*, in eo autem quod novissime indicavimus, decimo, cum de mittendo sanguine verba faciat, *juncta est, inquit, vena arteriis, his nervi*. Continuo autem cum graves ibi indicet noxas quæ compunctos nervos sequuntur; *at arteria incisa*, inquit, *neque coit, neque sanescit*. Quo loco adnotandum est, nec Celsum tamen, nec quos insequentibus libris commendat, tot Medicos, aut Chirurgos, quantum ex iisdem libris apparet, aneurysmatis injecisse mentionem, imo plus quam ipse, Hippocratem non dixisse, si quidem *venam sanguifluam* libro quem Almelveenius hic laudat, I. de Morbis pro arteria accipiamus; nam in iis quos citat, Aphorismis neque de arteria, neque de vena quidquam est. Aretæus vero, qui idem quod Celsus, scripsisse dicitur ab erudito alioquin Medico, Jo. Bapt. Silvatico in ea quam inscripsit de Aneurysmate, Tractatione, non antiquior, ut ipse putat, Cello fuit, neque eo quod designatur, capite ( a ) de alia arteria, quam de Aspera, locutus est, cum credere non posset, si in angina incideretur, posse coire. Quantum igitur ex ea Silvatici Tractatione, & ex Ingrassæ, Medici doctissimi, Jatropologia ( b ) perspicitur potest, nemo ex iis qui supersunt, ante Galenum Scriptoribus de aneurysmate verba fecit. Quod vero ad venas attinet, quæ Cello auctore, secari possunt, non illo uno loco standum est quo paulo ante dixerat, *non ubique mitti posse sanguinem, sed in temporibus, in brachiis, juxta talos*. Nam alibi ( c ) jubet, *ex naribus*, alibi ( d ), *ex fronte*, alibi ( e ), *ex fronte, vel naribus*, alibi ( f ), *ex iis quoque venis, quæ sub lingua sunt*, sanguinem mitti. Jussisset fortasse, ex podicis etiam venis, si hirudines, sive, ut loqui jam tum coeperant, sanguisugas probasset, quæ ut in legitimis Galei scriptis, sic pariter in Celsi ( g ), longe alia de causa, quam ut medicinæ instrumentum sint, memorantur: quanquam Themisoni, qui Celsum, nedum Galenum, ætate præcesserat, multo aliter visum esset, ut recte est a Clerico ( h ) animadversum. Est etiam ubi Celsus docuit ( i ) *inter verticem ac frontem* --- *venas incidere, & sanguinem mittere*; qui locus ob id etiam erat a me adnotandus, quod antequam id doceret, jam tum probe scire se, ostendit ( k ), ex venis ad oculos pertinentibus alias esse,

( o ) Uteri hum. gravid. Anat. P. 1. §. 36. ( p ) A. 1745. M. Jun. P. 1. ( q ) 490, 3, 31. & 491, 9, 17, 19, 27. & 492, 25, 31. ( r ) l. 7. c. 4. p. 412, 31. ( s ) l. 4. c. 11. p. 217, 27. ( t ) Anthropogr. l. 2. c. 21. ( u ) de Re Med. l. 2. c. 15. ( x ) l. 2. c. 3. p. 49, 22. ( y ) l. 5. c. 26. p. 280, 6. ( z ) Ibid. p. 288, 3. ( a ) 7. l. 1. de Acut. morb. curat. ( b ) l. 1. err. 4. ( c ) l. 4. c. 2. p. 188, 31. ( d ) l. 6. c. 6. p. 363, 13. ( e ) Ibid. p. 367, 23. ( f ) l. 4. c. 4. p. 197, 8. ( g ) l. 5. c. 27. p. 314, 13. ( h ) Hist. de la Medec. P. 2. l. 4. S. 1. c. 1. ( i ) l. 7. c. 7. p. 437, 22. ( k ) Ibid. p. 435, 27.



esse, quæ inter calvariam & cutem sunt, alias, quæ inter membranam cerebri & calvariam: superiores autem illas per tempora oculos rigare; inferiores, per eas membranas, quæ ab oculis ad cerebrum tendunt. Hanc autem non minus veram, quam subtilem, anatomicam observationem prorsus necessariam esse, censuit ad discrimen intelligendum eorum quibus utilis, & quibus inutilis futura esset ea curatio, non sine errore quidem aliquo, præsertim nisi hic quoque venarum nomine arterias putes significasse, at exemplo illustri in eo Auctore quem subtilibus dissectionibus adversari credunt, quanti hæc contra in exercenda medicina ab illis faciendæ sint qui uti sciant.

Habes aliquot, ut scribenti occurrerunt, locos sive mentione, sive explicatione, sive utraque dignos. Nec me fugit, esse alios prope innumeros, qui ad vina, ad aquas, ad edulia, ad medicamenta, ad ferramenta, ad tela, ad morbos, ad Auctores, ad alia pertinent quæ in Celsi opere sic memorantur, ut aliquam illustrationem requirerent. Sed ego epistolam, non librum, scribere aggressus sum. Quæ quoniam sentio quam præter opinionem excreverit; cætera quæ ad variantem scripturam, & ad meas de hac dubitationes, ac divinationes attinent, in alias Litteras conjiciam: quas propediem expectabis: & valebis.

Patavii MDCCXXXVIII. xviii. Kal. Januar.

## E P I S T O L A Q U I N C T A.

Jo. Bapt. Morgagnus Jo. Bapt. Vulpio S. P. D.

Uo magis memoria repeto, quot, & quam sæpe, & quam aperte in Almelveeniana Celsi editione minus probaverim Epistolis illis tribus quas duodetriginta ab hinc annis simul cum ea voluisti in publicum prodire; eo magis miror, mi Vulpi, existere aliquem potuisse qui perinde ac si a me curata, aut omni ex parte laudata esset, quidquid sibi in ea displiceret, id mihi objiceret non obscure, ne dicam, exprobraret. Ego vero, cum sint illæ Epistolæ in omnium manibus, minime opus esse ducio singula in quibus ab Almelveenio dissenſi, numerando percensere, præsertim cum tot sint, ut nihil aliud illæ nisi quædam fere perpetua ab eo dissenſio, esse videantur. Satis est duo quæ universe dixi, commemorare, alterum (a): recte illud fecit Almelveenius, quod in hoc loco nihil in Celsi verbis mutavit: quod utinam in pluribus aliis facere; quamvis ipso præeunte Lindenio; noluiſſet: alterum (b): ex innumeris prope locis quorum incertam scripturam commemorare poterat Almelveenius, hos paucos habere. Quod si fecisset; longe facilius mihi tunc fuisset, & nunc esset quas mutationes haud probarem, & quas tamen vicissim probarem, invenire.

Scripsi enim alias id quod superioribus etiam Litteris confirmavi, loca esse in ejus editione quæ bene ac sapienter mutata sint. Nunc, exempli causa, pauca alia proferam ex uno dumtaxat capite libri 8. Locus est cap. 1. de latis scapularum ossibus, quæ, ut in meis omnibus editionibus (Lindenianam semper excipio, quam est secutus Almelveenius) summo consensu legebatur, ab Romanis *scoptula operta* nominabantur: idque nomen, hujus unius loci auctoritate in latina Lexica inductum fuerat. Sed Casaubonus, ut in Scholiis habes ad hunc locum, aperte admonuerat, istam lectionem procul dubio mendosam esse, cum nunquam alibi hæc vox *scoptulum* reperiatur. Vocem autem *scutulum* apud idoneos Auctores inveniri, cum vel ex Lexicis ipsis constet, cumque duo ista ossa & forma sic satis, & officio, scapulas videlicet protegendæ, referant parva scuta sub tegumentis, & musculis quibusdam quasi latentia; Lindenius tum rationem quidem certe, tum optimos, quibus non carebat, calamo exaratos libros, ut opinor, secutus, *scutula operta* reposuit. Atque ut intelligas, me non temere sic opinari; in Foroliviensi codice *scutula* inveni; ille autem Venetus, quem apud Clericos Regulares nosti a me olim inspectum esse, etsi minus antiqua manu scriptum nunc habet *scoptula*, sic tamen habet, ut mihi quidem visus sit olim *scutula* habuisse. A qua voce num quondam ortam vulgarem illam quam memorat Paawius (c),

horum ossium appellationem censebimus, *scutorum cordis*, quippe vitalia a tergo munientium? Recte quoque Paawius (d), & ante ipsum Constantinus (e) admonuerant, cum aliæ editiones habeant in *sinus*, aliæ in *sinu*, legendum esse in *sinum* eo loco primi hujus capituli quem propterea sic edidit Lindenius, ex manu duo exigui pro-  
cessus in *sinum radii conjiciuntur*. Neque enim radius, quod probe scis, nisi unum habet sinum quo earpi quidem ossicula duo excipiat. Nemine autem; quod sciam; nisi evidentissima ratione, & optimo fortasse codice, præeunte, egregie rescripta a Lindenio sunt in eodem capite verba hæc: *alterum os ab exteriori parte suræ positum est: quod ipsum quoque sura recte nominatur*; cum editiones omnes, quotquot consului, sic proponerent: *quod ipsum quoque supra*, falsa omnino scriptura & inepta; nam neque supra, hujus ossis nomen positum fuerat, nec recte a se positum Celsus ipse dixisset; noxia præterea & nostræ anatomicæ, & Latinæ linguæ. Ob hoc enim præsertim mendum Lexica, quæ ad hoc tempus inspexi, fere omnia carent hoc suræ significatu, quo suræ os, fibulam dictum, ipsum quoque recte a Latinis suram nominatum fuisse, constat. Constat, inquam: neque enim illa vox quoque, eo loco a Celso posita, aliud posse ibi reponi, quam *sura*, ostendit, una litterula quæ temere irreperat, detracta. Confirmat hæc locus alter, minus, ut videtur, animadversus, atque perpenſus, libro eodem, cap. 11. recedit in *brachio*,  
*radius a cubito; & in crure, tibia a sura*.

Vides, ut uno in capite mutationes tres adnotaverim, quæ non possint, ut opinor, facile reprehendi. Erunt, præter eas quas scio, aliæ quoque ejusdemmodi & in eo capite, & in cæteris, siquis inquirat: id quod mihi in præsentia faciendum non putavi, ne forte præter modum viderer adductus iis, quibus potius quæ in tam longo, tamque difficili opere humanitus exciderunt, ea mihi cum alias, tum modo præsertim adnotanda hinc illinc suscepi, modeste tamen, ut hominem decet suæ conscium tenuitatis, nec aliud, nisi veri studium, & adolescentum utilitatem, spectantem. Itaque ut magis appareat, & quo animo ad id aggrediar, nec vana dixisse paulo ante; dabis veniam, ut unam aliam eorum mutationum adjiciam, in qua simul pro merito possum laudare, simul gradum facere ad cætera quæ dixi, adnotanda. Est ea mutatio initio ipso unius ex proximis ejusdem libri octavi capitibus, videlicet quarti: *Igitur, ubi calvaria percussa, protinus requirendum est, num bilem is homo vomuerit; num oculi &c.* Hic non modo antea legebatur, *ubi calvaria pertusa*: sed cum essent nonnulli qui

(a) Epist. I. (b) Ib. (c) Comm. in hoc Celsi caput. (d) Ibid.

(e) in libri ora ad hunc loc.



li qui legerent *percussa*; Paavius ( *f* ) extiterat qui repugnaret propterea quia ista de quibus Celsus quærendum esse, dicit, non possunt de ejus sententia, ut proxima ostendunt verba, nisi osse fracto, evenire. Sed non attendit Paavius quæ paulo inferius subjiciuntur: *At si nihil horum secutum est, & jam potest dubitari, an os fractum sit &c.* quæ, si pertusam posuisset esse calvariam, non erat Celsus additurus. Quod cum perpenderet, ut opinor, Lindenius, sciretque; admonente Constantino ( *g* ), haud deesse codicem qui doceret, legendum esse *percussa*; hanc vocem; siquid ego judico; sapienter reposuit. Almeloveenius autem vel sapientius fecit, qui non solum eandem vocem accepit, sed insuper lectores monuit, cunctas editiones habere *pertusa*. Hoc vero illud est quod ad mutationes omnes, multoque magis ad eas potuisse facere oportuisset, in quibus loci scriptura sic varia esset, ut alii aliter, non improbabili ratione adducti, conjicere possent esse legendum.

Namque; ut ab levioribus incipiamus; suboffendi aliquis fortasse potest, cum apud Celsum legit libro 4. cap. 8. aut lib. 3. cap. 21. *In initio*, aut *In sequentibus diebus*; quæ operarum incuria exeidisse, crederem, nisi utrumque in Lindenii quoque editione esset, hoc vero ad eundem modum etiam postea scriptum viderem capite 23. Si igitur hæc non inconsulto sunt facta; admonendus tamen erat lector, in plurimis editionibus scribi *Insequentibus*, in omnibus autem, & in codicibus, quantum mihi licuit videre, *Initio*. Multoque erat magis admonendus, tametsi illa Empiricorum verba in Præfatione sic edantur: *Ob hæc, ne mortuorum quidem lacerationem necessariam esse. Quæ etsi non crudelis, tamen fæda sit, cum aliter pleraque in mortuis se habeant, &c.* non deesse tamen editiones in quibus ita istud membrum legitur; *quæ etsi non crudelis, tamen fæda sit*; ut inter præcedentia, & insequentia interjici, non cum his ultimis conjungi, statim ab omnibus intelligatur: Potest etiam non planissima alioquin, utrolibet legatur modo, ibi magis obscurari sententia injecto verbo alius apud alios significationis, *dimoveat*, ubi Celsus lib. 1. cap. 5. eum qui gravedini sit opportunus, vitare hanc posse, ad eum modum docens inducitur, *si caput in sole protegit, ne incendatur, neve subitum ex repentino nubilo frigus dimoveat*. Hic autem & membraneus codex, & omnes quæ apud me sunt, editiones maximo consensu habent *id moveat*. Etsi vero eodem capite paulo superius codex, & editiones inter se non consentiunt; & ille tamen, & hæc discrepant ab eo quod edidit Almeloveenius, *post cibum aut contentio, aut fatigatio animi*. In codice enim est *agitatio animi*; in editionibus *cogitatio animi*. Quæ si indicata essent; credo, non defuturum fuisse qui codicem sequi mallet.

In duobus autem quos continuo proferam, locis si idem factum esset; tanto magis futurum fuisse qui ab Almeloveenii exemplari discederet, certo scio. Est uterque locus libro 8. Alter cap. 7. *nisi duæ partes ejus temporis, intra quod quæque ossa confervent, transierint*. Alter cap. 10. *nonnunquam autem recte quidem ossa confervuerunt, superincrevit vero nimis callus*. Igitur cum ad primum ego III. ad te Epistola ( *b* ) adnotassem, in duobus codicibus pro *confervent* legi *conservantur*, in editionibus autem meis omnibus *conferuntur*; sexto fere post anno exitit Schulzius ( *i* ), qui actum agens, & vel quandam meam typographorum Constantini emendationem tacitus describens, eo transivit, ut Lindenium acriter damna- ret, quod non retinuerit *conferuntur*, quo in verbo *veteres in universum omnes consensissent*, & quo Celsus *sensu non dissimili* usus esset, cum de artubus lib. 4. cap. 22. hæc scripsit: *articulis inter se* Morgagni *Opusc.*

*conferuntur*. Ad me non attinet, cui hic nec feritur, nec metitur, illud excutere, an revera omnes veteres in eo verbo consenserint, quando duo, quos inspexi, codices non ita consentiebant, neque an sicuti ossa in artubus, recte dixit Celsus, inter se articulis conseri, nimirum mutuo se excipientia, & subeuntia, sic non minus recte potuerit dicere, ea conseri, cum fracta, quodam interjecto quasi glutine, cohærent. Si id agerem; quærere possem, ubinam Celsus, ut hoc significaret, eo verbo usus sit? cum glutinari quidem, coire, & præsertim confervere tunc ossa, dixerit. Quin, ut idem quod proposito loco scripserat, rursus capite 10. enunciaret; hæc, si codices, & editiones, velut tibi eadem III. Epistola ( *k* ) exposui, inspiciamus, hæc, inquam, habuit verba, *donec duæ partes ejus temporis, quod quoque os, vel quod os quoque confervet, compleantur*. Quæ quidem verba si egregie, præmonente Constantino, & Schulzio ipso ( *l* ) confitente, si egregie, inquam, sic a Lindenio intellecta atque edita sunt, ut nunc legamus *quo os quodque confervet*; quærere, si viveret, Lindenius posset, collato hoc loco cum superiore, cur si ubi codices habebant *confervet*, recte edidit *conferuntur*, cur, inquam, ubi habebant *conferuntur*, non laude, non excusatione, sed contumelia dignus sit, quod ad eundem modum emendaverit? Sed Lindenium tueri in præsentia, ut dixi, ad me non attinet, qui illud exemplis ostendendum susceperim, quam præstitisset, ut quidquid mutaret, de eo lectores admoneret, quo facilius quisque posset quam lectionem mallet, eam sequi. Itaque non improbo omnino dissensum Schulzii, multoque minus ejus laudabilem voluntatem id illustrandi quod a Celso bis dictum retuli de expectando donec *duæ partes* transeant ejus temporis quo os quodque confervet. Quæri enim posse, duas quintas, an septimas, paucis, quotas voluerit partes? Si igitur est qui duas tertias significari, non intelligat; huic ex Hippocraticis monumentis ( *m* ) locum exhibet unde id colligat: qui locus ab Almeloveenio indicari potuisset. Libens quoque laudo; ut alia quæ infra memorabo, præteream; lectionem quam scite excogitavit alterius, supra descripti, loci, in quo apud Almeloveenium legitur *ossa confervuerunt*, nulla adnotata ex editionibus, & codicibus varietate. Schulzius autem cum in suis sex editionibus; ad quas meas adde reliquas, & membraneum codicem; animadvertisset, scriptum esse *cæperunt*; ex hoc manifeste vitiato hic verbo effici posse, censuit, *coierunt*, verbum a Celso pro *confervuerunt*, si alios ejus attendamus locos, hic verisimiliter usurpatum. *Conferbuerunt* autem non ideo rejicit, quod huc non conveniat; neque enim ignorat, scripsisse Celsum superiore pagina *ossa non confervuerunt*, & inter se *ossa confervere*: imo ob hoc ipsum rejicit; non est enim, inquit, ab elegantia Celsi expectandum, ut unam eandemque loquendi formulam *tam exiguo intervallo, toties repetat*. Mallem, suam nobis lectionem probasset ex levi scripturæ dissimilitudine inter *cæperunt*, & *coierunt*, quam ex accuratiori isto formulas variandi studio: quod sæpe a Celso, ut magnum decebat, & perspicuitatis amantem Scriptorem, neglectum est: mirorque, Schulzium, cum exempla illa e decimo ipso capite mox proferret, *os coire*, & *cum cæteris coeant*, non attendisse, quatuor, nec totos, versiculos esse inter utrumque interjectos, cum sexdecim, & quatuordecim intercedant in exiguo illo, ut ipsi visum est, intervallo: ut fileam, cum Celsus dixisset de ossibus quæ interdum non recte inter se confervent, maxime proprium videri posse, ut eodem usus verbo, hæc illis opponeret: *nonnunquam autem recte quidem ossa confervuerunt*.

K

Utcun.

( *f* ) Comm. in hunc loc. ( *g* ) in ora ad hunc loc. ( *b* ) p. 64, 4. ( *i* ) Exercit. de Ossib. Conferunt. §. 1. & 2.  
 ( *k* ) p. 64, 9. ( *l* ) Exerc. cit. §. 3. ( *m* ) l. de Fract. n. 6.



Utcunque id est; optandum fuerat, ut qua felicitate & perspicuitate Schulzius ex *cæperunt* fecit coierunt, eadem ex *contactum*, quod in cunctis quibus tunc utebar, editionibus, sive ex *contractum*, quod in codicibus legi, III. ad te Epistola ( *n* ) adnotaveram, elicere potuisset vocem aliquam, Celso usitatam, & ad propositum facientem, quam in perdifficilem alioquin locum reciperemus. Ipse autem *confrutum* nobis excogitavit. Intelligis, me de iis verbis dicere quæ, conjectura adductus, quod tunc ostendi, Roberti Constantini, sic in Præfatione edidit Almelo-  
 7, 12. veenius, *duritiem, mollitiem, lævorem, confrutum: processus deinde singulorum & recessus*, videlicet humanorum viscerum secundum naturam se habentium. Igitur ut Schulzio ( *o* ) demus, quæ fortasse non omnes continuo darent, sicuti a deferreo *defrutum*, ita a conferreo potuisse fieri *confrutum*: deinde ex iis quæ, ut erat doctissimus, e compluribus Græcis Scriptoribus operose congeffit, illa effici quæ ipsi visa sunt, & huc redeunt tandem, ut Latini *confervere* dixerint non de ossibus modo, sed *de quavis parte solida, quæ appulsu fluidarum augetur, vel nutritur* propterea quod cum ea quoque *succus nutritius conferreat*; ut hæc, inquam, omnia demus; non tamen idcirco omnino, ut ipse, *persuasum* habebimus, hic a Celso *confrutum* fuisse scriptum: quæ vox neque apud ullum alium extat, quod sciamus, Latinum Scriptorem, nedum apud Celsum usquam, neque eo in loco intelligitur quomodo ad rem faceret. Loquitur enim Celsus; quod Schulzius ( *p* ) agnoscit; *non de præternaturali statu, sed maxime naturali*: in hoc autem quid sit istud *confrutum*, peculiariter, ut cætera illa, ab Anatomicis adnotandum, neque ipse declarat, nec ego assequor. Nam si est bona bene nutritorum viscerum habitudo; satis illa ex *colore, magnitudine*, aliisque ibi a Celso enumeratis cognoscitur; ut præteream quod aliis visum est, eo in loco vocem desiderari quæ non minus ipsa *lævori*, quam *mollities duritiei, & recessus processibus*, opponatur: quamquam in nostris, quæ recte se habeant, interioribus non facile video quid asperi obvium sit, ubi eam partem quæ in thorace est, excipias arteriæ illius quæ propterea aspera nominatur.

Verum ut hic locus ob vitiatum fortasse in codicibus verbum ( *q* ), ansam præbuit doctis hominibus aliquid audendi, & inusitatas voces excogitandi; sic alii in quibus nihil, quod sciam, vitii fuerat, cur Lindenio dederint mutandi occasionem, dicere non possum qui ejus codices non inspexerim: illud possum, multo minus locos istos alios, nisi variantibus lectionibus indicatis, fuisse mutandos. Libro 8. cap. 4. ubi verba fiunt de asperitate quæ in percussa calvaria specillo occurrit, dubitante Chirurgo, a futuris, an a fracto osse illa sit, in meis omnibus editionibus, & membraneo ipso codice legebatur *os aperire tutissimum est*. Ibi Lindenius, quasi veritus ne hoc quod de nudando osse dicitur, acciperetur, ut  
 515, 17. Paawius ( *r* ) facere inceperat, de terebrando, sic mutavit, *os deoperire*. Idem profecto mox voluerat Celsus, cum, aliquando post vehementiorem  
 515, 22. ictum, scripsit, *quamvis specillo nihil invenitur, tamen aperire commodius est. At si ne tum quidem rima manifesta est &c.* Hic vero nihil mutavit Lindenius. Quod si primo etiam loco fecisset; in Lexica receptum non esset verbum *deoperio*, ex hac quidem Celsi, si modo Celsi est, auctoritate. Sed illud, si non æque prisca, aliqua tamen tuetur auctoritas. Vox autem *carpus* ita produci-  
 129, 23. tur, ut quæ neminem præter Celsum auctorem habeat, qui lib. 3. cap. 6. scripserit, *ejus carpo manum admove*. Non facile autem illam produ-  
 cturum fuisse, credo, qui & codicem, & editio-

nes meas omnes habere, sciret, non *carpo*; ut Lindeniana, sed *corpori*, & Constantini esse explicationem, non lectionem, quod in ejus libri ora adjectum est *carpo: aut thoraci*. Sane Celsus non carpum, sed primam palmæ partem dixit lib. 8. c. 1. *In manu vero prima palmæ pars ex multis minutisque ossibus constat*: qui locus illud quoque docet, non *manum* dumtaxat explicatam aut dilatam, ut tradi video, *palmæ* vocabulo significari. Et si vero pro latina voce *corpori* non latinam *carpo* substitui, plerique difficiliter patientur; non tamen facillime sinent, in latinæ locum reponi alteram, quamvis latinam, & a Celso ipso alibi in usum vocatam, præsertim si illa quæ extrudatur, ejusmodi sit, ut, nisi caveamus, ejus interire paulatim memoria queat. Urinæ in mulieribus iter Celsus, quod dixerat lib. 4. cap. 1. virili esse *brevius & plenius*, id est minus angustum, ut libro 7. cap. 26. simul esse *rectius*, addit, sic eadem usus diligentia, ne Chirurghi ad lotium manu emolendum fistulam in illud demissuri, aliquando, ut nostra ætate etiam contigit, turpiter decipiantur, docet non solum ubi semper, sed insuper quem sæpe in modum se ostendat illius finis, *Mammulæ simile*, inquit, *inter imas oras super naturale positum est*. Et sic quidem codex, & editiones omnes habent quæ apud me sunt. Almeloveeniana autem habet *caruncula*  
 474, 21. *simile*, eadem certe sententia, & voce non minus latina. Sed vox *mammula* rursus in periculum adducitur, ne, quemadmodum in Varronis libris ( *f* ) expuncta fuerat, ni Viri doctissimi ex codicibus antiquis restituisent, ita libris etiam Celsi eliminetur. Eodem quoque in eadem editione sententia redit lib. 8. cap. 10. ubi postquam traditum est, in suppuratione eo dimittendum esse ferrum *qua parte maxime tumebit locus*, hæc adduntur: 530, 20. *Si nusquam tumor se ostendit; ubi maxime pus subsit, sic intelligemus &c.* Qui tamen noverint, in meis omnibus editionibus, & codice quoque sic legi: *Si nusquam caput se ostendit*, iidem fortasse hoc malent, præsertim si sciant, ad Plinium ( *t* ) docentem, quæ furunculos discutiant, *priusquam capita faciant*, sive, ut alibi ( *u* ) loquitur, *si nondum caput fecerint*, adnotasse Dalechampium ( *x* ), videlicet *si nondum in acutum fastigium sublati fuerint, si nondum in acuminatum verticem extuberaverint*. Ex qua capitis apud Latinos significatione illa orta apud nostrates videtur consuetudo, ut tumores quibus id accidit, ipsi dicant *venire a capo*. Celsus eodem intellectu alibi ( *y* ) scripsit; suppurationes *in exteriorem partem feruntur, & acuntur*.

Plinii facta mentio cujusdam me admonet; quem ipse laudavit ( *z* ), loci Cornelii nostri. Is est lib. 2. cap. 33. *herba muralis ( parthenium vel perdicium appellant )*. Quæ sic, ut Almelo-  
 109, 15. veenius, Editores, qui apud me sunt, cæteri pro-  
 posuere, uno excepto, Viro apprime docto, Joanne Ruellio. Hic enim Celsi libros, ab se emendatos, typographo dedit qui Parisiis A. 1529. vulgavit simul cum Scribonio, ut gratus in litteris fatetur, huic præpositis, ad ipsum Ruellium scriptis. Ruellius igitur ista herbæ muralis nomina quæ Almeloveenius inter uncas inclusit, non latinis, sed græcis & litteris, & terminatione excudenda curavit. Quod cum judicio adductum suo, tum libris calamo exaratis, quibus abundasse legi, in primis permotum, fecisse, puto, quando ego quoque in membraneo codice non aliter scripta ea nomina animadverti. Accedit ipsius Celsi duplex in eodem capite exemplum, qui latinis herbæ sanguinalis, & solani vocabulis cum græcis litteris alia quæ apud Græcos in usu erant, adjecerit; non apparet, cur in herba murali idem facere non debuerit, præ.

( *n* ) p. 53, 12. & 33. Edit. Patav. ( *o* ) Exerc. cit. S. 10. & seqq. ( *p* ) S. 24.

( *q* ) de quo tamen vid. Epist. VIII. infra medium. ( *r* ) Comm. in hunc loc. ( *f* ) de Re Rust. l. 2. c. 3.

( *t* ) Nat. Hist. l. 22. c. ult. ( *u* ) Ibid. l. 26. c. 12. ( *x* ) ad cap. 12. cit. ( *y* ) l. 2. c. 8. p. 67, 71.

( *z* ) Hist. cit. l. 21. c. 30.



præsertim cum alibi quoque eandem servaverit consuetudinem, ut capite 25; ne alia quæram exempla; libri 5. in *herbasolari*, servaturus quodque, ut opinor, libro 6. cap. 10. in *radice ea*, quam *dulem* appellant, nisi ut erat unicuique longe notissima, minime opus fuisset græco etiam nomine, præsertim quod ipsa significationis vi nihil discreparet a latino, designare; quapropter ex verbis illis apud Scribonium (a): *glycyrrhizæ succi* (est autem radix dulcis) quatuor hæc ultima ideo neglexisse Marcellum, quod glossa esset, Rhodius (b) non dubitat; neque enim res adeo facilis, inquit, interpretationem postulabat. Si igitur græce hic illa nomina adscripsit Celsus; viderint, quo jure faciant qui *parthenium* & *perdicium* inter latinas voces referunt ex Celsi quidem auctoritate, cum interea *herbam muralem*, & *solarem*, & *radicem dulem* ejusdem, ut possent, exemplis non confirment. Id viderint pariter qui hunc locum ita ediderunt, uti descripsimus: nam præter græcas litteras, & terminationem, vox *Græci*, quæ in proximis exemplis non omittitur, desideratur. Sed altera ex parte objici potest is quem indicavi, Plinianus de Celsi locus. *Parthenium*, alii *leucanthen*, alii *tamnacum* vocant. Celsus apud nos, *perdicium* & *muralium*. Non est, mi Vulpi, tempus ut hinc ad Rem Herbariam divertam, neque ut, Plinii verba emendare conatus, actum fortasse agam. Sed quantum ex Dalechampii editione, qua melior, cum hanc Epistolam scriberem, non erat in manibus, & ex iis quæ in ejusdem margine adscripta huc sunt, ego quidem possum conjicere; Plinius potius est ex Celso, quam Celsus ex Plinio, emendandus: apud quem alibi quoque (c) cum alter ex hoc Celsi capite profertur locus, *strichnon* latinis litteris descriptum video, quam vocem Celsi Editores, nisi siqui forte græcis carebant typis, græcis litteris scripsere. Quod si ad Plinium, quotiescunque aliquid ex Celso; quod non sæpius tamen facit; nominatim producit, hujus adnotata fuissent verba ex iis videlicet qui extant, libris; interciderunt enim qui ad Rem Rusticam attinebant, ad quos videntur referenda quæ producta sunt lib. 10. cap. 53., aut si ad Celsum indicata semper essent loca quibus ejus sententia a Plinio laudatur; fortasse alter ad alterius scripturam meliorem reddendam opis aliquid afferre potuisset.

Verum ad *Almeloveenium* ut redeam, vel potius redire videar; neque enim reapse digressus sum, cum hæc attrigi quæ de vocibus aliter ab Ruellio, aut apud Plinium scriptis, ad Celsum poterat adnotare; debebat certe de mutato primo verbo capitis 1. lib. 7. lectores admonere. Legebant ibi ante Lindenium omnes quos inspeximus, *Luxata*: quam vocem, ut accipi quidem solet, res ipsa evidenter respuit; agitur enim de sugillatis, & contusis: tum Celsus, an quod vetustatem olere crederet? Catoni, ejusque antiquorum verborum studio Crispo Sallustio & *luxatum*, & *luxum* reliquit: & quanquam ii qui mox scripserunt, *luxare*, & *luxatum* rursus in usum revocaverint; ipse tamen fugit studio tanto, ut libro 8. non modo initio capitis 2. sed & capite 11. & quatuordecim quæ sequuntur, cum de luxatis ossibus semper ageret, nunquam hoc verbo, sed aliis, & pluribus potius, ne eo uteretur, usus sit. Nam de loco, aut sedibus suis moveri, excidere, elabi, prolabi, loco suo non esse, expelli, propelli, procidere, delabi, incidere, recedere, promoveri, labi, prorumpere, prodire ossa, dixit, & pleraque horum verborum repetere etiam sæpe maluit, idque exiguo intervallo, quam semel, ossa luxari, scribere: ut nisi aliæ essent quæ alias (d) proferrentur, hæc una animadversio satis ostenderet, non esse a Celso inscriptiones istorum capitum *De Ossibus Morgagni Opusc.*

*sibus luxatis*: De *Maxilla luxata*; & cæteras ejusdemmodi. Recte igitur videtur fecisse Lindenius, quod primum illud sustulit verbum *Luxata*: fortasse etiam hoc recte, quod pro illo rescripsit *Vexata*, non modo quia levissima mutatione, sed & quia Constantino, imo quodam Constantini codice non dissentiente, id fecit. Ille enim huc adscripserat: *contusa scriptum inveni: itemque vexata, quod plane non displicet, si pro contusis sumatur, ut apud Gell.* Hic vero loco quodam suarum *Noctium* (e), quem hic designari puto, sic habet: *qui fertur, & raptatur, atque huc, atque illuc distrahitur, is vexari proprie dicitur.* Verum hinc sequitur, vexationem posse quidem esse sugillationis causam; non ipsam tamen esse sugillationem. Nec quidquam de suo, quo hic uteremur, Macrobius (f) addidit, cum hæc, atque alia ex Gellio innominato descripsit. Celsi æqualis Auctor, Scribonius (g) rem magis illustrasset, si quos ex ictu, casu, --- contusione dolentes memorat, nec minus arbore alta delapsos, vel scalis devolutos, excussos a rheda vel curriculo, atque ita tractos, non illos manifesta causa vexatos, sed simpliciter vexatos dixisset, neque aliis ex occulta causa laborantibus opposuisset. Celsus autem ipse, qui sugillationem lib. 5. cap. 18. sic designaverat, si facie contusa, livor subcruentus est, capite autem 23. collisa corpora vel per ictus, vel ubi ex alto deciderunt, memoraverat, & cap. 26., nec semel, eadem significatione collisum scripserat, aut collisa, & lib. 2. c. 10. si ex superiore parte aliquis decedit, si contusus est &c. cur non hic *Contusa*, aut *Collisa* dixit; sed *Vexata*? Ob has igitur, atque alias quæ in aliquorum animis insidere possent, dubitationes, ut si forte *luxata* hic crederent Celso aliud, quam apud alios soleat, significare, tum etiam ne priusquam optimi non unius codicis auctoritate res, quæ ratione non posset, confirmaretur, alii essent qui *vexata* pro contusis accipi jam posse, Celsi auctore, non dubitarent; ob hæc, inquam, omnia quid antea scriptum esset, non videbatur reticendum.

Sic etiam admonendierant lectores, apud omnes, quantum nos quidem vidimus, lib. 4. cap. 2. pro *capillitio* legi *capillo*, aut, sicut in codice a Constantino inspecto, *capillis*; cum tamen noster codex *capillo* habeat; in iis verbis, sub quo nomine, capitis, nunc significo eam partem, quæ capillitio tegitur; ne ad unum quod ex Apulejo (h) proferri video, exemplum insuper Celsi addi posset, pro certo existimaretur. Sic & inferius illos omnes habere, non *spongiam concavam*, subinde *aqua frigida expressam*, sed in *aqua frigida expressam*, idque melius aliquanto; nam verius fortasse fuit ex aqua; sic enim cap. 24. *spongia imposita, quæ subinde ex oleo, vel aceto, vel aqua frigida exprimitur*: libro autem 6. cap. 6. non tanto finis minus expeditior est, sed minus expeditus est: & sane comparativo aliquando magis adjunctum legi; minus nec legisse memini, nec, si rationem attendas, potui. Utrobique autem codex cum editionibus consentit. Denique in eo loco libri 7. cap. 19. Neque tamen nimium ex ea tunica rursus relinquendum est, indicandum erat, editum fuisse ab illis omnibus id quod in codice, *sursus relinquendum est*. Nam etsi quæ proxime præcedunt, Sed non a summa inguinis plaga, verum infra paululum ea abscindenda, utrumlibet legere permittunt, placetque ibi rursus dici pro e contrario; decebat tamen, non ignorari, Celsum fortasse ipsum quoque ita *sursus* posuisse, ut motum non significaret locum versus.

Quin etiam ubi non tanti referebat, quid antea legeretur commemorare, minime id erat præmittendum, ut libro modo citato 7. cap. 13. in his verbis, *Medio tumor una linea inciditur*,

K 2

scri-

(a) Compos. Med. 86. (b) Nos. ad cit. Compos. (c) l. 27. c. 13.  
(d) Epist. VII. §. Sed ut plenius. (e) l. 2. c. 6. (f) Saturn. l. 6. c. 7.  
(g) Compos. Med. 101. (h) Metam. l. 2.



- 447, 28. scriptum fuisse in meis omnibus libris ( quibus & codicem addes ) *Medio tumore*, Pinziano excepto, cujus lectionem *tumor* qui in margine adnotarunt Constantinus, & Ronseus, recte quidem fecerunt, quippe cum Celsus alibi, ut puta libri hujus cap. 409, 27. 2. scripserit, *maiores sinus --- duabus aut tribus lineis incidendi sunt*; sed idem tamen cap. 9. etiam scripsit, *ab interioribus ejus angulis lineas transversas incidere*: Ut cap. 3. cum laudantur, puris jam redditis ulceribus, *cibi potionesque corpori faciendi aptæ*, hanc utique lectionem dignam esse quæ hic probetur, ubi de carne producenda agitur; nec tamen extra librorum marginem, quos duo iidem Viri procurarunt, usquam extare, quod sciam; sed pro ea fuisse corpori reficiendo: Ut in Præfatione ad librum eundem hunc 7. ea verba: *sed Chirurgus perinde faciet omnia, ac si nullus ex vagitibus alterius affectus oriretur*; apud omnes, si Cæsarium, & Pantinum excipias, sic legi, *perinde faciat*: & sane his nullo alio interposito verbo, ea præponuntur, *non ut clamore ægri motus, vel magis, quam res desiderat, properet, vel minus, quam necesse est, secet*: Ut lib. 6. cap. 6. ubi nunc scriptum vides, *alvum duci, longioremque inediam induci, necessarium est*, fuisse olim scriptum in meis editionibus cunctis id quod in codice, vel aurium ipsarum judicio, melius, *inediam indici*: Ut lib. 4. cap. 4. pro illis *caput leniter dolet*, quæ Pinzius quoque, & Junta, & Cæsarius habent, reliquos, ut codex, habere *leviter*, quemadmodum & Celsus alibi apud Almelveenium ipsum loquitur lib. 8. cap. 9. *is locus leviter indolescit*: Denique ut lib. 3. c. 27. ubi editum nunc est, *quicquid est puris, exeat*, in illis omnibus exemplaribus pro *exeat* fuisse *excedat*, si unum Cæsarii demas, in quo erat *excidat*, errore fortasse operarum, facili, nec hic quidem sententiam mutante, ut contra nonnullis aliis locis animadverti, velut extremo capite 9. libri 8. Ubi enim legitur, *si quid ex vertebra excidit, aut aliquo modo fractum est*, quasi ibi ageretur etiam de Spinæ luxatione, cum de fractura solum agatur, ibi codex, & Pinzii, Junta, & Manutiorum ambæ editiones sic habent, *si id quod ex vertebra excidit, aliquo modo fractum est*; in cæteris est *excidit*, in quarum aliquibus, ut Constantini, & Ronseii, deest *quod*, tamen si ex libri ora constet, in veteri codice non defuisse. Itaque mutato *excedit* in *excidit*, inepta primum sententia, deinde haud intelligibilis facta est: quæ res Lindenium coegit, ut pro *id quod ederet quid*, & particulam *aut* adjiceret; sic autem rursus quidem intelligibilem sententiam reddidit, sed ab Auctoris mente, nisi ego fallor, plurimum discrepantem. Hoc enim voluisse Celsum, arbitror, si aliquo modo fractus est vertebrae alicujus processus, is videlicet qui magis est injuriis expositus, nimirum posterior. Processum autem ut designaret, hic dixit *id quod ex vertebra excidit*, quemadmodum ultimo hujus libri capite dixit *quod excidit*, ut significaret nudi ossis eminentem partem, primo autem capite os calcis *quadam parte sinuari, quadam excensus*, id est processus, habere: quæ hoc libentius adnotavi, quia isto modo, & significatione in Lexicis non inveni.

Jam vero in eodem primo capite libri 8. quædam juvat animadvertere. Et primum ubi nunc legis, *Sed ea foramina, quæ a summis ad intimas nares simplicia sunt*, magno antea probandoque consensu legi consueverat, *a summis ad imas*.

506, 5. Illa autem multo inferius, *Ima vero spina in coxarum osse definit*, optime fortasse, ex conjectura Constantini, edita sunt, cum scriptum sit *desidit* in cunctis editionibus, si Manutiorum utramque excipias, quæ, & membraneus codex habent *desidit*. Constantinus tamen sic adnotaverat *desidet* vel *desinit*, minus a codice recedens in *desi-*

*det*: quanquam illa vox *descedit*, vel potius *desidit*; si quod supra dixerat Celsus, *parum desideres sinus*, attendamus; indicare videtur aliquid de Sacri ossis concavitate, in qua, hætenus extuberrans, spina repente subsidit. Cujus omissionem ossis minus in Celso notasset Paawius ( i ), si hæc suspicatus esset, aut etiam si in descriptione ossis coxarum Sacrum quoque comprehendi, animadvertisset; ex dextero enim & sinistro unum, idque transversum os Celsus non faceret, si, ut pectinem, ita Sacrum etiam os excluderet. Superius vero ubi descripti sunt dentes, & recte puto ab Almelveenio hæc ferme omnia esse proposita; *utrinque fere maxillares quini sunt, præterquam in iis, in quibus genuini, qui sero gigni solent, non increverunt*, & recte simul quæ Paawius maluerat, esse indicata: qui cum *quaterni*, ut omnes, legeret; mirum non est, si non in jam mutaret, haud mutandum amplius ex quo, antiqui apud Constantinum codicis auctoritate, ab Lindenio rescriptum est *quini*. Legebant præterea omnes in quibus *tres ultimi*, ubi penultimam voculam primus, quod sciam, expunxit Paawius, egregie quidem, re ipsa videlicet, ac membraneo, quod laudare solitus sum, exemplari consentientibus; in eo enim sic inveni, *quibus hi ultimi*: quam postremam, quæ apud omnes est, vocem nescio cur mutaverit Lindenius. Ad dentes quoque ea pertinent, *cum toto osse quod superiores dentes excipit*. Sic enim Lindenius, Constantini editionem, & quod in margine alii habent, secutus, edidit; nemine admonente, cæteros tamen habere *exigit*, quod in codice etiam video; & Celsum ipsum non uno loco, ut non multo infra, *ab utroque latere processus duos exigunt*, & mox, *deorsum versus processus exigunt*, & lib. 3. c. 28. *radices altius exigunt*, vim hujus verbi, non satis fortasse in Lexicis representatam, expressisse: & quamvis ad hunc ultimum Celsi locum adnotet in Scholiis Almelveenius, tribus exceptis Editoribus, alios maluisse ex codicibus *adigunt*, se vero ex Columellæ consuetudine *agunt*, vel *exserunt*; tamen sic habeto, præter illos tres, apud me septem alios esse Editores, qui *exigunt* retinere, vix duobus in margine commemorantibus *adigunt*, Columellam ( k ) autem vites scripsisse & *materiam*, & *uvas duplices*, & *complures exigere*. Sed quædam videtur nonnullorum esse quasi conjunctio de verbo isto *exigo* e Celsi libris exigendo. Nam ecce tibi etiam Paawius, qui in eo quem primum de tribus produximus, loco pro *exigunt*, lego, inquit, *exserunt*, nullo, quem laudet, codice, nulla, quod sciam, editione assentiente. Sed nimirum cum alter altero in loco retineat *exigunt*; non satis apparet, cur in utroque non debeant retinere. Jam vero in iis quæ continuo sequuntur, quidquid a Paawio, aut ab Lindenio mutatum est, videamus. Ea sunt: *Vertebrae, mediae perforatae, qua spina medulla cerebro commissa descendit*; *latera quoque inter duos processus tenuibus caris pervia, per quæ a membrana cerebri similes membranulae deducuntur*. Codex vero, omnesque editiones meæ pro *latera quoque inter*, habent *circa quoque per*; pro *pervia* autem, quod sic mutavit Paawius, habent *pervia*. Sed; ut alia omittam; qui de particula *per* in alias, ut *inter*, aut, sicuti Constantinus, & Ronseus in libri ora, *subter* mutanda cogitarunt, non videntur animadvertisse, quemadmodum, in cervice præsertim, per cavos a superiore facie processus meningis, & nervi exeant, ut neque, si hic ea particula mutanda sit, capite quoque 14. mutari oportere, ubi summo omnium, atque adeo ipsorum etiam consensu scriptum est, *vertebras non posse excidere, nisi & medulla, quæ per medium, & duabus membranulis, quæ per duos a lateribus processus feruntur, & nervis qui continent, ruptis*. In terea

( i ) Comment. ad locum prox. super.

( k ) de Re Rust. l. 5. c. 6. &amp; l. 3. c. 2. &amp; 6.



terea juvat animadvertere; cum Celsus vincula, & tendines, ut solet, nervorum nomine hic designet, pro veris autem nervis nihil nisi membranas memoret, a cerebri videlicet membrana deductas; utroque loco cum iis facere videri qui his temporibus vim eorum quos nervos proprie appellamus, in horum meningibus, non in substantia ipsa nervea, agnoscunt, præsertim cum de oculo quoque verba faciens lib. 7. cap. 7. tunicas quidem scleroticam, & choroidem ajat  
 432, 16. *extenuatas & in unum coactas per foramen, quod inter ossa est, ad membranam cerebri pervenire, eique inhaerescere*; substantiam autem, quam convelliunt, nervi Optici, prorsus negligat. Sed ne esse nimius videar in exemplis, ad eam Facultatem quam profiteor, attinentibus; rursus ad alia quæ alio pertineant, redeamus.

Utinam quod lib. 7. cap. 30. fecit Almelo-veenius, id semper facere potuisset. Ibi enim cum fermo sit de podicis venis sanguinem fundentibus,  
 494, 19. *et si edidit ut omnia vasa quasi capitula conspicua sint*; tamen cum monuerit, esse qui aliter legant, excitavit ad editiones alias, ipsosque codices inspiciendos. Quarum illæ, exceptis Manutianis, in quibus est *omnes venæ*, cum apud me habeant, non sine manifesto errore, *omnia vela*, codex autem *omnia vena*; proclive est attendenti, de iisdem venis scripsisse Celsum cap. 18. super-

rioris libri *ora venarum tanquam capitulis quibusdam turgentia*; proclive est, inquam, in Constantini inclinare sententiam, qui pro *vela* ad-

scripserat *venarum*, ut legatur *omnia venarum quasi capitula*. Sed eodem libro 7. cap. 26. ubi post signa calculi vesicæ spinosi in cervicem delapsi, cum Lindenio edidit Almeloveenius, neque  
 479, 24. *adhibenda manus, nisi id consistit*, nec de varietate lectionis admonuit; quotus quisque erit qui suspicetur, in cunctis iisdem editionibus, Manutianis quoque, & præterea in membraneo codice, & quod probe memini, etiam in altero illo Veneto legi *nisi id consistit*: quam lectionem illud confirmat quod supra inculcatum fuerat, *ne curandum quidem, nisi cum hoc*, nempe calculum descendisse in cervicem, *indiciis suis cognitum est*.

Quamvis autem infra ubi post sectionem præcipitur, ut si quis exiguus superfit calculus, potius relinquatur, hæc subjiciuntur,  
 480, 31. *quia longa inquisitione vesica læditur, excitatque inflammationes mortiferas; adeo ut quidam non secti, cum diu frustra per digitos vesica esset agitata, decesserint*: quamvis, inquam, noster codex habeat *quidam non secuti*; non reticendum tamen fuerat, editiones, quotquot a quod me sunt, ad unam omnes negantem particulam haud habere; ut si qui mallent, id quod a primo postulare videtur locus, has sequi, possent. Multo autem minus id fuerat supra negligendum, cum hæc

proposita sunt, *Manus sinistra calculum compellit deorsum digitis, donec ad cervicem pervenitur. In quam, si oblongus est, sic compellendus est, ut ne pronus exeat: si planus, sic, ut transversus sit: si quadratus, ut duobus angulis sedeat: si altera parte plenior, sic, ut prius ea, qua tenuior sit, evadat*. Namque ut hæc sint ad eorum normam quæ in libri ora adscripserat Constantinus; tamen Constantinus ipse edidit, uti plerique, *sinistrae digiti deorsum eum compellunt*, uti omnes autem, *ut pronus exeat*: quæ duo sic etiam in codice leguntur. Nec ratio quam attulit pro nova scriptura *ut ne pronus*, sic placere omnibus videtur posse; ut Lindenio placuit. *Jacens ovum oblongum pronum est*, inquit Constantinus: *stans erectum*. Pronus calculus minime, aut vix extrahi posset. Imo ovi exemplum adversatur; neque enim per id foramen per quod jacens traduci potest, traduci poterit erectum: itaque Celsus ovi similem calculum, id est altera parte plenior, altera tenuiorem, non erectum, sed pronum educi,

voluit, cum dari operam jussit, ut prius ea parte qua tenuior sit, evadat. In cæteris autem quæ his interjecta descripsimus, num recte omnia interpretetur Constantinus, alii viderint; res enim sane digna est de qua quærat. Nos vero, cum in iis nihil prorsus a communi scriptura alienum animadvertamus; ad alios Celsi locos in quibus ea mutata est, transimus.

Libri igitur octavi capite 10. ubi in ossis artuum fractura cui carnis quoque vulnus accesserit, fragmentum esse, docet, manu in suam sedem recondendum, ac, si id manus facere non  
 539, 34. *potest, vulsellam, quali fabri utuntur, injiciendam esse acutæ ossis prominentis cuspidi, ab ea parte, qua sima est; ut ea parte, qua gibba est, eminens os in suam sedem compellat*; admonendum omnino fuerat, pro *acutæ ossis prominentis cuspidi*, quæ nescio ex quo exemplari accepta sint, longe aliud alios legere consuevisse. Codex enim, & Pinziana, & Juntina editio ibi habent *recte se habendi capiti*, id est *habenti*, ut plerique postea ediderunt; nam aliqui *habenti capite*, unus Cæsius *habente capite* proposuerunt. Recte autem se habens caput, videtur hic extremum ossis, cujus ossis fragmentum prominet, firmum, & idoneum ad sustinendum vulsellæ illius quasi vectem, significare: quale non fore, si in acutam desinat cuspidem, tum ratio docet, tum Hippocrates (l) in re non ita dissimili, his verbis confirmat: *Si vero superna ossis pars immutata fuerit, ac confracta, ut vecti adhibendo locus non sit commodus; sed acutum quid prominet; tunc osse scalpendo derafo, securam vecti sedem facere oportet*. Acutam autem cuspidem in fragmento quod reponi debet, intelligi hic non posse, ea quæ modo scripserat Celsus, ostendunt, si fragmentum *acutum* est, *ante acumen ejus, si longius est, præcidendum; si brevius, limandum, & utrumque scalpro lavandum*. Libri quoque ejusdem caput 12. quod est de maxilla luxata, cum ad comprobandum, quanti referat, post ejus repositionem liquidiore cibo uti, sic desinat,  
 546, 18. *adeo ut fermo quoque frequens, motu oris temporum nervos lædat*; non tamen ad eundem modum verba hæc in libris cæteris leguntur. Omnes enim, & codex pariter sic habent, *adeo ut fermo quoque frequenti motu oris per nervos lædat*. Quod qui sciat, is fortasse suspicetur, minus hæc eo pertinere quo indicavit Constantinus, cum ad marginem rescripsit *motu, oris nervos perlædat*, non satis, ut videtur, animadvertens, num hoc verbum apud idoneos Scriptores legatur, aut qui sint oris nervi, aut denique num eorum lationem hic præcipue spectare conveniat; minus, inquam, hæc verba eo pertinere suspicetur, quam ne articuli maxillæ, in suam sedem nuper repositæ, cum quiete egeant, sermone lædantur, quippe maxilla, inter loquendum, pro vario oris motu per suorum identidem musculorum tendines coagitata. Sic fuisset suspicionibus aliis locus lib. 6. cap. 6. si, cum illa de lusciosis proposita sunt, *inungi oportet sanguine jecinoris (maxime hircini; sin minus caprini)* ubi id assum coquitur, excepto; indicatum simul esset, Manutios tamen pro *sanguine* scripsisse *humore*, plures autem, in quibus Cæsius, Constantinus, Ronseus, in libri ora edidisse alios *sanie*, alios *humore*, alios utrumque. Exitisset enim profecto aliquis, cui alterutra harum vocum magis, quam *sanguine*, placuisset, sicque Pantinum, a quo Celsus propterea arguitur, elusisset. Pantinus enim in sua ad hunc locum Adnotatione, cum Dioscoridem (m) produxisset, a quo adversus ejusmodi vitium *caprini jecoris assi* *ἰχθὺς* commendatur, & Plinium (n), qui pro Dioscoridis *ichore sanie* vertit (quasi Dioscoridem ante Plinium scripsisse, constaret) Celsus vero, inquit, *minus bene, sanguinem interpretatur*. Et mihi quidem Trallianum (o) quo-

(l) l. de Fract. n. 35. (m) l. 2. c. 39. (n) l. 28. c. 11.  
 (o) De singul. corp. part. vitiiis &c. l. 1. c. 23.



quoque, ut Ronseus hic in Enarratione admonet, animadvertenti in eodem casu laudantem, si ex hircino jocinore, dum assatur, ichora colligamus, & inde lumina perungamus, venisset in mentem, ut ex humore, quod verbum in codice quoque inveni, ichore in Celso rescriberem, si vox ichor ut in Lexicis ex ejus lib. 5. cap. 26. sect. 20. producta est; sic ibi latinis, non græcis, literis scripta haberetur.

Loci duo sunt libro 4. alter c. 9. alter 11. Ille ad hunc modum ab Almelveenio proponitur: *olea ex muria dura; lactuca intincta in aceto*. Omnia ex Lindenio sunt præter illud *dura*. Ediderat enim *dura*, ut omnes, qui ex Rei Rusticæ Scriptoribus probe scirent, quid esset muria dura. Itaque operarum inscitia id factum crederem; nisi certior fierem, in prima quoque Almelveenii editione scriptum esse ad eundem modum. Sed & omnes, ut codex pariter, post *dura* habent *tincta in aceto lactuca*: ut quamvis alibi scriptum esset *olea alba ex dura muria, eadem aceto intincta*; tamen nihil mutandum, non monito lectore, fuisse videatur, præsertim cum Lindenius ipse lib. 8. cap. 4. in Celso retineat, *spongia subinde in aceto tincta*. Locus alter est: *Admovendumque naribus pulegium ex aceto, vel polenta vino aspersa, vel mentha, vel quod secundum naturam est*. Qui minime ignoret, in plerisque editionibus legi *vel mentha, si nondum matura est*, adscribente Constantino nempe materia, fortasse hoc malit. Qui vero animadvertat, non fuisse opus hoc addere, cum illa imperata sint, *si adhuc subcruda sunt, quæ vomuntur*, simulque sciat, in codice, & in pervetusta Pinzii editione, & Junta, & Manutiorum utraque scriptum esse, *vel mentha secundum naturam est*, is, fieri potest, ut dictum accipiat de mentha, ut per se est, non ut pulegium ex aceto, neque ut polenta vino aspersa. Ibi etiam ubi gestationum lenissima genera, & instrumenta proposuerat Celsus lib. 2. cap. 15. dixeratque, *Si nihil horum est, suspendi lectus debet, & moveri*; quod auxilium erat libro proximo cap. 18. in phreneticis, capite autem 27. in iis qui resolutam haberent partem corporis, laudaturus; cum illa continuo adjiciuntur: *Si ne id quidem est, at certe uni pedi lecti fulcimentum subjiciendum est, atque ita lectus huc & illuc manu impellendus*; ibi igitur si adnotatum esset, ab aliis scribi *uni pedi lecti funiculus subjiciendus est*, tanto consensu, ut neque in codice, neque in editionibus meis omnibus aliter legatur; aliquis fortasse scripturam hanc probare maluisset, tanquam magis post illa quæ præcedere diximus, congruentem, ut cum suspensus omnibus pedibus haberi lectus non posset, at uno haberetur. Cæterum fulcimentum quoque, uni pedi subjectum, cum pariter præter illum quem secundum lineam diagonalem habet oppositum, reliquos pedes suspensos servet; eundem præstare usum potest, præsertim si ejusmodi sit quale cunis supponitur ut manu huc & illuc agitentur. Quod ob lectorum fulcra illa mobilia dico quæ ad eundem usum ab Antyllo, & Aetio memorata, ad hunc ipsum modum interpretatur Mercurialis meus (p): qui cætera gestationum similium genera apud priscos Medicos usitata, omniumque utilitates explicans, hoc quo *uni pedi lecti funiculus subjiciebatur*, ait Vir eruditissimus, primum (quod ipse sciat) inter Medicos Celsum monstravisse. Libro etiam 4. cap. 4. cum in gravedinis, aut distillationis initio hæc præcipiuntur, *Ambulatione tantum non acri, sed recta utendum est*, haud ab re fuisset monere, hæcenus omnes scripsisse *tantum acri, sed recta*, nisi quod Ruellius, & Stephanus *recta* ediderunt. Insuper Rubeus (q), cur acris, & recta esse debeat, ostendit, & Celsi commemoravit loca, quibus aeris inæqualitate maxime ea ipsa concitari in-

commoda, docuit lib. 1. c. 2. & 5. Attamen eodem cap. 2. *melior*, universe dicitur, *esse ambulationis sub divo, quam in porticu, & recta, quam flexuosa*, & cap. 4. quibus caput infirmum est, iis commendatur *multum ambulare*; sed, si licet, *neque sub tecto, neque in sole*. Nescio, an quidquam, saltem ejusmodi, dici possit pro eo loco libri 1. cap. 3. *Si assidua oscitatio urget*; cum ibi nemo; quod sciam; id legerit, sed omnes *fatigatio*, quam vocem ut ea quæ præcedunt, ac sequuntur, requirunt, sic Thriverius (r), & Pantinus (s) non nisi ea posita sententiam Celsi explicarunt. Nam quod lib. 2. cap. 7. nunc editum est secus atque in iis quos vidi, omnibus, *Suppuratio vero pluribus modis excitatur*, pro pluribus morbis, quæ lectio satis cum proximo utrinque Auctoris sermone congruit; tamen Constantinus in margine adscripsit, *legi etiam modis*. Et quamvis in iis verbis lib. 6. cap. 18. *Sive autem hoc modo cutis (de præputio sermo est) vincta erit, sive nunquam repugnaverit*, legendum potius *unquam* cum Pinzio, Junta, Cæsario, Ruellio videatur propterea quod supra positum est, *reduci eam cutem, aut rursus induci non posse*; tamen de hoc amplius videndum est, cum reliqui, & codex habeant *nunquam*.

At tanto magis discrepant in loco altero ejusdem capituli: *Quod si ex ictu testiculus aliquid desit, fere quoque pus increfcit*; ut minus oporteat mirari, editum esse ad hunc modum quo repugnantia dici videntur. In codice enim scriptum est, *si ex ictu alii desit*, in editionibus, *si ex ictu testiculis aliquid desit*; sed in horum aliis mox vocula desideratur *pus*, quæ in aliis, & in codice est. Denique Constantinus, & qui hunc in libri oris plerunque sequitur, nusquam nominat, Ronseus novam lectionem, nec omnino contemnendam, adnotarunt, *si ex ictu testiculis aliquid hæsit, fere quoque pus increfcit*. Ad eosdem testiculos, tres attinent loci cap. 18. lib. 7. hic minime prætermittendi. Primus est: *testiculi simile quiddam glandulis habent; nam sanguinem non emittunt, & omni sensu carent: dolent autem in ictibus & inflammationibus tunicarum, quibus hi continentur*. Codex quidem, meique omnes libri pro glandulis habent medullis, cui lectioni plerique credent ista ipsa favere quæ vidisti continuo sequi. At duo quos novissime laudavi, in margine adscripserunt *glandulis*, Galeno astipulantes: cujus etiam gratia Rubeus (t) hanc vocem mavult. Verum mox gravior est dubitatio: nam *si omni sensu carent testiculi*; quomodo in tunicarum ictibus dolent? Certe hæc dubitatio in eam non cadebat, quam omnes antea sequebantur, scripturam, *dolent autem --- tunica, quibus hi continentur*. Paulo inferius hæc alia occurrunt: *membranulæ inter duas testium tunicas superioribus partibus tenues patulaque sunt*. Hic vero legebant cuncti *leves parvulaque sunt*. Quæ res, cur id ita mutatum sit? Locus hoc ostendit tertius, qui, non ita multis interjectis versiculis, ad hunc modum proponitur: *rupto in inguinibus peritonæo, pondere eo devolvitur aut omentum, aut etiam intestinum: atque ibi reperta via, paulatim ab inguinibus in inferiores quoque partes nisum, subinde nervosas tunicas, & ob id, quod dixi, patentes diducit*. Verum hic quoque, ut Manutii ediderint *nisum*, & Constantinus in margine *ob id* deleverit; ipse tamen, & cæteri sic exhibuerunt, *demissum, subinde nervosas tunicas, & ob id ejus rei patientes diducit*. At in extremo proximo capite 19. etsi in verbis illis, *Inflammatione incisi scroti finita, propter nervos propiore cataplasmate, dein cerato utendum est*; etsi, inquam, antea legebatur *priore cataplasmate*, & sane unum, atque alterum paulo superius propositum fuerat; tamen, ne aliud dicam, is saltem, quem tibi sæpius nomino, Constantinus monue-

(p) Arr. Gymn. l. 3. c. 12. & l. 6. c. 11.  
(s) Annot. in hunc loc.

(q) Annot. ad hunc loc.

(r) (s) Comment. in hunc loc.



monuerat; propiore plane legendum, ut & vetus Codex ostendit. Sic idem ad eum locum cap. 29.

492, 17. *At si pes alter intus emortui fœtus, juxta repertus est, alter retro cum corpore est, quicquid prolapsus est, paulatim abscindendum est, adnotavit, revera in vetere exemplari esse prolapsus; cum in omnibus quidem meis sit protractum.*

Pariter ad ejusdem libri 7. caput 3. Constantinus adscripserat, codicem habere callosæ in his verbis, *si, antequam sinus carne impleatur, oræ collosæ fiunt*, ubi apud me omnes habent carnosæ, idque optime, ut puto, cum ea continuo sequantur, *illa quoque ipsa carne hebetæ, nec firma*. Hinc vero intelligis, quanti retulisset in his etiam locis quorum alia alicubi occurrebat scriptura, quid a cæteris scribi consueisset, non omisisse. Quanto igitur minus omitti hoc debuit, ubi nusquam quod sciamus, ea quæ proponitur, occur-

499, 12. *At si nervi juxta sunt, ignis alienus est; ne distendantur & membrum debilitent*: aut capite 7. *deinde melle inungendum a quarto die, vapore aquæ calidæ fovendum, inungendumque medicamentis ad cicatricem perducentibus*. Hic enim etsi codex habeat ut quarto, alii autem & quarto, alii, & melius, ut videtur, at quarto; nemo tamen habet a quarto. Ibi vero ut alii non re, sed verbis discrepent in eo quod est etiam in codice, *ignis alienus est*; omnes certe in hoc conveniunt, ut scribant, *ne vel distendantur hi, vel membrum debilitent*; præclare autem nosti, posse horum alterutrum ita fieri, ut alterum non sequatur.

Et, ne diutius in libro hoc uno 7. hæreamus; vide, quæso, libri 2. caput 12. ubi cathartici, quia stomachum fere lædunt, in febricitante improbat, hæc subjiciuntur. Plerumque vero alvus lotionibus ducenda est. quod ab Asclepiade quoque sic vituperatum, ut tamen servatum sit &c. Asclepiadem cathartica quidem vituperasse; quod &

29, 7. quo in volumine ab eo factum, Celsus quoque supra dixerat; indicatus ab Almeloveenio Plinii locus (u) ostendit, *Arguit & medicamentorum potus stomacho inimicos*; sed clysteres etiam vituperasse, non ostendit. Et quanquam aliqui in Celso hic legunt, *vituperatum*; fere omnes tamen legunt *temperatum*, quod codex quoque habet, & quæ mox adduntur, confirmant, *Est autem ea moderatio, quam is secutus videtur, aptissima, ut neque sape &c.* Confirmat pariter Celsi alter locus, quem huc attinere, adscriptis ad ejus oram numeris Almeloveenius significavit: *Asclepiades medicamenta sustulit; alvum non toties, sed fere tamen in omni morbo subduxit*. Alvum autem ducere, aut subducere a Celso hic dici pro eo quod est per clysterem exonerare, cum illud indicat quod id opposuit, & opponit propinatorum medicamentorum actioni, non secus atque ubi scripsit, *vel alvi ductione uti, vel lacte purgari*; tum præsertim Lindenius, & Almeloveenius non dubitant, qui a prima memorati capitis parte quæ de Dejectione per medicamenta est, totam hanc alteram separantes, huic inscriptionem præposuerunt *De Alvi ductione*. Quæ altera pars etsi quædam habet quæ ad clysteres dumtaxat non videantur attinere, si hodiernam spectes frequentiore consuetudinem, aut eos etiam, quibus interdum vel tunc utebantur, ex pura aqua; cur enim tot servanda quæ Celsus jubet? tamen tota ad clysteres pertinere ab Rupeo (x) existimatur, nec minus ab Lindenio, & Almeloveenio, ut qui hujus partis id quod descripsi, initium fecerunt, *Plerumque vero alvus lotionibus ducenda est*: quid enim aliud esse hic ipsis lotiones possunt, nisi clysteres, quos plures Italorum hodieque, & Galli haud absimili solent nomine significare? Nolle vero, a græca vocabuli clysteris origine, nedum ab hac sequiorum temporum in eo designando consuetudine illos fortasse adductos

fuisse, ut huc eam vocem inferrent *lotionibus*; pro qua plures quidem scribebant *potionibus*, ea quæ paulo ante animadvertimus, non attendentes; sed Pinzins, Junta, Ruellius, & in utraque editione Manutii idem quod in codice est, *potius*, unde *potionibus* videtur factum, ut hinc tandem ab Lindenio *lotionibus*. Quam ego vocem, minime, quemadmodum ostendi, apud Lindenium necessariam, cum hic antea apud neminem viderim, neque eo quidem significato, nisi in aliquo forte Lexico, idque ex hac Lindenii, & Almeloveenii lectione, offendisse meminerim; idcirco potissimum hunc locum diligentius consideravi. Sed quod ad alterum attinet, quem Asclepiadis facta mentio ad memoriam redegit ex libro eodem 2. sub finem capitis 6. *quod Asclepiades sciens, funeri obvius inclamavit, eum vivere, qui efferebatur*; satis est certiore te facere, neque in ullo meorum librorum extare sciens, & in cunctis pro *inclamavit*, esse intellexit; ut propemodum credam, huc aliquid translatum ex illis Apuleii (y) verbis, *confestim exclamavit, vivere hominem*, in ejusdem videlicet casus narratione, quem nescio cur duo eruditissimi Viri pro fabula habere videantur, cum ad illam Apuleii narrationem, hoc Celsi, & geminum Plinii (z), Asclepiadi alioquin parum æqui, testimonium accedat: & ut fraus subesse potuerit, sic nihil repugnet quominus vel sine ullo dolo id potuerit accidere, præsertim cum Plinius ajat, illi funeri Asclepiadem occurrisse ignoto, si qua collusionis suspicio fuisset, non omisurus.

Sed ad Celsum ut redeam; capite etiam 10. libri ejusdem constantem hanc inter omnes scripturam invenio: *Quod si vehemens febris urget, in ipso impetu ejus sanguinem mittere, hominem jugulare est. Expectanda ergo remissio est. Si non decrescit, sed crescere desit, tunc quoque, quamvis pejor, sola tamen occasio non omittenda est. Præclarus hic ordo, & præclara sententia; ut mirer, sic mutata nunc esse, ut legamus, *Expectanda ergo intermissio est: si non decedit, cum crescere desit, si neque remissio speratur, tunc quoque &c.* quasi remissio non satis opponeretur impetui, & quasi in febre quæ non decedat, non ante videndum esset, an decrescat, quam an saltem crescere desinat. Non displiceret lectio quæ proximo libro 3. proponitur cap. 11. *ei febris remissioni credendum est, quæ etiam immoratur, & jactationem fervoremque corporis, quem Græci vocant, minuit*; si modo editiones veteres, codicesve eandem haberent. Sed quotquot illarum apud me sunt, & codex quoque hic mire inter se conveniunt, in omnibusque sic legitur, *factoremque quandam oris, quem Græci vocant, minuit*: quam græcam vocem ex hoc quidem ipso Celsi loco in Thesaurum suum (a) retulit Henricus Stephanus, in summoque Lexicon (b) Joannes Scapula: eandemque Rhodius, ut ex his quæ ad Scribonium adnotavit (c), manifestum est, procul omni dubitatione in Celso erat editurus.*

Nec vero minus illa omnia exemplaria conveniunt in verbo *aqua* omittendo, quod lib. 5. cap. 28. nunc legimus in eo loco, *adjiciendusque ei pulvis ex contrita testa, ex aqua, qua faber ferrarius tingere candens ferrum solitus est*, aut in habendo *tum is* locus pro *tumens locus* libro 8. cap. 5. aut denique capite 9. in vocula *sed* prætermittenda, ubi nunc legimus, *sed abunde est eadem, quæ supra scripta sunt, facere*; nisi quod codex ab editionibus in eo discrepat, quod omisso *tum*, habet *is locus*, & quod istud *sed* non omittit. Contra autem in eodem codice ne unum quidem est verbum ex his quæ finem faciunt capitis 7. lib. 3. *Si quis autem in hujusmodi febre, ardente, leniter tussit, is neque vehementi siti consistari, neque bibere aquam frigidam debet, sed eo modo curandus est, quo in cæteris febribus*

præ-

(u) Nat. Hist. l. 26. c. 3. (x) Annot. in hoc caput. (y) Florid. l. 4.  
(z) Nat. Hist. l. 7. c. 37. & l. 26. c. 3. (a) (b) in OZΩ. (c) Not. ad Compof. 49.



*præcipitur*. Quod ideo a me adnotandum censui, quia Ronseus cum ad hunc locum enarrandum pervenisset, suspicatus est, *periodon hanc a sciolo quodam assutam potius, quam a Celso ita pronuntiata*; præsertim quando Pinzianum exemplar eam omittat. Et certe in eo non est, neque in Florentino, si probe memini, neque in Juntino. Suspicio autem Ronsei ex illo ipso Aphorismo (d) nata est, quem Almelveenius quasi cum descriptis verbis congruentem, in pagellæ ima ora indicavit, *Quibus plurimum sicca tusses leviter irritantes in febris ardentibus fiunt, non multum siti infestantur*. Si igitur hoc verum est, ut Galenus quoque (e) explicando confirmat; frustra Celso moneret, inquit Ronseus, *hosce non gravandos vehementi siti, nec propinandam frigidam, quod per se ipsi ---- siticulosi ---- non sint, & fauces affectæ frigidam non admittant*. Utcunque id est; hæc reticere non debebat Almelveenius, ut neque eos qui illa Celso verba adscri-

bunt, non ita ut ipse edidit, proferre, sed *leviter tussit pro leniter*, &, si Cæsarium excipias, pro *conflictari* scribere *conflictatur*, qua ratione ab Hippocratis aphorismo ista non discreparet sententia.

Non me præterit, ex his atque aliis quos producere possem, locis non paucos esse ejusmodi, ut quemadmodum propositi sunt ab Almelveenio, ita pluribus sint placituri. Verum neque ego ideo produxi quod omnes; ut quidam certe; displiceant mihi; sed tantummodo ut cognita lectionum varietate intelligeres, quanto melius ille facturus fuisset, si eam plerumque lectoribus indicasset, quorum alii, ut varii sunt hominum sensus, aliter fortasse legere maluissent. Præter eos tamen locos, sunt alii in quibus non video, quomodo Almelveenii scriptura ab ullo facile probari possit. Quos, ne hæc nimium longa Epistola fiat, in alteram differemus. Vale.

Paravii MDCCXXXVIII. XII. Kal. Januar.

## E P I S T O L A S E X T A.

Jo. Bapt. Morgagnus Jo. Bapt. Vulpio S. P. D.

**A**Ccipe jam quos nudius quintus promisi, locos. Quorum tanto magis referebat variantes lectiones ab Almelveenio indicari, quanto illa quam ipse potissimum secutus est, minus cæteris, nisi me fallit opinio, placere potest. Initio autem duo proferam quæ pro fortuitis ejus operarum hallucinationibus haberes, nisi ad eundem modum Lindenius utrumque edidisset, secundum vero Cæsarius quoque. Libro 2. cap. 8. *Ex vesica dolenti, si purulenta urina processit, inque eo lave & album subsedit*: & cap. 11. *In aneum, linamentum ardens conjicitur*. Dixerat autem modo Celso de cucurbitula *anea*, & *cornea*, & mox de *cornea* dicturus est iterum; ut manifestum sit, non ad paulo ante positum genus *aneum*, & *corneum*, sed ad proxima esse respiciendum: & sane, una illa Cæsarii editione excepta, decem meæ reliquæ, & codex habent hic *aneam*, ut illic omnes *inque ea*. Sed ejusmodi una in litterula typographorum errores, ab iis quas nominavi, editionibus in Almelveenianam traducti, facile, ut fit, doctissimorum illorum hominum oculos effugere potuerunt. Neque ipse aliam ob causam hic indicavi, nisi ut ab iis ad graviolem, eadem, ut puto, ratione illapsus, transirem. Est in brevi præfatione, memorato lib. 2. anteposita: *Non quod non omni tempestatum genere, omnis ætatis, omnis habitus homines &c.* Duo hic verba omni tempore, post tria illa prima collocanda, in Juntæ, deinde in Cæsarii editionibus ommissa, in Lindeniana pariter, & Almelveeniana desiderantur; sed non in codice, cæterisque meis editionibus. Quin mirum est, Almelveenium, cum indicatum a Pantino (a) olim, & Constantino (b) Hippocratis Aphorismum (c), quem Celso hic spectavit, adscriberet, non sensisse, duo ista potissimum requiri hic verba: quanquam satis id Celso ipse præmonstraverat, qui, cum modo scripisset, sibi exponendum, *quæ tempora anni, quæ tempestatum genera, quæ partes ætatis, qualia corpora quibus morbis sint, aut non sint opportuna*, idque præstet capite continuo insequente, eadem quadripartita divisione, eodemque ordine conservatis; non poterat sane in propositis, quæ ei divisioni, & ordini respondere debebant, verbis, cum res posteriores tres poneret, primam omittere. Ad eundem modum, sed gravius propter obscuratam sententiam, peccatum est lib. 8. cap. 1. in ossiculorum carpi descriptione: *oblonga omnia, & triangula, structura quadam inter se conne-*

*ctuntur, cum invicem superior alterius planities sit*. Quis, obsecro te, sex ultima hæc verba quid sibi velint, satis intelligat? Pleræque autem editiones, & codex quoque sic habebant, *cum invicem superior alterius angulus, alterius planities sit*: quo quidem modo cum Celsi apertissima sententia fiat; credas facile, neminem hic, nisi Almelveenii typographum, esse accusandum, qui duo necessaria verba *alterius angulus* transilierit. Sed hunc absolve, qui ab Lindenii typographo in errorem adductus est, iterum hunc etiam, qui a Pantini, & Pantini denique typographum, qui, nisi vetustius erratum est, a Cæsarii typographo deceptus fuit: hoc unum mirare, tot, tamque doctos homines non sensisse.

Quis autem Lindenio, & Almelveenio imposuerit, nescio, ut pluribus aliis quos continuo producere possem, locis ea prætermittent quæ minime erant prætermittenda, & in codice utique cunctisque meis undecim editionibus leguntur. Lib. 4. cap. 1. *renes & venosi sunt, & tunicis super conteguntur*. Post tria prima, totidem ommissa sunt verba *& ventriculos habent*; quasi Hippocrates (d), quem Celso inferius quoque sequitur, ubi *a renibus singulas venas, colore albas*, scribit, *ad vesicam ferri*, non ita esset locutus, *etiam ipsi renes ventriculos habent*, & mox, *enascuntur ex rene ipso venæ in vesicam*. Nempe Anatomæ parentes Græci, ut alibi (e) de laryngis ventriculis adnotavi, appellare caveas sæpenumero solebant ventrium, aut ventriculorum nomine, quorum consuetudinem in corde, & cerebro adhuc retinemus. Libro eodem cap. 2. *Cynicus spasmus cum acuta febre oritur*. Nisi post secundam vocem præterita esset vox *febre*; minus a vero distaret sententia. Libro autem 5. c. 26. *malum vulnus est, quodcumque in alis, vel feminibus, vel inanibus locis, vel inter digitos est*. Si post verbum *locis* hæc quoque interjicerentur *vel in articulis*; non miraretur lector, omnia perpendens quæ infra (f) de difficultate bene curandi articulos vulneratos traduntur, horum vulnera non fuisse cum cæteris illis commemorata. Nec, nisi quædam ommissa essent, inferius miraretur, in hæc incidens: *Hæ gravissimorum vulnerum curationes sunt*. Sed ne illa quidem negligenda, ubi interior pars collisa est: quis enim monitore egeat, ut sciat, interiorum partium collisiones haud esse negligendas? At Celsum non viscus aliquod, sed partes quæ proxime cuti subsunt, hic designasse, facil-

(d) 54. Sect. 4. (e) Comment. in eum Aphor. (a) Comment. in hunc loc. (b) Adnot. in marg. ad eund. loc. (f) 5. 111. 19. (d) de Off. nat. n. 8. (e) Advers. Anat. 5. Animad. 43. (f) Sect. 28. hujus cap.



facillime intellexissent omnes qui sic legissent, ubi integra cute, interior pars collisa est. Et quoniam hæc ad Chirurgos spectant; duo quodque alia ejuscemodi loca subjiciamus. Libro 6. cap. 6. ubi oculorum ulcera aut supercrescentia, aut sordida, aut certe vetera esse consuevisse dicuntur; post sordida, hæc desunt aut cava. Statim enim quomodo supercrescentia reprimantur, sordida autem purgentur, Celsus docet: collyriis autem ad id utilibus propositis, antequam dicat, qua ratione vetustis ulceribus succurrendum sit, cava ulcera quæ commodissime impleantur, ostendit. Eodem libro cap. 18. si Celsus præcipit, cum propter colis ulcera glans excidit, sub eo casu cutem ipsam circumcidendam esse, & nisi id fiat, quæ incommoda, & pericula instent, diserte mox docet; apparet certe, inter hæc non posse legi, sub eo casu cutem esse servandam; imo desiderari particulam non, quæ sententiam ut in contrarium vertat, sic cum proposito congruentem faciat.

Sed omitti aliquid incuria potest: addi vero, nisi de industria, fere non potest; ut qui addit, nec quæ aliorum scriptura esset, ignorare queat, & sciat, quanti referat eam indicare. Quod si fecisset Almelveenius; haud dubito, quin libro 2. cap. 24. ubi inter ea quæ stomacho apta sunt, ab ipso, cum Lindenio, primum ponuntur murices, purpureæ, cochleæ, quasi vix septem versiculis interjectis hæc eadem inter illa non esset iterum positurus, haud, inquam, dubito quin ii qui scirent, in omnibus quæ apud me sunt, editionibus, si unam Ruellii excipias, ipsoque in codice, secundo dumtaxat loco ista legi, primum illud supervacuum additamentum repudiarent. Sed nec Ruellius, nec codex, nec decem reliquæ editiones quidquam eorum habent quæ non apparet quid coegerit his tribus aliis locis adjicere. Libro eodem cap. 8. Longe optimum est in tabe, febrem omnino non esse: secundum est, tantillam esse, ut neque tantulum cibum impediatur, neque crebram sitim faciat. Istud tantulum, quod adjectum est, ne Hippocrates quidem indicat in ea prædictionum parte (g) quæ tota ibi, ipso quoque ordine conservato, a Celso latine reddita est. Probat enim, in tabescente febrem non invadere, ut ne a cænis prohibeatur, neque sitiatur. Libro 6. extremo capite 18. Si hac ratione ulcus non tollitur, vel aliis medicamentis similibus, vel vehementioribus; ferro adurendum est. Legebatur antea vel medicamentis vehementioribus, vel ferro adurendum est. Quæ interjecta sunt, aliis similibus, cum superflua sunt; quid enim tunc a similibus sperandum est? tum Auctoris sententiam mutant, qui, cum ei ulceri modo imposuisset medicamenta quædam ex iis quæ inter adurentia commemoraverat (h); si hæc inutilia sint, pergendum porro in adustione præcipit, sed vel medicamentis ex eo genere validioribus, vel ferro candente. Libro 7. cap. 5. postquam traditum est, quatenus plaga aut amplianda sit, aut facienda, ut telum, corpori inhærens, aut ab ea parte, qua venit, aut ab ea, in quam tetendit, extrahatur, hæc sequuntur: In summa autem utraque parte ista habenda cura est, ne nervus, ne vena major, ne arteria incidatur. Sed num summa dumtaxat pars tunc inciditur? aut ejusmodi nervus, & vasa num in summa tantum sunt parte? Certe si addita non esset ista particula In; neque hæc possent obijci, & Celsi hic eadem ac sæpe alibi, locutio foret, magna cura habita, ne vena, quæ juxta sunt, violentur: magna cura habita, ne qua vena incidatur: summaque cura quod ita futum est, tuendum &c. Verum alia quoque eorum quæ minus bene aut omissa, aut addita videantur, exempla habebis inter ea, ad quæ jam transeo, non feliciter mutatorum verborum. Quo in numero haud Morgagni Opusc.

scio an recenseam quod libro 5. est cap. 28. Præter hæc, is, qui tam robustus est. Nam etsi hæc ad verba illa continuo attexuntur, si lactens puer ita affectus est, unde patet, quæ graviora auxilia sequuntur, requirere ut legamus is, qui jam robustus est; tamen litterulæ unius mutatio non tam consilio, quam casu, accidere potuit, idemque Cæsarii quoque, & Pantini typographis contigisse. Non æque facile crediderim, duas alias, quamvis unius pariter litteræ, mutationes fortuito esse factas libro 7. cap. 19. & 20. Prima est in confectis pro conjectis: altera in sinistro pro ministro. Primus locus ita editus est: tunicam extra collocare oportet; deinde eam incidere sic, ut intrare duo digiti, index & medius possint: his deinde confectis, incidenda reliqua pars tunica, & inter digitos scalpellus immittendus est. Vides, ut, nisi antea scriptum sit, conjectis digitis, non posse præcipi, ut inter digitos scalpellus immittatur. Locus alter sic proponitur: eaque tunica eodem modo duobus hamis excipitur sic, ut a sinistro testiculus eatenus continetur, ne per vulnus exeat. Certe autem si inciso inguine, tunica excipienda ibi est duobus hamis eodem modo, id est si juxta ipsas oras est apprehendenda; neuter hamus poterit testiculum in sua sede continere, ne si instrumentum quidem esset ad eam rem idoneum. At Chirurgi ministrum, qui non raro his duobus ultimis libris, & ad aliquid præsertim simile præstandum superiore capite memoratur, quis posse dubitet? Apparet igitur, quanto melius conjectis, & ministro legatur in codice, meisque omnibus editionibus. In quibus pariter, nisi siquam nominatim excipiam, ea credito scripta esse, quæcunque recentibus mutationibus deinceps opponam. Libro 6. cap. 19. excipiuntur fico pingui leviter cocta & melle. Legebatur summo consensu, cocto ex melle. Non improbo cocta: quanquam in re controversa tantum consensum veterum exemplarium indicatum fuisse, mallet. Ex vero in & mutata non probo: quæri enim potest, quemadmodum, aut quo ex humore coctam ficum voluerit Celsus, nisi legas ex melle.

Hæc quæ modo notata sunt, si ea quoque casu mutata esse, credideris; non valde repugnabo. Utinam vero idem credi posset de iis quæ sequuntur. Libro 1. cap. 2. Exercitatio semper antecedere cibum debet: in eo qui minus laboravit, & bene concoxit, remissior: in eo, qui assuetus est, & minus concoxit, amplior. Contra autem antea legebatur, in eo, qui minus laboravit, & bene concoxit, amplior: in eo, qui fatigatus est, & minus concoxit, remissior. Utra lectio probanda sit, productis rationibus disputare nihil attinet, quando Celsus paulo ante docuit, qui parum concoxit, quiescere debere. Celso eodem auctore, non difficile est judicare in iis quæ scriptis de gravedine lib. 4. cap. 4. num recte edita sint cum alia, tum hæc præsertim: Gravedine levata, si nares magis pallent, balneo utendum est; --- deinde cum cibo plenius vinum bibendum. Etsi ad hunc modum & Cæsarius, & Ruellius, & codex habent; manifestum est tamen, legendum esse, ut in reliquis editionibus, si nares magis patent. His enim mox ea opponit Celsus: At si nares æque clausæ videntur. Qui etiam cum vinum bibendum præcepit levato vitio, & naribus jam magis patentibus, satis ostendit, in iis quæ paulo ante posita sunt, incipiente gravedine, protinus abstinere a sole, a balneo, a venere debemus; post balneo, male omisum esse vino, quod in codice, cunctisque legitur editionibus. Sed & pluribus aliis locis utra lectio retinenda sit, Celsus ipse demonstrat. Ubi enim lib. 3. cap. 21. nunc editum est, exigua hydropicis potio optima est, quæ urinam movet. Album moliri cibo melius est, quam medicamento,



- mento, cum scriptum esset olim non *Alvum*, verum *Sed id ipsum*; hoc, videlicet sed urinam movere, ea comprobant quæ continuo sequuntur: *Si tamen res coget, ex his aliquid, quæ id præstant, erit decoquendum, eaque aqua potui danda. Videntur autem hanc facultatem habere iris, nardum, crocum, cinnamomum, cassia, id est casia, myrrha, balsamum, galbanum, atque alia, in quibus ut quædam sint quæ alvum etiam movent; pleraque tamen non eam movent, sed urinam.* Libro 5. cap. 26. Gangrænæ ulceri proxima cutis plerunque subnigris pustulis impletur; deinde ei proxima, vel pallida, vel livida, fereque æruginosa & sine sensu est. Deterior in inflammatione est. Quanto melius antea legeretur; mitto rugosa pro æruginosa; at certe *Uterior*; nam *Aterior* in Pinziana, & Juntina editione mendum manifestum est; pro *Deterior*, præclare apparet ex iis quæ Auctor ipse statim subjicit, omniaque ea simul serpunt: *ulcus in locum pustulosum: pustula in eum, qui pallet aut livet; pallor aut livor in id, quod inflammatum est: inflammatio in id, quod integrum est, transit.* Libro 6. cap. 6. Suffusio, oculi pupillæ, qua cernit, se opponit. Olim vero; si Cæsarium, & Pantinum excipias, apud quos perperam erat *oculipituita*; longe melius scribebant *oculi potentia*, confirmante Celso lib. 7. cap. 7. ubi suffusionem, ait, *interiori potentia se opponere*; quod *potentia* vocabulum, hoc quidem significatu, miror in iis quæ apud me sunt, Lexicis non inveniri. Eodem capite 7. ubi de humorum cursu ad oculos verba fiunt per ea vasa, quæ alia Epistola (i) memoravimus aut *inter calvariæ & cutem*, aut *inter membranam cerebri & calvariæ repentiæ*, legimus nunc, *Potest autem adhiberi remedium his, quæ supra os fluunt, non potest his quæ ab osse.* At legebant quondam, *non potest his quæ sub osse*, ut non præcedentia solum, quæ modo commemorabamus, significant, sed & ea quæ mox addit Celsus, confirmant. Raso enim capiti adhibitis quæ humoris cursum suspendunt, si *sicci oculi esse cæperunt, apparet, inquit, per eas venas, quæ sub cute sunt, irrigari: si nihilominus madent, manifestum est, sub osse descendere.* In his autem quæ continuo sequuntur: *si est tumor, sed levior, duplex vitium est, id est per viam utramque humor fertur; in his, inquam, pro est tumor, de quo nulla fuerat injecta mentio, est humor legebant.* Quam vocem infra quoque, uno excepto Cæsario, habebant, ubi viginti interjectis vericulis, nunc ita scriptum est, *venas ex quibus ad oculos transfret; ut nisi scias, olim edi consuevisse, ex quibus humor; quid transfret, nusquam appareat.* Vide insuper eodem capite num placere possint quæ in unguis oculi curatione ad hunc modum proponuntur: *Caruncula lachrymalis, si vehementius unguis ducitur, sequitur quoque ac decidit. Si abscissa est, &c.* Quo enim modo, si decidit, abscindi adhuc potest? Erat autem antea hæc scriptura, *sequitur. Ideoque decipit: ac si abscissa est, &c.*
- Sunt & alia capita hujus libri 7. in quibus novæ mutationes vel proximis pariter Celsi verbis improbantur. Capite 4. Linum, per aui fistulam bipatentem trajectum, & utroque capite ligatum, *bis in die, soluto nodo, ducendum est sic, ut jubeat fistulam pars, quæ superior fuit.* Sed quidnam cogit bis in die nodum solvere? Num quod linum aliter sic duci non possit? At præceptum modo fuerat, *ut laxè cutem, quæ super fistulam est, teneat.* Num ut antequam putrescat, recens aliud linum alligari ad vetus possit, & pro hoc in fistulam trahi? At ejus rei causa mox scribitur, satis esse, ut *tertio quoque die nodus resolvatur.* Quid ergo est? Nempe olim, non *soluta*, sed *salvo nodo* scriptum erat vel apud Pinzium, & Juntam, etsi hi, per operarum incuriam, *salvo modo* ediderunt. Capi-

te etiam 2. nisi quid me fallit in Celsi sententia atque ordine intelligendis; mutata sunt quædam præter rationem. Videtur enim hæc vellet, ut ex incipientibus abscessibus materia eo congesta, incisa cute, & cucurbitula ter admotata, extrahatur; fieri tamen nonnunquam posse; ut cucurbitula nihil agat, propterea quod eam materiam sua illa tunica concludat, quam Meges quidem (haud multo aliter ac plures hoc tempore de folliculo censent cysticorum tumorum) non proprie tunicam vocari, agebat, quia nervosa non est, sed callus est qui pus vetustius consequitur; verum aliquando esse vel prius quam pus conficiatur, eoque cucurbitulæ tunc obstare interjectu suo, ne ex incipiente abscessu materiam educat. Quæ si ita sunt; non modo illa; quod quidem manifestius est; perperam sunt posita, *cucurbitulam accommodare oportet; quod quicquid illud malæ corruptæque materiæ coit, extrahat pro quæ quicquid illuc; sed hæc insuper, Neque tamen fas est, nihil a cucurbitula agere.* Interdum etiam fit, ut quicquid abscedit, velamento suo includatur, loco eorum, *Neque tamen fas non est nihil cucurbitula agere.* Interdum enim: itemque hæc, *tum pure quoque maturiore, hæc tunica interdum esse consuevit, cum antea legerent, maturior hæc, aut, quod est in codice, maturius hæc: & quanquam in alio Constantinus adnotet fuisse, ut tres quoque editiones habent, maturiore; non hic tamen agitur de pure celerius confecto, sed de materia ex qua conficeretur, extrahenda, nisi celerius tunica perfecta est quæ illa concludatur.*

Sed & capite 5. ejusdem libri septimi, & capite 26. alia sunt, quorum mutationes haud facile probes. In hoc, Medicus sinistra manus duos digitos, indicem & medium, leniter prius unctos oleo, simul in anum ejus demittit. Scribebant olim, *leniter prius unum, deinde alterum in anum ejus demittit, & longe quidem melius.* Agitur enim de puero cui calculus e vesica excidendus, satis doloribus circa ea loca cruciatus, quos cur, duos simul digitos immittendo, Medicus plus æquo augeat, nulla causa est. Cum vero ad nimiam sanguinis profusionem, quæ evulso calculo interdum accidit, compescendam, si inutilia sint alia, agglutinanda cucurbitula proponitur & in genibus, & coxis, & super pubem; scire licet, scriptum antea fuisse, non & in genibus, sed & inguinibus: quin Celsum pariter adversus nimias mulierum purgationes *cucurbitulas*, vel cute incisa, inguinibus admoventi, voluisse; quæ autem ratione, & quatenus, Rorarium (k), & Rubeum (l) explicasse: quæ si quis in eo casu non probet (quanquam de scriptura, non de ratione hic quærimus) is neque admotam genibus cucurbitulam in hoc probabit. Capite autem 5. cum legeretur, *Latum verò telum si conditum est, eodem videlicet modo quo paulo ante, Nihil tam facile in corpus, quam sagitta, conditur; non apparet unde sumptum sit quod pluribus verbis nunc ita editum videmus, Latum vero telum si aliquis intus in carne habuerit; nisi forte ex libro aliquo in quem pro duobus Celsi verbis longum glossema e margine in contextum irrepsisset.* Infra etiam ubi traditum est, quæ ratione extrahendum sit telum quod ossi inhaerit, cum illa adduntur, *si nihilominus morabitur, excuti quoque cum aliquo ferramento poterit, non video, cur antiqua lectio mutata sit, istum aliquo ferramento.* Minusque video libro 6. cap. 6. quid sibi velint ea verba, *posthæc cibo paulo pleniore, quam ex operum consuetudine uti, cum hæc quæ prius erant, præclare intelligam, ex eorum dierum consuetudine.* Proximo capite 7. postquam præceptum est, quid agendum sit, ubi crusta, qualis super ulcera innascitur, intra auris meatum conspecta est, hæc modo subjiciuntur: *Atque ubi crusta ex auricula procidit;*



elunda est aqua tepida; quo facilius ea per se diducta oriculario specillo protrahatur. Olim autem erant hæc, in quibus nihil displiceat: *Atque ubi crusta a corpore jam recedit, elunda auris aqua tepida est, quo facilius ea per se diducta, oriculario specillo protrahatur.* Capite 18. levis quidem mutatio est in iis verbis, *At Erasistrati compositio, aut Cratonis, recte super purulenta naturalia imponitur; una enim littera detracta ex Aut factum est At.* Sed tamen cum ea quæ proxime præcedunt, ipsa quoque purulentis naturalibus imponenda proponantur: si *Aut* ita displicebat, ut alia particula substituenda videretur; non quæ adversaretur, sed quæ conjungeret, potius erat seligenda, qualem, exempli causa, in libri ora Constantinus, & Ronsseus indicaverant, *Ac*, & optime quidem, nisi vocalis sequeretur. Verum in his quæ continuo legimus: *Folia quoque oleæ ex novem cyathis coquuntur*, manifestum est, humoris vocem desiderari: quam alii omnes habent, *ex novem cyathis vini* scribentes, si Cæsarium excipias, cujus quoque operæ ex incuria, ut opinor, prætermiserunt.

Sed non ob incuriam factum credo, ut lib. 4. cap. 22. nunc quidem sic legamus: *Ultimum est, & in uteri quoque morbis efficacissimum, tribus aut quatuor locis super coxam, cutem candentibus ferramentis exulcerare.* Nam etsi non idem modo Cæsarius, sed & ante ipsum Pinzius, & Junta hic habeant *uteri*; reliqui tamen, & codex habent *veteribus*. Loquitur autem hic Celsus de coxarum dolore, de quo proximo etiam capite 23. quo agit de dolore genuum, hæc videtur docuisse, *Omnes autem ejusmodi dolores, ubi inveteraverunt, vix citra unctionem finiuntur.* Libro 5. cap. 26. inter signa vulnerati cordis hoc ponitur, *sudores frigidi, malique odoris, tanquam in ægroto corpore oriuntur.* Sed vox illa *ægroto*, quæ plerisque ibi placere non potest, in nulla alia, quod sciam, editione est. Vix a Constantino, & Ronsseo in libri ora adnotatur, sic tamen, ut hæc sequantur, *melius irritato, nam in vetusto cod. irrotato.* Unde factum est quod uterque eorum, & Cæsarius antea, & Ruellius, & Pantinus, alique ediderunt, *in rotato.* Verum illa ipsa vox *irrotato* facile orta est, una haud intellecta litterula, ex vera, si quid ego judico, quæ in codice nostro, & Manutiorum utraque, & Stephani editione est, *irrorato*, nisi forte mavis ex duabus, quas Pinziana, & Junta habent, *in rorato.* Utrolibet autem modo corpus significatur, levi tenuique sudore, quasi rore, aspersum, qualis, ut puto, sudor infra quoque inter notas percussu ventriculi indicatur, *sudores tenues oriuntur*, per quos extremae partes frigescent. Ejusdem libri caput 28. qua parte abscissuum curationes proponit, non unum habet examine dignum. Sed; ut modus aliquis sit; hic quoque non omnia persequemur. Satis hæc esse poterunt, *Eadem aut hæc in minoribus quoque abscissibus --- recte fiunt. Eademque omnium curatio: tantummodo distat.* Crediderim quidem, typographorum negligentia mutatum esse autem in aut: eademque crederem ex tantum modo factum esse tantummodo, nisi duas illas voces in unum pariter conjunctas viderem in Junta, Cæsarii, Pantini, Constantini, & Ronssei editionibus, nisi quod hi duo ultimi in margine saltem disjunctas exhibuerunt, ut ratio postulat, & Codex, & Pinzii, Manutiorum, Ruellii, Stephani editiones proponunt.

Hic tamen discrepantia erat. Sed in ea lectione quam mox laudabo, cum quotquot mihi sunt editiones, & codex ipse convenirent; haud sane video, qua causa permoti Lindenius, & Almelo-veenius in alia omnia abierint. Libro 3. cap. 9. locus est tanto dignior quem diligenter consideremus, quod vel ex eo uno intelligi planissime Morgagni Opusc.

potest, Celsum, quamvis non vulgo, medicinam exercuisse. Dissensionem proponit Medicorum de tempore alendi ægros, si febris assidua sit, nec levior unquam fiat. Qui alunt matutino tempore, his illud objicit, insequi tempus meridianum, a quo omnis æger fere pejor fiat. Transiit deinde ad alia tempora his verbis, apud Almelo-veenium quidem: quæ, etsi plura sint, tamen omnia describam, necesse est. Igitur alii vespere tali agro cibum dant. Sed, cum eo tempore fere pessimi sint, qui ægrotant, verendum est, ne, si quid tunc moverimus, fiat aliquid asperius. Ob hæc alii differunt ad mediam noctem, decurso jam gravissimo tempore, eodemque longissime distante. Securius vero datur antelucanis horis; quibus omnes fere maxime dormiunt: deinde matutino tempore; quod natura sua levissimum est. Dicit hic aliquis, & jure dicet, cum cibum dare matutino tempore ob insequens meridianum improba- verit paulo superius; quomodo nunc probat? Deinde, quomodo antelucanis præsertim horis? quibus cum omnes fere maxime dormiant, experge- faciendi essent importunissime, nec sine detrimento. Accipe nunc cæterorum lectionem: longe aliam Celsi fuisse videbis sententiam, quæ neque propositis difficultatibus obnoxia sit, & medicinam ipsum exercuisse, evidenter ostendat. Ob hæc ad mediam noctem decurro, id est finito jam gravissimo tempore, eodemque longissime distante, secuturis vero antelucanis horis, quibus omnes fere maxime dormiunt, deinde matutino tempore, quod natura sua levissimum est. Vides, ut sibi constet excellens Medicus, qui ea tempestate cum rarius quam nostra, cibum caperent sani, multo autem rarius ægri, tempus quidem spectabat quo cibum daret, sed illa simul quæ datum essent insecutura. Animadverterat enim; ut ejus verbis ex superiore capite utar; non duci tam celeriter cibum posse, ut tempore proxime sequenti, in ægris præsertim, jam satis diductum esset. Secundum hæc tradit, quid secus ac alii, ipse facere consuevisset. Quo ejus luculentissimo testimonio, ut Medicum fuisse, ostenderem, in ea qua id quærebam, Epistola (m) non sum usus, quia necdum, quomodo hæc ejus verba oporteret legere, demonstraveram. Sed summa quoque & codicis, & eorum quos laudavi, aut omnium, aut fere omnium erat consensio in quibusdam aliis locis quos mutavit Lindenius. Qui, quoniam ad ægros spectant juxta propositam normam alendos, hic indicantur: Capite igitur, quod modo designabam, quarto libri 3. sic edidit: *Interdum enim peiores dies pares fiunt; & opportunius post febrium accessiones cibum datur.* Omnes loco febrium habebant eorum, aut earum. Recte habuisse, mens Celsi ostendit improbantis hic priscorum consuetudinem, ad hunc modum paucis ante versiculis propositam, sic ægros nutriebant, ut dierum imparium accessiones expectarent: deinde postea cibum, quasi levioribus accessionibus instantibus, darent: itaque nisi legamus post eorum, id est dierum parium, accessiones; sententiam Celsi corrumpimus. Infra pariter ubi eodem capite nunc scriptum est, *satiis est, principia cibi a decedente febre, quam reliquias ab incipiente excipi.* Ita si longius tempus secuturum est, quam integerrimo dandus est: si etiam breve, antequam ex toto integer fiat; bene omnes pro secuturum scribebant secundum, id est felix & opportunum integritatis tempus, & si Junta, & Cæsarium excipias; si breve, etiam antequam pro si etiam breve, antequam.

Quoniam hætenus vix quidquam notavimus in libro 8. quidquid ex hac Epistola reliquum est, in eum impendamus. Qui cum maxima ex parte huc redeat, ut ossa proponat aut vitia- ta, aut fracta, aut de loco mota; in his singu-



lis casibus pertractandis verba aliqua comperimus aut aliter, aut alibi fuisse ab Almeloveenio scribenda. Quod ad vitiata igitur ossa attinet; sunt capite 2. & 3. quædam ita nunc edita, ut dubitare possis, an sint retinenda; nonnulla autem sic, ut pro certo scias, esse mutanda. Quæ ut dignoscamus; Celsi ordinem servare juvat.

508, 1. Vitiatum os, docet, primo fere pingue fieri, deinde vel nigrum, vel cariosum. Quod autem pingue est, semel iterumve satis esse admoto ferramento adurere, ut ex eo squama secedat. Erat in omnibus quæ apud me sunt, editionibus; ut ex eo statu secedat; in codice evidenti mendo, pro statu erat stava: Constantinus in margine adscripserat recedat. Lindenius sic emendavit, ut primo loco posuimus, multo probabiliore scriptura, non tamen certa; nam & testa Celsus; sic enim etiam solet; poterat, non squama, scripsisse. Pergit deinde Celsus ad nigredinem, & cariem, curationem utriusque in summo osse tradens, & notas subjiciens, per quas seorsum tum illius, tum hujus finem in osse cognoscamus, tunc etiam cum dubium est, quam alte utralibet descenderit; quo loco, & quidem apud alios quoque, majori divisionis signo appolito post voculam illam est, spatioque insuper relicto, male in duas sententiam videbis fuisse disjectam. Et cariei quidem finem magis, minusve profundum monstrari, docet, a tenui specillo magis, minusve descendente. Cum expectas, ut de nigredine quoque doceat; ecce continuo hæc legis, quasi ad cariem ipsam spectantia: Colligi idem potest etiam ex dolore, & ex febre, quæ ubi mediocria sunt, illa alte descendisse non potest. Manifestior tamen adaesta terebra fit, nam finis vitii est, ubi scobis nigra esse desit. Sed nonne

509, 1. Auctor, cum inferius scribit, sive autem nigrities, quam terebra detexit, sive caries, quam specillum ostendit &c.; satis indicat, hæc de terebra ad nigredinem attinere? Est igitur omnino ea scriptura restituenda, quam in codice video, & in cunctis editionibus: Nigrities colligi quidem potest etiam ex dolore &c. Hanc in illam mutari jusserat Paawius (n), corruptissimam judicans, quia nigritem ex symptomatibus colligere non est opus, quippe quæ conspicitur, neque latere potest; haud animadvertens, non de nigredine quæ in summo osse est, sed de profunda illa hic quæri, de qua, ut Celsus dixerat, dubium est. Verum ut hoc loco non erat Paawio obtemperandum; sic altero quidem erat. Is

509, 15. in proximo est. Sin autem nigrities est, aut si caries ad alteram quoque partem ossis transit, oportet excidi. Idem quoque in carie ad alteram partem ossis penetrante fieri potest. Etsi in his codex, & editiones cunctæ; nisi quod habent, Atque idem in carie quoque; mire conveniunt; ratio tamen clamat, huc ex libri ora glossæma irrepsisse: neque ille tantus & calamo, & typis scriptorum librorum consensus aliud ostendit, nisi jam diu esse cum irrepsit. Cur enim continuo, & inutiliter bis idem diceretur? imo cur simul idem præciperetur, & Medici arbitrio relinqueretur? neque enim, ut libri, ita hæc conveniunt inter se oportet excidi, & fieri potest. Itaque glossæma esse, non dubitarunt Constantinus, & Ronseus, & post hos Paawius, Sed illi delendas esse quatuor illas voces est, aut si caries; hic autem, iis relictis, totam alteram partem, Idem quoque &c. tollendam censuit. Ego cum hoc facio,

Cæterum non, ut hic, ita etiam altero in loco ratio codici, & editionibus repugnabat, ubi ab Almeloveenio de specillo, cariem explorante, scriptum est, depressum in id foramen, quod infra solidam sedem habet, & renitens aliquid invenit, & madens exit, omittis ante renitens vocalis duabus, quas habent omnes, ob id. Si causam quæris; nempe Paawio visæ erant sensum tur-

bare, proptereaque cum præcedente vocula & delendæ. Ubi etsi mihi aliter videtur; tamen levius fero non secus ac cum paulo ante in Paawio legendo sic hallucinatus est Almeloveenius, ut pag. 511. quod ille recte admonuerat de ac si linea 14, ipse transtulerit ad At si linea 4. Gravior interea, ut qui sententiam prorsus vitiet, in una dempta litterula error est, qui in Casarii, & Ronseii editiones, non in cæteras, ne Lindenii quidem, neque in codicem irrepsit.

Quem ut errorem planius ostendam; alter qui præcedit, indicandus est: uterque autem postulat, ut hic quoque Celsi ordinem commemoremus. Os, cum altius vitiatum est, docuerat, ut vidimus, esse excidendum. Excidi autem, si vitium potest angusto modioli ambitu comprehendere, circumactio modiolus, docuit. Sin latius est; terebra, & scalpro. Terebra enim, secundum Almeloveenii scripturam, foramen fit in ipso sine vitiosi ossis atque integri: deinde alterum non ita longe, tertiumque, donec tactus is locus, qui excidendus est, his cavis cinctus sit. Quæres hic, quid significet ista vox tactus? Nempe incuriam operarum significat; operarum, inquam, non Almeloveenii, non Lindenii, tametsi hic quoque sic habet, sed operarum Casarii, in cujus editione anno ab hinc ducentesimo, & quod excurrit, ita scriptum est pro totus quod & sententia requirit, & codex habet, & editiones reliquæ omnes quæ apud me sunt. Tum, pergit mox Almeloveenius, excisorius scalper ab altero foramine ad alterum malleolo adactus id, quod inter utrumque medium est, excidit; ac si ambitus similis ei fit, qui in angustiore orbem modiolus imprimitur. Utrō modo vero &c. Quibus verbis si litterulam addas, & pro ac si rescribas ac sic; plana fient omnia atque aperta. Quem errorem si typographo pariter imputare velis; facile assentiar: nec vero, quamvis sententiam, ut dixi, omnino pervertat; aut ipsum, aut qui eum præcedit, hic eram memoraturus, nisi ab una in alteram editionem animadvertissem aut transisse, aut longo post tempore se se iterum intrusisse. Haud dissimile quidpiam accidit paulo superius, capite eodem 3. ubi nunc legimus: Si nigrities est, angulo scalpri sinus exiguus sit, qui clavum modiolus recipiat, ut, eo insistente, circumactus modiolus delabi non possit: deinde his habena, quasi terebra, convertitur. In his enim verbis non modo per typographorum negligentiam sit factum est ex sit, quod omnes habebant; sed & his, quod in Pinzianam, & Juntinam editionem incuria intruserat, reliquæ autem editiones, & in iis Lindeniana quoque, sic emendatum protulerant is, modiolus videlicet; his, inquam, rursus in Almeloveenianam se retulit. Quæ de carie paulo ante attigimus, locum alterum ad memoriam revocant, qui tametsi non ad 8. sed ad 5. attinet librum, non est hic a nobis prætereundus. Ibi igitur cap. 28. ubi de specillo in fistulam demisso, & os jam contingente verba fiunt, hæc sunt: si dilabitur specillum, nondum caries est; si non dilabitur sede, qua innititur, caries quidem, verum adhuc levis est. Antea scribebant omnes, si non labitur, sed aquali innititur, idque egregie. Nam etsi Constantinus, & Ronseus in margine adscripserint sede qua; monstrat tamen Celsus, utra verior scriptura sit, cum ad descripta verba hæc continuo attexit, si inæquale quoque & asperum subest, vehementius os exesum est. Scilicet voluit secundo loco, cariem quidem esse, sed hæctenus, ut specillum labi non sinat, cæterum levem adeo ut os æquale videatur.

Satis de vitiatis ossibus. Nunc, ut pollicitus sum, de fractis. Ad hæc pertinent ex libri, ad quem redeo, octavi capite quarto propemodum extremo



521, 2. tremo verba illa de curatione fracturæ calvariæ: Ubi bene res cedit, incipit ab ipsa membrana, vel si os eo loco duplex est, inde quoque caro increfcescens id, quod inter ossa vacuum est, replet. Non dubito, quin pro caro increfcescens id, quod, malis communem lectionem caro increfcescere, eaque id quod.

525, 9. Capite autem 7. ubi legis, si maxilla transversa fracta est (sub quo casu fere dens super proximum dentem excidit) tametsi Cæsarii quoque, & Ruelii editiones, atque adeo codex habent excidit; res tamen ipsa postulat, ut cæteris potius astipulemur, qui habent excidit. Sed hic neutiquam prætermittendus est locus; ad fracta artuum ossa pertinens parte ultima capitis 10. Solent tamen interdum adversa inter se ossa confervere: eoque & brevius membrum, & indecorum fit. Hic vero est ubi Schulzius (o) in illos asperius invehitur, qui temeraria mutatione; sic enim loquitur; adversa ossa ediderunt, ubi veteres omnes habebant diversa. Omnes autem ei sunt, qui sex quas laudat, editiones procuraverant. Quinque ego alios addo; nec tamen an reliqui pariter, quibus nunc careo, omnes habeant diversa, pro certo scio: esse posse qui non habeat, ex codice apparet, in quo lego transversa, quemadmodum & alios, quos non nominat, sed indicat Rubeus (p), legisse, non ignoro. Quid in suis codicibus Lindenius, illius mutationis auctor, legerit, nescio. Attamen Schulzio libens assentior improbanti istam lectionem adversa. Assentior quoque anteferenti alteram illam diversa. De ratione autem qua explicat, cur abiciat primam, tueatur alteram, magna ex parte dissentio. Nam discere cupientem quid Celso sint adversa ossa, rejicit ad caput 5. libri hujus. Ibi autem ossa narium adversa fracta illa intelligenda esse, patet, quæ ab adverso, non ab laterali, ictu fracta sint; itaque ossi opponuntur, quod a latere fractum, ictumve sit: quæ res quantum ad propositum faciant, non video. Scire etiam aventem, quid sint diversa, attendere jubet, Celsum proposita parte capitis 10. tradere instituisse communes curationes, ad humeros, brachia, crura, femina, digitosque confractos pertinentes; respexisse igitur ad illos casus, ubi in cubito vel crure utrumque os fractum est, minusque curiose omnia in reponendis & continendis ossibus facta sunt: ex quo accidere potest, ut ulna cum radio, vel tibia cum fibula, hoc est ossa diversa coalescant. Ego vero illud primum dico, qua parte propositum Celsi est communes etiam humeris & feminibus curationes docere, ea parte peculiare brachii vel cruris, quas superius absolverat, iterum attingi, præsertim nec brachio, nec crure commemorato, non potuisse. Deinde dico, quos Schulzius ponit casus me neque apud Tagaultium, neque apud Paræum, neque apud Fabricium nostrum, neque; ut alios omittam; apud Cel. Heisterum, ubi consultissimi hi Viri, neque minus in Celsi lectione, quam in Chirurgia diutissime versati, de ossium brachii, aut cruris fractura agunt, legere meminisse: ut quamvis ex parte queant contingere; rari sint, oporteat, cum Celsus non ita rarum designet suum; Solent enim, inquit, interdum &c. Quid ergo est? Non 5. hujus libri capite, sed prima parte capitis hujus 10. qua plura quoque communia Celsus docuit, locus erat, cum eo quo de agimus, comparandus; ut simul quid ipsi essent ossa adversa, & esse possent diversa, simul hic verba esse de crebro casu, nec solum ad brachii, aut cruris ossa attinente, perspicere-tur. Si fracta ossa non adversa, sed obliqua junguntur (quod fit ubi loco suo non sunt) membrum id altero latere brevius est, & musculi ejus tument. Loquebatur ibi de ossibus necdum repositis, non modo necdum conferventibus. Si ergo accidat, ut sic conferveant, quod solitum interdum accidere sive Chirurgi, sive ægri culpa, vel ni-

mis notum est; sua quoque curatio, oblongis omnibus ossibus communis, Celso non erat hic omittenda. Quam ita subjicit, ut frangi rursus ossa, & dirigi debere, dicat; non transferri: quemadmodum mox quoque dicit, ab ea parte, in quam os se inclinatur, involutam lana regulam esse objiciendam. Adversa igitur inter se ossa confervere non aliud Celso est, nisi ita confervere, ut naturalem quodque directionem confervent, non ut fractarum partium aliam alio inclinent. Non scripsit igitur hic adversa; sed id quod adversis oppositum est. Quod ut significaret, obliqua, ut vidimus, supra dixerat. In codice hic, ut dictum est, non secus ac alii olim, transversa reperi: quod & obliquitatem interdum non maximam significat, ut cum febricitantes sues, Columella (q) scripsit, obstipas transversa capita ferre, quod postea sic expressit Plinius (r); index suis invalidæ --- caput obliquum in incessu. Potuit tamen Lindenius in alio codice invenire adversa, sive quod inscitia librariorum, præcedens negativa vocula deesset, sive quod tenuis quæ eam repræsentaret, notula, atramento diffugiente, evanisset: nec prohibet quidquam credere, potuisse hic Celsum scribere, ut alibi fecisse vidimus, non adversa. Veruntamen si plerique optimi codices inter se hic, ut editiones, conveniant, & diversa habeant; hoc potius ita accipiemus, ut in longe aliam ac Schulzius, sententiam euntes, aliam ossium, quæ conferbuerint, partem alio versam inclinatumque significari, existimemus.

Restat, ut de ossibus loco suo motis verba faciamus. Capite 19. hujus, a quo non recedimus, libri octavi primum quidem in manuum digitis totidem fere luxationum casus, eademque signa esse dicuntur, quæ in ipsis manibus. Dictum autem fuerat cap. 17. manum in omnes quatuor partes prolabi, id est in priorem, aut in posteriorem partem, aut in utrumlibet latus, & quæ his singulis conveniant casibus, curationes adjectæ. Cum eadem igitur in digitis quoque expectes; de eorum curatione hæc solum invenis: Super mensam tantummodo intendi debent, qui vel in priorem vel in posteriorem partem exciderunt; tumque palma compelli: ut ita in locum, unde lapsus est digitus, restituatur. At qui in latus alterutrum prociderunt, ii qua ratione curandi sunt? Monstrant editiones omnes meæ, quæ nimirum summo consensu pro novem istis ultimis verbis, hæc habent, atque id quod in latus elapsus est, digitus restitui, id est Chirurghi digitis, ut opinor, non palma: quamobrem suspicatus sum aliquando, Celsum non atque, sed at scripsisse, certe in codice sic est, ad id quod in latus elapsus est. Verum hoc levius. Nunc ad primum, unum, atque alterum dumtaxat exemplum addam, utrumque luculentum, utrumque ex capite 20. libri hujus; sed alterum ex initio, ex fine alterum. Primum est: Cum de humeris dixerim; de his quoque, quæ in cruribus sunt, videri possum dixisse: siquidem in hoc casu quædam similitudo est femori & humero, tibia & cubito, pedi & manui. Dixerat Celsus proximis superioribus quinque capitibus de prolapsis humero, cubito, manu, & quæ in hac sunt, palma, & digitis. Cur igitur de humeris, ajat dumtaxat, se dixisse? aut quomodo humeris non modo femora, sed & tibia, & pedes respondeant? hæc enim omnia, ut diserte explicat, crurum nomine hic accepit. Num igitur ut nominata hac una parte totos artus inferiores, quod nescio an alibi usquam fecerit, hic certe significat; sic etiam humerorum appellatione totos superiores designavit? Sane hoc loco aliquid ejusmodi committeremur, necesse esset; quanquam non ad hunc modum loqui solitum sciremus, ut cum supra, cap. 1. per omnia femur humero, crus vero brachio

(o) Exerc. de Ossib. confervent. §. 4.  
(r) Nat. Hist. l. 8. c. 51.

(p) Annot. ad hunc loc.

(q) de Re Rust. l. 7. c. c. 10.



*chio simile esse*, scripsit; nisi & codex, & editiones, quotquot apud nos sunt, sic hujus 20. capituli initium proponerent, *Cum de his dixerim; de his quoque*, sive, ut habet Stephanus, *de iis quoque, quæ in cruribus sunt, videri possum dixisse*. Qua ratione ut vocula *his* ossa omnia artuum superiorum, sic vocula *iis* omnia pariter inferiorum comprehendit. Tandem ut ex capite hoc extremo alterum exemplum proferamus; tres certe  
 555, 15. ultimi ejus versiculi, *Potest tamen conditus, articulus medius aut summus canaliculo aliquo contineri*, neutiquam possunt femoris ossi convenire, de quo uno in suam sedem reponendo, in eademque continendo verba facta sunt eo capite. Et vero neque codex, neque ex meis omnibus editionibus ulla est, quæ tres eos alibi versiculos habeat, quam post totidem ex quibus caput constat 24. quod ad caput, quippe de luxatis digitis pedis, attinere possunt verba de articulo medio, aut summo. Sed cum digiti qui in manu sunt, singuli articulos habeant ternos, quot non habent singuli qui sunt in pede, & quod præsertim attendendum est, his longiores sint, multoque illos crebrius, quam hos, movere consueverimus; mirari aliquis possit, cur eum canaliculum Celsus non illis potius quam his continendis proposuerit capite 19: quod si fecisset; non fuisset opus hic  
 557, 4. iterare ubi in digitis pedis *nihil ultra fieri*, præcipit, *quam quod* præceperat in manus digitis. Quærere insuper aliquis posset, quare cum cruri, aut femori continendis, si fracta quidem, non si luxata sint, canalem adhiberi iusserit parte 5. capituli 19; in digito fracto canaliculum non laudaverit particula illa proxima 6. brevi adeo, ut typographi in altera Manutiana editione, prioris aliquin consimillima, pene accepisse videantur pro inscriptione partis 7. Quod si is quæreret, quasi ad brevissimam hanc particulam verba illa quæ proposuimus, suspicaretur esse adjicienda; plura essent per quæ ab ejusmodi suspitione posset dimoveri: sed unum satis est, quod articulus medius aut summus *conditus* dicitur, eadem videlicet significatione, qua capite 23. *condi* dicuntur luxata plantarum ossa; *iisdem modis, quibus in manibus, prodeunt, iisdemque conduntur*, id est reponuntur: articuli autem nomine hic junctura non accipitur, sed os quod jungitur; quæ significatio in artu quidem, non in articulo, a Lexicorum Scriptoris memoratur. Quæcum ita sint; conjicere posse mihi videor, Lindenium a codice fortasse aliquo admonitum, ad caput potius 19. attexenda verba proposita credidisse, eoque a capite 24. disjunctis, ejus autem amanuensium incuriâ ad caput 20. adjuncta esse.

Hæc, mi Vulpi, habui quæ duabus Epistolis ad te scriberem super locis pluribus, quæ mihi Almelveenianam Celsi editionem inter scribendum

volutanti, & cum libris seu typis; seu calamo descriptis conferenti, hic illic forte occurrebant digna in quibus alia scriptura aut indicata esset, aut etiam proposita. Ut hæc, sic alia, opinor, nec pauca fortasse, deprehendere potuissem, si minus fuisset aliis studiis, & occupationibus distentus. Sed vel ea quæ notavi, satis superque esse potuerunt scire aventibus, quid ego de ista editione sentiam. Neque tamen in Lindenium hanc culpam confero, quod marte, ut dicitur, suo tot mutaverit, multoque etiam minus, quod mutando, plura vitia verit, quam emendaverit. Me enim illa quam modo dicebam, collatio docuit, bene multa, quæ ab ipso primum inuenta crederes, in quibusdam antea editionibus, aut codicibus fuisse: plurima autem ne intelligi quidem potuisse, nisi emendationibus, quas ratio, & facilitas ipsa commendat, ab eo sæpius, ut videtur, selectis, quam excogitatis, feliciter restituta haberemus. In ejus igitur editione, ut ab Almelveenio ornata est, cum & plurima sint, ut dico, & in parte etiam ostendi, bene emendata, & plurima quoque, præter respondentes Celsi locos, numeris ad latus adscriptis indicatos, tum pagellis plerisque, tum volumini universo, non sine legentium utilitate, subjecta: cumque in cæteris editionibus, si eadem trutina examinarentur, non pauciora saltem; ne dicam multo plura; emendationem requirerent; quis merito arguere te possit quod non aliam nunc Cominianis formis describendam cures interea dum aliqua tandem melior existat. Et sane postquam ex eadem officina eandem emisisti editionem, cum semel, iterum, tertio apud exteros Celsus prodierit; secundum Almelveenii editionem semper audio prodisse. Utinam Viri docti, quibus codicum optimorum copia sit, ea in medium conferant, unde lumen accendatur ad illam, aliis non temere detractis, aliis adjectis, aliis mutatis, aliquando perficiendam. Nam certe, quo magis considero, novæ mihi subinde oriuntur dubitationes, quæ, si codicum subsidio abundarem, fortasse ad verum propius vestigandum perducerent. Nunc per se vix usui sunt. Nam ut vitiatum suspicer locum aliquem, faciunt; ut videam, quomodo restituere possim, non faciunt: & tamen videre mihi aliquid interdum videar quod a veri similitudine non abhorreat; id tamen proponere vix audeo conjecturæ nomine, aut divinationis, vel potius conatus divinandi. Cujusmodi igitur futura essent, intelligis, quæ promiseram; ut ægre ferre non debeas, si jam satis longam Epistolam nolui facere his quæ melius apud me latebunt, multo longiorem. Vale: & librum, quem ad Samonicum, & ad me attinere, dixeras, quam primum mitte.

Patavii MDCCXXXVIII. VII. Kal. Januar.

## E P I S T O L A S E P T I M A.

Jo. Bapt. Morgagnus Jo. Bapt. Vulpio S. P. D.

**N**Egas, mi Vulpi, te prius librum, quem eras pollicitus, esse missurum, quam dubitationes acceperis, & divinationes, quas promiseram. Accipe, quando ita vis, qualescunque sunt, & quotquot, & quocunque ordine succurrent protinus scribenti. Sed cave, ne tot sint, ut te pœniteat voluisse, neve, si justæ Epistolæ, tuique desiderii modum forte transivero, tu multans, me similem propemodum cantorum censeas (a).

*Omnibus hoc vitium est cantoribus, inter amicos*

*Ut nunquam inducant animum cantare, rogati:*

*Injussi, nunquam desistant.*

Hæreo primum in quodam loco lib. 2. cap. 7. *tum in superioribus partibus fit abscessus: ac si inter ipsa initia sanguis e naribus non fluit, circa aures erumpit*. Causa dubitandi est, quia cum ea quæ hæc præcedunt, & quæ subsequuntur, ex uno eodemque loco Hippocratici Prænotionum libri (b), ipso rerum conservato ordine, sumpta agnoscam, neque indidem accipi videam quæ illis interjecta hic descripsi, neque satis cum his convenire, intelligam, ut putant aliqui, certum quendam Coacarum Prænotionum (c) locum, in quo de sanguine quidem e naribus, sed post parotidis eruptionem fluente, verba fiunt; quærendum superest, unde igitur sumpsit Celsus, & cur hoc loco.

(a) Horat. Serm. l. 1. Sat. 3. (b) n. 6. (c) apud Holler. Sect. 2. l. 1. A. 21.



loco interjecerit; nisi quidem huc temere e sua sede translata sint, quæ sententia Ronssei (d) fuit. Verum id dum quærimus, scriptura ipsa nostræ officit perquisitioni. Verba enim illa, *sanguis e naribus*, neque in nostro codice, neque in ulla ex his quæ ante oculos sunt, editionibus invenimus: & vix Constantinus, & Ronsseus in libri ora scribunt *initia*, aut *viscera*, cum in contextu omnes scribant *ipsa ulcera*; alii autem *non fluit*, alii *non fuit*, quod & vetustior ex meis editionibus, & codex habet, hicque insuper *viscera*; ut mihi aliquando in mentem venerit legere, ac si inter ipsa viscera non sit, circa aures erumpit, abscessus videlicet. Quod etsi, quemadmodum postea animadverti, placuerit etiam Pantino (e); tamen, ut in loco aliter adeo ab aliis scripto, esse amplius perpendendum censeo.

30, 8. Commemorata sententia Ronssei de eo loco paulo superius transferendo, ad memoriam redigit dubitationem quandam meam, num alius sit forte de sede sua deturbatus. Indicia enumerans Celsus lib. 3. cap. 6. ex quibus Medicus febricitare ægrum, cognoscat, non videtur mihi omnium, ut nunc quidem legimus, ultimum illud facere potuisse, si *venæ non aquis intervallis morientur*; cum hæc continuo esset adjuncturus: *Ob quam causam medicus neque in tenebris, neque a capite ægri debet residere; sed illustri loco adversus eum, ut omnes notas ex vultu quoque cubantis perspiciat*. Quod si illud ex arteriarum ictibus percipiendum signum perpaucis ante versibus scriptum fuisse, concipiamus; nempe ultimæ erunt illæ notæ, post quas statim possint illa recte subjici, *Ob quam causam, & cætera* quæ descripsimus.

50, 8. Sed leve hoc præ iis quæ lib. 8. cap. 1. in descriptione articularum dubito superiorum vertebrarum, sive rei obscuritas tantummodo, sive & vitium quodpiam verborum est. Illustrare conemur locum, non perbreve, hætenus saltem, ut minus difficile possit intelligi, an a verborum depravatione, id quod credibilius est, oriatur obscuritas. 1. *Omnesque vertebrae (exceptis tribus summis) a superiore parte in ipsis processibus parum desidentes sinus habent: ab inferiore alios deorsum versus processus exigunt*. 2. *Summa igitur protinus caput sustinet, per duos sinus receptis exiguis ejus processibus*. 3. *Quo fit, ut caput deorsum parvis tuberibus exasperetur*. 4. *Secunda superioris parti inferiori inseritur*. 5. *Quod ad circuitum pertinet, pars summa angustiore orbe finitur*. Itaque superior secunda circumdata in latera quoque caput moveri finit. 6. *Tertia eodem modo secundam excipit*. & perpaucis de cervicis mobilitate interjecis, 7. *Jamque vertebra tertia tubercula, quæ inferiori inserantur, excipit*. 8. *Cætera processibus deorsum spectantibus in inferiores insinuantur, ac per sinus, quos utrinque habent, superiores accipiunt*. Locum omnem cum brevitatis, tum perspicuitatis causa in octo particulas divisi. In prima igitur, quæ verba uncis intercepta sunt, num a Celso esse, credemus? aut si a Celso, ita prorsus ab eo scripta? Nam si vertebræ tres summæ superioribus carent sinibus, itemque processibus inferioribus; quomodo prima vertebra sinus habet, ut in 2. particula est, quibus capitis processus recipiat? & quomodo tertia vertebra tubercula quæ inferiori inserantur, excipit? sic enim ostendam in particula 7. esse legendum. Jam vero particula 3. non ita uti ex Almeloventianæ descriptioni, in cæteris existat editionibus, sed ad hunc modum, *Quo fit, ut caput sursum deorsum versus tuberibus exasperetur*; nisi quod Juntæ editio, & Manutiorum utraque, & Ruellii habent *versum*, quibuscum & codex, & vetustior editio omnino conveniunt. Paavius (f), qui *versus* legeret, perperam huc intrusam ratus voculam *sursum*, quia *deorsum versus processus solummodo exserit caput*, hanc sustulit. Sed retinenda est, opinor, legendumque cum vetustioribus *caput sursum deorsum versum*, ut attollendi inclinandi capitis

motus intelligatur: quem recte Celsus sine articulis illis fieri non posse, indicat, quos proxime 2. particula memoraverat, sicuti motus capitis in gyrum, sive in latera cui structuræ debeat, mox 5. particula est traditurus. Veruntamen in hac, de qua loquimur, 3. num aliquid redundat, aut aliter legendum est? Nam si nihil aliud scripsisset, nisi *Quo fit, ut caput sursum deorsum vertatur, aut verti possit*; jam satis omnia exposita essent; tubera enim, quibus, additum est, caput *exasperari*, iidem nempe *exigui ejus processus* sunt, de quibus proxime dictum erat; ut minime opus fuisset, a Lindenio huc inferi illam insuper vocem *parvis*, quam apud alios non invenio, & quam supervacuum Celsus fecerat, cum *exigi processus* dixerat. Cæterum etsi alii fuerint, ut Constantinus, & Ronsseus in libri ora indicant, quibus post *versus* addere verbum placuit *moveatur*; ii tamen continuo & quoque addiderunt, & reliqua retinuerunt. Ego præter ea quæ antiquiores libri mutanda esse, docuerunt, nihil muto: quid dubitem, tantum indico. In particula tamen 4. mutare nihil ausim, tametsi & codex, & editiones omnes meæ magno consensu ab ea discrepent. Habent enim: *Secunda superiori parti inferiore. Quod ad &c.* scriptura, ut vides, aperte adeo mendosa, ut Paavius (g) huc adscripserit, *quis sensus? nullus sane. lego, secunda superiori parti inferiori. ut mens sit, secundam vertebrae jungi superiori parti inferioris vertebrae. nulla tum obscuritas*. Nulla utique. Sed neque erat, cur id Celsus traderet, quod omnes haud aliter esse posse, per se intelligerent: neque erat, cur necdum absoluto sermone de vertebra duabus primis, mentionem injiceret de tertia, præsertim cum hæc quomodo secundam excipiat, mox esset 6. particula indicaturus. Præterea in Paavii lectione verbum deest, neque in iis quæ proxime antecedunt, aut subsequuntur, quidquam est unde illud subaudias. Quamobrem longe melius ab Lindenio videtur factum, qui litterulas illas Paavii duas (i), & (f) sejungens, rescripsit: *superioris parti inferiori*, verboque *inseritur*, quod Constantinus in codice legi admonuerat, accepto, particulam hanc 4. complevit. Verum hinc oriri potest dubitatio, an quod hæc 4. sic dictum est, supervacuum sit propter ea quæ statim subjiciuntur particula 5. de vertebra prima circumdata secundæ, & quod consequitur, de secunda igitur superiori inserta. Nec dissimulare possum, aliquando mihi venisse in mentem suspicari, an non 4. particula, mendose adeo, ut vidimus, scripta, e librorum margine in contextum irrepsisset; cum dici non possit, quam apte post tertiam quæ de capitis inclinatione, aut erectione est, statim sequeretur 5. quæ ad circumversionem attinet ejusdem capitis, addito uno, haud amplius, verbo, *secundæ* videlicet ante *pars summa*. Sed quid de particula dicemus 6? Traditur in 5. modus quo prima vertebra excipit secundam, nimirum hujus summæ parti circumdata, quæ in angustiore dentiformem processum finitur. Continuo autem in 6. additur, *Tertia eodem modo secundam excipit*. Num secunda igitur ab ima etiam parte alterum ejusmodi processum exigit, cui tertia ad eundem modum circumdetur vertebra? Multo quam hæc aut emendare, aut dilucide explicare, facilius videtur restituere particulam 7. *Jamque vertebra tertia tubercula, quæ inferiori inserantur, excipit*. Nam etsi plures, nec contemnendæ editiones sic habent; vetustior tamen, & illæ pariter quas supra laudavi in particula 3. & præterea Henrici Stephani editio, & membræneus codex, & rei ipsius natura docent, pro *excipit*, rescribendum esse *exigit*. Quo enim pacto fieri possit, ut tubercula inferenda vertebrae inferiori, id est quartæ, excipiantur a tertia, id est tertiæ inserantur? Imo hæc a tertia emittuntur in quartam: idque adeo ex Anatome; quod præclare nobis; manifestum est, ut quamvis particula 8. quam ob hanc

(d) in Enarr. Injuncti loci. (e) Comment. in hunc loc. (f) Comm. in hunc loc. (g) Ibid.



ob hanc unam tantummodo causam protuli, indicare videatur, a quarta vertebra incipere processuum inferiorum in subjectas emissionem; tamen ( nisi etiam discrimen forte aliquod Celsus fuisset inter processus, & tubercula, per quod rem explicare quis posset ) multo levior mihi repugnantia hæc videretur, quam in uno eodemque versu dicere, eadem tubercula & alio inferi, & hic excipi.

Exposui fusc dubitationes meas, earumque causas, in descriptione vertebrarum. Nunc illas pressius indicabo, quæ ad claviculæ, ut Paavius ipse ( *b* ) existimat, descriptionem spectant. Locus est eodem i. capite aliquanto inferius, ubi latorum scapularum ossium figura, & adhæsiōe propositis, hæc scribuntur: *At a summa costa &c.* Describitur hic os quod sustinet jugulum, sive in quo jugulum insidit exteriore capite. Non potest igitur esse clavicula; hanc enim Celsus non solum alibi, ut hujus libri 8. capite 8, jugulum vocat, sed & hic, nec describere tamen incipit ante verba illa, *Id ipsum recurvum &c.* Quodnam igitur os esse istud, dicemus, quod primo loco proponit? Exterius certe juguli caput nullo alio osse, nisi eo quod nunc Scapulæ appellant Spinam, sustinetur. Si pergens igitur latum os scapularum describere, hic de ejus Spina Auctor loquitur, cui Spinæ quidem pleraque ejus verborum conveniunt; quomodo ait, *a summa costa fere media hoc os excrescere*, primum tenue, deinde eo plenius latiusque, *quo propius lato scapularum ossi fit?* Ut enim pro *summa costa* non accipias, quam his duabus iisdem vocibus non multo superius designavit, duodecim costarum supremam; sed unum de tribus scapulæ lateribus; nam *triangulam* esse, dixerat, certe a summo illorum, quod costam superiorem vocamus, Spina non oritur, sed a basi, multoque superius, quam ubi hæc media est. Deinde Spina, quæ a scapula oritur, & per ipsam pergit, parsque ejus est, num propior fieri scapulæ ipsi diceretur? Scriptum oportuit, *quo propius vertici lati scapularum ossis fit*, ut veram agnosceremus descriptionem. Sed & descriptio juguli ipsius cum sic finiatur *& cum lato osse scapularum, infra caput ejus, nervis & cartilagine connectitur*; quid tandem verbis illis designat, *infra caput ejus?* Nam sive caput, summum verticem significat scapulæ, sive ipsum juguli exterius caput; vox *infra* quomodo cum vero conveniat, non est facile divinare. Et sunt quidem aliqua in his spinæ scapulæ, & claviculæ descriptionibus, quæ aliter in Almeloventii, aliter in cæterorum editionibus, ipsoque codice leguntur. Sed nihil juvant ad has mihi dubitationes eximendas.

Nec plus jvant varietates aliæ in iis quæ paulo superius, ut modo indicabam, de collis scripta sunt. *Infra cervicem vero summa costa contra humeros sita est. Inde septem inferiores usque ad imum pectus perveniunt.* Equidem video, accipi non posse lectionem hanc, cum, aliquot interjectis versibus, hæc sequantur, *Sub costis vero superioribus, quinque &c.* Sic enim costæ cum summa illa uno in latere essent tredecim. Verum haud satis video, quomodo sine aliqua hæsitatione accipiam id quod ante Lindenium legebant, *Inde undecim inferiores.* Nam si universæ costæ ibi continuo describuntur; cur de inferioribus quinque mox scribitur, *ipse quoque paulatim in cartilagine versa?* quod profecto supervacuum esset, cum modo de omnibus scriptum esset, *paulatim in cartilagine degenerant.*

Sed non de ossium fabrica tantum, neque hæc tantum dubitationes fuere, quas, vel codice, meisque editionibus inspectis, mihi ex animo non potui eximere. De plurimis huc aliquot adjiciam. Libro 3. cap. 22. postquam inter levia phthisis initia, cibi primo acres, deinde lenes, tum in vicem modo hi, modo illi propositi sunt; hæc

sequuntur, *adjiciendaque quadam ex media materia, præcipue vero ex prima, cerebellum, vel pisciculus, & his similia.* Quo referrem illud ex prima, cum minime appareret; quid antea ibi legeretur, quæsi. Omnes aut ex apruna, aut, sicuti Pantinus ( *i* ) admonuit, ex aprugna habent; codex ex pruna. Sed quodnam ex pruna; si tamen sic assari, voluisset; cerebellum indicasse Cornelium, dicas? non aprugnum certe, quando lib. 2. cap. 18. apum valentissimæ materiæ esse, docuit, nec vulgo ea copia aprini cerebri est, quæ cæterorum quos phthisicis laudavit, ciborum. Suis quidem cerebellum minus valentis esse materiæ, ex agno autem, *hædove totum caput*, dixit, in media materia poni posse. Itaque ex quonam horum, aut his similibus cerebrum sumendum esset, scripsisse, puto, idque nomen in mendo latere; nisi forte malis, revera ex pruna scripsisse; cerebellum autem cum ex media materia, quam supra explicaverat, accipiendum esse, diceret, animalis nomen adjicere supervacuum existimasse: quanquam & codex, & editiones, cum ita habeant, præcipueque vel ex, priori magis conjecturæ favere videantur. Libro 7. cap. 2. planissima illa quidem sunt de suppuratis: *Sed cætera etiam subcruda aperiri possunt; inter nervos ultima expectanda maturitas est, quæ cutem extenuet, eique pus jungat, quo propius reperiatur.* Verum quæ continuo sequuntur, non item. Jamque alia rectam plagam desiderant, ut in carne: alia vero vehementer cutem extenuant, in quibus tota ea super pus excidenda est. Si editiones inspecio; omnes habent Itemque pro Jamque, & extenuat pro extenuant: nulla ut. Sed pleræque habent aliam rectam, perpaucæ alia rectam. Codex cum his perpaucis convenit; sed in eo discrepat ab omnibus, quod pro tota habet tuto. Verum per has lectionum varietates nihil proficere mihi videor, ut neque per Constantini, adscriptas in margine, conjecturas. Fieri enim posse, existimo, ut Celsus postquam dixit de prorsus maturis, verba fecerit de subcrudis, & quod consequitur, magis de carne, quam de cute incidenda: repetita autem esse per librariorum incuriam quæ de extenuata cute dixerat. De cute vero tota excidenda si hic quidquam præcepisset; non videtur paucis post versibus de eadem re ad hunc modum fuisse scripturus, *Est etiam in rerum natura, ut cutis latius excidenda sit.* Quod si non tota, sed tuto super pus excidenda, imo forte incidenda scripsit; nimirum hoc quoque ad ultimam illam maturitatem pertinebat. Vides igitur, cujusmodi sint quæ huc intrusa putem pro illis quæ nequidquam in codice, & tot aliis exemplaribus quæsi.

Nec felicior fui in ejusdem libri 7. capite 26. Namque ubi emoliri manu urinam oportet, cum hæc legerem: *Homo tum resupinus eo modo, quo in curatione calculi figuratur, super subsellium aut lectum collocandus est;* non mediocriter miratus sum, probe gnarus, quam molesta, & simul ut minus hic necessaria ea figura sit, quæ in calculi curatione a Celso ipso inferius proponitur. Multo autem magis miratus sum, ubi meis editionibus, & codice inspectis, summo consensu in omnibus pro in curatione calculi scriptum reperi in curatione ani: in qua alienam omnino a proposito requiri figuram, manifestum est, neque eam a Celso usquam fuisse descriptam. Itaque aut nomen alterius curationis hic posuit, aut ab ejus manu non sunt ista, eo modo, quo in curatione ani figuratur.

Libro etiam 8. cum in extremo capite 7. animadvertissem, iis quorum maxilla fracta est, non modo humidum cibum diu præscribi, sed hæc insuper addi, *etiam, cum tempus processit, in lagano similibusque aliis perseverandum esse, neque quicquam edendum, donec ex toto maxillam callus firmaverit;* alterutrum suspicatus sum, aut Celsum tria ista verba neque quicquam edendum non scripsisse,



scripsisse, aut, si scripsit, aliud quodpiam interjecisse quod a librariis præteritum sit, ut puta *durius*, aut aliud ejusmodi, nempe ad hunc modum, *neque quicquam durius edendum*. Nam laganum, ut tenue esset, quantum ex Acrone (k) intelligimus, comedebatur certe, quod & ipse Acron diserte ait; non potabatur. Quonam igitur modo qui in lagano perseverandum esse, diceret, idem negaret, quicquam edendum? Cum quotquot habeo editiones consulerem; nulla omnino fuit in qua tria illa verba invenirem. Sed codex ita prorsus habet, uti Lindenius, quem commentum non esse quæ addidit, hic quoque locus indicio est. Quanquam igitur eo inclinatus animus quo indicant editiones, præsertim cum Celsi sententia, vel tribus iis verbis demptis, eadem sit; tamen cum Scriptoribus liceat interdum aliqua inculcare, verbaque illa non modo in nostro, sed ut apparet, in aliis etiam, quæ Lindenius viderit, scriptis exemplaribus legantur; me potius juvat pendere animi, quam fortassis contra fidem vetustiorum, quibus careo, meliorumque codicum quidpiam pronunciare.

Magis autem hæreo in ejusdem libri capite 10. ubi de fracti humeri curatione verba fiunt. Neque enim hæc est sine aliqua obscuritate, quæ si a depravatis dumtaxat vocibus oriretur; aliquanto minus difficile esset eam discutere: sed vereor, ne præterea quidpiam desit, ut in fasciæ quæ secundo loco ponitur, descriptione, in aliisque fortasse. Frustra autem codicem, & libros formis descriptos inspexi. Variat quidem scriptura; sed non ibi ubi sperabam. A tergo ægri minister sub ea de qua modo dicebam, fasciâ, *porrecto*, si *dexter humerus ducendus est*, *dextro*, si *sinister*, *sinistro brachio*, *demissum inter femina ejus*, qui curatur, *baculum tenet*: *medicus super eam fasciam*, de qua tertio loco dixi, *plantam injicit dextram*, si *sinister*, *sinistram*, si *dexter humerus curatur* &c; medicus enim adversus, humiliorque sedet, eaque tertia fasciâ, amplexa ium ægri humerum, deorsum pendet capitibus ibi inter se vinctis. Pro *porrecto*, pro *plantam*, pro *humerus curatur*, in editionibus cunctis invenio *correpto*, in aliis autem *planam*, in aliis *palmam*, & rursus in cunctis *humerus sumatur*. Codex apud Constantinum pro hac ultima voce habet *sinuatur*; noster magis evidenti mendo *sura-tur*. Sed cum uterque habeat *planam*; noster, qui manifeste errore pro *correpto* habet *correcto*; habet contra pro *baculum*, quod ab omnibus scribitur, planissime *brachium*: quæ lectio tanto minus negligenda est, quod de baculo nullum antea, aut postea in hac curatione verbum est; *brachium* autem legi animadvertimus in hoc ipso Celsi loco in Vesalii Chirurgiam (l) relato. Nec *plantam*, ab Lindenio hic positam, facile rejiciendam puto. Idcirco enim videtur tertia fasciâ deorsum fuisse *demissa*, ut eam planta injecta *premat medicus*, sicuti mox Celsus loquitur; potius, ni fallor, *trahat dicturus*, si manu voluisset. Manu autem ut posset utraque medicus fracti humeri partes in suam sedem compellere, quemadmodum & res exigit, & superius ipse in universum docuerat; propterea planta uti maluerit ad fasciam premendam. Sic etiam cap. 15. ut ambabus manibus reponi luxatus humerus posset; medicum iussit vel genu uti; si modo Lindenius recte illa edidit, *humerum genu sub ala ejus cogere*, quomodo in antiquo libro manu exarato legi, docuerat Constantinus. Qui tamen dum confirmari hanc lectionem credidit cap. 20. de luxato femore, an hallucinatus sit, videas, ex verbis illis, *rotundum aliquid super inguen ponendum*, subitoque *super id genu adducendum est eodem modo eademque de causa*, qua idem in brachio fit; neque enim a Cello ibi designari, crediderim, Morgagni Opusc.

ut Constantinus ibidem putat; caput hoc 15. de humero, sed potius caput 16. quod proprie est de brachio, & in quo sane hæc scripserat, *rotundum aliquid a lacerti parte ponendum est*, & *super id repente cubitus ad humerum impellendus est*; ut genu capite 20. ægri sit, non medici, cuius quidem est in quadam repositione humeri apud Hippocratem (m), in qua medicus, præter manus, genibus quoque, & capite nititur. Veruntamen lectio, a Constantino producta, ejusmodi est saltem ut intelligi facilius possit, quam quæ est in nostro codice, ad eundemque prorsus modum in Pinzii, Juntæ, Manutiorum editionibus misere depravata. Sed ad caput 15. ut redeam; etsi quæ de quibusdam in eo verbis censeam, non reticui; quæ præterea tamen desiderem, supra indicavi.

Proferam denique ex lib. 5. cap. 19. num. 11. locum illum: *Sunt autem quædam emplastra, quibus utriusque rei facultas est. quæ, nisi singula habenda sit, meliora sunt*. Cum hærerem in ea voce *singula*, dubius, an Celsus, sic præsertim, illa uti voluisset; vel magis hæsi, dum attentius legens quæ sequuntur, eaque cum superioribus, & mox adjectis contendens, non invenire visus sum ita presse, apteque scripta, ut Celsus solet. Et sane editiones cæteras consulens, deesse illa vidi quæ sequuntur; sed tamen & ipsas, & codicem vitio non carere. Habent enim, *quæ si singula habenda sunt, meliora sunt*, statimque illuc transeunt, *sed in copia* &c. Cui vitio si Constantinus mederi voluit ex ingenio per ea quæ in margine adnotavit, quorum parte usus est postea Lindenius; morbum quidem magis cognovisse mihi videtur, quam sustulisse: sin codice aliquo usi sunt; vereor ut ejusmodi fuerit, qualem ipse versare & scrutari vellem: quanquam vitia interdum adeo antiqua sunt, ut ad ea tollenda satis opis ne a vetustissimis quidem, optimisque exemplaribus habere liceat. Quod cum possem tibi non uno exemplo demonstrare, eo quod sequitur, ostendam.

Cum ætate A. 1742. in Patriam secessissem meam, nec horas vellem pomeridianas illas fervidissimas perdere; Celsi codicem, quem alias, ut scis, nonnihil versaveram, petii; ut quidquid a Pinziana editione discreparet, in hujus oris perscriberem. Hæc editio, A. 1497. Venetiis habita, & qua nunc apud me nulla alia vetustior est, eo gratior in dies mihi sit, quo magis convenire ipsam in plerisque cum principe Florentina, intelligo, cum plura quæ ex hac adhuc servo, excerpta confero: estque eadem Celsus ille Pinzianus, quem adeo laudabat Schulzius (n). Celsus autem Foroliviensis calamo in membranis scriptus est A. 1451; ut quanquam ab editione illa in non paucis differat, non tamen unquam miratus sim, quod in difficilioribus locis non idem mihi auxilium tulerit, quod a multo antiquioribus libris sperassem, ut neque tunc in quodam Præfationis loco, necdum mihi, ut verum fatear, satis perspicuo, multo autem minus in Almeloveenii editione, in qua sic legitur: *Nam ne uterum quidem, ut nihilominus aerem contineat, spirante homine posse diduci*. Certe enim venter, spirante animali (quod vel proxima verba non negant) imo diutius vitam trahente, in experimentis anatomicis aperitur; non ita quidem, ut aerem nihilominus contineat: sed quis hoc requirat? aut sic objiciat, quod per se omnibus manifestum est, fieri nullo pacto posse? Itaque in nulla ex meis editionibus ita is locus descriptus est; sed in cunctis ad hunc modum, *Nam uterum quidem qui minus ad rem pertineat spirante homine posse diduci*. Verum ut communis hæc lectio neque insequentibus

551, 11.

262, 21.

11, 25.

(k) in Horat. l. 1. Sat. 6. (l) l. 2. c. 8. (m) l. de Artic. n. 2.  
(n) Epist. ad Thomæsum, præfixa Exercis. de Ossib. conserv.



tibus verbis repugnet, nec vero, nec illud requiratur, aut objiciat quod sic non esset obijciendum; tamen id ponit quasi minus ad propositam disputationem pertinens, quod evidens est ad ipsam pariter valde attinere. Ea enim erat disputatio quæ non minus ad hæc spectaret, quæ alvo, quam ad illa quæ thorace includuntur, vivo animali, examinanda. Cum propterea hæsitarem; frustra codicem illum cum Pinziana editione contuli: id enim quod modo tibi descripsi, ut in hac, ita in illo pariter scriptum erat. Quid optabilius esse poterat, quam videre, quomodo legeretur is locus in eo codice, *quicum nullum inter omnes Italiae membranas ætate vel emendatiori scriptione comparandum esse, censuerat Jo. Rhodius (o)?* Hujus voti me ultro compotem fecit Vir Humanissimus, idemque græce, latineque Doctissimus Antonius Cocchius Mugellanus in adjectis ad etruscam suam de Anatome Dissertationem, ad me perbenigne missam. In illis enim, inter egregia cætera, lectiones aliquot proferens ex vetusto illo Mediceo, quem Rhodius tantopere laudaverat, codice, eam quoque produxit quam præ omnibus optabam. Sed cum ea nihil prorsus discrepet a communi; jam æquum esset fortasse, ut me tardior in percipiendo, aut fastidiosior in accipiendo faterer: quod & facerem libens, nisi animadverterem, plerisque pariter Editoribus non planissimam esse visam propositæ scripturæ sententiam. Cujus rei indicium est, quod legendum credidere *qui minus*, & interrogandi notam? in fine apposuerunt; quasi ita aliquanto captu facilior redderetur. Cum vero difficultatem ne sic quidem tolli, existimaret Constantinus; eo decurrit, ut in libri ora adscriberet, *Nam ne utrum.* Quam adnotationem retinuit Ronsseus, credo ob eandem causam, Lindenius autem in contextum recepit, aliaque mutavit ex codice aliquo, an ex ingenio? minus feliciter certe, ut ostensum est, sed non obscura significatione difficultatis, quam offenderent in communi lectione satis commode intelligenda.

Cave tamen credas, optimos ejuscemodi codices; etsi non omnibus in locis meliora quærenti respondeant; non magno alibi esse usui ad veram lectionem aut ex quibusdam quasi vestigiis indagandam, aut etiam plane aperteque reperendam. Exemplis utrumque comprobabo, ab eodem Cocchio propositis. Legitur, ut in Manutiorum, aliorumque complurium, sic etiam in Almelo-  
 554, 8. *veenii* editione lib. 8. cap. 20. *Neque tot genera machinamentorum quoque, ad extendendum in hoc casu femur, Hippocrates, Andreas, Nileus, Nymphodorus, Protarchus, Heraclides, faber quoque quidam reperissent, si id frustra esset.* Quid coge-  
 bat Celsum, ut post tot, talesque Viros, obscurum fabrum memoraret? Nihil certe. Itaque laudanda videtur editio princeps, & Ruellii, & ante hanc, Pinzii, & Juntæ editiones, & si quæ aliæ nihil habent de fabro, cum cæteræ meæ omnes habeant, & codex Foroliviensis, & quinque alii Florentini, eodem sæculo scripti XV. Sed fuitne in codicibus vetustioribus quidquam ex quo perperam lecto istud extiterit de fabro commentum? In vetustissimo illo, inter *Heraclidem*, & *reperissent* hæc scripta fuerant, *quid qua vi.* Admonet autem non minus opportune, quam docte, Cocchius, locum hunc Celsi videri ex loco expressum *Heraclidis Tarentini*, extante adhuc apud Galenum (p): quod eo facilius credo, quo sapius video, *Heraclidem* illum a Cello memorari, & quo similior utriusque loci sententiam agnosco, *Heraclides* vero cum Medicis clarissimos nominet, in iisque Hippocratem, Nileum, & Nymphodorum; de fabro nihil, sed hujus loco, habet, ut Cocchius vertit, *aliique quidam.* Quibus

ex vocibus, a Cello verisimiliter scriptis, neque ut fabrum, sed ut cleros alios Viros, quos *Heraclides* nominatim laudaverat, significaret, num illæ sint natæ *quid qua vi*, Criticorum erit existimare.

Vidisti, ut optimus codex indicia præbeat ad veram, aut certe veri similem scripturam indagandam. Nunc accipe, quemadmodum plane eam aperteque exhibuerit. Libro 7. cap. 26. ubi Celsus docet, quæ via ferro facienda sit, per quam calculus e vesica eximatur, hæc legebantur: *juxta anum incidi cutis plaga lunata usque ad cervicem*  
 477, 27. *vesica debet, cornibus ad coxam spectantibus paululum: deinde ea parte, qua strictior ima plaga est, etiamnum sub cute, altera transversa plaga facienda est, qua cervix aperiatur.* Cumque omnia quæ apud me sunt, exemplaria in iis præsertim verbis conveniant, *qua strictior ima plaga est*; horum loco in pervetusto illo codice scriptum fuerat, *qua resima plaga est.* Nosti, qua significatione, non satis fortasse in Lexicis expressa, utatur Celsus voce illa *resima*, cum renes dicit lib. 4. cap. 1. *a parte altera resimos, ab altera rotundos.* Hic autem vides de plaga lunata verba fieri, novamque hanc, vel potius vetustissimam omnium scripturam aperte docere, transversam plagam ad lunatam illam ab ea parte esse addendam, a qua extant ejusdem cornua. Versamur, ut vides, in re gravi, & adeam rationem extrahendi calculi pertinente, quam inter cæteras præstantissimam multis de causis ostendit idoneus, si quis alius, harum rerum existimator, Heisterus (q): qui præterea ex eadem ortam esse, non dubitat (r), *Methodum*, ut vocant, *Lateralem*, nunc maxime celebratam, confirmatque (s) testimonio Ravii, qui de hac methodo, Raviana etiam dicta, interrogatus, sæpe respondit, *legite Celsum.*

Atque utinam Cl. Cocchius; ut has variantes lectiones proposuit, illamque insuper, quam & nos, admoniti a Foroliviensi codice, & cunctis editionibus, & re ipsa, in extrema superiore Epistola (t) attigimus; utinam, inquam, sic etiam reliquas omnes adjungere potuisset, quas, Celsum totum cum scriptis libris conferendo, jam diu habet adnotatas; magno certe beneficio cum omnes politissimi, utilissimique Auctoris studiosos, tum me præsertim, qui jam pridem ejus humanitati multum debeo, hoc etiam nomine obstrinxisset. Nam ego uno qualicumque codice usus, vix audeo ex iis quæ animadversa habeo, quæpiam proferre, veritus, ne aliter in aliis antiquioribus, & præstantioribus libris legatur. Exempli enim causa, libro 1. cap. 2. ubi *ambulatio melior esse dicitur in umbra, quam parietes aut viridaria efficiunt, quam qua tecto subest*, pro illa voce *viridaria*, quæ in meis omnibus est editionibus, in codice inveni *viridia*. Quod paulo fidentius memoro, quia in alio quoque codice sic legi, ex mea Pantini editione intelligo, cujus libri duo primi, & tertii priora capita cum olim; a quo nescio; collata fuerint cum veteri aliquo exemplari, & variantes lectiones inde habeant in oris calamo descriptas, inter has hæc habent *paries, aut viridia*. Differre autem, crediderim, *viridia* a *viridariis*, quod hac voce non nisi loca herbis & arboribus virentia, illa vero loca eadem aliquando, alias autem arbores plantæve ipsæ virentes videntur significari. Sic Cataneus (u) in minoris Plinii verbis illis, *ambit hunc ambulatio pressis varieque tonsis viridibus inclusa*, accipiendum censuit *viridibus* pro *arboribus semper virentibus*. Nec certe Vitruvium (x) aliter existimes accipere potuisse, cum scripsit: *Media vero spatia, quæ erunt sub divo inter porticus, adornanda viridibus videntur.* Neque enim *viridariis* dicere voluit, quæ ipsa sunt loca, seu

(o) Præfat. in Scribon. & Dissert. de Acia c. 6. (p) in Hippocr. de Artic. Comment. l. 4. n. 42.  
 (q) Dissert. de Lithot. Celsi præstantia. (r) Ibid. n. 52. (s) p. 167, l. 35.  
 (u) Comment. in l. 5. Epist. 6. (x) de Architect. l. 5. c. 9.



seu spatia; sed arboribus; quibus *hypethræ*, id est subdiales, ambulationes includerentur, ut sic haberent etiam a viridibus salubritatem, & in urbium obsidionibus, ut aliquanto inferius ait, succis arboribus apertæ, lignorum necessariam copiam sufficerent civitati. Quis autem Senecam (y), credat, cum in Africani majoris villa cisternam dixit *edificiis ac viridibus subditam*, viridaria intellexisse? cum cisterna, ut ædificiis & arboribus posset, viridariis subdita esse non posset; neque enim hæc satis convenirent cum cæteris quæ mox subjiciuntur, *sub hoc ille tecto tam sordido stetit, hoc illum pavementum tam vile sustinuit*. At enim Macrobius (z) cum *viridia* non pro appposito, ut in viridibus pratis, sed pro positivo ponitur, ut in illis, *formosa facies viridiorum*, docuit, & in genitivo casu sic finiri, & ipsam loci viriditatem significare. Fateor, qui supra dixerim, non semper arbores virentes designare. At certe non viriditatem ipsam loci apud laudatos Auctores significat; id quod proposito meo est satis: ut minime mihi querendum sit, qua significatione in Phædri (a) versiculo ponatur,

*Perambulante læta Domino viridia;*

quanquam ubi de ambulando per Romanos xyftos sermo est, posset alicui in mentem venire, ut secundum Plinii, & Vitruvii productos locos explicaret. Multo autem minus hic quæram, sintne *viridia* ad eundem modum accipienda in scriptis veterum Jurisconsultorum. Qua de re memini multa mecum olim erudite, ut solebat, verba fecisse Herculem Franciscum Dandinum Comitem (qui huic Gymnasio, mihiq; in primis, moriens, magnum tot ejus virtutum desiderium reliquit) cum differre, ipse quoque, sed alia ratione, *viridia*, & *viridaria* conjiceret, quamobrem alios fuisse *viridarios*, alios *topiarios*, existimabat, nec *viridaria* dicta etiam *viridaria*, nisi ex imperitia librariorum, qui *viridia* non intelligentes, alias in *viridaria*, nonnunquam littera ultima *i* non deleta, in *viridaria* mutassent: quæ in eum quem ultimum edidit librum (b) fuisse retulisse, non dubito. Illud dubito, ne forte etiam in Cello nostro ob eandem causam ejusdemmodi mutatio contigerit, & ex *viridia*, quæ ubi de ambulatione agitur, adeo convenire vidimus, factum sit *viridaria*.

86, 8. Ex iis quæ in Foroliviensi codice animadverti, hoc quoque est. Libro 2. cap. 12. ubi Almelveenius hæc edidit, *immittenda in alvum est, si levi medicina contenti sumus, pura aqua; si paulo valentiori, mulsæ; si leni, aqua, in qua fœnum græcum, vel ptisana, vel malva decocta sit: si reprimendi causa, ex verbenis*; supra illa verba, *si leni, aqua* (quæ in eo codice, ut in meis omnibus editionibus, ita sunt, *si leni, ex aqua*) supra illa igitur scriptum est *leniendi causa*, in margine autem *molliendi causa*. Quæ an glossemata, an variantes, ut sæpenumero in eodem codice, ex aliis descriptæ lectiones sint, non facile dixerim; sed tamen dixerim, apte his respondere, quæ mox sequuntur, *si reprimendi causa, ex verbenis*. Quo loco, si ex me quæras, quid Celso verbenæ sint; noli expectare, ut cum Almelveenio respondeam *quævis herba*, quasi fœnum græcum, vel malva non essent herbæ, vel herbæ omnes reprimerent; neque, ut cum aliis virgulta semper virentia, & jucundo odore, aut alia denique, magis ad Auctores alios, quam ad Celsum explicandum attinentia. Se ipse Celsus interpretatur hoc eodem libro cap. 33. cum inter reprimentia ponit verbenarum contusa cum teneris caulibus folia; *cujus generis, inquit, sunt olea, cupressus, myrtum, lentiscus, tamarix, ligustrum, rosa, rubus, laurus, hœdera, punicum Morgagni Opusc.*

*malum*: & uno versu interposito, *aqua calida, in qua verbenæ coctæ sunt, quas supra proposui*. Eæ autem omnes num semper vireant, aut jucundo odore sint, vides.

Sed, ut plenius desiderio tuo satisfaciam, audendum jam est, & sine cortice natandum, id est sine ullo codicum adjumento, veræ similior scriptura, si non divinanda, conjecturis saltem, aut certe suspicionibus perquirenda. A facilioribus incipiamus. Celsus quidem ipsum librum suum in quædam capita divisisse, manifestum est illa ejus loca attendentibus (c), quæ in extrema sua Præfatione indicavit Lindenius. Ita vero Celsus divisisse, ut nunc videmus, aut eas quas legimus, inscriptiones capituli præfixisse, si quis crederet; is quæ ego, scripta exemplaria inspiciendo, eam protinus opinionem deponeret. Longe enim alias, easque haud raro ineptas, & divisiones, & inscriptiones animadvertens, a Celso illas esse non posse, statim perspiceret. Huc adde, non easdem esse in cunctis codicibus partitiones. Quarum rerum omnium specimen habebis in II. & III. in Celsus Epistola ad te nostra, si particulam illam Indicis quam in II. (\*) ex Foroliviensi codice descripsi, cum ea contuleris quæ in III. (\*\*) est ex Veneto, utramque autem cum ea parte quæ illis respondet in libro cujuscunque editionis quarto. Cum enim editiones apparari cœptæ sunt, tunc primum, ut opinor, cogitatum est de aptiore & divisione in capita, & lemmatum his præponendorum sententia aut seligenda, siquo in codice minus forte inepta erat, aut de integro excogitanda: itaque non in cunctis editionibus eadem ubique divisiones sunt, eademque inscriptiones. Hæc attigi, primum ut mecum laudes Lindenium, si quid scite in lemmate aliquo emendavit, velut in eo quod antepositum capiti I. libri 8. sic in meis editionibus legebatur, *De positu, & figura totius humani corporis*, quando non hæc eo capite Celsus docuit, sed ejus *ossium positus figuræque*, ut ipso capitis initio promiserat. Recte igitur Lindenius fecit, quod a Constantino adscriptam in margine vocem *ossium* illi addidit inscriptioni. Deinde illa attigi, ne mireris, si fidentius dixerò, e lemmate capitis 27. libri 7. *De cancro, qui excisa vesica nascitur*, quamvis & codex, & omnes apud me editiones sic habeant, verbum esse tollendum *excisa*, aliudque, ut, exempli causa, *incisa* substituendum. Quis enim, nisi mortuo, vesicam excidat, id est scalpelli opè detrahat? 498, 29. 483, 11.

Faciles quoque, tametsi non in lemmate aliquo, sed in ipso Auctoris contextu, eæ mutationes videri possunt, quæ una in litterula consistunt, ut si libro 6. sub finem capitis 6. in illis verbis, quæ iisdem editionibus, & codici sunt communia, *recognitis omnibus, quæ medici quoque prodiderunt*, 370, 7. pro quoque rescribamus *quique*: neque enim ipse medicus non erat, nec remedia, quæ tam longo capite tot, & tam varia proposuerat, fere omnia a medicis non fuerant prodita.

Ubi vero sub initium capitis 17. lib. 5. hæc edidit Almelveenius: *In hoc autem volumine eas compositiones explicabo, quæ vel desiderari in prioribus potuerunt; vel ad eas curationes pertinent, quas protinus hic comprehendam sic, ut tamen quæ magis communia sunt, simul jungam. Si qua singulis, vel etiam paucis commodata sunt, in ipsorum locum differam*; recte quidem fecit, quod in paucis sequi maluit Lindenium, quam cæteros qui magno consensu habent parvis, ne Pantinos quidem, & Constantino, & Ronseo exceptis, quorum tamen primus in Adnotationibus, hi autem in libri ora Lindenio præluxerant; sed illud haud bene, quod scripserit *commodata*, qua in voce Almelveenii typographos errasse,

M 2

(y) Epist. 86. (z) Saturn. l. 1. c. 4. (a) l. 2. Fab. 5. v. 14.

(b) Interpret. de Servit. Prædior. (c) pag. 387, 19. & 531, 14. (\*) pag. 44, 1. Edit. Pat.

(\*\*) pag. 51, 7.



rasse, crederem; nisi eandem in Lindenii, & Pantini editionibus, imo in hujus quoque Adnotationibus offendissem, cum reliqui omnes ediderint accommodata, codex habeat accommoda. Hic tamen, illique omnes cum habeant in ipsorum locum; ego qui hæc non videam alio posse, quam ad curationes, referri, malim in ipsarum locum.

Jam vero ad paulo majoris momenti suspiciones progrediamur. Libro 3. cap. 6. hæc legimus. 129, 36. *Ac protinus quidem scire oportet, non febricitare eum, cujus venæ naturaliter ordinatæ sunt, teporque talis est, qualis esse sanis solet: nec protinus etiam sub calore motuque febrem se se concipere: sed ita, si &c.* Et in eo quidem ab Almeloventio discrepant pleræque editiones, & codex, quod habent non protinus autem; sed in cæteris mire omnes conveniunt, nisi quod Pantinus, offensus ultimis verbis, in Adnotationibus credit se se in potuisse mutandum, Constantinus autem & Ronseus leviori mutatione in margine adscribunt posse. Mihi vel hac levior placeret, id est esse, legeremque febrem esse, concipere, quomodo Celsus ipse alibi dixit, urinam in vesicam destillare, concipiunt, & ego eundem quidem hominem posse omnia ista præstare, concipio &c.

185, 17. 406, 27. Libro 2. initium capitis 14. apud Almeloventium est ad hunc modum. De frictione vero & gestatione adeo multa Asclepiades, tanquam inventor ejus, posuit in eo volumine, quod Communium Auxiliorum inscripsit, ut, cum trium tantum faceret mentionem, hujus & vini & gestationis, tamen maximam partem in hoc consumpserit, id est in frictione, ut vel ea demonstrant quæ de hac una & continuo, & toto capite sequuntur. Igitur cum Celsus dicat, in hoc, & hujus, & inventor ejus, nec de gestatione verba facere incipiat, nisi capite 15; aut me omnia fallunt, aut duæ illæ voces & gestatione, temere in primum versum irreperunt, idque a longo jam tempore, cum in cunctis meis editionibus, & codice legantur. Ronseus in libri ora habet equitatione, ex eo, credo, quod in plerisque erat editionibus, hujus, & equi, & gestationis, quasi equitatio ad gestacionem non pertineret, ad quam diserte retulit Plinius (d), melius tamen paucis, & in his Manutius aquæ pro equi scribentibus; sic enim ediderant, vini, & aquæ, & gestationis sive ex codicibus quibusdam; nam Foroliviensis ita prorsus habet, ut in margine Ronseus, vini. s. & aquæ, & gestationis, sive etiam Plinium (e) respexerunt. Is enim de Asclepiade hæc scripserat, cum proposito Celsi loco conferenda, quinque res maxime communium auxiliorum professus, abstinentiam cibi, alias vini, frictionem corporis, ambulationem, gestationes. Quibus ex verbis et si Muretus (f) delenda censuerat illa duo, alias vini, haud animadvertens, sic illas res quinque non fore; tamen ob hanc ipsam causam nihil mutandum esse, credidit Dalechampius (g), nisi alias in aliquando; neque hoc ipsum necessario, ut opinor. Nam quod Plinius infra subjicit: Trahebat præterea mentes artificum mirabili, vinum promittendo agris, dandoque tempestive, tum frigidam aquam, æque congruit cum superioribus, sive alias legas, sive aliquando. Sed quomodo Plinium quinque communia Asclepiadis auxilia, & Celsum tria tantum fuisse, dicentem conciliabimus? Frustra Plinianam Harduini editionem consului, quam post missam ad te V. Epistolam, nactus, ut libenter vidi pleræque eorum quæ de collatione utriusque Auctoris desideraveram, non omittentem, ita sperabam hujus quoque nodi solutionem præbituram. Quæ cum me spes frustrata esset ubi ad ea Plinii verba is quo de agimus, adnotatur Celsi locus; capita alia inspexi in quibus aut de Asclepiade, aut de frictione, & gestatione sermo est. Sed non modo nihil quod me juvaret, inveni; verum insuper ad caput 4. libri 28. non prætereundam operarum

hallucinationem offendi. Græcus enim Hippocratis locus, ut Galeni (h) ætate in libro κατ' ἵσθησις legebatur, qui locus ut ad frictionem attinet, sic omnino erat iis Celsi verbis, quibus expressus est, subjungendus not. 5. Sect. 14; ad alia Celsi verba, quæ de gestatione sunt, not. 8. non secus ac si ille pariter ad gestacionem spectaret, adjunctus est. Nos vero eam quam proposuimus, repugnantiam qua tandem ratione tollemus, ut cum Plinius quinque, Celsus tria tantum communia Asclepiadis auxilia fuisse, scripserit? Sic fortasse, ut dicamus, Celsum de illis quæ in memorato ab ipso volumine posuerat Asclepiades, Plinium de cæteris quoque eidem usitatis mentionem fecisse. Ut cunque id est; cum Celsus tria dumtaxat memoret, ex quibus unum frictionem fuisse, demonstravimus, alterum autem gestacionem fuisse ex consensu omnium hanc diserte in tribus illis enumerantium, veri similius est; satis perspicue apparet, hujus, id est frictionis, optimam scripturam esse, bonam gestacionis, dubiam vero auxilii ejus quod inter utramque a Celso positum est, sic tamen ut vox aquæ prævaleat, si codicem, qui hanc habet, & editiones, in quibus aut eandem legimus, aut ex ea corruptam equi, attendere velimus; vox autem vini ab iis qui frustra eandem quæ a Plinio, a Celso quoque dicta vellent, in codices aliquos intrusa videatur.

Ut igitur voces illas duas & gestacione in ejus capitis initium, sic totidem suspicor irreplisse in proximum caput 15. ubi nunc legimus: Gestacionum lenissima est navi, vel in portu, vel in flumine; vel lectica, aut scamno: acrior vehiculo: vehementior, in alto mari navi. Intelligis, me de istis postremis dicere duabus vocibus: quanquam de navi, pridem ab Almeloventio ipso notata, quin glossema sit, dubium esse non potest. At ego suspicor, non unum esse, neque Celsum, postquam in alto scripserat, mari adjiciendum censuisse. Suspicionem autem minus improbabis meam, ubi animadverteris, alio ordine in cæteris editionibus, ipsoque codice locum istum proponi consuevisse, ut gestaciones quæ navi fiunt, minime disjungerentur, sic videlicet: Gestacionum lenissima est navi vel in portu, vel in flumine: vehementior in alto mari navi; unde hæc duo ultima verba auferre non modo licet, sed & juvat. Non me fugit, quid Lindenium moverit, ut antiquum ordinem mutaret, nimirum ne quæ sequebatur gestacio vel lectica, aut scamno, ea videretur non minus vehemens dici, quam quæ navi in alto. Verum si hoc attendendum; illud quoque attendendum erat, eo quem ipse maluit, ordine vehementiorem dici gestacionem navi in alto, quam vehiculo, quasi vero gestacione in alto tunc utendum fuisset cum mare ventorum vi maxime esset agitatum: itemque dici lenissimam, ut navi in flumine, quæ vel lectica fiebat, vel sella, quarum motus, quippe pluribus gestantibus, creberrime inæqualis sit & dissimilis, necesse est. Non tamen negaverim, ut aliquid temere addi, sic & omitti inter alto, & lectica potuisse. Verum minus mihi facile est conjicere quod omnino verbum omissum sit, quam quæ sint addita, suspicari.

Sic & voces alias duas, & has quidem ex libroriorum incuria redundare, crediderim sub initium capitis 29. lib. 7. Sed ante omnia vulva natura mirabilis, cum in multis aliis, tum in hac re quoque facile cognoscitur. Oportet autem ante omnia &c. Quis enim tantam in disertissimo Scriptore inopiam verborum fuisse, existimet, ut duo illa verba ante omnia, nulla adductus ratione, tam brevi intervallo iteraverit? Ut bene illa conveniant secundo loco, ubi ordine præcipere Auctor incipit quidquid fieri oportet ad maturum partum, intus emortuum, manu educendum; certe primo illo non apparet, cur ponantur. Cum enim difficultatem ejus operis proposuerit; continuo

(d) Nat. Hist. l. 28. c. 4.

(g) in marg. ad hunc loc.

(e) Ibid. l. 26. c. 3.

(h) Vid. de Sanit. tuen. l. 2. c. 3.

(f) Variar. Lect. l. 14. c. 16.



tinuo spem unam dat; eamque in uteri natura mirabili quæ occasionem præbet cauto & perito Chirurgo primum unum digitum, deinde & alterum, & sic deinceps totam manum per illas angustias inferendi. Namque ex intervallo subinde os uteri dehiscit: qua occasione utendum, ut magister quisque obstetricandi spectatissimus vel nunc præcipit, sicque deinceps expectandum donec iterum id os aperiatur; ita enim legere malo, quam cum Lindenio, adscripta in margine a Constantino, & Ronseio sequente, os adaperiatur, cum sit in codice ad os aperiatur, ut in omnibus quoque, mihi notis, editionibus, excepta principe Florentina, ex qua a me olim excerpta nunc inspiciens, gaudeo, in his idem prorsus quod in mentem venerat, reperire.

Fortasse ob eandem veterum scribarum indiligentiam, quædam alia iterata sunt verba in citati libri 7. capite 26. Cum jam eo calculus venit, ut super vesicæ cervicem sit, juxta anum incidi cutis plaga lunata usque ad cervicem vesicæ debet. Veterum dixi; nam hic quoque tum in codice, tum in meis omnibus editionibus eadem illa repeti video, quamvis cætera paulo aliter, nempe ad hunc modum proponantur, ut incidi super vesicæ cervicem juxta anum cutis plaga lunata usque ad cervicem vesicæ debeat, nisi quod in codice est debet, quod in libri ora Constantinus, & Ronseus malunt, ut illud delentes, tanto melius hæc quidem quam Lindenius, quod si calculus super vesicæ cervicem sit, necdum ad eum pervenit locum, ut secundum inculcata hoc capite a Celso præcepta aggredi Medicus sectiones debeat. Ante hanc enim vel modo præceperat, ut calculus digitis compellatur deorsum donec ad cervicem perveniat, in eamque impellatur. Itaque ubi mox dicit, Cum jam eo venit, perspicuum est, hoc velle, Cum jam in cervicem venit; ut absonum sit addere ut super vesicæ cervicem sit, supervacuum autem videri possit dicere, super vesicæ cervicem esse incidendam cutem, quando plaga lunata juxta anum debere dicitur usque ad cervicem vesicæ pervenire, aut si illud minus supervacuum sit, vox saltem vesicæ secundo hoc loco sit minime necessaria.

Utcunque id est; a non absimili operarum socordia cum factum esse, conjecissem, ut in cunctis a me versatis editionibus duo alibi verba essent repetita; meam conjecturam postea confirmatam vidi non illibenter. Locus est lib. 8. sub initium capitis 7. ubi quædam de variis casibus attinguntur, qui ossi, dum frangitur, possunt incidere. Quinetiam aliquando plura fragmenta a fragmento fiunt. Sed in aliis quidem ossibus ex toto saepe fragmentum a fragmento recedit. Vides, quibus de verbis dicam, nempe a fragmento, quæ ut secundo loco necessaria sunt, sic primo vel tunc redundare mihi viderentur, si e fragmento scriptum esset, quod nusquam legi. Et fuisse quidem alios antea quibus displicuissent, ex Constantini marginibus intelligebam, qui adnotatum habent, Quidam segmento; nec tamen quid isti spectassent, percipiebam. Verum cum denique in Forolivienfi codice duo illa verba prorsus deesse primo quidem loco, animadverti; sic enim scriptum est, plura fragmenta fiunt; tum vero ad meæ conjecturæ plenioris confirmationem nihil aliud optandum cognovi, nisi ut cum eo codice plures alii, in primisque optimi, consentirent.

Quamobrem etsi alias duas suspiciones meas ab eodem codice demum inveni confirmatas; nolui tamen eas magis quam superiorem, ei codici acceptas referre non modo quia ipsæ quoque multo mihi antea in mentem venerant, quam ejus varietates codicis omnes adnotarem, verum etiam quia uni codici, neque ei optimo, non multum tribuo, in re præsertim quæ minus est in veteribus ejusmodi libris attendenda, velut hæc de dua-

bus prima, quæ nimirum pendet a distinctionum notulis, inter verba interjectis. Paulo supra finem ejusdem capitis 7. in omnibus quæ apud me sunt, editionibus ad hunc modum scriptum est, costæ, spina coxarum, os tali, calx; ad eundemque modum iterum paulo supra finem insequentis capitis 8. eadem verba proponuntur, nisi quod eo capite 8. coxarum loco, quam vocem retinent Lindenius, & Almeloveenius, reliqui habent, codice non discrepante, costarum. A quibus hic duo vides posse requiri, costarum spina quid sit? & quare a costis distinguatur? scribunt enim costæ, spina costarum: cum a duobus illis prioribus unum modo requiri possit, idque reliquis capite quidem 7. commune, spina coxarum quid sit? neque enim Celsus cum libri hujus 8. capite 1. ossa omnia sigillatim proposuit, in iisque costas, & os coxarum; illis, aut huic spinam tribuit; ne quis forte quia posteri summam hujus partem utrinque spinam vocarunt, eam, credat, capite 7. intellexisse. Quid ergo est? Coxarum ego utroque loco scribendum opinor; spina coxarum neutro. Sed verba ita distinguenda, costæ, spina, coxarum os, tali, calx; aut, si mavis, coxarum os, os tali; vel coxarum os, talus; sic enim singula hæc ossa alibi nominat Celsus. Qui inter cætera ossa, quæ ibi cap. 8. memorat, fere immobilia; id est non æque mobilia, ac humeri, brachii, femoris, cruris, digitorum ossa, de quorum curationibus est postea acturus, coxarum os prætermittere non debuit, nec vertebrae; has autem spinæ nomine, ut solet, hic quoque intellexisse, initium, & finis proximi, quod sequitur, 9. capitis satis ostendunt. Hæc cum essem conjectura persecutus; codice inspecto, distinctionis notas inveni, non inter coxarum, & os, sed inter spina, & coxarum, & inter os, & tali, quemadmodum suspicione præceperam.

Antequam alias hujus generis suspiciones adjiciam; alteram illam indicabo, quam a codice comprobata vidi. Libro 6. cap. 18. Anus quoque multa, tædiique plena mala recipit, nec a se multum abhorrentes curationes habet. Cum hæc primum legi; credibile visum est, non ita olim scriptum fuisse, sed potius nec inter se multum abhorrentes, quomodo Livius (i), exempli causa, dixerat abhorrent inter se orationes. Et vestigia quidem ejus scripturæ in cunctis meis editionibus deprehendi, in quibus videlicet legitur nec in se; licet Constantinus, & Ronseus in libri margine adnotaverint necnon in se multum abhorrentas, lectione minime iis, quæ sequuntur, curationibus conveniente, quas si perlegas, pleræque agnoscas nullam asperitatem, multam similitudinem inter se habere. Suspicionem denique codex luculentissime confirmavit, in quo perspicue scriptum reperi inter se.

Redeo nunc ad eos locos, in quibus suspicor, ob pravam verborum distinctionem sententiam esse corruptam. Libro 2. cap. 29. inter ea quæ alvum movent, ponuntur uvæ recentes pingues, minutæ aves, cochleæ &c. Capite autem insequente inter ea quæ contra adstringunt, recensentur dura ovæ; magisque, si assa sunt: minutæ aves, merula, palumbes; magisque, si in posca decocta est. Num eadem igitur minutæ aves alvum & adstringunt, & movent? Hæc repugnare, sensit Ronseus (k), commentusque est, primo loco teneras & nuper exclusas, elixasque; altero siccas, & adultas, & assas; quasi Celsus si ita intellexisset, per se declarare non consueisset. Quod & de Pantino (l) dictum volo, qui teneras, durasque distinxit; cum facilius posset, quam Ronseus, mutatis primo loco inter verba notulis, tollere, ut mihi videtur, repugnantiam, ad hunc modum, uvæ recentes, pingues minutæ aves. Dixi autem facilius, quam Ronseus; hic enim ne dubitavit quidem, quin pingues uvæ essent intelligendæ, sicque in Enarratione sua explicavit.

(i) Hist. l. 38. haud ita procul a fine.

(k) Enarrat. in hqs loc.

(l) Comment. in primum loc.



vit. At Pantinus ( *m* ) utrum malleus, optionem dederat, pingues de uvis, an de avibus dictum accipere. Ego vero non dubitandum crediderim, quin de avibus sit accipiendum. Pinguedo enim proprie in animalibus dicitur, & caro

106, 27. *pinguis* mox diserte a Celso in iis quæ alvum movent, commemoratur. Cæterum cum alii sic verba distinxerint, ut Almelveenius, alii ambigue, ut Pantinus; vix tandem unum Constantinum animadverti ita, uti ego conjeci, distincta edidisse.

Verum ne hunc quidem inveni qui alia quædam ita distingueret, quemadmodum mihi distinguenda videntur, libro 5. cap. 26. ubi Celsus sub nomine cancri, vulneribus supervenientis, gangrænam fere & sphacelum describit. Nam quod Almelveenius quæ Pantinus ( *n* ), & Ronseus ( *o* ) huc adscripserant, magis attendens, quam quæ Constantinus; indicat, quasi huc attinentes, Galeni locum, & Hildani Observationem; nempe uterque horum ibi de tumore verba faciunt, quem hodieque omnes cancrum appellant, non de affectionibus quas Celsus hoc quidem nomine complecti solet, nimis vulnerum inflammationi, aut constrictioni, ut antequam describat, ipse ait, succedentibus; sic enim cum sæpe alibi, tum præsertim ibi locutus est, ubi generatim vetuit nimis arctas fieri deligationes, 300, 15. *siquidem id, quod adstrictum est, alienatur, & cancro opportunum est, & ubi speciatim in ossis fractura quacum sit vulnus conjunctum, tanto laxiores fascias laudavit, quanto facilius & alienari & occupari cancro vulnus potest.* In illa 533, 23. igitur descriptione hæc etiam sunt, ex nigro ulcere humor pallidus fertur, malique odoris est, & caro intus corrupta: interdum etiam nervi ac membranae resolvuntur, specillumque demissum descendit &c. Nemo autem cæterorum est qui vel majoris distinctionis notam inter corrupta, & interdum non interponat; si Manutios, & Stephanum excipias: quanquam nemo ibi caro intus corrupta habet; habent vero caruncula corruptæ, vel, ut codex, carunculæque corruptæ, quod ego melius existimo, quia ante duos tresque versiculos cum de hoc ulcere dictum esset *caro ejus corrupta est; ineptum fuisset idem iterare.* Sic igitur rescribendum suspicor, ex nigro ulcere humor pallidus fertur, malique odoris est: carunculæque corruptæ, interdum etiam nervi ac membranae resolvuntur &c. id est putrefactæ excidunt.

Est etiam ubi depravatam sententiam credas non tam quod verba non bene distincta sint, quam quia transposita. De quo ut existimare possis; ex lib. 3. cap. 6. non brevem locum describam, necesse est, ad tempus attinentem quo portio febricitantibus est concedenda. *Ac ne illud quidem ab Heraclide Tarentino dictum, ratione caret: ubi aut bilis ægrum, aut cruditas male habet, expedire quoque per modicas potiones misceri novam materiam corruptæ. Illud videndum est, ut, qualia tempora cibo leguntur, talia potioni quoque: ubi sine illo datur, deligantur, cum ægrum dormire cupiemus: quod fere sitis prohibet.* Satis autem converterit, cum omnibus febricitantibus nimius humor alienus sit, tum præcipue esse faminis, quæ ex partu in febres inciderunt. Hic igitur manifestius est, quam ut admonitione mea egeat, non aliam, nisi minoris distinctionis notulam, inter quoque, & ubi fuisse ponendam. Illud aliquam attentionem requirit, ut suspicemur, suo non esse loco ea verba, cum ægrum dormire cupiemus: quod fere sitis prohibet. Hæc enim, si ad istum modum legantur, si ipsi particula, aut, ut in codice, meisque libris omnibus, præponatur, non bene ibi collocata esse videbuntur iis qui animadverterint, tempora illa non tunc dumtaxat esse deligenda, cum ægrum dormire cupiemus, sed tunc etiam cum materiam novam corruptæ misceri, volumus. Quorum utrumlibet addita quidem ista particula aut signi-

ficabit, sed in alium translata locum simul cum verbis insequentibus. Tantum igitur abest, ut eam particulam, quod Constantinus, & Ronseus in margine indicant, expungendam credam; ut sententiam sic restitui posse, existimem, *Ac ne illud quidem, ab Heraclide Tarentino dictum, ratione caret: ubi aut bilis ægrum, aut cruditas male habet, expedire quoque per modicas potiones misceri novam materiam corruptæ, aut cum ægrum dormire cupiemus; quod fere sitis prohibet. Illud videndum est &c.* Quod si forte malis, nulla translatione verborum facta, mutare tantummodo aut in ut; etsi translationem magis probem; non per tinaciter repugnabo: satisque mihi erit, locum, quemadmodum hætenus legebant, vitio non caruisse.

Age nunc veniamus ad alterum in quo manifestius esse videbitur vitium, neque, ut puto, sine verborum transpositione facile tollendum. Libro 4. sub initium capitis 13. hæc sunt. *Sed prior, morbus videlicet Ileus, modo supra umbilicum, modo sub umbilico dolorem movet. Fit in alterutro loco inflammatio: nec alvus, nec spiritus infra transmittitur. Si superior pars affecta est, cibus: si inferior, stercus per os redditur: si utrumlibet, metus est. Adicitur periculo, si vomitus biliosus, mali odoris, aut varius, aut niger est.* Vides, num ubi stercus per os jam redditur, possit vomitus esse, nisi mali odoris? numve periculum, quod jam summum est, his adjectis augeatur? Certe Aphorismus ipse, ( *p* ), quem, tanquam huc attinentem, indicat Almelveenius; si rationem, & Galeni ( *q* ) interpretationem attendamus; periculum in Ileo prænunciat ex eo vomitu, non qui vomitum stercoris, aut sterco- ri similitum excipiat, sed qui hunc præcedat. In Ileis, inquit Galenus, vomitus non semper adest, sed quando exitiales sunt: & si vehementius distorquentur, stercus eis ascendit: & mox, Hæc vero mihi fieri videntur ab intestinis in quibus passio talis existit, a se expellere stercus appetentibus, quando longitudine temporis cæpit molestare. Quam alteram ex Galeno descripsi particulam ob eam etiam causam, ut intelligeres, quanto melius in producto Celsi loco, ubi nunc legitur, *si utrumlibet, metus est*; legeretur antea ab omnibus, *si utrumlibet vetus est*, quod & codex habet. Itaque locum sic restitui posse, conjicio, si post transmittitur, continuo scribamus. *Adicitur, vel; quoniam in codice est, accedit; Accedit periculo, si vomitus biliosus, mali odoris, aut varius, aut niger est. Si superior pars affecta est, cibus; si inferior, stercus per os redditur; si utrumlibet vetus est; videlicet si in superiore, aut in inferiore parte inveteravit affectio.* Ad eundem enim modum Celsus de dysenteria infra loquitur cap. 15. *Si pluribus diebus nihil remedia illa ju-* 225, 26. *verunt, vetusque jam vitium est.* Verum ad alia veniamus, vel potius revertamur.

Cum enim supra mentionem facerem immobilium quorundam, id est minus inter se, secundum naturam, mobilium ossium, quæ Cornelius noster extremo capite 8. libri 8. nominaverat; in memoriam redii, quid essem olim suspicatus in verbis illis, quibus inter initia capitis 11. ejusdem libri, ossium motus præter naturam, id est luxationes, ita distinxit. *Moventur ossa sedibus suis duobus modis. Nam modo quæ juncta sunt, inter se debescunt: ut cum latum os scapularum ab humero recedit; & in brachio, radius a cubito; & in crure, tibia a fura: --- modo articuli suis sedibus excidunt.* Quem secundum modum sigillatim insequentibus proponit capitibus, de maxilla luxata, & quod ad susceptum sermonem maxime attinet, de luxato humero, aliisque ejusmodi. Hinc autem suspicio oritur, in iis quæ produximus, verbis non ab humero, sed ab jugulo potius esse legendum: Jugulum enim, id est clavicula, ita cum lato scapularum osse junctum est,



est, ut cum tibia fibula, aut, si mavis, cum ulna radius, non ita ut cum lato eodem osse humerus, qui & per articulationem jungitur, maximos quosque motus permittentem, & cum recedit ab illo osse, sive, quod eodem redit, cum illud os ab ipso recedit, non huc res attinet, sed alio, videlicet ad caput, quod peculiariter extarre dixi, de luxato humero. Quæ animadversio non tantum ad id valet, ut vitiatam hic esse scripturam, opinemur (frustra explicante Constantino de acromio, quod ossiculum perraro in adultis invenitur, nec inter ossa a Celso proponitur) sed ad illud quoque, ut paulo inferius ab Lindenio egregie emendatam intelligamus. Cum enim & editiones omnes, & codex ipse, ut ab humero habent, sic perperam quoque haberent *mollibus*, vel etiam, ut in Constantini, & Ronseii margine, *molibus*; nihil melius rescribi potuit, quam *mobilibus* in iis verbis, Quorum vitandorum causa, facienda eadem sunt, quæ in ossibus mobilibus læsis. Quid enim huc ossum mobilibus, vel ossibus mollibus, aut mollioribus? nam hoc malebat Constantinus. Hic enim, ut fibulæ, & radii diserte proposita exempla ostendunt, de ossibus agitur immobilibus, aut certe minus mobilibus: hisque Celsus læsis, adhibenda eadem esse, docet quæ læsis mobilibus.

Simile vitium, similique ratione emendandum, irrepsisse in primum caput libri hujus 8. suspicaberis, ubi legeris, *Maxilla vero est molle os*. Nemo enim hoc dicat, nedum Celsus, qui sternum, duritie cum maxilla non conferendum, os tamen esse *valens ac durum*, isto eodem capite dicturus est. Atenim codex, & editiones, quotquot inspicimus, habent *molle*. Nimirum, credo, ut *mollibus* habebant in loco superiore, notula quæ compendium vocis *mobilibus* significaret, a librariis olim non intellecta, aut minus animadversa: cujusmodi ob causam Veterum duo tresve ediderant infra, capite 4. ut Almeloveenius quoque ibi adnotavit, *membrana mollis ac sui coloris*, ubi edendum fuisse *membrana mobilis ac sui coloris*, satis illa ostendunt quæ continuo his opponuntur, *membrana immobilis, nigra &c.* Unum est, quantum video, quod mihi, pro *molle* hic *mobile os* reposituro, objici possit, nempe tribus, nec totis, interjectis versiculis, de eadem maxilla hæc addi, *solaque ea movetur*, supervacuis verbis, si modo ea mobilis dicta esset. Attamen haud plane supervacua fortasse videbuntur, si quid continuo sequatur, attenderis. Hoc enim ait Celsus, *solaque ea movetur*. Nam *malæ cum toto osse, quod superiores dentes excipit, immobiles sunt*. Aliud autem est dixisse, mobile os maxillam esse, statim atque de ea sermo fieri cœptus est, nempe cæteris illis capitis partibus quæ omnino immobilibus compinguntur ossibus, ad eum usque locum descriptis: aliud est, nonnullis de ea jam dictis, opportune admonere, maxillam de qua verba fiunt, illam esse quæ sola movetur; ne quis forte rerum ignarus, maxillæ nomine deceptus, putaret, superiorem quoque a Celso mobilem dictam fuisse. Nam superiorem etiam, a Romanis maxillam fuisse appellatam, ipsum malæ nomen indicio est, quod ex maxilla contractum esse, jam diu est cum docti homines de M. Tullio (r) didicerunt. Quod nomen etsi Plinius (s) tradidit, in homine tantum habere locum; non tamen scripsit, haud licitum esse in homine quoque superiorem maxillam dicere: imo licere, exemplo docuit suo, cum remedia adversus *maxillarum dolores, tumoresve* proposuit (t). Celsus igitur, ne quis dubitare posset, utram maxillam mobilem esse, dixisset; cum illud addidit; tum superiorem, nisi forte simul cum inferiore, nusquam, quod meminerim, alio quam malarum, nomine designavit: quia a malis aperte, ut hic, maxillam, videlicet inferiorem, di-

stinxit, quemadmodum capite 7. hujus libri videbis in illa certorum ossium enumeratione, *maxilla, mala, jugulum &c.* quam constantem ejus consuetudinem haud scio, an alii satis adnotaverint.

Locus eodem capite primo brevis est, sed in quo de pluribus dubitatur. *Super hos quoque musculos, qui tempora contegunt, os medium, in exteriorem partem inclinatum, positum est*. Sic cum Lindenio Almeloveenius. Sed qui eos præcesserant, quotquot inspexi, & cum his non codex modo quem memorare solitus sum, sed & Veneratus, ut quædam quæ olim ex eo excerpti, mihi adhuc ostendunt, habent ad hunc modum, *sub his quoque musculis, qui tempora connectunt*: in cæteris autem conveniunt codices, non editiones. Nam vel princeps, & Pinziana *inclinatum* habent, nedum reliquæ, præter editionem Ronseii, in qua tamen aliud discrimen animadverto; scripsit enim *in interiorem partem inclinatum*, quam lectionem Paawius (u) sequitur. Quibus de musculis Celsus loquatur, manifestum est: quo de osse, ambiguum, eoque magis, quod varia adeo profertur scriptura. De qua etsi in musculis minus controversiæ est; ea ipsa tamen a vera fortasse longius abest, quam putant. Qua enim, quæso, significatione tempora *connectere* isti dicuntur musculi quos Temporales vocitamus? Difficultas hæc, credo, Constantinum, & Ronseium impulit, ut in libri ora adscriberent *contegunt*. Quam tamen Paawius vocem respuit, tanquam Celso minus familiarem, oblitus; ut renum, & omenti descriptionem (x), & locos alios præteream, ab hoc capite distantes; hujus ipsius initio scripsisse illum, *cerebri membranam contegit*, in eademque pagella paulo supra, *os contegat*, & *erit contegendum*; ut intra duodecim, aut tredecim versus ter usus sit. Est igitur Celso maxime familiaris. Sed tamen dubito, num usurpaverit hoc loco, an potius, quam *contegunt*, scripserit *continent*. Quo id auctore? inquis, Nempe eodem Celso, quem animadverti, cum hos musculos indicaret hujus ipsius libri alio loco, qui & in codice, & in editionibus sine ulla cujusquam dubitatione uno eodemque modo legitur, ita scripsisse, *inter musculos, qui tempora continent*. Utinam Celli ipsius auctoritate uti possem ad cætera pariter quæ in verbis propositis dubia sunt, veri similiore ratione dirimenda, quæ ab illo nimirum pendent omnia, quod os intellexerit? Et a primo quidem id esse videtur quod latine a jugi similitudine satis bene vocamus Jugale: quamvis enim hanc jugalis significationem in Lexicis non videamus adnotatam; Celsus tamen *Jugale appellari posse ab eadem similitudine, a qua id Græci ζυγῶδες appellant*, infra docet, ubi id os memorat, ac describit. Quod attendens Paawius, negat, proposito loco de eo osse Celsum loqui, quo paulo post ex instituto sit locuturus, & quod præterea non *sub* his musculis sit, sed ipsis impositum. Cui secundæ animadversioni tantum videtur tribuisse Lindenius, qui de Jugali hic dici, crederet, ut propterea fortasse, pro *sub his* ediderit *super hos*, mutatione libris omnibus quos viderimus, ut supra indicatum est, repugnante, & minime ipsi necessaria; stante enim homine, est Jugale os infra totos ferme eos musculos. At Paawius processum petrosi opinatus est hoc loco indicari: quam opinionem, cum Celsus nihil usquam attigerit eorum quæ non nisi aperta calvaria, possunt de hac conspici; examinare non est operæ. De Constantini autem opinione, quam ex libri ora conjicimus, ubi pro *os medium* posuit *os malarum*, satis est, secundum Paawii primam animadversionem, hoc quærere, quid attinerit hic scribi quod paulo post nihilominus erat scribendum? Nam si *juxta aurem finiri Jugale os* tradetur, quod transversum a genis tendit; inde

(r) in Oratore, (s) Nat. Hist. l. 11. c. 37. (t) Ibid. l. 21. c. 20. & l. 23. c. 2. & 7.  
(u) Comment. in hunc loc. (x) l. 4. c. 1. p. 184, 2. & p. 185, 10.



inde satis intelligi poterat, *sub Temporalibus musculis os malarum, in exteriorem partem inclinatum, positum esse*. Quid igitur est? Fortasse, nihil a scriptis libris recedendo, vox illa *medium*; quam quo referamus, si de osse Jugali sermo sit, haud satis apparet; de parte illa calvariae accipienda est quæ, sub his musculis latens, contra medium fere ipsorum in exteriorem inclinatur partem. Cum enim hic Celsus calvariae latus describat, futuram videlicet squamosam, & os quod proxime post aurem crassissimum est; a veri similitudine non abhorret, cavere voluisse, ne quis forte, ut æquatum exterius videt ab his musculis capitis latus, sic ob ignorationem eorum crassitudinis putet, subjectam quoque calvariam ipsorum esse superficiei parallelam: itaque illud caventem, ibi os extrorsum inclinari, ubi sedem relinquat majori eorum crassitudini, docuisse: dixisse autem, *sub his musculis*, quia hisce obtegatur, non secus atque alibi (y) cor, dixit, *sub sinisteriore mamma situm*. Verum ex his omnibus quæ super uno isto loco a me scripta sunt, noli aliud magis attendere, quam quod, Celso auctore, conjeci de verbo *continent* pro *connectunt* substituendo.

Ejusdem auctoritate ductus, nonnullas alias suspiciones, dum infra legerem hoc ipsum caput, subortas, mihi jam demere conabor. Humerus, 504, 13. inquit, *extremis utrinque capitibus tumidus, mollis, sine medulla, cartilaginofus*. Nulla hic mendi suspicio. Nam quod duas illas voces *sine medulla* Paavius (z) omnino delendas esse, pronunciat, quia hoc os, sicuti mox Celsus ipse agnoscit, *medullosum* esse, constat; delendæ essent aliæ quoque, id est *mollis*, & *cartilaginofus*, quia durum esse, manifestum est, neque id Celsus negat. Sic enim pergit, *medius teres, durus, medullofus*. At vero omnia sunt retinenda; prima, quia de *extremis capitibus*; cætera, quia de *medio* inter extrema osse diserte dicuntur: utraque autem, si eæ inter se conferantur ossis partes, satis vera sunt. Suspicio autem oritur ex iis quæ continuo sequuntur, *leniter cavus, in priorem & interiorem; gibbus, in posteriorem & exteriorem partem*. Certe intelligis, hæc, sicuti Lindenius, & Almelveenius edidere, cum ipsius ossis figura non convenire. Sed neque conveniunt quæ pro his omnibus meæ cunctæ habent editiones. In aliis enim sic legas, *leniter gibbus & in priorem & posteriorem, interiorem, & exteriorem partem*: in aliis autem, quibuscum Pinziana, & codex ipse consentiunt, *leniter gibbus & in priorem, & in exteriorem partem*; quasi vero aut ab nulla parte esset cavus, quod primæ indicant; tunc autem pressius Celsus scripsisset, *leniter gibbus in omnem partem*: aut præter priorem, & posteriorem, duæ partes reliquæ non essent hic commemorandæ, quod cæteræ significant editiones; tunc autem Celsus hæc statim non subjecisset, *Prior autem pars est, quæ a pectore est: posterior, quæ ab scapulis: interior, quæ ad latus tendit: exterior, quæ ab eo recedit*. Si Celso igitur, & re ipsa ducibus, locus ille a librariorum facillima in ejusmodi præsertim verbis describendis hallucinatione est vindicandus; non inde, opinor, ejus initium unde Lindenius, sed unde omnes reliqui, faciendum est, rescribendumque magna ex parte, ut primi illi, *leniter gibbus in priorem & posteriorem & interiorem; cavus in exteriorem partem*.

Sed etsi tam varia, ut vidimus, apud varios scriptura vitium ipsa in eum locum irrepisse, indicabat; non est tamen cur alteri plurimum fidamus, in quo scribendo mire omnes consentiunt. Est eodem capite primo, ubi femina, id est femorum ossa, 505, 20. *ab exteriori parte gibba* dicuntur. Sunt autem; idque procul omni dubitatione; a priore, si re ipsa, & verborum paulo ante proposita declaratione standum est, quam Auctor 504, 21. *ad omnes articulos pertinere, etiam in ulterioribus,*

diserte admonuit. Crediderim igitur, scripsisse; a priore, aut, si minus recedere a communi lectione velis, *ab anteriore*: aut si forte *ab exteriori* scripsit non tam quia inde quoque, in nonnullis præsertim corporibus, nonnihil gibba sint, quam ut Hippocrati obsequeretur; non omisisse tamen a priore, ut simul id quod multo evidentius est, simul ipsum sequeretur Hippocratem (a), cujus hæc verba sunt, *considerare oportet, quod femur gibbosum magis est ad externam partem, quam ad internam, & magis ad anteriorem, quam posteriorem*.

Mendum quoque alterum mihi esse videtur in extrema eorundem feminum descriptione. 506, 25. *Atque in eo inferiora quoque capita media sinuantur, quo facilius excipi a cruribus possint*. Scire enim velim, quorsum pertineant duæ istæ voculæ *in eo*. Nihil enim singulari numero præcedit, quo referas. Novissima autem hæc fuerant, *tum infra introrsus leviter tendunt, quo aequalius superiora membra sustineant*. Igitur aut eæ voculæ inducendæ sunt, ut modus quo præcedentia ista dicuntur, in subsequentiis fervetur, aut videndum est, an forte ex ideo describentes fecerint *in eo*, potueritque Celsus ita scribere *ideo*, quo, ut notum est, eadem mente scriptum esse a M. Tullio (b) eo, quo, & idcirco, quo.

Verbum *sinuantur*, quod in isto ultimo erat loco, locum alterum ad memoriam reduxit ejusdem capitis, ubi ossa brachii proponuntur. Brachii autem nomine haud accipio humerum quoque, de quo jam vidimus; tametsi, Celso ipso auctore, non aliis modo, me posse, crederem, qui cum supra hic scripsit, *paululum motu brachii moveri jugulum*, non videtur humerum quoque non intelligere potuisse. Accipio, quod ipse multo sæpius, eam artus superioris partem quæ inter humerum est, & manum. Ejus igitur partis ossa describens Celsus, cum radium proposuisset superius tenuem, cubitum autem ibi plenior, ampliusque quam radius, cum extremo humero commissum, deinde radium a cubito paulatim diremptum: 505, 7. *rursus, ait, ad manum coeunt, modo crassitudinis mutato. Siquidem ibi radius plenior, cubitus admodum tenuis est. Dein radius in caput cartilaginofum confurgens, in cervicem ejus insinuatur. Cubitus rotundus in extremo, parte altera paululum procedit*. Gravis suspicio in ea cadit, *in cervicem ejus insinuatur*. Nam primum quæ est cubiti cervix? aut ubi a Celso indicata est? Deinde quomodo radius in imum cubitum insinuatur, si cubitus ibi in radium, ut probe nosti, se insinuat? Denique cum summam radii partem *leniter cavam* esse, a Celso non fuerit prætermisum; quomodo in ima tanto ampliorem 504, 822 omittere sinum potuisset? aut si omisisset; quæ mox posset illum, ubi de manu verba facit, non secus ac si propositus antea esset, commemorare? Primam enim manus partem describens, duo ejus processus, inquit, 505, 272 *in sinum radii conjiciuntur*. Augetur suspicio editionibus inspectis, quæ ante Lindenium, a quo notata illa verba accepit Almelveenius, prodierant. Nam Cæsarius quidem, & Pantinus *in cervicem*, at cæteri *in verticem* (nisi quod Constantinus *in vertice*) *in verticem*, inquam, ejus ediderunt, quod in codice quoque est: in eodemque, ut in editionibus quæ apud me sunt, prorsus omnibus, verbum sequitur quod quærebam, nimirum pro *insinuatur* habent *sinuantur*. Quid tamen adhuc ista faciemus voce *cervicem*, aut *verticem*, aut denique *vertice*? De cervice enim diximus, cur hic agnoscere non possumus. Verticem autem ut pro infima radii parte dici potuisse, non negaremus, exemplo inducti, quod infra animadvertimus in ossibus digitorum; 505, 32. illa tamen adjecta vox *ejus* non digna ibi Celso videretur, si ad radium velles referre, si ad radii caput. Satis enim fuisset scribere, *in vertice sinua-*

(y) l. 4, c. 1, p. 183, 11.

(z) Comment. ad hunc loc.

(a) l. de Fractur. n. 24.

(b) ad Attic. l. 8. epist. 9. &amp; l. 1. epist. 16.



*sinuatur*. Si quid ego suspicer, quæris; a te peto, ut propositum locum attente relegas, & Celsi mentem in describenda alterna illa superius atque inferius radii, & cubiti mutatione perpendas. Continuo idem quod ego, suspicaberis, ut radium quem in summo tenuiorem, quam cubitum, dixerat, in imo dicit esse crassiores; ita quoque eundem quem illic ostenderat multo minus, quam cubitum, ad juncturam pertinere, hic contra, unum ferme cum manu committi, ostendere debuisset, & quod consequitur, tradere, cubiti loco radium ipsum sinuari. Quod præclare fecerit, si, ut puto, scripserit *in vicem ejus*, id est cubiti, *sinuatur*. Ita autem scribere

potuisse, cum aliorum; tum Celsi ipsius commonstrant exempla. Quorum hoc, proposito simillimum, & maxime geminum, est libro 4. cap. 7. *Sed hic vinum sorbere, ut supra præcepimus, morbus ipse non patitur: in vicem ejus, cremor ptisanæ sumendus est.*

Suspiciones alias; quasi non nimis multas jam protulissim; huc additurum, opportune litteræ interpellant tuæ. Quæ quoniam non breves sunt, & multa, ut video, de Celso, nec levia, proponunt; cum perlectæ fuerint, respondebo. Has interim accipe, & quæ de Samonico expecto, fac mittas, & valeas.

Patavii Postrid. Kal. Januar. MDCCL.

## E P I S T O L A O C T A V A.

Jo. Bapt. Morgagnus Jo. Bapt. Vulpio S. P. D.

**L**itteras perlegi tuas, quibus ex me plura quæris: illud primum, & gravius, quid sentiam de non ita paucis, quas descriptas misisti, in Corn. Celsi Adnotationibus. Dicam, ut solitus sum, ingenue. Ab una eademque manu mihi profectæ non videntur. Sunt enim plures ex quibus aut acumen ingenii elucet, aut doctrina multiplex, atque eruditio, aut linguarum peritia non vulgaris, ut si has a magno quamlibet Viro esse, dicas, non difficile assentiar. At sunt vicissim aliæ ab illis adeo discrepantes, ut prope pœniteat legisse. Quod ne temere dictum suspicaris; relege quas indicabo.

In Celsi Præfatione hæc de Medicis Rationalibus verba sunt, *eum mederi posse arbitrantur, qui prius illa ipsa, qualiter eveniant, perceperit*. Pro hoc ultimo verbo substituitur in Adnotatione præcepit, hoc addito *Unde præcipere animo, præsumere*; quasi Celsus ipse nec præposuisset prius, neque ita satis significaret, qui illa ante didicerit. Lib. 1. cap. 3. *Qui vomere post cibum volet, si ex facili facit, aquam tantum tepidam ante debet assumere*. Adnotantur hæc, *Non tantum, ut alii, reponendum. Nam hic græcissat, proque ut tanquam ponit*. Credas fortasse, vetustissimas editiones habuisse *tanquam*; novissime autem aliquos fuisse qui mallerent *tantum*. Et tamen, si ex inspectis a me tot editionibus tres excipias; cæteræ omnes, & vetustiores in primis, & codex habent *tantum*, quæ vox an huc magis conveniat, ostendunt quæ continuo sequuntur, *si difficilior; aqua vel salis, vel mellis parum adjicere*. Vides, ut *adjicere* opponatur illi *tantum*. Quin etiam, duobus versiculis interjectis, hæc leges, *deinde aquam tepidam, ut supra scriptum est, bibere*. Sed gravius quiddam tentatur in verbis illis ex cap. 15. lib. 3. *dandaque opera est, ne qua crudititas in quotidianam id malum vertat, quartanam videlicet febrem*. Hæc enim apponitur Adnotatio, *ne qua crudititas quotidiana in malum vertat, ut cum dicitur Hoc tibi vertet in malum: non se vertet*. Utrum tandem ista adversus codicis, & editionum consensum proposita mutatio est, quod Celsus ita loqui, ut Plautus, Virgilius, & Cicero ipse, non posset? an quod ibi non deberet, ubi de quartana in quotidianam facile mutanda verba facit? Hæc enim continuo subjicit, *Nam quartana neminem jugulat: sed si ex ea facta quotidiana est, in malis æger est*. Imo ne qua crudititas quotidiana isto loco dicere non debebat, tum ne quis crederet, nisi quotidiana crudititas sit, ex quartana fieri quotidianam non posse, tum quia agrum, supra jussit, *tertio die abstinere*, hic vero quomodo in cibo assumendo se debeat gerere, non quotidie, sed quo die febris expectatur, ostendit. Libro 7. cap. 26. ubi is minister qui puerum, jam novem annos, nendum quatuordecim excedentem, sic contineat, ut oportet, dum ei calculus extrahitur e vesica;

Morgagni Opusc.

ubi igitur is minister debere esse dicitur *homo prævalens & peritus*, verbum *prævalens* Adnotatio mutat in *prudens*. Quid ita? Nam sæpe al in veteribus codicibus pro d legitur. Fac, sæpe ita legi. Num semper, num hic ita lectum esse, credemus? ubi non prudentia modo, quæ satis hic quidem voce illa *peritus* significatur, verum etiam vires adeo requiruntur, ut mox admoneat Celsus, si pueri qui curatur, robustius sit corpus, tum unius loco, ministros esse oportere *duos valentes*, qui contineant, imo semper a lateribus alios *duos valentes*, qui unum illum, aut eos *duos labare non sinant*. Magis sane quam in his qui puerum continent, in eo ministro prudentia requiritur, cujus manibus altera alteri imposita mulieris venter premitur, ut infantis mortui caput ad os uteri compellatur. Neque tamen a Celso insequente cap. 29. aliis quam his, designatur verbis, *valens homo, non imperitus*.

Aliæ autem sunt Adnotationes, nec eæ paucæ, quibus non tam verba Celsi mutantur, ut in superioribus, quam per causam glossematam omnino tolluntur, velut in ipsa Præfatione. Nam *famem facilius fert adolescens, quam puer: facilius in denso calo, quam in tenui: facilius hieme, quam æstate: facilius uno cibo, quam prædiano quoque assuetus: facilius in exercitatus, quam exercitatus*. Quid hic glossematis? Nempe in duabus illis vocibus *quoque assuetus*, quæ glossema esse ineptum dicuntur. Verum si tollantur, quæ membri illius sententia erit? Sic etiam lib. 3. cap. 5. cum oportere, ait Celsus, *cibum quam maxime semper ab accessione futura reducere: & hoc salvo, dare quam integerrimo corpore*; illud, *hoc salvo*, non dubitatur quin *superfluum sit, & glossema*. Est vero adeo necessarium, ut, si demas, Auctoris præceptum longe aliud appareat. Neque enim id vult, nec fieri potest, ut febricitanti cibum semper demas, cum est integerrimo corpore, verum ut integerrimo quidem demas, sed tunc dumtaxat, cum integritas tot horas mansura est, quot omnino ad cibi deductionem requiruntur, antequam nova incipiat accessio. Hoc enim, ut superiore capite adversus Asclepiadem, & Themisonem constituit, non illud, Celso præcipuum est: itaque, hoc salvo, illud tunc denique non recusat. Post hæc, duo leviora videbuntur: sed cum in eundem librum cadant; alia hic potius, quam ipsa, omittam. Alterum ad caput attinet 13; alterum ad 18. In primo legimus, *Si res inveteraverit*. In altero, *Si vero consilium insanientem fallit*. Ad primum hæc adnotantur, *Abundat res. Sic tamen loquebantur Plauti tempore, sed non Celsi*. Ad alterum, *insanientem pronuntiatur glossema esse. Nam elegantissime dici, raro hoc fallit*. Non est nobis quærendum in primo, num sic amplius non loquerentur Celsi

N

tem-



tempore; neque in secundo, an omiſſa voce *inſanientem*, hærent lectores, pauliſper ſaltem. Celſus ipſe hoc eodem libro cap. 21. certe ſcripſit, 161, 22. *Neque eum res feſellit; niſi huc quoque, adverſus codicis, & editionum fidem in ſententia obſignati, duo contendamus irrepiſſe glosſemata: ſicque alia in alios, qui produci poſſent, Cornelii noſtri locos, ut puta ubi ſub Operis finem legitur, cum jam vetus res eſt pro vetus morbus eſt, aut alibi, Ubi bene res cedit, & Balneum raturum res amat, & neque enim ſemper concoctionem res expectat, &c.* Sed quis tandem erit modus? Si jam ſic in alienis ſcriptis nimis ingenioli eſſe velimus; ad multo pauciora verba redibunt antiquorum libri, eorumque ſententiæ ex dilucidis ſæpe obſcuræ fient, & ex abſolutis aliquando imperfectæ.

Eſt viciffim ubi Adnotationum Auctorem males ingenium exercuiſſe ſuum, quam Celſum, quem aliqua tueri æqua interpretatione decebat, præpropera feſtinatione damnaviſſe, ut libro 4. capite 12. quod de morbo ventriculi ſcripſit, qui κοιλιακός a Græcis nominatur. Statim decurritur ad notam hanc apponendam: *Commiscuit colicum cum κοιλιακῷ Celſus. Facilis enim eſt lapsus.* Quid? ſi proximo, quod ſequetur, capite diſerte non ſcripſiſſet, intellini plenioris morbum (de quo eſt caput 14.) κοιλικόν nominari. Altera additur nota, *Hallucinans hæc ſcripſit, quia cum alvum nihil reddere dicat in hoc morbo (quod falſum eſt, & videtur de colico intelligendum) tamen paulo poſt aſtringentia præſcribit. Ex quo apparet, medicum non fuiſſe Celſum.* Ego vero medicum non fuiſſe, opinor, qui hoc ipſi objecerit. Viſiſſet enim, poſtquam ventrem tandiu liquaverat, quandiu in longo morbo opus eſſet, debuiſſe tandem ſub finem morbi juſtum robur ventri ipſi reddere, idque paulatim factò tranſitu, non ad valida aſtringentia, ſed ad aſſam carnem valentem, & ad pluviatilem aquam decoctam, timentem videlicet, niſi ventrem denique confirmaret, ne vitium contrarium oriretur, ut loquitur capite 16. Cæterum quo magis omnibus manifeſtum eſt, & ſemper fuit, deſcriptum hic, & curatum a Celſo morbum longe alium eſſe ac qui ſolet a Medicis Cœliaca paſſio nominari; eo æquius erat, exemplo adductos quod inſequens caput proponit, Ilei, primum inquirere, an forte qui ante Celſum de Medicina ſcripſerant Græci non eundem quem poſteriores, morbum eodem nomine deſignaffent; aut ſi eundem, an interdum tamen alium quoque: deinde, ſi nunquam alium quam poſteri, ſignificaffent; tum vero cogitare, an librarii, ut tot alia nomina, græca præſertim, in deſcribendo vitiantur, ita aliud a Celſo fortaffe ſcriptum, in κοιλιακός mutaffent. Rubens (a) eſt certe laudandus, qui cum alium omnino morbum ac quem alii hoc nomine ſolent, a Celſo hic proponi, videret; tum quis eſſe poſſet, quaſivit, tum pleroſque redarguit, qui cum hoc non animadvertiſſent, injuria Celſum toto hoc fere capite reprebenderunt. Sed Adnotationum quas miſiſti, plures non ea æquitate ſcriptæ ſunt. Itaque ad locum lib. 2. cap. 4. quem ſtuderant Interpretes alii vel explicare, vel reſtituere, de quibuſdam in urina 52, 22. *quafi filis*, hoc adnotatur, *Falſum eſſe Celſum ſatius eſt dicere.* Qua ratione cito quidem nodi inciduntur; non ſolvuntur. Neque aliter cum Celſo agitur ad caput 1. ejusdem libri. Nam quod ſcripſerit, *urinæ difficultas*, σπαραγγουρίας quam appellant, non quaeritur, num forte in codice vetuſtiſſimo cum græcæ vocis prima ſyllaba δὺς, atramento diffugiente, intercidiſſet, ſciolus aliquis longe aliam ac Celſus ſcripſiſſet, temere ſuffecerit. Continuo ſic pronuntiatur, *Fallitur Celſus in σπαραγγουρίας interpretatione, quæ proprie Latinis ſubſtillum, non ſtillicidium* addunturque in hanc

ſententiam quæ apud Mercurialem (b), & Meurſium (c) legeris ex Feſto, & Catone, qui omnium, qui nunc extant, antiquiſſimus linguæ Latine auctor dicitur ab Adnotationis Scriptore. Quem ego potius oblitum credam addere proſa oratione, quam ignorare potuiſſe, Plautum, & Terentium extare, quorum uterque ante Catonem, & primus quidem luſtris non ita pauciſſe mortuus; ut æquior in eum ſim; quam ipſe in Celſum fuit. Qui tametiſi hic, & alibi illud fortaffe magis ſpectaſſet, ſtranguriam quam ibi ex Hippocratis ſententia memoraret, ſine urinæ difficultate non fieri; quamobrem credo, quæ in Epidemiis (d) de ſtranguria poſita ſententia fuerat, eandem in Aphoriſmis (e) legi de dyſuria; tametiſi igitur Celſus id magis ſpectaſſet, quam ipſam vim, & naturam vocis; hanc tamen vim certe quidem ita expreſſit aliquando, & præſertim proximo capite ſeptimo, Aphoriſmum vertens 80. Sect. 4. ut σπαραγγουρίας ſic reddiderit, *ſi urina paulatim deſtillat.* Sed magnus Vir, & qui multa adeo ex græcis latina fecit, tam facile, in re quam ignorare haud poterat, non fuiſſet, opinor, damnatus; ſi qui damnavit, antea, ut bonum interpretem decet, ejus libros ſæpe, attenteque perlegiſſet: quod non feciſſe, cum ex iis quæ ſubinde ſcripta ſunt ſupra, tum magis ex his quæ ſum additurus, intelliges.

Libro 3. cap. 6. quando æger melior ſit, inquit Celſus. Hæc, inter cætera, adnotantur, *Cicero, meliuſcule mihi eſt. Celſus diceret, ſum meliuſculus. Vid. cap. XX. p. 159. l. 9.* Ibi vero iterum legitur, *ſi æger melior eſt*, Qui magis Celſum verſaſſet; non hunc locum, ſed alterum indicaſſet ex cap. 22. *Qui meliuſculus eſſe cæpit.* Libro 2. cap. 12. *ſi reprimendi cauſa, ex verbenis.* Adnotatio ſic habet, *Tallos herbarum intelligit Celſus per verbenas: ut videbis poſtea variis locis.* Tu vero an bene, an ſatis Celſi mens ita explicetur, ex illo uno quidem, ſed præ cæteris attendendo, loco ſcies, quem Litteris protuli ſuperioribus (f). Sic pariter ex alia Epistoſa (g) intelliges, num probare liceat conjecturam ad verba illa, quæ recte olim cap. 28. lib. 5. legebantur, *ſi non labitur ſpecillum, ſed æquali innititur*, ſic adnotatam, *Vel labitur ſede quali. Conjectura eſt, quia ſedem poſtea in eo ſignificatu ſumit; quaſi non continuo id Celſus opponeret, quod, ut lectionem antiquam confirmat, ſic ejusmodi conjecturis refragatur, ſi inæquale quoque & aſperum ſubeſt.* Sed hoc ea Epistoſa ſatis explicavimus. Itaque præſtat ad alteram Adnotationem tranſire. Inter alia quæ lib. 4. cap. 8. utilia hepaticis remedia traduntur, *pini flos* legitur. *Pini flos*, ſcribitur in Adnotatione, i. e. chamæpitys, quia non audent dicere pinum ſimpliciter, ne intelligatur arbor. Propterea Virgilius: Et ſemper florida pinus. Ubi male P. Bembus πινυς pro pinus correxerat in Culice in fine. Adde quod Dioſcor. dicit *πινυος* prodeſſe chamæpityn, Si aliæ nas lites mihi facere placeret meas; quaererem, ut priuſquam ita damnaſſetur Bembus, quocum modeſtius olim egerat Petrus Viſtorius (h), unde iſta Virgilii interpretatio petita eſt; quaererem, inquam, ut chamæpityn ſemper florere, oſtenderetur: nam Bembus quidem, Theophrasti (i), aut certe Plinii (k) teſtimonio, oſtendere poterat, *toto anno florere picridem ſuam.* Sed tamen ſi ibi Virgilium, ut in verſu quoque illo altero (l)

*Ipſe thymum, pinosque ferens de montibus altis*, ſi Virgilium, inquam, darem, pini vocabulo deſignaffe chamæpityn; quod vel olim inter Viros doctiſſimos controverſum, atque adeo a Salmaſio (m) pernegatum eſſe, ſcio; non hinc proſecto ſequeretur, quam herbam Poëta vocaſſet pinum, eandem

(a) Annot. in hoc cap. (b) Praeloſt. Datau. l. 3. c. 32. & alibi. (c) Not. in Caton. de Re Ruſt. c. 156. (d) l. 2. S. 6. (e) S. 6. Aph. 36. (f) Epist. VII. 4. (g) Vi. (h) Variar. Leſt. l. 25. c. 5. (i) de Hiſt. Plant. l. 7. c. 11. (k) Nat. Hiſt. l. 21. c. 17. (l) Georg. l. 4. v. 111. (m) Plinian. Exerc. in Solin. c. 23.



eandem Celsum, non jam pinum, sed *pini florem* vocare potuisse. At enim Celsus non ausus est dicere pinum simpliciter, & humilis ista pinus hepaticis prodest. Audio. Sed mitto quærere, cur non dixerit potius pinum humilem, aut pinum florentem? Hoc unum quæro, cur non ausus sit dicere chamæpityn? Certe si Adnotationum Auctor diligentius Celsum versasset; novisset præclare, libro 5. cap. 4. non dubitasse scribere, *pyrethrum, chamæpitys, uva taminia*, quam vocem *chamæpitys*, sive eam latinis, sive græcis potius, ut tot alias, litteris scripserit Celsus, cum omnia habeant apud me exemplaria, ne illo quidem excepto, quod calamo descriptum est; suspicari non oportet, obscuro *pini floris* nomine hic eandem herbam, quam perspicuo poterat, significare voluisse. Nam quod hæc hepaticos juvet, ita verum est, ut tamen ipsa quoque major pinus iisdem utilis sit, auctore non solum Dioscoride (n), sed inter alios, hoc vetustiores, apud Cælium Aurelianum (o) Diocle ipso, quem inter *priscos maximosque medicos* Celsus (p) posuit. At hi, inquis, pini folia laudabant; non florem: quem neque laudare poterant, quippe cum pinus nullum ferat; ut propterea Constantinus hic legendum censuerit *lini flos*. Ego vero qui de lini flore, aut foliis nihil ejusmodi invenire adhuc potui litterarum memoriæ mandatum; si quid hic esset mutandum, multo mallem *pini folia*, quam *lini flos*. Prius autem quam mutemus, cogitandum est, potuisse Celsum cum iis facere quos ex Theophrasto (q) commemorat Cæsalpinus (r), hæc scribens, *præter fructum, amentum fert* pinus *deciduum*, quem aliqui *florem* putant. Quin Cæsalpinus ipse florem amentaceum ferre, non negat: Cælius autem (s) cum veteres Medicos, generatim ait, *viridis pini decoctionem* hepaticis dedisse; certe amenta ista non excepit. Verum hæc tu videris. Interea ad aliquanto graviora veniamus.

Libro 2. cap. 3. *Pejor cita alvus est*, inquit Celsus. *sed ne hæc quidem terrere protinus debet, si maturinis temporibus coacta magis est, aut si procedente tempore paulatim contrahitur, & rufa est, neque fœditate odoris similem alvum sani hominis excedit.* Nihil huc aliud adnotatur, nisi quod ad vocem *coacta* pertinet. *Coacta*. *Martialis*: *Nec (sic) desiderio coacta ventris, Gutta pallia non fefellit ulla.* Quid hæc de catella (t), desiderio exonerandi ventris impulsæ, attinent ad minus liquida alvi recrementa? Hic enim manifestum est, respexisse Celsum ad locum illum ex Coacis Prænotionibus haud ita procul a fine, *Alvi egestio optima est mollis, coherens ac compacta, subfulva, non valde graveolens*, sive etiam ad alterum consimilem ex libro Prænotionum (u): nec dubitare quisquam potest quem non pigeat quæ de iusta copia, horaque consueta egestionis, & de lumbricis simul ejectis in utroque loco subsequuntur, cum iis conferre quæ proposita Celsi verba proxime antecedunt, aut sequuntur ad tres istas easdem res spectantia, & eadem quidem sententia. Igitur a Celso, nihil hic nisi quæ egeruntur, attendente, *alvus coacta* opponitur *alvo liquida*. Satisque erat libri 4. caput 19. quod de ventris fluxu est, perlegisse, ut pateret, hic alvum *coactam* alvum minus liquidam significare: quanquam hoc illis etiam verbis confirmatur quæ continuo sequuntur, *aut si procedente tempore paulatim alvus contrahitur*: demonstratur autem evidentissime loco altero ex capite 8. hujus libri 2. *Alvus in hac valetudine (tabe adhuc sanabili) ea tuta est, quæ quotidie coacta, eaque convenientia his, quæ assumuntur, reddit.* Quod enim hic dicitur de ipsis recrementis, ibi, ut idem significaretur, de alvo dictum est.

Morgagni Opusc.

Hæc scripseram, cum in aliam incidi Adnotationem, ex qua locum istum ultimum lectum quidem esse, nec melius tamen explicatum cognovi. Neque enim aliter exponitur ac primus ille, nempe ad hunc modum: *Coacta ergo alvus erit hic quæ cogitur excernere, ut infra (eodem cap. 8.) quæ vix excernit: locus autem qui indicatur, revera de alvo est quæ cogitur excernere in ischiadicis, alvusque nisi coacta non reddit, idque, quod excernitur, mucosum est.* Sed quid hic ad priorem locum de tabescente? in quo alvus *coacta*, eaque *convenientia* reddere dicitur. Num *coacta* ad alvum referemus vi apertam? quando *convenientia* non nisi ad egesta referri possunt; interjecta autem eaque prohibent alio *coacta* referre, quam quo *convenientia*. Verum quid verbis opus est? Utrumque locum ex libro 2. Prædictionum Celsi descripsisse, cætera ostendunt. Is autem qui ad tabescentem attinet, ejusmodi est (x), *Venter autem egerat quotidie, & id, quod egerit, sit durum (ἔστω σκληρόν) copia pro ratione ciborum ingestorum.* At qui de ischiadicis est (y), quibus *alvus non egerit, nisi ad necessitatem coacta (εἰ μὴ πρὸς ἀνάγκην) & prodit ipsis multus stercoraceus mucus.* Celso igitur aliud in alio loco latine reddendo spectandum fuisse, intelligimus, ideoque alterum ex altero loco non esse explicandum. Multo autem minus ex loco qui ad ischiadicos spectat, illum interpretari decet quem primum ex cap. 3. produximus, & ex Coacis Prænotionibus, aut ex Prænotionum libro acceptum diximus. Nam *coacta* ex *ἑωσμένης*, aut *σπασμένης* videtur expressum, quod *coherens* reddiderunt. Prætereaque manifestum est, Celsum de *cita* jugiter *alvo* loquentem, cum mane *coactam* magis dixit, minus quidem liquidam intelligere potuisse, adeo autem duram factam, ut cogi debeat ad egerendum, non potuisse.

Videamus porro; num alibi hæc Adnotationes Celsum felicius interpretentur: & primum in alio loco ubi ad Hippocratem pariter videtur respexisse. Libro 1. cap. 3. *Ubi amari ructus cura dolore & gravitate præcordiorum sunt, ad hunc (vomitum) protinus confugiendum est.* Hæc adnotantur, *Amari ructus i. e. acidi, ὀξύγευσται Græci vocant. Lucil. exhalans acidus e pectore ructus.* Nullum est dubium, quin ructus acidi a Græcis sic appellentur, imo apud Hippocratem atque alios medicos nihil pene est notius, ut vere ait Mercurialis (z), quam sic vocari. Illud dubium est, qua ratione quos Celsus *amaros* dixit, nos *acidos* intelligamus, præsertim si, ut eidem Mercuriali (a), & Almeloveenio visum est, spectaverit hîc Aphorismum 17. Sect. 4. quo Hippocrates vomitum præcipit *cordis morsum*, & *oris amaritudinem* patienti. Nec vero probabilior crediderim interpretationem alterius loci ex libro 3. cap. 20. Cum lethargicos alii excitare identidem studerent admotis iis quæ sternutamenta evocarent, aut fœdo moverent acrique odore; extiterat quidam Tharrias, insequenti etiam capite nominatus, qui contenderet, expectandum esse dum lethargus cum febrili accessione remitteret; tunc enim, nisi æger expergisceretur, esse ob has causas excitandum, ut excerneret aliquid, & sumeret: *Itaque eos, qui subinde excitant, sine usu male habere.* Hæc ea adscribuntur, *Gracismus est ἀπειρος ἔχειν, imperitos esse.* Mihi vero magis congruens cum iis quæ sequuntur, & minus contumeliosa in cæteros Medicos placet interpretatio, ut intelligam, hoc Tharriam dixisse, qui identidem ægrum excitare conarentur, eos hunc sine utilitate vexare. Neque enim, ut ibidem mox legimus, *vigilando melior sit; sed per se, si melior est, vigilat.* Notius est autem, quam ut confirmari a me debeat, *usum* persæpe utilitatem significare: nam

N 2

male

(n) de Med. Mat. l. 1. c. 74. (o) Morb. Chron. l. 3. c. 4. (p) l. 7. c. 6. p. 418, 4.  
(q) Vid. Hist. cit. l. 3. c. 6. (r) de Plant. l. 3. c. 52. (s) cap. cit. (t) Vid. Martial. l. 1. Epigr. 110.  
(u) n. 9. (x) n. 12. (y) n. 45. (z) Prælect. in Aph. 1. S. 6. (a) in Aph. 17. S. 4.



male habere quin idem hic valeat, ac molestia & incommodo afficere, dubitare nemo potest, cui vel Celsi unius non sit ignota consuetudo, tot aliis locis quos sciens prætereo, non aliter, quam libri ejusdem 3. capite 6. scribentis, *qua mole* (satis multæ vestis) plerique ægros in ipso impetu febris, potissimeque ubi ardens ea est, male habent.

Est etiam ubi Adnotationes aliquæ obscuræ mihi videantur, velut ea quæ ad vexatissimum illum Præfationis attinet locum (b), ubi, inter cætera, ab Anatomicis, spirante etiam tum animali, in hujus interioribus animadvertenda, occurrunt vox illa *contrafactum*, sive, ut alii antea ediderant, *contactum*, sive, ut Schulzius sibi persuasit, *confrutum*, sive demum, ut in aliqua editione, & in Constantini erat codice, & in Veneto, & Foroliviensi, *contractum*: quæ vox cur Rubeo placeret, alias ad te scribens (c), commemoravi. Auctori quoque placet Adnotatio. num. Sed causam, id est explicationem haud satis intelligo. Sic enim habet, Ruell. *contractum*. *Σύμπτωσις* vocat Hippocr. Aph. 3. lib. 1. *compressum*, *contracturam*: *contractum* ergo legendum. Quid enim sibi vult per interiorum *compressum*, & *contracturam*, quod non satis complectantur duæ præcedentes, inter cæteras, voces *figuram*, *magnitudinem*? Reddunt quidem latine, ut nosti, plures Interpretes græcam illam aphorismi vocem *compressiones*, alii, ut Mercurialis, quem, ut civem, libenter nomino, *collapsiones*, sed omnes eadem quam aphorismus requirit, sententia, ut effectum videlicet institutæ a Medico evacuationis. Sed quid hæc ad Celsi propositum, de eo interiorum statu qui maxime secundum naturam sit, ibi sermonem habentis? Obscura igitur Adnotatio est. Quod si exemplum aliud aliquod quam coincidentium ab evacuatione vasorum, produxisset; conarer fortasse rem ad eum modum explicare, qui mihi, istam vocem *contractum* in codicibus reperienti, in mentem venerat aliquando, nec forsitan præter rationem. Scilicet cum inter ista omnia quæ Celsus, sive potius apud Celsum Rationales Medici consideranda esse, agebant in vivi animalis interioribus, nihil de horum motibus inveniamus, cumque de eorumdem Medicorum sententia modo ostensus esset, quanti referat scire, an concoctio fiat quod *at-*  
6, 11. *teratur cibus in ventre*, ut docebat Erasistratus, an aliter, ut alii; item quæ ad *spiritum trahendum* attinent, & *emittendum*, ad *venas modo*  
6, 1. *submittentes se, modo attollentes*, ad alia ejusce-  
6, 5. *modi*; ob has causas non improbable videri possit, *contractum* inter cætera positum esse ea mente, non ut interiora collapsa, sed ut alternam eorum contractionem significet, per quam cor sanguinem in vasa impellit, septum transversum ad ducendum spiritum juvat, ventriculus denique, & intestina, dum peristaltico motu cidentur, sive, ut loquitur M. Cicero (d), *tum adstringuntur, tum relaxantur*, etiam terendo sic cibo, faciunt, ut omnia cocta sint atque confecta. Sed hæc obiter. Ad minus obscuras Adnotationes redeamus.

Apertissimæ illæ sunt, quibus aliquis redarguitur, ut ea quam venæ, paulo ante pro arteriis positæ, ad memoriam redegerunt. *Male Constantinus pro venæ reponit arteriæ.* Nihil mutavit Constantinus, ut qui probe sciret, præcis, & in his Celsus in more fuisse, ut sapius pro arteriis dicerent venas. Explicat tantum. *Venæ hic, i. arteriæ.* Si æque paucis possem; inquirerem hic, jure, an injuria Celsum quoque ipsum modo in remedium materia, modo in aliis quæ pariter ad Medicum spectant, libere aperteque aliæ Adnotationes reprehendant. Verum satis sit

tibi quod supra in aliqua attigi de eo genere. Sed minus tamen dedecuisse, in iis rebus tantum Auctorem ab eo notari qui in iisdem longe excelleret. Quod ne hic facile credamus, nonnullæ ex his faciunt Adnotationes. Libro 5. cap. 18. in Ctesiphontis malagmate partem Celsus ponit *nitri quam ruberrimi*. Hoc adnotatur, *Mirum*, qui dicat *ruberrimum esse nitrum, cum viride sit, & in ollas indatur, ad caules viridiores efficiendos*. Non mihi opus est quærere, quo colore esset nitrum quocum olera coquebantur, ut *smaragdina* fierent, quemadmodum loquitur Apicius (e); & Columella (f), Plinius (g), Martialis (h) indicant: illud certe erat album, quod teneris etiamtum brassicæ plantis, tritum desuper spargebat Palladius (i), ut *speciem pruina candentis imitaretur*; sic enim postea, *virore servato*, coquebantur. Satis est; ut de Plinio (k) nihil dicam, qui nitrum in Ægypto, scripsit, & *rusum exire a colore terræ*, aphronitrum autem probari, ut sit *colore pene purpureo*; satis, inquam, est quid de nitro ipso tradiderint Medici tres, inter antiquos nobilissimi, & omnium manibus versatissimi, commemorare. Hippocrates igitur libro de Internis Affectionibus (l) mentionem facit *nitri Ægyptii rubri torrefacti*; *nitri item rubri* libro de Natura Muliebri (m), & libro 2. de Morbis Muliebribus (n), & ne alios perquiram locos, libro etiam de Fistulis (o), ubi *nitrum rubrum assari*, jubet. Dioscorides de Medica Materia libro 5. cap. 89. non id modo quod Plinius, habet de optimi aphronitri colore *pene purpureo*; sed quod ad nitrum ipsum attinet, *præferri hoc, ait, leve, roseo colore, aut candido*. Galenus denique libris de Compositione Medicam. secund. loc. *nitrum rubrum* memorat in Compositionibus Aristarchi (p), Tryphonis Gortyniæ (q), Critonis (r), & Andree (s). Nec plura quæro ex his tribus, aut ex aliis, qui postea floruerunt, Medicis: tametsi Oribasium (t) meminisse de nitro eadem quæ Dioscorides, scripsisse; Avicennam (u) *album, aut purpureum, aut roseum* prætulisse; Auctorem denique Historiæ Simplicium Medicamentorum (x), quæ sub Serapionis nomine circumfertur, *alibi colore roseo, rubroque, alibi candido, cineritioque* commemorasse; nec Recentiores (y) deesse, qui etiamnum in Ægypto prope Nilum quasdam nitri *strias* efflorescere, confirmant, *nunc rubescences, nunc blande cærulescentes*, & (z) *nitrum nativum Alexandrinum rosei coloris esse, ejusdem Neapolitanum*. Mirum est igitur, non jam apud Celsum memorari nitrum quam ruberrimum; sed mirari aliquem, quod memoretur. Neque minus admiratione dignum est quod adscribitur ad initium capitis 21. libri 4. ubi occasione captata ex *nimia*, de qua Celsus loquitur, *seminis profusione*, sive gonorrhœa proprie dicta, hoc de altera illa adnotatur, qua ex lue venerea non semen, sed pus, aut aquosa quædam emittuntur, *Ea vero me auctore, vocari potest fistula*. Scilicet effluxus, qui fistulæ effectus est, hoc auctore, fistula esset; ipsa autem fistula, quæ gonorrhœas illas graviores aut neglectas, aut male curatas demum consequitur aliquando, in omnibus esset ex ea lue gonorrhœicis vel levissimis, ac recentissimis.

Quæ omnia cum ita sint; rescribere ad illum posses qui descriptas ad te istas Adnotationes misit, quasi a viro divino profectas, bene actum fuisse cum Celsus, quod earum Auctori, quicunque is tandem sit, alias ejusdemmodi addere non libuerit. Neque enim, ista quidem ratione, huic Augiæ stabulo expurgando magis ipse par fuisset, quam cæteri, qui huic operi, ut scribis, satis licenter pronunciantur *minime pares*. Duos illos dico, qui, ut ais, nominantur, doctos & acutos Vi-

(b) Vid. Epist. III. & V. (c) Epist. III. (d) de Nat. Deor. l. 2. (e) de Re Culin. l. 3. c. 1.  
(f) de Re Rust. lib. 11. c. 3. (g) Nat. Hist. l. 31. c. 10. (h) Epigr. l. 13. 17.  
(i) de Re Rust. l. 3. c. 24. (k) Ibid. (l) n. 29. (m) n. 29. (n) n. 120. (o) n. 6.  
(p) l. 5. c. 1. (q) l. 9. c. 2. (r) Ibid. c. 3. (s) l. 10. c. 2. (t) Medic. Coll. l. 13.  
(u) Canon. l. 2. tr. 2. c. 84. (x) l. 6. c. 53. (y) Vid. apud Eschmull. Not. ad Ludov. Diff. 1. de Remed. &c.  
(z) apud eund. in Schrod. Mineralog. c. 23.



Viros, quos cum hoc præmium referre video diuturnæ operæ, ut profecti erant, in Celso positæ; dicere non possim, quam gaudeam, me aliis semper occupationibus ab eadem suscipienda provincia fuisse avocatum, & dies vix paucos flagitanti tibi tribuere potuisse, quibus cursim nonnullæ, ut hic illic forte occurrebant inter scribendum, attingerem; non ex proposito, Celsi libros emendarem. Quod si mihi proposuisssem; alia atque alia, optimorum codicum præsertim, subsidia comparassem: atque, ut cæteris caruisssem; ac certe diligentius aliquanto cavisssem, ne quæ mutanda non essent, mutarem; ne quæ demenda non essent, demerem; ne Celsum damnarem potius, quam interpretarer, aut saltem excusarem; ne eorum quæ alibi scripsit, aut in scribendo spectavit, oblitus, aliud quam quod præclare sensit, ipsi tribuerem; ne quid mihi vellem, esset obscurum; denique ne Celsum iis in rebus accusarem, in quibus ipse quasi hospes videri possem; aut si forte in horum aliquod prolaberetur: ut modestè id, & dubitanti similis facerem; non præfidenti festinatione pronunciarem. Quæ vitia, ut ostensum est, cum alia in alias, tum ultimum præsertim in omnes fere cadit, quas perpendimus, Adnotationes. Invenies fortasse & alias alia aliqua animadversione dignas: quanquam mihi festinanter, & ne omnes quidem, percurrenti, plures, ut initio dixi, visæ sunt istarum dissimiles adeo, ut facile possint ad longe alium Auctorem attinere, eumque Lindenio fortasse antiquiorem: certe alteruter ab altero videri potest quædam sumpsisse; cum iidem interdum loci ad eundem modum legantur in illius editione recte emendari. Sunt etiam nonnulla in his Adnotationibus aliam ob causam supervacua, sive quia res per se clara satis est, sive quia ad alios Scriptores magis, quam ad Celsum, attinent quæ adnotantur. Vides igitur, quo delectu esset opus, si missis ad me Adnotationibus uti velles.

Cætera quæ ex me quæris, brevi possunt responsione expediri. Scire enim aves, num alia præstet ad Celsum addere præter ea quæ multa de similibus Auctorum locis, pauca autem de variantibus lectionibus, paginis subiecit Almeloveenius, aut ex suis, aliorumve adnotationibus conjecit in Scholia. Ego vero scire ex te aveo, quot, quantive sit voluminibus Celsi editionem Bibliopola adornaturus. Neque enim uno aut altero vel majoris formæ ea omnia comprehenderet quæ addi possunt. Noli autem credere; ut de similibus Auctorum locis primum dicam, quæ non indicari, sed fuscè produci, velles; modico hæc posse volumine contineri. At ea saltem, dices, proferantur quæ ex libris Hippocratis, aut qui sub Hippocratis nomine extant, Celsus videtur accepisse. Cave existimes, non plura esse, quam quæ collegit Henricus Stephanus. Ne Aphorismos quidem omnes, huc attinentes, pervidit: itaque alii a Viris doctis additi sunt, quos ipse omiserat. Præter Aphorismos autem quot alios tandem excussit libros? istosque alios quam accurate? Quære, exempli causa, locos quos supra indicavi; num collegerit, facile intelliges.

De variantibus autem lectionibus sic habeto, vel codices optimos, non modo vetustissimas edi-

tiones, crebris, & sæpe manifestissimis scaterere mendis: esse autem immensi laboris seligere in singulis exemplaribus quæ utilia proponas, cum in mendis ipsis indicia nonnunquam lateant veteris scripturæ, ut si certa quædam menda omittas; doctos non satis adjuves: si nulla omittas; immani omnes inutilium verborum copia obruas.

Huc adde miras inter se varietates, & codicum numerum, & legendi, ob vetustam litterarum formam, & compendia vocum, difficultatem, & itinerum impendia ac molestias; nisi si velles alienis oculis, & diligentiae credere, quæ in ipsarum quas in manibus habemus, editionum lectionibus ut sæpenumero fallat, periculo a nobis facto, compertum est. Crederes autem non modo in hoc, sed in delectu quoque illo ut plurimum oporteret, qui infirmissima sis valetudine.

Restat ut dicam de Scholiis. Jam nosti quæ ad Celsum explicandum, emendandumve olim scripserint Cæsarius, Thriverius, Pantinus, Lommus, Rorarius, Constantinus, Ronseus, Rubens, Paawius, Rhodius, alii. Si omnia omnium edantur; quæ libri moles? nam fusius aliqui scripserunt. Deinde quot inutilia admixta ex inani- bus hypothesebus? Seligendum igitur. At quos omittes? Num qui prolixiores fuerunt? At in his quoque sunt sua bona; nec qui brevitatem secuti sunt, idcirco non plura habent prætermittenda, vel quia non bona, vel quia a Lindenio jam in contextum recepta. Itaque intelligis, aut ex omnibus eligenda utiliora, aut omnia quæ omnes ediderunt, esse recudenda. Quorum alterum est longi temporis, gravis laboris, peracris in primis judicii, quod sine assidua animi contentione adhiberi non potest; alterum inutile magna ex parte, & mole ipsa odiosum ac permolestum.

Quid ergo mei consilii est? Nempe quod initio fuit, ut typographo auctor sis eandem quam prius, Almeloveenii editionem representandi, imo omnia, quæ ab Almeloveenio non sunt, omitterendi. Num tuas etiam, inquis, Epistolas? Imo illas maxime, necui amplius ansam præbeant Patavinas mihi Almeloveenii editiones tribuendi. Satis, superque illæ Epistolæ hic, atque alibi e typographorum officinis prodire, non ad id scriptæ, sed ut privatim postulationi satisfacerem tuæ. Neque aliud mihi fuit propositum has quoque alias fundenti potius, quam scribenti: aut si quando aliud fuit; tunc fuit, cum scirem necdum, quot in folia possent excrescere, nec spes deesset recognoscendi, quæ nunc vix est relegendi. De prolixitudine ipse quid sentiam, paulo ante dixi. Edentur alias separatim, si tanti esse videbuntur, nec tempus deerit recensendi, & ad pauciora redigendi; nosti enim, nulla re nos fieri in scribendo longiores, quam temporis angustis. Peto igitur abs te, mi Vulpi, majoremque in modum contendo, ut has quinque Epistolas apud te premas. Quod si in Præfatione tamen dicendum censueris, & scriptas esse, & quæ impellente iustissima ratione sint scriptæ, aut si certo quopiam earum loco, speciminis causa, uti volueris; non repugnabo. Vale.

Patavii xv. Idus Januar. MDCCL.



## Q. SERENUM SAMONICUM

## E P I S T O L A P R I M A.

Jo. Bapt. Morgagnus Jo. Bapt. Vulpio S. P. D.

Quoniam longissimas illas in Celsum litteras (\*) quas superioribus diebus ad te scripsimus, longas tibi videri, negas; multo etiam quam expectas, longiores in Samonicum nunc scribemus.

Quæremus autem, quænam ex hujus quas adhuc vidimus, editionibus dignior sit quam potissimum sequaris: aut si nullam ejusmodi invenerimus; quid tibi faciendum censeamus, simpliciter candideque (quod & solemus ipsi, & tu flagitas, mi Vulpi) admonebimus. Qui Samonicum formis descripserit ante Aldum majorem, vel potius; quoniam hic erat jampridem mortuus; ante Franciscum Asulanum, Andreæ forceri ejus filium, nec Keuchenius (a) invenit, nec ipse vidi. Itaque mirandum non est, si ut in primis fere cunctis conatibus usu venit, non pauca in illa editione desiderantur. Neque vero hoc eo dico, quod aut illa omnium prima fuerit, aut sex illi, & viginti versus quos in calce exhibet, imponere amplius cuipiam possint. Nam hi in reliquis deinceps plerisque editionibus, ut Samonico indigni, & jure quidem, notati sunt; ab Humelbergio autem etiam omitti: & cum, ipso confitente Asulano, in aliis impressis codicibus desiderarentur; apud alios igitur ante ipsum Typographos (qua de re videbimus postea) prodisset Samonicus, necesse est. Sed tum eo dico, quod antea; si Egnatio (b) credimus, viro sane peritissimo, & quem, ut in Celso, ita in Sereno quoque emendando operam suam Asulano commodasse, vix dubito quoties ejus in utrumque Auctorem ad Gonzagam Epistolam relego; usque adeo negligenter editus fuerat Samonicus, ut legi vix posset; tum quod bene multa ab Asulano in ipso edendo facta esse, animadverti quæ aut nullos, aut paucos certe invenerunt imitatores. In ipso enim Proœmio, Apollinis, atque Æsculapii invocationem suscepti argumenti propositioni anteposuit; in capite autem de *hydropisi* plerosque versus longe alio dedit ordine dispositos, ac passim habentur: quod & alibi, non tamen tot in versibus, fecit, & nominatim, nec sine causa, in cap. de *profluvio cujusque sanguinis*. Sed & versus omisit, aut certe non agnovit aliquot; ut in cap. de *hemirritæo*: *Coralium*, atque &c. & in cap. de *subitaneo dolore*: *Sic lacerat*, & duos qui continuo sequuntur, versus. Quibus quidem omnibus de rebus hic non judico; illud tantum animadverto, in hisce versibus sine ulla admonitione omittendis socium, aut imitatore (de extraneis nunc loquor; semper autem de iis solum quos ipse viderim) socium, inquam, aut imitatore nullum habuisse præter Cæsarium, nisi quod Humelbergius quoque priorem illum versum omisit; in iis autem transponendis, nullum pariter, si Humelbergium excipias, qui tamen non semper ad eundem prorsus modum transposuit. Sed neminem invenit præter Sororis eisdemque Aldi majoris Filios qui (id semel hoc in loco dixisse satis sit) Avunculi edi-

tionem sunt omnino secuti, qui versus quosdam, ab ipso agnitos, reciperet, ut in fine cap. de *felis vomitu*, ubi cæteri longe alium habent versum,

*Quæ capulas quoque producit medicina satubris,*

atque alterum in cap. de *vulneribus quibuscunque* &c. cujus videlicet hoc dedit initium:

*Cum magna humanæ sint pondera conditionis: Tam multæ innumeri species mihi vulneris adsunt.*

Verum ut ad alia veniamus; cum hunc versum in cap. de *subitaneo dolore*, *febre*, &c. Asulanus sic ediderit:

*Nec spernendus adeps, dederit quem bestia Melus;*

quamnam, quæso, bestiam esse *Melum*, dicemus? *Melis* quidem, vel *Mæles* quod animal sit, ex Varronis (c), Gratii (d), Pliniique (e) verbis conjici potest. Quibus & quendam locum M. Val. Martialis (f), cum Scriverio, Gronovio, & Schrevelio is facile addet qui Raderi (g) censuram, & Rutgerii (h), ac Salmasii (i) observationes in eundem locum perpenderit. Nam indicata ab aliis Frontini verba, atque alterum Plinii locum de *Mele* invenire se, diserte negavit Aldrovandus (k), & ante ipsum Gesnerus (l), qui *nec memini*, inquit, *authoris nomen, qui hæc tanquam ex illis citat*. Hic vero fuerat ille idem Pontifex Syponinus (m), quem paulo ante (n) scripserat, non primum, ut is Pontifex opinabatur, sed post Aggregatorem (videlicet Jacobum de Dondis Patavinum) aliosque, docuisse, *Melem* id animal esse quod nunc *Taxum* vocant. Quæ quidem in sententia esse fere omnes eruditos homines, agnovit Salmasius (o); quamquam ipse ex verbis Varronis longe aliud censuit. Ego vero etsi animadverti, quid Salmasio, cujus & nomen, & dissensionem modelle dissimulat, responderi posse, crediderit Janus Ulitius (p), ac præterea quomodo alter scrupulus qui ab Jano ipso ob Plinii verba injectus est, haud difficile eximi possit, si non modo cum Aldrovando (q) Natalis Comitæ (r), aliisque Poætæ versiculos, sed cum Gesnero eas quoque narrationes audiamus quibus Plinius, de quo agitur, potuit, ut tot aliis, sive jure, sive injuria fidem habere; tamen ne a proposito longius abeam, huc redibo ut affirmem: *Melis* quodnam sit animal, ex antiquorum Auctorum verbis conjici posse; esse autem animal, neminem qui aut illos, aut Caprum etiam Grammaticum (s); ne de Solino (t) quidquam dicam; vel curtim legerit, ignorare. At *Melus* non modo quale sit, sed ne id quidem quod animal sit, neminem ex idoneis latinæ linguæ Scriptoribus legisse memini qui doceret. Itaque cæteri in eo versu habent *Melis*, atque adeo Humelbergius (u) *Melis*, sive *Taxi* adipem in quodam medico libello ad eundem istum de quo Serenus loquitur, usum commendari affirmat, quod

(\*) Epistolam videlicet I. (a) Prolegom. ad Samonic. (b) Epist. Dedic. in illa ipsa editione A. 1528.  
(c) Rei Rust. l. 3. c. 12. (d) Cynegetic. vers. 402. & fortasse etiam 340. (e) Nat. Hist. l. 8. c. 38.  
(f) Vid. Epigr. 37. lib. 10. ex Museo P. Scriverii, item ex edit. Corn. Schrevelii, & Not. in idem.  
(g) Comment. in idem Epigr. quod ipse est 35. (h) in Not. in idem Epigr. Edit. Schrevel.  
(i) in iisd. Notis, & in Plinian. Exercit. in Solini caput 52. (k) De Quadruped. digit. Vivip. l. 2. c. 11.  
(l) Hist. Animal. l. 1. ubi de Mele ad litt. E. (m) Comment. linguæ Lat. (n) loc. cit. ad litt. A.  
(o) loc. cit. in Solinum. (p) Comment. ad cit. Gratii versum 402. (q) loc. cit. (r) De Ven. l. 4.  
(s) De verbis dubiis. (t) Polyhist. c. 52. ex Edit. Salmas. (u) Comment. in Sereni c. 47.



quod etiam in libro Æsculapii nescio cuius pro-  
ditum esse, testatur Gesnerus (x). Atque  
ego istiusmodi errorem, ut fortuitum Operarum  
lapsum, neglexissem, nisi animadvertissem, in  
Filiis Aldi editione retentum esse, & præte-  
rea alio in loco ubi *Melis* erat scribendum, uti  
quidem a Cæsario, Constantino, Keuchenio scri-  
ptum est, & a postremo (y) etiam sic satis o-  
stentum, esse ab Asulano, iisdemque Manutiis  
scriptum *pellis*, in cap. videlicet de *rejectione cibi* &c.

*Ovorum cinis, aut cochlearum, aut denique pellis.*  
Quid porro dicemus de Mithridatis Antidoto de-  
scripta in cap. de *venenis prohibendis*? Sic Asulanus:

*Antidotus vero multis mithridatia fertur  
Consociata modis: sed Magnus scriinia regis  
Cum raperet victor, vilem deprehendit in illis  
Synthesin, & vulgata satis medicamina risit.  
Bis denum ruta folium, salis & breve granum,  
Juglandesque duas, terno cum corpore ficus  
Hæc oriente die parco conspersa lyæo*

*Sumebat, metuens dederat, quod pocula matri.*  
Mitto, ab Humelbergio scribi: quæ pocula ma-  
tri; a cæteris: quæ pocula mater; in codice Con-  
stantini quod ipse, & H. Stephanus ad oram ad-  
notarunt: quæ pocula tutor. Mitto, postremam  
hanc scripturam ab iis præsertim probari oportere  
qui meminere, apud Justinum (z) (quod  
& ab eodem Constantino (a) indicatur) scri-  
ptum esse, Mithridatis pueri Tutores *venenorum*  
appetivisse; idque ipsum *metuentem*, antidota sæ-  
pius bibisse. Illud tantummodo quod habet Asu-  
lanus; terno cum corpore ficus, congruere nego  
cum iis quæ alii de ista ipsa *Synthesi* tradidere.  
Æmilius enim Macer (b), ubi de Rutæ virtuti-  
bus scribit,

*Obstat, inquit, pota, mero: vel, cruda co-  
mesta, venenis.*

*Hoc Mithridates rex Ponti sæpe probavit,  
Qui rutæ foliis viginti cum sale pauco,  
Et magnis nucibus binis, caricisque duabus  
Jesurus vesci consurgens mane solebat.*

Hic vero nolim, existimes, his versibus, atque  
adeo ipsi de *Herbarum Virtutibus* Poëmati quod  
sub Æmilii Macri nomine circumfertur, plus for-  
te a me tribui, quam par sit. Quinimo cum sæ-  
pe alias ex me quæsieris, de hoc Macro, ejus-  
que ætate quid sentiam; dabo hic operam, quan-  
do in ejus Poëmatis mentionem incidimus, ut  
percontationi tuæ cumulatissime satisfaciam.

Et primum cave existimes, ulla ex parte assen-  
tiri me posse Raphaëli Volaterrano (c), Geor-  
gio Pictorio (d), Thomæ Bartholino (e), qui  
Poëtæ illius esse crediderunt de quo Ovidius (f):

*Sæpe suas volucres legit mihi grandior ævo,  
Quæque nocet serpens, quæ juvat herba,  
Macer.*

Nam quod præfens opus non sit Macri illius Ovi-  
diani, vel ex eo elucere, quod hic noster Plinium,  
multis sæculis Ovidio juniorem, plerisque in locis  
citatur, recte olim animadvertit Joannes Atrocianus  
(g); recte, inquam, si id unum excipias  
quod multis sæculis Ovidio juniorem credidit Pli-  
nium, qui anno ab Ovidii morte sexto, vel septi-  
mo natus est; majorem enim Plinium, non quem  
Valerianum vocant (nam hunc a Macro citari,  
ajunt Daumius (h), & Fabricius (i)) intel-  
lexisse, cum ex eo apparet quod reapse majoris  
Plinii scripta plerisque in locis hujus Poëmatis  
laudantur, quod L. Gr. Gyraldus (k), An-  
dreas Tiraquellus (l), & Ger. Jo. Vossius (m)  
ex parte agnoscere, sæpius autem ostendit Geor-  
gius Pictorius (n), tum hinc liquet maxime

quod illo ipso in loco Atrocianus contendit, non  
ab eo qui aliquot post seniore Plinium sæcu-  
lis, sed ab eo qui cum seniore ipso Plinio facile  
vixerit, hoc Poëma scriptum fuisse. Scilicet il-  
lius Macri esse, affirmat, ad quem minoris Pli-  
nii Epistola (o) extat, eo argumento permotus  
quod in hac Plinius *adhortatur illum ad simile  
quid elaborandum*. Qua rursus in re Atrociano  
adstipulari me posse, nego. Neque id eo dico  
quod eas Plinii litteras perlegens, nihil tale, ut  
Vossius (p), invenerim; nam clausulam quidem  
inveni, ab Atrociano ipso productam, in qua Pli-  
nius illas suas litteras sperat eum ad quem scri-  
bit, non tantum ad legendos libros Avunculi,  
verum etiam ad simile aliquid elaborandum posse  
æmulationis stimulis excitare: quod tamen infir-  
missimum esse argumentum, fateor; nec Vossius  
fortasse aliud voluit. Neque eo potissimum dico  
quod illa ipsa Epistola, ut plerique habent libri,  
non sit Macro inscripta, sed Marco, quem An-  
toninum fuisse, uti Catanæus (q) existimat, li-  
cet suspicari. Sed eo dico quod nolter hic Macer  
non Palladium (r) modo, aut Galenum (s),  
verum etiam, quod vel olim a Tiraquello (t)  
adnotatum est, Oribasium (u) ipsum laudet;  
quem Julianus Cæsaris Medicum fuisse, constat.  
Quid? quod Strabi quem (ut Daumium (x)  
quoque observasse, video) diserte nominat (y),  
Strabi, inquam, de Ligustico sententiam ita me-  
morat, ut cum manifestum sit de Monacho illo  
Strabo, Gallo, ut vocant; revera Germano (z),  
hoc est Walafrido Fuldeni verba fieri a quo ista  
ipsa proposita est in brevi eo Poëmate (a) quod  
inscribitur *Hortulus*; tum intelligatur facile, jam  
diu hunc Hortulum vulgatum fuisse, quando a  
nostro scriptum est:

-- -- -- nec me legisse recordor

Ullum, qui Strabi sermonibus astipuletur.

Itaque ne iis quidem possum Eruditissimis Homi-  
nibus assentiri qui Macrum hunc nostrum iis ac-  
censent Scriptoribus qui inter secundi, & quinti  
sæculi initium floruerunt, præsertim cum ipsi quo-  
que cum Jo. Trithemio (b), Ger. Jo. Vossio  
(c), Olao Borrichio (d), & Jo. Alberto Fa-  
bricio (e), nono sæculo vixisse Strabum, &  
recte id quidem, agnoscant; Nam quod Atrocianus  
(f), & Pictorius (g) hunc vixisse ajunt  
sub Ludovico Imperatore, anno 1340. & quod hu-  
jus rei testem Atrocianus laudat Trithemium,  
nempe uterque in eo lapsus est ut pro Ludovico  
I. vel II. Ludovicum V. intelligeret; Trithe-  
mius certe etsi in eo est hallucinatus quod (h)  
Walafridum alium a Strabo esse, credidit; illum  
tamen circa A. 700; hunc vero alio in loco re-  
tulit ad A. 840, in alio autem ad 860. ut Vos-  
sius (i) animadvertit, qui cur malit ad A. 860.  
cum alibi (k) statuatur decessisse A. 849. non fa-  
tis video; illud contra video unde illa aut Tri-  
themii, aut librorum (eorum etiam dico quos  
secutus ipse est) inconstantia oriri facile potuerit;  
scribentium modo DCCCXL, alias autem  
DCCCLX, altera videlicet harum postremarum  
litterarum in alterius locum temere, ut sit, in  
describendo transposita. Utcunque hoc est; paulo  
minus dedecuisse Pictorium falli cum Wolfgan-  
go Justo (l) qui Strabum circa A. statuit 1163.  
quam cum Trithemio perperam intellecto, Anno  
1340. viventem agnoscere eum Scriptorem quem  
ab suo isto Ovidiano; si Diis placet; Macro lau-  
datum esse, perspiciebat. Errorem sane haud mul-  
to graviores admisisset quam ubi (m) *Avicenna*  
sequi, & (n) *Avicenna* subscribere hunc Ma-

(x) loc. cit. ad litt. G. (y) Not. ad Samonic. (z) Hist. l. 37. (a) Adnot. margin. ad Samonic.  
(b) De Herbar. virtutib. (c) Comment. urban. l. 17. (d) Epist. ad Lect. Macro ab ipso edito præfixa.  
(e) Dissert. de Medicis Poëtis apud Broukhuf. in Tibull. l. 2. Pl. 6. vers. 1. (f) Trist. l. 4. El. 10.  
(g) Præf. ad sua Comment. in Macrum. (h) Epistola ad Th. Reinesium, quæ est 4. inter Reinesii Epist.  
(i) Biblioth. Lat. l. 4. c. 12. (k) De Poetar. Historia Dial. 4. (l) De Nobilit. c. 31. n. 230.  
(m) De Poet. Lat. c. 2. (n) Scholiis in Macrum. (o) l. 3. Epist. 5. (p) loc. cit.  
(q) Comment. in eam Epist. (r) ubi de Rosa. (s) ubi de Urtica, de Atriplice, de Coriandro, de Cepis, de Pæonia,  
(t) loc. cit. (u) ubi de Sabina, & de Aloe. (x) Epist. ad Reines. cit. (y) ubi de Ligustico.  
(z) Vid. Trithem. loco mox citando. (a) c. 12. (b) De Ecclesiast. Scriptorib. c. 269.  
(c) De Poet. Lat. c. 6. De Historic. Lat. l. 2. c. 33. (d) De Poet. Lat. Diss. 2. n. 75.  
(e) Suppl. Bibliot. Lat. l. 4. c. 12. (f) Comment. ad Macri caput de Ligustico.  
(g) Schol. in id. c. quod est 25. (h) Vid. Voss. de Historic. Lat. loc. cit. (i) De Poet. Lat. loc. cit.  
(k) De Hist. Lat. loc. cit. (l) Chronolog. Medic. apud Linden. de Script. Med. (m) Schol. in c. 3. (n) & 46.



Macrum; docuit, quem mille ante Avicennam fuisse annis, affirmare ipse non dubitaverat.

Quod si quis forte ad hæc omnia idem respondeat quod Atrocianus (o): *posse hunc librum immutatum esse in aliquot locis*; ego vero idem ab eo petam quod æque libenter ab illis peterem qui cum Hadriano Junio (p), Antonio Morillono (q), Israël Spachio (r), aliisque, Trotulæ (sic enim inscribitur) *de Mulierum Passionibus* librum Erotis, Juliæ liberti medicique, opus esse, putant; tametsi non modo postremi capitis, quod unum videlicet ut novissime magna ex parte adiectum notavit Rhodius (s), ipse *Stilus Juliæ ætate multo posteriorem demonstrat*, sed vel in Prologo, primoque ipso capite laudatus Galenus, capite 20. Trotula ipsa laudata, capite 61. *nobiles illæ Salernitanæ*, imo cum earum fucio ex *brevisilio frustatim inciso mulieres Sarracenæ memoratæ*, & denique; ne innumera, cum possim, transcribam; capite 62. *aquæ vitæ de vino meliore destillatæ* facta mentio longe aliam ætatem apertissime commonstrent; ut multo malim credere Thomæ Bartholino (t), qui libri Auctorem non Erotem illum, sed *Doctorem Salernitanum* fuisse, affirmat. Quem igitur ad modum ab illis peterem ut his omnibus in locis quos subdititios esse contendat, necesse est, alium revera atque in reliquo universo fere libro stylum ostenderent; sic in Macro quem quisque locum additum ajat, eum ut styli nota discrepare a cæteris, demonstrat, rogabo. Quod si facere non possit; non igitur quæcunque aut ob ea quæ dicta sunt, aut ob ea quæ subjicere liceret de radicibus *Galangæ*, ac *Zedoar*, facile non ante Arabicæ Scholæ tempora medicamentorum numero adjectis, & ab nostro (u) tamen inter

-- species illas quas jam cunctis prope notas  
Usus medendi fecit,

nominatim propositis, aut ob rationem syllabarum male in carmine; idque non raro; servatam, ut hunc ne *sincerum* quidem *versificatorem* fuisse, J. C. Scaliger (x), cujus judicium probant Vossius (y), & Broukhufius (z), diserte pronuntiaverit, aut denique ob ipsius barbaras, ab eodem etiam Scaligero (a) notatas, voces; non, inquam, omnia quæ ob hæc atque ejusmodi alia antiquiori cuiquam Macro tribuere nequeat, continuo supposita, aut adulterata esse, contendat. Sed cum mecum animadverterit id quod attendisse oportebat Pictorium (b) *phrasi quid donantem*, jactantemque, *neminem hætenus verborum lenocinio curatum* esse, cum, inquam, mecum animadverterit, primum illum celebrem Poetam Macrum *humilem* quidem, Fabio (c) iudice, sed tamen *elegantem in sua materia* fuisse, tum ab iis qui in verborum certis ætatibus apud certos Populos usitatorum cognitione versati sunt, quo demum tempore, & quo etiam in loco vixisse hic Macer videatur, barbaris productis vocabulis quibus vulgo hanc, vel illam appellari ait modo herbam, modo ægrotationem; sciscitetur.

Et Daunius quidem in scripta ad Reinesium Epistola (d) *quando*, inquit, *Pseudomacer hic vixerit*, doceat Catalogus Sigeberti Gemblacensis. Ego vero (nisi forte iste Catalogus alius est a libello de *Illustribus Viris*, quod hujus ipsius libelli caput 171. haud facile credere me finit) nequaquam video qua ratione docere id possit. Caput enim 13. in quo nihil nisi hoc legimus: *Macer scripsit metrico stilo de viribus herbarum*, cum subjiciatur capiti duodecimo quod est de *Epiphanio Scholastico*, præponatur autem quartodecimo quod

est de *Paulino Nolano*, quostamen; contra, hunc (e) quidem A. 420, illum (f) vero circa A. 570, vel saltem 540. claruisse, accepimus; certe nihil magis ostendit, quam vere animadversum esse a Vossio (g), *temporum seriem sapius ab Sigeberto neglectam esse in ordine quo Scriptores suos collocat*. Itaque si quid hac in re docet ille Catalogus, id unum docet quod paulo post indicabo. Porro Olaus Borrichius (h) post editam illam Daunii Epistolam, & post annum scribens 1675; hunc, inquit, *Macrum ante V. sæcula vixisse, existimant*. Quod ego temporis intervallum multo facilius augendum, quam minuendum esse puto ex quo hæc apud Vossium (i) legi: *Hunc Macrum variis in locis sequi amat Schola Salernitana: imo quandoque integros ex eo versus exscribit: uti ex iis videre est quæ utrique prodita de absinthio, hyssopo, & aliis*. Equidem in ejus Scholæ opusculo peculiare de absinthio caput non invenio; re tamen vera non modo eadem hemistichia, integrosque adeo, & plures quidem sæpe versus in iis capitibus reperio quæ utroque in libello inscripta sunt de Hyssopo, Malva, Ruta, Violis, Urtica, Enula, Nasturtio, verum insuper in his quæ de Cepis, Cerefolio, Pulégio, Chelidonia, Porro inscribuntur, ne unum quidem versiculum ab Salernitana Schola editum video qui totidem fere verbis apud hunc Macrum non legatur; ut mirum sit, nihil de re hac apud eos quos habeo, sive Macri Enarratores Atrocianum, atque Pictorium (nam Cornarium non vidi, multoque minus quos Daunius (k), & Reinesius (l) memorant, Simonem de Loviz, & Guillelmum Gueroaldum) sive Salernitanum opusculi Interpretes Arnoldum Villanovanum, Joannem Curionem, Jacobum Crellium, nihil, inquam, de re hac; quod meminerim; me legisse. At vero Zacharias Sylvius, in cujus denique ejusdem opusculi editione animadversum id vidi (m), præclare docet (n), *Joannem de Mediolano* istud ipsum opusculum, nomine atque auctoritate omnium Salernitanæ Scholæ Magistrorum ornatum, comprobatumque, non ante undecimi sæculi postremos annos scripsisse. Veri autem similis esse, intelliges, hunc ex Macro, quam ex hoc Macrum mutuatum esse quidquam, si utriusque libellum, eaque potissimum quæ primo nominavimus, capita inter se comparaveris. Quod si illud præterea animadverteris, Macri librum in Sigeberti Catalogo non modo haud longe ab initio, sed & iis tantummodo quæ paulo ante exscripta sunt, verbis; non ut recentiorum decebat; fuisse memoratum; Sigebertum autem, quod ejus Chronicon (o) indicat, & qui huic additamenta adscripsit, confirmat, annis post undecimum sæculum sane paucis esse mortuum; multo proclivius tibi erit existimare, libellum Macri non modo ex opusculo quod eo sæculo exeunte scriptum est, quidquam accipere non potuisse, sed facile ante idem sæculum undecimum prodiisse. Quæ cum ita sint, cumque hic Macri liber ob ea quæ de Zedoaria, & Galanga, præsertim autem de Strabo qui nono sæculo jam medio decesserat, ea quam proposuimus, ratione memorato, supra a nobis dicta sunt, ante finem sæculi ejusdem noni facile scribi non potuerit; relinquatur sane ut decimo fere sæculo conscriptus esse videatur. Cæterum ejusne Scriptori nomen *Macro Florido*, ut Gueroaldus (p) indicat, an potius fuerit *Odoni*, ut se in codice quodam antiquissimo vidisse, testatur Gaudentius Merula (q), quem sequuntur Paulus Colomesius (r), & Janus Broukhufius (s),

an ve-

(o) loc. cit. (p) Animadvers. l. 6. c. 1. (q) Ibid.  
(r) Vid. apud Linden. de Script. Medic. in Append. ubi de Gynæcior. libris editis Argentor. 1597.  
(s) in Scribonium pag. 11. (t) Dissert. 6. de libris legend. (u) Vid. ubi de Pipere, de Galanga, de Zedoar.  
(x) Hypercritic. c. 5. (y) De Poet. Lat. c. 2. (z) in Tibull. l. 2. El. 6. vers. 1. (a) loc. cit.  
(b) Epist. cit. ad Lect. (c) Institut. Orat. lib. 10. c. 1. (d) quæ 4. est inter Reinesii Epist. ad Daunium.  
(e) Vid. Trihem. de Scriptorib. Eccles. c. 117. (f) Confer quæ ibi de hoc Epiphanio habet Sigebertus cum iis  
quæ de eod. scribebat Divin. Lect. c. 17. Cassiodorus, & quidem senex ut in Præf. prope fin.  
(g) Vid. apud Blount Censur. Celebr. Authorum ubi de Sigeberto ex Baillet. (h) De Poet. Lat. Diff. 2. n. 75.  
(i) De Poet. Lat. c. 2. (k) in Epistola ad Reinesii. quæ 9. est inter Reinesii Epist. ad Daunium.  
(l) Epist. 8. ad Daunium. (m) Vid. ad cap. 58. & in marg. cap. 51. & seq. (n) Ibid. in Præfationis cap. 3.  
(o) ad A. 1113. (p) Vid. Daunii Epist. cit. quæ 9. est &c. (q) De Gallor. Cisalpin. Antiquit. lib. 1. c. 11.  
(r) Opuscul. Kεμειλ, literar. c. 6. & Animadversion. in Gyraldi Dialog. 4. de Poetar. Historia.  
(s) in Tibull. l. 2. El. 6. vers. 1.



an vero *Odobono* ; quemadmodum is qui paucis , ut solet , verbis plura de Macro collecta habet , indicavit Fabricius ( *t* ) , alii viderint . Mihi certe ; ut in viam aliquando e diverticulo redeam multo quam initio putabam , longiore , quanquam quod tibi satisfaciendi causa facio , nimium mihi videtur nunquam ; quicumque tandem Auctor hic fuerit , & quacunque ætate scripserit ; non is certe fuisse , neque eo videtur scripsisse tempore , ut ejus unius auctoritatem opponere deceat Asulano , qui Serenum in celebri Mithridatis Antidoto describenda edidit tres , non duas , caricas memorantem .

Itaque scire licet , Plinium quoque Valerianum ( *u* ) hæc habere : *Rutam venenis resistere , - docuit & Rex Ponticus Mithridates , qui cum fratris sui timeret insidias , rutæ folia viginti cum duabus nucibus juglandibus , & totidem caricis , admixto salis grano , quotidie jejunos acceperit .* Sed & alio in loco ( *x* ) scripserat : *Pompejus Magnus , Mithridate devicto , in scrinio ejus invenit ipsius manu scriptam compositionem , qua ipse præsumpta adversus omnia veneficia in totum diem tutum se incolumemque præstabat , in qua nuces juglandes duæ , ficus sicca duæ , rutæ folia viginti , salis granum unum , in unum contunduntur , & devorantur a jejuno .* Verum præstat antiquioris Plinii ( *y* ) verba describere , ad quæ videtur ipse Samonicus in eo de quo agimus , loco respexisse : *In sanctuariis Mithridatis maximi regis devicti , Cn. Pompejus invenit in peculiari commentario ipsius manu compositionem antidoti , e duabus nucibus siccis , item ficis totidem , & rutæ foliis viginti simul tritis , addito salis grano : & qui hoc jejunos sumat , nullum venenum nociturum illo die .* Et sane in cæteris quos inspexi , Sereni exemplaribus pro terno cum corpore ficus , scriptum est , totidem cum corpore ficus : quam scripturam aliquis forte in eo minus probet quod præter totidem ficus , quod satis erat dixisse , illud quoque addat cum corpore , quod videtur redundare , atque adeo suspicetur , sic potius esse legendum : *geminum cum corpore ficus* ; sed quid faciamus ? illam ipsam scripturam in optimis etiam libris vidit Keuchenius . Ne nimius sim ; unum , haud amplius , in Asulani libro notabo . In capite enim de ventre molliendo sic illi quatuor pene ultimi versus eduntur :

*Quodque satis melius verbis dicemus Horati .  
„ Mitulus , & viles pellent obstantia conchæ :  
„ Sed cochleas prius urtica , aut fursure pasci  
„ Purior hinc gustus noxa sine moverit alvum :*

At vero in tertio versu post prius , voculam est , quam in cæteris libris vidi , melior tum carminis , tum sententiæ postulat ratio . Eidem autem , atque illi etiam qui consequitur , versui non video cur geminos istos semicirculos ad dextrum marginem , quasi & ii Horatii essent , apposuerit Asulanus . Sed illud contra & video , & probo , cur in vero Horatii versu ex optimorum hujus Poetæ exemplarium auctoritate ( quorum quatuor indicat Cruquius ( *z* ) , eandem sequens cum Vetere Horatii Interprete ( *a* ) , Lambino ( *b* ) , Chabotio ( *c* ) , aliisque ) scripserit *Mitulus* , quo in loco Cæsarius , Constantinus , Stephanus atque alii præterea , habent *Mugilis* .

Neque vero hic unus est Samonici locus qui melius in Asulani quam in aliorum scriptis sit libris . Nam in cap. de podagra depellenda , ubi Cæsarius sine ulla dubitatione scribit :

*Sunt quibus apposita siccatur hirundine sanguis ,*  
Constantino , Stephano , aliisque nonnullis vix in libri ora alteram , quæ vera est , scripturam adnotantibus , Asulanus certe , quem hic postea imitatus est Humelbergius , & laudavit Keuchenius , scripsit *hirundine* : quod quidem verbum & sententia postulat , & Plinius ( *d* ) quem subinde Auctor sequitur , satis indicat , cum , *hirudines* , inquit , *multi podagris quoque admittendas censuere* . Sic & in cap. de serpentium morsibus &c. scribit Cæsarius :

*Quem nocuit serpens , fertur caput illius apte  
Vulneribus jungi , sanat quem sauciat ipsa .  
Morgagni Opusc.*

*Utque Sarissæa curatus Telephus hasta :*

*Proderit & caulem cum vino haurire sabuci .*

Atque illud quidem verbum *Sarissæa* Constantinus ; Stephanus , & Keuchenius esse corruptum , senserunt ; scripserunt tamen , *Utque Larissæa* , quasi vero aut alia antecessisset similitudo , aut cum insequentem versu hic esset jungendus , aut denique id pati in istiusmodi carminum genere natura syllabarum posset . Asulanus autem , quem merito postea hic descripsit Humelbergius , optime scripserat : *Ut Larissæa* . Sed cum alia plurima afferri possent , hæc ad diligentiam Asulani demonstrandam satis sit attulisse .

Nunc de Joanne Cæsario verba faciam , si prius tamen ostendero , cur ante hunc de Asulano verba fecerim . Me quidem non fugit , Epistolam quam Cæsarius editis ab se Celso , & Sereno præposuit , datam esse pridie Calendas Aprilis A. 1527. , videlicet anno ante quam eosdem illos Auctores edidisset Asulanus , cujus nimirum editio Mense Martio A. 1528. absoluta est . Attamen cum prima Cæsarii editio hunc ipsum , non priorem illum annum præ se ferat ; non potui hanc illis accensere quæ ante Asulani editionem habitæ sunt , quarum duas , & ambas quidem Venetas , memorat Eruditissimus Vir Jo. Alb. Fabricius ( *e* ) , alteram A. 1488 , alteram 1502 . Sed & causa insuper accessit , cur Asulanum Cæsario hic antepone maluerim . Cum enim & idem Fabricius ( *f* ) , & Almeloveenius ( *g* ) , & qui ante utrumque scripsit , Lindenius ( *h* ) , & qui hunc emendavit , Mercklinus primam quæ apud Aldum habitæ est , Celsi editionem , & eam quidem ex emendatione Bapt. Egnatii , Anno statuant 1524. *Venetiis in folio* ; Epistola autem Egnatii emendato ab se Celso præfixa , Serenum quoque , ut initio diximus , una cum Celso esse editum ab Asulano , hoc est apud Aldum , sive in *Ædibus Aldi* , clarissime ostendat ; alterutrum sane fateamur , necesse est , vel Asulanum esse Cæsario præponendum , vel Doctissimos illos Viros pro ea quam scripserunt , alteram quam omiserunt , Celsi editionem , & hanc quidem Anno 1524. *Venetiis in folio* habitam , videlicet apud *Lucam Ant. Juntam* , omnino scribere voluisse . Ego sane , ut verum loquar , habitam isto anno apud Aldum , non modo in hac litteratissima Civitate reperire ipse non potui , sed neque Venetiis potuit Medicus suo magno merito in primis Clarus Petrus Ant. Michelottus , neque Bononiæ Zanottus meus Philosophiæ Professor Elegantissimus , neque Florentiæ cum jampridem , Humanissimus Juvenis , optimis studiis atque artibus instructus G. Josephus Georgius , tum vero etiam nuper Eruditissimus Vir , idemque Consultissimus Medicus Antonius Franc. Bertinus , neque Romæ Cælestinus Gallianus Abbas , & Professor virtute , doctrinaque Ornatissimus , neque Neapoli per Amicos Jo. Bapt. Verna Eques Præclarissimus , singulari in Medicina & facienda , & ornanda studio , usu , diligentia , neque Mediolani Vir Præstantissimus , & in Re tum Medica , tum Historica apprime versatus Bartholomæus Curtius , neque demum Augustæ Taurinorum Jacobus Cicogninus illa in Aula Medicus , & Consiliarius Spectatissimus . Quid ? quod Eximium Par Zenorum Fratrum , D. Petrus Catharinus C. R. S. ; & Apostolus CAROLI VI. Invictissimi Cæsaris Historicus , ac Poeta , Viri cum omni litterarum genere præditi , tum in perraris librorum editionibus , & Manutiorum imprimis , pernoscendis exercitatissimi , hanc sibi unquam notam fuisse , mihi per litteras querenti , sine ulla dubitatione pariter negarunt . Sed & sibi cognitam negarunt illam quoque alteram Celsi editionem quam , inter cæteros Antiquos Medicos , Aldi Filii habuisse scribuntur A. 1549 , cum eam tamen quam hi biennio ante habuerant , æque mecum facile agnoscant : & tu præterea , mi Vulpi , in ea qua uteris , ejusdem Auctoris Anno 1657 , Anno , inquam , 1657. ab Lindenio procurata , Samonicum nostrum deesse , vides . Quid ergo est ? Num qui secus statuunt , aliquid humani , in tam difficile præfertim , immensoque Opere passos esse , existimabimus ?

O

Quid

( *t* ) *Bibl. Lat. l. 4. c. 12.* ( *u* ) *De Re Med. l. 4. c. 3.* ( *x* ) *lib. 3. c. 33.* ( *y* ) *Natural. Hist. l. 23. c. 8.*  
( *z* ) *Comment. in Horat. Satyr. l. 2. Satyr. 4. vers. 28.* ( *a* ) , ( *b* ) , ( *c* ) *In Horatium ad eund. vers.*  
( *d* ) *Natur. Hist. l. 32. c. 10.* ( *e* ) *Bibl. Lat. lib. 3. c. 5.* & *in Supplem. ad idem caput.* ( *f* ) *l. 2. c. 4.*  
( *g* ) *in Indice Editionum Celsi , suæ Celsi editioni addito.* ( *h* ) *De Scriptis Medic.*



Quid vero, si forte illi in manibus habuissent, vel etiam haberent quæ nos invenire non possumus? Ego sane adhuc malui iudicium sustinere. Itaque in præsentia, non me quidem, sed ipsis, quemadmodum ostendi, auctoribus, Asulano postpositum habes Cæsarium.

Qui si revera post Asulanum suam in edendo Samonico operam posuit; multo magis mirandum est, pluribus ipsum in locis, etiam ubi Asulanus egregie se gesserat, esse lapsum: quod cum ex his quæ hætenus dicta sunt, intelligitur, tum magis ex iis quæ sequuntur, intelligitur. Sed & præter ea quæ cum Asulano omisisse, aut certe non agnovisse, supra diximus, alia insuper sine ulla admonitione omisit, ut in cap. de *hydropisi* versus quatuor, videlicet *Appositum* &c. *Qui subito* &c. *Aut huius* &c. cum eo qui proxime consequitur. Neque tamen non plura habet digna profecto quæ laudentur. Sed nos singula dumtaxat genera attingemus. Initium capitis de *uva faucibus* &c. sic edidit Asulanus:

*Ægrescunt teneræ fauces, cum frigoris atri  
Vis subiit: vel cum ventis agitabilis aer  
Vertitur: atque ipsas flatus gravis inficit undas.*

Quid ad fauces, si ventus gravis inficit undas? Cæsarius igitur pro *undas, undis* proposuit: quem Humelbergius quadantenus secutus, scripsit *unda*, atque ita rem explicavit, ut primum a Poeta diceret indicari noxas quæ faucibus ab aquilonari aeris constitutione afferuntur, mox vero quæ ab austrina, ejusque verba ad hunc modum esse interpretanda: „*Ipsas*.“) „*Scilicet fauces & partes vicinas*. *Flatus*.“) *Ventus*, „addere poterat *gravis*, & interpretari *austrius*, quando ab Horatio (i) *plumbeus auster* est dictus, „*Inficit unda*.“) Hoc est, humiditate afficit, & humectat, „Mihi vero longe simplicior interpretatio huc videtur posse convenire, videlicet ut significari intelligamus nocentem faucibus vim primum frigidioris aeris, deinde vero ejusdem in quoslibet vehementiores, & propterea noxios ventos compulsi, ut *flatus gravis* sit ipse vehemens, & noxius ventus qui fauces afficiat, lædatque suis *undis*, hoc est crebris, undarum in modum, percussionibus ac pulsibus, sive, ut Lucretius (k) loquitur, *impetibus crebris*, qui & ventos eodem in loco (l) cum fluminibus comparavit, atque alibi (m), *aeris magnum mare*, imo diserte (n) *aerias undas* dixit: quæ hic eo memoro, ne forte alicui mirum sit quod Poeta noster aeri undas tribuerit, quas Virgilius cæteroqui haud obscure & (o) fumo, & facile (p) Cytoro quoque monti tribuit, cum utrumque *undantem* dixit, quin diserte, salutantium turbæ, cum (q) *salutantium undam* scripsit, atque adeo M. etiam Tullius ipsis comitiis, cum (r), *illæ*, inquit, *undæ comitiorum*, ut *mare profundum*, & *immensum*, sic effervescent quodam quasi æstu, ut ad alios accedant, ab aliis autem recedant. Quid multis opus est? cum vel Medicorum Scriptorum vetustissimus, idemque gravissimus Hippocrates (s) jam olim Sereno præverit, non minus diserte, quam vere docens, *ventum aeris fluctum*, & *undam existere*. Non ignoro, in libris Constantini, & Stephani pro *undas*, quod perperam habent, & pro *Vertitur*, substitui in ora *auras*, & *Verritur*, atque hanc scripturam ut repertam in libris chirographis, laudare Keuchenium. Veruntamen hanc, & Cæsarii scripturam a doctis, & intelligentibus Viris tum inter se, tum pluribus cum libris antiquissimis conferri velim: utram maluerint, & ego probabo. Illud interea ignorare te, nolo, cum hæc, atque adeo totam epistolam scripsissem, in eo Sereni exemplari quod Venetiis A. 1488. supra diximus, esse vulgatum, omnium quæ descripta sunt typis, facile primo, cujus mihi nec opinanti copia a Cajetano Fratre tuo Viro humanissimo, eruditissimoque facta est, me eandem quam

Cæsarius repræsentavit; hujus loci scripturam invenisse. Quod si quemadmodum pro *undas, undis*, ita etiam pro *inficit, afficit*, aut *impetit* invenissem; nihil præterea esset quod de proposita a me interpretatione dubitarem. Cæterum illud quoque in Cæsarii libro dignum est laude quod notulæ hic illic adjectæ sint, quarum cæte aliquæ & optimæ sunt, & illustrandis subobscuris Poetæ locis admodum utiles. Præterea Vita Samonici addita est, brevissima illa quidem, sed quam tamen postea & Constantinus, & Stephanus suo quisque libro adjunxerunt. In hac quid desideretur; quoniam Humelbergius quidquid in ipsa scriptum est, in Epistolam transtulit quam Sereno a se Commentariis ornato præfixit; idcirco quando temporis ordo postulat, ut de Humelbergio ipso jam dicam, protinus indicabo.

Igitur Humelbergius, & ii quos modo laudabam, Doctissimi Viri non dubitant, Q. hunc nostrum Serenum Samonicum illum eruditissimum fuisse Scriptorem quem libro Saturnal. III. (t) (addere poterant & II. (u)) laudat Macrobius, & de quo hæc habet Spartianus in Caracallo: *Cædes deinde in omnibus locis, & in balneis facta: occisique nonnulli etiam cœnantes, inter quos etiam Sammonicus Serenus, cujus libri plurimi ad doctrinam extant*. Neque tamen cum hoc ponant, illud vident in controversiam vocari posse quod pariter affirmant, eundem Gordiani Junioris, hoc est Secundi præceptorem fuisse, de quo hæc scribit non Ælius quidem Spartianus, ut Humelbergius putat, sed Julius Capitolinus (x): *Sereno Sammonico, qui patri ejus amicissimus, sibi autem præceptor fuit, nimis acceptus, & charus usque adeo ut omnes libros Sereni Sammonici patris sui, qui censebantur ad LX. & duo millia, Gordiano minori moriens ille relinqueret: quod eum ad cælum tulit. Siquidem tantæ bibliothecæ copia & splendore donatus, in famam hominum, literarum decore pervenit*. Quibus ex verbis ut constat, duos fuisse Serenos Samonicos, Patrem videlicet, ac Filium, quorum hic Gordiani Secundi præceptor fuit; ita illud dubium relinquitur, fueritne hic idem ac Scriptor Caracallæ jussu interfectus. Siquidem quin esse potuerit, ætas quidem Secundi Gordiani non repugnat, quem tunc annis plus viginti fuisse natum, ex historiarum monumentis subducta ratione haud difficile est demonstrare. At tanta illa Bibliotheca, eruditissimo Scriptori conveniens, quæ ejus quidem patris fuisse dicitur, & quam ab homine inter cœnam repente occiso cuipiam nominatim relictam esse, ita verisimile non est, hæc vero an repugnent, est etiam atque etiam considerandum. Utcunque id est (nam quid ego de Samonico nostro suspicer, infra ostendam) certe If. Casaubonus (y), Ger. Jo. Vossius (z), Jo. Jacobus Hofmannus (a), Rob. Keuchenius (b), Ludov. Morerius (c), & Jo. Albertus Fabricius (d) non modo Samonicos; quod L. Greg. Gyrardus (e), Wolfg. Justus (f), Conr. Gesnerus (g), Ant. Riccobonus (h), Hermannus Conringius (i) non fecere; duos proponunt; sed Filium præceptorem Gordiani, Patrem autem ut cæterorum quæ deperdita sunt, Operum, ita hujus etiam Poematis auctorem fuisse, existimant. Keuchenius insuper (k) eos arguit qui Serenum Samonicum a Caracalla interemptum ab Sereno illo non distinguunt quem inter Poetas Lyricos haud obscure posuit D. Hieronymus (l), cum de Davide hæc scripsit: *David Simo- nides noster, Pindarus, & Alcæus, Flaccus quoque, Catullus, & Serenus, Christum lyra personat*. Et vero non facile essent hallucinati, si quomodo Servius in Commentariis utrumque laudans, illum atque hunc aliter appellaverit, animadvertissent; nam illum quidem *Samonicum* (m), aut *Serenum Samonicum* (n), hunc vero *Serenum* (o), aut *Serenum Lyricum* (p), vocasse, video, Verum id non

(i) Satyr. l. 2. Sat. 6. vers. 18. (k) De Rer. Nat. l. 1. vers. 294. (l) vers. 281. (m) l. 5. v. 277.  
(n) l. 2. v. 151. (o) Æneid. l. 2. v. 609. (p) Georgic. l. 2. v. 437. in quem Vid. Servii Comment. & Not. Farnab.  
(q) Ibid. vers. 462. (r) Pro Planc. (s) De Flatib. num. 5. Vid. Edit. Marinell. (t) cap. 9. (u) c. 12. 13.  
(x) in Gordianis. (y) Not. in Capitolini Gordianum Junior.  
(z) De Historic. Lat. l. 2. c. 2. De Poet. Lat. c. 4. De Philosophia c. 12. (a) Lexic. Univers.  
(b) Prolegom. ad Samon. (c) Dictionaire Historique. (d) Biblioth. Lat. lib. 3. c. 5.  
(e) De Poetar. Historia Dial. 4. (f) Chronol. Medic. apud Linden. de Script. Medic. (g) Biblioth. Epizom.  
(h) In Fragm. Vet. Historic. auct. ubi Samonici Vita; Vid. apud Voss. de Historic. Lat. loc. cit. & Fabric. Bibl. Lat. loc. cit.  
(i) Introd. in Art. Medic. c. 3. n. 17. (k) In Prolegom. citat.  
(l) In Epist. ad Paulinum quæ prima est in Tom. 3. Edit. A. 1565. (m) Comment. in Virg. Georg. l. 1. vers. 30.  
(n) Ibid. ad v. 102. 103. (o) Comm. in Æneid. l. 4. v. 291, l. 9. v. 762, l. 12. v. 923, &c. (p) Ibid. l. 2. v. 15.



non vidisse Humelbergium, mirandum non est, quando ne eos ( q ) quidem satis perspexisse invenio, qui Auctorum quos Servius in Commentariis laudat, Indicem concinnarunt. Cæterum Humelbergius cum eundem illum Serenum Samonicum hunc Serenum pariter esse, putat, cujus opuscula citant pluribus in locis multi, ceu Nonius Marcellus, Martianus Capella ( r ), & alii, videlicet præter Servium, Fortunatianus ( s ), Diomedes ( t ), atque is quem Humelbergius ipse diserte nominat, Terentianus ( u ); cum id, inquam, putat; certe aut eundem, aut ei persimilem errorem errat. Aut enim Septimium Afrum, & Lyricum hunc Serenum unum eundemque Poetam esse ( qua de re mox dicam ) suspicari possumus, aut secus. Si eundem; nempe error quoque idem est. Si alterum; errorem posse etiam esse non absimilem, ex eo intelligitur Sidonii loco ( \* ), quem Doctissimus Fabricius ( x ) semel, atque iterum indicavit: *noverint, - sententiam meam - sine M. Varrone, sine Sereno, non Septimio, sed Sammonico, - non posse damnari*. Et si enim me non fugit, hunc locum ita editum esse a Pio, vel certe ab Henrico Petro ( y ) : - *sine Sereno, sine Septimi, sine Sammonico* - ; video tamen, & Petrum Colvium ( z ), & Joannem Savaronem ( a ) priorem illam scripturam postea probasse, imo omnes Colvii libros eandem habuisse: quam Sirmondus ( b ) quoque secutus est. Porro ut Joannes Savaro ( c ), Septimium istum Serenum, Septimium Afrum esse, non dubitat; quem Terentianus ( d ) laudat non uno loco, præsertim vero his versibus:

*Dulcia Septimius qui scripsit opuscula nuper,*  
&

*Septimius docuit quo ruris opuscula libro;*  
sic interdum suspicatum esse me, fateor, Serenum illum cujus verba producit Nonius ( e ), esse fortasse eundem posse propterea quod illa nonnunquam ( f ) ex Sereni ruralibus, alias ( g ), ex Sereni opusculis proferre se, dicit. Illud accedebat quod etsi Crinitus ( h ) singulas singulorum Vitas conscripsit; persimilia tamen de utroque prodidit. Hinc enim Aulum Serenum de veterum Grammaticorum sententia inter Lyricos referri; inde Septimium Afrum vel propter eos versus in Jani laudem, quos Terentianus ( i ) produxit, imitatum esse Callimachum, scripsit, qui videlicet Poëta Lyrici munus suscepit in hymnis Deorum: hinc rursus Aulum Serenum Poëmata scripsisse vario, & multiplici carmine; inde Septimium Afrum vario, ac multiplici genere carminum usum esse. Neque prænomen adversabatur, cum inter vetera Epigrammata ( k ), & Poëmata ( l ) nonnulla A. Septimio Sereno tribui, non ignorarem. Sed ne hæc nos a proposito res abducat; eam, Crinito, & cæteris adstipulantes, missam faciamus, ut illud pariter quod a L. Gregorio Gyrardo ( m ) scriptum est, qui cum præter Lyricum istum A. Serenum, ac Samonicum Serenum, Q. insuper Serenum agnosceret, hunc ipsum Q. Serenum ( non Samonicum Serenum ) hujus de Medicina Poëmatum statuebat Auctorem: qua in re qui Gyrardum sequatur, invenio neminem.

Igitur; ut de Poëmate ipso verba faciamus; in hoc edendo Humelbergius non modo cum Asulano ea transposuit, atque omisit de quibus supra dictum est; sed præterea in cap. de rejectione cibi &c. versus sine ullo monito prætermisit duos: *Ovorum cinis &c.* cum eo qui proxime consequitur, & totidem in cap. de quartana typo, videlicet *Aut facilem &c.*, ac insequentem. Sed & in scriptura quam sequeretur, eligenda ita est aliquando hallucinatus, ut in cap. de ictibus scorpionis &c. adversus cunctos morsus parvorum animalium, inter quæ araneos & ipse enumerat, hæc ediderit: *Morgagni Opusc.*

*Exiguo piperis cerebrum conspergito melis,*  
*Quo lita sanescunt depulso membra dolore;*  
cum tamen non modo ante ipsum & Asulanus, & Cæsarius non melis, sed galli scripserunt, a qua scriptura ne unus quidem; quantum ego vidi; recessit eorum qui postea Serenum vulgarunt; verum & Plinius ( n ), quem nimirum Auctorem cum alibi non obscure, tum multo hic apertius descripsit Samonicus, idem indicaret, nec; quod magis mirandum est; hoc ipse ignoraret Humelbergius, ut qui Plinii verba profert in commentario ad hunc locum suo: *Contra omnium ( araneorum ) morsus remedium est gallinaceum cerebrum cum piperis exiguo potum in posca*.

Melius tamen multis in locis se gessit. Illi enim capiti cujus inscriptionem Asulanus sic edidit: *Felli vomitu, vel phthisi arcendis*, Cæsarius autem, quem cæteri quos vidi, sequuntur, sic: *Felli, vomitui, vel phthisi arcendis*; ita hanc ille emendatam præposuit: *Fellis vomitui, & phthisi arcendis*, & recte quidem; neque enim ibi vomitum, nisi uno in versiculo, Serenus imperat, quod Asulanus non attendit, neque vomitum quemcunque curandum suscipit, quod cæteros attendisse oportebat; sed bilis redundantiam, sæpius, ut notum est, ventriculum afficientem & ad vomendum concitantem, tum dejectoriis, tum vomitoriis etiam medicamentis tollere in animo habet. Cum hac autem Humelbergii inscriptione congruere animadverti antiquum Keuchenii librum, in quo primus hujus capitis versus satis bene, ut mihi quidem videtur, ita erat scriptus:

*Lutea si crescunt, & fundis noxia fella;*  
cum omnia quæ inspexi, formis descripta exemplaria pro fundis habeant cunctis: quam communem scripturam ipse etiam probat Keuchenius, quam bene, si judicent qui & ea perpenderit quæ modo exposuimus, & Poëtam in superioris capitis fine, in hujusque initio conversa ad Lectorem oratione hunc ipsum alloqui, animadverterint. Tres etiam capitis de carbone postremos versus ita scriptos dederat Cæsarius, quem deinde omnes quos ego vidi, secuti sunt:

*Allia vel piperi parce commista linuntur*  
*Pythagoræ cognata levi condita cumino.*  
*Proderit & madida fermentum polline turgens.*  
Equidem Asulanus qui distinctionis notam, non post cumino posuerat, sed post Proderit, facile hunc locum omni ex parte restituisset, si inter primum quoque, atque alterum versum distinctionis notam statuisset. Id autem ab Humelbergio, & jure quidem; si quid ego judico; factum est. Nam qui utrumque versum conjungunt, Allia Pythagoræ cognata intelligant, necesse est, quod ultro confitetur Cæsarius, hac adscripta notula: *cognata, id est, familiaria in cibo. Vide Laërtium in Vita Pythagoræ*. Sed hi non videntur animadvertisse, Horatium ad quem hic respicit Poëta, cum facete scripsit ( o ):

*O quando faba Pythagoræ cognata, -*  
id, veteri ejus Interprete ( p ) confirmante, cui Chaobotius ( q ), alique Enarratores, quotquot memini consuluisset, assentiuntur, id, inquam, propterea dixisse quod Pythagoras; ut Bondii ( r ), atque adeo Lambini ( s ) verbis utar, *a faba abstinuit, quasi sibi cum ea cognatio aliqua esset, veritus ne in fabam aliquam animus paternus immigrasset*. Non me latet, Aristotelem ( t ), M. Tullium ( u ), Plinium ( x ), Laërtium ( y ); ut propiores nobis Scriptores ( z ) omittam; alias etiam causas istius Pythagoræ consuetudinis attulisse, imo a Gellio ( a ) contraria Aristoxeni verba producit tradentis, nullo sapius legumento Pythagoram esse usum, quam fabis, quo-

O 2

( q ) Vid. in Edit. Virgil. A. 1646. apud Abr. Commelinum hunc Indicem in Serenus Sammonicus.  
( r ) De Nupt. Philolog. & Mercur. l. 5. ubi de Elocutione. ( s ) Vid. apud Gyrard. Dial. cit. & Voss. de Poet. Lat. c. 8.  
( t ) De Oratore l. 3. ( u ) De Literis &c. & Meris. ( v ) In Epist. ad Polem. Carm. 13. subiecta.  
( x ) Bibl. Lat. loc. cit. & Suppl. ad eund. locum. ( y ) Vid. Edit. Basil. A. 1542.  
( z ) Vid. Edit. Paris. A. 1598. & Not. ad hunc locum.  
( a ) Vid. hujus Edit. 2. Parisiensem A. 1609, & Comment. ad hunc locum. ( b ) Vid. hujus Editionem 2. Sidonii A. 1652.  
( c ) Vid. eund. loc. cit. tum Comment. ad Carm. 9. Sidonii. ( d ) in cit. Opere. ( e ) de Propriet. Sermon.  
( f ) ubi de Indifer. Generib. ad vocem Mercatus. ( g ) Ibid. ad vocem Labium, & ubi de Contrar. Gener. ad vocem Vagas.  
( h ) De Poet. Lat. c. 78. 82. ( i ) in Opere cit. ( k ) ( l ) Vid. Fabricii Bibl. Lat. l. 4. c. 1.  
( m ) De Poetar. Historia Dial. 4. ( n ) Natur. Hist. l. 29. c. 4. ( o ) Satyr. l. 2. Sat. 6. vers. 63.  
( p ) ( q ) ( r ) ( s ) In Horat. ad eund. vers. ( t ) Lib. de Fabis apud Laert. de Vita Philosoph. l. 8. in Pythagora.  
( u ) De Divin. l. 1. ( x ) Natur. Hist. l. 18. c. 12. ( y ) loc. cit. ( z ) Windet. de vita sanct. st. ( a ) Noët. Artic. l. 4. c. 11.



quoniam is cibus & subduceret sensim album, & lavigaret. Attamen aut hæc non efficiunt; ut certe non efficiunt; quominus Horatio Poetarum more liberum fuerit eorum potius sententiam sequi ( quorum etiam ab eodem Plinio ( b ) est facta mentio ) qui a Pythagora damnatam fabam tradiderunt, quoniam mortuorum animæ sint in ea; atque ita a Cæsario contra atque adnotavit, & ab reliquis ostendendum est, aliis quoque ipsis Pythagoram, & quidem ob eandem causam, abstinuisset: quo de cibo in tota ejus Vita nihil quidquam habet Laërtius. Aut si Horatio magis placuisse, dicerent, ut sequeretur Aristoxenum, & propterea fabam Pythagoræ cognatam dixisse, quod ea plurimum vesceretur; quanquam hæc inelegans esset, ut verum fatear, & ab Horatii urbanitate abhorrens ejus verborum interpretatio; meam tamen, atque adeo Humelbergii sententiam æque ac suam probabilem esse, non confiteri non possent, qui eos de quibus agitur, Sereni versus ita distinguimus:

*Allia vel piperi parce commixta linuntur.*

*Pythagoræ cognata levi condita cumino*

*Proderit, & madido fermentum polline turgens;*  
ut perinde sit Pythagoræ cognata dixisse, ac si dixisset: *Faba* proderit vel addiscutiendam, mitigandamve inflammationem, quæ Humelbergii interpretatio est, vel ad referenda, ut paulo ante Serenus ipse ait, *adoperta*: quid multa? ut idem sit ac illud quod scribit in cap. sequenti:

*Mollis odorato faba jungatur coriandro;*

*Proderit appositu, mollitque, aperitque tumorem;*  
Quod autem pro faba Serenus dixerit Pythagoræ cognata, minus ii mirabuntur qui ut fuerit Horatii studiosus, & quam libenter ejus verba in hunc suum librum transtulerit, animadvertent. Nam quod in cap. de jecoris, & lateris vitiis posuit;

*Si latus immeritum morbo tentatur acuto;*  
ex illo videlicet Horatii ( c ) est:

*Quod latus, aut renes morbo tententur acuto;*  
& quæ in cap. de hydropisi:

*Crescit hydrops. -*  
*Unguine quo frangit vires languoris aquosi,*

ex illis ( d )

*Crescit indulgens sibi dirus hydrops.*

*& aquosus albo*

*Corpore languor.*

In capite autem de ventre molliendo, præter id quod ultro, ut vidimus, confitetur, illud:

*Potibus & duris restricta morabitur alvus,*  
ex illo ( e ) est:

*si dura morabitur alvus;*

& denique quod in cap. de ischia &c.

*Ennius ipse pater, dum pocula siccant iniqua,*  
ex illis ( f ):

*Ennius ipse pater nunquam, nisi potus, ad arma*  
*Profiluuit dicenda.*

& ( g )

*Siccant inæquales calices:*

Quæ duò postrema, ut tertium quoque, ante me Keuchenius animadverterat. Sed ad Humelbergium redeamus, qui in eo pariter laudandus est, quod primum versum capitis de serpentium moribus cum Asulanus ita scripsisset:

*Cuspide non quisquam, longe neque cæde larissæ;*  
Cæsarius autem sic rescripsisset: *longæ neque cæde carissæ*; egregie ipse pro *carissæ* ( quod verbum qui sciat cum Vossio ( h ) quid Lucilio apud Festum ( i ), & quid in Philoxeni, & Isidori Glossis significet, nihil huc pertinere, sciet ) *larissæ* edidit. Sed multo etiam magis laudandus est, quod subobscurum sæpe Scriptorem Commentariis illustravit, quod ad rem medicam attinet, ut erat captus temporum illorum, sane eruditus, neque cætera indoctis, utinam haud raro non supervacaneis, aut minus prolixis; vel quando esse prolixa voluit, variantes potius scripturas ( quas, ut Asulanus, ac Cæsarius, omisit ) quam dilucidi etiam cujusque verbi interpretationem completentibus.

Ab utroque hoc vitio longissime refugit Rob. Constantinus, qui & variantes scripturas, & brevissimas ad plurimos locos notulas in ora editi ab se Samonici adscripsit. In harum tamen nonnullis Vir alioqui Doctissimus est hallucinatus, ut cum ad eos versus in cap. de vulneribus ferro &c.

*Si vero infrenus manat de vulnere sanguis,*

*Purpura torretur conchyli perlita fuco,*

*Hujus & atra cinis currentem detinet undam;*

cum, inquam, ad tria postrema verba versus postremi hæc adnotavit: *Hic affectus διαβρῖς de quo Celsus lib. 4. cap. 20. Perspicuum namque ex ipso primo versu est per currentem undam nihil hic aliud a Poëta significari quam quod paulo infra per nimios reserati vulneris amnes, præsertim cum ea continuo sequantur:*

*Verruca quoque desecta frenare cruorem*

*Dicitur ambustus tyrio de vellere pulvis.*

Nihil igitur ad hunc locum in quo de sanguinis profluvio agitur, urinæ pertinebat profluvium. Sed neque opus erat urinam in altera notula memorare, quam apposuit ad eum locum ex cap. de serpentium moribus;

*Carduus est nondum doctis fullonibus aptus,*

*Ex illo radix &c;*

Nam postquam illud egregie adnotavit: *Carduus fullonum; labrum veneris, διαβρῖς*; haud bene hæc subjecit: pro nondum doctis, leg. *nondum tactis*, nempe Podagra, Plin. lib. 28. cap. 6. *Virilis urina podagris medetur*, argumento fullonum, quos ideo tentari eo morbo negant; siquidem nondum haud cum doctis, sed cum aptus jungendum est, ut intelligamus, non perfecti, aut sicci, quali videlicet fullones utuntur, sed immaturi adhuc, & viridis illius cardui radicem esse adhibendam: quod & Humelbergius sine ulla dubitatione intellexit, & præterea cur fullones docti dicantur, exponere se satis posse, existimavit. Non erat igitur cur enarratione præsertim tam longe petita vulgatam scripturam Constantinus sollicitaret.

Sed multo illud gravius, quod in totius voluminis calce octo & septuaginta versus, quorum primus est:

*Quod natum Phæbus docuit, quod Chiron Achillem;*

postremus autem:

*Quotque hic sunt versus, tot agant tua tempora Janos;*

quod hos, inquam, versus cæteris Samonici adjungendos esse, indicavit; hanc enim ipsis inscriptionem præposuit: *Vindiciano attributum Carmen, videtur esse Sereni Peroratio, finisque Poematis*. Verum; ut alia prætermittam; duo certe in hoc Carmine decebat ipsum animadvertere quæ ipsius judicio vehementer repugnant. Alterum, Carmen hoc de libro esse in quo multo plura quam in Sereni Poëmate, & nominatim peregrina ac pretiosa, remedia copiose proponuntur;

*Denique reperies isthic quod lucis in ortu*

*Indus, Arabs, Syrus, Perses, divesque Sabæus*

*Vicino sub sole legunt, quod præbet Orontes,*

*Eximium ignoto mittit quod Nilus ab ortu,*

*Decerptum foliis, ramo, cute, cortice, virga,*

*Quodque ab Edymis ( leg. ab Idumæis ) vectum*

*Seplasia vendunt;*

*Et quicquid confert medicis Lalagea cataplas;*

cum contra Samonicus, qui; ut vere ait Turnebus ( k ), medicinam morborum parabilem versibus lepidis conscripsit, nihil libentius, aut sæpius facere videatur quam ut remedia proponat, sicut Plinius ( l ) loquitur, *parata vulgo, inventu facilia, & ex quibus vivimus*; atque adeo quæ quotidie pauperrimus quisque cernat: & judicium insuper hac de re, institutumque suum non uno in loco profiteatur, ut cap. de ventre molliendo:

*Multos præterea Medici componere succos*

*Consuerunt; pretiosa tamen cum veneris emptum;*

*Falleris, frustra que immensa nomismata fundes;*

& cap. de jecoris, & lateris vitiis:

*Quid referam multis composita Thilonia rebus?*

*Quid loquar antidotum variis? quis ista requirat?*

*At nos pauperibus præcepta feramus amica.*

Alte-

( b ) loc. cit. ( c ) Satyr. l. 2. Sat. 3. vers. 165. ( d ) Carm. l. 2. Od. 2. vers. 13. 15. 16. ( e ) Satyr. l. 2. Sat. 4. vers. 27. ( f ) Epist. l. 1. Epist. 19. vers. 7. ( g ) Sat. l. 2. Sat. 6. vers. 68. ( h ) Etymologic. Lingu. Lat. ad vocem Carilla. ( i ) De Verbor. Signific. l. 3. ( k ) Advers. lib. 17. c. 18. ( l ) Natur. Hist. lib. 24. c. 1.



Alterum quod, a Constantino animadversum esse oportebat, est, de vi carminum ad medendum quam dispar huic, atque illi Auctori sententia fuerit. Equidem non negaverim, vana haud raro, & risu excipienda remedia Serenum proposuisse, transversum videlicet actum ab ea quæ ejus temporibus invaluerat, credulitate ac superstitione, vel potius ne ignoravisse, aut omisisse videretur quæ tum maxime probabantur. Hoc etiam addam, me postquam ea legeram quæ ad plerasque abigendas febres de collo suspendenda esse, docuerat, olim esse suspicatum; num hanc forte damnationis ipsius causam prætendisset Caracalla, a quo videlicet damnatos esse & qui remedia quartanis, tertianisque collo annexa gestarent, Spartianus (m) docuit; quanquam hunc Historicum accuratius postea perlegenti, revera neque horum, illiusque damnationis tempora congruere, & tanquam Getæ fautor, Samonicus interemptus esse videatur. Attamen quid de vicarminum vere ipse censeret, satis in fine capitis de Quotidiana demonstravit;

Multaque præterea verborum monstra filebo;

Nam febrem vario depelli carmine posse,

Vana superstitio credit, tremulaque parentes.

Contra in iis versibus quos hujus ipsius Poëmatis perorationem esse, existimat Constantinus, quam fidenter, quam magnifice inania istiusmodi anilia remedia celebrantur!

Gramine seu malis agro præstare medelam,

Carmine seu potius: namque est res certa saluti

Carmen, ab occultis tribuens miracula verbis.

Quod si ex me quæras, cujusnam igitur Auctoris, & cujusnam libri sit ista peroratio; non Vindiciani, sed ejus ipsius in cujus Operis calce legitur, Marcelli esse, respondebo, a quo videlicet illi suo de Medicamentis libro instar clausulæ additam fuisse, eo minus dubito, quo magis ob multa vel pretiosa, vel superstitiosa remedia, magna in ipso cum laude proposita, eidem video convenire. Alii autem quod Vindiciani Comitum Archiattrorum Epistolam, a Marcello ante suum librum positam, continuo Marcelli ipsius liber cum poetica ista peroratione consequitur, hæc propterea fortasse Vindiciani esse, putaverint, cum tamen ex Marcelli Epistola ad Filios, loco Præfationis universo Operi præfixa, proclive esset cognoscere, & librum, & perorationem ipsam esse Marcelli, utpote qui apertissime hanc indicat, cum, *Versiculis*, inquit, *quoque lusimus migmatum & specierum digestionem compositis*. Non quod sit dignum aliquid in carmine, sed ut lectorem, scutatoremque hujus operis & poema pelliciat, & exoptatio blanda conciliet, quod opusculum in infima parte hujus codicis collocavi & ut sermone nostro opera hæc solertia nostra composita claudantur, & nugæ nostras multiplex foliorum celeret objectus. Hæc ideo pluribus verbis egi, quod animadverti, me hac de re non a Constantino solum dissentire, verum etiam a Viro nostræ ætatis eruditissimo, qui Carmen, inquit, *Sereni extrema parte truncum esse videtur, itaque pedibus eo in sententiam Roberti Constantini, qui versus in calce libri Marcelli Empirici de medicamentis, conjectura minime absurda, sed verisimillima habet pro peroratione poematis Sereniani*. Ego vero ut de eo lubens Doctissimo Viro assentior, quod aliquid facile in extrema præsertim parte hujus Poëmatis deesse videatur; non propterea tamen video, cur hoc versibus supplere debeamus quos Marcellus & suos esse, indicavit, & ita scripsit ut suo magis quam Sereni Operi convenient. Sane quæ duo ab eodem quoque Celeberrimo Viro ante ista verba sunt posita, alterum, *Sereni carmen Heroicum, præcepta de medicina parvo pretio parabili ad curandos præcipuos humani corporis morbos complecti*, alterum, quæ in his superstitiosa nonnulla ex more illius ætatis Serenus admisit, ita admisuisse, ut plura forte transcriberet, quam crederet; hæc, inquam, duo num duobus cum locis convenient quos supra ex ea Peroratione produxi, ipse omnium optime pro eo quo pollet, acri judicio, & veri studio existimabit; ego quod ipse existimaverit, sequar.

Verum etsi hoc, & quæ supra indicata sunt, in Constantino minus probo; non ideo tamen egregiam quam in Sereno emendando, illustrandoque posuit, operam meritis laudibus fraudabo. Certe in brevibus de quibus dictum est, notulis haud raro veram, Asulano, Casario, Humelbergio incognitam, scripturam attigit, interdum etiam, iis qui vel Doctissimum Keuchenium fugere, Veterum locis eandem comprobavit, velut cum ad eos versus ex cap. de prurigine, papulis, & scabiæ:

Ergo lutum prodest membris adhibere fricatis,

Quod facit ex asino siccatus corporis humor;

hoc primum adnotavit: *siccatus*, Alii *saccatus*; egregie quidem, ut jam Turnebus (n) præfenserat ex Arnobii (o), imo ex ipsius restitutis Lucretii (p) verbis, ubi de pueris in somniis lectum permingentibus:

Totius humorem saccatum ut corporis fundant.

Porro ab Sereno scriptum esse *saccatus*, cum alii indicant ipsius versus in quibus vel Lucretii (q) verba libenter usurpat; ut in cap. de solutione ventris:

Tam varii casus mortalia sæcla fatigant;

ut in cap. de ura & faucibus:

-- -- clamor fracto cum forte sonore

Planum radit iter, &c.

vel Lucretium studiose admodum laudat, ut in cap. de conceptione:

Hoc poterit quartus magni monstrare Lucreti;

tum veteres & Keuchenii, & aliorum libri manifeste confirmant. Deinde Constantinus hanc ita comprobavit, illustravitque scripturam: *Plinius lib. 28. c. 18. tradit, asininam urinam cum suo luto illitam hominis scabiem sanare*; qui Constantini, atque adeo Plinii locus Keuchenium fugerit, necesse est, non facile alioqui ad hos Samonici versus scripturam: *De asinino lotio nihil tale, quod sciam, apud medicos*: quanquam etiam apud Plinium Valerianum (r) hoc legitur: *Urina asini cum suo luto imposita (scabiem) sedat*.

Verum de Keuchenio ipso mox plura. Nam de Henrico Stephano, de quo jam ex ordine dicendum est, hoc tantum satis est indicare, ita ipsum Constantini editionem in Samonici verbis, & variantibus lectionibus ad eundem modum proponendis esse secutum, ut si cæteras etiam in ora notulas adjecisset, hac lacti similis non esset. Certe quam paucissima omnino fuere in quibus discrepare, animadverti. Ex his unum quod sententiam plurimum mutat, neque apud ullum alium adeo fidenter receptum comperi, adnotabo. Initium capitis de podagra sic habent Asulanus, & Humelbergius:

Quædam sunt rabida medicamina summa podagræ; Casarius autem, & Constantinus haud magna, quod ad sententiam attinet, varietate digna scribunt pro summa. Illud sententiam omnino mutat quod ab eodem Constantino, ut varians scriptura, in margine adnotatum est: *Quædam haud sunt pro Quædam sunt*. Istam autem ipsam scripturam recipit Stephanus, scribitque unus; quod viderim; omnium:

Quædam haud sunt rabida medicamina digna podagræ; five quod in libris calamo scriptis sic invenerit, five quod aliter nullam esse Poëtæ sententiam, judicaverit; nec fortasse injuria; hæc enim continuo sequuntur:

Cui ter tricenæ species Epidaurius ipse

Dixit inesse Deus, requiem tamen indere morbo

Fas erit, & tristem saltem mulcere dolorem;

nam si quædam esse, dixisset five digna, five summa podagræ medicamenta; cur nihil aliud quam aliquam saltem doloris quietem, & mitigationem promitteret? Quod sicui forte Stephani scriptura minus placet; is igitur aut quomodo communem explicet, videat, aut aliam aliquam perquirat; ut exempli causa, si Poëta non *Quædam*, sed *Quænam* scripsisset, atque ita quærendo, quænam vel digna, vel summa possint esse podagræ medicamenta, nulla videlicet istiusmodi esse, indicasset. Cæterum quæ si ve in verbis, si ve in Vita Sereni describendis tum in Stephano, tum in Constantino ipso desiderari possint, plura quæ cum de Asulano, Casario, & Humelbergio

(m) In Caracalla. (n) Adversar. l. 17. c. 18. (o) Adversus Gent. l. 2. (p) De Rer. nat. l. 4. vers. 1022.  
(q) Vid. l. 1. vers. 21. & alibi passim, tum ejusd. lib. vers. 645. & l. 4. vers. 531. 532. 536. &c.  
(r) De Re Medica l. 3. c. 38.



gio diceremus; exempla attulimus ad illos quoque pertinentia, satis superque præmonstraverint.

Unus de quo scribam, restat Keuchenius Vir multum; ut verum fatear; in græcorum, latinorumque cuiusque generis Scriptorum lectione versatus, antiquo etiam Sereni exemplari, calamo exarato, instructus, necnon illo quod Gryphianis formis descriptum est, aliisque fortasse quibus nos caremus, nonnullis (hæc enim inter Sereni Editiones in Prolegomenis memorat) fere omnibus tamen eo tempore editis, ut videri a Constantino potuerint. Sed vicissim quæ Constantinus, Stephanus, Aldique Filii procurarunt, eo in loco ne nominat quidem; Humelbergii autem Commentarium se necdum videre potuisse, diserte fatetur: quinetiam quem primo loco memorat, apud Aldum, hoc est a Francisco Asulano, editum Samonici librum an viderit, aut certe an adhibuerit, non satis constat. Videtur enim vidisse ex iis quæ aliquando notat, ut ad caput de vesica, & calculo; num vero adhibuerit, ii judicent qui nobiscum animadverterint, in Notis ad sextum versum ex cap. de ictibus scorpii:

*Magna quod exiguis perimantur sæpe venenis, scribere ipsum, se nescire cur eruditi viri non ausi fuerint membra pro sæpe reponere; vel in quarto versu ex cap. de lumbis & renibus sanandis:*

*Aut pice cum melli --*

recte quidem pro melli, molli rescribendum esse, existimare; sed de hac emendatione hæc subicere: Nihil verius ea lectione, quam nos primi restitimus; cum tamen Asulanus & in versu illo priore membra, & in hoc altero molli ad eundem prorsus modum ad quem Keuchenius emendat, revera scripsisset. Sed sive Asulani, aliorumque de quibus dictum est, librorum ope caruerit, sive contra, usus sit; certe illis tot aliis eruditionis prædiis ornatus Prolegomena ad Serenum copiosa scripsit, & bene docta, in quibus postquam superstitiosæ Medicinæ nugæ, & deliramenta erudite detexit, atque exagitavit, tum de Sereni ipsius Vita longe melius quam cæteri, de quibus supra dictum est, loquitur; nam eorum omnes quos indicavimus, errores declinat, & Veterum de Sereno testimonia accurate & collecta, & descripta proponit. Nescio tamen cur de ipso dixerit: *Superstitiosam* (medicinam) *passim*, Tralliani, Aetii, Myrepsi, Marcelli, cæterorumque medicorum exemplo immiscet; quasi vero qui aliis post ipsum sæculis existerent, horum Serenus permoveri exemplo potuisset: quod eram fortasse præteriturus, nisi etiam in Notis ad caput de Splene hæc invenissem: Forte antidoton ex iis remediis variam a Nicolao Myrepsio mutuavit Serenus; ab homine videlicet qui cum Mesuen citet (f), seculo duodecimo florentem, novem saltem ab Sereni ætate interjectis sæculis scripserit, necesse est.

Neque item præclare video, quamobrem Keuchenius, non minus quam cæteri quos supra dixi, Sereni Vitam cum ejus Poëmæte edidisse, illum omiserit Lampridii locum in quo Alexandri Severi luculentum de Samonico apparet iudicium: Latina, inquit Lampridius (t) (hic enim sequor typis editorum exemplarium inscriptionem; non ignarus alioqui eorum quæ hæc de re Is. Casaubonus (u), & Cl. Salmasius (x) monuere) Latina cum legeret (Alexander) non alia magis legebat quam De officiis Ciceronis, & De republica. Nonnunquam & oratores & poetas, in quibus Serenum Sammonicum, quem ipse noverat & dilexerat, & Horatium. Quæ tamen verba cum ego diligenter perpendo, & cum iis confero quæ de eodem Alexandro aut ipse habet Lampridius (y), vixisse videlicet annis XXIX., aut etiam Herodianus (z), tum duodecimum attigisse annum, cum factus est Consul cum Heliogabalo; ex his nimirum, aliisque Historiæ monumentis comperio, quinquennem, aut etiam quadrimum fuisse Alexandrum, cum Geta,

hujusque partium studiosus Samonicus a Caracalla interfecti sunt. Num ergo id ætatis puerum, etiam si constaret, in eodem loco ubi Samonicus, tum fuisse, jam tum eruditissimum illum Scriptorem & novisse, & dilexisse, credemus? An quando id minus veri simile est; conjiciemus potius, Poëtam istum Serenum Samonicum, de quo loquitur Lampridius, non Patrem; ut Is. Casaubonus (a) videtur credere; sed Filium fuisse, cum hunc annos aliquot paternæ cædi superstitem ponere, nihil vetet, & quæ Spartianus (b), Arnobius (c), Macrobius (d), Sidonius (e), Servius (f) de libris Samonici, ut videtur, Patris aut memorant, aut proferunt, hæc quidem soluta oratione scripta sint, illa vero ad doctum quidem atque eruditum Philologum, Historicum, aut etiam Mathematicum, non propterea tamen Poëtam, spectare videantur. Quod ut omni ex parte veri simile esse, intelligas; primum quæcunque Macrobius (g) ex Samonico & nominatim ex ejus libris Rerum Reconditarum produxit, ea cum versibus comprehensa non esse, constat; tum quod indicavit Arnobius (h), ad illos eosdem libros pertinere, Vossius (i) existimat. Deinde cum ex cæterorum locis plerosque in Prolegomenis Keuchenii, nonnullos in hac etiam Epistola habeas; ne ulli præterea supersint quos ad perpendendum requiras, ex iis quos ille omisit, duos insuper, alterum Sidonii, quem Doctissimus Fabricius (k) indicat, Servii alterum, quem nondum vidimus apud eos qui de Samonico locuti sunt, adscribemus. Et Sidonius quidem in Epistola (l) ad Leontium memorat Julium Firmicum, Sammonicum, Saturninum in libris matheſeos peritissimos conditores; quanquam Joannes Savaro (m) admonet, MS. optimæ notæ hos non agnoscere, sed Julianum Vertacum, Follonium Saturninum, qui quidem Mathematici quinam fuerint, & quomodo alterius nomen sit emendandum, his, inquam, Savaro de rebus quid censeat, alibi (n) proponit. Servii (o) autem locus mihi quidem certior est: Miracula, inquit, de hac insula (Thule) feruntur; sicut apud Græcos Ctesias, & Diogenes, apud Latinos Sammonicus dicit. Quæ omnia cum ita se habeant; minus mirum est, ea quæ produximus, Lampridii verba a Keuchenio esse prætermissa, ut qui facile ad Samonicum non Patrem, sed Filium pertinere, existimaverit, quem Poëmatis de quo agebat, Auctorem non putabat. Qua utraque in sententia diserte ostenderunt se esse Jo. Jac. Hofmannus (p), & hunc secutus Lud. Morerius (q), in primis autem Ger. Jo. Vossius (r). Hic tamen de Samonico, Filio, equid, scripserit, hant, inquit (s), sat scio. Sed Desid. Erasmus (t) Lyrica scripsisse, non dubitavit, atque adeo Serenum illum esse, censuit, quem inter Lyricos ab D. Hieronymo laudatum esse, supra dixi: cui sententiæ ætatem quidem eorum a quibus Serenum Lyricum nominatum esse, scio, adversari non opinor, quando Terentianus, quem eorum omnium antiquissimum esse, constaret, si Præfectus ille Syenes fuisset a M. Valerio Martiale (u) memoratus, isne fuerit, an ille potius ad quem Longinus suum illum aureum librum (x) scripsit, vel apud Eruditissimum Fabricium (\*) incertum est. Ego vero ut nihil in ejusmodi re affirmaverim; ita suspicor, quando Samonicum quidem Patrem fuisse Poëtam, non constat, Filium autem fuisse, ex producto Lampridii loco intelligi potest; suspicor, inquam, hoc de Medicina Poëma Filii potius, quam Patris esse credendum. Non me præterit, ita ab aliis posse accipi Lampridii verba, ut Serenum referant non ad proximam vocem poetas, sed ad priorem illam oratores: neque tamen ignoro, L. Gr. Gyraldum, cum duobus in locis (y) istis ipsis Lampridii verbis uteretur, utrobique orationes (quam quidem vocem etiam in Pall. ambobus Codicibus vidit Gruterus (z)) orationes, inquam, non oratores legisse; ut

(f) De Compos. Medicam. Sect. 32. c. 17. (t) in Alex. Severo. (u) (x) in Notis ad hanc Vitam.  
 (y) in ead. Vita. (z) Histor. l. 5. (a) in Notis ad Spartiani Caracallum. (b) in Caracallo, & Geta.  
 (c) Advers. Gent. l. 6. (d) Saturnal. l. 2. c. 12, 13. l. 3. c. 9. (e) in Epist. ad Polem. Carm. 13. subiecta &c.  
 (f) Comment. in Virgil. Georgic. l. 1. vers. 102, 103. &c. (g) loc. cit. (h) loc. cit. (i) De Historic. Lat. l. 2. c. 2.  
 (k) Bibl. Lat. l. 3. c. 5. (l) in qua est Carm. 22. (m) Comment. ad hunc Sidonii locum.  
 (n) Comment. ad Sidonii Epist. 11. l. 8. (o) Comment. in Georgic. l. 1. vers. 30. (p) Lexic. Universal.  
 (q) Dictionaire Histor. (r) De Philosophia c. 12. (s) De Historic. Lat. l. 2. c. 2.  
 (\*) in Scholiis in Epist. supra cit. D. Hieron. ad Paulinum. (u) Epigr. l. 1. 87, 86. Scriverio. (x) De Sublimi &c.  
 (y) Biblioth. Lat. l. 4. c. 7. (z) De Poetar. Historia Dial. 4. ubi de Sereno Samonico, & Dial. 5. ubi de Alexandro Mammæe.  
 (z) Not. in Lampridii Alex. Severum.



non obscure Ciceronis orationes intelligere, & ad hunc modum verba distinguere se, ostenderit: non alia magis legebat quam de officiis Ciceronis, & de republica, nonnunquam & orationes, & poetas in quibus Serenum Sammonicum, quem ipse noverat, & dilexerat, &c. Verum hanc totam rem alii viderint; ego enim ita propono, ut iudicium potius exquiram aliorum, quam interponam meum.

In Notis autem sane eruditis quibus Sammonicum ornavit, illustravitque Keuchenius, mallem aliquando ut minus suo tum ingenio, tum veteri exemplari indulsisset. Nam quod ad postremum versum capitis de fellis vomitu, & phthisi:

*Carne asinae, sevoque caprae medicina salubris;*  
hæc adnotavit: *Scribo; Lacte asinae. lacte disertim in avito. nec enim asinae caro, sed lac phthysicis ab antiquis medicis præscribitur;* primum illud attendisset, oportebat, in cæteris vetustis libris in quibus id verbum *asinae* est; quantum etiam ex Constantini, & Stephani silentio agnoscimus; constanter scribi *Carne*: tum vero Plinium Valerianum (a) docuisse: *Carnes asini ex jure sumptas phthysicis prodesse:* & ante hunc, majorem Plinium (b) hæc tradidisse: *Phthysicis medentur, jecur lupi ex vino, macra suis feminae herbis pasta lardum, carnes asininae ex jure sumptæ:* hoc genere maxime in Achaja curant id malum; quem locum Plinii spectasse Sammonicum, ostendit etiam adipis suilli mentio in proxime superiore versu facta, in hoc autem ipso sevi caprini, quod videlicet paucissimis interjectis verbis a Plinio adversus phthysin memoratur. Ad eos etiam versus capitis de solutione ventris:

*Proderit & pueris quos dentis origo fatigat,*  
*Castaneas coxisse muges, & sorba vetusta;*  
hæc notat: *Forte legendum: quos ventris origo fatigat. ventris integre scriptum invenio in veteri avito; & infra: Scribo - ex avito libro: - sorba perusta. id est, in sole siccata.* Verum in alijs; quod sciam; antiquis exemplaribus neutrum invenitur. *Vetusta* autem sorba pro siccatis & a Sereno hic accipi, & satis intelligi, ignorare Keuchenius non potuit qui ad illum alium hujus capitis versum:

*Aut cerasi victum longo jam tempore pomum;*  
hæc scripserat paulo ante: *Pomum cerasi longo tempore victum, ille siccatum vocat, quod album adstringat.* Nam quod ad illam alteram lectionem attinet, scire luculentius vellem, quid sit, aut quomodo sit interpretanda *ventris origo*: nisi ipse ultro subjecisset, vulgatam scripturam etiam posse defendi, nec debere immutari: quos dentis origo fatigat; & sic explicasset: iis igitur, quibus jam primuli dentes suboriuntur, & quos dentium origo fatigat, præscribuntur hic ad dysenteriam & album sistendam castaneæ coctæ &c. Non tamen edisserit, cur in hoc capite in quo alioqui agitur de alvi fluxu, dentesque pueri memorentur. Memorantur autem, quia in peculiaribus eorum morbis qui; ut Hippocratis (c) verbis loquar; jam dentire incipiunt, alvi profluvia potissimum numerantur. Laceritis (d) enim ob gingivarum pruriginem, atque dolorem vicinis salivæ canaliculis, ac glandulis, tanta hujus copia provenit, & a puerulis, ut pote exspuere nescientibus, in ventriculum, & intestina demittitur, ut his propterea laxatis, sæpius non dysenteria, sed diarrhœa serosa oboritur; quæ etiam illud affert commodi ut sic plurimis stimulantibus particulis una ejectis, nervorum distentiones, & comitialis morbus facilius arceantur secundum ea quæ ab ipso etiam Hippocrate (e) observata sunt: quibus in dentitione alvus amplius subducit, minus convelluntur, quam quibus parum; attamen si omnem denique modum transeat, non est dubitandum (quod tu minime ignoras, & Paulus (f) indicat) quin sit tantum a Medico minuenda, & cohibenda, quantum satis sit ne vires ita deiciat, ut vitam ipsam in discrimen adducat. Denique; ne longior sim; ad versus ex cap. de nervis incis, & dolentibus, atque contractis:

*Aut Baccho madefacta Ceres cum fronde cupressi,*  
*Quo poteris potu recreare rigentia membra;*

illud quidem recte adnotavit: *perperam sunt, qui ro potu ad compositionem referunt;* ut enim in superioribus septem versibus non de potandis, sed de extrinsecus adhibendis remediis sermonem fieri, ostendunt aut voces quibus Poeta usus est, aut ipsorum remedium natura, & Medicorum qui iisdem sunt usi, consuetudo; ita in his quoque fieri, tum duo hæc, tum nexus, tum Poeta ipse commonstrat, qui eandem prorsus res cum etiam (præeunte utrobique Plinio (g)) in cap. de podagra laudet, sic proponit:

*Trita cupressus ibi Baccho jungetur acerbo,*  
*Panibus & teneris, cohibebitque addita questus;*  
addita enim illic idem est atque *imposita*, qua ratione in cap. de lumbis &c. dictum est de sacculis:

*Quos vix passuris urentes addito membris,*  
& in cap. de fracturis:

*Conveniet cerebrum blandi canis addere fractis;*  
hoc est ossibus. Quæ cum ita sint; tantum abest ut in his de quibus agimus, versibus non scribendum sit *potu* pro *potu*, quod contendit tamen Keuchenius, quamvis illud sit in ora Gryphiani codicis, & alterius parvuli quem nos habemus, Lugdunensis impressum; ut nihil aptius posse fieri appareat, quam si illam scripturam cum Humelbergio recipiamus, præsertim cum & ingratum concursum vocum poteris potu sic vitemus, & quarto ante hunc versu Serenus sine controversia scripserit:

-- *tali recreabis languida fotu.*  
Nam in explicatione quidem quam ad retinendum potu profert Keuchenius: *non eo potu membra recreanda, sed potu rigentia debere accipi, quod multos egit transversos. ex potu enim rigor & vitium nervorum: nam nervis inimicissimum est vinum nimium potum;* magis ipsius ingenium laudo, quam Samonici genium, & veræ scripturæ speciem agnosco.

Neque hæc tamen ita accipias velim, quasi in Keuchenii Notis plurima esse vicissim bona atque egregia, & Eruditissimo Viro digna, negarem. Sunt enim: neque aliter pluribus in locis scripsisse Samonicum, credo, atque a Keuchenio constituitur, velut in versu capitis de lumbricis secundo cum scribendum statuit:

-- *interno cum viscere tania serpens;*  
non ut omnes libri typis editi habent, *tinea serpens*. Movet enim me liber ejus vetustus cum iis in hoc conveniens quorum scripturam in ora adnotarunt Constantinus, ac Stephanus, movetque præterea lex carminis, quæ *tania* requirit, *tinea* respuit; nam qui secus sentiunt, hoc certe ambigua, ut ostensum est, scripturæ loco antiquius non proferunt exemplum; quando constat, Horatium (h) contra scripsisse:

-- *aut tineas pascas taciturnus inertes,*  
& (i)

*Blattarum, ac tinearum epulæ.* --  
Vel cum ejus capitis quod inscribitur: *Ægris somno adsciscendo, versum sextum a plerisque ita scriptum:*  
*Proderit & magnum capiti substernere fultrum;*  
sed cujus tamen aliæ quatuor circumferuntur lectiones, quarum unam sequitur Asulanus, reliquas in ora exhibet Constantinus, ipse, ultima harum selecta, sic restituit:

*Proderit, ut Magi, capra substernere fella;*  
cum & vetustus ejus liber magna ex parte hanc repræsentaret scripturam, & locus Plinii (k), a Constantino quoque indicatus, eandem mirifice comprobet: *Magi, felle caprae - sub pulvino posito, somnum allici, dicunt.* Verum & has, & ejusmodi alias quas veras esse, agnoscit, scripturas, in quibus illæ quæ sunt de quibus supra ostensum est, *hirudine* pro *hirundine*: *saccatus* pro *siccatus*: *sarissæ* pro *carissæ*, si in edito ab se Samonico nolebat exhibere; cum tamen certe aut in ora adscribere, aut aliquo inter ipsa verba posito signo suis quamque locis indicare debuisset, omnes ibi omnino prætermisit magno sane cum Lectorum incommodo, qui nisi cunctas non ita aut breves, aut paucas perlegerint Notas, post ipsum Poema, atque adeo Prolegomena, in ulteriore libri

(a) De Re Medica l. 1. c. 61. (b) Nat. Hist. l. 28. c. 17. (c) Aphorism. Sect. 3. 25.  
(d) Vid. etiam Estmull, de Morb. Infant. Art. 18. (e) De Dentitione n. 2. (f) De Re Medica l. 1. c. 9.  
(g) Natur. Hist. l. 24. c. 5. (h) Epist. lib. 1. Epist. 20. vers. 12. (i) Satyr. l. 2. Sat. 3. vers. 121.  
(k) Nat. Hist. l. 28. c. 19.



libri parte seorsum editas; quid Keuchenius in ea re egerit, aut senserit, prorsus ignorent, necesse est.

Hæc cum ita sint; vides profecto, mi Vulpi, Viros Doctissimos a quibus, hætenus a nobis recensitæ, Sereni Editiones sunt procuratæ, peculiaria singulos in singulis ut bona præstitisse, sic vitia quædam declinare non potuisse. Igitur, nisi forte aliam aliquam invenias ex iis quas nondum inspexisse me, fateor, & in his Basileensem cum brevioribus Pictorii commentariis, Lugdunensem a Molinio, Parisiensem a Pithæo, Lipsiensem ab Rivino, Lugduno-batavam ab Lindenio ( minus enim nobiles, etsi novi, imo aliquas etiam vidi, hic tamen memorandas peculiariter, non putavi ) aut alio præterea aliquo quem ignorem, Docto ejusmodi Viro accuratam, quæ; etsi tempus quo pleræque earum habitæ sunt, & Constantini de Moliniana ipsa iudicium id facile sperare non sinat; ad illam tamen quam quærimus, & optamus, perfectionem propius accedat; nisi, inquam, talem ex reliquis invenias; necesse nimirum est, ut ex singulis aliqua, ex nulla omnia petendo, ista qua polles, tum solertia, tum diligentia non mediocrem operam ponas in Sereni Vita, Elogiis, Fragmentis, ac Poemate, itemque in Notulis quæ aut selectas variantes scripturas, aut necessarias interpretationes exhibeant, apparandis. Et Vitam quidem, Elogia, ac Fragmenta ex Keuchenii potissimum Prolegomenis, Notulas autem aliquas ex Cæsario, multo plures ex Humelbergio, & Keuchenio, non paucas tamen ex ipso etiam Constantino sumere poteris, a quo & variantes lectiones plerasque mutaberis: hujusque brevitatem tibi ad imitandum propones. Cujus quidem librum quem Almeloventius ( l ) ait esse rarissimum, & propterea fortasse in Prolegomenis omisit Keuchenius, nisi in vestra ista lectissima Bibliotheca habeatis, ex mea fumes. Daboque insuper, si volueris, plerasque variantes Sereni lectiones, a me inter legendum, ex ipso Constantini, & cæteris quæ vidisse me, dixi, exemplaribus collectas. Hæc tibi in ipso Poemate describendo, & notulis addendis non erunt inutiles; sed longe erit utilis singulos ex quibus collegi, libros inspicere.

Quod si præterea ex me quæras, de certis quibusdam Sereni locis ipse quid sentiam; illud primum admonebo quod & ex parte intelligitur ex iis quæ supra sunt, & Keuchenius ( m ) his verbis testatus est: *Quædam ejus capitula in membranis aliter comparent, ac editionibus; quædam ipso lemmate corrupta sunt, ut passim docuimus. Versus interdum omissi, vel amissi, ut ex aliis manuscriptis apparet, quibus olim excutiendis Pithæus, Barthius, cæterique doctissimi correctores præsuere. Voces etiam & syllabæ contra veterum auctoritatem contractæ, vel productæ. Quinetiam paulo post subjicit, se colligere, ex arbitrio describentium literionum Autorem hunc corruptum, aut emendatum fuisse; quod & primam ansam dedit tot innumerorum errorum & incredibilium lectionum. Huc adde quæ similia memorat Doctissimus Fabricius ( n ): In Sereni Carmine, quoniam pluries olim descriptum est & interpolatum, incredibilem lectionum varietatem offerunt MSti Codices, teste Rittershusio ad Oppianum, & Barthio XXVI. 27. Adversar. Equidem pertinaciter non contenderim, Samonicum, quamvis Eruditissimum Virum, aliquo in loco aut memoria labi, aut pati aliud humani potuisse, præsertim si ipse idem fuit qui in Fragmento de pisce acipensere quod nobis est a Macrobio ( o ) servatum, usque adeo prolapsus est, ut minorem Plinium cum majore apertissime confuderit, quod Jos. Scaliger ( p ) primus, quod sciam, notavit. At labi tamen in parvo hoc Poemate sæpe adeo, ac graviter potuisse ut ita hoc scripserit, quemadmodum nobis imperitissimi librarii scriptum dedere, quis credat? Cum igitur pessime ab his esse habitum, constet; experiri nos decet aliquanto etiam liberius quam in Celso, aut alio qui ad nos minus depravatus pervenerit, faceremus, an forte illi adjumenti aliquid afferre possimus. Et sane*

Franciscum quoque Asulanum, atque adeo ipsum; ut credibile est, Egnatium nonnullos omisisse versus, plures autem alios alium in locum transtulisse, supra vidimus. Ego vero qui & Egnatium, & me novi; etsi nunquam tantum mihi sumerem, id ut facerem; tamen ea in re quid suspicer communicare tecum non dubitabo. Et primum duos illos versus qui tum in cap. de lumbricis prius, tum etiam paulo post in cap. de vesica, &c. habentur:

*Ergo cinis cornu cervini proderit haustus,*

*Vel nepetæ tritum ex vino, vel lacte capellæ,*

alterutrum in locum esse suspicor ab oscitantibus librariis intrusos; neque enim solet Samonicus cum idem rursus proponit remedium, iisdem verbis, multoque minus iisdem versibus, sed longe aliis proponere, cujus rei nonnulla exempla supra sunt a nobis forte producta, cum de Humelbergii, Constantini, & Keuchenii Editionibus scriberemus. Hi autem duo versus primo certe in loco egregie sunt positi propterea quia quæcunque in ipsis laudantur, solida quidem ad pellendos, necandosve lumbricos ex Scribonii ( q ), Plinii ( r ), & Dioscoridis ( s ) auctoritate; fluida vero admixta, alterum ad necandos, alterum ad alliciendos ad necantia, lumbricos ex plerorumque Medicorum consuetudine ( quorum de opinionibus, & auctoritatibus in hac Epistola non judico ) in usum trahuntur. Veri ergo simile est, in alterum potius locum fuisse intrusos, idque eo credibilius est quod cum in priore constanter, ad eundemque modum a cunctis quos vidimus, libris exhibeantur; in altero sane aliter a Cæsario, aliter ab Asulano proponuntur sic tamen ut appareat magis emendandi conatus, quam emendatio; nam verba pleraque, & in his illud quod præcipue istuc convenire non videtur, retinent, hoc est nepetæ. Animadvertendum enim est, sermonem istuc haberi de urinæ profluvio, & incontinentia curandis:

*Quondam etiam nimio præceps urina fluento*

*Irrigat exuvias, obscænoque inficit hymbri;*

Num igitur credibile est, continuo versus consequi in quibus nepeta proponatur, herba videlicet urinam ciens, ut ab ipso Dioscoride ( t ), quem Plinius Valerianus ( u ), alique Rei Medicæ Auctores sequuntur, olim scriptum est; an potius, iis sublati, hunc continuo sequi oportere:

*Tum leporis cerebrum ex vino potare decebit;*

certe cum de nepeta nihil ejusmodi ex prisca auctoribus produci, meminerim; hoc apud Plinium ( x ) legi potest: *urinæ incontinentiam cohibet - cerebrum leporis in vino.*

At versus aliquot auferre, fortasse aliquibus videatur audacius; num ergo & transferre? Quod si hoc etiam videtur, ipsi igitur nobis edisserant, cur in cap. de phrenesi, & capite purgando, illum versum:

*Ceritum sæpe horrendi medicantur odores,*

hic protinus subsequatur:

*Atque ideo sanos etiam curarier est par;*

quid enim sanis cum Ceritis? de quibus Nonius Marcellus ( y ): *Ceriti, & larvati male sani.* Hæc minime cohærere, senserunt qui pro sanos reponendum esse insanos, censuerunt; sed ab his tamen erat animadvertendum, neminem dubitare quin curandi sint insani, neque adeo Samonicum ineptum esse potuisse, ut id sibi probandum esse, existimaret: præterea si insanos etiam curandos legamus, haud obscure consequi id ipsum quod vitare voluerunt, hoc est sanos quoque esse curandos. Hæc cum ita sint; illud ego attendendum censeo, caput hoc, ut inscriptio etiam ostendit, in duas divisum esse partes, quarum prima insanos curare, altera caput purgare, sive sanos ab insania defendere, hoc est, ut nunc vulgo loquuntur Medici, præservare docet; itaque illum de Ceritis versum ad primam partem, alterum in quo sanos secundum magis communem lectionem retinendum puto, ad alteram partem existimo pertinere, sic tamen ut duo versus qui caput hoc claudunt, inter utrumque collocentur, ut legamus videlicet:

*Ceri-*

( l ) in Præfat. ad C. Celsum.

( m ) in Prolegom. ad Samonicum.

( n ) Biblioth. Lat. l. 3. c. 5.

( o ) Saturnal. l. 2. c. 12.

( p ) Animadversion. in Chronologica Ensebi ad MMCXXV.

( q ) Composit. Med. Comp. 141.

( r ) Nat. Hist. lib. 28. c. 14.

( s ) de Mat. Med. l. 3. c. 36.

( t ) Ibid.

( u ) De Re Med. l. 4. c. 22.

( x ) Nat. Hist. l. 28. c. 15.

( y ) De Propriet. Scrm.



*Ceritum saepe horrendi medicantur odores.*

*Non semper praesens dolor est sanabilis: ergo*

*Cura magis prodest venturis obvia morbis;*

*Atque ideo sanos etiam curarier est par.*

*Purgatur cerebrum mansa radice pyrethri, &c.*

Vides ut omnia nunc cohæreant, ut nihil incongruum, absurdumve legatur. Sunt & alia in aliis capitibus, & nominatim in eo quod inscriptum est: de profluvio cujusque sanguinis, quæ in meliorem, ut puto, ordinem digeri postulant: sed quoniam postulant, non flagitant; idcirco iis missis, id unum monebo, plura esse capita quæ a suis sedibus avulsa alio temere esse translata videantur, & præsertim duo illa, inter se colligata, quorum primum inscribitur: *Ægris somno asciscendo*, alterum: *Lethargiæ expellendæ*; quæ videlicet, nullo interjecto, subjici oportuisse postremo eorum capitum in quibus de Febribus actum est, idest capiti de *hemitritæ*, ipsum primi initium indicare videtur:

*Non solum miseros teterrima febris adurit,*

*Sed super, optato pergit viduare sopore.*

Et de transferendis versibus satis.

Nunc duo vel tres ex his qui depravati sunt, locis quomodo legendi sint, conjiciamus. In cap. de *conceptione*, & *partu* locus est qui ut vitiatus sit, alia apud alios, neque ulla tamen satis aut perspicua, aut recta scriptura ostendet omnibus qui singulos consuluerint. Eum ita edidit Humelbergius:

*Ut menses olim minus octo moratus in alvo*

*Irrumpat thalamos & nexus solvat inertes,*

*Pulegio admixto venit embryo nectus aceto.*

Hunc autem locum ex Humelbergio potissimum descripsi, quod postremum versum, ita apud reliquos non prostantem, cum in suo veteri exemplari legi, doceat Keuchenius, & in ora a Gryphio, & Tornæsio adnotatum sciam, & de promovendo ac faciliiori reddendo fœtus exitu, qua de re in superioribus, & consequentibus versibus sermo est, diserte agere, videam; non ita facile rejiciendum esse, arbitror. Sed ut hunc versum ab Humelbergio accipiendum, ita priores duos ex aliorum librorum auctoritate, aliqua ex parte mutandos censeo; alioqui enim quæ tandem esset ista sententia: Ut veniat, venit? Cum ergo Cæsarii, ac Tornæsii libri in primo habeant: *At qui olim menses*, & ad hanc proxime accedentem scripturam sequantur Constantinus, Stephanus, Keuchenius, qui videlicet habent: *Aut qui olim menses*; secundum autem versum & hi omnes, & ipse quoque Asulanus ita scriptum exhibeant:

*Irrumpit thalamos, & nexus solvit inertes;*

cum hæc, inquam, ita sint; cur non conjiciamus, totum illum locum ad hunc fere modum posse restitui:

*At qui olim menses minus octo moratus in alvo,*

*Dirupit thalamos, & nexus solvit inertes,*

*Pulegio admixto venit embryo nectus aceto.*

Sic rationem superioribus propositam versibus qua vivi fœtus partus juvetur, consequitur ratio qua & mortui: hæcque de veterum Auctorum scriptis, & nominatim Plinii, quem Samonicus, ut sæpius diximus, sectari solet, deprompta; Plinius (2) enim hæc de pulegio tradiderat: *ex melle & aceto, de-functos partus ejicit*. Tota autem sententia hæc est: eo medicamine expelli fœtum qui ante justum tempus dirupit quidem sua claustra, & ligamina, membranas videlicet circumjectas, harumque per placenta cum utero nexum, quod hæc omnia inertia, hoc est minus valida forent; ipse tamen ab invalida matre cum paulo post pelli non potuerit, sic intra uterum mori coactus est. Quod sicui forte minus placeat *Irrumpit* in *Dirupit* mutare; ad eundem tamen modum explicare sententiam poterit, si quidem *irrumpe* proprie significet *penitus frango*, ut ab nonnullis Doctissimis Viris traditum est qui in hanc rem Lactantii (a) verba protulerunt: *summum igitur inter se hominum vinculum est humanitas: quod qui irruerit, nefarius & parricida existimandus est*. Sed cum ego non modo in meo Lactantii exemplari quod quidem ex vetustis illis est quorum editio Morgagni Opusc.

nem Romæ procuravit Episcopus Aleriensis (b), verum & in duobus aliis quorum alterum ibidem sexennio, alterum Venetiis biennio ante meum illud editum fuerat, non *irruerit* eo in loco legerim, sed *diruperit*; idcirco minus veritus sum conjicere, *Irrumpit* (cujus verbi alioqui ambiguum apud Serenum scripturam libri illi veteres ostendunt ex quibus Constantinus, & Stephanus in ora adnotarunt, *Erumpit*) aut in *Dirupit*, aut siquis forte ita malit, in *Perrumpit* esse mutandum: quanquam & istud ipsum *Erumpit* retineri fortasse potest propter illud M. Catonis (c) de Brassica: *Eadem tumida concoquit, eadem erumpit*. In postremo etiam Sereni capite quod est de *hemorrhoidibus*, cum ad eundem omnes modum priores duos versus constanter proponant:

*Excruciant turpes anum si forte papillæ,*

*Agrestis radix prodest super addita porri;*

in tertio vehementer discrepant; nam Cæsarius & habebat:

*Ni violet, sanat juglandis fragmine clausa.*

At vero Stephanus, & Constantinus ad oram scribunt:

*Ni violent, sanant juglandis fragmina clausas;*

imo Constantinus, sic, inquit, lege. Contra Keuchenius hanc quidem etiam profert scripturam; sed & illud continuo subjicit: *Nihil mutandum*. Asulanus vero, & Humelbergius etsi inter se, & multo magis ab his omnibus dissidentem scripturam olim dederant, ita mihi quidem ad veram accessisse videntur, ut ex utroque aliquid sumendo, omnino fortasse restituere hunc locum possimus. Igitur ita scripsit Humelbergius:

*Ne violet sanum, juglandis fragmine clausa;*

ut melior quam ex superioribus, sententia existat, scilicet agrestis porri radicem adversus cæcas hæmorrhoides, quas turpes papillas vocat Serenus, aperiendo, prodesse, si apponatur, excepta tamen dimidiato juglandis nucis putamine, eoque cohibita ne proximas temere rodant partes, sive, ut nostri loquuntur, excoriet; ad quod videlicet exemplum alii etiam Medici, & in his Sennertus (d), monent: *caustica, - glandium calice, vel alia capsula, ne vicinæ partes simul adurantur, hæmorrhoidibus apponi debere*. Neque aliam fere quam Humelbergius, sententiam Asulanus ipse proposuerat, nisi perperam distinguendo verba, sic obscurasset:

*Ne violet, sana, in juglandis fragmine clausum.*

Utroque igitur inspecto, ita hunc versum rescribendum esse, conjicio:

*Ne violet sana, in juglandis fragmine clausa;*

sic enim ab illo sanat, aut sanant, quod cæterorum libri habent, minus quam Humelbergius, recedemus, & vicissim ab illo clausa, vel clausas, minus quam Asulanus. Et fuit quidem aliquando cum quærerem, an istud clausum, quod habet Asulanus, jungendum forte esset cum eo quod continuo sequitur:

*Sal niveum fumes, -*

eaque tota quam exposui, de radice agrestis porri sententia accipienda potius esset de sale hoc candido, quod *Bethicum*, ut Serenus subjicit, appellabant. Sed cum de isto sale Bethico, sive Bætico (nam secundum Turnebi (e) iudicium, & observationem idem est) cum, inquam, de isto sale Bætico inquirerem; vix hæc apud Plinium (f) reperiebam: *Ad medicinæ usus, antiqui Tarentinum (salem) maxime laudabant: ab hoc quemcunque e marinis, ex eo genere spumeum præcipue: jumentorum vero & boum oculis, Traga-seum, & Bæticum*. Nam quod Humelbergius ad hunc ipsius salem pertinere, tradidit, quæ apud Plinium (g) de illo extant, qui glebis pene translucentibus cæditur, videlicet ei jampridem palmam a plerisque Medicis inter omnia salis genera perhiberi; nempe animadvertisse non videtur, ipsum vero in Hispania citeriore Egelastræ casum fuisse, ideoque esse Bæticum, hoc est qui ex ulteriore Hispania peteretur, non potuisse. Cum igitur in Bætico sale exulcerandi facultatem non modo celebrari, sed ne attingi quidem apud Auctores invenirem: contra autem, agreste porrum

P

ea vi

(2) Nat. Hist. l. 20. c. 14. (a) De Divin. Instit. l. 6. c. 10. (b) A. 1474. (c) De Re Rust. c. 157.

(d) Medic. Pract. l. 3. Parr. 2. Sect. 2. c. 13. (e) Advers. lib. 22. cap. 24. (f) Natur. Hist. l. 31. c. 7. (g) Ibid.



ea vi pollere; & notum sit, & Galenus ipse ( *b* ) tradiderit; adeo enim, inquit, est calidum, ut illitum cataplasmatibus modo, exulceret; quin Serenus id potius monitum de radice ejusdem porri adscripsisset, vix amplius dubitavi. Denique etsi minus libri variant in his versibus duobus ex cap. de infantibus dentientibus:

*Aut teneris cerebrum gingivis illine porci.*

*Aut leporis niveum bibitur cum lacte caprino;* sic enim a Casario, Humelbergio, Constantino, Stephano, Tornæsio, Keuchenio constanter scribuntur; tamen, nisi ego vehementer fallor, minus est inelegans quod scripserat Asulanus:

*Aut leporis niveo bibitur cum lacte caprino;*

quid enim? an porci de quo in priore versu dicitur, album non est cerebrum? Si tamen quæras, an censeam, lac caprinum vocari *niveum* a Samonico potuisse, & revera hoc in loco fuisse vocatum; vocari quidem potuisse, inficias non ibo; hic autem revera vocatum esse, haud ita facile affirmabo. Cum enim tertio ante hos versu humanos dentes niveos dixerit, caprinum etiam lac niveum dicere potuisse, neque tamen fortassis; ne summam verborum inopiam in re minime necessaria ostenderet; dixisse, contendam. Quod si *cerebrum*, quod aliter dicere non licebat, potius iterasset, scripsissetque: *Aut leporis cerebrum;* id sane multo æquius videtur ferri potuisse. Proxima etiam illa vox *bibitur* ejusmodi est, ut de ipsa dubitare possimus. Haud equidem ignoro, Dioscoridem ( *i* ), & hunc secutum Galenum ( *k* ) tradidisse, leporinum cerebrum affrictu, aut cibo facile infantibus dentitionem præstare; quorum utrumque postea etiam ab Oribasio ( *l* ), postremum vero tantum ab Aëtio ( *m* ) memoratum est. Plinius ( *n* ) tamen, quem sæpius noster solet Poeta describere, & quem revera hic descripsisse videntur indicare cum laudati ab

utroque dentes qui equis primum cadunt; adalligati; tum vero maxime, conjuncta lactis caprini mentio; nihil aliud, quod sciam, de illius cerebri usu ad dentitionem adjuvandam docuit, nisi lacte caprino, aut cerebro leporum perunctas gingivas, faciles dentitiones facere: quem ita Plinius Valerianus ( *o* ) secutus est, ut ad dentitionem dixerit, lacte caprino, & leporis cerebro gingivas perficari. Sed nec Sextus ipse Platonius ( *p* ), quem fuisse, putant, Chæronensem illum M. Antonini doctorem, nec Paulus ( *q* ), nec Actuarius ( *r* ), neque, ut plures alios sciens præteream, nostris ipsis temporibus Ettmullerus ( *s* ) aliter in pueris dentientibus leporini cerebri usum laudant, quam ut ipsum gingivis illineretur, atque adeo hic postremus vel sic adhibiti nimiam vehementiam timuit, & propterea quando, & quomodo illinendum sit, docuit. Verum utcumque hoc est; ob illum certe Plinii locum sæpius suspicatus sum, non *bibitur*, sed *linitur*, aut *linito* a Samonico scriptum esse. Sed quoniam neque sine veterum exemplarium auctoritate meæ mihi placent conjecturæ, & si tibi forte pro eo quo me prosequeris, studio placerent; satis tamen multa scripsisse, imo omnes justæ Epistolæ terminos jam diu mihi prætergressus esse videor; plures alios qui depravati sunt, locos omittam, & verbis Adriani Turnebi ( *t* ), Viri de antiquis Scriptoribus, & nominatim de nostro Samonico egregie meriti, finem denique scribendi faciam: Nos Medicum male habitum his vel fomentis lenire, vel medicamentis sanare conabamur: sunt & in multa alia ulcera, quibus vel Paon, vel Chiron manum admoveat; majorem enim opem, quam nostram, desiderant. Interim quædam a nobis in eo redupia curata erit, si modo curata dici possit; nam ne id quidem affirmare ausim. Vale.

Patavii Nonis Januar. MDCCXXI.

## E P I S T O L A A L T E R A.

Jo. Bapt. Morgagnus Jo. Bapt. Vulpio S. P. D.

VIdi his diebus quæ undeviginti ab hinc annis ad Samonicum præfatus est, adnotavitque Vir præclara eruditione, & famæ celebritate ornatissimus Petrus Burmannus ( *a* ). Quæ utinam sicuti ad me nunc misisti, ita mittere potuisses, cum is viveret; non tam ut perpauca, in quibus a me dissentit, satisfacerem, quam ut gratias agerem de reliquis plurimis, in quibus pro sua humanitate mihi voluit assentiri. Nolli enim, quam multa, quam varia non de poemate solum, sed de vita etiam, studiis, fatisque Samonici, de ejusque editionibus longa illa, quam vulgari voluisti, Epistola complexus sim. Cum totam ille perlegerit, & pene totam in suis cum Præfatione, tum Adnotationibus articulatim commemoraverit; accipe, ad quam pauca redeant illa de quibus ipsi aliter ac mihi visum est.

Igitur in Præfatione cum ad Samonici editiones ordine recensendas pervenit; ab illa orsus, qua antiquiorem nec ipse vidit, Veneta nimirum A. 1488. cujus mihi copiam factam esse ab egregio Viro Fratre tuo, in Epistola ( *b* ) non reticui, postquam duas, tresve alias memoravit, hæc habet: *Juntinam deinde Celsi, majoris formæ A. 1524. Morgagnus in Epistol. pag. 77. perperam pro Aldina Viros doctos accepisse credit, quasi & illa Serenum comprehenderet, cum biennio post Aldi socer Asulanus Celfo demum adjecerit Serenum.* Non hæc descripsi, quod hic ille a me dissentiat; ait enim, credidisse me, ab iis perperam acceptam esse: cui meæ ad sic opinandum non obscurissimæ propensioni ne ipse quidem refragatur. Sed, ut hæc planissime intelligas, Epistolæ paginam

illam relege, quæ in Patavina editione ( *c* ) est 18.; nam Burmannus editionem tertiam indicat, qua utebatur, habitam apud suos Hagæ Comitum; illam igitur, & quæ proxima præcedit, & 2. quoque paginam relege ( *\** ): perspicies continuo, nihil ea quæ Burmannus dicit, ab iis quæ ego dixeram, discrepare, nisi quod a me scriptum fuerat, non biennio post; sed A. 1528. neque Aldi socerum; sed Franciscum Asulanum, Andreæ soceri ejus filium, Serenum edidisse: neque me credere factum perperam a Viris illis doctis; sed etsi ita videatur, me tamen an perperam factum sit, malle judicium sustinere, Quarum rerum neque est cur me pœniteat, neque ulla earum est quam impugnet Burmannus: quamvis casu nescio quo acciderit ipsi, ut cum ea vellet quæ ego senseram, indicare, paulo aliter referret. Cur ergo, inquis, ista ejus verba descripsisti? Ob ea videlicet, quæ continuo subjecit: *Ibidem etiam contendit Morgagnus, Aldinam priorem Casarii Haganoensi editione debere haberi, cum tamen utramque in calce legas prodiisse A. 1528. mense Martio. Joannis vero Casarii dedicatio, oblata Comiti a Stoelberg, notam temporis habet pridie Kal. Aprilis A. 1527. ita ut certe Casarius hanc Colonia misisset ad Typographum Haganoensem Johannem Soterium videatur, ante annum, quam per cunctationes Typographi exiret in lucem.* Ego vero neque ista ignoravi; quin pagina illa 17. ( *\*\** ) diserte protuli; sed cum de editione, non de præposita epistola, ageretur, tempore standum esse, credidi quo illa absoluta, non quo hæc scripta esset: neque tamen contendit, editionem Venetam esse priorem habendam

( *b* ) De Simpl. Medic. Facult. l. 6. ad vocem Ampeloprason. ( *i* ) De Mat. Med. lib. 2. c. 18.

( *k* ) De Simpl. Med. Fac. lib. 11. ad voc. Cerebrum leporis. ( *l* ) De loc. aff. cur. l. 4. cap. 63. ( *m* ) Tetrab. 1. Serm. 4. c. 9.

( *n* ) Nat. Hist. l. 28. c. 19. ( *o* ) De Re Med. l. 1. c. 42. ( *p* ) De Medic. ex Animal. c. 2. ( *q* ) De Re Med. l. 1. c. 9.

( *r* ) Medic. l. 6. c. 7. ( *s* ) In Schröder. de Animal. Class. 1. & de Morb. Infant. Artic. 18. ( *t* ) Advers. l. 17. c. 18.

( *a* ) in Edit. Poetar. Latin. Minor. ( *b* ) pag. 267, 7. ( *c* ) illa quidem qua simul cum Samonico prodit; in præfati enim, id est Edit. Patav. II. est pag. 263, ( *\** ) hic 246, ( *\*\** ) hic 262.



dam Hagenoensi, nisi si Veneta, ut Viri illi docti affirmaverant, jam A. 1524. prodisset: imo sic omnem ea de re sermonem conclusi (d): *Itaque in praesentia, non me quidem, sed ipsis, quemadmodum ostendi, auctoribus, Asulano postpositum habes Caesarium.* Quæ cum ita sint, cumque, ut paulo ante vidimus, ego a Viris illis doctis discedere Burmanno visus sim; haud satis scio, cur eidem adversus Caesarium pro ipsis contendere videri potuerim.

Mox pergit ad alteram Caesarii editionem. Primam hanc editionem, inquit, deinde repetiit Jo. Soter Salingiaci A. 1538. quam male quosdam consuluisse, & pro ipsius Caesarii editione habuisse, in notis ad cap. XLVI. v. 830. ostendi. Ibi autem me, aliosque, ait, non hanc alteram, sed primam illam inspicere debuisse; attendendas enim illas esse editiones, quæ ab ipsis viris doctis sint curatae, antequam illis aliquid vitii adscribamus. Vera monet Vir Præstantissimus. Sed tamen quomodo primam illam curare ipse potuit Caesarius, quem fassus est Colonia ad Hagenoensem typographum misisse, tanto locorum intervallo disjunctum? Deinde quomodo primam illam, cujus hic inspiciendæ non est copia, potuissent ego consulere, aut credere, aliter habere, qui ex Caesarii editione quidquid alii proferrent, in ea pariter quam ego versabam, ad eundem modum invenirem? Denique si qua gravioris momenti in editione hac notavi, non ejusmodi certe sunt, ut typographorum incuriæ facile imputanda esse videantur. Nec sane mihi aliud diserte objici a Burmanno, video, nisi quod, ut in aliis aliquot est editionibus, sic in hac quoque animadverterim scriptum esse *carissæ pro sarissæ*, quod in prima, ait, legi editione. Crederes, hanc omni istiusmodi vitio carere, nisi, quæ verba eodem in capite post versus perpaucos notaveram (e), *Utque Sarissæa*, hæc eadem Burmanni Adnotatio indicaret in prima ipsa Caesarii editione retineri. Ineptum vero est, inquit, Caesarii & Pictorii, utque sarissæa, quod non intelligo. Sed tu, mi Vulpi, vel hinc intelligis, non esse igitur primam Caesarii optimam illam, quam in Epistola quærebamus, editionem. Propositum enim hoc erat nostrum, quid boni, quid contra esset in singulis animadvertendo, dispicere, (f), *quam dignior esset editio, quam potissimum sequeris.* Cujusmodi nullam cum invenimus; consilium denique nostrum fuit (g), ut ex singulis aliqua, ex nulla omnia petendo, novam appareres: quod nisi angustia illæ temporis permitterent; at si vires & valetudo postea suppeterent, succedentibus annis faceres, & si rata fuissent hæc nostra vota, jam fecisses.

Meum autem illud consilium hoc loco ideo commemoravi, quia Burmannus, qui Epistolam certe perlegerat meam, ejus rei prorsus oblitus videtur, ubi paulo infra ventum est ad Roberti Constantini, & Henrici Stephani editiones. Certe, inquit, *Constantini editionem* Henr. Stephanus ita expressit, ut recte judicet Morgagnus, lac lacti similis non esse, si unum vel alterum excipias locum. Quod cum recte viderit, mirari subit idem institutum in sua editione, quam nuper Patavii prodidit, secutum, & Constantini vestigia tam diligenter servasse, ut ne quidem ab aberrationibus ejus sibi caverit, cujus exemplum cap. XXX. v. 577. videri poterit, ita ut hæc repetita modo Constantini editio jure vocari possit. Novam hercle, & difficilem observationem! quando tu, angustiiis temporis exclusus, & notularum brevitate ac copia allectus, ex illa Patavinam editionem ita describi voluisti, ut aperte, & in fronte statim ipsa liqueret omnibus, esse ex *Editione Lugdunensi* A. 1566. Rob. Constantini, cum hujus Notis, variisque lectionibus, non secus ac Celso, conjunctim edito, præfigi jusseras, deberi ipsum curæ, & studio Th. J. ab Almeloveen. Tuque idem optime omnium nosti, num ullam ego editionis utriuslibet Auctoris Patavinæ lineolam, nedum pagellam antea, aut dum typographus excuderet, non dico emendaverim, sed viderim. Quin et Morgagni Opusc.

iam scis, annuisse me, ut Epistolas in illos Auctores simul ederes meas, ea conditione si reciperes, etsi tibi forte propositæ aliquæ a me emendationes necessariæ viderentur, tamen in eorum contextu ne litterulam quidem te esse propterea mutaturum: quam fidem non modo servasti, sed etiam a te mihi datam in præposita editioni Epistola omnibus prædixisti. Quam igitur meam somniant aut Gelli, aut Samonici editionem? Num quam procuraverat Constantinus, me daturum emendatam in ea Epistola promisi, in qua tibi ne ejus quidem repetendæ consilium dedi?

Satis etiam superque ostendit, ut opinor, Epistola eadem, in qua non semel indicandum a me fuit, quid carminum legibus repugnaret; ostendit, inquam, num tandem, licet inter poetas nomen non profitear meum, adeo iis in legibus hospes sim, ut quantum flagitii Constantini operæ commisissent in his duobus versibus, non sentirem,

*Pulegiumve potens, & agreste jungatur anethum. (h)*  
*Græcos hyoscyamon propria scito dicere lingua; (i)*  
nec statim rescriberem jugatur. Græcus. scit; præsertim cum, etsi duo posteriora membra in Henrici quoque Stephani, & Roberti Keuchenii editiones irrepsissent, primum autem etiam in plures, inter quas, ipso indicante Burmanno, illa est, quam male! non consului, Caesarii prima; aliæ tamen essent in manibus quæ tribus hisce vitiis carerent. Quæ quanto evidentiora sunt, tanto magis adducere ipsa Burmannum debebant ad suspicandum saltem, Patavinam editionem non esse meam; non ad scribendum in primo: *quam scabiem nec me depulisse, securum semper editionis Constantinianæ*, quasi in tot ejus locis, qui se in Epistola considerandos forte obtulere, nihil unquam reprehendissem: in duobus autem alteris: *se de Keuchenio non mirari, sed stupere, ipsum Constantinum, & me, qui eum exprimo semper, etiam in vitiosissimis locis, hic nec duplex vitium animadvertisse.* Relinquebatur, ut illa quoque objiceret mihi, quæ in Constantini editione cur minime notaverit, haud satis scio, nempe in versu (k)

*Sal niveum sumes, Baticum quod nomine dicunt,*  
secundam tertii pedis syllabam omnino sine diphthongo scribendam fuisse: nam etsi, quocumque modo scribas, facile corripere non possit; certe si diphthongum habeat, jam nullum superesse disputationi locum, neminemque fore cui dubium sit, quin sic, oporteat produci: Versum autem (l)

*Atque palato agitat retinensque, vomensque,*  
toto uno pede mutilum, evidentissime claudicare: quo quidem pede apud plerosque non careat, adverbium pariter inter agitat, & retinensque interjicientes, aut aliter, non mancum, edentes. Hæc certe, & si qua alia a Constantini typographis peccata sunt, eadem ratione, qua superiora, mihi poterat assignare Burmannus! Verum ut illa quæ immerito assignavit, hic mihi prætereunda non fuere, ne silentio agnosce-re & probare viderer; sic id omne facile condonandum est Viro & meritissimo, & mortuo, & quod caput est, erga me, ut cætera præclare ostendunt, egregie animato.

Nam quod in Præfatione reliqua, de me addit si-ve Keuchenii editioni in iis quæ bona habet, laudem non exiguam tribuente, si-ve in neglectis quibusdam necessariis subsidiis hominis securam supinitatem notante; in hoc mecum facit vel magis quam ipse vellem, qui multo, ut debebam, lenius id indicavi (m); in altero satis assentitur, cum bona illa Keuchenium ex avi schedis, qui spectatus Archiater fuerat, ait, descripsisse. In Adnotationibus autem, cum per sæpe proferat quid ipse in Samonico legerim, explicaverim, disseruerim; aut non improbat, aut diserte probat, aut lectores ad meam Epistolam rejicit: & siquid forte aliter, ut in rebus ejusmodi, aliquando mavult; ea ratione mavult qua mox videbis. Locos enim omnes in quibus a me nominatim discrepat, huc adscribam. Qui cum pauci admodum

(d) pag. 264, 35.

(e) pag. 262, 5.

(f) pag. 245, 8.

(g) pag. 296, 20.

(h) c. 30. v. 15. Burmanno autem 577.

(i) c. 20. v. 20.

(k) c. ult. v. 4.

(l) c. 9. v. 13.

(m) p. 285, 29.



dum sint; alios addam in quibus mihi vicissim nonnulla haud satis placent quæ ipse proposuit. Sic modesta aut illius a me, aut mei ab illo dissensione Poeta noster fortasse illustrabitur. Cujus hic ordinem servare præstat, quam aut illum quo in Epistola usus sum, aut quo in his Litteris uti possem, si locos vellem in quibus aut a me Burmannus discrepat, aut ego ab illo, separare.

Igitur capitis VI, quod inscribitur *Prurigini, papulis, ac scabiei arcendis*, initium apud plerisque omnes ad hunc modum se habet,

*Illotus sudor, vel copia nobilis escæ*

*Sæpe gravi scabie correptos asperat artus,*

Producit Burmannus Constantinum, qui indicaverat, pro copia, legi posse inopia: ubi una producta inter tot breves more Græco: item esse alios, a quibus copia retinetur, pro nobilis legentes inutilis. Producit deinde Keuchenii locum, qui cum hisce ultimis faciebat. Denique Scaligerum, qui ad marginem codicis pro nobilis adleverat noxilis. Tum hæc subjicit: *Sed caret auctoritate vox illa noxilis. forte nec copia nobilis escæ. ut deficiente victu mundiore, ex vitioso alimento scabiem oriri dicat.* Mihi vox nobilis videtur omnino expungenda; neque enim mundiorem dumtaxat victum significaret, sed etiam exquisitiorem, quomodo, exempli causa, a Plinio (n) dicitur *Turdus inter saxatiles pisces nobilis, & apud antiquos piscium nobilissimus habitus acipenser.* Pauperibus autem, pro quibus scribebat Samonicus (o), neque copia est ciborum hujusmodi, nec quibus est, aut non est, idcirco scabies oritur; ut mihi æque copia, ac inopia, sive nec copia nobilis escæ aliena hic esse videatur. Contra vero copia inutilis escæ; quod non carere vidimus doctis approbatoribus, quibus Henricus Stephanus addendus est, ut qui de duabus Constantini potulis priore omissa, alteram in libri ora apposuit; huc pulchre attinet, si eam vocis inutilis vim spectemus, qua apud idoneos latinos Scriptores haud raro invenitur. Neque enim tantummodo pro eo quod nulli usui est, posuerunt, sed etiam pro noxio, & pravo: idque ex iisdem constat exemplis quæ in iis ipsis Lexicis proferuntur, in quibus vis tamen hæc altera non traditur. Lege enim Plinium (p); ut ejus complures alios omittam locos; ubi *stomacho scripsit inutilissimum*, aut Hirtium (q), ubi *inutiliter administrari*, aut Varronem (r), ubi *bibitur inutilius*; res ipsa ostendet, ita dici, ut ab eodem Varrone (s) apum reguli plures dicuntur *inutiles fieri propter seditiones*, &, ne ab nostris Medicis recedamus, ut a Cornelio Celso (t) *cum omnibus inutilis esse dicitur post cibum aut contentio, aut fatigatio animi, tum his præcipue, qui vel capitis, vel arteriæ dolores habere consueverunt*, itemque ubi remedium proponit (u), *si fungos inutiles quis assumpsit*. Copia igitur inutilis escæ copia erit ciborum pravorum, quales videlicet sunt falsi, acres, & qui facile corrumpuntur; utor enim Sennerti (x) verbis, quibus hæc continuo subjecta sunt: *hinc pauperes, qui pravis illis cibis utuntur, frequentius scabie infestantur.*

Ad proximum caput VII. de *Threnesi*, ubi scriptum est versu quarto *Sive meri gustus*, cum adnotasset Burmannus hanc explicationem *Pictorii, meri hic pro stomacho accipitur*; non miror quod mox addidit: *Pictorii explicationem quæ meri non intelligo.* Meri enim est nomen, quo Arabes, & qui diu secuti sunt Arabes barbaro, & semibarbaro sermone Medici stomachum, id est gulam, significabant. Alienum autem adeo est quod hic Pictorio venit in mentem, videlicet quod ab Samonico de vino dictum est, id de stomacho dictum esse, deinde vero si de stomacho dictum esset, Arabico nomine tunc dici aut potuisse, aut decuisse; ut excusandus sit Burmannus, si tam absurdam explicationem non est assecutus.

Sed nec ego satis assequi possum, quid ipsum Bur-

mannum cogeret, ut de addenda vocula cogitaret in versu tertio capitis XIII. de *Dentium vitio*,

*Cum Baccho violas decoxeris, ore teneto.*

Adscribit enim, *An in, vel ex Baccho, ut solent loqui Medici.* Certe autem Scribonius in *Medicis Compositionibus* (y) non aliter atque hic Serenus, locutus est: *omnia contusa cribrata, melle Attico decocta, & rosæ aridæ aqua decocta*; aut ne mihi ob ea quæ sequuntur, aut antecedunt, nodus ibi in scirpo quæ-ratur; mittamus, obsecro, alios Medicos, &, quemadmodum alibi locutus sit hic ipse noster Poeta Medicus, videamus. Sic igitur capite de *Podagra* (z),

*Aut nitidum ranæ decoctum viscus olivo,*

capite autem, quod inscripserunt *Vulneribus ex re dubia curandis* (a), modo prorsus gemino, nedum consimili ejus in quo hæsitat Burmannus,

*Aut hederam Baccho decoctam, & semen anethi.*

Me quidem cui non animadversam credebatur in aliis versibus multo evidentissimam inscitiam operarum, plus nimio offenderet una ex illis intrusa voculis, si legeremus *Cum in Baccho*, aut *Cum ex Baccho*. Utcunque enim versus constaret; aures tamen ferre non possent. At factum bene quod in versu illo de *Podagra* ne locus quidem sit quo contrudi possit alterutra.

Age nunc transeamus ad caput in quo paulo diutius moremur. Versus enim habet quos in Epistola (b) consideravi. Est proximum XV. cujus hoc initium est,

*Ægrescunt teneræ fauces, cum frigoris atri*

*Vis subiit, vel cum ventis agitabilis aer*

*Vertitur, atque ipsas flatus gravis inficit undas.*

Burmanno primum illa displicent, *frigoris atri*. Nescio, inquit, quo modo non placet illud epitheton: nec quis atrum frigus dixerit, scio; artum vocari, ut adstrictum, posse credo. sed rectius acris, quod penetrabile alii Poetæ dicunt, præferrem. quum frigoris acris vis subiit. ita Lucretius IV. 261. acris ferit frigus.) Hanc ego partem non agitaveram: nec sane displicere ita poterat illud *atri*, appositum, si quod aliud, huic Poetæ persæpe usitatum, & frigori satis conveniens, sive ut infestum, noxiumque spectetur, sive ut eo acrius, quo cum atriore, latente videlicet sole, conjunctum est die, sive demum ut cutem livore inficit, quo intellectu atrum ab Horatio (c) dictum esse venenum, Viris doctis placet, sicut a Virgilio quoque, nec semel, cujus hemistichium (d), *membris agit atra venena* Samonicus transtulit in poema hoc suum (e). Servius certe, ejusdemmodi explicans Virgilii locos (f), sic dixisse atrum, itemque nigrum venenum, ait, *ut pallida mors dicitur, vel tristis senectus*, nimirum quia nigri sunt homines post venenum.

At enim quis frigus atrum dixerit, non succurrit. Sed neque, ut video, quis artum: quo de verbo hic quidem, nihil dico, ut neque de ingrato illo terminationis ejusdem in tribus continuatis vocibus sono, *frigoris acris vis*; quando Burmannus ipse alio videtur inclinare; hæc enim continuo addit: *forte tamen Auctor scripserit, quum frigoris artus vis subiit, cum vis frigoris subiit membra humana. ita cap. IX. & VI. sed judicet lector.* Utor permissio: & fauces quas frigidus aer subjerit, hic aperte adeo significari, dico, ut non oporteat huc artus induci, quos frigus pervaserit, de quibus videlicet jam satis supra IX. illo capite actum erat. Nihil igitur hic muto.

Atque utinam ne in fine quidem tertii versus quidquam mihi visum esset in *Asulani*, & quorundam aliorum scriptura mutandum. Nam et si quam præferbam, ea in aliis libris extabat; tamen diu est cum per me intellexi, longe melius esse cum primis *undas* legere, quam cum aliis, *undis*. Subpudet me; ut verum tibi fatear; tarditatis meæ, quæ in re apertissima adduxit ut quærerem, *quid ad fauces, si ventus gravis inficit undas?* Ut excusari me, cupio; sic libens excusatum volo Burmannum, qui non ita absimili, si finem spectes, interrogatione utitur: *denique licet jam ventus inficeret mare (ut ita Lucret;*

scri-

(n) Nat. Hist. l. 32. c. ultim. & l. 9. c. 17. (o) Vid. Epist. I. p. 279, 29. (p) Hist. cit. l. 22. c. 24.  
(q) de Bello Alex. c. 65. (r) de Re Rust. l. 3. c. 5. (s) Ibid. c. 16. (t) De Medic. l. 1. c. 5.  
(u) Ibid. l. 5. c. 27. n. 17. (x) Medic. Pract. l. 5. p. 1. c. 27. (y) 120. & 230. (z) XLII. v. 16.  
(a) LXIII. v. 8. (b) p. 265, 15. (c) Carm. l. 1. Od. 37. (d) Georg. l. 2. v. 130.  
(e) c. XLVI. de Serpent. mors. v. 15. (f) ad Æneid. l. 2. v. 221. & l. 4. v. 514.



scribere autem voluit *Lucan* ; V. 564. niger inficit horror terga maris ) an inde , inquit , faucibus hominum ægritudo nasceretur ? Scilicet oblitus uterque nostrum , Samonicum pro pauperibus scripsisse , haud animadvertit id quod ipsis præ cæteris frigida tempestate accidit , quippe simul magis ex corporis labore incaltescentibus , simul caventibus minus , qualem statim non modo aerem hauriant , sed & potionem . Res omnibus notissimas placet eloqui Etmulleri ( g ) verbis , qui inter causas externas , quibus fiunt vel ipsæ faucium inflammationes , sunt , inquit , in specie subitaneum frigus inspiratum , aut potus nimis frigidus post nimiam ac intensam corporis incaltescentiam . Serenus igitur cum primam faucium ægritudinis causam , haultum ore præfrigidum aerem indicasset ; tum alteram memorat , præfrigidum potum : quem undarum nomine , quo aquam persæpe solet , pauperum potionem , designat , undarum autem , quas flatus gravis , id est ventus nimio frigore noxius , hoc ipso vitiat , cum propemodum gelidas reddit . Vel nimis igitur apparet , quid ad fauces ægras faciendas undæ attineant , quas ejusmodi ventus infecerit , & quam longe a Poetæ sententia abessent undæ illæ aut aeris , quas ego comminiscabar , aut maris , quod alter ; ut pro undas retineret auras ; commemorabat , flatum huc denique nescio quem pestilentem inducens quo auræ inficiantur . Quæ tamen interpretatio si a doctis Viris probabitur ; non eam difficilius huic meæ secundæ anteponam , quam secundam hanc anteposui primæ . Cæterum pluribus , quas , ut semper alibi , ita hic quoque Burmannus valde laudabili , & perutili diligentia producit , variantibus lectionibus una addenda est , quam prope ducentos ab hinc annos , tanquam vetustiore , & magis probatam , Medicus doctissimus sequebatur Jo. Philippus Ingrassias ( h ) . Legebat enim pro undas , uvas , id est uvulam . Animadvertit tamen , non modo Cellsum , Scribonium , aliosque , sed & paulo inferius , hoc ipso capite , Samonicum eadem significatione non uvas , sed uvam scripsisse ; ut mihi quidem minime appareat , cur aliter primo loco scribere , aut emphasim illam adjungere in pronomine ipsas debuisset , quod pronomen , si undas , ut vel tunc alii , legas ; habeat locum : si uvas ; non habeat .

Tertiam , quam Samonicus profert , causam faucium ægritudinis , rabidum clamorem , ipse illustrat Hortensii exemplo ;

*sic est Hortensius olim*

*Absumptus ; causis etenim confectus agendis*

*Obticuit , cum vox domino vivente periret ,*

*Et nondum extincti moreretur lingua deserti .*

Hic Burmannus . Erravit forte Serenus de verbis Ciceronis , in libro videlicet qui inscribitur Brutus , sic Hortensii vox extincta fato suo est , nostra publico . Nam Cicero de immaturo obitu ejus , quo eloquentiæ ejus finis est factus , potius agere videtur , inquit ; in tempestivo autem dicere voluit , Rei nimirum Publicæ ; neque enim esse potest mors immatura seni ; Hortensius autem quarto & sexagesimo anno est mortuus , cum perpauca ante mortem diebus Bruti socerum defendisset Appium : quæ omnia ex eodem M. Tullio ( i ) habemus . Hinc vero , ut laudatus a Burmanno indicaverat Baylius ( k ) , ratio petitur qua coarguatur Serenus . Hortensius enim , voce orbatus , quomodo pro Appio Claudio dicere paulo ante mortem ( l ) potuisset ? Scilicet hæc quæ in uno eodemque Ciceronis libello sunt , eruditus Vir Serenus non viderit ! præsertim cum eorum quædam parvo intervallo ab iis verbis disjuncta sint , quibus forte verbis ipse deceptus existimatur . Atqui non dixit , Hortensium diu fuisse sine voce : potuitque hic in ea ipsa Appii defensione , non secus ac L. Crassus in actione contra Philippum ( m ) , morbum contrahere quo absumptus est , & quem a vocis privatione inchoatum credere nihil vetat ; ut dies aliquot ante mortem , quamvis cæteris

vigeret facultatibus , loqui tamen , causasque orare non posset . Qui dies ut perpauca fuerint , tot certe fuerint , necesse est , ut Appius postquam , in judicio etiam ambitus , absolutus fuit , quæ de re Tullius in duodecima ad ipsum Epistola ( n ) videndus est , potuerit , ut proxima docet Epistola , non solum auctoritate orationis , sententiaque sua , sed etiam opera , consilio , domum veniendo , conveniendis Amicis Tullii , nullum onus officii cuiquam reliquum fecisse , cum de Supplicationibus eidem Tullio decernendis agi debuit , actumque est . Quas posteaquam non sine magna difficultate , & diligentibus prefationibus decretas esse , Ciceroni scripsit M. Cælius Epistola undecima ( o ) , tum denique Epistola duodecima , Hortensium tunc animam agere , significavit . Quarum , & duarum , quas ad Appium missas diximus , Epistolarum non esse , ut aliarum alibi , perturbatum ordinem , attenta earum lectio ostendit : quem contra perversum esse in duabus agnoscimus , ad Atticum scriptis ( p ) . Cum enim ex septima appareat , Ciceronem necdum Rhodum venisse , ex sexta intelligitur , ei jam esse nunciatam Hortensii mortem ; de qua tamen sibi , cum Rhodum venisset , allatum esse , initio ejus libri ( q ) scribit qui paulo ante citatus est . Sed hæc fortasse alias . Nunc enim satis est pro Sereno aliquid respondisse , Pro quo & illud addi licet , non tot demum sæcula ab Hortensii morte ad ipsum intercessisse , ut verisimile sit , non potuisse etiam tum memoriam superesse inter Romanorum doctissimos , quo revera fato , & quomodo tantus Orator absumptus esset .

Caput XIX. ut plura habet quæ in Epistola attigimus , sic & plura obtulit Burmanno , quorum in aliis nobiscum faciat , in aliis discrepet . Nobiscum facit ; si errorem operarum illius corrigas ; in capitis inscriptione sic legenda , *Fellis vomitui , & phthisi arcendis* .

In primo autem versu discrepat : quem cum plerique sic legerent ,

*Lutea si crescunt , & cunctis noxia fella ;*

credidi , & credo ob eas causas quas tunc proposui ( r ) , longe melius fore , si ex libri antiqui fide pro cunctis rescribamur fundis , id est rejicis . Non improbat hæc Burmannus . Addit hoc tantum : mihi præ cunctis noxia non displicet ; sic enim & aliqui legebant . Vides , hoc illi condonandum , qui Medicus non esset . Nam inter tot bilis genera , quorum viginti quatuor , & famosa quidem , numerat , describitque Sanctorius ( s ) , luteam non esse præ cunctis noxiam , quis ex Medicis ignoret ?

Sed ab initio capitis veniamus ad finem , qui ad phthysim spectat , & plerisque omnibus est ad hunc modum ,

*Proderit & veteris sevi pila sumpta suilli .*

*Carne asina , sevoque capræ medicina salubris .*

Pro ultimo hoc versu illum quem in Epistola ( t ) notavimus , unus ferme ediderat Asulanus ,

*Quæ capulas quoque producit medicina salubri .*

Quo in versu cum libri calamo scripti ( quorum inspiciendorum nulla mihi , ut scis , copia fuerat ) sic variarent , ut alii Quæ , aut Quas , aut Quò , itemque alii capulas , aut scapulas , aut scapulis , aliique producet , aut perducit , alii denique salubris , salubres , salutis haberent ; Burmannus ex conjectura a veri similitudine non longius remota , adscripsit , forte quæ scapulas quoque perducit medicina salubris ; addiditque , perducere esse unguere , tractare , fricare . Sed cum Serenus ( u ) corpus quidem , frontem , artus , locos , sæpe dixerit , succo , aliisque esse perducendos , nonnunquam ( x ) & lanam succidam , & ranæ sanicem , aliudve membris , aut corporibus esse perducendum , nunquam tamen , quod nunc meminimus , luccum ipsum , aliudve , dixerit , corpus , artusve perducere ; fortasse melius quis rescriberet ,

*Quo scapulas quoque perduces , medicina salubris ;* ut ad præcedentem versum duo ultima hæc verba referrentur .

Et

( g ) Prax. l. 1. S. 18. art. 2. ( h ) de Tumor. p. n. tr. 1. c. 1. ( i ) Philipp. 2. & in Bruto ,  
( k ) Lexic. Critic. in Hortensio . ( l ) Cic. in cod. Bruto . ( m ) Id. de Oratore l. 3. ( n ) ad Familiar. l. 3.  
( o ) Ibid. l. 8. ( p ) l. 6. ( q ) Brut. ( r ) p. 273, 27. ( s ) Comment. in 1. Fen l. 1. Can. Avic. qu. 82,  
( t ) p. 247, 18. ( u ) c. 5. 39. 34. 46. 49. 40. ( x ) c. 25. 35. 43. 60.



Et sic quidem ubi hic versus retinendus videatur. Sin autem is potius quem proposuimus supra, ut pleræque habent editiones; tum vero non tam id quod Keuchenius reponendum crediderat; *Lacte asinæ*, quam ea quæ pro lectione hac Burmannus addidit, sunt a nobis considerata. Hic enim primum fatetur quidem, perperam negavisse Keuchenium, asininam carnem phthificis olim fuisse a Medicis datam, siquidem hoc in Epistola ( *γ* ) demonstratum est: non tamen extra veri speciem esse, ait, *Keuchenii lectionem*; nihil enim hodie familiarius est Medicis; quo loco præstitisset testimonia proferre de priscorum consuetudine. Imo quia, inquit, *caro tam asini, quam asinæ prodest, hic vero asinæ legatur, lac præferendum videtur*; quasi vero censere non potuisset Samonicus, asinæ carnem magis, quam asini, convenire eadem ratione qua asinæ lac magis convenit, quam vaccæ. Certe libro 2. ex iis qui inter Hippocraticos inscripti sunt de *Vittus Ratione*, postquam de plerorumque animalium, & in his, de asininis quoque carnibus, sigillatim ( *ζ* ) verba sunt facta, generatim traditur ( *α* ), animalia mascula femineis esse sicciora: & notius est quam ut hic debeat memorari, passim in Medicorum præscriptionibus inter hæc; atque illa discrimen attendi. Sed in Epistola ( *β* ) indicatum præterea a me fuisse, memineris, quare Samonicus hinc eum Plinii spectasse locum videatur in quo de asininis carnibus in phthisi proficuis, non de lacte, sermo est. Si tamen lac in hoc versu, vel lacte nominandi casu, ut vetustiores solebant, cum Burmanno legendum esset; alia insuper mutatione opus foret, quam ex conjectura quadam minus difficilem reddit, quasi cum *sevomque* antiquo more fuisset scriptum, librarii hinc fecissent *sevoque*. Ego, etsi has conjecturas laudo; tamen *scabri quid in constructione*, in quibusdam præsertim Auctoribus, malim, quam plura mutare.

Capita explicans duo, XXIV. & XXXIV. quorum alterum est de *Præcordiis sanandis*, alterum de *Profluvio cujusque sanguinis*, in singulis singulas aliorum interpretationes Burmannus offendit, quæ ipsi dubitationem afferant. Prima interpretatio Pictorii est, qui ad verba illa quarti versus ( *\** ) *nondumque tepentia*, adscripsit, laudante Keuchenio, *id est tepido calidiora*. Hoc vero an possint significare, dubito, inquit Burmannus, *cum tepere minus sit tñ calere*. Quod exemplis confirmari posse, indicat, minime; aut ego fallor; necessariis. Comparete enim illa, non simpliciter, effertur; itaque in tepore ipso calor est, si cum frigore conferas. Sed hæc levia. Dubitatio autem altera ejusmodi est, quam Burmanno accidere posse, non credidisset; certe nollem accidisse. Serenus scripserat ( *c* ),

*Menstruus immenso si profluit impete sanguis,  
Succida lana malos remoratur subdita cursus.*

Ad verbum hoc subdita adnotavit Constantinus, in pessa. Refert id Burmannus, & continuo hæc addit, *Nescio, an non pertineat ad v. 655. ( d ) ut sit pro ex passo, vel ad v. præced. pro immenso, certe non capio hanc notam*. Verum, ut Medicus non esset; qualem tamen esse decebat Sereni interpretem; at certe quotus quisque Philologus non perlegit Cornelium Cellum? qui toto eo, non brevissimo, capite ( *e* ) quod inscripserunt de *Pessis*, tum quid essent ea, docuit, *quæ feminis subjiciunt*. πῶσος Græci vocant, tum variis adjectis exemplis ostendit. Quin etiam Philologi ipsi hæc attigerunt; neque in *Variis Mureti Lectionibus* caput ( *f* ) deest, quo sententia confutatur Marcelli Virgilii, hinc pessulum in Eunuchio Terentiana ( *g* ) dictum putantis, quod Poeta ad hos respexisset, de quibus loquimur, pessos. Cæterum quid magis humanum est, eoque facilius excusandum, quam non omnium quæ legerimus, meminisse, præsertim si quis tot, & tam varia legerit, ut Vir longe eruditissimus, Burmannus; qui ex sua multiplici, assiduæque lectione benigne nimis conjecturam faciens de mea, credidit in adnotatione ad caput XLII. ipsa

quoque, si Superis placet, Jurisconsultorum volumina, vel quæ apud Batavos suos prodeunt, a me verari potuisse: qui ne illa quidem, nisi tu mitteres, eram visurus quæ de mea in Samonicum Epistola ab hinc annos undeviginti ibi ediderat ipse Burmannus. Sed adnotationem illam videamus.

Jam nosti, ut capitis modo memorati versus primos quatuor perpendens,

*Quædam sunt rabidæ medicamina digna podagræ,  
Cui ter tricenæ species Epidaurius ipse*

*Dixit inesse deus; requiem tamen indere morbo*

*Fas erit, & tristem saltem mulcere dolorem;*

nosti, inquam, ut primum versum cum ultimis non cohærere, existimaverim ( *h* ), neque immerito factum esse ab iis qui propterea legendum censuerunt, *Quædam haud sunt*. Nosti etiam, ut sicui forte sic legere minus placeret, huic alterutrum faciendam dixerim, ut aut pristinam scripturam commode explicaret, aut novam aliam perquireret, ut, *exempli causa, si Poeta non Quædam, sed Quænam scripsisset, atque ita querendo, quænam vel digna, vel ( quod alii legébant ) summa possint esse podagræ medicamenta, nulla videlicet istiusmodi esse, indicasset*. Burmannus quid super exemplo hoc scripserit, mox dicam: prius autem, quomodo scripturam pristinam maluerit explicare. Primum igitur ait, *Serenum non videri sibi negare, tolli posse omnem podagram, sed tantum, rabidæ ( id est quæ ad summum venit ) esse quædam medicamina apta, quæ si non tollant, mulceant tamen &c.* Sed ipsius *rabidæ* cum remedia, Serenus ajat, esse *digna*, sive, ut codex, & Vetus editio, aliæque a me laudatæ habent, *summa*; quonam modo illuc statim descendat, ut tamen ( tamen, inquam ) dicat, *quietem saltem, & mitigationem sperari posse*? Hæc erant nimirum quæ videbantur, & adhuc videntur non cohærere. Sensit hoc, credo, ipse Burmannus. Itaque elegantior, & ut putat, verior lectionem subiecit, *qua omnes astus de hoc loco componantur*. Levi & ipse mutatione legit, *Quædam sint*, tumque interpretationem hanc esse posse, non dubitat, ut dicat Poeta, *licet quidam jactent circumforanei agyræ, esse quædam medicamina, quæ rabidam podagram tollere possint, putem ego, illa minime univrsum depellere posse morbum, nec tamen ideo destituere pedibus laborantem fas esse censeo, sed posse quibusdam remediis mulceri & leniri dolorem*. Nunc postquam hanc tibi, in qua ipse nihil hæsitat, interpretationem descripsi, miraberis fortasse magis, si dixerò, cur hæc maluerit quam ea quæ, *exempli dumtaxat causa, indicaveram*. Ea, inquit, *aliquantulum coacta & dura mihi apparent*.

Quod dictum multo etiam magis miraberis, ubi non me, sed Scaligerum, Virumque alium eximium spectasse dixerò, ut auctores exempli illius. Hæc enim modo ante judicium id suum scripserat: *Scaliger olim in ora Codicis Vossiani correxerat, Quænam sint. Etiam Morgagnus in Epistola conjicit, Quænam sunt? Quod nescio, an debeat monitori alii: certe potuit videre Ampl. Bynkershoekii Observationes juris, in quarum libro III. cap. 1. vir Ampliss. legit per interrogationem, quæ negantis vim habet, Quænam sunt rabidæ medicamina digna podagræ? Id est nulla sunt. Quam gaudeo, in eadem me, in quæ duo ejusmodi Viri inciderant antea, forte incidisse; tam ægre fero, id cum scriberem, ignorasse: neque enim tantummodo, ut solitum me esse, omnes scitis, acceptum illis retulissem; sed præterea non dubitanter, nec exempli causa, ut feci, attigissem, imo ut eorum auctoritate confirmatum & amplexus ipse quidem essem, & tibi fidenti animo proposuissem. Cæterum eidem monitori, cui debuit Scaliger, & post Scaligerum Bynkershoekius, ego quoque, id quidquid est, debeo, nimirum attentæ propositorum versuum considerationi: nec video, cum secundus quidquam debere non dicatur primo, cur ego suspitione aspergar, quasi illud deberem secundo: cujus a me libros, per-*

san-

( *γ* ) p. 291, 1. ( *ζ* ) n. 9. ( *α* ) n. 12. ( *β* ) p. 291, 17. ( *\** ) c. 24. ( *c* ) v. 13. in cap. 34.  
( *d* ) id est 23. ibid. ( *e* ) 21. in l. 5. ( *f* ) 9. in l. 11. ( *g* ) Act. 3. Sc. 5. ( *h* ) pag. 284, 22.



sancte jurare possem; nunquam esse visos, si id tanti esset, aut me ipse non probe nosset.

Quod vero id quod illis verum, mihi non improbabile visum est, id, inquam, coactum, & durum Burmanno videatur, haud aliter levem reprehensionem hanc feram, quam cum legi ante annos aliquot in egregio Eruditissimi Gunzii de vulgo dicto Plinio Valeriano Libello inscriptionem capitis IX. in eaque hæc, *De Macro error Barthii, Daumii, Fabricii, & Morgagnii*. Gratiam enim habui Gunzio, quod in ejus me erroris societatem, tanquam in equum Trojanum includere cum principibus, ut Cicero (i) ait, voluisset: quanquam perfectio eo capite, magis quidem agnovi ejus erga me humanitatem: sed quis meus fuisset error, satis cognoscere non potui. Res ad eandem Epistolam attinet, de qua Burmannus, & expediri verbis potest non ita multis, quæ hic tibi describam, Gunzii primum, deinde meis. Ille sic: Daumius rescripsit Reinesio, citatum hunc auctorem (Plinium Valerianum) sub Plinii nomine fuisse a spurio Macro, quod, licet non nominet, videtur tamen accepisse a Barthio, idem prodente, sed, quod audacter dicam, sine ulla verisimilitudine. Quoties enim Plinium citat poeta (Spurius ille Macer) utut quæsieris, nihil, spondeo, simile in toto nostri auctoris (Plinii Valeriani) opere inveneris. Mirum igitur est, Daumii, ut videtur, auctoritate imponi sibi passos esse Fabricium, & Morgagnium Epist. in Cels. & Seren. Samon. p. 67. Hag. Com. quæ pagina 7. est in Patavina editione (\*). Ego vero, ut ibi ostenderem, quo de Plinio locutus esset Atrocianus, cum a Macro illo Plinium plerisque in locis citari, dixit; hæc scripseram, majorem enim Plinium, non quem Valerianum vocant (nam hunc a Macro citari, ajunt Daumius, & Fabricius) intellexisse Atrocianum, ex eo apparet quod reapse majoris Plinii scripta plerisque in locis hujus Poematis spurii Macri laudantur. Num igitur quod ait Daumius, secutus sum? an potius evidenter ivi in alia omnia? Scilicet ne forte Plinii nomine falli crederer; quod Daumius, & Fabricius tradiderant, non erat mihi reticendum. Ne vero a proposito aberrarem; ab eorum sententia mihi erat discedendum: quod & feci, commemoraturus libenter vel istam ipsam, si tunc facta esset, Gunzii sponsonem, ut quæ propositum non modo non infirmare, sed & confirmare posset meum. Neque enim Atrocianus, & ego cum diximus plerisque in locis, ad alia respeximus, in quibus forte Plinium Valerianum laudaret Macer: imo haud aliud dicere voluisse Atrocianum, & quod consequitur, me quoque ejusdem verbis utentem, quam multis in locis, ex ipso illius proposito, quod mox in Epistola explicavi, tam planum est, quam quod planissimum. Quod vero ea vox pleraque non majorem semper partem, sed & multa damtaxat, aut non pauca significet; ostendi, si quis dubitaret, non uno liceret exemplo, illo præsertim Cornelii Nepotis (k), quem idoneum in primis fuisse latinæ auctoritatis, nemo inficiabitur: Timothei autem moderate sapientisque vitæ cum pleraque possimus proferre testimonia, uno erimus contenti. Sed jam ad Burmannum revertamur.

Qui ex eodem capite de podagra hæc interpretans, (l)

*Seminecisve hirci reserato pectore calces*

*Insere,*

cum explicationes indicasset recte docentium, hoc vellet Samonicum, ut in apertum hirci pectus statim podagricus pedes immittat; hujusmodi suspicionem proposuit. Sed, inquit, suspicionem movet Plin. Valer. III. 14. qui pellibus vituli marini calceandos pedes censet, cui consentit Marcellus, an non & hic de pedibus non in ipsam pectoris hircini aperturam immittendis, sed de calceandis posse capi. sed tunc potius induere, quam insere dixisset. Imo non dixisset seminecis, ejus vocis oblitus videtur Burmannus, cum locum dare cepit istiusmodi suspicioni. Non ta-

men hic quidquam propter eam oblivionem mutavit.

Sed capite XLIX. quod est de Quartana, miraberis & viciniorum vocum oblitum, & ea de causa, magis communem, magisque veram, ut opinor, lectionem facile mutantem. Versus hi erant, (m)

*Sume tribus digitis apprensus semen anethi,*

*Tantumdem marathri, mulsum nec desit aceti,*

*In cujus cyatho prædicta salubriter hauris.*

Ipse autem ultimi versus initium sic edidit, ut extabat apud pauciores, *Uno sed cyatho*, hæc addens, quod confirmat Plinii Valer. d. l. (id est III. 5.) certe illud cujus quo referas, non video. At nos referimus ad istas ipsas proximas voces *mulsum aceti*, quemadmodum & rei natura, & ipse præmonstrat Samonicus, cum aut capite de fellis vomitu (n) quædam alia bibenda dicit *cyatho diluta gari*, aut capite de hydropisi (o)

*In geminis calidi cyathis potanda Lyæi.*

Quid? quod indicatus Plinii Valeriani liber capite, non 5. quod ad Tertianam febrem spectat, sed 6. quod ad Quartanam, non magis repositam a Burmanno, quam illam quæ antea apud plerosque erat, scripturam confirmat. In extremo enim eo capite hæc leges, quæ cum propositis Samonici versibus prorsus conveniunt, *Semen anethi tribus digitis comprehensum, & fœniculi tantumdem, & aceti mulsi cyathus unus potui datur*. Sumpta autem sunt indidem, unde ista Sereni, ex Tlepolemo, aut ex libro XX. majoris Plinii, capite 17. pariter extremo. *Tlepolemus ad quartanas trinis digitis seminis anisi & fœniculi usus est, in aceto & mellis cyatho uno*: quæ verba etsi ut Keuchenius protulerat, ita refero, neque dubito, quin alterutro in libro sit aliquid emendandum; tamen eodem quo dixi, spectare, satis intelliges, eoque magis, si quod ad Plinium adnotavit Harduinus, attendas, Sereni vetustiores libros omnes manu exaratos hic habere anesi, ex quo fortasse amanuenses fecerint anethi; facilius autem hoc credes, si animadvertas, in Keuchenii codice fuisse anisi. Unde igitur factum dicemus, ut lectionem potissimum illam emphaticam *Uno sed cyatho* a Plinio Valeriano confirmari, Burmannus crediderit? Certe quod ille scripsit *cyathus unus*, haud plus, minusve scripsit quam Celsus (p), exempli causa, cum ait, *vini austeri cyathus*; itaque satis apud Samonicum idem intelligebatur a legentibus *In cujus cyatho*.

Denique ad octavum versum capitis LIII. quod de fracturis inscribitur,

*Aut veteri Baccho capræ fimus inde petulcæ,*

cum hæreat Burmannus, & fimus neutro genere quis dixerit, se nescire, fateatur, imo sic corruptum fuisse, agnoscat, versum quoque vigesimum secundum capite XXXII; mirari subit, cur non Scaligerum secutus sit, a quo ita emendatum fuisse, ait, *finum inde*. Nam quod ipse addit, *sed primæ syllabæ modus repugnat*, nihil est, nec Scaliger poterat ignorare. Neque id eo dico quod Samonicum meminerim *fimi primam syllabam alibi produxisse*, ut ad caput XXXII. adnotavit Keuchenius, quod nec meminisse Burmannum, credo, ibi hanc Keuchenii, quam profert, adnotationem neque laudantem, neque rejicientem. Sed eo dico, quod non mutato illius syllabæ modo, Scaliger potuit rescribere *finum inde*, neglecta æthiopi, facile arbitratus, non dedecere in Sereno, qui Lucretii adeo, ut in Epistola (q) vidimus, studiosus fuit, quod hic, neque semel, post Ennium, & Lucilium, fecisset, ut cum scripsit (r),

*Nam quod flavidum est, e lavibus atque rotundis.*

(s) Sed dum abest, quod avemus, id exsuperare videtur.

(t) Semina, seque simul cum eo commiscuit igni.

Sed in re pervulgata opus non est exemplis pluribus.

Patuca

(i) Philipp. 2. (n) in ista alia quidem; in hac enim est p. 251. (k) Vit. exc. Imp. 13. (l) v. 9. (m) v. 10.  
(n) cap. XIX. v. 3. (o) cap. XXVII. v. 7. (p) De Medic. l. 4. c. 4. p. 201, 25. (q) p. 283, 14.  
(r) de Ret. Nat. l. 2. v. 465. (s) Ibid. l. 3. v. 1095. (t) Ibid. l. 6. v. 275.



Pauca hæc sunt illa in quæ forte incidî, cum alia quærerem, id est locos omnes, in quibus a me Burmannus dissentiret. Si tantum fuisset temporis, ut Adnotationes singulas possem attente perlegere; fortasse & alia animadvertissem, nec dubito, quin longe plura alterius generis, nempe non approbatione solum, sed & summa laude dignissima. Sereni in primis contextum universum, & quid in eo, & cur mutatum, perlibenter alias considerassem. Nunc vero a cæteris, quibus distringor, studiis gravioribus vix na-

ctus pauxillum hoc laxamenti quod satis esset ad ea cursim adnotanda, & scribenda quæ hætenus legisti, sentio, mi Vulpi, animo me potius, quam opera, satisfacere potuisse voluntati tuæ. Habes igitur Epistolam in Samonicum earum non dissimilem, quas in Celsum non ita pridem accepisti. Quamobrem si de hac feceris quod de illis rogavi ut faceres; erit id mihi quam gratissimum. Vale.

Patavii XIII. Kal. Februar. MDCCCL:

Le&uri poterunt interea hæc saltem sic emendare.

Pag. 4. col. 2. lin. 37. Præceptor - Præceptorî p. 10. c. 2. l. 33. tissimus - tissimes p. 12. c. 2. l. 35. se - te p. 15. c. 1. l. 6. Composit m - Compositiva p. 20. c. 1. l. 62. in libro - libro p. 26. c. 1. l. 76. me - meo p. 27. c. 1. l. 41. devoratum - devoratam p. 30. c. 1. l. 41. corrivata - corrivatam p. 32. c. 2. l. 7. quoque - quoque usum credo p. 37. c. 2. l. 3. decentis - recentis p. 38. c. 1. l. 41. erga - ergo l. ult. en - fen c. 2. l. 46. etsi - & si p. 39. c. 1. l. 26. dogmata - Veterum dogmata p. 40. c. 2. l. 56. humi - hum p. 43. c. 2. l. 72. seminis - seminis emittendi p. 45. c. 1. l. 12. ob - ab c. 2. l. 16. eandem - tandem p. 74. c. 2. l. 36. dimittendum - demittendum p. 95. c. 2. l. 19. quo - de quo

PARTIS PRIMÆ FINIS:






JO. BAPTISTÆ  
MORGAGNI

P. P. P. P.

OPUSCULORUM  
MISCELLANEORUM

P A R S A L T E R A.



V E N E T I I S,

M D C C L X I I I.

~~~~~

E X T Y P O G R A P H I A R E M O N D I N I A N A.

S U P E R I O R U M P E R M I S S U, A C P R I V I L E G I O.



TO BAPTISTE

MORGANI

M R N

OPUSCULORUM

MISCELLANEO RUM

PARIS A L T N A



NEW YORK

1811

THE NEW YORK PUBLIC LIBRARY

ASTOR LENOX AND TILDEN FOUNDATIONS



ILLUSTRI VIRO  
FRANCISCO MARIAE  
ZANOTTO

IN BONONIENSI GYMNASIO  
PROFESSORI DOCTISSIMO ET ELOQUENTISSIMO  
INSTITUTO SCIENTIARUM A SECRETIS  
FACULTATIBUS OMNIBUS QUAS TANTUM MUNUS POSTULAT  
ORNATISSIMO

PROPTER IMMORTALIA IN EAS FACULTATES ET IN SE  
MERITA

GRATO OBSEQUIOSOQUE ANIMO

D. D.

JOANNES BAPTISTA MORGAGNUS









PARTE HAC SECUNDA  
CONTINENTUR

**D**E Prospero Alpino Epistolæ duæ .  
pag. 7

De Philologo Ravennate, & de Angelo Bolognino Epistola. pag. 9

De Vita, & Scriptis Dominici Gulielmini Commentariolum. pag. 12

De Vita, & Scriptis Antonii Mariæ Valsalvæ Commentariolum. pag. 14

De genere mortis Cleopatæ Epistolæ duæ.  
pag. 21

De Ordinario Frontini Consulatu Epistolæ duæ.  
pag. 23

De quadam librorum M. Varronis particula, ut legitur in Veteri Codice, Epistola.  
pag. 28

In Vitruvii locum, ad tempus quo is scripsit, attinentem, & in alterum Veteris Auctoris Compendii Architecturæ Epistola. pag. 32

Lau-



Laudationes habitæ olim a Morgagno, cum  
Gymnasiarchas, aliosve Doctoris Insignibus  
exornaret. pag. 33

In Scriptores Rei Rusticæ Epistolæ quatuor.  
pag. 36







# DE PROSPERO ALPINO

## EPISTOLÆ DUÆ.

### EPISTOLA I.

CLARISSIMO VIRO

D. HIERONYMO DAVIDI GAUBIO

IN ACADEMIA LUGD. BAT. CHEMIÆ PRÆLECTORI DOCTISSIMO

Joannes Baptista Morgagnus S. P. D.



Ultorum ego Præstantissimorum Vi-  
rum qui cum in aliis, tum præsertim  
in hoc Gymnasio, scriptorum fama  
claruerunt, imagines mihi comparavi,  
quæ non solum pictorum artificio, ut  
ait M. Tullius (a), delectent, sed et-  
iam commemoratione hominum, & co-

gnitione formarum. Et vero satis explicare verbis ne-  
queo; ut me tibi indicem; quantum ad labores stu-  
diorum inflammer, cum Jacobi Sylvii, Julii Cæsaris  
Arantii, Constantii Varolii, Caspari Bauhini, Joan-  
nis Riolani, Marcelli Malpighii, & ne ab Decessori-  
bus meis longe abeam, cum Andrea Vesalii, Realdi  
Columbi, Gabrielis Falloppii, Hieronymi Fabricii ab  
Aquapendente, Julii Caslerii, Adriani Spigelii, Joan-  
nis Veslingii, Antonii Molinetti, Dominici de Mar-  
chettis oculos, ora, vultusque intueor, aut cum Hie-  
ronymum Mercurialem, Hieronymum Capivaccium,  
Joannem Thomam Minadour, Bernardinum Tomita-  
num, atque alios, aliis etiam Litterarum studiis illu-  
stres Viros lineamentis, quemque suis, & coloribus ex-  
pressos, quasi vivos, & præsentis, circumspicio.

Sed tot inter tabulas quibus museum hoc ornatur  
meum, imago, quam requiris, Prosperi Alpini desi-  
deratur: nec mirum, quando is qui duodetriginta haud  
amplius annis a Prosperi obitu Vitam ejus inter il-  
lustrum Virorum Elogia (b) Patavii edidit, Tomasi-  
nus, nusquam videtur eximii Professoris imaginem in-  
venisse, aliter inter cæteras quas plerorumque propo-  
suit, non omisurus. Haud me fugit, Paulum Fre-  
herum (c), cum Alpini Vitam ex Tomasino, un-  
de & Mercklinus (d), & novissime Vir Cl. Papa-  
dopolus noster (e), alique, repeteret, effigiem il-  
lius quandam protulisse; verum unde hanc tanto post  
tempore petierit, ignoramus.

Has mihi ob causas propemodum desperanti, &  
Tuæ tamen honestissimæ voluntati inservire maxime  
cupienti, fors fortuna hic tandem apud Sculptorem  
quendam obtulit quod sedulo per Amicos in aliis et-  
iam vicinis Urbibus inquirebam. Pictor nobilis Lean-  
der Bassanus, ut non minus amicitia erat, quam vi-  
cinitate, cum Prospero conjunctus, hunc ex Ægypto  
ad suos tunc primum revertentem, ad vivum pinxe-  
rat tanta quidem arte, & elegantia, quanta summo  
Artifici, summoque Amico summi Viri imaginem po-  
steris relicturo conveniebat. Hanc ipsam tabulam fe-  
liciter nactus, continuo ejus exemplum per Jo. Bapti-  
stam Cromer, quo ego diligentissimo Pictore in Ana-  
tomicis quoque Iconibus hic sum usus, fideliter de-  
scribendum curavi. Id cum his litteris accipies.  
Sed ne forte quæras, unde sciam quæ de tabulæ Au-  
ctore, & de eo quo picta est, tempore supra affirma-  
vi; en tibi quæ in tabulæ tergo majoribus litteris  
olim scripta, adhuc leguntur.

AN. A VIRGINIS PARTU MDLXXXVI.

MEN. FEBRUARIO

LEANDER BASSANUS PROSPERI  
ALPINO MEDICO QUUM STATIM

EX ÆGYPTO BASSANUM  
VENERIT GRATO ANIMO  
EFFIGIEM ITA EGREGIE  
GALIDAM OB AMICITIAM

PINXIT

AN. SUÆ ÆTATIS

XXXI.

Descripta hæc habes cum ipsis, quæ inveni, mendis,  
& lituris, quas inter illa est attentione digna, quod  
cum An. CIO D LXXXVI. M. Febuario ætas Prospe-  
ro tri-

(a) In Verrem l. 4. (b) Tom. 2. (c) Theatr. Viror. erudit. Cl. P. 3. (d) Linden. Renov.  
(e) Hist. Gymn. Patav. Tom. I. l. 3. S. 2. c. 23. n. 108.



ro tributā esset annorum xxxxi; merito primum illud x deletum est, quando inter omnes constat, die 23. Novembris A. cio d liii. fuisse natum, & quod consequitur, annum tunc vix complevisse 32. Verum ut a tergo quædam, ut diximus, deletæ, ita in ipsa tabula post illud tempus quædam litteræ additæ sunt, videlicet inscriptiones appictorum librorum, nisi forte illo jam tempore magna ex parte scriptos habuisse, credamus, quos aliquot certe post annis emisit.

Et quoniam ut Alpini imaginem scio, sic quoque de ejus Vita aliquid te editurum esse, credo; perpauca quæ in eam rem animadversa habeo, subijciam. An Mater ejus etiamtum viveret, cum de vitæ genere deliberavit, an Medicinam ipse fecerit Melphis, an e vita excesserit die 5. Februarii A. cio dcc xvii. quorum alia ab aliis tradita video, non modo vehementer dubito; sed unde horum pleraque per errorem accepta sint, scio. Tomasinus certe qui mortuum scripserat A. superiore, eodem quo natus fuerat, die, cum deinde in librum manu exaratum, quem & ego vidi, forte incidisset, quo in libro ponitur insequenti anno mortuus eo quo dixi, Februarii die; sive eorum oblitus quæ antea tradiderat, sive ei libro, unde quamplurima sumpsit, magis credens, hunc, cum de Gymnasio Patavino (f) scriberet, secutus est. Utri Tomasini loco major fides habenda esset, cum dubitarem, neque aliter facile liqueret; in mentem

venit, ut volumina inspicerentur, in quibus publice in hac Urbe quis quo die, qua ætate, quo morbo decesserit, ex ordine perscribitur, si forte id institutum ab initio usque sæculi XVII. receptum fuisset. Receptum fuerat. Inventum est igitur quod primum scripserat Tomasinus, Prosperum Alpinum, Rei Herbariæ Doctorem, die 23. Novembris A. cio dccxvi. annos natum tres & sexaginta, post semestrem ægrotationem obiisse. Itaque obortus in re gravissima quod ad Alpini Vitam attinet, error, aut certe dubitatio omnis sublata est. Cæterum Tomasinus quæ in Elogiis omiserat, posteriore illo Scripto (g) supplevit, ut A. cio dc lxxxiii. Prosperum hic publice docere cœpisse, & novissime annuo præmio florenorum dccc. docuisse, perhiberet.

Hæc habui quæ de Alpino Patre cursim ad Te scriberem, Vir Clarissime, si forte hinc aliquid subseruire tibi posset novam laudatissimi ejus Operis editionem pro singulari tua solertia, eruditione, diligentia apparanti. Tu meam Tibi quem æque humanitas, ac doctrina commendat, inserviendi voluntatem æqui bonique facies, & Viro Summo Hermanno Boerhaavio, cujus a Te benignam salutationem accepi, etiamsi proximis ipse diebus rescripsi, tamen meis verbis salutem plurimam dices. Vale.

D. Patavii Kalendis Octobris cio dccc xxxii.

## E P I S T O L A II.

Eidem.

CUM Tuæ mihi Litteræ; ad quas novissime respondendi, redditæ sunt, Alpini imaginem requirentes; continuo Tomasini Elogia in manus sumpsi, sperans fore, ut in quibus Alpini Vitam a me lectam esse, meminissem, in iis effigiem quoque invenirem. Cum hæc nusquam esset, nullumque ejus appareret indicium; protinus Freheri Theatrum inspexi, cumque in eo rudem quidem, sed tamen quandam reperissem; vehementer mirabar, undenam illam, nisi ex Tomasini Elogiis ex quibus Alpini Vitam excerpterat, petissem. Itaque eadem iterum Elogia a capite ad calcem pervolutavi, nec prius quærendi finem feci, quam mihi sum visus intelligere, in iis non modo non esse, sed ne esse quidem posse. Cum enim imagines cæteræ in ipsis essent paginis impressæ, in quibus Elogia descripta sunt, paginarum autem, nusquam abruptus, constaret numerus; nulla profecto imago potuisse excidere videbatur. Igitur Alpini effigiem a Tomasino inventam non esse, cum ego, & Amici crederemus; quæsi vi ipse, & tandem aliquando repertam alibi, cum superiore epistola ad te misi.

Vix miseram: ecce Vir Doctus, familiaris meus, qui menses aliquot hinc abfuerat, ex itinere salutatum me venit, cumque ex aliis, ut sit, sermonibus in alios, & in eum denique incidissemus, ut inventam nuper Bassani tabulam quæ Alpinum sibi amicissimum præclare pinxerat, commemorarem; quæsi vit

ille, num alia esset ab ea imagine quam proposuisset Tomasinus. Ubinam? inquam. Ille vero, in Elogiis. Tum ego meum horum exemplum, pro perfecto mihi a peritissimo Bibliopola venditum, nitidum adhuc, & pene novum, proferri jussi, in quo cum ille neque inveniret, neque inveniri posse, cerneret; nihil unquam sibi fuisse longius, dicere, quam ut domum rediret, ac in exemplo suo quæreretur. Redit, quærit, invenit, ad me mittit. Exemplum, ut libri qui semel, haud amplius, editus sit, prorsus, cætera quidem, mei simile, in eo autem dissimile, quod imagines aliquot, serius, ut opinor, ab Auctore inventas, habet extra institutum paginarum ordinem assutas. Ex iis effigies Alpini est, non, ut a me missa, ætate florentis, sed senis, quam Freheri Sculptores describentes, incredibilem in modum, ut alias plurimas, depravarunt in meo quidem Theatri exemplo; sic enim loquar, necesse est, nequa iterum Bibliopolæ fraus, & fallacia eo me forte inducat, unde animus abhorret maxime, ut aut negligens, aut mendax fuisse videar. Quæ me causa impulit, ut statim has alteras litteras ad Te darem, Vir Clarissime, testes apud Te futuras meæ fidei, meæque, Tuo fortasse proposito non inutilis, sedulitatis. Vale, & hominem qui suos ultro agnoscit, indicatque errores, vel hoc ipso nomine amare perge.

D. Patavio Pridie Nonas Octobr. cio dccc xxxii.

(f) l. 4. (g) l. i. c. 34. & l. 3. c. 14.



2

---

DE PHILOLOGO RAVENNATE ET DE ANGELO BOLOGNINO  
E P I S T O L A.

---

ORNATISSIMO DOCTISSIMOQUE VIRO  
D. D. J O A N N I A S T R U C  
Medico, & Professori Regio

Joannes Baptista Morgagnus S. P. D.

**L**itteras Tuas, Vir Præstantissime, die 14. Februarii ad me datas, quis apud se diu retinuerit, pervolutaverit, novoque addito, italice inscripto, integumento ad me demum miserit, nescio: illud scio, ante hos paucos dies mihi redditas, gratissimasque fuisse, quippe datas a Medico, & Scriptore Nobilissimo, eodemque, quod vel ipsæ ostendunt, longe humanissimo. Atque utinam is essem quem pro Tua ista credis humanitate, & sicuti Tractatus Tui de Morbis Venereis præclaræ laudes ad nos pervenerunt, sic etiam ipse Tractatus pervenisset; tunc sane ita uti ego non minus quam Tu, vellem, Tua omnia persequi, & conficere Mandata possem. Nunc vix de Philologo quidem Ravennate quæ requiris, pleraque, de Angelo autem Bolognino perpauca licet significare; nam de Jo. Antonio Roverello, & de Jacobo Cataneo non plura mihi sunt nota, quam Tibi.

Philologi igitur illius de lue venerea Opusculum, quod frustra a te adhuc quæsitum scribis, in Bibliotheca mea est, ita inscriptum, ut ex *Lindenio Renovato* tu, & Cl. Mangetus (a) descripsistis, nisi quod pro *Hysan*, *Hetechen*, *Caravalgii alter*, Philologus edidit *Huyfan*, *Hetechen*, *Caravalgii alvar*. Est autem editio hæc mea quæ apud Lindenium novissima indicatur, *Venetis apud Petrum de Francisciis, Tertia Impressio. MDLXXV.* in 8.º constatque ex foliis octo, & chartis duabus. Quam ab Auctore ipso curatam non solum integumentum libri ostendit, in quo aureis litteris significatur, dono, ab eodem missum fuisse, sed & ex Epistolis duabus, libro præfixis, altera commonstrat, qua *Comiti Guidoni Rangonio*, cuius se *Alumnus* proficitur, hanc *Impressionem Tertiam* . . . . cognominis gratia, reconsecrare voluit.

Huic eidem Rangonio Dialogum olim dicaverat, quem ab nemine adhuc vidi inter Philologi libros commemoratum, de optima hominum felicitate contra *Aristotelem*, & *Averroem*, ceteros necnon philosophos; ipse autem habeo impressum *Mutinæ per Antonium Rocciolum Anno Dominicæ Incarnationis M. D. XXI. Die XXXI. Octobris* in 4.º libellum ex tribus foliis cum dimidio. Huic quoque Dialogo Epistolæ præfixæ sunt duæ, ad Rangonium prima, ad munificentissimum Senatū altera, generosum Collegium viginti quatuor, & duodecim viros urbis *Ravennæ*: ex quibus, ut mandatis satisfaciam tuis, nonnulla juvabit adnotavisse. In altera carissimam sui genitricem antiquam *Ravennam* fatetur, seque ab ipsa ad capeßenda præclara studia, auro adjutum videtur significare. In prima autem Rangonium in castra secutum se, indicat. *Me præsentem*, inquit, . . . . *Firmum*, & *Reate Piceni nobilissimas urbes a gravi Iberorum obsidione non pluribus mille peditibus, equitibusque trecentis, imo Reate solum quinquaginta equitibus liberaßti*. Hoc etiam addit: *Tu denique astrologiam, reliquasque disciplinas ita calles, ut nemini secundus locus admittatur*. Quibus si illud adjunxeris, quod cum huic Dialogo ita suum nomen præscripsisset, *Thomæ philologi Janothi Ravennatis*; in quibusdam postea emissis *li-*  
*Morgagni Opusc.*

bellis, velut in eo qui inscribitur *De Vita Principis, & Venetorum commoda semper, Consilium*, ad hunc modum, quem infra vel post ejus mortem servatum ostendam, se nominavit *Thomam Philologum Rangonium Ravennatem*; ex his videlicet proclive erit intelligere tum quod ipsi patrium cognomen fuerit, tum quod a Rangonio, ut videtur, acceperit, tum quare ejus se, ut diximus, *Alumnus*, & cognominis gratia Opusculum ipsi de lue venerea reconsecrare profiteretur.

Quod cum fecit, jam Comes Rangonius per senex erat, ut qui a Petro Bembo sub initium libri XII. *Rerum Venet. Histor.* strenuum ejus A. 1511. militare facinus recensente, *magni animi adolescens* vocatur. Ipse autem Philologus qua ætate tunc esset, in prima quam eidem Opusculo præponi, dixi, Epistola aperte docet. Augustino enim Gadaldino, cui latinam tot Galenicorum librorum interpretationem debemus, id ab eo Scriptum petenti, mittere se, ait quæ *longo suo fere octogenario secundo rerum usu percepta* habebat. Quos si annos ex illius tertiæ editionis anno 1575. subducas; invenies natum annis circiter septem ante finem sæculi XV. Nec vero Opusculum de quo loquimur (sic anno illo iis certe auctum quæ in extremo sunt, & Epistola ad Gadaldinum, alibique indicantur) Philologo ultimum fuit. Nam *Consilium* quod paulo ante memoratum est, habeo excussum *Venetis MDLXXVII. Die Martis XI. Junii*. Quam editionem ne forte post Auctoris mortem iteratam suspiceris secundum eam quam apud Lindenium unam vides A. 1558; scire licet *Serenissimo Venetorum Principi D. D. Sebastiano Venerio* a Philologo ipso oblatam, qui & *Auream Sacratissimam Rosam* commemorat, munus Gregorii XIII. Pont. Max. ad Venerium principatus initio delatum: quæ nempe in eum annum incidisse 1577. postquam III. Nonas Junii *Morocenus Princeps* decesserat, confirmat *Andreas Maurocenus* libro XII. *Historiar. Venetar.*

Equidem hæc scio cum *Historia Gymnasii* nostri, ante hos tredecim annos edita (b) & apud Mangetum (c) exscripta, non consentire. Nam postquam annos circiter viginti Medicinam Venetiis fecisset Philologus, Patavii ab A. 1496. ad belli usque Cameraçensis initia, hoc est ad A. 1509. scribitur docuisse: ab A. autem 1520. (sive potius, si *Tomasinum* (d) sequimur, 1521.) iussu ipso in tradenda publice Astrologia *Friderico Delphino*, quod reliquum vitæ fuit, exercendæ Patavii Medicinæ dedisse, ubi octogenario major obiisse dicatur A. 1559. sed verius esse, eum superstitem fuisse ad A. 1556. neque ante annum sequentem prope nonagenarium decessisse. Quæ tamen an iis quæ a nobis producta sunt, argumentis certissimis, apertissimisque satis infirmentur, ipse judicabis. Ego præterea ex ejus libris, non Patavii, sed Venetiis senem Medicinam fecisse, intelligere mihi videor, ubi & sacram *Ædem* in celeberrimo loco, non *D. Julianæ*, ut nonnulli scribunt, *edificavit* an. 1554; sed *D. Juliani*, (e) conlata pecunia instaura-

B

vit,

---

(a) Biblioth. Scriptor. Medic. (b) Tom. 1. l. 3. 52. c. 10. (c) Biblioth. cit.  
(d) De Gymnas. Patav. l. 3. c. 39. (e) Sansovin. Venetia descr. l. 1.



vit, nobili usus Architecto Jacobo Sansovinio, quod ad Aedis frontem attinet, in qua Philologi statua ex ære visitur, & hæc leguntur: *Thomas Philologus Ravennas Physicus; ære honestis laboribus parto, ædes primum Paduæ virtuti, post has, Senatus permissu, pietati erigi fecit. Illas animi, has etiam corporis monumentum. An. Mundi VI. MDCCCLIII. Non. Octobr. Jesu Christi MDLIII. Urbis MCXXXIII.* Ex his liquet, ante eum annum 1554. ædificavisse ædes Patavii, de quibus non uno loco meminit Tomasinus (f), ad studiosorum Juvenum usum.

Ex aliis autem quæ in eodem illo Templo leguntur, ante finem certe sæculi XVI. obiisse, intelligimus; sed quo anno, haud apparet. Describam tibi, ut apud Franciscum Sansovinium (g) live diligenter, live, ut videtur, oscitantèr Typographi repræsentantur. A dextris quidem Aræ majoris sic: D. O. M. *Thomæ Philolog. Rang. Raven. Phys. Eccles. & Fab. Proc. Opt. merito R. Commentarii. A sinistris autem sic: MDIIC. In spem resurr. futura, & immortal. gloriæ perpetuum monumentum ex test. P.*

Cæteris tamen quæ de Philologo in eadem Historia leges Gymnasii Patavini, his minime repugnantia, non est cur ipse in præsentia repugnem. Hæc tantum addo: Numismata circumferri ejusdem imagine signata (h), ipsumque Equitis ornamentis auctum fuisse; *Eques enim in ejus quod semel atque iterum memoravimus, Consilii, itemque in Microcosmi, & Opusculi de quo agimus, inscriptionibus appellatur.*

Nunc, quando ad ejus Vitam quæ attinebant, ut tu præoptabas, meaque ad præsens memoria tulit, satis attigimus; ad ipsum Opusculum redeamus. Id decem primum habet Capita.

Primum est de mali Galleci (sic enim semper, & in fronte quoque libri scribit, quod describentes non attenderunt, a Gallaicis, seu Gallecis Hispaniæ populis nomen repetens) ortu, & nomine. Quo in Capite credit, hujus morbi descriptionem apud Veteres etiam Medicos inveniri. Tempus autem quo Capita hæc scripsit, aperte significat, non post annum fuisse 1547. nec ante 1515. his verbis: *Christianissimus autem nunc vivens Franciscus primus.*

Capite II. Mali Galleci Essentia, Causa, & Diffinitio proponitur, quæ est ejusmodi, *Gallecus morbus est compositus seu Diabolicus varia humorum corruptione: qui cum per contagium communicatur, non solum concubitu, sed & vestibus, cibo, potu, osculo, lacte, aeris ab infecto coinquinati inspiratione contrahitur.*

III. Gallecæ Luis Signa. Hæc ponuntur quinque, ipsum semper, sed non insimul, sequentia, dolores videlicet, tubera, pustulæ, ulcera, macies cum pallore quodam.

IV. Prognosticon:

V. Sanandi modi, aut cura, & primum Diæta, & Chirurgia.

VI. Primus Sanandi Modus, Evacuatio: ubi Pharmacica, in qua improbat eos qui hunc morbum vehementibus primo curant, quoniam, ut modo dixerat, *Morbus hic perpaucos interimit.*

VII. De ligno sancto, ac Regio, an autem a Priscis cognitum quaeritur, & Ebeni speciem esse, statuitur.

VIII. De ligno India eodem, ubi ejus descriptio, selectus, vires, & variæ ex eo formulæ, & præparationes.

VIII. Aqua Ligni fit hoc modo, traditurque ratio conficiendi ejus Decoctum primum, & secundum.

X. Præparatio ante Aquæ modo dictæ Potum, ubi & regimen in sumenda, multo severius, quod ad alimenta attinet, quam ætate hac nostra: neq solum tamen vere, & autumno, sed & aliis anni temporibus infinitos a Philologo hac ratione fuisse curatos, legimus.

Hactenus in prima editione. Cum autem supervenisset postea Galleci . . . signum 6. . . anno, ut ait, a Christo 1538. vel circa, & clariss. medicus Veronensis Gajonus diminutum Auctorem censuisset, quod nihil dicere voluisset de casu pilorum contingente in mor-

bo isto, eorum tempestate, propter ulteriorem adustionem acquisitam in materia a qua Lues ipsa causatur: quod accidens tunc fere omnes infestare videbatur; ideo Philologus 2. impressione . . . librum perfecit suum. Ac primum agens de Depilativa, linimentum, lixivium, unguentumque descripsit, tunc a Medicis ad præcavendum pilorum defluvium in usum adducta, tum ubi pili cecidissent, quid faciendum, indicavit.

Quoniam vero septimum demum etiam tunc compa-ruerat signum, . . . dentium casus (ut alia deinceps, si vixerimus diu nos ipsi, inquit, sed rationabilius posteris visuri sunt simptomata) idcirco de Dentativa etiam addidit quod sibi est visum, & quia dentes in adultis deperditi non renascuntur amplius; attigit quæ sunt facienda, ne cadant: ut illa quoque, *An vocis sempiterna ac perpetua amissio octavarum esse possit Gallecti morbi signum: An Unguium casus in pluribus Roma contingens, Venetiis, ac ubique locorum multis, 9. valeat esse signum. Denique An Ulcera Meri, hoc est Pharyngis, Amigdalæ, Epiglottidisque decimum.* Mirum est, quod Bubones vix semel, idque obiter cap. XIX. Gonorrhœam autem nusquam, quod animadvertim, ne anno quidem 1575. hunc tertio, ut diximus, libellum edens, memoraverit, Certe Falloppius duodecim ante annis librum conscribens de Morbo Gallico (i), indicavit, hanc observari cœptam circa A. 1549. defluvium autem pilorum A. 1533; ut neque in hoc cum Philologo conveniat. Agitur jam, inquit Falloppius, 30. annus quo hoc pilorum defluvium incepit, non sunt 15. anni quibus observata est Gonorrhœa gallica; nam Bubones quidem etsi a primis illis hujusce Luis Scriptoribus commemoratos non memini, a pluribus qui ante Falloppium scripserunt, propositos legi. Sed hæc, atque alia tu melius.

Secundum illa, Philologus de Cina sermonem instituit, natale solum, delectum, vires, aliaque ejusmodi proponens, & denique ejus aquæ, sive decocti conficiendi modos plures, & regimen. Interjicit autem inventum, ut ait, suum tertiæ conficiendæ aquæ sive ex China, sive ex Sarfa, sive ex ligno India, si postquam secunda parata est, tantundem aquæ, quantum in superioribus, addatur, & ad quartæ dumtaxat partis consumptionem decoquatur, eaque ad membrorum potissimum abluitionem servetur. Nec reticet alias formulas, & præparationes, interque has, ut in ligno Indico fecerat, docet, quibus, & quomodo pro aqua vinum sit ad decoctionem adhibendum, aut addendum, aut China contusis uvis adjicienda, aut denique ex decocto, aqua, aut vino parato, humor sit per destillationem eliciendus. Hunc autem Sublimatum vocat. Ex his intelliges, quod cupiebas, quid sibi illis vellet, quæ in Opusculi inscriptione posuit, verbis aquæ, vini, sublimati.

Quibus absolutis, hæc subjicit, unde cognoscas, cur, & quando de China, deque Sarfa quæ ipsi nota erant, addiderit Opusculo huic suo. *Accedit modo Clariss. Doctorum modesta repetitio, qui labore insigni authorum quorumcunque galleci morbi sex & 40. Scripta impressa simul recollecta, cum Jordane typographo ornatissimo, aliisque pluribus ingeniosissimis viris, Aloysioque Luisino rogantibus, ne quid egregio & magno huic volumini deesset: De (sic) cinæ, spartæ parilla, duarum stirpium, ultimo, præsentis tempore a medicis cognitarum historiam, vires, & operationes . . . ederem, & sententiam meam proderem. A quibusdam licet viris doctissimis nonnulla de his fuerint scripta, & ultimo Falloppii eximii, & eminentissimi Fraçanciani, ut ajunt, absolutissima in lucem impressioni data, quibus plurimum tenetur ætas nostra . . . Verum enim cum senescentes addiscamus, scientiæ & artes additione compleantur, & juniores semper sint perspicaciores, cumque præfatos lectione, & experimentis multis præcesserim annis, . . . quicquid senserim scriptis meis jamdiu impressis De galleco morbo, ligno vel indico, cynna, & sarfa pardiglia. Postea Hetechen. Ultimo, de caravalgio alvar, novis mirabilium virtutum planta (sic) expromere, & lumini dare decrevi.*

Et

(f) Oper. cit. l. 1, c. 61, & l. 4. ad A. 1577.

(g) l. cit.

(h) Monument. Viror. Illustr. Galliæ Togatæ l. 2. c. 4.

(i) c. 23.



Et continuo de Sarfa eadem, proportionem, tradit quæ de ligno Indiæ, Chinaque tradiderat, nisi quod in aqua fere, hoc est confectum in aqua decocto, subsistit.

Tum de Huysan beata radice hæc habet. Species duæ. Assumuntur ambæ a gravissimis dispositionibus præter naturam, insignique languore correptis. Infunditur horis vigintiquatuor Huysan libra una, seu duæ. Eaque, humiditate virtutum plurimarum sufficienter acquisita, contundatur, & exprimatur succus velut spuma alba; expressus vasculi parvi (sic) aurora, calidus, ac sero potatus. Ex quibusdam cum saccharo. Ex aliis cum melle. Ex quibusdam solus ad placitum, ac pro temperie captus, ventrem bis, vel ter in die commovet, humoremque requisitum educit. Hinc decocta Huysan proponit tria, scilicet ad medietatis, ad tertiæ partis, ad nullam consumptionem. Cæterum de hac radice in extremo libro illud indicat, ab insulis Indiæ occidentalibus, ab Hispanis nuper compertis, afferri. Habes quod cupiebas de Huysan. De reliquis, cum ad libri finem pervenerimus, accipies.

Nam postquam Auctor scriptis, ut videtur, ab initio Capitibus ea omnia interjecit quæ memoravimus, continuo redit ad Capita reliqua.

XI. Est Tertius sanandi modus, unctio, videlicet ex argento vivo, saliva hominis extincto. Quæ melius, aut secus addantur, aliaque persequitur.

XII. Quartus sanandi modus, Cerotum, scilicet ex eodem argento.

XIII. De Unctionis, ac Ceroti accidentibus, quibus qua ratione occurrendum, docet.

XIV. Quintus sanandi modus Suffumigium ex cinnabari, quod in quibus non tentandum, & quomodo interdum mane illo; sero, innunctione uti conveniat, ostendit.

XV. Sextus sanandi modus, præcipitatum, cum priora inutilia fuerint, exhibendum.

XVI. Reliqui sanandi modi, inventi, ac futuri, quorum neutros commonstrat.

XVII. De doloribus, id est qua ratione in his succurrendum.

XVIII. Pustularum cura.

XIX. Tubera, apostemata dura; vulgo gummas, resolvemus, maturabimus, & aperiemus.

XX. Ulcerum cura, in qua tamen Auctor monet, se rectius antiquissima quoque Ulcera, ac nullo diutius medicamento curata, solo Mollitivo melle liquefacto roseo, imo etiam absque melle eo, tantum petiis cooperata cicatrizarisse, ac perfectæ salutis per decocta exhibita restituisse magno cum decore.

XXI. Delentur Maculæ, quæ nimirum Pustulis, ac Tuberibus, Ulceribusque cicatrizatis, remanent.

XXII. Modus vivendi post curationem sani.

Ad extremum addit Empiricum illustre novum 1575. mense Februarii acceptum. Est autem decoctum corticis ligni sancti in vino paratum, & sine severiori regimine exhibitum. Denique, ut pollicitus fuerat, de Caravagio Alvar, Planta quidem nova e Portugalia nuper allata, cujus scobs unguento ex mercurio addenda sit secundum formulam quam latine redditam proponit, verbum potius, quam verba facit. Sic etiam de Semine Indo, Hetechenque decocto, indidem unde Huysan diximus, nuper advectis cum Radice Mechoacan, & Terræ planta escuerzonera. Nam de illo Semine hoc tantum habet: Semen Indum Anno 1574. Adeo laboriosum, ut vomitum simul ac ventris profluvium timorose ingenti cum vitæ discrimine promoveat, pluresque enecaverit, corpusque totum adeo perturbet, ut qui solum granum unum voraverint, ferme perierint. De Hetechen autem hæc: Est lignum, quod quidem spinosum est, mediocriter crassum, pheniceæ coloris, quo Afri utuntur, ex Joanne Aphricano, suis in historiis, velut scribit Fracastianus medicus cl. (cujus videlicet verba ex libro de morbo Gallico (k), tum præcedentia, tum insequentia, sine ulla fere, aut levi mutatione, sua facit.) Cum autem ad nos medicamenti usus, aliorum velut superiorum, non ju-

Morgagni Opusc.

stius pervenerit, idcirco dum certi nihil afferre possim, sicut nec de radicibus quibusdam, quibus in Galleco, simili vel morbo utuntur mulieres in insula sancti Thome; de his, aliisque pluribus, inquit, si vixero, eadem methodo qua de ligno Indiæ, China, Sarfa, Antimonio etiam prætermisso sui insigni discrimine, explicabo; ut quod in libri fronte de Antimonio promittitur, non fuisse præstitum, appareat.

Habes, Vir Clarissime, si non accuratam illam Opusculi analysim quam requirebas, at certe unde obscura, & tibi, ut scribis, plane ignota ejus vocabula declarentur. Nunc de Angelo Bolognino perpauca, ut promissimus, subjiciemus magis ut veram ejus patriam, quam ut primam editionem cognoscas ejus librorum De Cura Ulcerum exteriorum, & De Unguentis, quæ communis habet usus practificantium hodiernus in solutæ continuitatis medela. Nam etsi alii aliud tum de ejus origine, atque adeo de ipso cognomine, tum de anno quo primum ista vulgavit, litteris mandaverunt; non ita mihi adhuc facile de hoc est, ut de illis utique est, certi aliquid constituere.

Wolfgangus Justus, quantum intelligo ex Lindenio Renovato, hæc olim de eo scripserat A. 1556: Angelus Bologninus Bononiensis. Docuit Chirurgiam ex Avicenna Bononiæ Anno Christi 1506. Lindenium sequitur, ut fere solet, Cl. Mangetus (l), nisi quod Bologninus, an Bologninus fuerit, incertus est; quemadmodum & in Historia Chirurgiæ Antiqua (m) incertus fuerat Vir Doctissimus Andreas Ottom. Goelickius. Sed Jo. Nicolaus Pasqualis Alidosius in italico libro A. 1623. Bononiæ edito, inscriptoque I Dottori Bolognesi di Teologia, Filosofia, Medicina &c. hæc de illo habet: Angelo Bolognini 1508. Fu lettore di Chirurgia fin' al 1517. Scrisse de cura ulcerum, & de unguentis communibus in solutione contin. Et de lue venerea del 1516. Bernardinus autem Scardeonius in eximio Opere de Antiquitate Urbis Patavina (n) sicuti, quod ad cognomen attinet, idem quod Alidosius, ita, quod ad Angeli Patriam, longe aliud quam ille, & cæteri quos laudavimus, jam docuerat, quippe anno scribens 1559. Claruit, inquit, in hac ipsa arte Chirurgica & Angelus Bologninus ex Plebe Sacci municipio Patavino, vir magni ingenii, & in ea parte rei medicæ, quam ab opere manuum Chirurgiam Græco vocabulo appellamus, peritissimus. Is aliquandiu artem hanc publice Bononiæ docuit: sed parvo contentus, & ocio patrio delectatus, in patriam se recipiens, intra municipii sui fines postmodum se se continuit: & quamvis dignis stipendiis, & honoribus a multis civitatibus vocaretur, patrium tamen solum, quamvis tenue, cum quacumque nobili civitate commutare neglexit. Non est dubium, quin gravissimus Historicus vera scripserit, præsertim cum Patavii (o) natus A. 1478. denatus autem A. 1574. eodem quo Angelus in propinquo oppidulo vivebat, tempore & ipse vixerit; ut in his nec fallere, nec falli potuerit.

Quamobrem merito cæteri Scardeonio astipulati deinceps sunt Patavini Scriptores, & in his Angelus Portinarius, cujus volumen de Felicitate Patavii (p) eadem lingua, eodemque anno vulgatum est quo librum suum Alidosius emisit, deceptus, opinor, ut plerique alii, Bolognini cognomine, quod Gentis nimirum est Bononiæ in primis nobilis, & pervetustæ. Quod si quis propterea Angeli Majores inde olim profectos, in his regionibus consedis, suspicetur; fortasse vera ille conjiciet: sin Angelum Bononiæ natum esse contendat; ne initium quidem libri ejus de Unguentis satis attendisse videatur. Cum in florentissimo Bononiensi Studio, inquit, a Senatu Bononiensium stipendio adductus fuero: quæ sane verba Bononiensis civis non videntur; hic enim in patrio Gymnasio patrii Senatus jussu profiteri, neque eo adductum se, dixisset. Angeli autem nostri, an consanguinei potius alicujus soboles fuerit is Angelus J. C. qui Patavii quidem sibi, & posteris, in oppido autem ipso Plebis Sacci Avo Sepulchrum sic inscribendum curavit, illud (q) Futura considerans Angelus Bologninus Le-

B 2

gum

(k) c. 10. (l) Biblioth. cit. Script. Med. (m) n. 141. (n) l. 2. Class. 9.  
(o) Vid. Papadopoli. Hist. Gymn. Patav. Tom. 2. l. 2. c. 25. n. 113. (p) l. 7. c. 6.  
Vid. Salomonii Urbis Patav. Inscript. pag. 331. n. 37.



gum Doctor ex q. Evangelista Art. Doct. P. M. D. LXXV. sibi & posteris, hoc vero (r) Joan. avo Evang. fil. D. Bolognini Medic. Dotto. Angelus Bolog. Ju. Vt. Dot. posuit 1588. alii viderint: ego ob eam dumtaxat causam hæc protuli, ut quo ex municipio noster fuisse a Scardeonio scriptus est, ex eodem postea videas alium extitisse Angelum Bologninum, non Bologninum. De nostri igitur & cognomine, & Patria non solum, verum etiam quod in hac ante A. 1559. decessisse, & quo primum anno Bononiæ fuisse, quo ad suos rediisse videatur, si Scardeonio qui illa, & si Alidosio qui hæc optime omnium novisse poterant, fidem habeamus, satis constat.

Utinam de primo etiam anno quo libros illos suos edidit, constaret. Verum Scardeonius, qui edidisse opus non aspernandum, scripsit, eadem videlicet quæ ex Alidosio commemoravimus, nominans, non aliud addidit, nisi ea omnia primo Venetiis, postmodum & Basileæ impressa fuisse anno Domini MDXXXVI. In Historia Gymnasii nostri (f), ex qua alia malim accipias, velut Angelum Medicæ artis adorem in hoc promeruisse, & annum ejus emortualem ignorari, verba illa Scardeonii ita accipi videntur, ut si dixisset Vivo ipso edita sunt an. MDXXXVI. non semel hæc opera. Mihi autem secus videntur intelligenda. Nam neque eo anno aliam, quam Basileensem illam editionem invenio, quæ apud Lindenium commemoratur, & mihi alia in manibus est, de qua ab iis qui de Bolognino loquuntur, nullam mentionem factam meminimus, Venetiis anno superiore habita per Jo. Patavinum, & Venturam de Ruffinellis in 8º Leonici quoque, Matthioli, Frisii, Hutteni, Almenarii Opuscula complectens, quæ ad Luem Veneream attinent, ad ejusve curationem. Sed hæc præter libros de Cura Ulcerum, & de Unguentis, peculiarem Bolognini librum non continet de ea Lue; nisi forte ejus nomine intelligunt caput illud extremum, cæterorum sane multo longissimum, in quo de mercurialibus unguentis scripsit: neque alia contineri video iis editionibus quæ ab Lindenio, & qui eum sequuntur, sive propositæ sunt, sive omissæ: nam & illam ubi de Bolognino quidem scriptis verba faciunt, prætermiserunt, quæ in Thesaurio Chirurgiæ, collecto a Petro Uffenbachio, Francofurti habita est A. 1610. typis Nicolai Hoffmanni in fol.

Verum ut ad vetustissimas editiones redeamus; vidisti supra, Vir Clarissime, quandam ab Alidosio indicari perfectam A. 1516. quæ eadem atque illa videtur esse quæ apud Lindenium primo loco ponitur, Papiæ apud Bernhardinum de Garaldis 1516. in fol. cum diversis varii argumenti Auctoribus. Hanc tamen primam omnium fuisse, facilius crederem, si Bolognini unius scripta, ut fere in primis sit editionibus,

non aliorum quoque, protulisset, neque indicia præterea quædam essent, illa antea, & seorsum quidem, prodixisse. Laudatum utique Goelickium (t) tradidisse, video, Bologninum in Academia Bononiensi Chirurgiam publice docuisse, atque adeo circa annum 1506. scriptis suis innotuisse eruditis. Libellus tamen de Unguentis postea exierit, necesse est, quando Auctor inter ejus initia ostendit, se in illa Academia Chirurgiam profitentem, studiosorum, ac Doctorum ingeminatis in dies precibus adductum, eum libellum conscripsisse, hoc est post annum 1508. quo ipsum Bononiæ docere cœpisse, Alidosius, ut vidimus, indicavit. Accedit, missum esse librum ad Franciscum Caballum, qui, ut in præfixa Epistola cæteris laudibus est ornatus, ita Rem Medicam Patavii ex prima sede tum exponere dictus esset, si fuisset scripta Epistola ante annum 1509. ex quo Brixiam in Patriam se recepisse Caballum, accepimus (u). Videtur igitur post initia Cameracensis belli vulgatus, & separatim quidem, atque adeo post editionem libri de Ulceribus, quippe carminibus peculiaribus illi adjectis, quibus id Angeli de medicaminibus secundum opus commendatur.

Libro autem de Ulceribus in editione eadem quam mihi in manibus esse, dixi, præposita Epistola est ad Franciscum Gonzagam Mantuæ Principem, quæ ex Epistola intelligitur, Auctorem, cum superioribus annis in maritima Venetorum classe primum, deinceps in Epidauri urbe degeret, chirurgum publico stipendio gerens, hunc librum inchoasse horis subsecivis, cumque eundem nuper Venetiis absolvisset, & emittere destinasset, Franciscum sibi Principem invictissimum occurrisset, cui illum ... dedicaret. Hinc constat, prodixisse eum librum antequam Angelus in Bononiensem Academiam vocaretur, quippe unde, ut ex Scardeonio didicimus, in patriæ perpetuum otium secessit. Prodiit igitur ante annum 1508. Sed quo tandem anno, & quo in loco, mihi quidem adhuc incomperatum est.

Habes, Vir Doctissime, quæ de Thomæ Philologo, & de Angelo Bolognino confestim potui rescribere, gavifurus plurimum, si non ex rebus, quæ paucae, & tenues sunt, sed ex mea ad Tibi inserviendum promptitudine, atque alacritate quanti Te merito faciam, quantumque me Tibi debere, sentiam, pro Tua summa Rei Medicæ Peritia, ac Doctrina, pro Tuaque perbenigna de me opinione, existimaveris. Vale, & Facultatem nostram utilissimis, iisdemque eruditissimis scriptis ornare perge.

D. Patavii Postridie Kal. Quintiles  
CIC DCCC XXXVIII.

DE VITA ET SCRIPTIS  
DOMINICI GULIELMINI  
COMMENTARIOLUM  
JOAN. BAPT. MORGAGNI.

**M**Ajores Dominici Gulielmini Novariæ orti, Cravineam, quod in Valle Antigorii est oppidum, migrasse perhibentur. Hinc certe Avum centum circiter annis ante transiisse Bononiam, constat, & in ea Urbe confedisse.

Bononiæ Dominicus natus est V. Kal. Octobr. A. D. MDCLV. Principio plura genera Doctrinarum attigit; tum vero ad quæ magis se ferri natura intellexit, ad illa duo totum se contulit, Mathematicam Scientiam, & Medicam Artem, usus in utraque nobilissimis Præceptoribus Geminiano Montanario, & Marcello Malpighio.

Annum agens XXI. Mathematica illustrare cœpit editis duabus *Volantis Flamme Epitropeiis*. Quibus porro de *Cometarum Natura*, & *Ortu Dissertationem*, ac *Observationem* addidit *Solaris Eclipsis*. Has duo sunt consecuta Volumina de *Aquarum Fluentium Mensura*, totidemque *Epistole Hydrostaticæ*: quibus nunc tertia adjungenda est ex Berolinensibus *Miscellaneis*; & is demum quem Italice scripsit, de *Natura Fluminum* liber.

Quam vero iis scriptis de sua in Mathematicis præstantia opinionem excitaverat, opere (quod difficilius est) confirmavit. Joanni Dominico Cassino, Astronomo-

(r) Vid. ejusd. Agri Patav. Inscript. pag. 299. n. 32.

(u) Vid. cit. Hist. Gymnas. Patav. Tom. 1. l. 3. S. 2. c. 10 n. 48.

(f) l. cit. 2. c. 15. n. 64.

(t) loco supra cit.



nomorum hujus ætatis facile Principi, in Bononiensi illa celebratissima Meridiana Linea instauranda comes fuit. Padum autem flumen ( ut de reliquis ejus Operibus sileamus ) a Placentiæ Mœnibus, quibus magis magisque imminerebat in dies, objectis Molibus repulit.

Nec vero tanto Mathematico præmia, atque honores defuere. Nam Patria XXX. annos natum promotioni Fluminum, & totius Provinciæ aquariæ præfecit, paucisque interjectis annis in Publicos Mathematicum Professores retulit. Ipsum Kalendarium, ut ibi positum est in more, conficere, ipsum Hydrometriam primum omnium docere, in hisdenique cunctis, aliisque præterea Muneribus ipsius absentis rationem haberi, & conservari perpetuo voluit, ex quo scilicet ab Amplissimo Venetorum Senatu Patavium honestissimis conditionibus evocatus, in Stephani Angeli Mathematici Perillustris locum suffectus est A. D. MDCXCVIII.

Itaque jam nulla in Italia fere tota paulo difficilior Mathematica Consultatio accidebat, quin ejus sententia a Magistratibus, Virisque Principibus expeteretur. Hinc Mantuam, hinc Cremonam, hinc Mutinam, hinc alio sæpe accersebatur. Parmensium autem Dux præsertim post illud, de quo antea dictum est, ad Placentiam Opus feliciter absolutum, & plurimi fecit, & propria auro, gemmisque exornata imagine donavit. Cum vero Ferdinandus de Abdua, & Franciscus Barberinus Cardinales ab Innocentio XII. Pont. Max. legati essent, ut de illis cognoscerent, quæ inter Bononienses, & Ferrarienses jam diu sunt, controversiis circa Rheni in Padum derivationem; Dominicus non modo suorum apud illos causam egit, sed ab utroque vehementer probatus, jussus est pro sua peritia, & fide de Aquis etiam Ferrariensis Agri, & Ravennatis referre. Nec dubium est, quin ea quæ sunt ab illo proposita perplacuerint, quamquam ob gravissimas quas hic referre non attinet, causas illæ quidem nondum compositiæ sunt lites. Ab sapientissima autem Venetorum Republica alias in Illyricum missus est ad Castrum Novi munitiones instaurandas, alias in Forojuliensem Provinciam ut rapidum amnem, Palmæ proximum, & quasi impendentem, a munitissimo oppido arceret. Quam sæpe vero de rebus hujusmodi consuleretur, quamque item charus haberetur, dici facile non potest, nec Venetis quidem solum, quamquam his plurimum, sed & Reipublicæ Lucensi, & Hetruscis Principibus, & optimo Ingeniorum Æstimatori, ac Patrono Clementi XI. Pont. Max. ut a quibus omnibus, & præterea a suis Civibus magnis eodem tempore propositis præmiis, & honoribus paulo antequam e vita discederet, est vocatus.

Neque in eo Mathematicæ tantum Scientiæ, sed & Medica Doctrina spectabatur. Emiserat namque Italice scriptas *Considerationes ex Figuris Salium erutas*, Latine autem, de *Sanguinis Natura & Constitutione Exercitationem*, pro *Theoria Medica adversus Empiricam Sectam Prælectionem*, de *Salibus Dissertationem*, & de *Idearum vitiis, correctione, & usu ad statuendam, & inquirendam Morborum naturam Exercitationem*: qui fere omnes Libri rursus Batavorum Typis descripti sunt. Annumerari his possent Epistolæ sex ad G. Desnoues Italico scriptæ sermone, sed Gallico tantum editæ. Annumerari autem omnino debet *Symposium Medicum, sive Quæstio Convivalis de usu Mathematicum in Arte Medica*; nam etli Josephum Donzelinum Antonii Filium Cossentinum auctorem præfert, ego tamen certum compertumque habeo, tam illam esse Gulielmini, qui sub ficto nomine latere tum voluit, quam quod maxime. His ut fere Contemplatricem Medicinæ Partem ornavit, sic aliis vicissim libris Activam erat ornaturus. Huc enim priores illi vendebant, nimirum ut viam quasi munirent accessibus ad Libros de *Febribus*, & de *Methodo Medendi*, quos quidem affectos reliquit. Perfectæ autem plures supersunt Dissertationes, apud Filium aliam, aliam apud Alexandrum Bonis Medicum Venetum, optimis cum scientiis, tum moribus ornatissimum, hisque nominibus Gulielmino carissimum, & in iis de *Materiæ Affectionibus* duæ. De *Principio* autem *Sulphureo* novem, & de *Æthere* unica, quas vivens adhuc emitti jusserat, post ejus mortem prodire, eodem Alexan-

dro Bonis curante & se atque earum Scriptore dignam Præfationem addente.

Annum agens XXII. a præclarissimis Philosophorum, Medicorumque Bononiensium Collegiis Doctor renunciatus, Medicinam domi, forisque cum laude fecit, eoque etiam nomine in comitatu Virorum Principum fuit.

In Anatomico Scholæ Bononiensis Theatro solemnem humani Corporis dissectionem adolescens non sine honore administraverat. Postea in custodiendo præclaro Ulyssis Aldrovandi Museo Ovidio Montalbano successor est datus; Librorum quoque cum philosophicorum, tum Medicorum factus est Censor. In Patavino autem Gymnasio primum Medici Theorici locum ab A. MDCCII. post discessum Pompeii Sacci Parmensis Medici clarissimi pro sua, & illius Gymnasii dignitate, quæ est amplissima, tenuit.

Porro ejus consilium sæpe in Morbis difficillimis requirebatur: constatque, a Magno Hetruriæ Principe amplis, ut sibi Medicus esset, fuisse præmiis, & honoribus invitatum.

Tanti autem Mathematici, & Medici famam non Italiæ modo, sed Europæ universæ fines peragrasse, ex eo præsertim agnosci potest, quod non in Patrium tantum, sed & in externos Cætus Doctorum Hominum celeberrimos est lectus, Cæsareum N. C. Germanicum, Regiosque item Parisiensem, Londinensem, & Berolinensem.

Acerrimo fuisse ingenio, & non deteriore judicio, etli scripta satis ostendunt; non alienum tamen est addere, qualem in scriptis, talem quoque in omni sermone se præbuisse. Negare solebat Montanarius, præclariore, aut promptiore ingenio novisse quendam; Alter vero Præceptor Malpighius quanti ipsius judicium faceret, cum sæpe alias, tum præsertim vitæ excedens ostendit, Posthumi Operis editione illi, & Sylvestro Bonfiliolo Viro clarissimo commendata.

Ad hæc, atque alia quæ Natura dederat, animi bona singularis industria, & labor assiduus accesserunt. Nunquam non illum invenisses aut legentem aliquid, aut commentantem, aut scribentem, aut domi, & in Publico docentem, idque ea diligentia, & copia, & acumine, & quod semper est caput, ordine, ut ex ejus Discipulis nominare possem plures, nihil a tanto Præceptore degenerantes, nisi cum plures nominassem, plures tamen superfuturos esse, intelligerem. A publico docendi officio non illum poterat affecta valetudo, non ex recenti itinere languor avertere. Sed neque in gravissimo, quo confectus est, morbo Amicorum monitis, precibusve potuit adduci, ut Libros seponeret, quos pulvino subditos, illis discedentibus sumebat in manus.

Cæterum in Amicos officiosus, in Præceptores pius, in bene de se meritos quosque gratus, modestus præterea, æquus, unoque verbo moribus optimis, & honestissimis fuit, ut hæc etiam de causa fieret, ut qui illo familiariter uterentur, hi longe carissimum haberent, quo ex numero Patricii Veneti duo non sunt nobis prætermittendi, Sebastianus Fuscarenus Eques, ac ædis D. Marci Procurator, dum viveret, Amplissimus, Meritissimusque, & Christinus Martinellius Vir Doctissimus, & Bonorum omnium Fautor summus.

Statura fuit procera, amplo corpore, atque robusto, sed novissime, credo ob assiduas lucubrationes, nonnihil incurvo; Nigros habuit, vegetosque oculos, nigra, densa, magna, & contracta supercilia, colorem sublividum, vultum vero natura adductum, & tamquam ad severitatem compolitum, ut primo aspectu longe aliter atque erat, asper austerusque putaretur. Valetudine usus est prospera, nisi quod adolescens pulmone sanguinem rejecit, consequente neque brevi, neque periculo vacua ægrotatione; supremis quoque annis lumborum, imprimisque faucium rheumate frequenter laboravit.

Causamque adeo novissimæ ægrotationis ex gravedine contraxit, quæ postquam tribus interjectis mensibus remiserat, iterum ineunte Majo recrudit. Huic cum febris non sine quibusdam Mentis alienationibus, aliisque gravioribus symptomatibus accessisset, visus tamen æger rursus levare, & fortasse erat convaliturus.



rus. Sed vires a sævo, longoque morbo infirmatas sanguis e naribus eodem die semel, atque iterum profluens sic deiecit, ut dum ad excipiendum sanguinem pelvim posceret, & se in cubitum reponere niteretur; extemplo deficeret IV. Idus Jul. A. D. MDCCX. ætatis LIV. super menses IX. ac dies XV.

Aliquot ante illum diebus quæcunque ex nostris ritibus, quos semper caste religioseque servaverat, impendente morte fieri solent, ea omnia sancte perfecerat. Nec vero supremum boni prudentisque Patris familias neglexit officium, scripto herede Josepho, quem ex Constantia Joannetta Cive Bononiensi Uxore obsequentissima tulerat, filio, eoque cum ipsa Uxore, communique altera Filiola & Matre, quam grandævam admodum reliquit, Viris gravissimis, amicissimisque commendato; nam duæ quas ex eadem Constantia tulerat, majores Filia inter sacras Virgines se receperant.

Patavii, qua in urbe decessit, in Æde S. Maximi humatus fuit, quadrato imposito lapide in quo inscriptum est.

HIC JACET  
DOMINICVS GVGLIELMINI  
BONONIENSIS  
IN PATAVINO GYMNASIO  
PVBLICVS THEORICÆ MEDICINÆ  
PROFESSOR PRIMARIVS.  
OBIIT DIE XII. IVLII. ANNO MDCC. X.  
ÆTATIS SUÆ LIV.

Felix autem Abbas VIALE Vir doctissimus, atque integerrimus, & quo erat Patavii cum Gulielmino conjunctior nemo, justum ex albo Marmore Monumentum in celeberrimo loco statuit ad S. Antonii Templum, qua hoc fere Meridiem spectat.

DE VITA, ET SCRIPTIS  
ANTONII MARIÆ  
VALSALVÆ

COMMENTARIOLUM

JOAN. BAPT. MORGAGNI.

Antonius Maria Valsalva; si magnos Anatomicos Inventis metimur; nemini sua ætate secundus fuit: si solertia, studio, labore, eximiaque humani corporis scientia; vix aliquos sibi habuit pares. Nam quicumque in ejusmodi judiciis, non, ut vulgus, fortunam, sed industriam potissimum, & hac partam rerum doctrinam spectare solent, hi si Valsalvæ vitam cognoscant, & ad ea quæ natura tribuerat, quot, quantaque a pueritia ad extremum tempus adjumenta addiderit assiduæ exercitationis sciant, & quæ sive meditando, sive Medici, Chirurgique partes sustinendo, præclara ediderit signa excellentis cujusdam in Re Anatomica facultatis, non ignorent; sane illa tempestate anteferendum ipsi neminem, perpaucos comparandos putabunt. Sed ab initio est ordiendum.

Forum Cornelii, quod sequioribus sæculis *Imola* ceptum est nominari, in eo Cispadanæ Galliæ tractu quem nunc *Romandiolam* vocant, urbs est, imposita *Æmiliæ* viæ: qua ex urbe tum superioribus, tum nostris temporibus Viri exitere generis nobilitate, virtute, doctrina ornatissimi. In ea Antonius est natus anno *Æræ Christianæ* CIO IDC LXVI. xv. Kal. Februarii, patre Pompejo Valsalva, matre Catharina Tosia. Familia Tosia, inter Forocornelienses nobilis, in ea Matrona finem habuit. Paternæ autem stirpis initium olim, & agnomen fuerat ex Valsalva, quod supra Forum Cornelii erat castrum ad sinistram Vatrei fluminis. Nam verum quidem ejus stirpis nomen est Finia. Certe cum Tusignani esset, quod propter eundem amnem, sed aliquanto inferius, est oppidum, id nomen gessisse, apparet ex diplomate, in membrana scripto, quo strenuus Miles Joannes Baptista Finius (is ex majoribus Pompeji fuerat) Alidosiæ gentis stemmate donatus est. Id stemma, si quod aliud, Forocorneliensibus notum propterea quia his Alidosii centum annis amplius imperitaverant, in vetusto apud ipsos Valsalvæ proavorum sepulchro insculptum visitur. Quibus, posterisque eorum stir-

pis nomen, ut fit, obsolevit; agnomen servatum est.

Antonii Parentes qua ipsi erant in Deum pietate, in homines comitate, eadem filium imbuerunt. Accessit cura & diligentia Virorum, simul in conformandis primæ ætatis moribus, simul in litteris præmonstrandis excellentium, Patrum e Societate Jesu, quorum beneficium, tanto pluris æstimandum, quanto illi a gravioribus in quibus summa cum laude versantur, studiis ad id officii se demittunt, cum pauci admodum, postquam ex ephebis excefferunt, videantur agnoscere; memori ipse quoad vixit, & grato animo est prosecutus. Erat in puero ingenium docile, acutum, aptum ad quaslibet artes optimas sic tamen, ut ad quam potissimum ferretur, non obscure significaret. Gaudebat enim avicularum, aliorumque animalculorum dissectionibus, eorumque exta curiosius, quam pro illa ætate, rimabatur: quam ego præsignificationem, non in Vesalio (a) tantum, sed in aliis quoque pueris fuisse, scio, qui, cum adolevisset, Anatomix penitus se dediderunt.

Quibus rebus fiebat, ut de eo Parentes, Amicique bene sperarent, atque adeo talem futurum confiderent, ubi Magistrorum accessissent præcepta, qualem & nostrates, & externæ Scholæ suspexerunt. Hac mente Bononiam est missus. Quod in Gymnasium ut venit, non magis vetustate, & fama illustre, quam Doctoribus nobile; haud diutius quærendum fuit adolescentulo, mirabili discendi cupiditate flagranti, quibus se traderet erudiendum. Longe enim præstabat omnes in philosophicis disputationibus, in herbarumque cognitione Vir probitate antiqua præditus Lælius Trionfetti. Ab hoc utrasque doctus est. Ea autem quæ de Mathesi attigit, a Petro Mengolo, acutissimo & subtilissimo homine, itemque ab Geminiano Rondellio, qui faciliore fuit ingenio, & ad obscura quæque Euclidis dilucide tradenda facto. At Rei Medicæ, & quod præcipue quærebat, Anatomicæ præceptorem

(a) Vid. Freher Theatr. Viror. erud. clar. Part. 3.



ptorem habuit qui iis temporibus principatum hujus scientiæ tenebat, Marcellum Malpighium. Ad hunc quoniam ob gravissimas quibus distinebatur, studiorum occupationes, & diuturnos, quosæ requirebant, secessus, non semper aditus patebat; aliis etiam doctoribus utebatur, in hisque Paulo Salano Medico, præsertim vero Joanne Galeatio Manzio Medico & Chirurgo experientissimo, nec non cæteris qui in magnis illis Valetudinariis sive medicaminibus, sive manu, sive etiam utriusque medicinam faciebant.

His omnibus operam dabat assiduus, impiger, laboriosus. Idem ubi de superiore loco a majoribus natu de iis quas memoravi, Facultatibus sermo haberetur, aut in contrarias partes disputaretur, audiendi studiofissimus. Idem in disputationibus quæ inter æquales haberentur, alias respondendo, alias contra ea quæ proposita essent, dicendo, exercitatissimus. Itaque tantum in illis omnibus progressum fecit, ut magna cum laude anno CIO IDC LXXXVII. ab Amplissimis Bononiensium tum Philosophorum, tum Medicorum Collegiis in albo Doctorum conscriptus fuerit.

Sed posteaquam istam quam exposui, studiorum rationem animadvertit magna ex parte magis ad veri similitudinem, quam ad verum perdiscendum valere; se ipse reprehendit, & observationibus potius, ut Malpighius monuerat, quam disputationibus, quærere abdita Naturæ constituit. Igitur ad eam exercitationem qua in ægotantibus morborum notas, progressum, exitum, & remedium vires diligenter attenteque adnotabat, alteram adjunxit, ut in iisdem mortuis quæ partes quod vitium haberent, accuratissime perscrutaretur. Quoniam autem hæc quid ab recte se habentibus discrepant, intelligere non poterat, nisi qua ratione sint eadem secundum naturam constitutæ, cognitum penitus & perspectum haberet; persequere, & rimari quæcunque viscera, & membra cœpit, quæ sana quidem esse constaret; neque hominum modo, sed & cæterorum quæ nostra terra fert, animalium, si quod forte, ut haud raro usu venit, occurreret in quo clarius aliqua, & apertior structura esset. Ex structura enim actiones Partium, atque utilitates, ex his autem significationes eorum quæ in ægotantibus videmus, intelligi non dubitabat. Quamobrem ut facilius assequi illas posset; vivas quoque sibi disseccandas esse bestias, & multa ac varia in iis capienda experimenta, animadvertebat. Hæc fuerunt causæ cur iis potissimum studiis se daret; ad quæ natura etiam, ut supra docui, propensus erat.

Quanta autem industria, assiduitate, contentione se dederit, hæc sunt testimonia. Illo ipso anno CIO IDC LXXXVII. jam renem cani exsecare sciebat sic ut hic viveret. Quot autem sive in canibus, sive in aliis animantibus, cum viverent, pericula fecerit, aut quæ in occisis adnotaverit, quot hominum cadavera incidit, quot in Partibus aut quæ secundum naturam sunt, aut quæ contra se habent, sit rimatus, cum prope innumeris in chartis scripserit; non minorem tamen numerum consciis videtur prætermisisse, persæpe medicis occupationibus impeditus, nonnullum morbis prohibitus: quos neque paucos, neque leves ex istis ipsis graveolentium corporum disseccionibus eo facilius contrahebat, quod cum reliquis vigeret sensibus, ob incredibilem teterrimi odoris patientiam naribus tandem captus fuerat. Sed ea erat cupiditate eoque studio per anatomen proficiendi, ut quamvis acutis propterea conflictatus ægotationibus, extremo in discrimine fuerit primum anno CIO IDC LXXXVII. iterum circa annum CIO IDCC, quamvis antea ad tantam maciem, gracilis per se juvenis, redactus esset, ut accedente tussicula, & falsi ad fauces humoris defluxu, nemo esset Medicorum qui non tabidum mox fore, metueret, nemo Amicorum qui non rogaret, sibi ut tandem parceret, institutumque periculosum dimitteret; tamen ne post hæc quidem disseccionum finem fecerit: imo quotiescumque occasio data est, quo annis superioribus, eodem & insequentibus incredibili mentis ardore ad verum inquir-

rendum actus, dies noctesque inter cadavera est versatus.

Atque hoc loco non est prætereundum quod vel tum fecerat, cum olfaciendi sensu apprime uteretur. Est enim ejusmodi, ut ex eo uno conjici possint cætera quæ perpeti non dubitabat, ut suo illi studio indulgeret. Ex summo cadaveris femore exsecuerat quidquid longi dirique morbi fuerat sedes, exsectumque domum miserat, ut fere solebat, quo diligentius examinaret. Cum totus in eo esset, plerisque jam satis inspectis, subito in proximam urbem ad Viri primarii curationem accersitus, quod reliquum erat in aquam, subinde mutandam, conjicere, & in reditum differre cogitur. Serius quam speraverat, Bononiam reversus, nihilosecius quæ reliquerat in manus sumpsit: neque antea posuit quam plane intelligeret, frustra sibi operam esse sumptam, nisi is nervus qui omnium est crassissimus, quomodo supra infraque exsectam partem se haberet, pro certo cognosceret. Quid faceret? Erat ætas summa, tempestas fervidissima, dies autem jam decimus tertius postquam cadaver sepultum fuerat. Ausus est tamen de eo eruendo vespillones appellare. Negantibus cæteris, vix unum blandis precibus, magnoque præsertim pretio exorat. Protrahitur luridum, informe, taboque diffuens cadaver. Graveolentia absteritus intoleranda recedit vespillo. Sed intrepidus accedit Valsalva: quæ vult inquiri ac persequitur, nec abistit prius, quam satis sibi superque faciat. Multa ego audiui, multa legi de Vesalio (b), de Ruyschio (c), de aliis qui supra quam credi possit, Anatomen adamarunt. Incredibilia, cum essent juvenes, aulos illos, & perpeffos, non nego. Hoc nego aut unquam, aut certe cum viri essent facti, nactique jam magnam in Anatomicis rebus, & Medicis, ac Chirurgicis scientiam, auctoritatemque, pertulisse.

Sic enim Valsalva disseccionum fuerat studio incensus, ut cætera non omitteret quæ egregio in Medico, Chirurgo requiruntur. Quorum pleraque supra sunt a nobis commemorata. Ad ea accesserat singularis cura in remedium materia, eorumque natura, & facultatibus cognoscendis: ob eamque causam quæ cautiores prodiderunt Chymici, non neglexerat. Quibus in rebus ut facile, multumque proficeret, intima amicitia fecerat, quam adolescens cum aliquanto adultiore conjunxerat Petro Molinellio, quem multo doctissimum fuisse rerum illarum, vere videor posse contendere, neque minus experientem Medicum, & in optimi cujusque Medicinæ Scriptoris voluminibus noscendis æque ac perlegendis versatum. Utebatur etiam intime Hippolyto Francisco Albertino, qui in medendo ut sagax, diligens, cautusque fuerit, cum ejus Opuscula (d), quamvis perpaucula, satis ostendant; hic nihil attinet docere. Hi, siqui alii, inter se, & cum Valsalva conjuncti, ut plerisque hujus intererant disseccionibus, sic vicissim suas cum eo animadversiones, observationesque communicabant; vel potius tres una easdem, iis quidem annis, instituebant, simul in Valetudinariis, simul domi illud omne tempus tribuentes studiis optimis, quod alii plerique juvenes in pravis, aut inutilibus consumebant.

Et si hæc, ut diximus, ita se habebant; tamen cum inter cæteras Valsalvæ exercitationes illa præcipue emineret, qua jam plerisque præstabat Medicis, Anatomia; effugere non potuit, primis illis temporibus, nonnullorum mistas cum laudibus obrectationes, ut præclaris Viris persæpe accidit, qui aut Philologiæ, aut Mathelisi, aut Rei Chymicæ, aut Herbariæ excellentem scientiam cum Medicina conjunxerunt, sed Anatomes in primis: quod usu evenit vel illi quem paulo ante nominavimus, Andreæ Vesalio, ad hunc modum describenti *peffimum*, ut loquitur Corn. Tacitus (e), *inimicorum genus, laudantes*. „ Si quem, „ inquit (f), aliqua ab ipsis ignorata cognoscere „ animadvertant; illum quidem eorum peritum factum esse: cæterum (quod ipsi nomine tantum „ sunt) medicum esse negant; quasi is demum medicus foret, qui nihil minus quam medicus vere censendus

(b) Vid. ejus Epistolam de Rad. Chyn. (c) Vid. ejus Advers. Anat. Dec. 2. in fin.

(d) Vid. cum Bonon. Inst. Sc. Acad. Commentar. (e) Vit. Agric. (f) Epist. cit.



„fendus sit: & perinde ac si absolutior in aliqua medicina subfervientium disciplinarum diligentia, ad reliquam medicinæ cognitionem obesset. „Quorum vidualæ, non minus quid ipsi ignorent, quam in quo alii excellant, prodentes, cum parum cæteris, tum nihil Valsalvæ offecerunt: quin e contrario effecerunt, ut fama ejus magis in dies magisque cresceret, dissectionum autem accuratissimarum utilitas in Medico, Chirurgoque clarius eluceret.

Illis enim fretus, primus, Bononiæ, in membrorum amputationibus, ad sanguinem compescendum, atrocissimum ignis auxilium rejecit; arterias obligavit; primus surditatem posse interdum manu curari, ostendit: primus chirurgica plura instrumenta, pluribusque ex partibus constantia, ad multo pauciora, & simpliciora contraxit. Cumque non tam ex aliorum commentariis, quam ex proprio, in re præsentī, judicio Chirurgiam exerceret; hanc in ægrotantibus propemodum singulis, non ad certam quandam & immutabilem normam, sed ad peculiarem cujusque casum accommodabat: atque, ut maximi erat tum consilii, tum animi; celeriter quæ opus erant, & excogitabat, & perficiebat, manu æque promptus atque ingenio. Hinc illa quæ sæpe alii, & præstantes quidem Viri, frustra conati, in desperatis reliquerant, nova ipse arte, nec, postquam vidisses difficili, confecit ex sententia; ut verissimum ei testimonium dederint Nosocomii Incurabilium Conservatores, cum mortuo posuerunt monumentum in quo scriptum est, apud eos quoque fuisse, & quidem *per V. lustrā, Chirurgum miris curationibus beneficentissimum.*

Magnus itaque in Re Chirurgica Valsalva fuit; nec minor in Medica. In hac ab illa; in utraque ab Anatomica summopere adjuvabatur. Quæ enim Medicus latentia curat, subinde haud alia sunt, quam quæ Chirurgus ante oculos posita, tumores, inflammationes, abscessus, alia istiusmodi. Vidisse persæpe aperta juvat ad abdita melius intelligenda. Sedem vero, & siqua indicia abstrusiora sunt, quid certius doceat, quam Anatome, quæ in qua parte quod viscus sit, & post certa signa quod vitium inveniri soleat, ostendit? Huic acceptum referre decet quod Valsalva de præsentibus verissime judicaret; de futuris non minus vere conjiceret. Nam quo in viscere, quæve in hujus parte quæ esset labe, sæpius, ægro etiam tum vivo, pronunciavit; neque ea res illum fefellit. Sæpe etiam accidit, ut cum mortis causam in cadavere quæsituri, aperire pectus instituisent, ipse interveniens, cum quæ in vivente fuissent notæ, accepisset, afferri ferram continuo jusserit, atque intra calvariam id ostenderit, quod pectore includi, existimaverant: contra, alias ut cum illam secare vellet, recludendum esse pectus, moneret; in hoc enim, ut reapse mox invenerunt, suis ex receptaculis sanguinem erupisse. Quarum prædictionum etsi Bononiæ illæ maxime pervulgatæ sunt quæ in summorum Virorum dissectionibus contingere; complures tamen plerosque fugerunt, olim inter discipulos in Valitudinariis habitæ eadem scientia, minori gloria.

Quod si vera est, ut sane in morbis sanabilibus plerumque est, Hippocratis (g), aut certe vetustissimi Auctoris sententia, *Medicum qui suffecerit ad cognoscendum, sufficere etiam ad sanandum*; post ea quæ exposui, non necesse habeo referre, quot illi fuerint quorum cum jam nulla spes salutis relinqueretur, Valsalva in tempore vocatus, partim in pristinum restituerit; partim si ab interitu prorsus retrahere non potuit, at hoc certe retardato, quoad licuit, servavit, partim instanti periculo sæpius depulso, longe plures quam speraverant, annos in vivorum numero sic retinuerit, ut quam minime multa veltigia gravissimorum morborum manerent. Dederat autem præcipuam operam, uti in chirurgicis, sic in medicis (quod utinam omnes imitemur) ut qui morbi vulgo insanabiles habentur, eorum attentius primordia vel per anatomen observaret, si forte aliquos inveniret quorum aut initis occurrere, aut augmenta intercipere, aut impetus tardare posset. Eaque in re quid

præstiterit, neque illustrius, neque felicius proferri a me posse exemplum credo, quam quod, incunte sæculo, princeps instituit, dilataciones intimarum arteriarum (*ἀνευρύσματα* vocitant) priusquam majores fiant, curare ea ratione, quam Albertinus (h), ejus, ut ante dictum est, studiorum conscius, tandem proposuit annis superioribus, ipseque, & alii apud Bononienses Medici suis deinceps ad eundem modum respondentibus experimentis comprobarunt.

Talis cum esset; suis Valsalva dignam meritis famam est adeptus in doctissima Civitate. Jam tum juveni se, suorumque salutem crediderant Viri summi, alii litteris, alii dignitate, omnes genere, prudentiaque illustres. Ut crevit ætas, atque auctoritas; idem fecerunt multo plures, prioribus pares, nonnulli & majores, in his Thomas Ruffus, & Jacobus Boncompagnus S. R. E. Cardinales, quorum hic sacris, ille etiam cæteris præerat Bononiæ rebus. Nobile erat Valsalvæ nomen, laus maxima: eaque erat omnium, Medicorum quoque, de illo opinio, ut magni ejus consilium, magni ejus opera in rebus difficillimis æstimaretur, nec solum inter Bononienses, sed etiam inter omnes quæ ejus opem expertæ sunt, Civitates, Mantuam, Parmam, Placentiam, Ravennam, Forum Cornelii, & Livii, Faventiam, Ariminum, Fanum Fortunæ, Urbinum, atque alias, quo ad primarios viros, fœminasque, ad Dynastas, ad Præsules, ad S. R. E. Cardinales, gravioribus implicitos morbis accersebatur. Nam qui, atque unde consultum venirent, aut sibi per litteras auxilium peterent, nec facile, & post ea quæ retuli, supervacaneum est memorare.

Quas ob res, ob editumque de Aure Humana librum, quo de libro post dicemus, quam Bononiensibus charus, quam Exteris notus, quam utrique admirabilis fuerit, indicio esse possunt quæ utrique & privatim, & publice in hunc contulerunt. Nihil ei detraxit inter illos viventi quod alienæ erat civitatis. Nam non modo, ut supra indicatum est, amplo Incurabilium Nosocomio Chirurgum præfecerunt, non modo Inclytæ Scientiarum Institutū Academicæ Præsidentem iterum, ac tertiam præposuerunt; sed & multo antea alio in Cœtu ad aliud Munus admitti posse, magno omnes consensu censuerunt, non quod civis esset, ut lex jubebat, sed quod scientia, & fama illis esset, ut lex sinebat: esse enim illud fortunæ; hoc virtutis. Quod vero non ad privatam, sed ad publicam rem pertinebat; Civitatis salutem, & annonam ejus potissimum spectatæ fidei, peritiæque Senatus Amplissimus commendavit, illam sub initium ferme sæculi, cum litteræ, & merces ex regionibus afferrentur nomine pestilentia suspectis, ne nisi rite, perpurgatæ acciperentur; hanc duodecim post annis, quo tempore necessarium, siquod aliud, ad colendos agros animalium genus, boves communibus, & contagiosis morbis absumebantur, ne latius horum vis ferperet, & quoad ejus fieri posset, infringeretur. Neque tunc solum, quid de Valsalva sentiret Summus Civitatis Ordo præclare ostendit, cum utrique illum rei præfecit, aut cum Honorarium Anatomies Professore declaravit; sed tunc præsertim cum anno ciro dcc xcvii. tantum illi honorem habuit, ut unum ex omnibus delegerit qui in celeberrimo Gymnasio & humanum corpus incideret, quod a plurimis antea quidem, & ab ipso quoque, sed nec quotannis, neque ex publico decreto factum, & singulas incisas partes, cum vellet, ex peculiari officio ostenderet, additis apud Theatrum Anatomicum, illique attributis ædibus ad id officium aptissimis; quæ ante ipsum concessa fuerant nemini.

Hæc Bononienses. Cuncta autem Italia, atque adeo Europa quanti eum faceret, inde apparebat, quod ex eruditis Medicis Bononiam venientibus nemo erat qui ipsum videre, adire, alloqui prætermitteret, nemo qui cum vidisset, non id in præcipuis suæ peregrinationis fructibus poneret. Ex cæteris qui ire illuc non poterant, ut quisque erat ingenii, & studiorum fama clarior, ita alii epistolis saltem colere, alii missis quos vulgaverant, libris, alii cum inter docen-



docendum, aut scribendum de ejus inventis sermo incideret, honestissima commemoratione præclarum de eo judicium patefacere non omittebant. Itaque etsi Bononia nunquam ille pedem extulerat, nisi aut eo quo diximus, medendi causa profectus, aut cum semel Patavium venit, idque anno CIO IDCXCVI. cognoscendi cupidus, qua hic ratione eotempore traderetur Anatomia, aut cum insequenti anno Florentiam, anno autem CIO IDCCXXI. Venetias se contulit, utroque Patriciorum Bononiensium gratia, quos ægrotantes consiliis adjuvaret suis; nihilo tamen secius nulla erat usquam docta Civitas, Gymnasium nullum, in quo non æque ac Bononiensibus, esset notus, in quo sine dubio magnus intelligentium omnium sententia non haberetur. Qua constanti fama, & suo ipsa judicio, quod maxime facit auctoritatem, permota Regia Societas Londinensis dignum se, & præceptore Malpighio Anatomicum in suum numerum adlegit.

Cum cæteri, cum etiam tam procul a nobis disjuncti hæc in Valsalvam conferrent; fieri non poterat, ut ipsum negligerent Forocornelienses sui. Nam etsi hoc fere commune vitium in multis civitatibus, ut magna invidia magnæ gloriæ comes sit; tamen quædam sunt, & certe illæ nostræ sunt, fautrices suorum, seque eorum laude ornari, dignitate augeri, nec fallo, arbitrantur. Talem se Valsalvæ Patria præbuit, lumina ipsum omni tempore existimatione, summoque amore complexa. Itaque præcipuum ei honorem detulit, ut ex iis esset, qui nobili præsunt Magistratui Pacificorum. Neque hoc contenta, majora obtulit, & super hæc, honorarium, publice dandum in annos singulos, si quidem ad suos remigraret. Ille etsi pius erat in Patriam, ut qui maxime, etsi talem de se opinionem civium suorum, benevolentiamque habebat charissimam; tamen, gratis actis, eo beneficio uti noluit, non tam ne sibi non constare videretur qui majoribus, & plura pollicentibus civitatibus negaverat, quam ne parum gratus adversus illam a qua & doctrinam, & famam acceperat, & multis in se collatis honoribus ante fuerat occupatus. Credo etiam magis illud spectasse; ut sapientem decebat Virum, & longe in posterum prospicientem; se charitati in Patriam inservire melius posse, si in eo quidem morem Patriæ non gereret. Nam si paruisset; cives fortasse aliquos ex iis qui tum vivebant, servasset, paulo postea nihilominus interituros.

Sed contra ea, si remaneret Bononiæ; se suæ videbat universæ Civitatis gloriam aucturum laude nominis, quoad ipsa, & litteræ essent, nunquam intermoritura. Idem majores, idem æquales Clarissimos Viros intuitos esse, & consecutos. Neque enim Joannem illum quem *ab Imola* vocitant Juris Consulti, neque Alexandrum Tartagnum, neque post hos M. Antonium Flaminium, neque eum qui memoria nostra floruit, Jo. Bapt. Zappium in Patria aut patronos, aut poetas agendo, sed Patavii, sed Bononiæ, sed Romæ in magnis Gymnasiis, magnisque in Urbibus docendo, scribendoque, illos in summis Legum Doctoribus, hos in eximiis Poetis, utrosque in maximis Fori Corneliis ornamentis esse habitos, atque haberi.

Itaque domicilium quod sibi ab adolescentia Bononiæ constituerat, ad extremum usque tempus servavit, cum eoque facultatem studiis obsequendi suis, quam in litteratissima, & frequentissima Civitate sibi magnam dari, expertus fuerat. Bibliothecam quidem instructam habebat libris neque paucis, & selectis, qui præsertim ad Philosophicam, ad Medicam, ad Chirurgicam, ad Anatomicam Rem attinerent. Tamen siqui forte essent præterea sibi opus aliquando; erat ubi aut pretio, aut prece confestim, & facile compararet. Erant ibidem Amici & doctissimi, & conjunctissimi: quanquam juvenis amiserat duos, Valerium Zanium, Comitem, & Patricium, eruditione, prudentiaque, sua tempestate, cum paucis, & Marcellum Malpighium, Anatomicum, ut ante dictum est, cum nemine comparandum. Zanius eum non secus dilexerat, ac filium: quod grato ipse animo præ-

*Morgagni Opusc.*

dicabat, referens interdum pro re nata quæ a Senegravissimo acceperat, cum de Deo religiose, de historia erudite, de moribus sapienter, identidem secum pro intima familiaritate verba faceret. Malpighius autem, cujus sæpe præcepta, & monita eodem animo commemorabat, alacritatem addiderat ornandi spartam medicam, atque anatomicam solertia illa, ac diligentia, quam in adolescentulo jam tum admiratus, quoad superfuit, vel Romæ laudare nunquam destitit: quod ex ejus, & Pacchioni ad Valsalvam litteris perspectum habemus. Sed illuc redeamus. Erant Valsalvæ apud Bononienses, præter omne genus librorum, Amici plures eruditissimi, atque experientissimi. Erat magnus, ut in urbe ampla, & tribus præsertim non mediocribus Valetudinariis instructa, ægrotantium, & cadaverum numerus; ut & novas instituere, & inchoatas posset observationes perficere. Cujus rei nullam unquam occasionem prætermittebat, semper aliquid ejusmodi mente agitans, nec obvia tamen despiciens; velut cum in Valetudinariis ambulans, quasi aliud agens, jacentium decubitus aspectumque adnotabat, ex hisque tantummodo, eorum periculum, atque exitum conjiciens, mox interrogando, & cætera tum, & deinceps animadvertendo experiebatur, falsam, an veram (id quod sæpius) conjecturam fecisset. Qua facili, siqua alia, & in medio posita, exercitatione se multum olim profecisse, confirmabat, ut sæpe vel in iis de quibus Medici securi fuissent, suspicari primus, nonnunquam & prædicere potuisset quæ minime fuerant expectata. Ad hanc, atque ad alias discipulos hortabatur exemplo suo; quorum copia, a longinquis etiam civitatibus, nullo ipsi tempore Bononiæ defuit: quæ haud scio an una ex præcipuis ibi permanendi causis fuerit Viro, quamplurimos posset juvandi, & præclara studia propagandi cupidissimo.

Et sane ex ejus Schola, tanquam ex equo Trojano, complures prodierunt illustres Viri, quos nominare singulos & longum est, & siquem forte invitus præteream, odiosum. Illud satis fuerit dixisse; eorum alios floruisse, & florere in Medicina facienda, alios etiam in tradenda, alios Archiatros, alios Publicos Professores, alios munere utroque nobiles, nonnullos denique editis scriptis, si non illustres, at certe non ignotos. Neque hos solum, & quos itidem Bononiam, tanquam ad mercaturam optimarum artium, profectos, aut Amici, aut primarii Viri commendaverant, libenti animo erudiebat; verum etiam siquos cum paupertas premeret, ingenium, & docilitas sublevabant. Nec vero hoc semel fecit, sed sæpius; maxime in adolescentibus duobus, quos, laudatum in Fabricio ab Aquapendente exemplum (i) referens, cum famulos accepisset, Chirurgos, nec vulgares, dimisit. Sed & aliquot Obstetrices iis præceptionibus informavit, quibus faciles partus ex difficilibus redderent, in qua ipse facultate excellebat, nulla alia re impulsus, nisi ut per eas complures matres, filiosque servaret, utrosque corpore, hos etiam animo summum alioqui detrimentum facturos.

Magna quoque capiebatur miseratione eorum qui morbis simul, & inopia conflarentur, præsertim si honesto essent loco nati. Hos, medicinæ causa accersitus, quibus rebus indigebant, ex sua re familiari, non modo ex sua arte, adjuvabat, solitus alioquin & apud ditiores hanc eo, quo utinam omnes, ingenuo animo & liberali exercere. Neque enim lucrum, sed suam existimationem spectabat, qua nihil, secundum Deum, habebat charius. Hanc in eo agi arbitrabatur, si quem morbum plane insanabilem esse sciret, ejus ut sanabilis curationem susciperet; item si in quo aliquid a remediis sperasset, his nequicquam usus, porro pergeret: quorum utrumque semper est abominatus; sed ægris, vel potius quorum intererat, admonitis, se quidem, cum per eos licuit, continuo subduxit. Erat utique in Valsalva cum summa humanitas, tum mirabilitas: at polliceri quod præstare non posset, id vero non liberalis, sed levis, atque adeo perfidiosi hominis existimabat. Idem in nitendo quod semel non sine

C

ma-

(i) Vid. Tomasin. Elog. illustr. Viror. Tom. 1. in Casserii Elogio.



magna ratione admisisset, tanta erat cura, atque constantia, nulli ut diligentia, & studio parceret, nihilque intentatum relinqueret. Nam etsi, ut cautum Medicum decebat, semper illud, sicuti in ejus quadam ad Principem Virum epistola est, Hippocraticum ( *k* ) spectabat, *ne quid noceret*, eoque simplicioribus, cum poterat, & tutioribus, & usitatis, neque multis adeo remediis uti consueverat; & plura tamen, & validiora auxilia non ignorabat, & in chirurgicis praesertim operibus magno, ut antea dictum est, erat animo, atque intrepido, nunquam tamen praecipite, aut incauto, ut qui omnia quae incidere possent, ante prospexerat: quanquam, etiam adversus necopinata quo animo esset, tunc satis ostendit, cum in suis aedibus commentantem fulmen propemodum perstrinxit. Tantum enim ab eo absuit, ut animo caderet; continuo numquid forte alicui domesticorum fulmen nocuisset, numquod incendii initium usquam reliquisset, superiores, inferiores, omnes partes aedium adeundo, sic quaesivit, ut si ipse, qui prope ambustus erat, nullo periculo fuisset, magis postea consideratione discriminum quibus vita nostra obnoxia est, quam re praesenti perturbatus.

Hæc Valsalvæ studia, hunc animum facies commendabat, alta amplaque fronte, nigris oculis ac vividis, decenti naso, ore parvo, labris rubentibus, cætera colore inter candidum, & rubicundum; sereno vultu, sed non sine gravitate; ad hæc, congruentibus membris omnibus, statura non magna, sed figura venusta: satis firmæ ad laborem ferendum vires; stabiles manus, eademque, cum opus esset, promptæ atque expeditæ; corpus agile; nisi quod extremis sex septemve annis prægravante pinguedine tardabatur. Nam qui gracilis, ut supra indicatum est, ad virilem ætatem pervenerat, sensim deinde pinguescens, honestam primum dignitatem, sed postremo ultra modum obesus, molestiam, morbos, ipsamque adeo, quam & præviderat, & prædixerat, mortem est natus.

Principio, tussis qua annis quoque superioribus, sed remissius, vexatus fuerat, augeri, & cum tanta faucium siccitate ac siti conjungi, ut noctu praesertim, magnam aquæ vim absumere cogeretur: hinc noctu vigiliis urgeri, interdum dormitatione: ad hoc, qui non multi cibi, vini autem vel minus multi fuisset, jam illum pene sine modo appetere, aquam autem, ut dixi, vel præter modum. Ex his, ut morbus morbum parere solet, aut augere, pinguedo crescebat; stomachus infirmabatur: itaque anno ante quam decederet, ad cætera incommoda ciborum vomitus a prandio accessit, noctu autem vehemens nonnunquam dolor laxioris intestini quod *κόλον* nominant; ut noctibus quatuor continentibus quaternas horas torqueretur. Hoc tamen morbo & alias fuerat olim cruciatus: qua re magis, quam difficultate ejus ab renum dolore internoscendi, factum censeo, ut ex his semel laborans, ex eodem se intestino laborare crediderit, donec arenosa urina alium esse morbum ostendit, sed inter initia persæpe adeo similem prioris, ut Galenus ( *l* ) quoque cum altero tentaretur, alterum esse, existimaverit quoad usque dejectio humoris quem vitreum dixerat Praxagoras, errorem sustulit.

Quo magis præceptum illud omnibus a Medicis servari debet; id quod Valsalvæ nocte intempesta non licuit; ne suorum ipsi morborum sint iudices, cum duo summi Anatomici & Medici sic cavere non potuerint, ne alter in alterum errorem inciderent; cujus simplicem confessionem sibi uterque credidit convenire sive Hippocratis more ( *m* ), aliorumque, ut Celsus ( *n* ) ait, *magnorum virorum, & fiduciam magnarum rerum habentium*, sive etiam, quæ mea omni tempore sententia fuit, quod longe majori laude ingenuitas digna sit, quam hallucinatio, praesertim ejusmodi, reprehensione. Sed ad postremos Valsalvæ morbos revertamur.

Hi quorsum essent evasuri, jam plura antea indicia fuerant. Nam etiam inter consulendum Medici animadverterant somniculosum, nonnunquam & stertentem,

sic tamen, ut cum responderet, non videretur dormivisse. Mihi vero non tam id displicuit, cum forte anno eodem CIO MDCC XXI. consilia pro Fœminis primariis conferremus Venetiis primum, Faventiæ iterum, quam linguæ difficultas quædam in explicando sermone, levis illa quidem, sed mihi tamen, longo intervallo audienti, satis manifesta; ut ex eo tempore & vereri ipse, & Amicis prænunciare, quantumvis frustra, non destiterim quod anno accidit CIO MDCC XXIII. prostridie Kal. Februarias. Nam cœnato, secumque, ut solebat, commurmuranti, & quasi aliquid commentanti repente os distortum quid immineret, domesticis præmonstravit. Admonitus, tantum adhuc aberat a mentis læsione, ut eos qui aderant, ne animo deficerent, neu perturbarentur, sed sibi ut quam quisque possent, opem ferrent, hortatus, accersitis Medicis, & Sacerdotibus, illis quidem ut sanguinis non una detractione contenti, rursus mitterent, si videretur, significaverit; his vero, Sacra ministrantibus, ea omnia religionis & pietatis signa dederit, quæ vitam anteaactam decerent, donec graviore morbi vi, quem *επιπληξία* vocant, ingruente, eadem nocte vivere desiit. Sic Valsalva vix major septem & quinquaginta annis natus, quo morbo liberaverat plures, & quo de morbo præclara animadverterat, eo ipse morbo ereptus fuit.

Elatus est, pro dignitate hominis, honesto funere, conditusque in sacra Æde quæ ab Divo Joanne in Monte Bononiensibus appellatur. Quanta omnium de vivo opinio, quantumque mortui desiderium fuerit, vel ex monumentis cognosci potuit, quæ ipsi intra eum quo decessit, annum, aut certe non post multo, raro exemplo quinque sunt posita, ab aliis aliud, aliisque verbis, sed eadem omnia & laudis, & voluntatis significatione; unum sepulchro proximum, idque ab Aeditimis, Canonicis Regul. Lateran., alterum, de quo supra commemoravi, in Nosocomio Incurabiliū ab hujus Conservatoribus; tertium, & quartum, adjecto ejus e nobili marmore simulacro, singulari opera atque arte perfectio, illud, Senatoribus auctoritate, & sapientia præstantibus quibus Instituti Scientiarum procuratio demandata est, id jubentibus, in magnificis aedibus eidem Instituto assignatis; hoc in celeberrimo Gymnasii loco ab utraque Alma Universitate *Artistar.* quod potissimum, quoniam ita factum atque exornatum est, ut quatuor de quibus in hac Vita exposuimus, Valsalvæ præcipua studia non minus inscriptis verbis, quam circum addita haud ineleganti pictura repræsentet; idcirco ære describendum, & cum hoc nostro Commentariolo conjungendum curavimus ( \* ). Novissimum, nec sine simulacro id quoque, Forocornelii in eo loco statutum est, quem in locum, si quid sibi in Patria accideret, Valsalva suum inferri corpus destinaverat, in Divi Dominici Templo, recens instaurato. Positum est autem ab uxore, Fœmina letissima, Helena Linia, pene una superstite Familiæ suæ, apud Bononienses veteri, & Senatoriæ.

Quæ quantum viro, dum hic viveret, obsequens fuerit, cura patefecit ejus voluntati vel post obitum satisfaciendi. Cum enim hoc illum sciret in animo habuisse, ut, se mortuo, sua chirurgica instrumenta omnia, quæ nec ita pauca erant, nec vulgari industria atque artificio fabrefacta, Nosocomio cederent Incurabiliū; Academiæ autem Instituti Scientiarum suum Anatomicum Museum, cum ob alia, tum maxime ob admirabilem illam, primamque omnium, universi auditus organi una in aure præparationem, a Viris etiam Principibus expetitur: cum igitur id sciret; nec prece, nec gratia, nec præmio adduci potuit, ut aliis quam quibus vir indicaverat; non jusserrat; cuncta illa traderentur: tanti apud eam, viri quoquo modo cognita voluntas fuit.

Hanc anno duxerat CIO MDCC X. ex eaque liberos sex procreaverat, mares duos, fœminas quatuor. Sed virilem sexum non reliquit; in prima enim pueritia utrum-

( *k* ) De Morbis Vulgar. l. 1. Sect. 2. Vid. & Galeni Comment. 2. in eund. l. ( *l* ) De Loc. aff. l. 2. c. 5.

( *m* ) De Morbis Vulgar. l. 5. n. 14. ( *n* ) De Medicina l. 8. c. 4. ( \* ) Vid. in Veneta Operum Valsalvæ Editione.



utrumque amiserat filium. Filiarum quoque ultima non diu patri superstes fuit. Vivunt reliquæ.

Quarum priorem nuptum dedit mater Ludovico M. Montefanio Capraræ J. C. nobili civi Bononienfi: altera, & tertia solemniter vovere Deo virginitatem maluerunt. Has omnes Valsalva habuit hæredes non tam magni patrimonii, quam maximæ gloriæ. Illi enim augendo; etsi indiligens paterfamilias non fuit; multo minus operam dederat, quam scientiæ, & virtuti, & quæ harum comes est, laudi nominis amplificandæ.

Inter omnes constat, qui ejus & mentem, & consuetudinem probe cognitam habuerunt, multo eum maximam vitæ partem, ut verum inquireret, ac publica commoda promoveret, in dissectionibus consumpsisse. Namque in auris dumtaxat anatomia sedecim ipsos annos fuit, dissecit ejus rei causa humanis capitibus amplius mille. Hinc *Tractatus* extitit de *Aure Humana*, qui unus maxime apud Philosophos, Medicos, atque Anatomicos Valsalvam illustravit, post Bononiensem editionem A. MDCCCIV. apud Constantinum Pisarium, Trajecti ad Rhenum iterum A. MDCCCVII. in officina Guillemi Vandevvater, Genævæ autem tertium A. MDCCCXVI. sumptibus Crameri, & Perachonii, a typographis descriptus, & tamen a multis jam annis in tabernis librariis prostrans raro adeo ut nunc quartum prodire debuerit, cum tres posthumæ Anatomicæ Dissertationes, novum assidui Valsalvæ laboris, atque industriæ specimen, primum ederentur. De quibus, & de eo Tractatu cum illa huc addidero, quæ nulla ratione omitti possunt; finem statim scribendi faciam.

Dissertationes Valsalva recitaverat in ea quam sæpius memoravi, Instituti Scientiarum Academia, primam quidem anno MDCCCXV. XVI. Kal. Jun. alteram vero anno MDCCCXVII. circiter Idus Decembris; tertiam denique anno MDCCCXIX. item pridie Idus Decembris. In prima sermonem habuit de laxioris intestini Vinculis, de Sinibus arteriæ Magnæ, de nervis ab Spinæ Medulla ad par Vagum accedentibus, deque Annulis tum Visoris, tum Motoris oculi nervi moderatoribus. In altera de quibusdam oculorum affectionibus, & secundum, & præter naturam, inque his posterioribus de Suffusione. In novissima de excretoriis Ductibus, atque usu Renum Succenturiatorum. Gratia erat in plerisque his rebus cum novitatis, tum vero etiam utilitatis. Itaque magno assensu, & laude ab iis qui aderant, audita, mox fama apud cæteras Academias pervulgata summam omnibus editionis expectationem commoverunt.

Nec abnuebat Valsalva: sed illis valetudinis tardabatur incommodis, quibus, ut supra demonstratum est, iis ipsis annis tentari cœperat. Icones erant conficiendæ, quæ cum prima Dissertatione proponerentur. Neque enim tertiam scripserat, quæ curam eandem requirebat, cum de edendis observationibus illis suis cogitationem suscepit, nonnunquam animi pendens, an adjectis ad eas aliis, longe alio pertinentibus, omnia rescriberet, decemque in capita digereret: quæ res ipsa quoque afferebat moram. Sed tertia addita Dissertatione, hoc consilium prorsus abjecit: & Dissertationes ut recitaverat, ita cum Academia, cui tradiderat, Commentariis edendas statuit. Dum horum editio necessariis de causis diutius extrahitur; utrumque accidit eorum quæ in iisdem sunt a Viro Clarissimo Francisco M. Zanotto diserte, ut solet, commemorata (o), ut suas Valsalva Dissertationes, aliquid in his expoliendi, & perficiendi causa, ab Academia repeteret, utque antequam redderet, supremum obiret diem. Secuta sunt illa quæ ab Zanotto protinus subjiciuntur, vere, cum narrat; perhumaniter, cum existimat, omnia scribente, judicium de me & Hæredum Valsalvæ amicis, & tantæ Academia, honestissimum: missio ad me non modo earum Dissertationum, sed & chartarum Valsalvæ omnium, quæcunque ad ejus studia attinerent, postquam & cuncta ita ut ipse omnino volui, numerata fuerant, & singulæ obsignata; sic autem volui

Morgagni Opusc.

ob illas causas quæ in earum chartarum restitutione afferentur, nunc facile intelliguntur: denique confessio Epitomes Dissertationum illarum, a me neque ita multo post, ad Academiam missæ, quæ cum ejus Commentariis (p) edita est.

Quoniam vero in ea ad Zanottum Epistola qua illam sum quanta maxima potui, brevitate Epitomen complexus, esse causas scripsi, cur Dissertationum editio mihi necessario esset in longinquum tempus differenda; quo in judicio utinam deceptus essem; hic fusius exponendum est, quæ mihi, & quot difficultates obstiterint non tam in re perficienda, quam in consilio capiendo qua eam potissimum ratione perficerem. Chartæ fuerant ad me allatæ maximo numero, quædam inter se nexæ, fere omnes solutæ; aliæ ad aliam rem attinentes, pleræque autem ita scriptæ, ut sibi scribere occupati homines, memoriæ dumtaxat causa, solent, imperfectis sententiis, interdum & verbis, nec sine compendiariis notis; nonnullæ etiam, diffugiente atramento, vix legendæ. Perlegi omnes labore improbo, quem tamen nota Valsalvæ manus & consuetudo sublevabat. Inter legendum, quæ prorsus inutiles viderentur, seposui: cæteras, quæcunque aliquid haberent quod ad Dissertationes, ad Tractatum, aut denique ad Anatomen quoquo modo attinere posset, certo singulas adscripto numero mihi notatas, iterum ac sæpius relegi donec quasi indice seorsum confecto, quid in qua charta extaret, facile, cum vellem, & scire liceret, & reperire. Feci idem in Virorum Doctorum litteris, quæ erant plurimæ, ad Valsalvam scriptis, siquam vidi ad ejus aut observationes, aut vitam illustrandam ex parte aliqua esse utilem. Sic tandem etsi plurima inveni quæ ad eorum dissectiones pertinent, qui ex vulneribus, aut ex certis aliis quibusve morbis interierunt, complures etiam observationes, & quædam experimenta, longe alio, magnam partem, quam quo voluisssem, spectantia, quarum rerum omnium eæ quæ nunc usum nullum habuerunt (nam multæ habuerunt) ut alias habeant, si vita suppetet, operam dabo; tamen quæ potissimum quærebam, ea multo fuerunt mea spe, & voluntate pauciora.

Illud magis miratus sum, vel quædam defuisse quæ olim mihi, atque aliis palam Valsalva dixerat ab se animadversa, aut observata, sive, quod malim credere, multa chartis committere prætermiserat, sive etiam interciderunt; ut certe exemplum intercidit ejus Tractatus amplissimis oris conspicuum, in quibus videlicet posset, siquid addendum, detrahendum, aut mutandum videretur, commode adnotare. Cujus ego exempli hoc magis recordor, quod cum duo, haud amplius, ad eum modum facienda curasset, sibi alterum servavit, mihi alterum continuo dedit; rogans ut idem in meo facerem, quod in suo ipse esset factururus. Tale igitur ejus exemplum ut summa conquiri diligentia juberet, etiam atque etiam petere non destiti ab illius sororis filio Fausto Stagnio J. C. & Canonico Forocorneliensi, spectata in avunculum pietate Viro, qui & chartas ejus omnes magna cum cura ipse collegit, & quæcunque de ejus vita minus cognita mihi erant, misso bene longo, italice scripto, commentario me docuit. Cum in Stagnio, ea de re vicissim a me admonito, non minor esset, quam in me, cupiditas exempli illius inveniendi: cum sæpius non per alios modo, sed per se ipse quævisset, neque ullum pene quærendi finem fecisset; illud nusquam extitit. Qua de re hic commemorandum putavi, ut si unquam forte alicunde id prodeat, facile ab omnibus agnoscat, meusque hic labor, Valsalvæ voluntate cognita, felicius ab aliquo suppleatur.

Nam voluisse Valsalvam, ut in Dissertationibus, ita etiam in Tractatu quædam mutare, alia tueri, vel ex schedis ipsius constet; quæ vero potissimum, & qua ratione, vix usquam omnino constat. Una enim, haud amplius, charta est, in qua diserte adnotaverat, quid & quemadmodum in prioribus dumtaxat paginis Dissertationis tertiæ sibi mutandum constituisset. Itaque magnum mihi onus laboris, atque

C 2

officii



officii suscipiendum putavi, ut quibus de rebus in ejus Tractatu, & Dissertationibus verba sunt, iis de rebus primum quid alii & ante, & post ipsum in eandem, aut in contrariam sententiam prodidissent, deinde quid ipse, quid ego observassemus, attento animo, & libero ab omni partium studio considerarem, ut sic denique conjicerem, quæ ipse sibi, si viveret; atque utinam viveret; tuenda, quæ mutanda posset existimare. Quæ omnia etsi neque brevis temporis fuerint, neque modicæ difficultatis; nihil tamen difficilior mihi accidisse, fateor, quam aut postrema illa conjicere, aut cum conjecissem; quod tandem mihi consilium capiendum, quidve faciendum, constituere. Nam cum alia essent, eaque plurima, quæ jure mihi laudari, & defendi posse; alia vero quæ aliquanto secus se habere viderentur; num propterea constare satis, crederem, illa eadem futura fuisse quæ Valsalva servaret; hæc eadem quæ deleret? Quid? si me aliquid fugeret; multa autem posse, confiteor. Quid? si observationes, quantumvis sæpe a me iteratæ, non ad eundem semper modum responderent: id quod in aliis, neque ita raro, accidisse animadverti. Num mihi nihilofecius tantum sumerem, ut quasi ipse Valsalva essem, quasi omnia quæ ille, perspecta haberem, quasi aliter atque a me, res nunquam ab eo potuissent, aut ab aliis possent inveniri; in ejus Scriptis non omnia conservarem; sed alia mutarem, alia tollerem?

Contra ea, hæc subibant animum cogitationes. Quid? si ut mihi, ita forte aliis & videatur, & deprehendatur in his rebus. Quid? si has ipsas Valsalva fuerat mutaturus. Num his conservatis, officio ipsi debito? num veri studio? num publicæ utilitati satisfaciam? Simul veniebat in mentem, quam ipse fuisset veri diligens, ut verum semper consuecset rebus aliis omnibus antepone, quantum esset veritus quidquam quoquo modo confirmare, quod, non dico num verum esset, dubitaret, sed tantummodo non per se sciret. Cujus animi specimen non unum dedit; sed hoc maxime, neque a me, neque hoc loco prætereundum. Censor fuerat ab Academia anno MDCCC VI. constitutus cum Viro Clarissimo Joanne Antonio Stancario, ut mea Prima *Adversaria Anatomica* uterque ante editionem, quæ certis de causis differri non poterat, examinarent, & si videretur, approbarent. Cum Eustachius Manfredius, in cujus acerbo obitu magnam nuper Italia, non modo Academia, fecit jacturam, huic præfesset, eumque Censores convenissent; hæc Valsalvæ sententia fuit: se quidem non dubitare, quin meas observationes qua consuecsem, diligentia, & fide in perfectis *Adversariis* scripsissem; sed illud tamen non intelligere, qui sibi eas liceret approbatione sua confirmare, nisi ante, singulas per anatomen ad Partes ipsas exegisset, verasque esse, comperisset; quæ res nec modici esset temporis, nec exigui laboris. Mirari hic Stancarius, obstupescere Manfredius. Ille vero sic sum, inquit, ut videtis. Morgagnum diligo; sed verum magis. Itaque mihi stat non approbare, nisi spatium detur per dissectiones recognoscendi.

Quid verbis opus est? Vix cessit, vix dedit tandem permotus manus postquam ab utroque factus est certior, non illud a Censoribus leges Academiæ postulare; sed hoc tantum, quod ultro fatebatur, non videri sibi quidquam esse in eo libro quod aut falsum esse, sciret, aut alienum ab Academiæ institutis. Atque hoc Valsalvæ factum, Stancarii, ut oportuit, & Manfredii manu testatum, sicut eo tempore prope subiratus, juvenili animo, tacite quidem, sed non levissime tuli; ita nunc senex & probus, & laudibus effero: mentem enim unice ostendit Viri, nihil, si opus fuisset, amicitia daturi, sed huic verum, ut par est, constantissime antelatum.

Cum hæc ita essent, diuque animum modo in hanc, modo in illam partem distraherent; vix tandem me ab ea ancipiti cogitandi cura expedivi ea ratione ut parti utrique satisfacerem; sed magnum ipse susceperem scribendi onus; quod, etsi me annos jam

multos pressit, leve tamen existimabo, si ab æquis & intelligentibus Viris meum hoc consilium non improbatum esse, cognovero. Est autem hujusmodi.

Primo loco *Tractatum de Aure Humana* non modo iisdem archetypis Tabulis; quibus duæ posteriores editiones caruerunt; ornatum; sed talem omnino damus, qualis a Valsalva editus fuerat; nisi quod voculas aliquas, salva sententia, interdum mutavimus, quæ contra ejus voluntatem, nobis longo usu hac in parte probe cognitam, irrepsent, quasque adeo per se ipse fuerat mutaturus. Sic etiam in contextum accepimus adnotatiunculam quandam ad num. VIII. Cap. v. jam tunc postquam hoc Caput a typographis descriptum fuerat, sub asterisco, quando aliter non poterat, ipso jubente, in ora additam. Sic denique siquid præterea ab iisdem operis manifesto peccatum fuerat, emendare non omisimus.

Tractatui posthumas *Dissertationes* subjecimus. In his sententiam nunquam, at verba sæpius, nec raro verborum quoque circuitum ea ratione commutavimus, quam vel olim Valsalvæ ipsi maxime placere in conficiendo Tractatu, cognoveramus (q), perspicuam magis, quam cultam, orationem, nec tamen omnino incultam, probanti. Nihil addidimus, nihil prætermisimus; si quiddam excipias sub finem tertiæ Dissertationis, idque non de nostra tantum, sed etiam de utriusque Amicorum, hominum doctissimorum, sententia: erat enim cogitatum inexplicabile, & quod consequitur, plane inutile. Contra, in Dissertatione eadem quosdam locos ita restituimus, quemadmodum ipsum cognovimus ex charta de qua ante dictum est, per se facere decrevisse. Insuper unamquamque Dissertationem in plures quasi articulos distribuimus, singulisque articulis & suum numerum præscripsimus, & ad oras summulam adscripsimus eorum quæ in quoque articulo traduntur: non quod harum rerum in ejus chartis ulla nobis inventa sit; sed quod in Tractatu illas omnes voluisse, meminimus; ut non videatur in Dissertationum editione fuisse omissurus.

Denique cura accessit conficiendarum Tabularum, earumque Explicationum. Reliquerat ille quidem Figuras novem, omnes ad Dissertationem primam attinentes; sed aliam fere in alia charta, non collectas in Tabulas, non adscriptis numeris, non inscriptis litteris distinctas, non adjectis Explicationibus illustratas. In uno dumtaxat folio quid in illarum quibusdam pingendum curasset, presse & continuata oratione, quasi memoriæ causa, adnotaverat. Nos igitur in tres, quas Dissertationibus interjectas edimus, novas Tabulas distribuimus, numeris, & litteris distinctas, hisque respondentibus Explicationibus ad ejus mentem declaravimus. Atque ut ille ab eodem quo ad Tractatus Figuras usus fuerat, egregio Pictore Angelo Michaeli Cavazzono pari & hujus, & sua diligentia atque industria has quoque delineandas curaverat; ita & nos ut ab eodem a quo primæ, laudato Sculptore Francisco M. Francia in ære insculperentur anno MDCCC XXV. curavimus, nullis neque sumptibus, neque precibus, neque monitis parcentes, ut sculptura omni ex parte, summaque cum fide de picturam sequeretur: cujus certe voti, excepto uno aut altero, de quo in Explicationibus admonemus, loco, compotes fuimus.

Hactenus quo consilio satis a nobis factum sit primis illis rationibus, expositum est: nunc, quomodo alteris, indicabimus. Duodeviginti Epistolas scripsimus, quarum undecim ad Tractatum attinent; reliquæ ad Dissertationes. In utrasque autem coniecimus tum quidquid ad singula ex ordine capita, & rerum argumenta, in Valsalvæ chartis spectare, deprehendimus, quod bono in lumine collocavimus; tum quidquid ex anatomicorum inventorum historia ad easdem res pertinere, intelleximus; tum quidquid de his iisdem rebus aut ad eundem modum, aut secus ab Doctissimis Viris non modo olim, sed ad hæc usque ultima tempora scriptum esse, cognovimus. His omnibus nostras, quales eæ cunque sunt, non paucas certe, neque indiligenter habitas, observationes, & animad-

(a) Vid. ejusd. Tractat. cap. 4. num. 8.



animadversiones adjecimus. Secundum has, ubicunque id facere, & quatenus facere licitum fuit, simul verum, simul Valsalvam defendimus. Siquando autem credidimus, utrumque simul defendi non posse; idem quod ipse ibi facturum fuisset, ingenue est a nobis factum, ut Valsalva excusato, & quoad potuimus, laudato, verum tueremur.

Has autem Epistolas etsi una cum Valsalvæ Scriptis emittimus; non omnibus tamen scriptas volumus. Sunt enim ita cum iis conjunctæ, ut facile a Bibliopola sejungi queant. Itaque siqui eam de Valsalva opinionem habent, quam si ullo de homine habere liceret, de ipso in primis habendam faterer, nulla ut defensione egere, nulli ut suspicioni erroris obnoxium credant; ii poterunt in ejus Scriptis acquiescere, securi cæterorum. Qui autem illa eo sunt animo in manus sumpturi, ut siquid forte minus placeat, id reprehendant; hos vero etiam atque etiam rogatos volo, ut se tantisper ab eo judicio sustineant, dum illi Valsalvæ loco respondentem in meis Epistolis locum perlegant. Sæpius enim aut ita defensum, aut ita excusatum invenient, ut aut nulla re-

prehensione opus esse, intelligant, aut siqua forte; ea certe quæ cum aliqua tamen sit laudatione conjuncta. Sicubi autem viderint, vero cogente, me ire in alia omnia; non continuo Valsalvam arguant; sed sic existiment potius, idem illum facturum fuisse, si diutius vixisset, si spatium dato, plura observare, plura animadvertere, plura etiam legere potuisset; nam quamvis magnus illa tempestate Anatomicus fuerit; non ei tamen licebat quid a posteris inveniendum esset, divinare. Simul eorum quæ supra dicta sunt, veniat in mentem, fuisse ipsi in animo mutare quædam in Scriptis suis, fortasse illos eosdem locos. Ad extremum, quidquid displiceat; me potius, & consilium meum; non animum; reprehendant. Si quid autem forte a me felicius alicubi aut observatum, aut animadversum, aut constitutum esse, crediderint; non mihi illud, sed Valsalvæ ipsi acceptum referant: qui nisi me olim adolescentulum ad hæc studia instituisset, nisi quærendo prævisset, observando præluxisset; nihil a me horum susceptum esset.

## DE GENERE MORTIS CLEOPATRÆ

## EPISTOLÆ DUÆ.

## EPISTOLA I.

ILLUSTRISSIMO AC CELEBERRIMO VIRO

D. D. JOANNI MARIÆ LANCISIO

Ab intimo Cubiculo Pont. Max. & Archiatrorum  
Comiti Meritissimo

Joannes Baptista Morgagnus S. P. D.

Quod sæpe alias ab Deo Opt. Max. sumi precatus, ut Sanctissimo Pontifici tempora aliquando feliciora concederet, idem superioribus diebus etiam, atque etiam optavi, cum Michaelis Mercati Volumen abs Te mihi redditum est. Nam quid Ipse in secundo rerum omnium cursu ad bonarum artium incrementum, earumque cultorum commoda non conferret, qui in difficillimis, gravissimisque temporibus tantum conferat? Vix enim Eustachii Tabulis exoptatissimis Anatomicos donaverat, cum de vulganda Mercati Metallotheca consilium cepit non minus ab omnibus rerum naturæ studiosis desiderata. Quod etsi per se donum erat eximium, mirum tamen in modum auxit, cum a Te, Vir Doctissime, recenseri, annotationibus illustrari, supplementis instrui, cum elegantissimis typis describi, cum & amissas, & novas etiam Tabulas a peritissimis Artificibus addi jussit. Quas inter, ut plures sunt, quibus Statuarii, Pictoresque juvari possunt, sic aliqua etiam est, quæ ab eruditis Historiæ cultoribus haud inutiliter aspicietur, illudque cum primis Cleopatram morientis simulacrum antiquo opere, & summo artificio perfectum, quod nominatim jussu Principis, earum quoque artium, totiusque eruditionis Patroni, cæteris esse interjectum mones. In ea enim statua Aspis est, non pectori admota (qua in re Pictores scilicet nostri peccant, historiæ veritatem, ut Petrus Victorius animadvertit, deferentes) sed ita brachio alligata, ut ipsius vinculi constrictione irritari, & ad mordendum provocari videatur. Accedit in simulacro is corporis habitus, ut non tam morientem, quam placide dormientem spectare credas; quod pulchre nimirum cum iis consentit, quæ a Plutarcho in Antonio traduntur: aspidis morsum grato somno inducto sine ullo dolore intermittere; idque Cleopatram, facto in capite damnatis periculo, cognovisse, illudque propterea mortis genus

potissimum elegisse. Quinimo Florus; ipsam *admotis ad venas serpentibus, sic morte quasi somno solutam* scribit. Neque alio habitu illam quoque Cleopatram imaginem fuisse, crediderim, quam in Augusti Triumpho gestari Propertius vidit; *Brachia, inquit, spectavi sacris* (Beroaldus autem legebat *fixis*) *admorsa colubris,*

*Et trahere occultum membra soporis iter.*

Non ignoro, quod Franciscus Reditus de imagine in triumpho gestata, id de isto quoque simulacro eos posse dicere, qui, ut Tu refers, non aspidis ictu, sed epoto veneno Regiam mortuam esse, contenderent, nimirum aspidem a Sculptoribus additam, quod nulla alia ratione significare melius possent, quo illa se mortis genere interemisset. Sed præterquamquod nullus antiqui Scriptoris locus mihi in præsentia succurrit, quo illi suam de epoto veneno sententiam possint tueri, & serpentis præsertim, cujus venenum non gustu, sed in vulnere nocere, vel ipse olim Celsus docuerat; certe adversatur iis Plutarchus tum alia scribens, quæ prætermitto, tum illud adjiciens: *brachium Cleopatram ajunt duas notas habuisse leviter impressas, & humidas;* neque video, si locus ictus non apparuisset, quomodo Augustus, ut Dion, & Suetonius tradunt, admoveere Pyllos potuisset, qui *venenum, ac virus exsugerent.* Itaque Reditus non hanc sententiam, sed aliam quandam secutus est Auctoris libri de Theriaca ad Pisonem, & ejus, quem supra memoravimus, Dionis narrationibus consentientem: *brachium ipsam sibi momordisse, aut pupugisse, & venenum vulnere instillasse.* Verum quas affert hujus sententiæ rationes non ita difficile solvi possunt. Nam quod primum ait, unius aspidis morsu non potuisse Cleopatram secundum ea, quæ ipse in viperis expertus est, duas primum ancillas, tum postea se quoque ipsam interficere; ut mittam, ex Plutarchi narratione apparere,



rere, Reginam primum, deinde ancillas, harum quoque alteram non ita celeriter occubuisse, illud quæram modo, qua illi ratione unam, eadem cur plures aspides habere non licuerit? Addit, quod Plutarchus idem fatetur, aspidem ipsam ab nemine conspectam esse. Sed omittit quod ille continuo subjicit: *tractus dumtaxat quosdam in littore, qua domus ad mare spectabat, esse visos*, indicio serpentes post ictus illatos, ab Ancillis projectos, se se illac subduxisse. Novissime pavidum natura fœminarum omnium animum memorat, ut serpentes sine incredibili horrore non modo tractare, sed ne aspicere, quidem possint. Verum sive ob eam, quæ, ut ab Eliano scriptum est, Egyptiis erat cum aspidibus familiaritatem, habuit Cleopatra, cur minus expavesceret, live potius atroci aliquin animo fœminæ desperatione accedente, non magis serpentes horruit, quam paulo ante ferrum, quod ipsa sibi, dum caperetur, intentaverat, horruisset; profecto ob hunc ipsum impavidum animum ab æquali fere Historico Vellejo commendata est, ubi *illata*, inquit, *aspide, morsu ejus, sane experts muliebris metus, spiritum reddidit*. Narrationibus autem Dionis, & Auctoris libri de Theriaca, eorumque omnium, qui aspidis morsum in dubium traxere, testimonium oppono, quo neminem, quod sciam, esse adhuc usum, plurimum miror; nam Scriptoris est & omnium manibus tritissimi, & Augusto perfamiliaris, & qui illud protulit iisdem pene diebus, quibus Cleopatra mortua est, ut nec verum ignoravisse, neque Sculptorum licentiæ, aut aliorum scriptorum auctoritati servire potuisse credendus sit. Is ergo est Horatius Flaccus, qui in eo ipso Carmine (a) quod ut ejus initium

apertissime indicat, statim ab allato de iis rebus nuncio lætabundus scripsit, hæc primus omnium de morte Cleopatrarum posteris tradidit:

*Qua generosius  
Perire quærens, nec muliebriter  
Expavit enses, nec latentes  
Classe cita reparavit oras.  
Ausa & jacentem visere Regiam  
Vultu sereno fortis, & asperas  
Tractare serpentes, ut atrum  
Corpore combiberet venenum,  
Deliberata morte ferocior &c.*

Neminis ergo narrationes, multoque minus dubitationes, & conjecturas ejusmodi testimonio, quod per antiqua etiam simulacra, istudque in primis Vaticanum confirmant, facile præferendas esse, crediderim. Sed ut tandem aliquando eo redeam, unde me ista ipsa statua abduxerat; plurimum omnes, quicunque bonas artes colimus, Pontificis Optimi liberalitati, & Munificentia, multumque etiam Tibi, qui hæc nobis munera tum consiliis Tuis impetras, tum doctrina, atque eruditione adauges, Illustrissime Lancisi, debemus; ego autem præ cæteris, qui ut aliis pridem ornamentis, ita ut hujus etiam Voluminis dono a Maximo omnium Principe honestarer, curavisti. Ad cujus ego sanctissimos Pedes provolutus, dum Ipsi, atque adeo nobis, & Litteris fausta omnia precor, illud prætermittere nullo pacto possum, ut Tu, qui Ejus valetudinem servas, recte, & diutissime valeas.

D. Patavii XVI. Kal. Majas M DCC XVII.

## E P I S T O L A II.

Ad Eundem.

Cum Tuae mihi Litteræ gratæ, jucundæque semper fuerint, tum hæc, quas Tibure nuper scripsisti, jucundissimæ fuerunt, ut quæ Te convaluisse, non nunciarunt modo, sed & certissime comprobarent. In his enim docte, ut soles, copioseque ostendis, quid Tibi de veneni genere, quo sibi Cleopatra mortem conscivit, videatur. Qua in re etsi longe aliter, atque ego, sentis; id tamen mihi ingratum esse non potest, primum quod a Te est; deinde quod veri studio dissentis; novissime quod tuam ita sententiam proponis, ut mihi meæ retinendæ locum relinquo: quanquam neque eo animo scripsi, ut vehementer tuerer, & id, quod Tibi, Vir Summe, non probari intelligo, nonnisi remisse, & dubitanter tueri possum.

Aspidis morsu periisse Reginam, scripsi, non quod ignorarem, id Dioni quidem, & Plutarcho incertum videri; sed quod in Romana Historia plus latinis, quam Græcis, & in re antiqua plus æqualibus, quam posteris credendum existimavi. At enim Horatius, qui, ut æqualis, Poeta tamen esset, veri tantum similitudinem summa cum libertate est secutus. Qui credam, quando in reliquis, quæ de Cleopatra eodem loco tradit, summa cum fide verum sequitur? Quid quod Vellejus & fere æqualis, & historicus idem confirmat? At Suetonius pro certo non tradit. Fateor. Sed Vellejo posterior. Sed eo teste non de morsu aspidis, sed de Psyllis admotis, non ad probandum, sed ad conjiciendum sum usus: ut neque ad illud probandum, sed ad indicium, quale idcumque est, dissimulatum a Redio, commemorandum, Plutarchi locum adduxi de tractibus in littore animadversis. Horatio igitur, & Vellejo testibus potissimum usus sum. His Florum, & statuas vetustissimas addidi. Quibus adductus, si non certum, at minus sane incertum esse credidi, Cleopatram morsu aspidis, quam alia ratione extinctam esse.

Id vero est, quod Tibi, Vir Amplissime, ne verisimile quidem videtur. Nam plures, inquis, aspides

præsto fuissent, necesse foret. Ego vero, etsi ei dubitationi in priore Epistola etiam alia videor ratione satisfecisse, hic quæram, cujusnam experimentis constet, aspidem uno morsu omne exhaustire venenum oportere? Reditus enim, qui hæc in viperis expertus est, contingere interdum vidit, ut non nisi tertio, alias non nisi quarto, aut sexto morsu venenum omne exprimeretur. At enim a moribundis Ancillis occultari aspides non potuissent. A moribundis fateor; a morsu statim, quid prohibuit? Nam argumentis quidem a tenero, mollique fœminarum animo ductis jam pridem respondi. Quod autem addis: ictos a serpentibus neque statim mori, neque sine indicibus veneni, & in faucia parte, & in toto corpore manifestis; Aetius sane aliud aspidis genus intra horas ad summum tres, aliud præsentissima morte conficere tradit; maculas autem, vel alia istiusmodi inter signa ejus veneni, quæ alioqui diligenter enumerat, minime ponit. Sed neque hæc ponit Actuarius. Ponit vero, *Aspidis morsum esse acus puncturæ similem, omnino exiguum sine tumore*; quod quidem signum, atque adeo istam cum *punctura acus* similitudinem ipse olim Dioscorides, quem Cleopatrarum familiarem fuisse accepimus; litteris mandavit, Paulus deinde Aegineta, Avicennas, & quoscunque de ictu aspidis legisse memini, ad unum omnes inculcavere, præcipue autem idem Aetius, cujus in libris, quod Tu minime ignoras, plurimæ nobis Veterum nobilium Medicorum, eorumque etiam, quorum scripta interciderunt, observationes servatæ sunt. Hic igitur in iis, quos aspides momorderunt, non illud modo tradidit, *vulnera in demorso loco, veluti ab acu puncta inveniri*; sed hoc præterea subjecit, *bina quidem ex masculi morsu, a quibus nihil effluit, nisi violentum animal sit, quod morsum inflixit*: quæ omnia pulchre nimirum conveniunt cum duabus illis notis, quas Plutarchus memorat, exilibus videlicet, & subobscuris; jam enim juvat Tuam potius, & Eruditissimi Assalti, quam Leonardi Aretini versionem sequi, præsertim quando græca Plutarchi exemplaria



plaria ad manum non habeo. Cæterum eundem Aretinum animadverto, unam Charmium inventam esse vivam, dicere: cui quare Psylli non sint admoti, & si sint admoti, cur id historici litteris mandare neglexerint, etsi non difficile potest intelligi; mihi tamen satis est, ex Suetonii, & Dionis testimonio constare, Cleopatram quidem fuisse Psyllos admotos; hinc enim consequitur, locum ictus apparuisse. Dabis ergo veniam, Humanissime Lancisi, quod Cleopatram morsu aspidis occisam esse, non modo a veri similitudine non alienum, sed verisimilius adhuc censeam. Nam quod potius veneno quodam præsentissimo degustato mortem objerit, ut Tu erudite, ingenioseque adstruis, tute ipse confiteris, nullo veteris scriptoris loco confirmari facile posse, quando Plutarchi verba producis, quæ de veneno inflicto in vulnus instillando explicari æque, ne dicam credibilius, possint, cum id in novacula gestatum fuerit, & cum præterea apud Auctorem libri de Theriaca, & apud Dionem hujus generis venenum a Cleopatra servatum esse inveniamus; ejus autem generis, cujus Tu existimas, non inveniamus. At vero epoti veneni narcotici, & in Regina, & in Ancillis indicia fuerunt. Non nego. Sed Tu vi-

cissim pro tua eximia eruditione, & candore non negabis, ista ipsa indicia aspidis etiam morsum consequi, ut non modo Plutarchus, sed celeberrimi quique, de quibus supra dictum est, Medici, in primisque Aetius, luculentissime docuere.

Cum ergo ambigua signa habeamus, cur ab epoto a Cleopatra veneno, de quo apud Veteres Auctores nihil habemus, ea derivabimus; ab aspidis autem morsu, quem contra tot habemus non modo memorantes, ut dubium, sed affirmantes, ut certum, antiquos Scriptores, non derivabimus?

Hæc habui, Vir Doctissime, quæ statim rescriberem, cum & multis occupationibus distinerer, & corpore languerem, non ut sententiam tuerer meam, multoque minus, ut Tuæ adversarer, sed ne nihil viderer respondisse. Meæ enim sententiæ arbitrium tuum esto. Tua certe magno semper apud me in pretio erit; nam quod argumentis utcumque opponerem Tuis, invenire fortasse potui; quod auctoritati opponam Tuæ, quæ cum apud omnes, tum vero apud me summa est, atque amplissima, invenire profecto non possum. Vale.

Patavii IV. Nonas Junii M DCC XVII.

*Ad Epistolas hæc duas plura alia nuper addita sunt Epistola Anatomico - Medica LIX. ab artic. 37. ad finem usque.*

## DE ORDINARIO FRONTINI CONSULATU

## EPISTOLÆ DUÆ.

## EPISTOLA I:

## JO. BAPTISTA MORGAGNUS

DOCTISSIMO ORNATISSIMOQUE VIRO

JOANNI POLENO

Rei Mathematicæ Professori Celeberrimo

S. P. D.

ET si tuæ me litteræ invenerunt nihil minus, quam Fastos cogitantem; morem tamen gessi: Falloppium, & Eustachium deposui; Norisium, & Pagium in manus sumpsi. Ille in Epistola Consulari (a), ubi quærit, anno *Æræ Christ.* 100. Fronto, an Frontinus Trajani III. Consulis Collega fuerit ordinarius, cum plura quæ infra memorabuntur, erudite, ut solet, in medium affert, tum vero ut ad Frontinum potius inclinem, duabus efficit rationibus. Quarum altera a Fastorum auctoritate, altera autem est a veterum Scriptorum testimoniis petita. Primum videlicet ut fatetur, Prosperi Fastos, sed omnium vitiosissimos, itemque Cassiodori, sed Prosperum describentis, habere *Frontonem*; ita ostendit, Fastos Anonymi apud Cuspinianum, qui omnium quidem procul dubio sunt optimi, habere *Frontinum*. Deinde etsi paullo ante agnoverat, Prosperi suffragatorem videri Dionem (b), cum de Frontone Consule, rerum potente Nerva, mentionem faciat; propterea quia is quo de quærimus, Consul, Plinio in Panegyrico (c) auctore, *nuper consulatum alterum gesserat* a Nerva datum; vicissim tamen producit qui vel clarius illi Cuspiniani Anonymo suffragetur, Martialem scilicet; de cujus quidem testimonii vi mox videbimus.

Pagius autem in *Crit. Baron.* (d) & Frontonem ipse retinet, & docet, *Norisium nuper ad se scripsisse, M. Julium Frontonem probabilis Collegam Trajani poni.* Vir omnino fuit Norisius non modo dignitate, atque eruditione, verum etiam moribus eminentissimus, quod intelligere plane licet vel ex ista ingenua mutatione sententiæ. Attamen quod ne ipse quidem fecit, ut majorem sui, quam veri rationem haberet, non puto ab reliquis esse faciendum; sed novæ ipsius sententiæ rationes eo animo esse excutendas, ut si firmæ sint, hæc probetur; sin contra, prior illa retineatur. Excutiendi autem labor ipse quidem meus; firmæ vero, an infirmæ sint, tuum, Vir Doctissime, erit judicium, præsertim quando Scriptores nobilissimi Pagius (e), & Tillemontius (f) firmas jam videntur existimasse.

Principio illud est animadvertendum, prioris sententiæ rationem primam non modo a Norisio, ut par erat, infirmatam non esse, sed ne memoratam quidem; credo, quia facilius confirmari poterat, quam infirmari. Nam ut in Fastis Idatianis (quod Norisius (g) minime ignoravit) scriptum legimus: *Traiano III. & Pontino*; ita proclive admodum est aliis ex Fastis suspicari, istud *Pontini* nomen forte esse mendosum,

(a) pag. 59. & seq. (b) in Nerva (c) cap. 61. (d) Tom. I. ad Ann. Chr. 100. n. 1. (e) Ibid.

(f) Hist. des Empereurs & cæc. Tom. II. Trajan. Art. 10. (g) pag. 59.



sum, ac legendum esse *Frontino*. Id enim scripturæ vitium an facilius in *Frontino*, quam in *Frontone* scribendo oriri potuerit, et si Tillemontius ( *b* ) in medio relinquit, haud tamen difficile est existimare.

Sed quam Norisius rationem non attigit, hanc, si tibi videtur, in præsentia seponamus: quas vero ad Pagium scripsit, eas omnes ex ordine attendamus. Dio, inquit, in *Nerva Frontonem tunc consulem nominat*. Non modo hoc Norisius cum scripsit Epistolam Consularem ( *i* ), ut supra ostendimus, non ignorabat, sed ne illud quidem, Cuspinianum vero *Frontinum* in Dione legendum putasse. Et sane in Italorum nominibus persæpe, & facile a Græcis Auctoribus, vel certe librariis peccatum esse, cum alii animadverterunt; tum præsertim Robortellus ( *k* ) admonuit, Plutarchum in Poplicola *Λαίρτω* ( *Κλαίρων* ), potius, vel *Λάρον*, ut notavit Sigonius ( *l* ) scripsisse pro *Lartem*; in Cicerone autem Clodiam illam *Quadrantariam* vocasse *Κυαδραντίαν*: a Dionysio ( *m* ) quoque A. Verginium appellatum esse *Μοντανόν*, quem Latini dicebant *Cælimontanum*. Quid multis opus est? In ipsis de quibus loquimur, *Frontini*, & *Frontonis* nominibus permutandis lapsos esse librarios *Æliani* *Tactica* describentes, facile est ex Sixti Arcerii in hæc Notis ( *n* ) intelligere. Cum enim primum, idque recte, scripsissent *παρὰ Φρόντινῳ*, alio deinde in loco perperam scripsere *ἐκ Φρόντωνι*: quos ille cum reprehendere debuisset, in alium se errorem abripere passus est, ut unum atque eundem esse Virum, crederet, quem *Ælianus*, *Martialis*, *Dio* modo *Frontinum*, alias *Frontonem* vocassent. Sed facilius nimirum fuit Arcerius in iis quos distinguere oportebat, confundendis, velut ibidem cum illum quoque *Frontinum*, qui in Galeni libro ultimo Remediorum *κατὰ τόπους* semel, atque iterum nominatur, eundem ac nostrum esse, censuit, haud animadvertens, Heram Medicum, cujus verba de *Frontino* ischiadico profert *Galenus* ( *o* ), *natum esse ante Andromachum*, quod *Galenus* supra in VI. libro ( *p* ) testatur: qui quidem *Andromachus*, si dubites, ille senior fuerit, inter *Neronis*, ut idem *Galenus* alibi ( *q* ) docet, *Medicos primus*, an ejus filius; id unum præstiterit attendisse, *Cornelium* quoque *Celsum* ( *r* ) *Heræ* medicamenta bis memorasse.

Verum nos *Frontonem* ponamus in Dione quidem esse legendum, & quando Norisius illi hujus testimonio plus ponderis inesse, postea credidit; quale demum sit, videamus. Et si totus is locus ejusmodi est, ut nonnulla habeat quæ aliter ab aliis intelligi possint; id tamen perspicuum est, *Frontonem* consulem inter ea memorari, quæ, ut *Plinius* ( *s* ) ad *Quadratum* scribit, *primis diebus redditæ libertatis* acciderunt, & prius certe, quam *Nerva* ipse cum *Virginio Rufo* consul narretur; ut permirum omnino esset, *Panvinium* in *Commentariis* in *Fastos* ( *t* ) suis, scripsisse, *Frontonem* a Dione consulem anno post occisum *Domitianum* fuisse referri, nisi & id, & alia quæ ibidem peccat, facile essent in tanto & Scriptore, & Opere excusanda. De ea re nullum certe verbum apud *Dionem*, multoque minus quod ille ( *u* ) *Frontonis* Consulatus ex *Kal. Jul.* inceperit ejus de quo modo dictum est, anni: qui quidem dies illuxit præterlapso jam medio dominationis *Nervæ* tempore; non inter hujus initia; inter quæ initia, video *Tillemontium* ( *x* ) quoque ipsum agnoscere, *Frontonem* consulem a Dione memorari. Quorsum hæc? inquires. Nondum eo dico, quod velim, *Calliodori Chronicon*, alioqui, ut dictum est, vitiosissimum, in eo verum esse, quod *Domitianum* occisum tradit *Frontone* consule sic, ut hic consulatum sub *Nerva* quidem potuerit gerere; non tamen a *Nerva* datum. Sed eo dico, ut illud certe alterum intelligatur: qui inter initia dominatus *Nervæ* consul fuerit, de illo accipienda minus videri, quæ de eo, de quo quæri-

mus, *Trajani* Collegæ *Plinius* pariter in *Paneg.* ( *y* ) indicavit: ita nuper consulatum a *Nerva* datum gessisse, ut adhuc oculis paulo ante dimissi fasces oberrarent &c. itemque illa: modo prætextam exuerat, modo liſtores abire jusserat, modo gratulantes amici recesserant: qui enim convenit modo, & paulo ante, si intercesserat plane triennium?

Et rationem quidem primam satis excussimus petitam ex testimonio *Dionis*, vel potius ( ut verum loquamur ) *Joannis Xiphilini*, qui sæculo XI. in epitomen contraxit *Dionem*. Nunc alteram videamus. *Fronto*, inquit, erat Consul II. Hoc vero aut demonstrandum, aut non attingendum omnino fuerat. Quantum enim ex sæpius laudato *Panegyrico* ( *z* ) certum est, eum quo de quæritur, Collegam *Trajani*, consulatum alterum antea gessisse; tantum inter omnes liquet, neminem adhuc id ostendere potuisse de *Frontone*; posse autem omnes de *Frontino*, & verbis quidem Auctoris, non uno, imo non decem fere post sæculis scribentis, sed illis ipsis temporibus Romæ viventis, scribentisque, *Martialis*. Nam hic disertè bis *Frontinum* consulem, neque ita pridem fuisse, latissime indicat in eo Libro ( *a* ) cujus nonnulla Epigrammata anno 98. scripta esse, constat; ut hinc *Norisius* in Epistola Consulari ( *b* ) illud quoque alterum eruit posse, crediderit, *Frontinum* Consulem II. fuisse sub *Nerva*. Verum ego quod, ob alias causas, non sine controversia inferri, ostendique posset, remitto; illud autem quod negari non potest, urgeo: *Frontonem* bis Consulem fuisse, nullius veteris Auctoris fide probari; *Frontinum* bis Consulem fuisse, æqualis Scriptoris testimonio præclarissimo demonstrari.

Jam vero tertiam *Norisii* rationem examinemus. *Fronto*, inquit, erat vir togatus, non vero militaris, qualis *Frontinus* fuit. Nimirum hic quoque ad *Panegyricum* *Plinii* respexit, qui de utroque in hunc annum Collega *Trajani* verba faciens, sic ipsum alloquitur ( *c* ): *Tertii* Consulatus decus bellorum sociis olim, periculorum consortibus, parce tamen tribuebatur, quod tu singularibus viris, ac de te quidem bene ac fortiter præstitisti, sed in toga meritis: utriusque cura, utriusque vigilantia obstrictus es, Caesar: itemque infra: ( *d* ) nempe enim hi sunt, quos Senatus cum publicis sumptibus minuendis optimum quemque præficeret, elegit quidem primos. Ego tamen non video, quid tandem ex his omnibus non conveniat *Frontino*. Nam quod bellica laude plurimis ante annis floruerat, & *Silurum* gentem subegerat; num propterea insequentibus, suos inter cives pacis artibus vicissim excellere, & postremis denique annis, cura, ac vigilantia sua bene, ac fortiter de *Trajano* mereri non potuit in toga? Non opinor, cum *Plinius* ad *Severum* ( *e* ) scripsit, se in *Curiani* causa adhibuisse in consilium duos quos tunc civitas spectatissimos habuit, *Correllium*, & *Frontinum*, & ex eorum sententia judicasse; vel cum ad *Arrianum* ( *f* ), successisse se in Augurato *Julio Frontino*, principi viro; non, inquam, opinor, tunc spectatissimum, & principem virum in sago dixit, sed in toga. Quid verbis opus est? Procuratio *Aquarum* ( *g* ), res administrata per principes semper civitatis viros, Officiumne erat, quod non a togato, sed a militari omnino homine gereretur? Non contra vel ipsa *Curatorum* *Tabula* ( *h* ), a te, Vir Eruditissime, ut tot aliæ in tua ista eximia *Frontini* editione, & diligenter concinnata, & doctè illustrata, inter *Curatores* fuisse, ostendit, qui Legum peritia, studiisque civilibus principem in civitate locum erant affecuti? Hanc autem *Aquarum* ( *i* ) Procurationem ad usum, tum ad salubritatem, atque etiam securitatem Urbis pertinentem, certe *Frontinus*, utpote sibi a *Nerva* ( *k* ) injectam, jam fere beniniam gesserat sub Imperatore *Trajano*, eaque fide, ac sollicitudine gesserat, qua ex ipsius *Commentario* intelligitur, ut cum innumeras fraudes ( *l* ) vel per offensas

( *b* ) Tom. cit. Not. 3. sur *Trajan.* ( *i* ) pag. 61. ( *k* ) De Romanor. Nominib. ( *l* ) De Nominib. Romanor. ( *m* ) Antiquit. Romanar. l. 6. ( *n* ) ad pag. 93. 94. 98. ( *o* ) lib. cit. c. 2. ( *p* ) c. 4. ( *q* ) De Antidot. l. i. c. 1. ( *r* ) De Medicina l. 5. c. 22. 3. & c. 28. 4. ( *s* ) l. 9. Epist. 13. ( *t* ) l. 2. ad Ann. U. 850. ( *u* ) Panvin. Fast. l. 2. ad Ann. cit. ( *x* ) Tom. & Not. cit. ( *y* ) cap. cit. ( *z* ) eod. cap. 61. ( *a* ) l. 10. Epigr. 48. ( *b* ) pag. 62. ( *c* ) cap. 60. ( *d*e ) l. 5. Epist. 1. ( *f* ) l. 4. Epist. 8. ( *g* ) Vid. *Frontin.* de *Aquar.* Art. 1. ( *h* ) Tab. Q. Vid. etiam Not. Polen. ad Art. *Frontin.* 102. ( *i* ) *Frontin.* Art. 1. ( *k* ) Ibid. & Art. 102. ( *l* ) Art. 76. & alibi.



*senfas retexisset*, magnoque cum Reipublicæ emolumento sustulisset, videatur, si quis alius, tunc dignus fuisse, ut & a Senatu publicis sumptibus minuendis in primis præficeretur, & cura ac vigilantia sua bene ac fortiter in toga de Trajano meritis diceretur. Certe Trajano tantundem a Frontone tunc præstitum fuisse in toga, non constat.

Quod si istud Plinii elogium Frontino ob eam causam non conveniret, quod olim militari munere functus esset; fortasse ne Frontoni quidem posset ob eandem causam convenire. Neque enim hic, pro quo disputant, Fronto ille est M. Cornelius Fronto, Rhetor nobilissimus, quem haud semel Gellius ( *m* ), Capitolinus ( *n* ), Xiphilinus ( *o* ), nonnunquam etiam Eumenius ( *p* ), Macrobius ( *q* ), Aufonius ( *r* ), Hieronymus ( *s* ), alique laudarunt, ut Catanæus ( *t* ), Panvinius ( *u* ), atque alii passim existimabant, quorum opinionem ab Norisio ( *x* ) & Tillemontio ( *y* ) firmissimis argumentis convulsam video. Neque item est Fronto Catus, Orator in Epistolis Plinii ( *z* ) laudatus, quem Catanæus ( *a* ), & Panvinius ( *b* ) eundem ac priorem credebant; Tillemontius ( *c* ) autem ne consularem quidem ejusmodi virum, sed celebrem dumtaxat causarum patronum existimat; ego vero non cum certe, quem quærimus, Consullem fuisse, puto propterea quia cum in Senatu pro Mario Prisco causam dixit, eo ipso tempore Consul fuisset, ut ex alia Plinii Epistola ad Arrianum ( *d* ) proclive est intelligere, non fuisse tamen, ex Plinii silentio apparet, qui in ea Epistola cum Julium Ferocem, & Cornutum Tertullum ita nominet, ut *Consulis designati* titulum singulorum nomini adjungat, multo minus videtur fuisse in Frontone Catio nominando Consulis titulum præteriturus. Est ergo is pro quo propugnant adversus hominem clarissimum, a Tacito, Plinio, Martiale, Æliano celebratum, ac inter principes civitatis viros per ea tempora nemini ignotum, Frontinum, Fronto quidam, a Plinio in nulla, quod sciam, ex tot Epistolis nominatus, a Martiale autem, & Tacito ( nam de Æliano dictum est supra ) vel non memoratus; quod vix de summo Viro, & III. ut contendunt, Consule credibile est; vel ita memoratus, ut militarem hominem contra atque ponitur, fuisse, constet. Nam Martialis in Libri I. Epigrammate 56. ad Frontonem scripto, sic ipsum, laudans alloquitur:

*Clarum militiæ, Fronto, togæque decus:*

quem quidem hunc ipsum esse posse quo de agitur; M. Julium Frontonem, in sæpius laudata Epistola ( *e* ) suspicatur Norisius. Cornelius autem Tacitus in I. Histor. ( *f* ) hæc scribit: *Exauktorati per eos dies ( Galbæ scilicet extremos ) Tribuni, e prætorio Antonius Taurus, & Antonius Naso: ex urbanis cohortibus Æmylius Pacensis: e vigiliis Julius Fronto: itemque in proximo Libro ( g ): Vincit ( a ) Vitellianis) præfectus castrorum Julius Gratus, tanquam fratrem ejus Julium Frontonem tribunum Othoniani sub eodem crimine vinxissent.* Et Raderus ( *h* ) quidem, a quo primus de duobus hisce locis producit, non dubitavit, illum ipsum Julium Frontonem, & eum ad quem scripsit Martialis, & hunc III. ut putant, Consullem, unum eundemque fuisse: sed & Juvenalem in I. Satyra ( *i* ) de hoc eodem locutum esse, censuit: quibus fere omnibus in rebus & præeuntem habuit Calderinum ( *k* ), & ad stipulantes Farnabium ( *l* ), atque Schrevelium ( *m* ). Quid? quod non alium esse illum quoque credidit, quem Josephus libro VII. de Bello Judaico inter Titi Duces, Consiliarios, Amicos bis memoravit, Frontonem. Verum ego, ut Titi Libertum ( sic enim idem Josephus altero in loco vocat ) ad consulatum proventum esse, animum inducere non possum ut credam; ita superiora illa reliqua satis esse puto, ut intelligatur, istum

Morgagni Opusc.

quo de ajunt, Frontonem vel obscurum apud æquales fere omnes Scriptores fuisse, vel in militaribus etiam officiis contra atque urgent, fuisse versatum.

Qua in re ostendenda eam ob causam longior fui, quod quidquid deinde Pagius ait, ad se scripsisse Norisium, non eo pertinet, ut Frontonem illo præsertim ipso, quo quærimus, tempore fuisse Consullem, sed ut togatum fuisse virum, non militarem, credamus. In Lib. inquit 48. Digest. L. 5. De pænis recitatur rescriptum Trajani ad Julium Frontonem. Ejus filius fuit Præfectus classis sub Hadriano, Gruteri pag. 573. Ad quæ ne illud quidem dicam, Catanæum ( *n* ), qui jam olim verba illa legis animadverterat, sic legisse: *Divus Adrianus Julio Frontoni rescripsit*, quod ego quoque in nonnullis vidi editionibus, cum aliæ tamen, eæque ( ut verum fatear ) laudatiores habeant, *Divus Trajanus*. Neque item dicam, cautius Tillemontium ( *o* ) facere, qui Julium Frontonem classis præfectum, prioris filium non affirmat fuisse, sed tantummodo esse potuisse. Hæc, inquam, atque alia præterea omittam. Nam quanquam id, quod minime planum faciunt, ultro concederem, Frontonem, de quo sermo est, sic semper in toga floruisse, ut nullam unquam militaris officii partem attigisset; non tamen propterea sequeretur, in Frontinum quoque non cadere laudes istas, quæ in Plinii Panegyrico illi, de quo quærimus, Consuli tribuuntur, velut antea probatum est.

Quam ob causam de illa pariter Inscriptione apud Gruterum ( *p* ), a Tillemontio ( *q* ) ( sed tamen post Norisium in Consulari Epistola ( *r* ) ) animadversa nihil adjiciam, nisi hoc unum: non apparere ex eo lapide, M. Julium Frontonem IIII Virum viis curandis fuisse anno 103. quod Tillemontius ( *s* ) affirmat. Quod enim Trajanus ibi COS. V. scribatur, hinc illud tantum effici potest, non ante annum 103. Inscriptionem incisam esse: in quo tamen repugnat adscripta TRIBUNIC. POTEST. V. quæ annum designat 102. vel etiam duos menses ultimos anni 101. Itaque mirum non est, Reinesium legisse TRIBUNIC. POTEST. VIII. i. e. A. V. 858. ut in altera Gruteri Editione indicatur, vel potius, ut in Synagmate ( *t* ) illius invenio; TRIB. POT. VIII. A. V. 855. Veruntamen ut hoc in anno 855. apertissimum Typographi errorem omittam; respondet enim A. Chr. 102. cum respondere debeat A. 105. vel 106., certe si exemplari standum est, quod emendatum ex Gudii, qui bis contulerat, codice in memorata Gruteri Editione habemus; non post numerum V. qui extremum sinistrum occupat marginem, sed potius ante, cum justo aliquanto majus intervallum inter POTEST. & V. relinquatur, videtur esse supplendi locus. Accedit cognomen PARTHICI, quod in hoc etiam lapide adscribi, non animadvertit Reinesius, mox ( *u* ) docens, Trajano haud ante Tribun. Potestatem XII. tributum esse, in hoc quoque a Fabretto ( *x* ) reprehensus, negante ( *y* ), in ullo vel marmore, vel nummo non suspecto titulum PARTHICI ante XIX. Trib. ( Trajani ) Pot. reperiri. Quam ego litem hic quidem non faciam meam, ut neque illam alteram, V. Trajani Consulatum non in 103. ( quod Tillemontio, & plerisque aliis paulo ante negare nolui ) sed in annum, ut Fabrettus ( *z* ) contendit; 104. incidisse. Hæc eo tantummodo attingi, ut intelligeretur, quænam aut suspensiones in istum lapidem, aut dubitationes in istum annum possint cadere 103. qui illo dicitur indicari; præsertim cum ipse Tillemontius alio in loco ( *a* ) ponat, anno primum 107. Parthici cognomen Trajanum mereri potuisse, quod sibi anno demum 115. magis magisque confirmavit. Quid? quod idem Tillemontius alibi ( *b* ) censuit, ad annum usque 111. istius lapidis tempus posse produci. Et mihi quidem omnia, quæ hic memoravimus, reputanti sic omnino visum est, aut PARTHI-

D

CI

( *m* ) Noët. Attic. l. 2. c. 26. l. 19. c. 8. & 10. ( *n* ) in M. Antonin. & in Vero. ( *o* ) in Adriano, & in M. Antonino. ( *p* ) Paneg. Constantii. c. 14. ( *q* ) Saturnal. l. 5. c. 1. ( *r* ) Paneg. c. 14. ( *s* ) ad Ann. 163. ( *t* ) in Plin. l. 2. Epist. 11. ( *u* ) Comment. in l. 2. Fast. ad A. V. 850. & 853. ( *x* ) Epist. Consul. pag. 59. & seq. ( *y* ) Not. VIII. sur Trajan. ( *z* ) l. 6. Epist. 14. l. 2. Epist. ii. ( *a* ) loc. cit. ( *b* ) Ibid. ad A. V. 853. ( *c* ) in ead. Not. ( *d* ) l. 2. Epist. ii. ( *e* ) pag. 61. ( *f* ) cap. 20. ( *g* ) l. 2. Hist. c. 26. ( *h* ) Comment. in cit. Epigr. Martial. ( *i* ) vers. 12. ( *k* ), ( *l* ), ( *m* ) in id. Martial. Epigr. ( *n* ) loc. cit. ( *o* ) Tom. cit. Trajan. Art. 10. ( *p* ) pag. 199. ( *q* ) Not. 8. sur Trajan. ( *r*s ) Ibid. ( *t* ) Class. II. 30. ( *u* ) Ibid. ( *x* ) De Columna Trajan. c. 9. pag. 294. C. ( *y* ) Ibid. p. 292. D. ( *z* ) Ibid. p. 282. B. C. & cæt. ( *a* ) Trajan. Art. 20. ( *b* ) Ibid. Art. 18.



CI cognomen esse inducendum ; augendumque numerum Tribun. Potest. aut si retinere illud liceat sic tamen, ut hic maxime augeatur ; neque Gruteri exemplar, ut ostensum est, neque notam COS. V. ullo modo pati ut ultra XV. augere possimus : quod si fiat ; non annus 103. sed postremi duo menses anni III. indicabuntur. Post quorum ; non amplius ; duorum mensium intervallum cum Trajanus Consulatum inierit VI. hinc est, ut minus illa me moveant, quæ Virum Eruditissimum Joannem Massonium ( c ) permoverunt, ut hoc in lapide non modo Trib. Potestatis, quam ipse quoque XV. legendam existimat, sed etiam Consulatus numerum censeret esse mutandum, & pro V. legendum VI. Verum hæc ἐν παρόδῳ.

Jam enim supra satis mihi præstitisse videor, quod receperam, ut Norisii rationes excuterem. Quæ tamen firmæ, an infirmæ sint, ut, Vir Doctissime, pro eo quo polles, acri judicio existimabis ; ego vel firmissimas existimanti pro eo, quo unice moveor, veri studio facile assentiar. Hoc enim veri studium ita mihi animos addidit ad Summorum Virorum huic tertio Frontini Consulatu adversantium rationes agitandas, ut tamen ipse qui essem, & qui contra illi, non obliviscerer. Idem veri studium ne illud quidem dissimulare me, finit, quod altera ex parte nunc demum venit in mentem, videlicet tertio isti Frontini Consulatu ob stare facile posse illud idem Martialis Epigramma ( d ), quo demonstratur secundus. Versus enim extremi quatuor haud obscure videntur ostendere, Epigramma nondum reddita libertate, id est Domitiano adhuc rerum potente, scriptum fuisse, &

quod consequitur ; alterum Frontino Consulatum ab Nerva quidem, ut oporteret, datum non esse. *Accedent, inquit Martialis,*

*Accedent sine felle joci, nec mane timenda*

*Libertas : & nil quod tacuisse velis.*

*De Prasino conviva meus, Venetoque loquatur,*

*Nec facient quemquam pocula nostra reum.*

Permirus est, in hac controversia neminem, quod sciam, versus hosce attendisse, qui illam videlicet de altero Frontini Consulatu mentionem, & continuo quidem, sequuntur ; nisi forte in aliam omnino partem accipiendos crediderunt, ut Poeta hoc diceret : sub civili, mitique Nervarum imperio jam non esse timendam, ut superiore tempore sub Domitiano, sermonum ac jocosum libertatem vel in ipsam Venetam, Prasinae factionem. Huc autem pertinet, quod de *Factionibus aurigatorum, & studiis Principis* in hunc locum adnotavit Farnabius : *periculosum erat sub Nerone, Vitellio, & Domitiano iis favere, a quibus alieni Principes. Prasina autem, & Veneta maxime favebant.* Eodemque trahere fortasse quis malit ultima verba explicationis Raderi : *nullus erit, qui nostros jocos insidiosè excipiat, & deferat ad Casarem, nosque reos faciat, ut Domitiani temporibus contingebat.* Sed quamquam in priorem illam interpretationem propensioem esse me, fateor ; tu tamen, Vir Præstantissime, hoc etiam dispicies, & quid sit veri similis, constitues. Vale, & me, quod facis, redama.

Patavii XIII. Kal. Quintiles. CIOCCCXXII.

## DE ORDINARIO FRONTINI CONSULATU

### E P I S T O L A II.

CLARISSIMO DOCTISSIMOQUE VIRO

P E T R O P L U V E N I O

E S O C I E T A T E J E S U.

Joannes Baptista Morgagnus S. P. D.

**M**irabar quid esset, quod quæ de Ordinario Frontini Consulatu, Anatomicus ad Mathematicum, fuderam potius, quam scripseram, ea Doctissimo Viro Joanni Poleno, Collegæ meo, editione, Sapientissimis *Actorum Eruditorum* Scriptoribus laude, Tibi denique, Vir Clarissime, atque Eruditissime, Tua, neque illa brevi, consideratione in tam gravi præfertim, illustrique Opere, non indigna viderentur. Sed cum hanc in ipso Volumine ( a ), quo me liberaliter donavisti, perlegerem ; quod de illis suspicabar, de Te perspicue cognovi, hæc me omnia vestra debere humanitati, quæ non uno loco ex Tuis erga me perbenignis verbis elucet. Quod enim ad rem ipsam attinet ; pro veri studio, & publicæ utilitatis amore non obscure a meis opinionibus, institutoque dissentis. Quæ utinam in mea illa Epistola satis exponere potuissem ; fortasse Tibi Æquissimo Viro aliquanto aliter visum esset.

Nam principio sic habeas velim, optasse me semper primum ne opinione ab ullo, si fieri posset, homine discreparem, deinde ne dissensum nominatim proferre cogerer. Sed Amicus summus tum rogando omnino cogebat, tum omnia, quæcunque rei declinandæ causa dicerem, vel tollendo, vel infirmando,

Dicebam, si mea Epistola vulgaretur ; me pluribus visum iri Norisii sententiæ adversantem. At simul, respondebat ille, pro altera Norisii sententia stantem. Sed pro sententiâ, ajebam, ab ipso deserta, & pro qua nihil facile mihi venire in mentem potuerit, quod ipsi non venerit, idemque inane visum fuerit. Ille vero negabat, posteriores curas necessario semper esse sapientiores : confirmabat, non Pictoriam modo, atque Poeticam Protogenes, & Torquatos, sed cæteras Facultates omnes, excellentes interdum homines habuisse *quibus nimia diligentia nocuerit* ( b ), & quorum posterior labor ad prioris laudem non pervenerit : nonnulla præterea a me certe fuisse interjecta, quæ Norisius non illa quidem ignoravisse, sed non satis fortasse animadvertisse videretur. Cum autem me, meæ tenuitatis conscius, abjicerem, & quod in Epistola diserite scripseram, qui essem ipse, & qui contra Norisius, inculcarem ; tum vero is graviter referre Tulliana illa ( c ) non tam auctores in disputando, quam rationis momenta querenda esse ; quin etiam obesse plerumque iis qui discere volunt, auctoritatem eorum qui se docere profitentur ; desinere enim suum judicium adhibere, id habentes ratum quod ab eo quem probant, judicatum vident ; ad hæc illud addere, quam-

tam

( c ) Not. in calce Gruter. pag. 324.

( b ) Plin. Nat. Hist. l. 35. c. 10.

( d ) l. 10. Epigr. 48.

( c ) De Nat. Deor. l. 1.

( a ) I Cesari raccolti nel Museo Farnese Tom. X. Tav. 3. Medagl. 8.



tam bonis Artibus, & quam diuturnam calamitatem tunc opinio præjudicata attulerit, cum etiam sine ratione valebat auctoritas. (d)

Etsi hæc me, atque alia id genus urgebant; tamen simpliciter illud fatebor, unde plane quo revera animo sim, Vir Clarissime, cognoscas. Si Norisius mutationem sententiæ suæ, nulla addita ratione, proposuisset; fortasse multo apud me magis tanti Viri auctoritas, quam quas produxit, rationes, valuisset. Tunc enim novum aliquid, magnique momenti invenisse hominem, existimare potuissem, quo ad sententiæ mutationem compulsus esset. Nunc vero cum suam ne ipse quidem auctoritatem a nobis suspici, sed rationes attendi, voluerit, quibus in sententiam hanc novam traductus sit; quid aliud facere potui quam quod in Epistola feci, ut novas hæc rationes; non antiquas; ex ordine perpenderem, aut si etiam antiquas; ut cum his novas compararem? Nec sane quidquam erat causæ, cur primam suam ab Norisio sententiam desertam esse, ægre ferrem, aut cur pro ipsa propugnator subirem, aut denique cur rem jam satis definitam in controversiam revocarem, qui nunquam antea pro sententia prima stetissem, qui novam quandam adversus eandem, dubitationem in extrema Epistola pro veri studio proponerem, qui tandem nulla satis certa momenta rationum animadverterem, quibus aliquis rem obscuram adhuc, & incompertam extra omnem justæ dubitationis aleam revera ponere, & pro certo constituere potuisset; quando ne ipse quidem Norisius aliud denique pronunciavit, quam Frontonem probabilius Collegam Trajani poni. Hoc mihi igitur in ea Epistola propositum, hoc institutum fuit, non ut quidquam ego de re hac, imo nec de novis ipsis Norisii rationibus statuerem; sed has ut tantum perpenderem; judicium aliorum facerem.

In iis rationibus nulla erat ex Fastis petita, nec vero esse poterat, quando Norisius non vulgares, qui Frontonem habent, sed illos Anonymi censebat esse omnium optimos, qui habent Frontinum. Erat autem hæc, Consulem II. jam fuisse Frontonem. Verum id cum nullius veteris Scriptoris fide probetur, de Frontino autem constet; hinc mihi illud consequi visum est, non jam Frontonem non fuisse, aut omnino esse non potuisse, sed precario dictum esse a Norisio fuisse Consulem II. qui Frontinum quidem fuisse Consulem II. non precario in priore sententia affirmaverat: eaque de causa quanto firmitior esset ejusmodi ratio ad illam sententiam, tanto infirmiore esse ad hanc novam.

At enim in Fastis, a Goltzio, & Panvinio compositis, tempus adnotari videmus alterius Consulatus Frontonis. Nihil hic mihi necesse est, quod ad Goltzium attinet, quam suspecta sæpe ejus sive fides, sive diligentia fuerit, commemorare. Malo tibi credere, Vir Doctissime, qui non uno in loco adversus aliorum suspensiones hominis existimationem tueris. Sed tamen Goltzium, & Panviniū jure, an precario id suis in Fastis scripserunt? Si precario; cur attenderem? Sin jure; quibus ipsi ex fontibus hausissent, videndum erat. Et Panviniū quidem (nam Goltzium nullo prorsus sui facti laudato Auctore, nihil ibi aliud agit, nisi ut Panviniū describat) Panviniū, inquam, unde sumpserit, confitetur, quod in Fastis anno post interfectum Domitianum ex Kal. Jul. M. Cornelium Frontonem II. Consulem scripsit. Domitii, inquit, Apollinaris, Fabricii Vejentonis & cæt. consulum hoc anno successorum Plinius junior l. 9. Epist. ad Quadratum; M. vero Cornelii Frontonis Dio in Nerva, & Hadriano, & Julius Capitolinus in Marco meminerunt. Quos anno post occisum Domitianum fuisse referunt. Quinam? obsecro. Non Capitolinus certe in Marco, non Dio in Hadriano, quibus in locis nihil de Frontone hoc nostro, nihil de his rebus. Unus igitur relinquitur Dionis, sive, ut verius loquamur, Xiphilini locus in Nerva, is scilicet locus quem semel atque iterum perpendit Norisius, & quem ego quoque ex instituto in Epistola examinaui. Num vero eo loco referat Dio, Frontonem anno post occisum

Morgagni Opusc.

Domitianum fuisse consulem, & fuisse ex Kal. Jul. tu ipse, Vir Eruditissime, satis ostendis, qui cum eundem istum producas locum, non id referri ab Dione scribis; sed pro Panvinii assertione aliquam dumtaxat congruentiam trahi ex eo loco posse, credis. Quod si concessero; hinc illud quidem consequetur, Frontonem ex Kal. Jul. Consulem esse potuisse: certe autem fuisse sic ut in Fastis ex Dionis auctoritate sine ulla dubitatione ex Kal. Jul. Consul scribendus fuerit, & statuendus, non consequetur. Id autem est quod mea in Panvinio ita notabat, ut tamen simul excusaret, Epistola.

Et vero aliud est ad certissimam historiæ normam Fastos conscribere, aliud est eorum quæ ita esse, ut non esse, potuerint, conjecturas proferre. Quid enim prohibet quo minus Frontonem Consulem ex Kal. Sept. fuisse, credamus non tam dico anno post occisum Domitianum (quod nunc quibusdam placere sic video, ut in Fastos retulerint) quam eo ipso anno quo Domitianus occisus est? Num forte ille Dionis locus? Quid, si non modo non prohibeat; sed plurimum faveat? Decet autem, atque adeo oportet quæ istum de Frontone locum proxime antecedunt, & subsequuntur, diligenter attendere. Postquam igitur narravit Historicus, post eadem Domitiani Nervam esse Imperatorem designatum, & Decessoris statuas sublata, triumphales arcus disturbatos, post hæc, inquam, quæ statim ab audita cæde Domitiani Romæ esse facta, de Suetonio (e) intelligimus; continuo illa subjicit, Nerva autem eos qui rei facti erant impietatis, absolvit, exulesque restituit. Servos vero, ac libertos, qui insidias dominis, patronisque suis fecerant, omnes interfici, jussit, cavique, ne is liceret crimen ullius facinoris dominis inferre: neminem quoque impietatis, aut ritus Judaici accusari permisit. Tam multi enim per calumniam damnati fuerant, in quorum numero Seras philosophus fuit, ob eamque rem ingens tumultus concitatus erat (omnes enim accusabantur ab omnibus) ut ferant, Frontonem consulem dixisse, malum quidem esse Imperatorem habere, sub quo nemini licet quicquam facere: sed multo pejus esse, cum omnia licent omnibus. Quibus cognitis rebus, Nerva talia fieri in reliquum tempus vetuit. Erat Nerva senectute, & languenti stomacho imbecillior; aliisque interjectis, tum demum hoc subdidit, Virginium Rufum, qui sæpe Imperator appellatus fuerat, non est gravatus collegam in consulatu assumere ex Kal. videlicet Januariis ejus qui Domitiani mortem infecutus est, anni. Sed hæc, atque alia etiam quæ sequuntur, in præsentia mittamus; illa quæ præcedunt, spectemus, & cum iis quæ Plinius is qui primis dominationis Nervæ diebus interfuit, de illis ipsis ad Quadratum scripsit (f), comparemus.

Primum quidem, occiso Domitiano, cur Publicium Certum sibi accusandum statuisset, ostendit; tum vero cur non continuo fecisset, hanc causam subjicit. Ac primis quidem, inquit, diebus redditæ libertatis pro se quisque inimicos suos, dumtaxat minores, incondito turbidoque clamore postulaverat simul, & oppresserat. Ego & modestius, & constantius arbitratus immanissimum reum non communi temporum invidia, sed proprio crimine urgere, cum jam satis ille primus impetus deferbuisset, & languidior in dies ira ad justitiam rediisset, & cæt. Quæ ergo Historicus dicit, multos per calumniam damnatos fuisse, ob eamque rem ingentem tumultum concitatum esse, cum omnes accusarentur ab omnibus, eadem Plinius quoque his verbis indicat, pro se quisque inimicos suos --- incondito turbidoque clamore postulaverat simul, & oppresserat --- communi temporum invidia. At hæc, ait, illo primo impetu, & primis diebus redditæ libertatis contigisse; Historicus autem, cum ea contigerunt, Frontonem consulem fuisse significat. Igitur aut ego quidem plurimum fallor, aut Scriptore hoc utroque collato, intelligitur, primis illis diebus quibus per ipsam Domitiani mortem libertas reddita est, Consulem fuisse Frontonem.

D 2

Sed



Sed videamus ; quæso ; num Vir Doctissimus Jo. M. Catanæus rem aliter atque ego, perceperit ? Sane ad ista Plinii verba hæc commentarii loco apposuit . *Dion scribit ingentem tumultum exortum, quod Nerva principe factò statim omnes suos inimicos accusarunt, unde ferunt, Frontinum ( sic enim ipse, non Fronto- nem, legebat ) dixisse, quod malum esset habere Im- peratorem sub quo nulli liceret aliquid facere, Domi- tianum sane demonstrans ; sed pejus sub quo omnibus o- mnia .* Nec vero Tillemontius ( g ), Vir in Auctorum sensibus, rerumque temporibus inquirendis, si quis alius, diligentissimus, unquam aliter hos Dionis, Pliniique locos intellexit. Quin imo diserte scripsit, ab Dione *inter initia dominationis Nervæ Frontonem Consulem memorari, a Plinio autem turbulentam il- lam communemque accusationem accidisse narrari pri- mis diebus ex quo mors Domitiani ( & electio Nervæ ) libertatem reddiderant .*

Cum igitur ex Suetonio ( h ) constet, Domitianum XIII. Kal. Octobris, hoc est XVIII. Septembris die occisum fuisse, neque dubium sit, mox ei Nervam successisse; si quis Frontonem ex Kal. Septembr. ejus anni, & quod consequitur, tunc cum Domitianus cæ- sus est, & cum mox omnes primis redditæ libertatis diebus tumultuosius accusabantur ab omnibus, si quis, inquam, tunc Frontonem Consulatum ( num tamen II? certe autem ab Nerva non datum ) gessisse, po-

fuerit; is Dionem non modo non adversantem, ve- rum etiam plurimum facientem habebit.

Atque hæc non ad defensionem, sed ad ampliorem eorum expositionem scripta sunt, quæ pressius in E- pistola attigi, cum aliquam ex novis Norisii rationi- bus perpenderem. Nam quæ de reliquis adjeceram, satis ibi exposita credo; certe a te, Vir Clarissime, præterita video. Quod si nihilominus ea tibi sententia fuerit, siquid a Norisio, aut a Panvinio precario de Frontone traditum sit; de illo amplius non esse quæ- rendum; eo me animo esse, confirmo, ut facile pos- sim existimare, ea in re vidisse aliquid tantos Viros, quod mihi videre non licuerit. Sed cum id siluerint ipsi; in eam partem meas dubitationes accipias ve- lim, quasi alios, & te in primis, cujus Ingenium, & Eruditionem suspicio, & colo, etiam atque etiam ro- gem, ut quod illi reticuerunt, vos me, hominem veri studiosissimum, & per illorum, vestrosque labo- res, missis controversiis omnibus, proficiendi cupidis- simum, doceatis. Cum enim vos alibi animadvertam, ubi iidem non satis firma proposuerint, aperte dissen- tire; necesse est suspicer, hac una in re de qua ipse dubitavi, subesse aliquid fortasse quod me quidem fu- giat, a cæteris autem non ignoretur. Vale, Vir Doctissime, & mihi, quod facis, favere perge.

D. Patavii IV. Kal. Septembr. CIO MDCC XXVIII.

DE QUADAM LIBRORUM M. VARRONIS PARTICULA  
UT LEGITUR IN VETERI CODICE  
E P I S T O L A.

ERUDITISSIMO AC PRÆSTANTISSIMO VIRO

J O A N N I P O L E N O

Marchioni, Matheseos Professori Celeberrimo

Joannes Baptista Morgagnus S. P. D.

Q Uæ in vetusto Codice Bibliothecæ Cassinensis, Frontini Commentario de Aquæductibus, con- tinuo, nulloque præfixo titulo, quasi ejusdem Auctoris essent, subjiciuntur, ut paulo attentius cæpi legere, statim particulam esse agnovi libri IV. M. Varronis de Lingua Latina. Qua in particula ut lo- ca Urbis plurima, ducto a Capitolio initio, diligen- ter indicantur, sic mirum non est, hanc illi Fron- tini Opusculo subjunctam esse, quod cum ad alia, tum vero ad locorum Urbis notitiam valet, ut vere Joan- nes quoque Ludovicus Vives ( a ) animadvertit. Ne- que enim aliud spectasse qui istud additamentum ad- scripsit, hinc potest intelligi, quod illa, quæ pro- xime a Varrone sunt tradita, ut pote alio pertinen- tia, omisit, atque adeo in istis ipsis quæ descripsit, ob eandem, opinor, causam, de indultria præter- misit nomina Junii, Nævii, Lucilii, Voluminii, quos ibi Varro laudat Auctores. Etsi vero & hæc no- mina consulto, & perpauca alia fortuito omissa sunt, neque desunt, ut in plerisque omnibus calamo scri- ptis exemplaribus quæ diligentius descripta velles; tamen cum particula ista, illa ipsa tum satis anti- qua, tum in Frontino præ cæteris fideli a te, Vir Doctissime, agnita manu, scripta sit; non erit ( cre- do ) inutile iis, qui de nobilissimi Scriptoris, & præ- stantissimi Operis emendatione solliciti sunt, hoc et- iam exemplar inspexisse. Quod quidem intelliges vel

ex iis dumtaxat locis, quæ mihi licuit, homini ( ut nosti ) longe alia agenti, neque multis editionibus Varronis instructo, his subsecivis horis seligere.

Antiqui Oppidi Saturniæ tertium illud ( inquit Varro ) etiam nunc manet vestigium, quod post ædem Saturni in ædificiorum legibus parietes postici muri sunt scripti.

De istis Legibus ædificiorum non modo silent Var- ronis Interpretes, quotquot memini legisse, verum ne in eo quidem Indice quem Henricus Stephanus ad- didit Scriptorum, & Legum quoque in his Varro- nianis libris memoratarum ulla mentio est, ut neque de lege prædiorum urbanorum, cujus verba paulo su- pra posita sunt. Credibile est, illas ad eundem fere modum fuisse, ad quem ex tabula marmorea P. Ru- tilio, Cn. Manlio Coss. scripta legitur apud Grute- rum ( b ) *Operum. Lex. II. Parieti. Faciundo. in. Area. Quæ. est. ante. Ædem. Scapj. & cat. nisi quod leges quas Varro commemorat, non publicæ erant sed pri- vatæ, si Codici Cassinensi credimus, in quo ita scri- ptum est; in ædificiorum legibus privatis.* Quod qui- dem ultimum verbum etsi in meis editis libris deest; non deerat tamen in iis pervetustis membranis qui- bus utebatur Turnebus ( c ).

Aventinum Montem olim paludibus fuisse ab reli- quis disclusum sic, ut ratibus adiri debuerit, ex iis quæ Tibullus ( d ), Propertius, ( e ), Ovidius ( f ) scri-

( g ) Tom. 2. P. 3. Not. 8. sur Trajan, & Tom. 2. P. 1. ( b ) l. cit. c. 17. ( a ) De trad. discipl. l. 5.  
( h ) pag. 208. ( c ) Advers. l. 20. c. 30. ( d ) l. 2. Eleg. 5. ( e ) l. 4. Eleg. 9. ( f ) Fast. l. 6.



scribunt, intelligi ex parte licet. Ejus rei Varro hæc ait esse vestigia, quod quatum itur Velabrum, & unde ascendebant ad Rumam nova via locus sacellum Labrum. Sic Manutii. Henricus autem Stephanus, & qui Stephanum in iis quoque locis omnibus sequitur, qui post proferuntur, Dionysius Gothofredus ad hunc modum: quod ea, quatum itur Velabrum, & unde ascendebant ad Rumam nova via locus est, & sacellum larum. Verum Josephus Scaliger (g) ita hunc locum legendum esse censuit, nulla pene (quod ipse ait) licentia; quod qua nunc itur, Velabrum: & unde ascendebant ad Rumam, Nova Via: ubi locus & sacellum Larum. Quem ita secutus est Aufonius Popma, ut in hunc ipsum fere modum ediderit. Non negaverim, sic planam atque perspicuam reddi Varronis sententiam iis præsertim, qui horum Virorum interpretationem simul attenderint. Attamen cum in exemplari nostro lego: quod ea qua tum dicitur Velabrum, & unde ascendebant ad finem novam viam, locus est qui dicitur Sacellum Labrum; cumque animadverto in veteri etiam Turnebi (h) libro hanc fuisse scripturam: quod ea qua tum dicitur Velabrum: & mox ad infimam novam viam locus Sacellus Labrum, & huc illam quoque pertinere scripturam, quam Henr. Stephanus in ora adnotavit: descendebant ad imam novam viam, cum, inquam, hæc omnia attendo, ut in hisce antiquis exemplaribus menda esse non nego, ita proposita emendatio an undique probanda sit, dubito. Equidem Rumiam, seu Ruminam, ut Varro noster (i) alibi vocat, apud Romanos Deam fuisse cui facientes mulieres, non vino, sed lacte hostias spargerent, de Plutarcho (k), & Nonio (l) didici, imo ex ipso Varrone (m) scio huic Deæ sacellum fuisse, apud quod a Pastoribus sata ficus. Num tamen id sacellum in Urbe fuerit, vel si in Urbe, eo in loco, me adhuc fateor ignorare. Nam quod Ædicula Matris Rumæ in Regione VIII. a Panvinio (n), atque adeo ab Sexto Rufo (o) secundum exemplar a Panvinio editum collocatur; nempe hic exemplar id sequitur, cujus de auctoritate quid habendum sit, non obscure docet Nardinus (p): nec fortasse a vero longissime absit, qui ex hoc uno, cujus de vera scriptura quærimus, Varronis loco istam Matris Rumæ Ædiculam in illud exemplar irrepisse, suspicetur. Contra, si infimam novam viam legamus; quin hæc certus esset Urbis locus, & in ea quidem vicinia agnoscendus; dubitare nemo possit. Nam vel nolter Varro in divinarum libris ut testatur Gellius (q), *Ajus*, inquit, *Deus appellatur, araque ei statuta est in infima nova via, quod eo in loco divinitus vox edita erat.* Hanc autem vocem de qua Livius (r) quoque ter meminit, exauditam esse a luco Vestæ, qui a Palatii radice in novam viam devexus erat: aramque propterea Ajo loquenti, adversus eum locum consecratam esse, testem locupletem habemus Tullium (s): Atque utinam ut ex his cognoscimus, ubi esset infima nova via, ita etiam ubi summa nova via fuerit, sic intelligere possemus, ut locum illum Solini (t), *Habitavit . . . Tarquinius Priscus ad Mugoniam Portam supra summam novam viam* ab aliis veterum Scriptorum locis non ita fortassis discrepare, confiteremur. Sed hoc alii viderint; nos ad Varronem revertamur.

Reliqua, inquit, Urbis loca olim discreta, cum argeorum Sacraria in septem & XX. partes urbis loca sint disposita. Sic Manutii. Henr. Stephanus, ut Argeorum Sacraria in septem & viginti partes urbis sunt disposita. Aufon. Popma, sint disposita; cætera ut Stephanus, nisi quod in Notis, partes urbis sint esse censet glossema, eoque inducendum. Turnebi (u) vetus liber, tum Argeorum Sacraria, in septem & viginti partes, ubi sunt disposita. Codex autem Cassinensis; Reliqua Urbis loca olim discreta cum Argeorum Sacraria in septem & viginti partes Urbis sunt dispo-

sita sinceriore (ut opinor) certe faciliore, & planiore Scriptura, ut videlicet intelligamus tunc loca illa discreta fuisse, cum Sacraria hæc fuere disposita.

In Regione Esquilina, *lucus fagutalis, & larium, Querquetulanum Sacellum & lucum Martis, & Junonis Lucinae*, quorum angusti fines: non mirum. Jamdiu enim late avaritia nunc est. Sic editiones Manutiorum. At Stephanus, *lucus fagutalis, & lucus Mephitis, & lucus Junonis Lucinae*; quorum angusti fines: non mirum. Jamdiu enim late avaritia una est. Item *lucus Larum, Querquetulanum Sacellum*. Popma, *lucus Fagutalis, & Lanum* (leg. Larum; imo ex Notis in quibus Jos. Scaligerum innominatum, ut sæpe solet, sequitur, *Virarum*) *Querquetulanum Sacellum, & lucus Martis, & Junonis Lucinae*; quorum angusti fines non mirum: jamdiu enim late avaritia una est. Turnebus (x) legit, *lucus dicitur fagutalis, & larum Querquetulanum Sacellum, & lucus Mephitis*, & mox: *jamdium enim late avaritia via est*; verum in hac emendatione non suam sed antiqui libri fidem obstrictam esse, vult. Illud etiam alibi (y) monet, libros veteres *meficis* habere, at se *Mephitis* rectum putare, ut ante emendaverat Augustinus, & agnoverat Scaliger (z). Nunc Scripturam Cassinensem producamus: *lucus dicitur Facutalis, & Larum querquetulanum est, Sacellum & lucus Mefitis, & Junonis Lucinae*, quorum angusti fines, non mirum, jamdiu enim late avaritia est. Non est negandum, menda hic quoque, & quidem apertissima, occurrere. Sunt tamen & quædam fortasse probanda, in quibus *Sacellum* illud, & *lucus Mefitis*. Nam qui *lucus Martis* edidit, non facile proferent antiquorum Scriptorum locos, quibus istam suam lectionem confirmet. Publius quidem Victor (a) inter cæteros Romæ Lucos *Lucum* etiam *Mavortis* proponit, sed in recentiori Epilogi additamento, quod primum editum est a Panvinio, de cujus editionis additamenti non aliter habendum esse, ac de ipsius Sex. Rufo indicatum est, haud immerito monet Nardinus (b). Quod si etiam utrique illorum credamus; tamen neque Victor, qua in regione is lucus esset, ostendit, & Rufus in longe alia Regione, videlicet IX. *Lucum Mavortianum* constituit; non in V. in qua Ædiculam quidem Martis memorat, sed ita, ut ignores, in Esquilis, an in Colle Viminali statuatur, ut apud ipsum ibi conjunctis, sic a Varrone in hoc loco omnino sejunctis. De Sacello autem Mephitis, quod in Esquilina Regione, atque adeo qua in hujus parte esset, luculentum in promptu est Sex. Pompeii (c) testimonium. *Eam*, inquit, *partem Esquiliarum, quæ jacet ad vicum Patricium versus, in qua regione est ædis Mefitis*, Cispus Anagninus tuitus est. Quod si aliquid hac in partetribuendum est illi Urbis topographiæ, quam majori in tabula edidit Marlianus (d); huic certe lateri Esquiliarum, de quo Sextus loquitur, magis e directo respondebat, propiorque erat Esquilinus Campus, sive (ut Varro supra vocat) Puticulæ. *Extra oppida*, inquit, *a puteis Puticulæ, quod ibi in Puteis obruebantur homines: nisi potius, ut Ælius scribit, Puticulæ, quod putrescebant ibi cadavera projecta: qui locus publicus ultra Esquilias: cui idem Festus (e), & Porphyrio Horatii interpretes (f) adstipulantur.* Quamobrem proclive est cum Alexandro Donato (g) intelligere eo potissimum in loco fuisse cultam Mephitim, Deam, ut Servius (h) ait, *odoris gravissimi, ne ex tetra illo, & exitiali cadaverum putrescentium odore homines detrimentum caperent: itaque alio translato communi isto (ut Horatii (i) verbis loquar) misere plebis sepulchro, tum licuit, ut idem ait,*

*Esquilis habitare salubribus, atque  
Aggere in aprico spatium, quo modo tristes  
Albis informem spectabant ossibus agrum.*

Non me fugit, Nardinum (k), quem ut novisse hæc omnia

(g) Conjectan. in hos libr. Varron. (h) loc. cit. (i) apud Nonium de Propr. Serm. c. 2. in Rumam, (k) Quæst. Rem. 57. (l) loc. cit. (m) De Re Rust. l. 2. (n) Reip. Rom. Comm. l. 1. (o) De Regionib. Urbis. (p) Rom. Ant. l. 2. c. 5. (q) Noët. Attic. l. 16. c. 17. (r) Histor. l. 5. c. 32. 50. & 52. (s) De Divin. lib. 1. (t) Polyhist. c. 1. (u) l. cit. c. 35. (x) loc. cit. (y) Comment. in hos libr. Varr. (z) Conjectan. cit. (a) De Regionib. Urb. (b) loc. cit. (c) De Verb. Signif. l. 17. in Septimontio. (d) Topogr. Urb. Rom. c. 7. (e) Oper. cit. l. 14. in Puticulos. (f) In od. 5. Epod. (g) Rom. Veter. l. 3. c. 10. (h) in l. 7. Æneid. v. 84. (i) l. 1. Sat. 8. v. 10. (k) Oper. cit. l. 4. c. 5.



omnia video, sic verbi illius Horatiani modo vim satis attendisse, nonnihil dubito, tum de tempore, quo id sepulchrum translatum est, tum de ejus loco aliter ac cæteri, existimare: cui nos assentiri in præsentia nihil vetat, cum ipse ( *l* ) quoque Donato in eo quod diximus, nihilominus assentiatur. Neque aliam fortasse ob causam Cremonense illud *Mephitis templum* de quo narrat Tacitus in III. libro *Historiarum ante mœnia* erat constitutum, nisi quod haud longe ( *extra oppidum* videlicet, ut ait Varro ) Cremonensium erant Puticulæ. Quod ad Templum, vel ad ejus potius viciniam fieri potest, ut pertinuerit basis illa marmorea, his verbis inscripta,

MEFITI,  
L. CAESIVS  
ASIATICVS  
VI. VIR. FLAVIALIS  
ARAM. ET. MENSAM.  
DEDIT. L. D. D. D.

Laude enim Pompeii, urbe nimirum Cremonæ vicina basim hanc inspectam fuisse, a Grutero ( *m* ) traditum est: quem ad locum Gruteri quicumque hæc adscripsit; *Mephitis templum ante mœnia Cremonæ Tacit. 13. Hist.* ille, vel ( ut credere par est ) ipsius potius Amanuenses, atque Typographi & in urbis nomine, & in libro Taciti indicando, manifestissime a vero aberrarunt. Sed neque prætermisionis culpa vacat Jo: Gulielmus Stuckius, qui *universæ* superstitionis ethnicae ritus ceremoniasque complectem in sua *Sacrorum Sacrificiorumque Descriptione*, cum multo etiam ignobiliores Deos, eorumque cultum commemoraret, de Mephiti ne verbum quidem facit, quam templa arasque habuisse, constat, & cui præterea peculiare fuisse alicubi litationis genus, haud difficile intelligitur ab iis cui cum Plinio ( *n* ) legerint memorantem in *Hirpinis Amsancti ad Mephitis Aedem lacum* ( vel, ut legunt alii, *locum* ) quem qui intravere, moriuntur, tum animadvertunt, Servium ( *o* ) de eodem Amsancti in Hirpinis loco, *aquas sulphureas habente*, hæc tradere, *gravis odor juxta accedentes necat, adeo ut victimæ circa hunc locum non immolarentur, sed odore perirent ad aquam applicatæ: & hoc erat litationis genus*. Num autem hæc Servii verba ( ut Medicus eruditissimus, qui nonnulla istorum ante nos attigit, Leonardus a Capua ( *p* ) videtur existimare ) id significant ut victimas intra lacum sinerent suffocari, aquis nimirum submersas, alii dispiciant; ego jam redeo ad Varronem.

Hæc paulo infra ex Sacris Argeorum adscribit, *Septimus mons quinticeps lucum Petilium*. Ita Manutii. Stephanus. *Septimus mons quinticeps lucum Petilium*; in libri ora *Petilium*. Popma, *Septimus mons quinticeps lucum Poetillum*. Cassinensis codex, *Sceptius mons quinticeps lacum poetillum*. Equidem non lacum, ut solet in hoc Codice, scribendum fuisse, sed lacum, non est cur dubitem; sic enim Pub. Victoris vel antiquiora illa Panviniano exemplaria in hac V. Regione habent, *Lucus Petilius*; imo Livii quoque liber sextus ( *q* ), in *Petelinum lacum extra Portam Flumentanam* ( Nardinus ( *r* ), mavult *Nomentanam* ) unde conspectus in Capitolium non esset; item liber septimus ( *f* ) in *lucum Petelino*. An tamen *Septimus mons quinticeps* Scribendum fuerit, non *Sceptius mons quinticeps*, dubitari etiam atque etiam potest, nam primum Turnebus ( *t* ) quoque ad hunc locum hæc adnotarat, *Vetus liber Sceptius mons: quod verius puto*. Deinde Josephus Scaliger ( *u* ), *frequens mendum hic inolevit*. Nam male quinticeps, sexticeps scriptum est pro quinticeps, sexticeps, etcæt. Neque enim primiceps dixit, sed primiceps. Igitur cum utroque codex hic facit in hoc quidem loco; nam & alicubi intelligitur cum illo Turnebi ( *x* ) codice an-

tiquissimo convenire; in quo pro *Quarticeps*, vel *Quarticepsis* scriptum erat *Quarticepsis*.

Sed non sic tamen in plerisque eorum, quæ non multis interjectis, rursus ex Argeorum Sacrificiis habet, in hunc modum, *Collis Quirinalis Salutaris Quarticeps adversum est pilonaris ædem Salutis. Collis Muccialis Quinticeps*, & mox; *sexticeps in Vico in Stegano Summo apud Auradum etc.* Longum esset quæ singuli pro his ediderunt, aut edenda censuerunt, proferre, atque contendere. Non tamen reticebo, verbum *Quirinalis* ab omnibus quos ego viderim, omitti: etiam paulo ante, si excipias Manutios. Pro *Muccialis* vel *Mutialis* Scaligerum ( *y* ) ex Libro IX. ( *z* ) Dionysii legendum censere *Martialis*, & sic editum a Popma. Pro *vico in Stegano* Manutios in *stellario* ( quod vetus etiam Turnebi ( *a* ) codex habebat ) Stephanum autem, & Popmam, post Augustinum, *Mustellario* edidisse. Denique pro *Auradum* Manutios; & Stephanum scripsisse *Turaculum*, Popmam *Auguraculum* ex Scaligeri ( *b* ) videlicet, ac Turnebi ( *c* ) conjectura, quorum ille in antiquis excusis, hic vero in calamo exaratis libris *Auraculum* legerat, quam ferme lectionem cum accuratissimum exemplum scripturæ attendo Cassinensis Codicis, a te, vir Doctissime, editum ( *d* ), in hoc pariter fortasse agnosci posse, non nego. Hæc tamen omnes varietates ab emendatoribus Varronis eo diligentius sunt pensandæ, quod *Auguraculum*, exempli causa, a Publio quidem Victore illo antiquo in Regione X., idest in Palatio sub *Auguratorii* nomine collocatur; non tamen aut hujus, aut alius veteris Auctoris locum produci video, a quo in Quirinalis montis parte, seu, ut Argeorum Sacra vocant, in Latiari Colle ponatur: imo ne in Capitolio quidem a Victore ( quod Turnebus ( *e* ) pariter affirmat ) statui invenio. Ad eundemque modum de *Vico Mustellario* testimonia Veterum proferri, non video; quamvis Panvinius ( *f* ) in Regione hac VI. addiderit, ut *Pilam* etiam *Honoris*. Quam ut ex *pilonaris* ( verbo in hoc, quo de agimus, Varronis loco a Popma; non modo a Manutiiis, edito ) nonnulli fecerant, velut Scaligero ( *g* ), & Stephano ( *h* ) adnotatum est; ita cæteri quod precario factum videbant, abjecerunt, & meliora quæsierunt. Itaque cum esset quibusdam in libris *Pila naris*, ut diserte Popma ( *i* ) testatur, ac Stephanus edidit, non desuerunt qui sic legi posse crederent ( *k* ), *Pilamque*, *Naris* fluvii Statua ornatam intelligerent, precario hi quoque, non sic tamen, ut convinci tam possent, quam conjectura illa a Turnebo ( *l* ) aliquando commodior existimata, ut videlicet legeretur, *Pilam Horatiam*; hanc enim cum in foro fuisse sciret, non erat cur crederet, *potuisse e regione esse Montis Salutaris*. Fuit etiam cum idem ( *m* ) legendum putaret *ædem Honoris*; quamquam denique ( *n* ) illam cæteris conjecturam prætulit, ut rescriberetur *Apollinaris*, & *Apollinaris collis* intelligeretur in quo *Apollinis ædes* erat. Hanc conjecturam Turnebi non secutus quidem est Josephus Scaliger ( *o* ), quod scribit Gothofredus ( *p* ) ( quæ enim sequi potuisset illos Adversariorum libros, qui post sua edita Conjectanea prodire? ) sed ita ipsam antevertit, ut tamen maluerit legere *Apollineris* antiquo declinatu pro *Apollinis*: quo in loco idem verbum intulit etiam in carmen Martii Vatis, non dubitans quin hexametro in versu vix facile locum habere possit nomen *Apollinis*, & quin Livius ( *q* ) in eo carmine referendo *alienis verbis* usus fuerit, *detergo illo situ, & squallore vetustatis, ne simplex illa rusticitas versuum inquinaret delicias illas & lumen orationis suæ*. Quod quidem si Livio visum esset faciendum; longe aliter ( opinor ) id carmen proposuisset, non ad illud horridulum ut verum loquamur, & hiulcum exemplum, ad quod ferme etiam apud Macrobius ( *r* ) propositum est. Verum ut Scaliger in hoc divinasset; certe cum in Varrone *Apollineris ædem* legen-

( *l* ) l. cit. c. 4. ( *m* ) pag. 96. ro. ( *n* ) Nat. Hist. l. 2. c. 93. ( *o* ) in l. 7. Æneid. v. 563.  
( *p* ) Lez. I. intorno alla nat. delle Mofete ( *q* ) c. 20. ( *r* ) Rom. Ant. l. 4. c. 4. ( *f* ) c. 41. ( *t* ) Comment. cit.  
( *u* ) Conjectan. cit. ( *x* ) Adversar. l. 20. c. 35. ( *y* ) loc. cit. ( *z* ) Antiqu. Rom. ad An. 288.  
( *a* ) Comment. cit. ( *b* ) ( *c* ) loc. cit. ( *d* ) in Frontin. Tabula T. ( *e* ) Adversar. loc. cit.  
( *f* ) Reip. Rom. Comment. l. 1. ( *g* ) loc. cit. ( *h* ) in marg. ( *i* ) in Notis cit. ( *k* ) Nardin. cit. l. 4. c. 6.  
( *l* ) Comment. tit. ( *m* ) Ibid. ( *n* ) & Adversar. loc. cit. ( *o* ) Conjectan. cit. ( *p* ) Not. in Varron.  
( *q* ) Histor. l. 25. c. 12. ( *r* ) Saturnal. l. 1. c. 17.



legendum censuit, non animadvertit, quod ipse contra aliorum ædem Honoris objecerat, id contra suam Apollineris ædem multo magis objici posse. Sic enim scripserat. *Substituerunt hic --- alii Pila Honoris, alii Honoris ædem majore imprudentia. Non enim, nisi fallor, antiquior fuit Honoris ædes, ea quæ vota est a Cl. Marcello bello Gallico ad Clastidium. Alia autem a C. Mario ex Cimbricis manubiis dedicata fuit. Tantum vero abest, ut utraque harum hic intelligatur ut Libri Argeorum non minus 300. annis præcedant Cl. Marcellum.* Fugit revera eruditissimum alioquin hominem locus M. Tullii, quem locum eo quoque omnes fugisse miror, quos sive de Romanis Honoris Templis, sive de M. Cl. Marcello, sive de Q. Fabio Maximo Verrucoso scribentes, ad hunc diem meminisse legisse. Vides (inquit Cicero in II. de natura Deorum) *Virtutis Templum, vides Honoris a M. Marcello renovatum, quod multis ante annis erat bello Ligustico a Quinto Maximo dedicatum.* Hic tamen mitto locum hunc urgere Tullii adversus Scaligerum. Multo etiam magis mitto quærere, annisne dumtaxat 300. Marcellum præcesserint libri Argeorum. Illud unum dico, qui censuit, substitutam esse perperam Honoris ædem in iis libris, qui tot ante illam annis scripti fuissent, dispicere eundem oportuisse, ne forte illam in Quirinali Colle ædem Apollinis quam in iis ipsis substituebat, multo pluribus annis libri Argeorum antecessissent. Quid enim, si ne ætate quidem L. Syllæ ulla adhuc in eo Colle Apollinis ædes constructa esset? Hoc autem videtur docere Asconius Pedianus (f), qui eam solam tum demum (Sylla sciente) fuisse Romæ Apollinis ædem scribit, quæ erat extra Portam Carmentalem, inter Forum Olitorium, & Circum Flaminium, ut recentiores videantur, cum aliæ aliis in Regionibus sitæ, tum nominatim ædes illa Apollinis, & Clatræ quam a Victore in Regione VI. positam esse, non ignoro. Nam Apollinis quidem Medici nominatam ab Livio ædem etsi alibi a cæteris statui video; non tamen video, qui firmis argumentis ostendat, haud eandem fuisse ac illam, quæ ab Asconio extra portam Carmentalem, ac prope Forum Olitorium memoratur. Livius certe, qui ædem Spei (t) extra Portam Carmentalem, ac (u) in Foro Olitorio commemoraverat, cum de Porticibus quibusdam narraret (x), & post Spei, inquit, ad ædem Apollinis Medici. Itaque Panvinus (y) has duas ædes nulla interjecta sic proposuit: *Ædes Spei in Foro Olitorio, Ædes Apollinis Medici.* Huc adde, cognomen tum hoc ipsum Medici in illo potissimum Templo Apollini convenisse, quod huic grassante pestilentia, pro valetudine populi votum esse, Livius (z) est auctor; illud autem votum Apollini templum quicumque in Livii lectione sunt versati, & in his Nardinius (a), minime dubitant, non modo quin Romanorum omnium templorum Apollinis antiquissimum fuerit, verum etiam quin ista ipsa ædes fuerit, quam solum tum Romæ habuisse Apollinem, testatur Pedianus. Quod si quis forte ex me quærat, cur unum igitur atque idem templum Livius uno dumtaxat in loco ædem vocaverit Apollinis Medici; in cæteris autem omnibus (b) ædem Apollinis, atque alia ejusmodi paret quæ objiciat; ille vero ad extremum sic habeat; una, an duæ ædes fuerint, mihi demum perinde esse, illud quidem hic spectanti, ut ostendam; aut hanc, aut rationem aliam aliquam excogitandam esse, qua Pediani testimonium tueamur, sed hoc tamen potissimum agenti, ut intelligatur, ne id quidem Apollinis Medici templum in Quirinali Colle fuisse. Hoc autem si minus ex his, quæ pro Asconio attigi, planum fiat; satis certe planum fieri ex eo potest, quod nemini adhuc, quod sciam (ut ne mihi quidem) venit in mentem ut templum illud procul a Tiberi collocaret, propterea quia fere omnes in Li-

vio sic legunt: & post Spei ad Tiberim ædem Apollinis Medici. Quæ omnia cum ita sint; etsi Turnebum secutus Aufonius Popma (c) magis in Varrone probat Apollinaris, collem intelligens, in quo Apollinis ædes erant; in eo tamen videtur aliquanto magis laudandus, quod Pilomnaris legi etiam posse conjecit, ut id cognomen esset Salutis hostes pellentis, quemadmodum ob hanc ipsam causam in Saliari Carmine Pilomnoe poploe de Romanis dictum esse, censuit Festus (d). Sed quoniam id precario conjecit Aufonius, idcirco tamdiu antiqui codices sunt excutiendi, donec lectio aliqua eliciatur, quæ simul ab eorum scriptura non longe absit, simul veterum auctoritate Scriptorum confirmetur. Qua vide, quæso, Vir Doctissime, an conprobari forte possit quod ex Cassinensis Codicis scriptura pilonarois de Pilumni areis vel aris scribenti hæc mihi venit in mentem. Nam Pilumnus is, qui pluribus Virgilii versibus (e), & in hos Servii Commentariis, imo duobus etiam Varronis nostri adhuc extantibus locis celebratur, altero ex libro II. de Vita Populi Romani, altero ex libris Antiquit. Rer. Divin. & Jovis filius habitus est, & non modo a Pilistoribus, sed ab aliis pariter est cultus inter Deos Conjugales, & scætae Mulieris custodes. Ad ejusque cultum magis, magisque ostendendum pertineret etiam Cumana Inscriptio, si ut apud Gruterum (f) (non ut (g) apud Reinesium) legenda esset, videlicet,

PILVMNO. SANCTISSIMO  
GENIO. MVNICIPI. SACRVM. & cæt.

Sed ut apud Rutulos, si Virgilio credimus, lucum, & vallem habuit sibi sacra; ita apud Romanos (qui abnepi (h) certe ipsius Juturnæ ædem (i) statuerunt) aras, vel areas, & in Quirinali quidem colle, habuisse, non facile, quantum nunc memini, invenire poterimus, nisi de Pilumni ætate, atque origine, non quod Virgilius fortasse omnino confinxit, sed quod docent Viri quidam eruditissimi ponamus. Itaque Festum in duobus illis, quæ paulo ante ex Saliari Carmine produximus, verbis interpretandis hallucinatum esse, affirmat post Meursium Andreas Dacierius (k), docentque ambo, accipienda illa esse de populo Pilumni sic, ut Pilumnus sit ipse Romulus, quem ita Salii Pilumnus a pilo dixerint, ut Sabini a quiri (id est ab hasta) Quirinum. Hoc si posuerimus; minus difficile erit suspensionem meam (qualis ea cunque est) quadantenus comprobare. Nam primum a Livio (l) traditum est, Regem illum, ut Tullius (m) appellat, doctissimum Numam, qui Salios canentes carmina instituit, eundem (n) Sacrificia locaque sacris faciendis, quæ Argeos Pontifices vocant, dedicavisse; ut non sit mirandum, si quo nomine in Saliari (ut Horatius (o) loquitur) Numæ carmine appellatur Romulus, eodem quoque in Argeorum Sacrificiis aliquando appelletur. Romulum autem in Quirinali colle vel Numæ temporibus cultum fuisse, ex pluribus Veterum locis inter se collatis intelligi potest. Primum videlicet ex eorundem Sacrificiorum verbis mox producendis, in quibus notiore etiam nomine Quirini Ædes in hoc colle memoratur. Deinde ex Ovidii (p), & Plutarchi (q) testimoniis, quæ præclarissime illustrat non modo Sex. Aurelius Victor (r), sed Dionysius quoque Halicarnassensis (s). Ille enim statim ab Romuli excessu, ædem scribit in Colle Quirinali Romulo constitutam, ipsum pro Deo cultum, & Quirinum esse appellatum. Hic vero, Numam ipsum voluisse, Romulum templo, & alternis annis sacrificio sub Quirini cognomento coli. Denique aras in Quirinali Monte habuisse Romulum, cum ex isto ipso sacrificio conjici licet, tum satis aperte (ut mihi quidem videtur) ostendit Varro, hæc post quatuor Quirinalis Collis partes ex Argeo-

(f) Comment. in Orat. Cicer. in toga cand. (t) l. 24. c. 47. l. 25. c. 7. (u) l. 23. c. 62.  
(x) l. 40. c. 51. Vid. Edition. Jo. Dujatii (y) Reip. Rom. Comm. l. 1. (z) l. 4. c. 25. & 29. (a) l. 6. c. 2.  
(b) l. 3. c. 63. l. 7. c. 20. l. 27. c. 37. l. 34. c. 43. l. 37. c. 50. l. 39. c. 4. l. 41. c. 21. & cæt. (c) Not. cit.  
(d) De Verbor. Signific. l. 14. in Pilumnoe (e) Æneid. l. 10. v. 76. 618. & l. 9. v. 3. 4.  
(f) Corp. Inscript. pag. 96. 4. (g) Syntagm. Inscript. Antiqu. Cl. 1. n. 296. (h) Virgil. Æneid. l. 10. v. 619.  
(i) Ovid. Fast. l. 1. v. 463. & P. Victor. Reg. IX. (k) Not. in Festum. (l) l. 1. c. 20. (m) De Orat. l. 1.  
(n) Ibid. c. 21. (o) l. 2. Epist. 1. (p) Fast. l. 2. (q) in Romulo. (r) De Viris Illustr. c. 2.  
(s) Antiquit. Roman. l. 2.



georum Sacris, hic nominatas subjiciens: Horum Deorum aræ, a quibus cognomina habent, in ejus regionis partibus sunt. De prima autem earum partium in illis Sacris ita erat scriptum, quantum ex Codicibus quos secuti sunt Manutii, & ex nostro habemus: *Col-lis Quirinalis terticepsos* (vel *terticepsos*) *Ædem Qui-rind* (vel *Quirini*). Atque hæc in loco difficillimo suspicari ausus sum: quæ si tu magis confirmaveris, tunc ego quoque probare incipiam; sin minus, de vera illius Scriptura, quod quidem facio, fatebor amplius esse quærendum.

Sed ut hic locus facile emendationem desiderat; sic in alio fortassis supervacua est, quem corrigendum esse putavit Scaliger; præsertim si ut in Codice Cassinensi legatur. Manutii, alique sic proposuerant, *Germalum a germanis Romulo*, & *Remo*, quod ad *ficum ruminalem* & *hi ibi inventi*, quo aqua hyberna Tyberis eos detulerat in alveolo expositos. Scaliger (t) autem hoc adnotavit: *Vera lectio quod ad ficum Ruminalem e Tyberi inveni*. At si hanc veram lectionem esse censuit, cur non illud quoque addidit: quæ sequuntur *glossema* esse, ideoque inducenda? Nam si legendum e *Tybri inveni*; quid subjicere continuo oportet, quo aqua hyberna Tyberis eos detulerat in alveolo expositos? Hæc tamen in nullis. (quod sciam) aut impressis, aut scriptis libris omissa sunt; certe in Cassinensi inveniuntur; quando illa contra, & *hi ibi*, unde Scaliger fecit e *Tybri* non sunt pariter in omnibus. Nam Stephanus quidem ita edidit, & *hi inveni*, Popma *hi inventi*, Cassinensis Codex habet, *ibi inventi*: quam ego lectionem valde probandam esse, existimo. Nam hoc ait Varro, illum Urbis locum Germalum esse dictum, quod *ibi* germani Romulus, & Remus inventi sunt.

Denique extrema hujus particulæ verba Stephanus, &

Popma in hunc modum proposuere: *Ab hoc quoque quatuor partes Urbis Tribus dictæ: & ab locis Suburaria, Esquilina, Collina, Palatina: quinta quod sub Roma, Romilia. Sic reliquæ tribus ab iis rebus, de quibus in Tribuum libris scripsi*. Melius profecto, quam Manutii, a quibus (ut priora omittam) postrema ita proposita fuerant, *sic reliquæ tribus ab his, ut in tribuum libris scripsi*. Multoque etiam melius, quam in Codice Cassinensi, in quo hæc ita scripta sunt: *Sic reliqua trita ab his rebus, quibus in Tribuum libros scripsi*. Hæc tamen scriptura in suis ipsis mendis vestigia fortassis servat verioris scripturæ. Nam in illo *trita* facile reliquæ sunt verbi *triginta* sic, ut Varro postquam de quinque dixerat, reliquas triginta tribus complexus fuerit. Certe Turnebus (u), cujus cum antiquis Varronis exemplaribus sæpius hoc nostrum convenire, supra ostensum est, in libris *vetustate cariosis* ita se legisse, testatur: *Sic reliquæ triginta diebus ab his, quibus in tribuum libris dixi*. In illis autem *libros scripsi*, si quis veterum librariorum frequentissimum in primis errorem, hujusque causam attendat; is suspicari facile possit, latere hanc lectionem *libro scripsi*; nisi forte ex aliquo alio qui me adhuc fugit, aut Varronis ipsius, aut alterius prisce Scriptoris loco omnino constet, ab illo non librum, sed libros Tribuum scriptos fuisse.

Qui tamen locus, alique ejusmodi, quos me requirere, supra indicavi, si tibi, Vir Eruditissime, in promptu fuerint, eo gratius erit intelligere, quod ita Manutii, Stephano, Popmæ, Scaligero, aliisque summis Varronis emendatoribus, a quibus sine erroris mei suspicione dissentire nunquam possim, libenter) ut soleo) adstipulabor. Vale.

Patavii prid. Kal. Quintil. CIO DCCC XXII.

IN VITRUVII LOCUM, AD TEMPUS QUO  
SCRIPSIT, ATTINENTEM, ET IN ALTERUM  
VETERIS AUCTORIS COMPENDII  
ARCHITECTURÆ  
E P I S T O L A.

Ad eundem Marchionem Polenum.

**H**æreo, nisi Tu forte, Vir Clarissime, aliter legis in Vitruvio. Dices, ubi? Libro 2. cap. 9. Ibi enim postquam alnum, scripsit, *in palustribus locis infra fundamenta ædificiorum palationibus crebre fixam*, -- *permanere immortalem ad æternitatem*, & *sustinere immania pondera structuræ*, & *sine vitiis conservare*, &c., tum hæc subjicit. *Est autem maxime id considerare Ravennæ, quod ibi omnia opera & publica, & privata sub fundamentis ejus generis habeant palos*. Quæ cum lego, & Strabonis simul venit in mentem, qui Tiberii ævo de eadem Urbe longe alia edidit libro 5.; sic hæcere me, fateor, ut propemodum suspicari incipiam, aut ea quæ modo de Ravenna descripsi, non esse a Vitruvio, aut si forte sint, non hunc libros suos Augusto, sed, contra ac plerique, nec sine multiplici ratione, creditis, alicui obtulisse posteriorum Imperatorum. Nam si, ut fumus ille Geographus post Augusti obitum mandavit litteris, *intra paludes urbs maxima Ravenna posita*, erat adhuc *tota ligneis compacta ædificiis* (ξύλων ὅλη) quæ fieri potest, ut in ea, vivente Augusto, omnia opera & publica, & privata ejusmodi essent palis, fundamentisque suffulta, quæ non modo *sustinere*

*immania pondera structuræ*; sed (quod diu antea ex ædificata opera significat) *sine vitiis etiam conservarent*? Exemplum igitur ad confirmandam Vitruvii sententiam ab Ravenna maxime petitum, non Scriptorum Augusto cœvum, sed aliquem potius videtur indicare, qui postquam Claudius amplam illam, & marmoribus ornatissimam Portam, quam Auream vocabant posteri, murosque Ravennæ dederat, tunc demum viveret, sive is Vitruvius, quod alii ejus librorum loci minus credibile mihi faciunt, sive alius fuerit qui Ravennæ exemplum in ora addiderit codicis sui, unde postea sit inter Vitruvii verba translatum. Cujus si tu, Vir solertissime, libros aliis interpolatos locis agnoveris; idem hic quoque accidisse, facilius credam.

Quod si forte quædam animadverteris a librariis inter describendum non solum fuisse in Vitruvio addita, sed interdum etiam omissa; pondus aliquod accessisse, putabo, alteri, leviculæ alioquin, dubitationi meæ: quam ubi perpaucis adscripsero; has litterulas obfignabo.

Priscus ille anonymus Scriptor Compendii Architecturæ, quod, cum rarius esset, nec sine erroribus edi-



editum, in tuis nunc Vitruvianis Secundis Exercitationibus diligenter ex collatione etiam antiquorum codicum multo emendatius habemus, articulo 27. cum cerussæ conficiendæ rationem proponit, *Sarmenta*, inquit, *vitiosa vineæ*, *infuso aceto in dolio sub tabulis plumbeis deponantur*. Hic primum abs te peto, ut mecum reputes, an pro istis vocibus *Sarmenta vitiosa vineæ*, Anonymus forte scripserit *Sarmenta vitis amineæ*. Hujus enim scripturæ vestigia mihi videor internoscere in iis quæ fideliter ad hunc Anonymi locum profers cum ex Codice Romano I. *vitiosa mineæ*, tum præsertim ex Vasconiani Editione *vitio amineæ*. Amineæ autem vitis, ejusque uvæ, & vini creberrima, ut nosti, apud Veteres mentio est non tam Græcos ut Dioscoridem, Galenum, Hesychium, quam Latinos, Catonem dico, Varronem, Virgilium, Celsum, Scribonium, Plinium, Columellam, Samonicum, Palladium, & si quos alios Rhodius ad Scribonium, Keuchenius ad Samonicum, & Cl. Gesnerus ad Rei Rusticæ Scriptores commemorarunt, quorum locos minime opus est a me tibi Viro Eruditissimo singillatim indicari. Quam si de vite amineæ conjecturam non improbas; tum hanc dubitatio-

nem expende meam, fortasse & Vitruvium, quem sæpius, hic autem certe Anonymus sequitur, in describenda cerussæ confectioe libro 7. cap. 12. ut *sarmenta* ponit, sic vitem quoque ex qua sumi *sarmenta*, vellet, posuisse. Neque enim videtur quod Compendii Scriptor pressse quantum poterat, ut ejus instituti postulabat ratio, non omisit: id Auctor qui fufius scriberet, prætermittere debuiffe.

Hæc igitur omnia acerrimo perpendas velim iudicio tuo. Nam si forte aliquid hic esse, censeas, quod probes, vel saltem quod ad meliora cogitanda excitet; per mihi jucundum erit illi non omnino displicuisse cujus præclaris adnotationibus alterum de duobus istis Scriptoribus illustratum habemus, alterum propediem expectamus. Sin contra; non ægre feram, si tecum dixeris, Amicus meus hodie cum ab suis festus occupationibus solatium quæreretur, nec prorsus tamen otiosi vellet, fecit quod in Cranio olim Diogenes; versavit dolium. Vale, & me, quod facis, redama.

Pridie Idus Novembres MDCC LXI.

# AB JO. BAPTISTA MORGAGNO

*Laudationes habitæ olim, cum Gymnasiarchas, aliosve Doctoris Insignibus exornaret.*

Qui sibi proponi ad laudandum malunt plenam potius, & uberem, quam tenuem, jejunamque materiam, næ illi cito sententiam mutarent, si in quo nunc ego, in eo ipsi loco versarentur. In tuam enim laudationem, Vir Illustrissime ac Generosissime, nuper in hoc Gymnasio Profyndice meritissime, in tuam, inquam, laudationem, tanquam in viam latam quandam, atque patentem ingressuro, ab initio statim hujus, hinc atque hinc aliæ, ac porro aliæ occurrunt viæ, ut quam potissimum insistere, quam relinquere sine reprehensione possim, quo magis cogito, eo magis incertus sim.

Nam principio illa tria se offerunt quasi capita laudum tuarum, te optime tibi, te optime Nationi tuæ, te optime huic demum Academiæ præfuisse.

Jam vero si illud primum arripiam, & de te adhuc privato dicere ingrediar; vide, quot in partes meam orationem diducant multæ, cæque spectatæ omnibus, virtutes tuæ, hinc pietas, hinc temperantia, hinc mansuetudo, hinc humanitas, hinc candidus, & gratus animus, & quod difficilius est, cum præclaro ingenio, acrique judicio incredibilis conjuncta modestia. Quid de illo dicam tuo inexplebili studio, atque amore veritatis? a cujus pervestigatione nullo te unquam tempore aut otium abstraxit, aut voluptas avocavit, aut denique somnus retardavit. Quin etiam instar refectionis existimans mutationem laboris, ab utriusque Partis Medicinæ consideratione ad ægros ipsos invisendos, ab his rursus ad rem botanicam, ad anatomicam, ad mathematicam, ab hac iterum ad Theoricam nostram Medicinam redibas; redibas autem? quem si dicam, quotiescunque ego sive in Gymnasio, sive domi de illa per totos tres hosce annos verba feci, toties affuisse; nihil tuæ sim diligentiae additurus, & latine sim, non oratorie, locuturus. Nam quantos in eo studio progressus habeas, & viderer mihi gratificari, si dicerem, neque ita cito transire possem ad laudum tuarum alterum caput quo me dudum tua vocat Inclyta Natio, cui egregie adeo præfuisse.

Quamquam & hic pariter tuorum numero impediior ornamentorum, atque virtutum. Nam primum me-

Morgagni Opusc.

mini, non te læta; & prospera tempore illius Muneris; sed aspera, & dura ad id capeffendum impulsisse: tuis consiliis, animique constantia, quam Amplissimorum hujus tum Gymnasii, tum Urbis Moderatorum auctoritas confirmavit, vestrum istum Cœtum ad pristinam integritatem, splendoremque rediisse: te mox ab ejusmodi Cœtu, Amplissimis iisdem Viris inde invenientibus, hinc, quod contigerat antea nemini, suffragia recensentibus, incredibili consensu præfectum cæteris fuisse. In quo quidem non tam accepisti beneficium, quam dedisti. Quippe rem communem egregie procurasti, auxisti bibliothecam, & tuos (quod caput est) Germanos in optimis studiis, cæterisque virtutibus tui similes aut servasti, aut effecisti. Dum te enim imitari, te subsequi student, ideo omnes mores eosdem, quia omnes tuos habent. Quo uno factum est, ut cum & ipsis, & omnibus sis carissimus, æternumque desiderandus; non tamen, etsi Munere te abdicasti, aut ab illis, aut ab hoc Gymnasio desidereris.

Cujus tu Magistratum (quod de tribus caput erat postremum) ut merueris, ut ceperis, ut gesseris, quis possit digne oratione complecti? Ego sane, cui sicut ab initio dixi, tuæ laudationis difficilius est exitum, quam principium, invenire, satis habeo hæc quoque carptim, breviterque perstringere, hic etiam commemorantis, quod vix possum, quam laudantis, quod pro meritis nullo modo possum, similior. Magistratum sic gessisti, ut unus ex Veteribus illis, & Priscis, consilio, diligentia, integritate, & difficillimis temporibus prudentia, ac dexteritate singulari. Magistratum sic cepisti, ut in novo Honore nihil præter nomen, & insignia novum fuerit. Primus tu tuitulis, & fascibus; ac modestia, studio, & erga Professores tum singulos, tum universos reverentia par cæteris: & hoc tantum cæteris major, quod melior.

Magistratum denique sic meruisti, ut qui maxime. Nam si, ut Plinius inquit, tunc verissime iudicatur, meruerit quis Honorem, necne, cum adeptus est; quanto de te facilius iudicium homines fecerunt, cum gesseris! Fecerunt autem honestissimum de te iudicium cum cæteri omnes, tum non ita pridem Viri

E

Gra-



Gravissimi, Amplissimi hujus Gymnasii Moderatores, hodie vero Celeberrimum hoc, Sapientissimumque Collegium. Illorum igitur perhonorificis Litteris, horum autem cunctis suffragiis, ceu auspiciis optimis praeuntibus, injuncto mihi extra ordinem munere nunc fungor, & *Doctor. Pileo &c.*

Quod reliquum est, Deum O. M. veneror, ut te semper tui esse similem, velit, utque his praeclaris initiis reliquae tuae vitae partes respondeant. Hoc majus precari nihil possum.

Quae ab Deo O. M. diu multumque duo sum precatus, alterum, ut Germanorum Inclyta Natio, quae Academiae huic nostrae magno semper ornamento fuit, pristinum ad numerum, splendoremque rediret, alterum, ut quorum ego amore, atque officiis auctus ornatusque essem, iis aliquam referre gratiam possem; ejus utriusque voti cum me esse compotem factum, vehementer gaudeo, tum vero per te esse factum, Illustrissime, ac Generosissime Profyndice, magis gaudeo, & incredibilem in modum laetor.

Quod enim hoc anno Cœtus iste vester nobilissimus frequentia lectissimorum Adolescentum, huc ex omnibus Germaniae partibus confluentium, tanta floruerit, quantam intra plures annos fuisse, non memini; id nimirum non tam Magistratus tui felicitati, quam assiduitati, diligentiae, nomini, cæterisque virtutibus, & ornamentis tuis acceptum est referendum.

Dici enim non potest, ad illam rem quam utile fuerit, te nunquam hinc sive commodi, sive negotii causa secessisse; contra assidue diligenterque praesto semper fuisse iis qui advenirent, benigne excipiendis, qui praetergressuri fortasse erant, blande retinendis, utrisque pariter fovendis, protegendis, juvandis.

Neque dubium est, quin huc aliquos ipsa tui nominis notitia adduxerit. Multi enim te noverint, necesse est, qui in Herbipolitana, Ingolstadiensi, aliisque Germaniae Academiis tuae istius indolis, quae sa-

ne est magna, & ingenii, quod erectum, atque acerrimum obtigit, specimina edideris.

Aliis autem quibus minus forte per te ipse notus esses, Amici, Affinesque tui Viri Ornatissimi, & non una in Civitate Spectatissimi, ignotum esse, non sinebant.

His cum tu curis, atque ornamentis vestrum istum Inclytum Cœtum ad pristinam frequentiam, splendoremque revocaveris, cumque ego Germanos tuos, atque adeo nostros cum cæteris virtutibus praeditos, tum vero in primis gratissimos expertus sim; non est mihi dubitandum, quin ita ipsi omnes sentiant, nihil sibi jucundius, nihil optatius a me fieri in praesentia potuisse, quam ut laudibus tuis reliquis sepositis, in hac una insisterem, & hanc praecæteris celebrarem.

Id ipsum autem ut possem, a te mihi datum est, quando Honorum, tibi ab Sapientissimis hisce, Gravissimisque Patribus summo consensu decretorum, Insignia a me potissimum (quae tua in me semper fuit Humanitas) tradi, concupisti, Amplissimi autem, Praestantissimique Rei Litterariae Triumviri, ut tibi bene, & ex eorum sententia gesti Magistratus testimonium darent, jusserunt.

Injuncto ergo extra ordinem munere jam fungens, *Doctor. Pileo &c.* Faxit Deus, ut cujus opera tam bene de me merita Natio rursus floruit, is ingenio, exultatione, honoribus florere nunquam desinat.

Quod posui in ea Oratione quam in Florentissimo hoc Gymnasio primam habui, non posse hominem, in Juris Prudentia rudem prorsus ac peregrinum, non posse, inquam, in Medica Facultate undique perfectum, & absolutum existere; id confirmatum nunc esse auctoritate, judicio, exemploque tuo, maxime laetor, Illustrissime, & Generosissime Prorector, & Syndice. Etsi enim de legitimo partus tempore, de notis virginitatis, de ictibus, & vulneribus, de veneficiis, de morbis vel simulatis, vel redhibitioni locum facientibus, vel tormenta quaestionesque prohibentibus, de aliisque hujusmodi sexcentis & pertæpe Medicos a Magistratibus consuli, & multo aptius, atque prudentius respondere eos qui Legum non sint ignari; etsi, inquam, id ita est per se certum, ut quod certissimum; nihil tamen novo isto exemplo tuo accidere aut opportunius poterat ad commonendum, aut efficacius ad persuadendum, aut denique illustrius ad excitandum.

Nam primum Itali quidem Medici illi Veteres, & Avorum nostrorum aequales, in hac ipsa re sibi esse elaborandum, existimabant. Hinc Fortunati Fidelis de Relationibus Medicorum, hinc Baptistæ Codronchii, & Pauli Zacchiae Methodus Testificandi, & Quaestiones Medico-Legales extitere. Nostra autem, & Patrum ætate hujus generis exempla ferme extra vestram Litteratissimam Germaniam non reperio. Vester enim Medicus fuit Joannes Daniel Horstius, qui Zacchiae Quaestiones adauxit, vester est Michael Bernardus Valentinus, qui Pandectas Medico-Legales collegit, vester est denique Joannes Bohnius, qui non solum de Vulnerum Renunciatione post vestros Corbæum, Svevum, Sebizium egregie scripsit, sed & omne Medici Forense officium complexus est.

Hoc tu usus Praeceptore ita Rei Medicæ operam dedisti, ut Juris Scientiam non praetermiseris. Cui rei testimonio est primum typis edita Disputatio Medico-Legalis, quam in Celeberrima Lipsiensi Academia ante hos tres annos habuisti, doctrinæ, & æquitatis plenissimam, deinde inter eos qui in hac nostra Legum studiis operam navant, ita gestus a te Magistratus, ut magis Juris Prudentiam, an Medicam Facultatem amares, omnibus quidem dubium fuerit; quin utriusque Insignia tibi merito deberentur, nemo dubitaverit.

Quod si hoc exemplo per alium quemcunque hominem ex Germania, quo de Italia olim migraverat, tam opportune reducto æquos rerum aestimatores permoveri conveniret; quanto magis permoveri convenit, te reducente! Cum enim tu isto excellenti ingenio, isto acri judicio, ista singulari prudentia, ista praeclara eruditione instructus, domestica, atque adeo paterna institutione expolitus, in Celebris non una Germaniae Schola versatus, existimaveris tamen, eorum quæ in Medicum cadunt, officiorum te mancam quodammodo atque imperfectam cognitionem habiturum, cui Legum scientiam non adjunxisses; quisnam in posterum putet, se numeris omnibus absolutum Medicum fore, qui omnem Juris notitiam neglexerit?

Est autem exemplum hoc tuum eo etiam magis efficax, quod illustrius. Nam primum in libera, & praestantissima Urbe, nobili genere es natus, Patre Viro Clarissimo, Doctissimoque, qui Rem Physicam, atque Poeticam magna cum laude in eo Gymnasio proficitur, Confanguineis Viris Amplissimis ac Ornatissimis ex eorum Ordine qui Rem vestram Publicam administrant. Quo nisi te loco natum scire-

rem;



tē; ex moribus tamen facile agnoscerem. Ea enim humanitate, mansuetudine, gravitate, constantia, liberalitate, fide, innocentia Magistratum gessisti, ut te ad has Virtutes non doctum, sed factum, non institutum, sed generatum esse, patefeceris. Itaque plusne ornamenti Illustri huic Muneri attuleris, an acceperis, dubium reliquisti. Illud vero est certissimum, te omnium de te opinioni ita respondisse, ut si unquam alias Gymnasium hoc exoptavit, licere, ut olim, bene de se meritis Prorektoribus statuas ponere; nunc præsertim exoptet: ut Amplissimum hoc, Gravissimumque Collegium nunquam libentius, nunquam majori consensu suffragia tulerit: ut Illustrissimi atque Excellentissimi Rei Litterariæ Triumviri in iis quibus modo paremus, Litteris honestissimum de te iudicium fecerint: ut denique Illustrissimi at-

que Excellentissimi hujus Inclytæ Civitatis Moderatores cum pro eorum summo utilitatis publicæ studio tuas alias omnes actiones probaverint, tum hodiernam hanc præsentia sua honestare voluerint. Quibus etiam benigne annuentibus, atque auspiciis ista su semper fausta, ac felicia præbentibus, injuncto extra ordinem munere jam fungor, & Doctor. Pileo &c.

Deus O. M. qui cum Vir Clarissimus Parens tuus iisdem his Philosophicis, & Medicis Insignibus hoc ipso loco ornaretur, Majorum nostrorum votis annuit, is nostra modo rata habeat, atque adgo faxit, ut ex te nova sæpius tam opportuna, tam efficacia, tam illustria exempla prove-  
niant.

Si quantum & locus hic ad laudandum ornatus, & tu laude dignus es, Vir Nobilis, atque ex Amplissimo hoc Collegio jam pridem Philosophiæ, nunc etiam Medicinæ Doctor Meritissime; tantum mihi temporis ad commentandam laudationem dedisses; hinc non pro meritis quidem laudatus, attamen haud omnino illaudatus discederes.

Sed cum nihil ex hoc loco, & nihil item de tuis laudibus, nisi aut perfectum ingenio, aut elaboratum industria dici conveniat, ego vero si quid in dicendo possum, non ingenio, sed diligentia possum, hæc autem, nisi tempus datum sit, nihil valeat; de tuis laudibus invitatus fileam, necesse est.

Neque hæc eo dico, quod verear, ne forte ægre hoc feras silentium meum, qui contra sic exultem, me idcirco a tua modestia in has angustias temporis esse conclusum, ne quidquam huc asferre

ad laudandum possem, nisi laudandi voluntatem.

Sed eo dico, ut omnes intelligant, quid sit quod silentio cogar præmittere tuam istam singularem humanitatem, cæterosque optimos ac probatissimos mores, studia a puero in præstantissimis disciplinis, ipsaque in primis Philosophia collocata, & cætera ornamenta omnia, ob quæ ante hos tres annos in hoc Amplissimum Collegium es cooptatus, eam ipsam denique operam, quam Rei Medicæ studio dedisti, quæ quanta, & quam felix fuerit, vel hoc hodiernum horum omnium Doctissimorum Patrum honestissimum de te iudicium satis ostendit.

Nunc quando laudatione minime possum, at his saltem quibus possum, quibusque adeo summo quodam, atque incredibili Sapientissimi hujus Cœtus consensu jubeor, te Medicæ Facultatis Insignibus exornabo, &c.





# JO. BAPT. MORGAGNI

## IN SCRIPTORES REI RUSTICÆ

### EPISTOLÆ QUATUOR.

#### EPISTOLA I.

AD CELEBERRIMUM ET DOCTISSIMUM

VIRUM

JACOBUM FACCIOLATUM

JOANNES BAPTISTA MORGAGNUS.

**Q**Uæris ex me, Vir Doctissime, pluribus de locis Columellæ, ut in plerisque hujus editionibus proponuntur, quid sentiam. Ego vero & de iis, & de Palladii quibusdam, & de nonnullis etiam Varronis quid suspicer, ita scribam, ut judicium non interponam meum, sed exquiram tuum. Neque enim in Re Anatomica, aut Medica, in quibus ob assiduum, opinor, studium, susceptosque a puero labores usum aliquem habere videor, sed in media Philologia versabimur, in qua ut pene adhuc hospitem, aut certe tironem esse me, fateor; sic te esse principem, atque signiferum, negare non potes. Huc illud accedit, me præter sex, septemve illas, quas memorabo, eorum Auctorum editiones, aliam præterea vidisse nullam, cum tu in vestra ista amplissima Bibliotheca, quam utriusque nostrum Patronus Beneficentissimus GEORGIUS CARDINALIS CORNELIUS, ad scientias, bonasque omnes artes fovendas, promovendas, ornandasque natus, insigni nuper accessione locupletavit, multo plures facile habeas. Sed illud inprimis etiam inculcem necesse est, me nunquam hos Rei Rusticæ Auctores in manus summis, ut emendarem; sed cum aliud in alio inquirerem, subinde in certis, in quos incideram, locis hæsisse, itaque nunquid forte vitii, & quid subesset, sic inter legendum quæsisse, quod visum fuerat, nonnunquam, ut fit, adnotavisse. Hæc igitur quæ ne relecturus quidem fueram, nisi tu pro tua humanissima de me opinione petiisses, nunc tibi ex ordine describam, non alicujus ad sciendæ laudis gratia, sed tuæ sententiæ requirendæ.

Et primum Columella (ab hoc enim incipiam de quo tu potissimum quæsisisti; ejus autem verba, ut cæterorum quoque, adscribam fere secundum Gryphianam editionem A. 1548.; hac enim, ut multo frequentiore, contigit ut initio uterer (\*)) §. 1. Col. 1, 8, 8 & 11, 1, 21. Columella igitur postquam libro I. cap. 8, *Villicus*, inquit, *exhortandus est ad instrumentorum, ferramentorumque curam, ut duplicia, quam numerus servorum exigit, refecta, & reposita custodiat, ne quid a vicino petendum sit*; continuo hujus rei causam ita subjicit: *quia plus in operis servorum, quam in pretio rerum ejusmodi consumitur*. Quibus in verbis fieri potest ut nihil delit; si cui tamen sententia videretur paulo obscurior, quam ferat perspicui alioqui scriptoris consuetudo; animadverti unde petere verbum posset quo suppleret, illustraretque sententiam ex lib. videlicet XI. cap. 1. Ibi enim Columella ejusdem præcepti eandem causam ita proponit: *quia plus in operis servorum advocandis, quam in*

*pretio rerum ejusmodi dependitur*. Cum autem utrobique continuo addat, quibus vestibus adversus frigora; & imbres familia munienda sit, scribatque primo in loco: *pellibus manicatis, centonibus confectis, vel sagis cucullis*; in altero *pellibus manicatis, & sagatis cucullis*; scire ex te velim, utram magis probes scripturam, an utraque repudiata iis adstipuleris qui sic videntur legisse, *sagis, aut cucullis*, vel potius Ferrario nostro (de Re Velt. Part. 2. lib. I. c. 22.), qui malebat, *sagis cucullatis*. §. 2. Col. 1, 8, 19. Nam haud longe a fine ejusdem capituli, ubi scriptum est: *Fæminis quoque fecundioribus, quarum in sobole certus fuerit numerus, honorari debet, otium nonnunquam, & libertatem dedimus*; non dubito quin concedas aliquid aut addendum esse, ut exempli causa particulam *si* ante fuerit, aut delendum, velut istud ipsum fuerit, quod quidem in Juntina editione non invenio, cum meæ reliquæ constanter sic habeant, ut descripsi.

§. 3. Col. 2, 4, 9. Libro II. cap. 4. ubi præcipitur, quibus temporibus iterum, tertioque arare oporteat colles pinguis soli, cum ita legam; *de Aprili medio usque in solstitium iterandi, tertiandique. Septembri, circa æquinoctium, ac totidem operis, quot uliginosi campi, excolitur jugerum talis agri*: fateor non videre me, qui fieri potuerit, ut neque Jucundus Veronensis, neque is qui ab hoc emendatos Rei Rusticæ Auctores Venetiis (Anno 1514.) edidit, Aldus Manutius, neque Nicolaus Angelius, cujus emendationem in iisdem Auctoribus Florentiæ (An. 1521.) vulgandis secuti sunt Hæredes Philippi Juntæ, neque Colonia (A. 1536.) Joannes Gymnicus, neque Parisiis (A. 1543.) Robertus Stephanus, neque semel, iterumque Lugduni (A. 1537. & A. 1548.) Sebastianus Gryphius (horum enim utor Columellæ editionibus) fateor, inquam, non videre me, qui potuerit fieri, ut ne unus quidem horum tot, tamque exercitatorum hominum animadverterit, nisi illa distinctionis nota quæ ante vocem *Septembri* est post *æquinoctium* transferretur, duas Columellæ depravari sententias: quod non te modo, sed quicumque in ejus, ac Palladii lectione vel mediocriter versati sint, statim perspecturos esse, confido. §. 4. Col. 2, 8, 5. Sed ea tantum, quæ sunt ad finem capituli 8, legisse satis est, ut intelligatur in isto loco: *Tremellius quidem asseverat priusquam impleverit, ab avibus aut formicis sata edi, ubi æstivis serenitatibus ager aret*; non impleverit cum aliis quos modo nominavi, sed impleverit cum Angelio, esse scribendum. §. 5. Col. 2, 11, 5. Verum

(\*) Loci Columellæ hic, & deinceps indicantur, ut cæterorum quoque Scriptorum Rei Rusticæ, quemadmodum illi dispositi sunt in elegantissima horum Editione Lipsiensis Ann. 1735.



Verum ne hic quidem satis diligens fuit in eo loco de Medica herba describendo quem habemus cap. 11.

*Tardius messem primam ejus facere oportebit, cum jam seminum aliquam partem ejecerit.* Posteaquam voles teneram, cum profiluerit, defeces licet, & jumentis praebeas. Nam, ut cæteri, duo illa verba Postea quam in unum compulit non sine sententiæ obscuritate. Id enim voluit Columella quod is, qui ipsum plerumque exscripsit, cum idem præciperet de Medica, litteris mandavit, Palladius (de Re Rust. l. 5. tit. 1. f. 3.) : Prima messis ejus tardius fiet, ut aliquantum semen excutiat. Cætera vero messes quam volueris cito peragantur, & jumentis præbeantur.

§. 6. Col. 3, 2, 18. Libro autem III cap. 2, ubi de uvīs apianis hæc legimus: vini dulcis, sed capiti, nervis, venisque non apta, nisi mature lecta: pluviis, ventisque, & apibus afferunt prædam; major ista distinctionis nota, quæ ante pluviis est, ante nisi videtur transferenda. Nam cum vina ob acida præsertim corpuscula nervis officere credantur, acidiora autem sint, quo maturius leguntur uvæ; non apparet, nervis apianas non esse aptas, nisi mature legantur: contra autem præclare intelligitur, easdem pluviis, ventis, apibus esse obnoxias, nisi mature sint lectæ, propterea quia sunt præcoquis fructus, quod modo ab Autore dictum fuerat.

§. 7. Col. 3, 10, 17. Sed hæc planiora; illud difficilior, quo emendari modo possit decimum caput, quod me fateor haud semel legisse cum propter alia, tum vero ob hæc, quæ sane sunt dicta & pulcherrime, & vere f. 9. Videmus hominibus inspiratam velut aurigam reſtricemque membrorum animam, sensusque injectos ad ea discernenda; quæ tactu, naribus, auribusque, & oculis indagantur.

Linguam videlicet omisit non oscitanter, sed perite, quod ejus munus multo manifestius, quam narium, aurium, & oculorum, in tactu quodam consistat, quod nostris temporibus per ipsam quoque Anatomem est comprobatum. Et paulo post: Nec generandi quidem data est facultas manibus, aut plantis, sed quod hominibus ignotum voluit esse genitor universi ventre protexit, ut divina præditus ratione rerum æternus opifex quasi quibusdam secretis corporis in arcano atque operto sacra illa spiritus elementa cum terrenis primordiis misceret, atque hanc animantis machinæ speciem effingeret. Jam vides, opinor, quæ me hominem philosophum res induxerint ad Columellam pervolutandum; sed & alias postea memorabo.

Nunc mendum, quod huic capiti in meis quidem cunctis infedit editionibus, videamus. Eos Autor jubet in terram deponi malleolos, quos uvarum feracissimos esse, constat, tanto, inquit f. 17, magis quod compertum habeamus, naturali quadam malignitate deſciscere interdum, quamvis diligenter prolata semina, idque nobis poeta velut surdis veritatis indulget dicendo: „Vidi lecta diu, & multo spectata labore „Degenerare tamen, ni vis humana quotannis „Maxima quæque manu legeret, sic omnia satis „In pejus ruere ac retro sublapsa referri. „Quod non tantum de seminibus leguminum, sed in totam agricolationis rationem dictum esse intelligendum est.

Quid tandem, obsecro te, istis in versibus indulget nobis Virgilius? atque adeo surdis veritatis quid est indulgendum? Non contra potius inclamandi hi sunt, & clare, diserteque admonendi? Quod quidem & facere Virgilium constat, & Columellam significare credendum est. Itaque nisi tu, Vir Doctissime, dissentis, ipsum non indulget, scripsisse, arbitror, sed inculcet; quæ vox, ut vides, cum facile depravari sic potuit, tum non solum toti illi sententiæ, sed & modo quo istic Columella utitur, non indicativo, ut Grammatici loquuntur, sed subjunctivo præclare convenit: Quin etiam fortasse eo verbo voluit quodammodo indicare, sibi minime excidisse, in superiore quoque libro (cap. 9. f. 12.) eandem ab se curam in eligendis seminibus commendatam, eosdemque versus quatuor esse propositos.

§. 8. Col. 3, 11, 4. In proximo autem capite 11 aliquid deesse apparet iis in verbis: totum solum sicco fimo, aut si id non sit, alterius generis quam recentissimo stercoreari. Et si enim cum in libro 4. cap. 8. (sect. 3.) hæc legimus: aliquid fimi, vel si est commodius, columbini

stercoris; intelligere videmur, fimi nomine certum aliquid vel genus vel discrimen stercoreis a Columella significari; cum tamen priora illa omnia verba relegimus, sententiam nihilominus imperfectam deprehendimus, nisi cujus animantis siccum illud fimum esse debeat, adjiciatur.

§. 9. Col. 3, 21, 4. Et si vero in cap. etiam 21 desiderari quidpiam videtur in eo loco; Nam & paterfamilias libentius ad spectaculum rei suæ, quanto est ea luculentior, descendit, & quod de sacro numine poeta dicit, Et quocumque Deus circum caput egit honestum. Verum quocumque domini præsentis oculi frequenter accessere, in ea parte majorem in modum fructus exuberat; tamen velim consideres, possintne omnia videri integra, si ne una quidem litterula adjecta, ita scribamus, distinguamusque: honestum, verum; quocumque domini præsentis oculi frequenter accessere, in ea parte &c. aut etiam sic. honestum; verum quocumque domini præsentis oculi frequenter accessere; in ea parte &c. nam post verum satis facile est, aut est etiam, & enim ante parte intelligitur.

§. 10. Col. 4, 10, 3. In Libro IV. cap. 10. ubi legimus: Sed nec utique verno omnibus regionibus melior putatio est: nam ubi cælum frigidum est, ea sine dubio eligenda est. Ubi vero aprica loca sunt; mollesque hyemes, optima & maxime naturalis est autumnalis; equidem non modo pertinaciter non negaverim, scriptum a Columella esse verna, sed etiam hanc melius respondere agnoscam voci quæ consequitur, autumnalis. Attamen verno scribi nullo modo potuisse, non antea concedam, quam dilucide ostensum mihi sit, perperam scriptum esse a Palladio (lib. 3. tit. 12. f. 7) ubi multæ sunt vineæ dividantur, & pars earum, quæ Septentrionem respiciet, verno putetur alia pars adversa clementioribus plagis, recidatur autumnis. Nimirum videtur hic intellexisse tempore quod vel ibi fecit Columella, vel paucis quoque ante versibus, ubi legitur: Nobis neque angusta putatione coercenda semina videntur, nisi si admodum invalida sunt, neque utique verno recidenda; pro verno rescribendum est verna; nam vox quidem tempora longius abest, quam ut putem ad eam respexisse.

§. 11. Col. 4, 25, 1. Capiti autem 25 subiecta vini. toriæ falcis figura in plerisque editionibus formæ non respondet, quæ in eo capite descripta est. Securim namque (ut hoc unum attingam) ita pingunt, non ut semiformis lunæ speciem, sed ut triangulum repræsentet. Una ad descriptionem videtur accedere Juntina; Aldina enim etsi non quantum aliæ ab Juntinæ forma discrepat; in eo tamen loco securim addit, ut hæc rostro nullo modo superposita, sed omnino supposita sit.

§. 12. Col. 4, 32, 5. Sed in extremo etiam capite 32 eadem Juntina cæteris videtur esse anteposenda. Neque enim de arundinetis sic verba illa exhibet: caditur deinde post brumam. Nam usque in id tempus incrementum capit, ac tum compeſcitur, cum obrigant hiberno frigore. Fodiendum quoties & vineta; sed ad hunc modum: cum obriguit hiberno frigore. Fodiendum &c. qua postrema distinctionis nota Robertum quoque Stephanum uti video.

§. 13. Col. 5, 7, 3. Et si vero in Libro V, qui me loci, nec pauci ii quidem, morati sunt, eodem omnes modo in meis cunctis editionibus leguntur; vix tamen dubito, quin plerique saltem eorum sint aliter scribendi, velut hic capite 7. Cætera simili ratione, atque in arbusco Italico administrantur, ut vites longis scrobibus deponantur, ut eadem diligentia curetur, atque in ramis deducatur; sic potius curentur, atque in ramos diducantur, quem videlicet ad modum cum de Italico arbusco præciperet, paulo ante (cap. 6. pag. 190) dixerat: vitem in ramos diducere.

§. 14. Col. 5, 8, 3 sq. Longe difficilior mihi est alter locus ex cap. 8. Olearum, sicut vitium plura genera esse arbitror, sed in meam notitiam decem modo pervenerunt, Pausia, algiana, Liciniana, Sergia, Nevia, culminia, orchis, regia, circites, murtea. Ex quibus bacca jucundissima est pausia, speciosissima est regia, quæ potius esca, quam oleo est idonea. Pausia tamen oleum saporis egregii, dum viride est, vetustate corrumpitur. Orchis quoque, & radius melius ad escam, quam in liquorem stringitur. Oleum opti-



optimum *Licina* dat, plurimum *Sergia*: omnisque olea & major fere ad escam, minor oleo est aptior. Primum quæro an istud ultimum & inducendum sit. Quæro deinde, cur *radius* inter decem illa genera non memoretur. Nam num forte scriptura vitata sit, & pro *radius* legendum sit *regia*, ne suspicari quidem possumus, tum quia de *regia* id iterare non oportebat, quod modo traditum fuerat, tum quia *radius* inter oleas non modo Cato (de Re Rust. cap. 6. f. 1.), Virgilius (Georgic. l. 2. vers. 85.), Plinius (Natur. Hist. l. 15. c. 3.) Palladius (l. 3, 18, f. 4.) sed & Columella ipse discrete numerat libro de Arboribus cap. 17. (f. 3.). Optima est, inquit, olea *Liciniana*, *pausia* secunda oleo, *escæ* orchis. Sunt & *regiæ* & *radii*, quæ neque specie neque oleo sunt tam grata, quam quas supra diximus. Vides ut dilucide *regiam* ab *radio* distinguat. Itaque ne solertem aliqui scriptorem usque adeo immemori ingenio fuisse cogitemus, ut tanquam Curio ille pater cum decem modo proposuisset genera, undecimum addere potuisset; relinquitur, ut horum alterutrum suspicemur: scilicet aut inter illa decem genera Columella posuit *radius*, sed alio quodam nomine, ut puta *algianæ*, vel *Neviæ*; nam circitis quidem, & fortasse etiam *murteæ* eam esse figuram, vocabula ipsa indicant, ut idem ac *radius* esse non possint; reliqua autem sex genera memini simul cum *radio* legisse memorata, sic ut *radius* ab ipsis differre intelligeretur; Aut in eorum decem generum enumeratione genus aliud aliquod perperam a librariis duplicatum est, & sic *radii* nomen (quod a Virgilio, Plinio, Palladio, Columella ipso continuo post *Orchitem* subjici solet) ut *denarius* ille numerus constaret temere expunctum. Cujus suspicionis ansam dant quæ Dalechampius notavit ad Plinii caput 3. lib. 15. *Columellæ*, inquit, *olivæ* decem genera, *Pausia*, *Licina*, *Sergia*, sive *Regia*, *Radius*, *Nevia*, *Culminia*, *Corninia* Plinio, *Orchites*, *Algiana*, *Murtea*, *Circites*, *Contia* Plinio. Quod autem non sine ulla ratione scripserit *Sergia*, sive *Regia*, ostendunt hæc in eodem capite verba Plinii; *Licina*, *Cominia*, *Contia*, *Sergia*, quam *Sabini* *regiam* vocant. Num tamen *Sergia*, quam *Sabini* *regiam* vocabant, a cæteris etiam, ac præsertim a Columella eodem nomine appellaretur, plurimum dubito, quando hanc quidem inter *minimas* recenset Plinius (loc. cit.), qui non multo post *grandissimas* esse, dicit, quæ *regiæ* vocantur, ab aliis *majorinæ*, ab aliis *phauliæ*. Denique illud potissimum quæro, quomodo locus is, quem ex libro de Arboribus protuli, ita discrepet a superioris sententia, ut quod in hoc genus esse omnium speciosissimum dictum est, in eo *speciei* ipsius gratia spectata, tribus generibus postponatur. Num quod Columella, non *baccarum*, ut in priore, sed ipsius arboris speciem, pulchritudinemque respexerit? An quod irrepperit mendum aliquod? An quod liber is de Arboribus non sit Columellæ? qua de re nimirum ambigitur in illa ipsius vita, quæ a Gryphio, & Stephanano cum ejus scriptis edita est. In qua tamen de eo vicissim non ambigitur, quod multo minus certum est, Columellam videlicet scripsisse librum lustrationum sacrificiorumque priscorum pro frugibus, quem tantummodo constat promississe (lib. 2. in fine) (2, 22, 5 & 6). Sed quanquam etiam Aldus major illa ipsa de re dubitaverit (Epist. ad Lector. ante Auctores Rei Rust.), neque ego audeam quidquam certi proponere; eo tamen facilius videor animum inclinare, ut suspicer, scriptum principio fuisse hunc librum de Arboribus a Columella, ut eum locum obtineret, unde ipsum non immerito amovit Jucundus; deinde vero cum rem totam ornatus, pleniusque tractandam existimasset, pro illo uno hunc quem modo appellamus tertium, & quartum præterea, quintumque scripsisse. Quod quidem credibilis videbitur iis, qui libri secundi, nec non quarti & quinti, præsertim vero undecimi initio perlecto, plane intelligent, non simul universum hoc opus, sed per singulos pene libros a Columella fuisse vulgatum, sic ut lectorum iudiciis, & postulationibus, suoque insuper indulgens proposito totius Rei Rusticæ disciplinæ, quoad ejus fieri posset, cumulatissime absolvendæ, sæpe in posterioribus discrete tueretur, nonnunquam et-

iam iteraret, illustraret, augeret, perficeret; quæ in superioribus præceperat voluminibus. Verum sive liber is Columellæ est fufius rescribere meditantis, sive alterius qui hujus præceptiones fere describere, & strictim sæpe, nonnunquam aliquanto pluribus verbis tradere instituerit; sane cum pleraque præcepta atque adeo verba in eo libro, atque in hoc præsertim quinto, eadem esse, animadvertam; haud inutile fore, censeo, ut loci omnes qui sibi in utroque respondeant, inter se comparentur, deturque opera, ut quæ forte alterutro in libro vitata sint, alterius ope restituantur. Ego aliquot exempla proferam; tu pro tua prudentia, quid sit faciendum, constitues. §. 15. Col. 5, 10, 7 In libro hoc quinto cap. 10. sic legimus: Sed antequam arbusculas transferas, nota quibus ventis antea fuerant constitutæ, postea manus admoveto, ut de clivo & sicco in humidum agrum transferas. Quo in loco si qui sint qui existiment, *clivo*, & *sicco* non satis humidum agrum respondere, quærantque ideo quid deesse possit; inspiciant hi comparem locum in lib. de Arboribus cap. 20. (f. 2.) Priusquam arbusculas transferas, rubrica, vel alia qualibet re signato, ut iisdem ventis, quibus ante steterunt, constituas eas, curamque adhibeto, ut ab superiore & sicciore, & exiliore in planiorem, humidiorum, pinguiorem agrum transferas. Sane etiam Palladius, qui plurimum, ut supra dictum est, sequi Columellam solet, ita de re hac scripsit (lib. 3. tit. 19. f. 2.): Plantas similiter notabimus, ut ipsis, quibus steterant cardinibus opponamus. De clivo, sicco, & exili in planum, pinguem, & humidum transferemus: quibus tamen in verbis an vox agrum, aut alia ejusmodi desideretur, videndum est. §. 16. Col. 5, 10, 12 Sed multo magis videndum est, quæ in eodem Columellæ cap. 10. non multo post habentur: Nucem Græcam serito circa Cal. Februar. quæ prima gemmascit: agrum durum, calidum, siccum desiderat; non modo an aliter distinguenda sint, verum etiam, idque maxime, an ex iis sint emendanda, vel potius esse usui debeant in iis emendandis, quæ libro de Arborib. leguntur cap. 22. (f. 1.) Nucem Græcam serito Arcturi signo, vel circa Calend. Febr. quæ pruina nescit. Agrum calidum, durum, & siccum desiderat. Nam alterutro in loco ob literarum similitudinem videntur librarii aut ex pruina nescit effecisse, prima gemmascit, vel ex prima gemmascit, pruina nescit. §. 17. Col. 5, 10, 13 In his autem verbis quæ paucis post versibus utroque in loco sequuntur, in primo quidem sic: Omnis autem nux unam radicem mittit, & simplici stylo proreperit. Cum ad scrobis solum radix pervenit, duritia humi coercita recurvatur, & ex summo duum ramorum ambas radices emittit; in altero autem ad hunc modum: Omnis nux unam radicem mittit, & simplici stylo proreperit. Cum ad scrobis solum radix pervenit, duritia humi coercita recurvatur, & extensa in modum ramorum alias radices emittit. Vix dubitare posse videor, quin hæc; extensa in modum ramorum alias, ita a librariis priore in loco vitata sint, ut nata videlicet sint ista: ex summo duum ramorum ambas. §. 18. Col. 5, 10, 15 Eodemque in loco cum paulo infra de malis punice sic legam: nos exiguum admodum laseris vino diluimus, & ita cacumina arboris summa oblevimus. Ea res emendabit acrorem malorum, eo facilius crediderim, legendum esse emendavit, quod in libro de Arboribus cap. 23, f. 1 eadem omnino verba comperio, nisi quod pro emendabit revera scriptum est emendavit; & pro laseris, laser Cyrenaicum. §. 19. Col. 5, 10, 17 In iis tamen, quæ mox subjiciuntur de piro, primo quidem in loco sic: juxta ipsam radicem truncum findito, & fissuram cuneo tedæ pinæ adigito, & ibi relinquito; in libro autem de Arborib. cap. 24. paulo aliter: juxta ipsam radicem truncum findito, & in fissuram cuneum pineum tedæ adigito, & ibi relinquito; vide an aliquid ex utroque loco sumendo, utrumque præstet ita rescribere: & in fissuram cuneum tedæ pinæ adigito. §. 20. Col. 5, 10, 19 Nam quod priore in loco paulo post sequitur: mala, sorba, pruna post mediam messem usque in Idus Febr. serito, emendandum omnino esse ex libro de Arborib. cap. 25, 1. Mala æstiva, cydonea, sorba, pruna, post mediam hiemem usque



que in Idus Febr. serito, eo credibilis est, quod Palladius ( Jan. 15, 1 Febr. 25, 13 Sept. 14, 1 Nov. 7, 13 ) et si pro alia locorum temperie alios etiam menses memorat, quibus forba, mala, pruna serantur; id tamen tempus, quo messis habetur, aut ipsi proximum memorat nunquam. Quod si haud inutilem fuisse existimas inter superiores locos utriusque libri comparationem institutam; multo utiliore fortasse existimabis, quam inter duos, qui proxime consequuntur, instituamus. §. 21. Col. 5, 11, 5 In ejusdem enim libri 5 capite 11 scriptum est ad hunc modum:

*Ea autem fine, qua adraferis, surculos sic inserito, ut semipede, nec amplius de arbore extent, supra deinde muscum imposito, & ita ligato, ne pluvia dilabatur.* Locus autem, qui in lib. de Arborib. cap.

26, f. 4 huic ipsi, ut superiora etiam, ac consequentia manifesto commonstrant, loco respondet, sic habet: *Ea autem fine, qua adraferis, surculos demittito ita, ut sex digitis de arbore extent. In una autem arbore duos aut tres ramulos figito, dum ne minus quaternum digitorum inter eos sit spatium.*

Pro arboris magnitudine, & corticis bonitate hæc facito. Cum omnes surculos, quos arbor patietur, demiseris, libro ulmi, vel vimine arborem astringito: postea paleato luto bene subacto oblinito totam plagam, & spatium, quod est inter surculos usque eo, ut duobus digitis insita extent: supra lutum muscum imposito, & ita obligato, ne pluvia dilabatur.

Vides ut plura in hoc altero quam in priore loco tradantur: quæ ne consulto ab Auctore omissa, sed potius ab oscitantibus librariis negligenter præterita esse, putemus, cum res ipsæ per se docent, tum vero id commonet, quo nihil facilius est factu, ut videlicet ab illo primo extent ad hoc secundum extent temere, ut sit, in describendo delapsi, plures interjectos versus iisdem, aut fere iisdem verbis eadem præcepta continentes, transilire, primo illo in loco potuerint. Sane in idem ferme erroris genus eosdem incidisse in libri etiam XI. capite 2 describendo, ex vetustis codicibus intellexit Robertus Stephanus ( in fine Oper. Columell. ) sed ne longius a proposito loco deflectamus; Palladius quoque, Columellam, ut sæpe diximus, plurimum sequens, cum de hoc eodem insitionis genere præciperet, hæc minime prætermisit: ( lib. 3. tit. 17 sect. 2 sq. )

statim surculum mergimus una parte decimus salva medulla, & cortice partis alterius, qui supra arborem sex vel octo digitis emineat. Duos vel tres vel plures surculos pro trunci qualitate constituimus: quaternis digitis ( an quaternos digitos? ) vel amplius inter eos spatium relinquimus: tunc junco, aut ulmo: aut vimine stringimus, & supra lutum musco tectum ponemus, ac ligabimus &c. Illud unum dissimulare non possum, dubitasse me an integrum sit verbum illud ultimum dilabatur. Cum enim veniebat in mentem, Columellam lib. IV. cap. 29 f. 8 de vitis insitione scripsisse: fissura diligenter subacto luto linitur, atque superposito musco ligatur, quod & calores & pluvias arceat, non dilabatur, sed illabatur scribendum esse, suspicabar, præsertim cum etiam Cato post peractas insitiones sic præcipiat: ( cap. 41 f. 4. ) insuper lingua bubula obtegito, si pluât, ne aqua in librum permanet. Cum autem de eadem re in lib. de Arborib. cap. 8 f. 2 hæc legem; quidquid inferueris viti, diligenter libro ligato, atque luto subacto paleato illinito, operitoque plagam, & ita alligato, ne aqua, ventusve penetrare possit: deinde supra lutum muscum imposito & ita religato: ea res præbet humorem nec inarescere sinit; tum vero qua ratione servari quadantenus posset vulgata scriptura, intelligebam. Sed de hoc tu, Vir

Cl. constitues, ut de his quoque duobus locis, quos cum inter se utroque in libro comparaverimus, protinus ad VI. librum transibimus. Hæc igitur in V.

§. 22 Col. 5, 11, 7 Paulo post consequuntur: medium truncum acuto scalpello permodice findito, ita ut fissura digitorum trium sit in ea: deinde cuneum, quo diducatur, inserito. At quanto melius in libro de Arborib. cap. 26 f. 6: medium truncum acuto scalpello modice findito, ita ut fissura trium digitorum sit.

In eam deinde cuneum, quoad patietur, inserito. Pariter primi, atque alterius generis insi-

tionis descriptione absoluta, cum de tertio nondum fieri cœpta sint verba, illic quidem ita scriptum est: Hoc tertium genus insitionis, cum sit subtilissimum, non omni generi arborum idoneum est; hic vero omissa, ut decebat, prima illa vocula: ( ibid. ) Tertium genus insitionis, cum sit subtilissimum &c.

§. 23. Col. 6, 2, 8 Libro VI. cap. 2 curandum ne in domitura bos calce, aut cornu quenquam contingat: nam nisi hæc caveantur, nunquam ejusmodi vitia, quamvis subacta, eximi poterunt. Suspicio legendum esse, quamvis subacto, hoc est domito; hic enim, ut est perspicuum, docet quomodo juvencos, qui de grege feri comprehenduntur, subigi conveniat ( f. 1. )

§. 24. Col. 6, 5, 3 Videndum autem censeo, an unum, & fortasse etiam alterum verbum inducendum, aut quid aliud faciendum sit in eo loco capitis 5. Tum paribus cassia, myrrhae, & thuris ponderibus, ac tantundem sanguinis marinæ testudinis miscetur potio, cum vini veteris sextariis tribus, & ita per nares infunditur. Atque utinam Vegetius, qui plura, ut nosti, ex Columella descripsit, non hæc divulsisset ( Artis Veterin. l. 3 c. 2 ) facile ex illo conjiceremus, quid in his verbis agendum esset, ut certe conjicio quid agendum sit in iis quæ proxime consequuntur: Sed ipsum medicamentum ponderis sex uncia divisum, portione aqua per triduum cum vino dedisse sat erit.

Cum enim Vegetius de sanguine marinæ testudinis cum vino per os dando scripsisset, hæc subjecit ( ibid. )

Pulverem & cassia fistulæ, nec non etiam thuris pro aqua parte admisces, ex eo unam semis unciam cum sextario vini veteris in die per nares bovis infundis. Quod medicamentum per triduum facies; unde proclive est colligere, ita scriptum esse a Columella vel numerorum notis indicatum: pond. sex uncia.

§. 25. Col. 6, 6, 4 Capite autem insequenti voculam deesse suspicio eo in loco: Ubi nec medicina processit. Nam cum paulo etiam supra medicina alia proposita sit, deinde, nonnullis de chirurgico auxilio interjectis, hæc altera medicina, & post hanc porro tertia imperetur, videtur fuisse scriptum fortassis: Ubi nec hæc medicina processit.

Neque enim istarum minus profecto gratum duarum vocularum concursum declinare voluisse credendus est, qui modo scripserat: Si nec hæc profuit res, atque alibi etiam ( l. 12 c. 1 f. 2 ): sed nec hæc tantum &c. ( lib. 12 c. 52 f. 1 ) si nec hæc fuerit &c. Illud accedit, verba quæ apud Vegetium illis Columellæ respondent, hæc esse ( ib. c. 3 ) si ista non valent: Vides, ut post illos superiores hunc etiam aditum aperire coner ad Columellam emendandum. Neque enim inficior, verum esse quod Reinesius ad Daumium scripsit ( ep. 121 ): Vegetium Columellæ exscriptorem esse, & ad eum esse exigendum; imo cum hæc ponam, illud adjicio, esse tamen, ubi vicissim Columella ad Vegetium exigi possit, quod fortasse in aliis capitibus luculentius ostendam. §. 26.

Col. 6, 6, 5. Nam quæ in hoc ipso 6 capite legimus: Sunt & ante detractionem sanguinis illa remedia, tribus heminis vini tres unciae pinsiti allii permiscuntur, & post eam potionem ( bos ) currere cogitur. Vel salis sextans cum cepis decem conteritur, & admisto melle decocto &c. apud Vegetium quidem ita proposita inveniuntur ( loc. cit. ): Ante detractionem tamen sanguinis adhibentur ista remedia: tribus heminis vini, quatuor uncia contriti olei permiscuntur, postque potionem cogetur currere: duæ quoque uncia salis cum decem unciis ceparum arteruntur: mel quoque decoctum admiscetur &c.

Ego vero ita hic Vegetium ad Columellam exigendum esse, non dubito, ut pro contriti olei, contriti allii reponatur; imo et si aliquos exillere posse video, qui vicissim quærant, an apud Columellam non cum cepis decem sed cum ceparum dextante legendum sit, librariis videlicet in numerorum notis intelligendis facile deceptis; ego tamen re ipsa, & verbis quæ apud Vegetium consequuntur, perpenis, hunc potius ex Columella emendandum in hac quoque parte, existimaverim, ut plerisque præterea in locis, quos collatis utriusque tum his, tum insequentibus paginis, nullo negotio proferre possem, nisi emendatos jam



jam putarem ab his, qui Vegetium post A. 1528. (ejus enim anni tantummodo exemplar habeo) typographis tradidere. Itaque nunc tantum de Columella emaculando videamus. Quem si in iis tot locis, quos supra ex lib. V & VI produxi, quamvis in meis omnibus editionibus ad eundem modum scriptis mendis tamen inquinatum esse, credidi; quanto magis esse credam in extremo capite 8. (quod me fateor non intelligere) *Sed hoc his solum fastidium est; cum Juntina editio non est hic habeat, sed tollunt?* §. 27. Col. 6, 10, 2. Minusque pariter dubitabo, quin capite 10, ubi legimus: *Porri etiam succum oleo, vel ipsa fibra cum ordeacea farina contrita remedio est; rescribendum sit: succus cum oleo, quando Rob. Stephanus ita scripsit: succus oleo, praesertim cum Vegetius quoque hac ita verba descriperit (ibid. c. 4) Porri etiam succus expressus cum oleo & ipsi febrim cum hordeacea farina remedium praestant: quo etiam ex loco erunt fortasse, qui cogitent, an alia in Columella emendanda sint; sed his ego non ita facile adstipulabor.* §. 28. Col. 6, 17, 1. Contra autem menda quae initio capitis 17 in meis omnibus libris insedere, experiar an possim tollere Vegetio adjutore. Id caput sic incipit: *Est etiam mortifer iis (bobus) serpentis ictus, est & magnorum animalium noxium virus: nam & viperam, & caecilia saepe cum in pascua bos improvide percubuit, laceffita onere morsum imprimit. Musque araneus, quem Graeci σκντάλην appellant, quamvis exiguis dentibus, non exiguum partem molitur.* Hac ita Vegetius (ibid.) *Serpentis quoque ictus mortiferus est bobus, sed & minorum animalium noxium virus.* Nam vipera & celicia cum in pascuis bos improvide supercumbit, stimulo morsus imprimunt. *Araneus quoque, quem Graeci migaltem appellant, parvi quidem corporis non parvam solet inferre perniciem.* Hic si Vegetium ad Columellam rite exigere velimus; unum emendabimus verbum & pro celicia scribemus caecilia. At si Columellam ad Vegetium; duo facile corrigemus. Nam pro magnorum reponemus minorum; neque enim magnum ullum hoc in capite virulentum animal memoratur: & pro σκντάλην, quod quidem apud Graecos, non muris aranei, sed serpentis nomen esse, scio, μυγάλην, quod apud ipsos, ut praclare nosti, muris aranei nomen est, vetustis insuper libris, ut Rob. Stephanus observavit (in fine Oper. Columellae) auctoribus, rescribemus. Praeter quae an in pascua sic itidem mutare oporteat, in pascuis, videndum est. §. 29. Col. 6, 17, 3. Sed & paulo infra juvat utriusque Auctoris verba comparare. Columella: *Hujus herbae succus vino mistus infunditur faucibus, atque ipsa folio cum sale trita malagmatis more, scarificationi intenditur: vel si hanc herbam viridem tempus anni negat, semina ejus collecta, & laxigata cum vino dantur potanda.* Vegetius (loc. cit.): *Hujus herbae succus cum vino faucibus infundatur, atque ipsa folia cum sale trita imponantur in plagam.* Quod si viridem minime reperiunt, semina ejus collecta & trita dantur ad potandum cum vino. An folio -- intenditur (Gymnicus scripsit foliis, ceteri, in quibus Gryphius etiam ipse in prior editione, folia -- intenditur) omnino mutandum sit in folia intenduntur, quaeri potest; certe vivo, quod Aldi, Gymnici, Stephani, & Gryphii postremum quidem exemplar proponit, in vino mutandum est. §. 30. Col. 6, 17, 5. Mox etiam hac Columella: *Vel si id non adest, humorque ostendit injuriam dentium (muris aranei) cuminum conteritur, eique adjicitur exiguum picis liquida, & axungia, ut lentorem malagmatis habeat.* Id impositum perniciem commovet. *Vel si antequam tumor discutiatur, in suppurationem convertitur, optimum est ignea lamina conversionem rescare, & quidquid vitiosum est, inurere &c.* Sic autem Vegetius (ibid.) *Quod si non fuerit contritum cuminum cum picula & axungia, ut similitudinem malagmae habeat, impositum plagae perniciem submovet.* Quod si antequam tumor discutiatur, suppuratio fuerit generata, optimum est ignea lamina vel cauterio collectionem aperire, quidquid vitiosum est, inurere &c. Hic quaero abs te, Vir Doctissime, non illud, an Columellae scriptura utcumque defendi possit? sed illud tantum,

malisne credere, scriptum esse a Columella, perniciem commovet, quam perniciem submovet: conversionem rescare, quam collectionem (haec enim vox tumorem etiam, ut nosti, ac vomicam Latinis scriptoribus significat) rescare? Sane Gymnicus; credo, quod ibi vocem istam conversionem haud probaret; quod rescandum esset, intelligi maluit, quam ponere, scripsitque ideo, lamina rescare. Est etiam aliquid, quod et si a Vegetio non indicatur, minus tamen rectum esse, suspicor in primis ipsis Columellae nostri verbis: *Vel si id non adest, humorque ostendit injuriam dentium; videtur enim legendum, tumorque ostendit, tum quia id consequitur: antequam tumor discutiatur: tum quia haec antecedunt: Caeciliae morsus tumorem, suppurationemque molitur.* Idem facit etiam muris aranei. §. 31. Col. 6, 24, 2. Levius est quod in capite 24 notavimus; sed & sententiam magis corrumpit, & mirandum magis est, ne id quidem ab ullo eorum qui editiones has nostras procurarunt, esse animadversum, videlicet haec verba: *quod si aut faemina recusat, aut non appetit taurus eadem ratione, qua fastidientibus equis mox praecipiemus.* Elicitur cupiditas &c. ad hunc modum esse distinguenda: -- praecipiemus, elicitur cupiditas &c. §. 32. Col. 6, 26, 2 & 3. Cum autem saepius legerim capitis 26 illam partem: *apprehendere testium nervos, quos Graeci κριμασπας ab eo appellant, quod ex illis genitales partes dependent, quibus comprehensis statim testes ferro rescare, & expressos ita rescindere, ut extrema pars eorum adhuc praeclatis nervis relinquatur.* Nam hoc modo nec eruptione sanguinis periclitatur juvenis, nec in totum effeminatur adempta omni virilitate, formaque servata maris generandi vim deposuit, quam tamen ipsam non protinus amittit. Nam si patiaris eum a recenti curatione faeminam inire, constat ex eo posse generari. Sed minime id permittendum, ne profluvio sanguinis intereat: verum vulnera ejus sarmentitio cinere cum argenti spuma linenda sunt, abstinentisque eo die ab humore &c.; cum ergo saepius hac legerim, dubitare coepi, non a recenti curatione, sed a recenti castratione esse legendum, cum ob alia quae vel nota sunt, vel ex verbis consequentibus apparent, tum quia Palladius, qui, ut alibi etiam diximus, fere solet Columellam exscribere, illa eadem priora proponens, hac subdit (l. 6. tit. 7. f. 2) *nec admittendum est, quod plerique faciunt, ut statim castratos coire compellant, nam certum est ab eis generari, sed ipsos fluxu sanguinis interire.* Vulnera vero castratione cinere sarmentorum, & spuma linentur argenti -- Castratus abstineatur a potu &c. Sed & M. Varro (de Re Rust. l. 2. c. 5. f. 14.) exemitis, inquit, testiculis, si statim admiseris, concipere. Quod si forte quaeras, cur saepius illa, ut dixi, relegerim; memoria repete, quantum me Anatomes, & Chirurgiae delectet historia, cujus videlicet gratia non hac modo, quae qualiacunque sunt, instituto tamen subserviunt meo, verum alia quoque magna cum voluptate apud Columellam me legisse confiteor, velut hac proximo libro VII cap. 9. (f. 5) *Faeminis quoque (Scrofis) vulvae ferro exulcerantur, & cicatricibus clauduntur, ne sint genitales; capite autem 11 (f. 2) alteram illam speciosiore, sed magis periculosam castrationis suum rationem: cum virilem partem unam ferro resectam detraxeris, per impressum vulnus scalpellum inferito, & mediam quasi cutem, quae intervenit duobus membris genitalibus rescindito: atque uncis digitis alterum quoque testiculum educito, sic fiet una cicatrix &c.* Vides, ut jam tum nosceret membranam interurram, quae testem in modum sive communis septi, ut Recentiorum Anatomicorum quidam contendunt, sive peculiaris sacculi, ut alii docent, trajectam. Sed neque ignorabat peculiarem illam quam Chymici inculcant ad praeparanda medicamenta fimi vim atque utilitatem: nam libro eodem capite 5 hac scripsit (f. 8) *oblutum vas in sterquilinio defoditur, ac toto anno fimi vapore concoctum, mox promitur: tepesactumque medicamentum linitur &c.* Neque tandem cum in hoc ipso libro VI cap. 16 scripsisset (f. 2) *solere neglecta ulcera scatere vermibus, illud praecipere omisit, quanam circum ulcera adhibenda sint medicamenta, ne infestentur a muscis, quae ubi, inquit, ulceribus in se,*



insederunt, vermes creant. Sed nunc quidem, hisce præteritis, suspectos locos memorare pergamus.

§. 33. Col. 6, 27, 10 Capite 27 ignobilis quoque vulgaris elicit cupiditatem &c. Videtur & deesse, aut alia ejusmodi vocula, quæ videlicet duo illa adjectiva colliget, ut cap. 37 ( f. 9 ) degener, & vulgaris asellus itemque initio Libri VII vilis hic vulgarisque asellus. §. 34. Col. 6, 30, 6 Capite 30 & ne plus justo exinaniatur, sterco ipsius jumenti fluentibus venis ad motum fasciis obligetur. Etiam si Vegetius ( l. 2 c. 45 ) hunc ipsum locum non sic descripsisset: quod si plus profluat ( sanguis ) quam necesse sit, sterco ipsius jumenti fluentibus imponitur venis & fasciis alligatur; tamen mirum fuisset, neminem eorum qui mea Columellæ exemplaria edidere; si Rob. Stephanum excipias; animadvertisse, scribendum esse *admotum*. Sed tamen magis mirum est quod protinus notabitur.

§. 35. Col. 7, 1, 2 Libro enim VII cap. 1 in his verbis: *Hujus animalis tam exiguae tutelæ plurima & necessaria opera supra portionem respondent, tum & facilem terram qualis in Batica totaque Lybie sit, levibus aratris proscindat, & non nimio pondere vehicula trahat.* Sape etiam &c. ne Stephanus quidem animadvertit, non *tum & facilem*; sed *cum & facilem* esse legendum. §. 36. Col. 7, 3, 3 Neque item cap. 3 in iis, quæ de maxime probato ariete conscribuntur: *intortis cornibus, non quia magis hic sit utilis ( nam est melior mutilus aries ) sed quia minime nocent.* Intorta potius, quam surrecta & patula cornua, quibusdam tamen regionibus &c. nisi quid aliud insit vitii, hanc distinctionem convenire: --- quia minime nocent intorta potius, quam surrecta, & patula cornua.

§. 37. Col. 7, 3, 4 Paulo autem infra, ubi scriptum est; --- *mutilum probabimus marem, quoniam est illud incommodum in cornuto, quid cum sentiat se velut quodam naturæ loco capitis armatum, frequenter in pugnam procurrit; mendum certe inest: quod qua ratione tollendum esset, difficile foret divinare, nisi Cl. Drackenborchius ( ad Silii Italici Punic. lib. 7 vers. 566 ) nuper monuisset, in veteri codice ita scriptum esse: quodam naturali telo capitis armatum &c.* §. 38. Col. 7, 3, 15 Porro in eodem 3 capite deesse aliquid crediderim, ubi agitur de gregis numero supplendo.

Quod ut melius possit intelligi, totus describendus est locus: nec committi debet, ut totus grex effectus senectute dominum destituat: cum præsertim boni pastoris vel prima cura sit, annis omnibus in demortuarum vitiosarumque ovium locum totidem, vel etiam plura capita substituere, quoniam saepe frigoris atque hiemis sævitia pastorem decipit, & eas oves interimit, quas ille tempore autumnii, ratus adhuc esse tolerabiles, non submoverat: quo magis etiam propter hos casus, nisi validissima, quæ non comprehendatur hieme, novæque progenie repletur numerus, quod qui faciet &c. Scilicet deesse videtur particula non legendumque non nisi validissima. §. 38. Col. 7, 6, 7 Fidentius vero in his capitis 6 verbis: *Parit autem, si est generosa proles, frequenter duos, nonnunquam trigeminos.* Pessima est fætura, cum matres bimæ ternos hædos efficiunt; hic, inquam, fidentius non bimæ, sed binæ scribendum esse, asseruerim, quod etsi quinque reliquæ editiones repugnent, at illam saltem mecum facere invenio, quæ ab Joanne Gymnico est procurata. §. 39. Col. 7, 6, 9 Illud tamen, quod in hac & ceteris paulo infra neglectum est, leve sit licet, omittendum non putaverim, videlicet ut in iis, quæ de magistro capri ni pecoris præcipiuntur: *per rupes, per solitudines, per vepres facile vadat, & non ut alterius generis pastores sequatur, sed plerumque ut antecedit gregem; nota aliqua distinctionis collocetur inter pastores & sequatur.* §. 40. Col. 7, 8, 7 & 7, 12, 12 Sed in extremo capite 8. Est etiam ( caseus ) non ingrati saporis muria perduratus, atque ita maligni ligni, vel culmi fumo coloratus; cum Juntinum exemplar, non maligni habeat, sed malini, quæro ex te, utrum hanc omnino censeas accipiendam esse Scripturam. In hoc autem loco ex cap. 12 semper & lac, & spiritus maternus longe magis ingenii, atque incrementa corporis augeat; putas ne omnia recta esse, & Morgagni Opusc.

ne ullum quidem verbum in non suam sedem esse transpositum?

§. 41. Col. 8, 2, 10 VIII Libri capite 2 *Vasta fœmina & frequenter horrentibus plumis hirta: robusta crura, nec longa &c.* Permirum est, in nullo meorum exemplarium scriptum esse *fœmina*; fœmina enim modo descripta, nunc qualem gallinaceum marem probet Auctor ostendit, Varronem secutus, cujus hæc sunt ( de Re Rust. l. 3 c. 9 f. 5 ); *fœminibus pilosis, cruribus brevibus.* Res ita perspicua est, ut quocunque modo scripta vox illa neminem morari posse videatur. Sed tamen Philippus Beroaldus ob ejusmodi scripturæ incuriam in Apuleii, Scriptoris alioqui nocturna, diurnaue manu ab ipso versati, loco quodam proponendo incredibilem in modum deceptus est in suis Columellæ enarrationibus ( ad vocem *Glaber.* ) *Glabella*, inquit, *fœmina decenter dicitur Apulejo, cujus corpus est lavigatum, politum, nulloque pilo hispidum; cum Apulejum ( Metamorph. l. 2 ) quidem non glabella fœmina, ut in Juntinō ( A. 1522 Florentiæ ) etiam exemplari est, sed glabella fœmina scripsisse, ex proximis verbis intelligatur, ut non Phoridem, sed ejus fœmina, vel id potius, qui fœmina erat, glabellum dixerit; quamobrem Elmenhorstius ( Emendation. ad l. 2. Metamorph. Apul. pag. 122 v. 11 ) non conjecturam modo Lipsii, sed & Florentini codicis auctoritatem sequi se posse, existimavit, & glabellum ibi fœmina scribere.* §. 42. Col. 8, 4, 1 & 8, 5, 5 sq. Capite 4 *excreta tritici minute commode dantur;* An Juntinam sequi editionem præstat, & reponere *minuta*? Capite 5 *gallinæ incubare cupiunt, ab Idibus Januariis, quod facere non omnibus permitendum est, quoniam quidem novellæ magis edendis; quam excubandis ovis utiliores sunt: & mox iterum:*

*Aliæ melius excubant, aliæ editos pullos commodius educant.* At e contrario quædam & sua & aliena ova comminuunt. An incubandis & incubant rescribendum est? §. 43. Col. 8, 17, 4 Capite 17 quo loco agitur de marina aqua tum in piscinam inducenda, tum submovenda: *Nec dubium, quin quanto magis imo mari venit unda, tanto sit frigidior, quod est aptissimum nantibus.* Sin autem locus ubi vivarium constituere censemus, pari libra cum aquore maris est, in pedes novem defodiatur piscina, & infra duos a summa parte cuniculus rivi perducatur, curandumque est, ut quam largissime veniant, quoniam modus ille aquæ jacentis infra libram maris non aliter exprimitur, quam si major recentis freti vis inceserit, legemusne: ut quam largissime veniat?

§. 44. Col. 9, 3, 2 Libro IX cap. 3 Columella memorat nonnullas ( apes ) minimas, gracilesque, & acuti alvei ex aureolo, varias &c. Videtur antiquo more scribendum, *acuti alvi, ex aureolo varias &c.*

& tamen nostri omnes, præter Stephanum, ita distinguunt, ut primo proposuimus; *alvei* vel ipse Stephanus scribit. §. 45. Col. 9, 4, 4 Cap. 4 *At in hortensi lira confita nitent candida lilia, nec his sordidiora leucoja, tum punice rose, luteolæque, & Sarranæ violæ, nec minus cælestis numinis hyacinthus; quid si legamus, cælestis luminis? videtur enim hic Columella florum tantummodo colores spectare, idemque in libro insequenti scribit ( 10, 97 ):* *Candida leucoja, & flaventia lumina calthæ, & mox ( v. 100 ):* *Nec non vel niveos, vel caruleos hyacinthos.* §. 46. Col. 9, 7, 2 Cap. 7 *Singula ( alvearia ) binis parietibus angustis contineantur, liberaque frontes utrinque sint.* Nam & qua procedunt, nonnunquam patefaciendæ sunt, & multo magis a tergo, quia subinde curantur examina.

Suspicio legendum esse, qua subinde; nam cap. 15 ( f. 5 ) docet, quid faciendum sit favos demessuro, ubi a posteriore parte nullum vestibulum patefactum habuerit alveare, tum hæc addit ( f. 11 ):

*Castratæ deinde alvi, si quæ transversos favos in aditu habebunt, convertendæ erunt, ut alterna vice posteriores partes vestibula fiant: Sic enim proxime cum castrabuntur, veteres potius favi, quam novi eximentur, ceræque novabuntur, quæ tanto deterioribus sunt, quanto vetustiores.* Quod si forte alvearia circumstructa, & immobilia fuerint, curæ erit nobis, ut modo a posteriore, modo a priore parte

F  
castrantur.



castrentur: §. 47. Col. 9, 8, 8 Capite 8 *Primum quam longe sint* ( apes ) explorandum est, *parandumque in hanc rem liquida rubrica, quacum festucis illitis contigeris apum terga fontem libantium* &c. Hic operæ pretium facturos nos arbitror, si Palladium hunc ipsum locum describentem ( L. 5. tit. 8 f. 2 ) inspexerimus. *Ac primo, inquit, quam longe sint, exploremus, aut proxime rubricam liquidam brevi vasculo infusam geramus, & observemus fontes, aut aquas vicinas: tunc dorso apum bibentium tangamus illo liquore tincta festucula* &c. Fortasse hæc Palladii verba ad hunc modum sunt emendanda: *Ac primo ut quam longe sint, exploremus, aut proxime; rubricam* &c. Fortasse omiſſa etiam particula *ut*, satis est aut ita, ut distinxis, legere, aut sic --- *proxime. Rubricam.* Verum utcumque hoc est, illud ex iisdem verbis suspicari proclive est, deesse in Columella unam, aut alteram vocem, legendumque in hunc fere modum: *parandumque in hanc rem vasculum liquida rubrica, aut cum liquida rubrica.* §. 48. Col. 9, 9, 3. Capite autem 9 in his quidem verbis: *quod ne fiat* ( hoc est ne apes peregrinam regionem petant ) boni curatoris est, *vernīs temporibus observare alveos in octavam fere diei horam, postquam non temere se nova propriunt agmina; etsi satis per se apparet, rescribendum esse postquam, id est horam, juvabit tamen & Palladii* ( Jun. 7, 5 ) respondentem huic locum transcribere: *Observabit autem custos assiduus usque in octavam, vel nonam horam, quia post hæc tempora non facile fugere consueverunt.* §. 49. Col. 9, 9, 7. Paulo autem infra videas velim, deeatne vulgatam in Columella fervere scripturam: *Itaque si constat principibus gratia, manet pax incruenta. Sin autem sapius aciem dimicantibus notaveris, duces seditionum interficere curabis; an contra oporteat, acie dimicantibus, vel acies dimicantibus rescribere.* §. 50. Col. 9, 12, 2. Capite 12 *Crepitaculis areis --- terreatur fugiens juvenus. Eaque quæ vel pavida cum repetierit alvum maternam, & in ejus aditu glomerata pependerit, vel stativo se ad proximam frondem contulerit, protinus custos novum loculamentum in hoc præparatum perlinat intrinsecus prædictis herbis: deinde guttis mellis respersum admoveat.* Credisne legendum, eique, an potius, æque pavida cum vel repetierit &c. §. 51. Col. 9, 13, 9 & 14 Capite 13 *Prodesse etiam putat apibus vetustate corruptis examen novum contribuere, quamvis periculum sit, ne seditione consumantur.* Legendum videtur *consumantur.* Ad extremum vero ejusdem capituli, ubi apibus ob maximam florum copiam, magis mellificio, quam reparandæ soboli operam dantibus, *utilissimum esse dicitur tertio quoque die alveorum exitus præcludi, exiguis foraminibus relictis, per quæ non possunt apes exire, ut ab opere mellifico evocata, quoniam se non sperent posse ceras omnes liquoribus stipare, fætibus expleant, aut est scribendum avocata, aut etiam in iis Tullii exemplaribus* ( Tullulan. 1 ) in quibus legimus: *a negotio omni evocamus animum, minime necesse est reponere avocamus, vel serocamus.* §. 52. Col. 9, 14, 6. Denique cap. 14 postquam rationem attigit Columella reparandi apes juvenco perempto, *Quam rationem, inquit, diligentius persequi supervacuum puto, consentiens Celso, qui prudentissime ait, non tanto interitu pecus istud admitti, ut sic requirendum sit.* Hic vero ego in eadem opinione esse me, fateor, quam & alibi ( Epist. in Corn. Cel. ) indicavi, nimirum non admitti, sed amitti esse legendum.

§. 53. Col. 10, 21 sq. Libro autem X, non minus quam in iis locis, de quibus hætenus dictum est, meas omnes editiones peccare video in his versibus: *Nec manibus mitis ferulas, nec cruribus æque Terga rubi, spinisque ferat paliuron acutis; nisi quod Juntina habet æqua: quod ut probandum videtur, sic miteis, vel mites pro mitis reponendum.* In his quoque *Tu quæ pallet humi, quæ frondes purpurat auro. Ponatur viola; vix editio eadem: Tum; Stephani vero Tunc exhibet.* §. 54. Col. 10, 121. Sed omnes iterum sunt mendosæ in hoc versu: *Rutæque Palladiæ baccæ victura saporem:* quem propterea ita interpretatus est

Junius Pompo. Fortunatus ( comment. in hunc librum X Columellæ ) ut Palladiæ baccæ nomine oleum significari, doceret, atque ita rem, si Diis placeat, declarari posse, crederet: *Rutæ manipulus si liquamen, vel oleum defierit, admixtus dapibus, & liquaminis, & olei vicem præstat, ac escam sapidiorum facit.* Vetus autem Codex a Cl. Drackenborchio ( ad Silii Italici Punicor. l. 7 vers. 354 ) memoratus, non *victura* in eo versu habet, sed *jutura*, quem videlicet ad modum Palladium ( l. 4 tit. 10 f. 36 ) quoque scripsisse video, *humoribus juti*; ut sententia sit, Rutam ad juvandum, id est meliorem efficiendum olivarum saporem utilem esse.

Quam ego scripturam eo magis probandam existimo, quo magis sententiam hanc confirmare possum, non modo ejusdem Palladii, aut Catonis, sed ipsius etiam Columellæ auctoritate. Mitto igitur Palladium ( l. 12 tit. 22 f. 5 ) qui sic condire olivas docuit: *lectas baccas ex arbore statim condias, rutam, & petroselinum sternes inter spatia structionis, & subinde ciminati salis aspersione cumulabis* &c.

Mitto Catonem ( cap. 119 ), qui Epityrum ( id est conditura olivarum genus, ut Columella noster ( l. 12 c. 47. f. 9 ) docet, quod in Civitatibus Græcis plerumque usurpabant ) sic faciendum præcepit: *Ex oleis albis, nigris, variisque nucleos ejicito. Sic condito. Concidito ipsas. addito oleum, acetum, coriandrum, cuminum, fœniculum, rutam, mentam* &c.

Certe ipse Columella ( ibid. ) cum Epityrum describit, in singulos, inquit, modios olivæ triti salis costi singulos sextarios infundimus: *itemque lentisci semen, rutæque, ac fœniculi folia* &c.; & in nigræ olivæ conditura ( cap. 48 f. 5 ) olivam, inquit, in urceum, aut cacabum novum mittito substrato apio, & modica ruta; & alio in loco ( c. 47 f. 5 ) qui huc potissimum pertinet: *At hæc oliva per se parum jucunda est, sed ad eas condituras, quæ lautioribus mensis adhibentur, idonea maxime est: nam cum res exigit, de amphora promitur, & contusa recipit quamcunque volueris condituram.* Plerique tamen sectivum porrum, & rutam cum apio tenero, & mentam minute concidunt, & contusis olivis miscent &c.

§. 55. Col. 10, 125 sq. Proximi sunt hi versus: --- *& lactis gustum quæ condiat herba. Dejectura quidem fronti data signa fucarum, Vimque suam idcirco profitetur nomine Grajo.* In quibus ut Georgio Alexandrino ( enarration. priscar. voc. in libr. de Re Rust. ad vocem *Lactis* &c. ) concedam, de Lepidio verba fieri, hujusque vi cutis squamas, maculas, cicatrices, aliaque id genus vitia emendari etiam posse; non tamen istic *fucarum* quid sit, intelligam. Nam quod Fortunatus ( comment. cit. ) asserit, esse hanc Columellæ sententiam, quod *lepidium dejiciat signa & ulcera quæ mulieres sibi ex fucis fecerunt*, videturque propterea *fucorum* legere; nempe is syllabarum naturam, legesque istiusmodi carminis non attendit. Tu igitur, Vir Doctissime, hac etiam de re fac sciam quid sentias. §. 56.

Col. 10, 230 sq. Sed Fortunatus cum aliis in versibus haud multum vidit, tum vero in his: *Quare age quod sequitur, parvo discrimine sulci Spargantur cæcis nasturtia dira colubris, Indomito male sana cibo quas educat alvos, Et satureja thymi referens, thymbræque saporem;* in his, inquam, interpretandis ( ibid. ) tam cæcus fuit, quam serpentes illi, quos humiditate fere cæcos erumpere, ait, de teria; illis enim, asseruit, Columellam hic docere *nasturtium adversari; saturejam autem esse male sanam alvis quas alvos educat.* Scilicet non vidit, saturejam ad superiorem versum nihil attipere, in eoque *alvos* pro *alvus* scriptum esse, ut *equos, avos* sæpe in antiquis monumentis nominandi catu, quamquam in vetustis aliquibus Columellæ exemplaribus hic legi revera *alvus*, testatur Ro. Stephanus ( in fine Oper. Columellæ ). Itaque Victorius ( Castigation. in Columellam l. 10 sive Hortulorum pag. 141 ) cum illud animadvertisset, rescripsit *alvus*, & *cæcas colubras* interpretatus egregie est ventris lumbricos, quos etiam *nasturtio* polli ab Dioscoride ( de Mat. Med. l. 2 c. 149 ) traditum esse, non ignorabat. Illud addi potest, idcirco hos dixisse Columellam ab alvo educari male sana, *indomito cibo*, quia probe sciret, quod etiam

supra



supra ( l. 6 c. 25 p. 230 ) docuerat, *lumbricos fere nasci cruditatibus*. §. 57. Col. 10, 248 sq.

Denique in his verbis: *Quaque tuas audax imitatur Nysie viteis, Nec metuit senteis, nam reprobis improba surgens* *Acbrados, indomitasque bionias alligat alnos*. mihi quidem *bryonias* videtur potius esse legendum, quod in antiquis etiam codicibus ab Stephano ( loc. cit. ) inventum esse scio.

§. 58. Liber XI inscribendus erat *Villicus*, quem admodum duodecimus inscriptus est *Villica*. Docet id ejusdem libri duodecimi caput 18 ( pag. 421 ) sic enim incipit: *Quamvis priore libro, qui inscribitur Villicus*. §. 59 Col. 11. 2, 94 Cap. 2

*Nono Calendas Januarias Brumale solstitium* ( sicut Chaldaei observant ) significat. Hic desiderari puto quod significatur.

Neque enim sic ista verba accipienda esse, quasi Columella, ipse confirmaret, id significari quod tradunt Chaldaei, cum illud indicat quod superiore capite ( pag. 364 ) scripsit, se *Astrologorum observationes, improbissimasque Chaldaeorum pollicitationes* alio opere confutavisse, tum hæc commonstrant quæ duobus ante versibus scripta sunt, si cum eo loco, de quo agimus, comparentur:

*Sexto decimo Calendas Januarii sol in Capricornum transitum facit, brumale solstitium, ut Hipparcho placet, itaque tempestatem sæpe significat*. §. 60. Col.

11, 3, 37 Capit. 3 Postquam & locum, & rationem culturæ docuit attri oleris, feritur, inquit, a *Vulcanalibus usque in Calendas Septembris*, sed etiam mense Januario menta dulcem desiderat uliginem, quam ob causam juxta fontem mense Martio reple ponitur. Videntur hæc verba melius distingui in editione Juntina, sic videlicet --- mense Januario. Menta &c.

Nili ita fiat; quo tempore atrum olus feri oporteat, Auctor præter morem, institutumque suum omisisse credendus est. §. 61. Col. 11, 3, 39

Magis etiam apparet paulo post, verba aliter esse distinguenda: *Thymum & transmarina cunila, & serpillum*, sicut priore libro jam retuli, magis alvearia curantibus, quam olitoribus studiose conferuntur.

Sed nos ea condimentorum causa ( nam sunt quibusdam esculentis aptissima ) non alienum putamus etiam in hortis habere locum neque pinguem, neque stercoratum, sed apricum desiderant.

Et tamen vix in Editione Stephani invenimus ista distincta --- etiam in hortis habere locum &c. §. 62. Col. 11, 3, 43

Contra sunt distincta in omnibus multo magis, quam oporteret, hæc verba: *Ea cum pingui, & stercoroso solo post Idus Februarias sic obrue- ris, ut quantum tres digiti seminis comprehendere queunt, singulis fossulis deponas*.

Fere post quadragesimum diem inter se implicantur; perspicuum namque est, sic esse scribenda --- deponas, fere post &c. §. 63. Col.

11, 3, 64 In extremo denique hoc libro cum hæc legamus: *omnium librorum meorum argumenta subjeci, ut cum res exegisset, facile reperiri possit, quid in quoque quarendum, & qualiter quidque faciendum sit*; non illud modo dubium est, scripseritne Columella aliquanto aliter, ut puta reperiri posset &c. facien- dum esset; verum hoc insuper certum est, & illa ar- gumenta periisse, & fecisse hic ipsum ad eundem quadantenus modum, ad quem A. Gellius, qui no- ctes suas hac clausula absolvit: *Capita rerum, quæ*

*cuique commentario insunt, exposuimus hic universa, ut jam statim declaratur, quid, quove in libro queri, inveniri que possit*: & continuo singulorum capitum argumenta ex ordine subjecit.

Non ignoro, posse aliquos credere, ista omnia ab aliis fuisse iis No- tibus adjecta, permotos auctoritate Th. Bartholini, qui in Dissert. VI de legendis libris, *Capitum*, in- quit, seu sectionum index nec novus est, nec anti- quus.

In primis editionibus tantum comparet. Neque enim antiquorum libri per capita fuerunt distin- cti, sed Voluminibus.

Ita Plinius, Herodotus, Thu- cydides, Livius, Sallustius, & alii Græci pariter, & Latini Auctores totum opus sine distinctione capi- tum pari tenore perscripserunt.

Sed velim, ut mihi respondeant, scripseritne Celsus lib. VI cap. 12. *Lingua quoque ulcera non aliis medicamentis egent, quam quæ prima parte superioris capitis exposita sunt*;

itemque lib. VIII cap. 9. *Medicamentis vero iis- dem opus est, quæ prima parte hujus capitis exposita*

*Morgagni Opusc.*

sunt; & hæc Celsi verba an utrobique res ipsa com- probet? Quæ cum urgeo, non propterea tamen contendo, aut plerosque scriptores veteres idem fecisse, aut aliena esse a vero, quæ porro subjicit Bar- tholinus: *cum a posterioribus scribis per capita, & sectiones Libri Auctorum dividerentur, sæpe sine cura, & consilio, conjuncta fuisse separata, & vice versa, quod non raro lectorem in lectione turbat*.

Quinimo fateor, id alicubi vel Celsi ipsius scriptis; non modo Columellæ; accidisse. Et de Celso qui- dem alibi ( epist. in Corn. Celsum ) ostendi. Co- lumella autem sive libros suos indivisos reliquit, sive in majores quasdam partes, si non in capita, ipse distribuit, ut illa in extremo sexto videntur indica- re: *sicut prioribus hujus voluminis partibus tradidi- mus, quæ curam boum, equorumque continent*; certe nullo modo potuit sic dividere, ut nunc habemus.

Quidquid enim aut libri quarti initio in pri- mum atque alterum caput divisum videmus, aut ini- tio secundi primum caput inscribi, aut initio quin- ti, octavi, undecimi primum caput inchoare; vel præ- fationis loco ipse reliquisset, vel si capitibus accen- fere voluisset, sexti quoque & noni, & duodecimi li- bri exordia pariter accensuisset.

Neque item in eodem libro duodecimo caput 15 a 14; multoque minus tertii initium a fine secundi sive eo in libro, sive etiam in septimo divulgasset.

Neque facile in libri sexti caput 17, in quo de serpentibus, aliorum- que noxiorum animalium ictibus agi videmus, quæ ad oculorum vitia pertinent, compegisset: quam et- iam partem quoties relego, excipique protinus ani- madverto capite 18, in quo iterum de noxio animalcu- lo ( hirudine videlicet, boum faucibus, stomacho, vel intestinis adhærente ) verba fiunt; toties suspi- cor, a librariis alicunde avulsam, huc temere fuisse conjectam, nec tamen nuper; cum eundem locum tenere videam apud Vegetium ( lib. 3 cap. 4 ) ubi plura ex sexto Columellæ volumine descripta sunt.

Sed quod aliter hæc tamen apud Vegetium, ali- ter apud Columellam in capita sunt divisa, id quo- que videlicet indicio est, non hanc quam habemus, divisionem a Columella fuisse institutam. Quid? quod hæc ipsa aliter in aliis editionibus occurrit.

Ut enim illa omittam, quæ operarum potius ne- gligentiam demonstrant, ut in Aldina libri sexti non modo octavum, sed & nonum caput, iterum octavum;

quinti autem libri non modo quintum, sed & sex- tum, iterum quintum; in editione item Gymnici, libri ejusdem non modo sextum, sed & septimum,

iterum sextum inscribi, sic ut omnia, quæ illa con- sequuntur capita non suo propterea numero inscripta sint; ut, inquam, hæc prætermittam; Juntina certe editio librum ipsum primum in tredecim capita habet distributum, quem posteriores, quibus utor, reliquæ habent in novem.

Huc illud accedit, quod quæ non præcepta modo, sed verba libro quinto in unum caput decimum collecta sunt, eadem fere libro de Arboribus in octo capita sunt tributa, ut præclare intelliget quicumque duodevicesimum, & septem,

quæ insequuntur, capita cum illo uno decimo com- paraverit.

Quod cum fecerit, minus, opinor, mirabitur eorundem librariorum aut inconstantiam, aut imperitiam, qui cum tot alios passim versus, quemadmodum in more positum est, scripserint, sic ut versus esse, vel oculorum judicio continuo quili- bet agnoscat; hos tamen ( l. 2. c. 2 f. 18. Ibid.

c. 8 f. 3. l. 5 c. 5 f. 7. l. 7 c. 3 f. 10. lib. 9 c. 3 f. 2. Ibid. c. 8 f. 13 ) & *picis in morem ad digitos lentescit habendo. dum sicca tellure licet, dum*

*nubila pendent. & quid quæque ferat regio, & quid quæque recuset. cum tonsis illotus adhæsit sudor: &*

*hirsutis secuerunt corpora vepres. ardentes auro, & paribus lita corpora guttis. trita meliphylia, & cæ- rinthe ignobile gramen*; hos, inquam, quasi vero ver- sus non essent, omnes, ut hic descripsimus, cæteris cum verbis Columellæ permixtos, confusosque exhibue- re.

Sed jam his, atque aliis ejusmodi prætermis- sis, nunc quod facere instituimus, eorundem in singulis verbis describendis hallucinationes notemus.

§. 64. Col. 12, 4, 5 Libro igitur XII verbum aliquod Librarios in extremo quarto capite omisis- se potius crediderim, quam Columellam, quæ ait de

F 2 aceti,



aceti, & duræ murie usu, ea cum superioribus connectere voluisse, perinde quasi sex septemve versus, qui nexum aut dissolvunt, aut certe plurimum infirmant, non intercederent. §. 65. Col. 12, 7, 1. Sub initium autem capitis 7, ubi colligi, & reponi jubet cymam, caulem, capparim --- item ferulæ cum coliculo silentes, aut flores deesse suspicor; nam mox addit, silentem florem vitis albæ & asparagi; aut licet Juntinum habet exemplar, legendum esse ferulas.

§. 66. Col. 12, 17, 2. Ad finem vero capitis 17, postea in juncis fiscellis, vel sparteis saccis percolant; legendum videtur percolent; non modo enim hæc antecedunt: sunt qui multitudini studentes aquam ficis permisceant &c. verum & hæc continuo sequuntur: ligatumque acetum infervesciant &c.

§. 67. Col. 12, 19, 2. Sed quod legimus cap. 19, Quæcunque vini nota sine condimento valet perennari; etsi ita rarum est, ut in amplioribus Lexicis ne memoratum quidem inveniam, non tamen facile mutandum crediderim ab iis præsertim, qui in calce etiam 20 capitis (f. 8) hæc animadverterint: marmoris, vel gypsi, quod flos appellatur, uncias singulas, item ad tertias decocti defruti sextarios binos singulis amphoris miscere oportebit; ea res etiamsi non in totum perennat, certe usque in alteram vindemiam plerumque vini saporem servat. §. 68. Col. 12, 20, 2. Contra etsi in eodem vigesimo capite mea omnia, si Juntinum demas, exemplaria sic habeant: Deinde si natura tenuæ mustum erit, cum ad tertiam partem fuerit decoctum, ignis subtrahendus est, & fornax protinus aqua refrigeranda: quod si fecerimus, nihilominus defrutum infra tertiam partem vasis confedit; tamen, ut in Juntino, legendum videtur consi-

det. §. 69. Col. 12, 20, 5. Aliquanto infra: Ad prædictum autem modum musti adjici debent ii odores, nardi folium, iris illyrica, &c. quorum singulorum libræ satisfaciunt. Item myrrhæ quincunx, calami pondo libram, casie selibram, amomi pondo quadrans, croci quincunx, cripæ pampinaceæ libram.

Hæc, ut dixi, arida contusa, & cribrata debent adjici, &c. Hic velim videas, an librarii numerorum notas verbis reddentes in eo peccaverint, quod libram, & selibram scripserint pro libra & selibra.

§. 70. Col. 12, 24, 1. Itemque cap. 24 in his verbis: quæ cum in tantum refrixerit, quantum ne contacta corpus urat, partem aliquam ejus, quæ satis videbitur prædictæ pici immiscebimus, & diligenter lignea spatha, vel etiam manu peragitabimus; vide an legendum potius sit immiscebimus.

§. 71. Col. 12, 25, 3. Pariter cap. 25 ubi hæc scribuntur: deinde cum refrixerit, tum quantumcunque humoris est, tantum in amphoram musti portionem adjici; an tantam scribendum sit. §. 72, Col. 12, 48, 3. Capite autem 48 cum de olivarum conditura hæc traduntur: Plerique tamen tres partes defruti, aut mellis, & unam miscent aceti, & eo, quo condiunt, jure.

Quidam &c. legendum crediderim, & eo condiunt jure, aut eoque condiunt jure; jus enim est istud ipsum quod iisdem verbis describit; neque enim necesse est, ut jus liquor eorum sit, quæ coquuntur; sic capite superiore 46 f. 2 taleolas, inquit, radicem inula in umbra triduo, vel etiam quatrinduo siccato; deinde siccata in vasis (an in vasa) sine pice, interjecta cumila, conficito, cum nila imposita, sex partibus aceti una pars sapæ misceatur cum hemina salis cocti, ut hoc jure macerentur taleolæ, donec quam minimum amaritudinis respiciant. §. 73. Col. 12, 55, 1 & 2. Sic capite etiam 55 quem locum aliam quoque ob causam huc transcribemus: album acre acetum (sinapi) adjicito, & pistillo permisceto, colatoque. Hoc jus ad rapa condienda optime facit. Caterum, si velis ad usum conviviorum preparare, cum exaniveris sinapi, nucleos pineos quam recentissimos, & amygdalum adjicito &c. Hic ego legendum crediderim, non exaniveris, sed exaniaveris, sive exsaniaveris, hoc est noxium humorem expresseris, aut abstuleris; modo enim dixerat manibus expressum --- comprimito manu plana --- aquam nitratam suffundito, ut omnem amaritudinem ejus (sinapis) & pallorem exaniet.

Sed & capite 47 f. 9) de oliva hæc scripserat: præ-

lo supponitur, vehementerque premitur, ut exudet quantumcunque habet amurcæ. Patimur autem nunquam tota nocte, & postero die pondere pressam baccam velut exaniari; & cap. 53 (f. 2) largum salem infarcito, compositisque supra tabulatum tergoribus, aut frustis (carnis suillæ) vasta pondera imposito, ut exanietur. §. 74. Col. 12, 57, 5. Denique inspicias velim postremi capitis verba extrema: quod si etiam cum laser non habueris, pro silphio mellis adjicies pondo semunciam; videasque, an quidpiam in his quoque verbis a librariis peccatum sit.

§. 75. Col. Arb. 10 lem. Restat Liber de Arboribus. In hoc caput X ita inscriptum est. Vindemiam quomodo putes; cum inscribendum, opinor, fuisset: Post vindemiam quomodo putes; hoc enim ejus capitis initium est: Vindemia facta statim putare incipito ferramentis quam optimis, & acutissimis, ita plagæ leves fient. Verum ut impositas a librariis inscriptiones prætermittentes, verba ipsa Auditoris consideremus; in hoc ipso loco non credo leves scribendum esse, sed læves; hæc enim continuo sequuntur: neque in vite aqua consistere poterit, quæ simulatque immorata est, corrumpit vitam, &c.

Sed & libro IV cap. 24 (f. 21 lq.) cum istiusmodi ferramentis putatorem uti juberet, inter alias eandem hujus præcepti causam ita proposuit, quod si mollis, aut retusa, & crassa falx sit, plagæ asperæ atque inæquales vites lacerent, unde fit, ut vitis laniata, scabrataque putrescat humoribus, nec plagæ consanentur. Cæterum hanc ego (ut alias ejusmodi) animadversionem omissem, nisi aut meæ omnes editiones in eo peccassent, aut hoc ad plures alios locos pertinuisset, quales sunt libro IV cap. 24 (f. 4) ferroque allevanda est, ut hibernas aquas respuat. Nam præstat ex vulnere sobolem repullescentem vellere, quam nodosam & scabram plagam relinquere.

Libro V cap. 6 (f. 13) serra defecari, & plagam falce allevari, cap. 9 (f. 3) earum plagæ utraque parte falce levantur; atque ut multos alios locos sciens omittam, cap. 11 (f. 7) plagam diligenter levato: quod & infra iteratur cap. 26 (f. 6) in hoc ipso libro de Arboribus. §. 76. Col. A. 26, 7. Quocum libro, quoniam supra nobis utile fuit quantum comparare: nunc vicissim experiamur, an utile sit ipsum conferre cum quinto. Igitur quod hoc ipso capite 26 ob unum fortasse omissum verbum subobscurius videri potest: Tertium genus insitionis, cum sit subtilissimum, non omni generi idoneum est: ET fere ea recipiunt talem insitionem, quæ humidum, succosumque, & validum librum habent; id in V Lib. cap. 11 (f. 8) admodum perspicue dictum est: Hoc tertium genus insitionis, cum sit subtilissimum, non omni generi arborum idoneum est, SED fere recipiunt talem insitionem, quæ humidum &c.

§. 77. Col. A. 26, 8. Porro in ipsa quæ subsequitur hujus tertii generis descriptione hic quidem postquam traditum est, quomodo gemma ex una arbore sit detrahenda, hæc subduntur. deinde ex qua arbore inferere voles, in ea nitidissimum ramum eligito, & ejusdem spatii corticem circumcidito, & materiem delibrato, & in eam partem, quam nudaveras, gemmam hanc, quam ex altera arbore sumseras, aptato ita ut emplastrum circumcisæ parti conveniat. Hic vero nudaveris pro nudaveras, & potissimum in qua arbore, pro ex qua arbore esse rescribendum, cum inde intelligitur quod paulo ante dictum fuerat: Ex qua arbore inferere voles, & absoluto de illa sermone, nunc de ea, in qua inferendum est, verba fiunt; tum ex lib. V (cap. 11 f. 10) confirmatur, in quo ista eadem res sic proponitur. postea item alterius arboris, quam emplastraturus es, nitidissimum ramum eligito, & ejusdem spatii corticem circumcidito, & materiam delibrato: deinde in eam partem quam nudaveris, præparatum emplastrum aptato, ita ut alteræ delibratæ parti conveniat. Sic enim Palladius (l. 7 tit. 5 f. 3) idem docens, Item, inquit, ex ea arbore, cui velimus inferere, similiter cum gemma tolletur emplastrum, nitido tamen, atque uberi loco. §. 78. Col. Ar. 28, 2. Sed & quæ capite 28 habentur: Mulierps quidem si lactis inopia premuntur, cythisum aridum in aquam



aquam macerari oportet, cum tota nocte permaduerit: postero die expressi succi ternas heminas permisceri modico vino, atque ita potandum dari; si hæc, inquam, cum iis comparentur, quæ libri V capite ultimo (12, 2) scripta sunt; multo proclivius erit cognoscere, post oportet, facili omissione voculam & esse prætermittam, atque totum locum ita ut ibi (pag. 204) legitur, esse rescribendum. Mulieres quidem, si lactis inopia premuntur, cythiisum aridum in aquam macerari oportet, & cum tota nocte permaduerit, postero die &c. §. 79. Col. Arb. 30, 1 & 2. Atque utinam in libro V ut de cythiis, ita etiam de viola, & rosa Columella scripsisset; longe facilius esset conjicere, quid duobus de locis capitis 30 sit statuendum. Alter in ipso est initio: *Violam qui facturus est.* Quæro enim, oporteatne Scripturam hanc retinere, an potius saturus reponere, cum hæc sequantur: *terram stercoreatam & repastinatam minimum alte pedem in pulvinos redigat.* Atque ita plantas hornotinas scrobiculis pedibus factis ante Cal. Mart. dispositas habeat. Alter locus est paulo infra: *Rosam fruticibus ac surculis disponi per surculos pedales convenit per idem tempus quo & viola;* ubi ego scribendum crediderim non per surculos pedales, sed aut per scrobiculos pedales, ut paulo ante de Viola dictum est, aut potius, ut aliis quoque ante me visum esse scio, per sulculos pedales; certe Palladius (l. 3. tit. 21. pr.), qui solebat Columellam respicere: *rosaria, inquit, conseremus, quæ sulco brevissimo aut scrobibus ponenda sunt, vel virgultis, vel etiam semine.*

§. 80. Pall. 1, 24, 2 & 3. Hactenus de Columella: in quo cum plura, quam ab initio existimabam, notata sint; ideo non multa in Palladio notabuntur, quæ forte in ipso, dum Columellæ penitus intelligendi causa inspicerem, sic aliud agens animadverti. Lib. I tit. 24. *A mustellis tutæ fient (columbæ) si inter eas frutex -- projiciatur --, non pereunt. Et neque locum deserunt, si per omnes fenestras &c.* An sic potius distinguendum -- *Non pereunt, neque &c.* Ibidem: *Inducunt alias, si cumino pascantur assidue, vel setosi hirci alarum balsami liquore tangantur.* Si Palladium sic revera scripsisse putamus: num ita intelligemus, ut setosi illi hirci partes quædam sint alarum balsami liquore tangendæ?

Quod autem mox bis herbum pro *ervum*, ut ex Columella (l. 8. c. 8. f. 6.) & Varrone (l. 3 c. 7 f. 8) intelligitur, posuit, an fecit, quod potius ab *εργος* cum Felto (De verb. ver. signific. l. 5) quam ab eruendo, cum aliis, dictum *ervum* arbitraretur? §. 81. Pall. 1, 32 Tit. 32. *Fœni, pælearum, ligni, cannarum repositiones nil refert, in qua parte fiant, dummodo siccæ sint, atque perflabiles, & longe removeantur a villa propter casum surripientis incendii, an surrepentis incendii?*

§. 82. Pall. Febr. 9, 8 Libro III tit. 9. *Caput sarmenti, cum deponitur, torquendum non est, nec aliquo modo vexandum, nec demersa penitus fecundioræ parte, quod sterili proximum est, supra terram relinquatur.* Legendum videtur, ne demersa. Sequitur enim: *deinde quoniam ipsa tortura vexatio est, & pars ea, de qua radix futura præsumitur, injuriæ nulli subijcienda est, cum qua contendere cogatur ante, quam teneat; itaque cum hæc ratio altera sit, altera antecesserit, necesse est; sane præceptum non esse, sed rationem, quod de fecundioræ parte dicitur, luculentissime ostendit Columellæ caput quod hic spectavit Palladius, quodviceßimum Libri III (f. 4) demonstrat enim, qui sarmenti caput contorquet, ea duplicatione consequi, ut omnis fecundior ejus pars obruatur, consumaturque.* §. 83. Pall. Febr. 15, 1 & 2 Tit. 15. *Novellam vitem Columella dicit a primo anno ad unam materiam esse formandam, nec recidendam totam, sicut Italiæ consuetudo est.* Anno secundo expleto, quia vel intereant vites in totum recisæ, vel infæcunda sarmenta producant. Hic vero sic verba esse distinguenda, nec recidendam totam, sicut Italiæ consuetudo est, anno secundo expleto, quia &c. Locus quoque ostendit, quem Palladius indicat ipsius Columellæ (l. 4 c. 11 f. 1) in quo Virgilium, Sæternam, Stolones, Catones non solum in eo

erravisse, ait, quod primi anni capillamenta seminum (vitis) intacta patiebantur, sed & post biennium cum viviradix recidenda erat, omnem superficiem amputabant solo tenus, &c. Deinde easdem, quas hic Palladius, affert rationes. §. 84. Pall. Febr. 24, 3 Tit. 24. *Hoc etiam mense cepullas seris, sed constat & vere, & autumno esse seminandas. Si semen ejus seve- ris, in caput crescit &c. videtur legendum, semen earum: videturque pariter legendum esse semen eorum, uti in proximo libro IV tit. 9 (f. 6) hæc habentur: semina ejus mulso, & lacte per triduum maceranda sunt; illa enim antecedunt: Nunc melones ferendi rarius; hæc autem sequantur: hinc suaves efficiuntur* §. 85. Pall. Febr. 24, 8. Infra eodem titulo 24. *Mihi etiam illud utile videtur, ac diligens, ut asparagi agrestis radices plurimas in unum locum congeramus cultum, vel certe saxosum.* Scribendum crediderim incultum, præsertim cum id continuo sequatur: *quæ statim fructum dent ex loco, qui aliud nihil alebat.* §. 86. Febr. 25, 4 Tit. 25. *Si languida arbor est piri, vel ablaqueatæ radicem terebras, & ibi ligneum palum de primis, vel &c.* Sane hic perspicuum est, scribendum esse *deprimis*, neque tamen scriptum video, nisi in editione Junta- rum.

§. 87. Mart. 9, 3 Libro IV tit. 9. *Singulis sane annis a codice auferendæ sunt plantæ, ut nec matres fatigentur, & soboles per alia spatia digerantur: cum aliqua tamen radices parte vellendæ sunt.* Hic etiam, si Juntinam excipias, meas omnes editiones peccare existimo, scribendumque *radicis*. Titulo autem 10 (f. 20) ubi de Mespilo: *si putatur, hinc arbor sterilis fieri, finus, & cinis vitium simul si radicibus infundantur, fertilem reddunt; pessime erratur non modo in Aldi, sed & in Junta- rum editione; sic enim scribitur: fieri finus; quasi vero Palladius diceret, arborem a putatione sterilem fieri, cum hoc dicat, si ab adhibita viva calce de qua modo sermo fuerat, timetur, ne arbor sterile fiat, ideoque ita verba distinguenda sint, uti a Rob. Stephano factum est: si putatur hinc arbor sterilis fieri, finus &c.*

§. 88. Pall. Mai. 1, 1. Sed quid esse manifestius potest, quam in ipso Lib. VI initio: *Majo mense locis frigidis, & humectis panicum seremus, & nullum more, quo dixi; non scribendum esse nullum, sed milium, quando ejus capitis inscriptio hæc est; De panico, & milio, &c.; & tamen cum in Juntino exemplari esset milium, cæteri, qui Palladium postea edidere, scripserunt nullum; quinimo Seb. Gryphius cum in priore quidem editione scripsisset milium, in altera rescripsit nullum.*

§. 89. Pall. Jun. 7, 2. Libro VII tit. 7. *Fumus admoveatur ex Galbano, & arido fimo bubulo, quem in pultario factis carbonibus convenit excitare.* Columella sic (l. 9. c. 15. f. 5) *fumum admovebimus factum galbano, vel arido fimo.* Ea porro vase fictili prunis immista conduntur: quæ verba cum conféro, suspicor, Palladium scripsisse, mistis carbonibus, aut in pultarium factis carbonibus; nam illud factis minus placet. §. 90. Pall. Jun. 7, 7. Sed utilius fortasse erit, quæ infra scribuntur de apum regibus, comparare cum alio Columellæ loco; Palladius sic: *pulchri coloris, & nitidi, leves sine pilo nisi forte pleniores quasi capillum gerunt in ventre, quo tamen non utuntur ad vulnus.* Columella (l. 9. pag. 327) autem sic: *pulchri coloris, & nitidi, levesque, ac sine pilo, sine spiculo, nisi quis forte plenioræ quasi capillum, quem in ventre gerunt, aculeum putet, quo & ipso tamen ad nocendum non utuntur;* quibus ex verbis facile est conjicere, nonnulla fortasse verba Palladii librariorum incuria esse prætermittæ, aut saltem plenioræ scribendum esse pro pleniores.

§. 91. Pall. Sept. 13, 2. Libro X tit. 13 ubi caparim feri jussit solo sicco, & gracili, continuo hæc addit; *herbas sponte persequitur; scribendum suspicor: herba sponte persequitur.* Neque enim id vult quod Columella (l. 11. c. 3. f. 55) cum illam *noxium virus habere docuit, succoque suo sterile solum reddere;* nam hoc Palladius paulo ante dixerat iis verbis, *succo suo terris nocet.* sed id facile vult, quod Columella (ibid.) pariter ad hunc modum tradidit: *cultu*



cultu aut nullo, aut levissimo contenta est. Quippe quæ res etiam in desertis agris citra rustici operam convalescit: scilicet hoc opponit Palladius iis, quæ deorigano proxime scripsit: Nunc circa æquinoctium seres origanum: stercorari, ac rigari donec convalescat, appetit; Capparim autem seras modo; sponte ipsa proveniet, ac convalescet.

§. 92. Oâ. 5, 1. Libro XI tit. 5. non minus fortasse proderit Columellam inspicere, quem saepe adeo respiciebat Palladius. Ipse igitur Palladius sic: Sed hæ radiculæ (vitis) non ad siccum debent recidi, ne aut plures inde nascantur, aut &c. Quid obsecro te, esse dicemus in hoc loco recidere ad siccum? Neque enim siccum illud est, unde si amputentur radiculæ, renasci plures possunt: neque sicca sunt ipsæ, quæ præcidi debent, radiculæ; nam ideo præcidendæ sunt, ne si convalescant, ut duobus ante versibus dictum est, inferiores radices faciant interire. An illud ergo relinquitur, ut non ad siccum scribamus, sed ad truncum, quod Columella (l. 4 c. 8 f. 2) videtur indicare eadem præcipientes hisce verbis: minime applicandum est ferramentum ipsi matri, quoniam si juxta truncum radicem præcideris, aut ex cicatrice plures enascentur, aut &c. §. 93. Pall. Oâ. 19, 1. Tit. 19 passum nunc fiet ante vindemiam, quod Africa sœvit universa conficere pingue, atque jucundum, & quoad conditum, si utaris mellis vice, ab inflatione te vindices. Traditur deinde ratio passi conficiendi, & sic denique sermo absolvitur: Hinc passum est quidquid effluxerit, & conditum vasculo, mellis more servatur. Quæro itaque, an legendum sit: & quod conditum, si utaris mellis vice, ab inflatione te vindicat, aut etiam: & quod conditum si utaris mellis vice, ab inflatione te vindices; nam memini & Plautum, & Q. Scævola, & M. Varronem, & alios verbum utor cum accusandi casu junxisse.

§. 94. Pall. Nov. 13, 2. Libro XII tit. 13 quæro ex te, Vir Clar. quid deesse aut quid vitii esse censeas in iis verbis: Qui (agni) donec firmentur, intra stabulum furfuribus, vel medica herba, vel (si est copia) farina hordei pascantur ingesta, donec conceptum paulisper robur ætatis, pascuum matribus possint habere commune. Legemus ne -- concepto paulisper robore ætatis; aut nullo verbo mutato, tantummodo voculam & ante pascuum addemus?

§. 95. Pall. Inf. 158 sq. Multo autem magis quæro, in Lib. XIV sive de Infitionibus, ubi de Pistaciis sermo est, quomodo emendandum censeas verbum, quod nec sententiæ convenit, & carminis legibus repugnat in horum versuum altero:

Quin & amygdalios subeunt pistacia ramos,

Et debitum majus de brevitate petunt.

Num pro debitum reponendum pretium? Nam supra quidem, ubi agitur de pomo, vix dubito, quin iis in versibus: (v. 87. 88.)

Robora thyrsigero platani concordia Baccho.

Fætibus instituit plena rubore novis;

pro rubore legendum censeas rubere, præsertim cum ante (v. 61 sq.) de piro dictum sit: Phyllida quin etiam grandi mitescere fructu Instituens! -- Atque hæc in Palladio nunc habui, quæ notarem; nam supra alia etiam aliquot in eodem, cum de Columella scriberem, animadverti. §. 96. Varro 1, 55, 4. In Varrone autem, quem eandem ob causas subinde in manus sumsi, rogo te, ut perpauca hæc mecum velis diligenter perpendere.

Libro I cap. 55. Olea, ut uva, per idem bivium redit in villam, alia ad cibum eligitur, alia ut eliquefeat. Hic Victorius (Explication. suarum Castigation. in Varron. pag. 68): Alia ad cibum eligitur. Maculam habet optimus codex. Lædatur enim hic scriptum est. Quomodo ex vetere lectione locus corrigi debeat, si pervulgata mendum continet, docti viri cogitabunt. Tu igitur, Doctissime Vir, cogita, sit ne pro eligitur rescribendum laudatur.

§. 97. Varro 2, 2, 20. Libro II cap. 2. locus est, de quo miror, neminem adhuc, quod sciam, dubitasse: De sanitate sunt multa, sed ea (ut dixi) in libro scripta magister pecoris habet. Mihi vero scribendum videtur non, ut dixi, sed ut dixisti, vel si quis minus velit a vulgata scriptura recedere, ut dixti. Neque enim hic loquitur scriptor, sed is,

quem induxit, Atticus, neque Atticus illud dixerat, sed Scrofa (L. 2, 1, 21), Quarta pars est de sanitate; eamque partem his verbis absolverat (f. 23)

Item ad alios morbos aliæ causæ, etiam alia signa in omni pecore, quæ scripta habere oportet magistrum pecoris. Itaque aut octogenarium istum senem Varronem multo magis obliviosum, suique instituti immemorem credamus necesse est, quam hi ipsi libri summa eruditione ac diligentia scripti patiuntur; aut potius censeamus, Atticum, qui ut Scrofa roganti satisfaceret, suum hunc sermonem ita inceperat, ut ipsi responderet (2, 2, 2): Ego, opinor, incipiam primus, quoniam in me videre conjecisse oculos; ubi ad eam partem, quam Scrofa satis tractaverat, de sanitate, pervenit, ipsum potissimum intuentem, alloquentemque, sic ut indicavimus, loquentem induci: De sanitate sunt multa, sed ea, ut dixisti, in libro scripta magister pecoris habet.

§. 98. Varro 2, 4, 8. Cap. 4. Verris octo mensium incipit salire: permanet, ut id recte facere possit, ad primum, deinde ita retro, quoad perveniat ad lanium. Sic Victorius antiquis libris auctoribus, emendavit. Sed ut fatetur, in his scriptum fuisse, id retro, & tamen se scripsisse ita retro; sic decebat ipsum pariter dubitare, num integra esset vox illa primum; quid enim ibi est permanet ad primum? Nam quod ipse annum intellexit, vereor ne fecerit precario. Quid? quod res præterea repugnat. Nam Victorius ipse Plinii verba profert, non ultra trimatum generare verres, docentis: quæ etsi conatur eludere ad hunc modum, quamvis autem usque ad trimatum generent, ad primum annum facere id recte possunt, ut credidit Varro: postea languidiores fiunt, nec tam bene munere illo funguntur; tamen Columella (l. 7. c. 9. f. 2) hoc tollit effugium, diserte affirmans, verres ab annicula ætate commode progenerare, dum quadrimum agant. Hæc dum scriberem, & qua ratione prorsus restitui hic locus posset, mecum ipse cogitarem; ecce Vir Cl. Pontedera meus, atque adeo noster, diu a me quæsitam Varronis editionem mittit, quam Ausonius Popma procuravit.

In hac non ad primum lego, sed ad trimum, idque, ut opinor, recte; ad eundem enim modum, fortasse huc respiciens, scripsit Palladius (l. 3. tit. 26);

verres usque ad quadrimos invire sœminas possunt; ut Varronis (qui & infra cap. 7. f. 13. ait post trimum) loquendi modum, Columellæ autem sententiam exprimeret; quæ tamen a Varronis sententia multo propius abest, quam illa Victorii; nisi forte omnino conciliari etiam potest. §. 99. Varro 2. Frustra autem quæsi, quid infra senserit idem Ausonius in eo loco: Hujus suis (Æneæ) ac porcorum etiamnum vestigia apparent Lavinii. scilicet ad hunc ipsum modum scripsit, atque adeo descripsit Victorium: qui etsi confitetur, vetustam scripturam hanc fuisse, apparent jamne; tamen cum oppidum significari debere depravata illa voce, intelligeret, Lavinii maluit ex ingenio rescribere, quam litterarum vestigiis firmitus inhærendo, alicujus alterius oppidi nomen, ut puta Interamnæ eruditus Viris proponere, quod videlicet, ut abs te peto, perpenderent, atque in historiæ latinæ monumentis, an huc pertinere posset, inquirerent. Quod si minus litteras sequi volebat; at certe cogitare illud poterat, non magis Lavinii in ea voce vestigia esse, quam Romæ.

§. 100. Varro 2, 9, 4. Capite 9 vide, an forte verbum aliquod desideretur in Canum descriptione. Quo enim modo hæc satis intelligam: colore potissimum albo, quod in tenebris specie leonina? Quod si quidpiam deesse putes juvabit Columellam (l. 7. c. 12. f. 3) inspicere, qui cum in descriptione eadem, ad Varronem, ut haud raro solebat, respiceret, pastor, inquit, album colorem in cane probat, quoniam est feræ dissimilis, magnoque opus interdum discrimine est in propulsandis lupis sub obscuro mane, vel etiam crepusculo, ne si non sit albo colore conspicuus, pro lupo canem feriat.

§. 101. Varro 3, 5, 9. Lib. III cap. 5 ubi confluit altera amnis, sic enim Rob. Stephanus, Seb. Gryphius, Ausonius Popma scribere malunt, quam alter amnis, uti in Juntarum, Aldi, Gymnici exemplaribus, imo in priore etiam ipsius Gryphii scriptum



ptum fuerat. Auctorem illi habent Victorium qui *amnis*, inquit; *hic muliebri genere appellatur in fidelissimis libris, quemadmodum sæpe a vetustis auctoribus appellatam Nonius docet, qui etiam Varronis ipsius hoc exemplum adducit, περί πλάτης libro primo: In hac civitate agros colunt arenosos: propter hos fluit amnis, quam olim Albulam dicunt vocitatam.* Popma (Not. ad hunc locum Varronis) Victorio, nisi quod Libri Varroniani inscriptionem corrigit, sic astipulatur: *ubi confluebat altera amnis.* Sic enim Varro loquitur, ut Periplo lib. 1. Propter hos fluit amnis, quam olim Albulam dicunt vocitatam. E quidem nihil ego eorum negaverim, quæ ab his duobus eruditissimis viris observata sunt. Altera amnis scriptum erat in fidelissimis libris. Credo; sed nihil librariis sæpius accidit, præsertim dictante aliquo, ut plerumque solebant, codices antiquos describentibus, quam ut insequentis vocis litteras primas cum prioris extremis confunderent, & sic aliquam interdum omitterent, alias duplicarent. *Amnem* sæpe a vetustis auctoribus muliebri genere appellatam esse, Nonius (de Propriet. Serm. ubi de Indisc. Gener.) docet. Fateor; sed tamen a poetis; Nam Plautum, Nævium Accium, auctores laudat. At enim iis hunc quoque addit, de quo

agitur, Varronem. Non inficior; neque tamen vereor, ne me audacem putes, si contra atque Aufonius, Victorius, Nonius ipse sine ulla dubitatione arbitrati sunt, contendam, ex eo, quem producant, Varronis loco minime constare, hunc amnem fœmineo genere dixisse. Quid enim? Num quia scriptum est a Sallustio: *est locus in carcere, quod Tullianum appellant*; a Cicerone autem: *domicilia conjuncta, quas urbes dicimus*; denique (ne, si plura congeram, ad te præsertim scribens, ineptus videar) a Livio: *Anxur fuit, quæ nunc sunt Terracinae, urbs prona in paludem*, num, inquam, propterea Sallustius *carcerem* neutro, & Cicero *domicilium*, aut Livius *Anxur* muliebri genere appellavisse dicendi sunt? Habes Vir Doctissime, de locis plurimis Columellæ, de quibusdam Palladii, de nonnullis etiam Varronis, non quid ego statuam, sed quid suspicer, atque adeo quid ex te quæram. Cum responderis, tum demum aliquid constituam. Gestum enim feci, quod ajunt, præsertim Roscio, non ut apud Roscium me jactarem, sed ut per Roscium proficerem. Vale.

Patavii ipsis Kalendis Quintil. M DCC XXI.

## E P I S T O L A I I.

CLARISSIMO ET ERUDITISSIMO

V I R O

J U L I O P O N T E D E R Æ

J O A N N E S B A P T I S T A M O R G A G N U S .

S. P. D.

QUÆ in Auctores rei rusticæ scripsi ad Amicum, & collegam nostrum Clarissimum Jacobum Faciolatum, non ut ipse aliquid constituerem, sed ut Doctissimi Viri sententiam elicerem, eorum exemplum ad Te mitto, non modo ut eliciam tuam, verum insuper ut annotationes exprimam, quas te bene multas in eisdem illos auctores meditari, jamdudum scio. Quo enim modo cessare tu poteris, qui ad rei herbariæ excellentem scientiam, non mediocrem agriculturæ notitiam adjungis, cum me, unum ex Anatomicis, succisivis aliquot horas tuis Auctoribus & dedisse, & dare intellexeris? Quod ut planius cognoscas, quæ post eam scriptam epistolam ad plura ex iis, quæ tunc attrigi, loca adnotavi, tum aliis de quibus post dicemus subsidiis, tum quatuor usus editionibus, quibus eo tempore carebam, Veneta quam Nicolaus Jenson procuravit anno 1472, duabus Regiensibus anno 1496 & 1499 ac denique Heidelbergensi illa a Clariss. Do. Alberto Fabricio (Biblioth. Lat. l. 2 c. 7) celebrata anno 1595 ex typographia Hieronymi Commelini.

§. 1. Col. 1, 8, 8 Et primum in Columellæ lib. 1 cap. 8 haud procul a fine de quatuor editionibus quas modo memoravi, priores tres, in extremo autem capite 32 lib. 4 & ipsas & Commelinianam cum Juntina, & mecum facere, deprehendi. Sed vinitoriæ falcis figuram frustra in venustioribus illis quæsi. Nimirum ejusmodi imagines non ab ipso Columella sunt, nisi forte geometricas quasdam formas excipias, de quarum una scripsit (lib. 5 c. 2 l. 6): *si triangulus disparibus fuerit lateribus ager, tanquam in subiecta forma, quæ habet rectum angulum.* Sed ut in aliarum quoque disciplinarum libris plerumque contingit, addita sunt ab junioribus, haud inutili sane consilio, modo rebus, quæ ab Auctoribus describuntur, satis respondeant. Atque utinam ad ea quoque capita Columellæ, in quibus de certis vitium aut arborum partibus, aliisque ejusmodi verba facit, eruditi,

eademque rei rusticæ periti Viri imagines adjunxissent; ego certe, ut de me ipse confitear, non paucis præterea illius locis, quæ vitata esse, subsentio, ausus essem medicas manus admoveere, quæ nunc agriculturalis ignarus, vobis in ea doctrina versatis cogor omnia relinquere.

§. 2. Col. 5, 8, 3 sq. Libr. 5 cap. 8 Cum in decem illis olearum generibus radium non invenirem, alterutrum suspicatus sum, aut positum quidem esse, sed alio quodam nomine designatum, aut in eo loco describendo librarios peccavisse. Revera utrumque accidit. Nam hi cum græcis litteris περιίτης scribere debuissent, circites scripsere, quæ vox apud latinæ linguæ idoneos auctores M. Terentium Varronem (de lingua lat. lib. 5) & Sex. Pompejum Festum (de verbo. ver. signific. lib. 3) non eam formam significat, quam Columella spectaverat. Scripsit enim περιίτης, ut τῆς περιίδος, id est radii similitudinem significaret. Auctore hæc ajo Fr. Sylburgio, qui in eo indice, quem in calce editionis Commelinianæ habemus, hoc posuit: *Circitis olea, rectius περιίτης, radius.* Nec plura in hanc rem addo, quod nuper cum tecum sermonem haberem de oleis, probe sensi, te conjectura in istam ipsam emendationem incurrere, quæ a Sylburgio proposita est. Illud potius ex te quæro, quid censeas super illa repugnantia, quam inrer locum, quo de agimus, atque alterum ex cap. 17 libri de Arboribus animadverti. In primo, *bacca jucundissima est pausia, speciosissima est regia, quæ &c.* In altero; *sunt & regia, ut radii, quæ neque specie, neque oleo sunt tam grata, quam quas supra diximus.* Mihi quidem vel mendum aliquod subesse, vel Columella nunc baccæ, alias arboris magnitudinem attendisse videbatur. Num hic quoque saltem de mendo divinavimus? Certe aliter uterque locus in tribus illis vetustioribus editionibus habetur: *bacca jucundissima est pausia: speciosissima est regia, etiam virga: quæ &c.* & : Sunt



& : Sunt & regiae, & radii non sine specie neque olea, neque sunt tam gratae, quam quas supra diximus.

Rectene undequaque? non affirmo. Aliter certe.

§. 3. Col. 5, 11, 8. In eo autem loco, quem postremum expendimus in cap. 11 libri ejusdem 5 equidem sine ulla dubitatione affirmavero, illas ipsas editiones a vera scriptura aberrare; sic enim habent:

Nos tertium genus insitionis invenimus: quod cum sit subtilissimum &c. Neque Columella hoc tertium

insitionis genus, quod fit per emplastrum, sed quartum, quod fit per terebram, novam tantummodo rationem invenit: quæ res perlegenti, vel istud ipsum caput, vel 26 & 8 libri de arboribus, itemque libri 4 caput 29 tam aperta est, quam quod apertissimum. Attamen & ipsa scripturæ varietas non injuria suspectum mihi fuisse locum, ostendit. §. 4.

Ille autem inter hæc loca Libri de arboribus, & quæ modo ex Libris 4 & 5 indicavimus, consensus tantus ut gallicam terebram ab eodem appareat ad inferendum esse translatam, qui omnia illa loca conscripsit, non leviter sane confirmat, eundem quem librum 4 & 5 scripsisse liquet, Columellam librum quoque de Arboribus confecisse: qua de re nimirum doctissimi homines dubitaverant. De libris etiam quos scripsisse Columella testatur, de generibus surculorum, an editi fuerint, an extant, & quinam sint, ambigere adhuc nonnullos scio; etsi V. Cl. Jo. Albertus Fabricius (\*) recte monuerit, haud diversos esse videri a libro tertio, quarto, & quinto hujus ipsius de agricultura operis. Itaque placet Eruditissimi Viri judicium ex hoc ipso quinto libro confirmare.

Nam Columella qui lib. 2 cap. 11 pr. hæc scripserat: cetera pabula neque enumerare, ac minus ferere dignamur, excepta tamen cythiso, de qua dicemus in iis libris, quos de generibus surculorum conscripsimus; satis ipse, quinam hi sint libri, ostendit in extremo capite 11 libri quinti. At prius, inquit, quam finem libri faciamus, quoniam fere species surculorum omnium persecuti sumus prioribus libris, de cythiso dicere nunc tempestivum est, & continuo addit novissimum caput de Cythiso.

§. 4. In hoc libro 5 plura esse, præterea animadverteram, quæ haud inutiliter cum libro de arboribus conferrentur, & vicissim. Idem animadverteram in libro 6, si cum P. Vegetio compararemus: Verum illud studiis gravioribus distentus, ipse perficere non potui, quod quidem si quid forte otii tibi est, a te fieri, etiam atque etiam velim.

Sed Vegetium ita contendi cum Columella, ut quædam in hoc, plurima in illo emendanda esse, deprehenderim. Ea omnia (usque adeo & multa & gravia sunt) in altera, si voles, epistola seorsum persequar.

§. 5. Col. 7, 1, 2 &c. Nunc ad 7 librum veniamus. In capite 1 & 6 mecum faciunt tres illæ veteres editiones. In illo enim habent, cum & facilem; in hoc, matres binæ. Quod autem ad 9. 8. avum attinet extremum caput, illæ quidem malinis lignis, Commeliniana autem habet, malini ligni.

Lib. 8 cap. 2 vix una Commeliniana inter corrigenda admonet, non fœmina, sed femina esse legendum. Eadem pariter, sed in Sylburgii indice, alteram animadversionem confirmat meam in caput 5, ubi de excubandis ovibus. Hæc enim adnotat: excubandis rectius excludendis, vet. ed. vel incubandis.

Ræ tamen vera meæ quoque veteres editiones excludendis habent, & excludant: quem ad modum etiam paulo antea eodem capite, item semel atque iterum 11 & 14 locutum esse Columellam invenio.

§. 6. Libro etiam 9 Commelinus, uti Stephanus, & ego, verba distinguit, quæ ex 3 capite proposui. In 4 autem capite quo loco cœlestis numinis hyacinthus in cunctis scribitur editionibus, legi nuper Salmasium (Plinian. exercit. in Solin. ad hujus pag. 62 E) rescribentem nominis, nec tam grave fuit multis modis intelligere, minus feliciter venisse mihi in mentem, qui mederi possem, quam gratum, me tamen morbum, & medendi genus vidisse. Fuit quoque in cap. 8, cur suspectus mihi esset locus iste.

Præparandumque in hanc rem liquida rubrica, quando antiquæ tres editiones habent, præparandaque, quod etiam Commeliniana ex vetere alia editione inter emendationes proponit. Illa autem Palladii verba,

quæ his & proximis Columellæ respondent, ad eundem omnino modum eæ omnes quatuor editiones distinguunt, ad quem a nobis secundo loco distincta sunt. §. 7. Col. 9, 9, 3 sq. Cap. 9 tres priores editiones sic habent: in octavam fere diei: post quam horam. Pariter cap. 13 nostram emendationem confirmant; habent enim, consumatur. Imo Commelinus, inter corrigenda, probat consumatur.

§. 8. Col. 10, v. 101. Libro 10 in eo versu. Tu quæ pallet humi, quæ frondens purpurat auro, Commeliniana id habet, quod in Juntina, tres reliquæ, quod in Stephani editione probavimus. Illum autem versum (121): Rutæque Palladiæ bacæ victura saporem, cum in omnibus summo consensu ad hunc ipsum modum proponi, animadverterem; videndum aliquando putavi, an hac ipsa servata scriptura, interpretari ita possemus, ut ruta esse utilis diceretur in olivarum conditione ad eum quem ante hanc habent, saporem demendum, minuendumve.

Quæ hoc minus displicebat interpretatio, quod Columellam hic quoque potuisse in animo habere Virgilium suum videbam, cujus illa sunt, & quidem in eo Poemate, quod hoc in libro noster imitatur, persequitur, & ut ipse loquitur (in præfat. ad hunc librum 10) explet (Georgic. l. 4 v. 101): Dulcia mella premes: nec tantum dulcia, quantum Et liquida, & durum Bacchi domitura saporem. Attamen cum ad eam scripturam quam in veteri codice Cl. Drackenborgium invenisse, commemoraveram, proxime accedere audiam codicem celeberrimæ Bibliothecæ Divi Marci, tuum, mi Juli eruditissime, de utraque cum lectione, tum interpretatione judicium esto.

§. 9. Col. 10, 125 Proximis versibus: -- & lactis gustum quæ condit herba Dejectura quidem fronti data signa fucarum Vimque suam idcirco proficitur nomine Grajo. eo libentius fateor, lepidum significari, quod Joannes Ruellius (de natura Stirp. l. 2 c. 104) admonet, Columellam, ubi oxygalæ faciendæ rationem proposuit, docuisse, alios recentia folia lepidii cum dulci lacte in olla miscere, alios autem siccata, & quidem sine condimentis: quæ verba sunt lib. 12 cap. 8. Sed cum ipse quoque fucarum legit, me nihil hic fateor intelligere.

Plinii quidem de lepidio verba agnosco, quæ inter sua, ut solet, profert Ruellius: sic in facie cutim emendat exulcerando, ut tamen cera, & rosaceo facile sanetur: sic lepras & psoras tollit semper facile, & cicatricum ulcera (alii ulcerum cicatrices) videoque hac ratione ad delenda etiam stigmata in fronte impressa, adhiberi potuisse, præsertim cum similes tollendi hæc modos apud Scribonium (comp. med. 231.) Paulum (de re med. l. 4 c. 7) Aetium (Tetrab. 2 Serm. 4 c. 12) Actuarius (Meth. med. l. 6 c. 8) aliosque legam, sic ut a vi desquamandi cutem, sive maculosam, sive a morbo, a vulnere, ab ulatione cicatricosam, græco nomine λεπίδιον appellari potuerit.

Hæc tamen omnia cum intelligam; fucarum quid istic sit, non intelligo. Quod autem in quibusdam editionibus fucarum est scriptum, nimirum id nimis aperte carminis legibus repugnat. Viderat hoc, qui in veteri codice, ab Josepho Scaligero inspecto, ita scripserat, ut refert Rhodius (not. ad Scribon. Comp. 174) Deletura quidem furcæ fronti data signa. Justo autem Lipsio; quod Rhodius pariter memorat, placuit, ut pro fucarum rescriberetur focorum: cujus ergo emendationis auctorem, & probante quidem Turnebo (Adversar. lib. 13 cap. 22) Guilielmum Pelisserium fuisse, video.

Attamen ut cætera omittam, multo propius a magis communi scriptura emendatio abest reponentium, fugarum: quam quidem ejusdem Rhodii, ut ab ipso proponitur; esse credidi, donec & in Dalechampii commentariis in Plinium (l. c.) & inter ea inveni quæ Johannes Wowerius olim adnotaverat ad Petronium (Satyric.)

notum



notum fugitivorum epigramma memorantem, indicia videlicet, ut Cajus ( Epitom. instit. t. 1 ) loquitur, aut igne aut ferro ( in facie ) impressa, per quæ, si iterum fugerent, dignosci, & deprehendi possent, exempli gratia hæc quam Rhodius alibi ( Not. cit. ad Compos. 231 ) commemorat, litterarum species F. H. E. L. T. quod est: *Fugitivus hic est Lucii Tizii*. Idem nominat, ac mecum refellit, qui legendum esse *fucorum*, cum Fortunato contendebant.

Qui etsi in eo quoque interpretando, quem continuo post hunc expendimus, de alvi colubris, id est, lumbricis est lapsus; nostræ tamen fidei est, te admonere, ipsius verba in Regiensi editione anno 1499 sic proponi; ( v. 232 ) *aliis quas alvos educat*, ut intelligatur, nonnullam errorum quos ipsi adscriptimus partem, inscitia, incuriaque operarum esse affigendam. Cæterum ibi in Columella *alvus* legit Commelinus, & infra *bryonius*: quas nos lectiones probaveramus.

§. 10. Col. 11, 3, 37 & 39 sqq. Sed in libro etiam 11, quæ prima ex 3 capite duo loca proposuimus, & ipse, & qui tres antiquiores editiones curaverunt, ita distincta exhibuerant, ut nos indicavimus.

Nec in extremo capite 17 lib. 12 sine ratione aliquid mutandum esse, putavi, quando hæc omnes quatuor editiones non ut cæteræ habent, *infervesciant*, sed *infervesciant*; aut in capite 55 ( f. 2 ) pro *exaniveris*, legendum esse *exaniveris*, quando hoc habet Commeliniana. In libro etiam, qui reliquus est, de *Arboribus*, illa ipsa editio, inter corrigenda, ita emendaverat 10 capitis inscriptionem, ut nos emendavimus. In iis autem verbis, quæ ex cap. 26 ( f. 8 ) secundo loco protulimus, tres veteres editiones non modo ut nos, habent *nudaveris*; verum insuper commonstrant, non immerito illa nobis displicuisse: *ex qua arbore inferere voles*, cum sic habeant: *quam arborem inferere voles*. Sane etiam paulo supra ad eundem modum, itemque libro 5. cap. 11 ( f. 3 ) scriptum est: *Arborem quam inferere voles*. Sed nimirum hic dum constantem cæterarum omnium editionum scripturam esse antiquam, putavi, in ejusque propterea vestigiis scrupulosius omnino insistendum; ab antiquæ non sententia quidem, sed locutionis genere aberrare coactus sum.

§. 11. Col. Arb. 30, 2 Quod mihi ut aliis nonnullis in locis, sic in postremo quoque accidit, quem ex Columella proposui: *Rosam fruticibus, ac surculis disponi per surculos pedales convenit*. Etsi enim non unam indicavi rationem, cur *surculos* pro *surculis* scribendum putarem; ubi tamen animadverti, non modo in Commeliniana, sed & in duabus vetustioribus editionibus esse *fulcos*, in tertia autem harum, quæ videlicet ex ipsis recentior est, *furcos*, cœpi suspicari, ex hoc fortuito typographi errore natum fortasse esse *surculos* in posterioribus editionibus. Quod qui in *fulculos* mutandum esse ante me, censuerunt, illi quidem Columellæ sententiam procul dubio restituerunt, verbum autem an restituerint ita dubium est, ut vox *fulculus*, quam hujus unius loci auctoritate in latina Lexica intulerunt, nisi productis aliis scriptorum exemplis confirmetur, ipsa quoque dubia & incerta esse videatur. Illud hoc in loco non est omittendum, Jensonianum exemplar non habere *fruticibus*, sed *frutibus*: quæ scriptura ex iis quæ Palladius huc, ut solebat, respiciens tradidit, fortasse posset confirmari. Nam rosaria conferenda ac ponenda esse, docuit *vel virgultis vel etiam semine*, quippe quæ *baccas nutriant in brevissimi piri similitudinem, plenas seminibus*. Non negaverim: *fruticibus* in Columella respondere *virgultis* in Palladio. Attamen nihil in illo de *semine*: & quod de *surculis* dixit, fortasse etiam *virgulta* complectitur. Neque enim *surculus*, ut vulgo credunt, id tantummodo est, quod *in ramis oritur*, sed interdum etiam est *frutex*, ac *virgultum*, auctore ipso, ni fallor, Columella ( lib. 3 c. 11 f. 5 ) ubi negat, *esse ullum tamdiu viduum solum virgultis, ut non aliquos surculos progeneret, tanquam puros sylvestres, & prunos, vel rubos certe*. Sed hæc tu melius.

§. 12. Palladius sequitur, cujus nos loca non cum illis tantum editionibus quatuor, quas sapius Morgagni Opusc.

commemoravimus, sed cum libris insuper Petri Crescentiensis tum Latina tum nostra hac lingua editis, & Palladii interpretatione quadam vernacula, atque calamo exarata, ac perantiqua, nuper contulimus. Petrus enim Crescentiensis, sive ut vulgo a nostris appellatur, Crescentius, qui ante annos trecentos scripsit de agricultura, non alius auctoris verbis sæpius utitur, quam Palladii, ut cum, etiam ubi non nominat, ipsum haud raro describat, manifesta quæ in Crescentium menda irrepsit, Palladii ope tollenda sint, & vicissim; id quod te jam pridem & animadvertisse, & facere instituisse, non ignoro. Vernacula autem illa Palladii interpretatio ab homine Florentino; quod ex Januario cap. 4 & aliunde planum est; scripta, quam antiqua sit, ex ipsis verbis intelligimus.

Hanc V. Clariss. Doctissimusque Salvinus Salvinus anno superiore ad Cajetanum Vulpium miserat, qui ejus mihi copiam fecit, singulari homo in juvandis litteris studio, ac diligentia. Quin etiam Apicii de arte coquinaria libros inspexi: sed ut nonnulla quæ pariter in Palladio sunt, in ipsis agnoverim, nihil tamen invenerim, quod magnopere ad eum pertineret. §. 13. Pall. 1, 24, 2 & 3 Iis igitur novis subsidiis instructus, inprimis quæ ex Palladio lib. 1 tit. 24 proposueram, locis, in quibus agitur de columbis, cœpi vehementer suspicari, aliena esse verba illa: *frutex virgosus sine foliis asper, vel, & mox, setosi*. Nam primum verba hæc omnia in Jensoniana, superiora vero etiam in duabus aliis vetustis editionibus desiderantur, in Commeliniana autem, quæ ad veteres membranas, quod ad Palladium attinet, exacta est, omnia hæc uncis sunt interclusa. Sed ne in vernaculis quidem Palladii, & Crescentii interpretationibus ullum eorum vestigium est. In illa tamen *hirsi alarum*, reddita sunt *summa alarum* ( *le sommitadi dell' ale* ) quæ Palladii verba an ita essent rescribenda, *cirri alarum* interdum quidem dubitavi, nunquam tamen quidquam certi constitui.

§. 14. Pall. Feb. 15, 1 &c. Libro 3 initium tit. 15, ita ut ego censueram, distinctum inveni, cum apud Crescentium ( lib. 4 c. 14 ) tum in vernacula interpretatione Palladii. Neque tit. 25 f. 4 editiones illæ quatuor aliter habent atque ego in Juntina probaveram.

Libro 4. tit. 9 ( f. 3 ) cum Juntina pariter mecumque eadem faciunt editiones, & ea de qua sæpius dixi, interpretatio. Verum tit. 10 ( f. 20 ) ubi de Mespilo, etsi hæc omnes, & præterea Crescentius ( l. 5 c. 16 ) in eo quod præcipuum est, a me non dissentiant, in reliquis tamen vernacula quidem interpretatio, & Commeliniana editio consentiunt; cæteræ autem sic habent, ut legisse etiam ex parte videatur Crescentius: *sed putatur hinc arbor sterilis fieri. Fimus & cat.*

§. 15. Pall. Maj. 1, 1 &c. Libri 6 initio in iis omnibus ( si Crescentium demas, in quo locum non inveni, qui huic admodum responderet ) scriptum est *milium*.

Libro autem 7 tit. 7 ( f. 2 ) frustra in his omnibus quæsi, quid pro *factis carbonibus* sit rescribendum. Editiones enim hæc ipsa habent; Interpretatio ne carbones quidem memorat; Crescentius ( lib. 9 c. 103 ) denique hunc locum tam negligenter describit, ut pro *in pultario factis carbonibus*, habeat, *in pulmentario siccis carbonibus*. Quod tamen *ἐπίστρω*, si modo vestigia servat scripturæ Palladii, permovere aliquem possit, ut conjiciat, scripsisse hunc, *in pultario sitis carbonibus*. §. 16. Pall. Jun. 7, 7 Neque diligentius exscripsit, quæ Palladius de Apum Regibus subjecit, sic enim habet ( lib. 9 c. 102 ) . *Leves absque pilo, nisi fronte pleniores, quasi capillum gerunt in ventre*; itaque ex forte; quod a Columella Palladius descripserat, factum est *fronte*: quos sive Crescentii, sive operarum potius errores, ut esse veteres, intelligamus, is etiam servavit, qui ejus libros olim in vulgarem hanc linguam transtulit. Hic quæres fortasse, quemadmodum verba hæc Palladii Florentinus interpretes reddiderit. Sic autem reddidit; *morbide senza pelo. & anno un capello, quasi nel ventre di fuori come agugli-*



ne. Nempe hic in vertendo quædam omittit, qui alibi, plura intrusit de suo, & præsertim libro 1, ubi agitur de aquæ salubritate agnoscenda, quæ certe nec Palladii esse, nec esse potuisse, proclive est demonstrare. Cæterum etsi hoc verum est, etsi præterea haud paucis in locis Auctoris sententiam non est assecutus, est vicissim ubi non inutile prorsus sit hanc quoque interpretationem consulere.

§. 17. Pall. Sept. 13, 2 &c. Quod in libro 10 suspicatus eram, id velim etiam atque etiam consideres. Nam ne mihi quidem ipsi unde quaque nunc placet. Præterea illa interpretatio, atque editiones vetustæ adversantur. §. 18. Pall. Oct. 5, 1 Contra lib. 11 tit. 5 non dubito quin pro ipsa steterim Palladii sententia, cum iis in verbis: *Sed hæ radiculæ (vitis) non ad siccum debent recidi, malle me, ostendi, truncum legere, quam siccum.* Ecce etiam Crescentius (lib. 4 c. 15) ubi hæ ipsa verba exscribit, eandem sententiam confirmat, quamquam verbum aliud proponit: *Sed hæ radiculæ non ad stipitem recidi debent.* Vernacula autem Palladii interpretatio sic idem docet, ut quo tamen verbo sit ipse usus, *trunci* (quo sæpius de vite loquens Columella) an vero *stipitis*, incertum relinquit; nisi forte *vitem* scripsisse indicet. Sic enim habet: *non tagliandole rasente la vite.* §. 19. Pall. Oct. 19, 1 Tit. 19 Minus placent quæ conieceram ad illa verba: *Passum nunc fiet ante vindemiam, quod Africa fucrit universa conficere pingue, atque jucundum, & quoad conditum, si utaris ab inflatione te vindices.* Multo simplicius emendabimus, si nulla detracta, aut mutata littera legemus (ut in una, si probe memini, editione est Gymnici.) *quo ad conditum si utaris*, sed media syllaba in *conditum* producta, non, ut mox in *conditum* vasculo, correpta. Sic autem interpretabimur: quo passo si pro melle utaris ad vinum condiendum, non sic inseris, ut a melle. Mel enim, ut nosti, *alvum inflare*, cum Dioscoride (de Med. Mat. l. 2 c. 75) Medici admonent. Quod autem cum Palladius scripsit, *ad conditum*, & proprio verbo, & id quod ego interpretor, significante usus sit, te latere non potest. Nam latini cum dicebant *conditum*, Græci autem juniores, latinæ hujus vocis usurpatione, *κondίτον*, vinum intelligebant, aromatatum, imprimisque piperis, & præterea mellis additamento confectum. Talia sunt apud Apicium (de art. coquin. lib. 1 c. 1, 2.) *Conditum Paradoxum*, & *Conditum Melizomum*; & quamquam eo tempore jam multa addiderat aliorum & Heliogabali (vid. Lamprid. Heliogab.) præsertim luxuria; talia certe, & hoc quidem ipso *Conditi* nomine appellata, tam longo ante tempore in usu fuerant, ut hæc ejus vocis significatio, in uberrimis latinis lexicis prætermissa vix uni Glossario Caroli du Fresne relinqui non debuerit. Major enim Plinius (Nat. Hist. l. 14 c. 16) postquam plurimum vinorum aromatatum compositiones indicavit, *Qualia*, inquit, (vina) *nunc quoque fiunt, pipere, & melle addito, quæ alii condita, alii piperata appellant.* Et de his fortasse verba etiam sunt accipienda Corn. Celsi (de Medicina l. 1 c. 2) *condita omnia duabus de causis inutilia sunt, quoniam, & plus propter dulcedinem assumitur, & quod modo par est, tamen ægrius concoquitur*; neque enim ista dulcedo condimentis omnibus de quibus sic universe interpretantur Pantinus (Comment. in Cels.) & Rubeus (Annot. in Cel.) ita conveniebat, ut *Conditis*, quorum cum varias compositiones ad quinquaginta apud Apicium (lib. citat. 1 c. 1 & seqq.) Paulum (de Re med. l. 7 c. 11) Oribasium (medicin. collect. l. 5 c. 33) Aetium (Tetrab. 1 serm. 3 c. 62 & seqq. & Tetrab. 4 serm. 4 cap. 117 & seqq.) Nicolaum Myrepsum (de compos. medicam. sect. 1 c. 194 & sect. 27 c. 33 & seqq.) aliosque legerim; nullam memini legisse, in qua non satis mellis admisceatur. Scilicet conditum omnino erat nulli quoddam genus, ut Cælius Aurelianus (Morb. Chron. l. 5 c. 1) scripserit: *probat conditum bibendum, quod plerique latini mulsum vocant.* Ipse etiam Palladius, qui libro 3 (t. 32) *Conditum vel absinthiatum, vel rosatum vel violatum* memoraverat, ubi rosatum vel sexto (t. 17) vel hoc ipso libro (t. 15) conficere docuit, utrobique mel adje-

cit. Non tamen semper inter conficiendum conditum, & nominatim rosatum, aut violatum, mel admiscebant; sed aliquando (id quod constat ex Apicio lib. cit. cap. 4) eo tantum tempore, quo erant bibituri, videlicet ut liberum esset singulis convivis pro arbitrio plus minulve addere. Quem ad morem hic Palladium respexisse crediderim, propterea quia passum istud, *quo ad conditum si utaris mellis vice, ab inflatione te vindices*, docuit, *conditum vasculo, mellis more, servari.* Porro ut Palladius pro melle passum, ita Nicolaus Myrepsus (sect. 27 c. 40 & 43) saccharum aliquando posse adjici Conditis, monuit. Martialis (Xenior. 106) autem passi, & mellis magnam, ut sic dicam, propinquitatem significavit in disticho de passo: *Gnossia Minoæ genuit vindemia Cretæ, Hoc tibi, quod mulsum pauperis esse solet.* neque reticuerat Plinius (nat. hist. lib. 14 c. 9) qui passum ait in adulterium mellis excogitatum. Sed eam sæpius ostenderat Celsus (de Medic. l. 2 c. 20, 22, 30, 32, 29, 18, 25, 28) qui etsi inter ea, quæ boni succi sunt, & quæ lenia, & quæ alvum adstringunt, passum numeravit, cum mel inter ea, quæ acria sunt, numeret, idemque crudum, ut mulsum quoque movere alvum, doceat, tamen pariter & valentissimæ esse materiæ, & aliena stomacho, & facile intus corrupti passum, & mulsum pronuntiavit. Certe etiam Dioscorides (de med. Mat. l. 5 c. 7) istud ipsum passum Creticum de quo Martialis, & cui Plinius (loc. citat.) primatum dedit, *inflare tamen, & stomacho adversari*, docuit. Africum vero de quo verba facit Palladius, an hæc non faceret, aut minus quam mel faceret, meum non est in præsentia decernere; neque enim Palladii hallucinationes, si quæ forte essent, defendere, sed verba tantum exponere institui. §. 20. Veg. 1, 56 Quibus ita expositis haud difficile fuerit unum, aut alterum non modo intelligere, verum etiam restituere P. Vegetii locum. Libro enim 1. Artis Veterin. cap. 56 (l. 22) *si hiems, inquit, fuerit; condita, cum semiuncia apii seminis triti, & olei tribus uncis calefacta per os ipsius (equi) oportet infundi. Si æstas fuerit; absinthium vel rosatum cum quatuor scrupulis croci, & duabus uncis olei frigidum per os similiter debet accipere. Quorum si non suppetit copia, vinum simpliciter convenit præberi cum cæteris.*

Hic Sambucus ex suis codicibus pro vinum in libri ora reponit unum, repugnante Vegetio, cujus hæc sententia est: cum apii semine, & oleo, vel cum croco & oleo vinum simplex ab eo esse dandum, cui condita nulla sint hieme, æstate autem neque sit absinthiatum, neque rosatum: *absinthiatum* enim esse legendum, indicant, quæ commemoravimus, Palladii verba: *Conditum vel absinthiatum, vel rosatum.* Quibus addi possunt & illa Lampridii (in Heliogab.) *condito piscinas, & solia temperavit, & rosato atque absinthiato vulgus ad bibendum invitavit.* §. 21. Veg. 4, 8 Pariter libro Vegetii ultimo cap. 8, ubi editum est: *post cursum, sive post laborem conditi bene piperati heminam adjicies, æstate roris vel absinthii tantundem, & per os dabis ad cornu; legendum crediderim, æstate rosati vel absinthiati tantundem; non modo quia in illo priore loco sine ulla controversia est: si æstas fuerit, rosatum convenire, sed etiam quia in hoc ipso loco Sambuci codices pro roris, habent olei rosati; ut mihi aliquando hisce ambobus locis collatis in mentem venerit, hic esse scribendum olei & rosati.* Etsi vero iidem, alique Codices pro conditi bene piperati habent, *conditi bene præparati*, nihil tamen (quod ad hoc attinet) esse facile mutandum, ostendunt, quæ supra de pipere memoravimus usque adeo conditis adjecto, ut hæc etiam piperata vocitarentur, quod non inficiabimur a Celso (de Medicin. l. 4 cap. 19) esse factum, ubi malum punicum in piperatum conjici, jussit. Cæterum an de pluribus Vegetii locis in quibus *vinum candidum* scriptum est, nonnulla saltem sic oporteat emendare, ut alibi *vinum calidum* alibi *vinum conditum* legamus, ipse constitues; ego jam transeo ad Varronem. §. 22. Varro 2, 4, 8 De Varrone, ad ea quæ scripseram, nihil hoc tempore est, quod addam, nisi quam ob rem in lib. 2. cap. 4 Aufonium Popmam laudaveram eam rem fuisse



fuisse ante ab Josepho Scaligero ( conjectan. in Var-  
ron. ) non animadversam modo, sed etiam probatam.  
Quod autem supra in extremo capite 2 ostenderam,  
non bene scriptum esse, *ut dixi*, cum scribendum vi-  
delicet fuisset, *ut dixisti*, id vero sic a te accipi, ve-  
lim, ut si quis Varronem malit, quam librarios erra-  
visse, ipse acrius non repugnem. Illud enim mihi  
propositum fuit, ut errorem ab aliis non animadver-  
sum reterem, ejusque, si librorum crederetur,  
emendationem proponerem. Equidem hos longe  
facilius, quam Varronem; hunc tamen falli ipsum  
quoque potuisse, confiteor, in re præsertim ejusmo-  
di, in qua si quis dicat, Marci etiam Tullii diligen-  
tiam aliquando desiderari; illum ego refellere magis  
cupiam fortasse, quam possim. Hæsi nimirum, ne  
tecum quidquam, mi Juli, dissimulem; cum in libro  
5 de finibus cap. 8 hæc nuper relegerem: *quoniam  
igitur & de voluptate cum Torquato, & de honestate,  
in qua una omne bonum poneretur, cum Catone est dis-  
putatum &c.* Quæ si ab ipso Tullio dicerentur,  
aut certe ab aliquo, qui duabus illis superioribus dis-  
putationibus interfuisset; res plana esset atque expedi-  
ta. Dicuntur autem a M. Pisone, qui non modo  
ipse non interfuerat, sed eas ne legisse quidem pote-  
rat, quippe quem epistolæ ad Atticum ( lib. 13. e-  
pist. 19 ) docent, antequam disputationes illæ confi-  
cerentur, decessisse; ne ipsas dicam satis docere, non-  
dum habitas confingi eo tempore, quo eas M. Piso  
commemorabat. Neque minus hæreo, cum aut in  
2 libro de natura Deorum sic loquens, cum Vellejo  
inducitur Balbus: *velut a te ipso hesterno die dictum  
est, anum fatidicam & pavoris a Stoicis induci*; aut cum  
in tertio sic Cotta cum Balbo: *omniaque quæ a te nu-  
dius tertius dicta sunt, cum docere velles, Deos esse  
&c.* quasi vero non id Vellejus in primo, neque  
hæc in secundo libro Balbus dixisset, & hi tres libri  
( quod singulorum ostendunt initia ) non unius diei  
sermones complecterentur. Quid ergo est? Num  
cuique ( id quod Tullius in Bruto fatetur ) *difficile  
est in longa oratione non aliquando aliquid ita dicere, ut sibi  
ipsi non conveniat*, præsertim aliud alio tempore suis in  
scriptis mutanti, quod Ciceronem maxime in Dialo-  
gis fecisse constat. Nam certe ( vid. Epist. ad Atti-  
cum lib. 13. epist. 13, 15, 19 ) Quæstiones Academi-  
cas a Catulo, Lucullo, Hortensio, ad Varronem trans-  
tulit, & ex duobus libris in quatuor contulit.  
Num igitur offensus prolixitudine disputationis de

Natura Deorum, cum quod in ea de Legibus ( vid.  
fin. lib. 2. de Legib. & lib. 3 ) fecit, facere hic ne-  
quiret aut nollet, ut diei longitudinem inculcaret;  
habuit in animo aliquando id facere quod in libris  
de oratore, aliisque, ut eos sermones in plures di-  
stribueret dies, neque tamen publicis occupationibus,  
& calamitatibus impeditus, perfecit. Num pari-  
ter libros de Finibus sic primum informaverat, ut  
quemadmodum in iis de officiis, unus ipse doceret,  
tractaretque omnia, quæ deinde cum in Dialogos  
conferret, illa obvenirent dicenda M. Pisoni, quæ  
ipsum dixisse Ciceronem dicebat? Quæ si ad hunc,  
aut alium aliquem non absumilem modum contigisse  
arbitremur; videlicet Varro etiam poterat eam pri-  
mum omnem orationem aut Scrofæ aut Attico tri-  
buisse, quam inter utrumque diviserit postea.  
Certe nobiles quoque ex nostris Poetæ, & in his Lu-  
dovicus Ariostus, & Torquatus Tassus, cum hic cer-  
tam quandam rem delevisset, ille vero unum aut al-  
terum verbum mutasset, obliti respondentia etiam alia  
tollere, ac commutare, versus præsertim duos ( G.  
Liberata Cant. 16 St. 35 v. 4. O. Furioso Cant. 23.  
St. 107. v. 8 ) reliquere, quorum alterum non satis  
intelligi, alterius verba cum superioris verbis mini-  
me cohærere, vel studiosissimi eorum homines confi-  
tentur. Quod si idem Tullio, aut Varroni accidisse,  
nullo pacto fateri quis audeat; Varronem qui-  
dem, ut tueri possit, docuimus, ut Tullium, ipse  
viderit. Nobis enim non modo his diutius hic im-  
morari non licet; hæc epistola est concludenda.  
Summa ergo est, primum, ut inter legendum, quas  
ad Facciolum scripsimus litteras, has quoque iden-  
tidem inspicias, neque propterea quod iis omnibus  
in locis, de quibus ( ne frustra longi essemus ) sili-  
mus, cunctæ nobis editiones adversantur, conjectu-  
ras nostras continuo abjicias, immo, si necessariæ  
videantur, hoc ipsas magis quantulacunque sunt,  
probes, quod labeculas indicent sub tot exemplarium  
auctoritate facile delitescentes. Deinde fac, illud  
memineris; si hæc nostra erga tuos Auctores seduli-  
tas grata est, si ab hac porro alia atque alia expe-  
ctas; unam hanc in posterum tibi fore & sensum tuum  
ostendendi, & nostra eliciendi facultatem, si tuas vi-  
cissim ad illos annotationes perscripseris, & nobiscum  
tandem aliquando communicaveris. Vale.

Patavii Postrid. Idus Mart. M D C C X X I I I.

## E P I S T O L A I I I.

JOANNES BAPTISTA MORGAGNUS

JULIO PONTEDERÆ

S. P. D.

**E**T si ex meis ad Rei Rusticæ Auctores Adnotationi-  
bus nulla unquam alia eorum Studiosis existet uti-  
litas; hanc tamen, quod expresserint tuas, tantam es-  
se, existimabunt, ut non vulgarem ex meis cepisse se  
fructum, fateantur. Quo magis ea præstare me,  
debet, quæ superiore Epistola pollicitus sum, ut ne-  
que tu, qua es modestia, suspiceris, non satis mihi  
forrasse, quas adhuc miseris, placuisse, & illi intel-  
ligant, quod alias atque alias addideris, id quoque  
huic nostro, quaecunque est, exemplo, & adhorta-  
tionibus se debere. Cum Pub. Vegetius in suos de  
Arte Veterinaria libros non pauca transtulit e sexto  
libro Columellæ, tum ex hujus sexto, & tredecim  
quæ insequuntur; capitibus, tertii sui libri tertium,  
& quartum caput evidentissime confecit. In hæc  
ego cum plurima passim menda Librariorum imperi-  
tia socordiaque irrepsisse, animadverterem, sic ut haud  
paucis in locis aut alienissima ab re legantur, aut  
quæ nullo modo intelligi queant; vitia hæc existima-  
Morgagni Opusc.

ham propria esse principis Editionis, non alterius et-  
iam communia, quam anno 1574 procuravit Joan-  
nes Sambucus Vir Doctissimus, & pervetustis Codici-  
bus sane instructissimus. Superioribus tandem  
mensibus hujus mihi Editionis copia facta est.  
Quid quæris? Codicum, nonnunquam, ut verum  
fatear; haud inutilium sæpius tamen in gravissimis  
apertissimisque mendis mirifice consentientium, ratio  
habetur; Columella autem, unde illa ipsa capita  
certe fuerant primum descripta, ne memoratur qui-  
dem. Non me fugit, quantum vetustorum Co-  
dicum auctoritati, atque consensui, quantum etiam  
Vegetii ipsius arbitrio, ætati, & in scribendo con-  
suetudini tribuendum sit. Hic tamén sæpe men-  
da sunt ita evidentia; emendationes autem occur-  
runt ita faciles, & necessariae, ut nisi Vegetii ipsius  
ἀντίγραφον producat, nemo sit, qui persuadere pos-  
sit, Codices non esse corruptos, neque ea quæ a Co-  
lumella præmonstratur, ratione emendandos. Quid  
ergo



ergo est? Num in Vegetio relinquendum est nihil, nisi quod in Columella inveniatur? Imo plura sunt fortasse etiam mendosa, quæ tamen in præsentia quidem tentare non ausim. Nonnulla quoque ejusmodi sunt, ut Columellæ vicissim emendando præclare inserviant, de quo nunc potissimum laboramus. Quæ cum ita sint, operæ pretium arbitror me esse facturum, si locos singulos, quorum alter alterius ope indiget, inter se conferam, atque

*Vegetii 3, 3, 1.*  
Cruditatis plurimum nocet, cuius hæc sunt signa: crebri ructus, cibi fastidium, sonitus ventris. (1) intensiones nervorum, oculi hebetes: propter quæ nec bos ruminat, neque linguam detergit, ut solet. Prodest itaque (2) ut duos congios (3) ubi bibi possit digerere per fauces. Post quos statim brassicas triginta caules modicas decoques, & ex aceto dabis.

Sambucus ex Codicib. in marg.

(1) *Contractiones* (2) *calide*. (3) *ut* Idem *brassica* habet, non *brassicas*.

*Calidæ ut bibi possit*, non aliter est accipiendum, quam si dixisset, ita calidæ, ut tamen bibi possit, quemadmodum fere dixit altero hujus libri capite 3 *calidum ita, ut manus pati possit*. Hanc emendationem, ut vides, Sambuci codicibus ex parte debemus: Columellæ autem reliquas.

Cæterum velim proposita cruditatis signa attendas,

*Veget. 3, 3, 2 & 3.*  
(1) Præterea lentisici & oleastri cacuminum pondera 4 deterunt, & cum lib. mellis atque aquæ congio miscunt (& paulo infra) ab alio quoque cibo vel potione prohibentur. Nam si neglecta fuerit cruditatis, ventris inflatio intestinorumque subsequitur, exprimit gemitus, cibosque capere non sinit, nec in loco consistere, decumbere, & volutare cogit, caudamque frequenter commovet. (1) *quibus lentisici* Samb. in marg. ex Cod. Idem non habet *aquæ*.

Hic noli mirari, quod omnia in Vegetio non correxerim. Equidem nonnulla facile deesse, & quænam desint, agnosco; sed quibus potissimum verbis reponenda sint, pro certo non video. Quæ emendavi, ea minus dubia erant.

Pariter in Columella minus dubitavi rescribere *libram mellis*, reputans quam facile librarii de duabus proximis literis *m* una omissa, *libra* scribere potuerint perperam. Post fieri addidimus *debet*; nam & verbum ejusmodi desiderabatur, & Columella hoc

*Veget. 3, 3, 4.*  
Si tardius proficit, tres partes lauri diu conteruntur, & cum duplici aquæ calidæ dantur. (1) Si ista non valent, myrtæ foliorum sylvæstris duæ lib. tunduntur in pila, & (2) duæ ex calida aqua miscuntur, ac per vas ligneum faucibus infunduntur. (1) *si laurus non adest*. (2) *dico* sextarii, Samb. in marg. ex Cod.

Hic quoque intelligo, alia insuper in alterutro Auctore esse posse depravata, præsertim si quæ Sambucus ex Codicibus adnotavit, sic legenda censeas, *duo sextarii*, eaque illuc pertinere, ut pro *duæ ex calida aqua*, intelligamus Vegetium scripsisse, *duo sextarii ex calida aqua*: quæ cum Columella omnino consentirent. Sed quoniam suo uti iudicio atque arbitrio Vegetius potuit; idcirco in ipso ne *myrtæ* quidem

*S. 1.*  
*Columella 6, 6, 1.*  
Cruditatis signa sunt crebri ructus, ac ventris sonitus, fastidia cibi, nervorum intentio, hebetes oculi. Propter quæ bos neque ruminat, neque lingua se deterget. Remedio erunt aquæ calidæ duo congii, & mox triginta brassicæ caules modice cocti, & ex aceto dati.

*Vegetius emendatus.*

nec bos ruminat, neque lingua se detergit, ut solet. Proderis aqua calidæ, ut bibi possit, duos congios digerere per fauces. Post quos statim brassicæ triginta caules modice decoques, & ex aceto dabis.

& si pleraque ejusmodi esse, videas, non ut inde effici, sed ut iis adjici potius queant illa duo, quæ continuo subjiciuntur, intermissa videlicet ruminatio, & ea quæ fit per linguam, deteritio; tum vero cogites, oporteatne in utroque Auctore rescribere præter, quæ, ubi legitur ab omnibus propter quæ.

*S. 2.*  
*Colum. 6, 6, 2 & 3.*  
Tum lentisici, oleastrique cacuminum pond. 4, & libra mellis una trita permiscunt aquæ congio (& infra) aliaque potione prohibent. Hoc per triduum fieri, dum omnis causa languoris discutitur. Nam si neglecta cruditatis est, & inflatio ventris, & intestinorum major dolor insequitur, qui nec capere cibos sinit, gemitus exprimit, locoque stare non patitur, sæpe decumbere, & agitare caput, caudamque crebrius agere,

*Veget. emend.*

decumbere & volutari cogit, caudamque frequenter commovere,

*Colum. emend.*  
Tum lentisici, oleastrique cacuminum pond. 4, & libram mellis, una trita, permiscunt aquæ congio (& infra) aliaque potione prohibent. Hoc per triduum fieri debet, dum omnis causa languoris discutitur. Nam si neglecta cruditatis est, & inflatio ventris, & intestinorum major dolor insequitur, qui nec capere cibos sinit, gemitus exprimit, locoque stare non patitur, sæpe decumbere, & agitare caput, caudamque crebrius agere cogit.

uti solet, velut cap. 9. *Quæ medicina sub testeo fieri debet.* & lib. 7 c. 5 *quod in omnibus morbis, ac pestibus fieri debere censemus* &c. ad extremum etiam addidimus *cogit*, verbum non minus ibi desideratum, & a Vegetio facile ex Columella descriptum, & præterea ab non recenti manu additum (ex ingenio an ex Codicibus?) in uno ex tuis Columellæ exemplaribus, in quo etiam ante *gemitus* conjunctio & satis eleganter est interjecta.

*S. 3.*  
*Colum. 6, 6, 4.*  
Si nec hæc profuit res, caprifici aridæ conteruntur, & cum dodrante aquæ calidæ dantur. Ubi nec medicina processit, myrti sylvæstris foliorum duæ lib. deligantur, totidemque sextarii calidæ aquæ misti per vas ligneum faucibus intunduntur.

*Veget. emend.*

Si ista non valent, myrtæ sylvæstris foliorum duæ lib. tunduntur in pila &c.

*Colum. emend.*

Ubi nec hæc medicina processit, myrti sylvæstris foliorum duæ lib. levigantur, totidemque &c.

mutavimus, cum libro etiam 2 cap. 12 *myrtam aridam conterendam* scripserit, aut veteres secutus, qui pro myrto *myrta* dixere, aut suæ vel tempestatis, vel regionis consuetudine quadam abreptus, nam a suis quoque Gallis myrtum vocitari *murtam*, Joannes Ruellius (de natura Stirp. lib. 1 c. 100) testatus est.

In Columella cur addiderimus voculam *hæc* nostra ad Cl. Facciolatum Epistola ostendit. Certe etiam

Luca.



Lucano non usque adeo ingratus visus est harum vularum concursus, nec hæc, ut non scripserit (Pharsal. lib. 3) nec hæc alius committat prælia miles; neque Varroni (de re rustica 1, 55, 3) qui nec hæc, inquit, non minima causa.

Quod autem pro delignantur substituerimus lævigantur, duæ fuerunt causæ, altera quod delignantur ab sententia alienum est, altera quod lævigantur a Vegetio indicatur; tunduntur, inquit, in pila.

Sic alibi etiam loquitur Columella (lib. 6 cap. 17) semina ejus collecta, & lævigata cum vino dantur potanda, pro quibus hæc habet Vegetius (lib. 4 cap. 4) semina ejus collecta, & trita dantur ad potandum cum vino. item (lib. 7 c. 5) galla cum austero vino lævigata: (lib. 9 c. 13) omnia eadem aquis ponderibus in unum lævigata: & (lib. 12 c. 41)

quæ in collo subsiderunt, diligenter contrita lævigantur. Quæ loca sunt eo diligentius attendenda, quod in amplissimis Lexicis latinis hic verbi lævigo significatus omittitur, qui hodieque, ut nosti, apud Medicos in usu est, cum aliquid imperant non modo conteri, sed ut ipsorum verbis (Amalth. Castello-Brunon. in Lævis) utar, insuper redigi in pulverem impalpabilem exquisitissimæ lævitatatis, qui & Alcool a quibusdam dicitur, & fit quidem manu, vel tritura super marmore cum porphyrite, vel in mortario cum pistillo, ita ut quod contritum est, excutiat per setaceum, vel linteum. Ita verbum lævigo, respondet græcis λαινω & λαινω, quibus non tantum complanare, & polire, verum etiam terere, molere, comminuere, & ex asperis ac duris in lævem pulverem redigere significabant, ut Aristoteles lib. 2 anim.

#### Veget. 3, 3, 5.

Ante detractionem tamen sanguinis adhibentur ista remedia: tribus heminis vini, quatuor uncias contriti (1) olei permiscuntur, postque potionem cogetur currere: duæ quoque uncias salis cum decem uncias ceparum atteruntur: mel quoque decoctum admiscetur, ex quo facta collyria longiora non parum valida immittunt in anum, ut ventrem resolvant.

(1) allii Samb. in marg. ex Cod. qui non habet ista.

#### S. 4. Colum. 6, 6, 5.

Sunt & ante detractionem sanguinis illa remedia, tribus heminis vini tres uncias pinisti allii permiscuntur, & post eam potionem currere cogitur. Vel salis sextans cum cepis decem conteritur, & admixto melle decocto collyria immittuntur al.

30.

#### Veget. emend.

Ante detractionem tamen sanguinis adhibentur ista remedia: tribus heminis vini, quatuor uncias contriti allii permiscuntur, postque potionem cogetur currere: duæ quoque uncias salis cum decem cepis atteruntur &c.

Ut ad Facciolatum nostrum scripsi, ita hic Vegetium ex Columella duobus in locis emendo. Primam emendationem, & res ipsa, & Sambuci codices firmant. Alteram necessariam esse intelligent, quicumque ista collyria & pro bove, & longiora, & non parum valida esse, attenderint; neque enim satis crassa, & longa e dextante fient ceparum, salisque sextante, nisi multo insuper melle adjecto, multo autem addito melle, qui esse poterunt non parum valida, cum acrem videlicet ceparum vim, salisque stimulum nimia mellis copia obruet atque infringet. Quod si quis forte valida hic dictum accipiat, non ut

lib. 4 c. 10 confectio non minus valida; sed ut dura significet, quando lib. 1 c. 42 hæc scribuntur: Sal bene tritum, & mel coques, pastillosque longos, & duos facies, & in anum jumenti interius immittes. is libri hujus tertii inspiciat caput 57. hæc nimirum, & in ejusdem modi quidem morbo proposita, inveniet: cepas decem veteres, ficus sicca 8 (Samb. Cod. uncias quatuor) nitri scrupulos quinque, stercore columbini scrupulos quatuor, ex quibus addita urina collyria facies, & bina vel terna in anum immittes.

#### Veget. 3, 3, 7 & 8.

Sed interdum in (1) illa medicina convenit, sequiturque (2) omnium vitium, quorum signum est, si exuentum & mutosumque ventrem ediderit, singulare remedium est (3) cupressinæ quindecim, verbenæ quindecim gallæ diligentissime tritæ, quantum utræque ponderantur tanti ponderis vetustissimus caseus, quibus pariter detritis admiscuntur vini austeri sextarii 4, & in potu dantur, ita ut lentisco mixtaque oleastri cacumina præbeantur. Si venter coeperit fluere, (4) & videris egere corpus, & vires & capto plerumque inutilem reddit, quia ex cibariis ad medellani bovis nil pervenit, quod sic videris per ventrem projicit quam quod manducaverit. Quæ cum acciderint, &c.

(1) nulla (2) torminum. (3) cupressi baccas, & Gaubæ ana XV bene tritas, & tantundem vetustissimi casei. (4) viride, quale manducant. Samb. in marg. ex Cod.

#### S. 5.

Colum. 6, 7, 1 & 2. Sed interdum nulla prodest medicina. Sequitur torminum vitium, quorum signum est cruenta & mucosa ventris proluvies. Remedia sunt cupressini quindecim coni, totidemque gallæ, & utrorumque ponderum vetustissimus caseus, quibus in unum tunc admiscuntur austeri vini quatuor sextarii, qui pari mensura per quatrimum dispensati dantur: nec desint lentisci, myrtique, & oleastri cacumina viridis. Alvus corpus, ac vires carpit, operique inutilem reddit: quæ sum accident &c.

#### Veget. emend.

Sed interdum nulla medicina convenit, sequiturque torminum vitium, quorum signum est, si cruentum mucosumque ventrem ediderit. Singulare remedium est cupressinæ quindecim verbenæ, & quindecim gallæ diligentissime tritæ, & quantum utræque ponderantur, tanti ponderis vetustissimus caseus; quibus pariter detritis admiscuntur vini austeri sextarii 4 & in potu dantur, ita ut lentisci, myrtique & oleastri cacumina præbeantur. Si venter coeperit fluere viridis, & quale manducans egere corpus & vires carpit, operique inutilem reddit, quia ex cibariis ad medullas bovis nil pervenit.

#### Colum. emend.

Remedio sunt cupressini quindecim coni, totidemque gallæ, & utrorumque ponderis vetustissimus caseus, quibus &c.

Et si plura menda ex Vegetio sustulimus, & in his duo illa obelo notata, quæ pro desperatis in prima Editione relicta erant, non tamen omnia sublata esse, existimamus. Fortasse ubi de torminibus sermo incipit, ibi oratio prorsus est a superiore disjungenda; nam in ipso etiam Columella, inde hoc caput 7 videtur fuisse inchoandum, aut ille ex Vegetio emendandus, atque ita ambo intelligendi, ut dicant, adversus cruditatem, & intestinorum dolores nullam interdum medicinam proficere, indeque tormina consequi. Fortasse Vegetius paulo post scripsit, ventre reddiderit non ventrem ediderit. For-

tasse medicamentum in quatrimum esse partiendum, non omisit. Fortasse ut alia præteream, extrema verba, quæ emendare, a Columella, & Codicibus destituti, ausi non sumus, aut ad hunc fere modum scripserat: quod sic videris; plus enim per ventrem projicit, quam quod manducaverit; aut ad hunc alterum: quod sic viride per ventrem projicit, quam quod manducaverit; neque enim, puto, in Vegetio te offenderit, sic viride --- quam, memoria tenentem, scriptum esse a Propertio (lib. 2 Eleg. 5 al. 4) non ita --- variant --- quam. Eorum autem quæ emendando rescripsimus, partim ita evidenti-

tia



ria sunt, nulla ut egeant probatione, partim confirmari possunt facillime, velut hoc: *Si venter cape-rit fluere viridis, & quale manducant, egerere.*

Nam simul Editionum, simul Codicum vestigia observavimus, ad eundemque modum locutum esse Celsum ( de Medic. lib. 2 c. 8 ) meminimus: *si nigra alvus profluxit, & nigra alvus sanguini atro similis; ut suspicati interdum sumus, legendum esse in Columella, non viridis. Alvus; sed Viridis alvus, præsertim cum in superiore capite, lentisci pariter, oleastrique cacumina imperans, viridis non adjecerit.*

Utcunque est; in Vegetio *venter viridis* ita intelligendus est, ut addita a nobis ex Sambuci Codicibus verba demonstrant; & commentarii loco esse poterit initium ejus Celsi capitis ( lib. 4 c. 16 ) quod tractationem lævitatatis intestinorum cum tractatione connectit torminum: *Ex torminibus interdum intestinorum lævitas oritur, quæ continere nihil possunt, & quidquid assumptum est, imperfectum protinus reddunt &c.* Quod vero non ad medelam bovis scripserim, sed ad medullas bovis, in causa fuit non modo sic aptior sententia, verum etiam Vegetii ipsius alter locus ( lib.

#### Veget.

Pabulaque superius præbent. Aliqui vero 2 lib. ex (1) vinaceis ad focum torrent & conterunt, & cum sextario vini austeris ad bibendum dant, & cum mērata sæpius cacumina objiciunt

(1) *vinaceis*, Samb. in marg. ex Cod. qui pro *superius* habet *sæpius*.

#### §. 6.

##### Colum. 6, 7, 3 & 4.

Eademque pabula, ut supra diximus, objiciant. Quidam vinaceorum duas libras torrefaciunt, & ita conterunt, & cum totidem sextariis vini austeri, potandum medicamentum præbent, omnique alio humore prohibent, nec minus cacumina prædictarum arborum objiciunt.

#### Veget. emend.

Pabulaque, quæ superius præbent, Aliqui vero duas libras ex vinaceis, ad focum torrent, & conterunt, & cum 2 sextariis vini austeri ad bibendum dant, & commemorata sæpius cacumina objiciunt.

Hic, ut opinor, haud miraberis, vel quod ad sententiam perficiendam quæ addiderim; nosti enim quam facile Librariis fuerit de duabus proxime iteratis voculis unam transilire; vel quod pro *sextario* rescripserim 2 *sextariis*; vides enim ex duabus vinaceorum li-

bris, & vini uncis non amplius viginti spissam nimis potionem confici. Sane & Columella hic duos addit vini sextarios, & Vegetius modo ad lauri & abrotani libras duas, non minus totidem sextariis addiderat.

#### Veget.

Quod si neque proluvis ventris erit, neque intestinorum dolor, recusat tamen cibos, & prægravato capite erit: lachrymæ quoque oculis & pituita naribus currit, usque ad ossa frons media uratur, aureque ferro discindantur, sed usturæ igneæ factæ, ut sanescant &c.

#### §. 7.

##### Colum. 6, 7, 4.

Quod si neque ventris resisterit citata proluvis, neque intestinorum, ac ventris dolor, cibosque respuet, & prægravato capite, si sæpius quam consuevit, lachrymæ ab oculis, & pituita a naribus profluent, usque ad ossa frons media uratur, aureque ferro scindantur. Sed vulnera facta igne, dum sanescunt &c.

#### Veget. emend.

Quod si neque proluvis ventris erit, neque intestinorum dolor, recusat tamen cibos, & prægravato capite est, lachrymæ quoque oculis, & pituita naribus currit, usque ad ossa frons media uratur, aureque ferro discindantur. Sed usturæ igneæ factæ, ut sanescant &c.

#### Colum. emend.

Quod si neque ventris erit citata proluvis, neque &c.

Vocat hic Vegetius *usturas*, quas alibi *ustiones*, ut Scribonius, aut *usta*, ut Celsus, vocaverat ( lib. 2 c. 14. 48. 49. 36 ) & Celsus quidem *adusta*, sæpius dixit; aliquando ( l. 5 c. 9 ) tamen dixit *igne adusta*, ut minus miremur, Vegetium scripsisse, *usturæ igne factæ*. Sunt enim etiam medicamenta, quæ adurant, & *crustas ulceribus tanquam igne adustis inducant*. Etiam Celsus etsi *adusta* appellare *ulcera* consuevit; nonnunquam tamen ( id quod alii etiam fecerunt medici ) *vulnera* appellavit, ut ubi ( l. 5 c. 28 sect. 1 ) carbunculum docuit adurere. *Finis*, inquit, *adurendi est, dum ex omni parte sensus doloris est*. Tum deinde *vulnus*, sicut cætera *adusta*, curandum est; unde intelligitur, liquisse etiam Columellæ scribere, *vulnera facta igne*. In Columella tamen illud præcipuum mihi fuit, ut verbum istud *resisterit*, quod non satis mihi unquam placuit eo in loco, diligentius considerarem. Vidi nuper, Jensonianam Editionem habere creverit pro *resisterit*, id quod meam de hoc verbo suspicionem adauxit. Tum animadverti in proximo capite transitionem similem: *Si neque ranæ fuerint, neque alvus citata, & nihilominus cibos non appetet*. Itaque in eam

opinionem adductus sum, ut censerem, absoluto sermone de torminibus, transire hic Columellam ad alium morbum, adversus quem ustionem videlicet frontis usque ad ossa imperet. auxilium certe in dysenteria ab nemine, quod sciam, propositum. His de causis verbum *erit*, quod facile ex Columella Vegetius descripsit, mihi placuit rescribere; jure, an secus, ipse arbitraberis. Hæc quoque dispicias velim in principio, & sine insequentis capitis, quæ non est, ut cum Vegetio satis conferre possimus: *Solent etiam fastidia cibo afferre vitiosa incrementa linguæ*. Hic mihi videtur legendum *cibi vel ciborum*.

Item: *sed hæc his solum fastidium est*. Hæc vero sic fortasse sunt rescribenda: *Sed hæc, si solum fastidium est; ut sententia sit quæ ei loco maxime convenit*. Sed hæc proderunt, si neque ranæ, neque alvus citata, sed solum cibi fastidium fuerit. Eandem sententiam videtur spectasse, qui in Juntina Editione sic emendaverat: *Sed hæc his solum fastidium tollunt*. Verum neque id verbi in ulla præterea editione est, & his non cohæret cum proximo verbo appetet.



## Veget. 3, 4, 1.

Interposita hora trigesima (1) parvos aculeos decoques, & ex oleo ac liquamine per os digeres, eamque escam per dies quinque jejuno dabis. Præterea cacumina (2) lentium, vel olivarum, vel tenerimum quemque frondem, ac pampinos, si eodem tempore sunt, præbebis in cibo. Labra quoque ejus deterges ad (3) spongiam.

(1) *Strigium ex ol. ac liq. coquas, & per* (2) *lentisci,* (3) *spongia. Samb. in marg. ex Cod.*

Hoc in loco non cur cætera emendaverim (per se enim id liquet) sed potius cur ad spongiam non emendaverim, dicendum est, præsertim cum in Codicibus Sambuci esset *spongia*. Nimirum idem esse Vegetio ad spongiam, & *spongia*, plura ejus monstrant loca. Sic in superiore capite 3 etiam

## Veget. 3, 4, 4.

Si recens fuerit (tuffis) sextarius farinæ hordeaceæ, cum uno ovo crudo, & hemina passii per os datur jejuno: gramen quoque concisum, tunsumque admixta farina fabæ frixæ, & pollinis lentis (1) sextario aquæ calidæ miscetur.

(1) *sine cortice sextariis duobus aqua Samb. in marg. ex Cod.*

Fabæ frixæ apud Galenum (de Alim. Facult. 1. c. 19) quidem, Oribasium (Euporist. lib. 1 c. 19) aliosque veteres mentionem invenio. Sed qui fabam frixam adversus tussim laudaverit, aut in farinam redigi, scripserit, non memini invenisse. Plinius (Nat. Hist. 1. 22 c. 25) quoque, cum utrumque memorat, fressam ad tussim laudat; non frixam. *Faba*, inquit, *solida fricta fersensque in acre acetum coniecta, torminibus medetur.* In cibo fressa, & cum allio cocta, contra deploratas tusses, suppuratio- nesque pectorum quotidiano cibo sumitur. Quoniam tamen non modo Columella mox proponit *hordecum torrefactum*, *molitum*, adversus tussim; sed ad hanc ipsam capite 65 hujus libri laudat Vegetius *farinam*

## Veget. 3, 4, 5.

Veterem tussim sanant duæ libræ hyssopi maceratae ex aquæ sextariis tribus, quod infusum teritur, & cum duabus partibus (1) farinæ miscetur, & per os datur, super quod aqua hyssopi, in (2) aqua decoctum, infusum, decoctumque (3) etiam propinatur ad cornu.

(1) *lensis* (2) *qua.* (3) *est Samb. in marg. ex Cod.*

Declarat Vegetius, quid nomine *aquæ hyssopi* intelligendum sit, eamque ipsam esse, dicit, ex qua hyssopum jussit macerari, & ex qua, si placet, coqui etiam potest. Igitur cum perperam vox *decoctum* itereatur; videas velim, num primo loco delere ipsam deceat, an mutare, quod feci, in *videlicet* an forte in,

## Veget. 3, 4, 6.

Porri etiam succus expressus cum oleo & ipsi febri cum hordeacea farina remedium præstant (& mox). Idem præstat ervum, si in pabulis cum ptisana hordei molitum, & cum aqua tepida vel mulsa in fauces salivanti ore dimissum.

Porrum ipsum quod & alii Auctores faciunt, capite hujus libri 65 ad tussim commendat Vegetius, quod vicissim ad febrem commendare non memini. Quo minus dubitandum est, quin jure ipsi febri, de qua sermo est supra absolutus, in ipsa fibra mutaverimus, non ignari etiam Catonem (de Re Rust. c. 70) ita esse locutum, *porri fibras III.* Quod au-

## S. 8.

## Colum. 6, 9, 1.

Interposita hora, modicæ magnitudinis coctos brassicæ coliculos triginta ex oleo & garo salviati more demitti (convenit) eamque escam per quinque dies jejuno dari. Præterea cacumina lentisci, aut oleæ, vel tenerimam quamque frondem, aut pampinos vitis objici, tum etiam spongia labra detergeri.

## Veget. emend.

Interposita hora, trigesima parvos coliculos decoques, & ex oleo, ac liquamine per os digeres, eamque escam per dies quinque jejuno dabis. Præterea cacumina lentisci, vel olivarum, vel tenerimam quamque frondem, ac pampinos, si eodem tempore sunt, præbebis in cibo. Labra quoque ejus deterges ad spongiam.

scripsit, ad acutam cannam execes ranulam; pro acuta canna, in secundo autem, ad acum vel acutum cuprinum pars auriculæ signatur pro acu, vel acuto cuprino, & paulo post, perforas ad acum pro perforas acu &c.

## S. 9.

## Colum. 6, 10, 1.

Recens tussis optime salviato farinæ ordeaceæ discutitur. Interdum magis profunt gramina concisa, & his admixta fressa faba. Lentis quoque valvulis exentæ, & minutæ molitæ, miscentur aquæ calidæ sextarii duo.

*faba frixa*, capite autem 69 *lentem* ac *fœni græci*, & *lini semen frigere separatim*, & *pulverem facere* profuturum tussientibus, jubet; idcirco, etsi in Sambuci Cod. erat *terere* pro *frigere*, in præsentia tamen nihil in his verbis mutare volui. Insequentia pariter consulto non attigi, cum dubitarem, essentne omnia secundum Sambuci Codices restituenda, & ad Columellam exigenda, an vero contra in Columella etiam scribendum esset sextario pro sextarii duo: quod ni fiat; certe aliter verba sunt distinguenda, ut scribamur *minute molitæ*. *Miscentur*. Fuit etiam cum suspicaret, pro *salviato farinæ ordeaceæ*, legendum esse ex Vegetio *sextario farinæ ordeaceæ*. Sed de *Salviato* paulo infra.

## S. 10.

## Colum. 6, 10, 1.

Veterem tussim sanant duæ libræ hyssopi maceratae sextariis aquæ tribus. Nam id medicamentum teritur, & cum lentis minutæ, ut dixi, molitæ sextariis quatuor more salviati datur, ac postea aqua hyssopi per cornu infunditur.

## Veget. emend.

Veterem tussim sanant duæ libræ hyssopi maceratae ex aquæ sextariis tribus, quod infusum teritur, & cum duabus partibus farinæ lentis miscetur, & per os datur, super quod aqua hyssopi, in qua videlicet infusum, decoctumque etiam est propinatur ad cornu.

ut dictum, quod ut ab ipsa scriptura propius abest, ita reposuissim, si decoquendum esse, supra dixisset. Quod autem scribit infundendam esse non per cornu, ut infra, atque alibi etiam, sed ad cornu; nimirum ita loqui sæpius solet, ut lib. 2 c. 28. lib. 3 c. 12. 45. 54. 65. 67. 78 &c.

## S. 11.

## Colum. 6, 10, 2.

Porri etiam succum oleo, vel ipsa fibra cum ordeacea farina contrita remedio est (& mox). Facit idem pari mensura ervum sine valvulis cum torrefacto ordeo molitum, & salviati more in fauces demissum.

## Veget. emend.

Porri etiam succus expressus cum oleo, & ipsa fibra cum hordeacea farina remedium præstant (& mox). Idem præstat ervum sine valvulis cum ptisana hordei molitum, & cum aqua tepida, vel mulsa in fauces salivanti ore demissum.

## Colum. emend.

Porri etiam succus cum oleo &c.

tem & hic ervum, & paulo ante lens molenda esse dicuntur *sine valvulis*, idcirco hoc fuit addendum, quia etiam cum valvulis molebant, teste Scribonio (comp. med. 168) qui ad podagram caldam imperat *fabam molitam cum suis valvulis*. Propterea Vegetius *ptisanam hordei* hic scripsit, id est, hordeum tunsum, & decorticatum; hoc enim proprie signi-



significat *trivium* : Cæterum *salivati* more rescripti, non *salvati*, ut minimum ab hac scriptura recederem, *salivanti*: quæ hic nimirum confirmat quod Vegetius (annotat. ad c. 9 Columellæ) docuit, in antiquis Columellæ exemplaribus scriptum esse *salivati*, ubi Editiones habent *salvati*. Et quanquam capite etiam 24 libri hujus habent *salvatum*; relictum est tamen capite 5 *salivandum* & 37 *salivandus*; imo

*Veget. 3, 7, 4 sq.*  
Sinus ipse, qui eam (suppurationem) continebat, urina bubulina calida lavatur, ac linamentis, ac stuppis, sive linteolis pice liquida & oleo infusis curatur. Quod si colligari ea pars, ubi est ulcus, non potest, lana candente seipsum caprinum, aut bubulinum stillatur. (1) Aliquantum cum vitiosam partem inunxerint, tunc urina veteri humana lavant, atque ita æquis ponderibus pice liquida cum vetere axungia incoquant & liniunt.

(1) *Quidam vero* Samb. in marg. ex Cod.

Ut minime dubito, quin, ita sententia postulante, recte Vegetium ex Columella emendaverim, reponens *collui* pro *colligari*; sic contra non liquet, sitne ex Vegetio Columella emendandus, scribendo *curatur* pro *colligatur*. Hinc enim linamenta, id est, penicilli, minime idonea videntur ad colligandum, & Columella ipse huc respiciens in proximo cap. 12, cum, inquit, *maturuerit suppuratio rescinditur ferro, eaque emissa, ut supra docuimus, linamentis curatur*. In eodem tamen capite hæc etiam sunt: *linamentis pes involutus sparteæ munitur*; nec desunt, qui linamenta interdum quoque pro linteolis, quamvis non complicatis, accipienda esse, opinentur; denique vox *colligari* in Vegetio pariter, quanquam perperam, & certe non suo loco, hic legitur. Itaque etsi suspicabar, addendam fortasse aliam aliquam vocem, ut *applicitis*, *demissis*, *impositis*; ob hæc tamen causas ni-

*Veget.*  
Sed si sanguis adhuc super ungulas in cruribus est, ad triduum triti salis perfricatione discutitur. Quod si tantum in ungues descenderit, cultello leniter inter duas ungues aperies, & mundabis deintus, & postea stuppam sale atque aceto infusam applicabis ad solum, sparteæ opere calceatur, maxime quæ datur operantibus, & in aquam non mittat pedem, sed ubi siccum est, ambulet.

Plura quidem hoc loco in Vegetio emendavi, neque tamen pro certo affirmaverim, sic menda omnia sublata esse. Potest enim *ad triduum*, depravatio esse vocis *assidua* Columellæ. Possunt & quædam quæ apud hunc sequuntur, verba in Vegetii exemplaribus intercidisse, & vicissim possunt apud Columellam nunc deesse duæ illæ voculæ *triti salis*; solebat enim Columella frictiones ita imperare, ut medicamentum aliquod affricaretur. Sic jubet, paulo post (f. 3), *oleo, & sale genua confricari*; sic capite in sequenti (f. 1) extenuari scabiem *trito allio defricato*, sic 15, 2 suffragines *veteres axungia defricari*, imperat, sic 31, 2 impetigines *aceto & alumine defricari*; sic præsertim 32, 1 intertriginem *trito sale cum adipe defricari*. Quin etiam ea ipsa, quæ in Vegetio emendavi, rectene omnia emendata essent, nonnunquam dubitavi, & potissimum *ad solum*, & *ambulet*. Neque enim ignorabam *solum* posse interdum *soleam*,

Commelinus aliis quoque in locis rescriptit *salivati*, quod Robertus etiam Stephanus faciendum monuerat.

Quorum uterque cum hoc loco pro *succum oleo* ediderit, *succus oleo*, eo facilius veterem meam ex Vegetio Columellæ emendationem confirmavi, *succus cum oleo*.

*S. 12.*  
*Colum. 6, 11, 1.*  
Sinus ipse, qui eam (suppurationem) continebat, calida bubula urina eluitur, atque linamentis pice liquida, & oleo imbutis colligatur. Vel si collui ea pars non potest lamina candenti seipsum caprinum, aut bubulum instillatur. Quidam cum vitiosam partem inusserunt, urina vetere eluunt, atque ita æquis ponderibus incocta pice liquida cum vetere axungia liniunt.

*Veget. emend.*  
Sinus ipse, qui eam (suppurationem) continebat, urina bubulina calida lavatur, ac linamentis, ac stuppis, sive linteolis pice liquida, & oleo infusis curatur. Quod si collui ea pars, ubi est ulcus, non potest, lamina candente seipsum caprinum aut bubulinum stillatur. Quidam vero cum vitiosam partem inusserint, tunc urina veteri humana lavant, atque ita æquis ponderibus, pice liquida cum vetere axungia incoquant, & liniunt.

hil adhuc mutare ausus sum: Sed in Vegetio, etiam reliqua visa sunt necessario emendanda, præsertim vero *lana*, atque *inunxerint*. Quorum hoc neque sententiæ, neque Columellæ, neque tandem respondet Vegetio (cap. 3) qui paulo ante, non post inunctiones, sed post ipsas *usturas* veterem urinam adhiberi, imperaverat. Illud vero ejusmodi est, ut quanquam capite etiam 55 superioris libri ad eundem modum occurrat, nihilo tamen minus utrobique omnino sit mutandum in *lamina*, pro qua mox dicit Vegetius, *ferro candenti*; sic videlicet: *axungia veteri, & sepo hircino, pari pondere ferro candenti stillantibus*. Quod autem *urina bubulina*, & *sepum bubulinum* reliquerim, ea fuit causa, quod pro *bubulum*, solet Vegetius sæpius scribere *bubulinum*, ut infra hoc ipso capite, & lib. 1 c. 13. lib. 2 c. 28. lib. 3 c. 8 & 47. lib. 4 c. 27.

*S. 13.*  
*Colum. 6, 12, 1 & 2.*  
Sed si sanguis adhuc supra ungulas in cruribus est, fricatione assidua discutitur, vel cum ea nihil profuit, scarificatione demitur. At si jam in ungulis est, inter duas ungues cultello leniter aperies. Postea linamenta sale, atque aceto imbuta applicantur, ac solea sparteæ pes induitur, maximeque datur opera, ne in aquam pedem mittat, & ut sicce stabuletur.

*Veget. emend.*  
Sed si sanguis adhuc super ungulas in cruribus est, ad triduum triti salis perfricatione discutitur. Quod si jam in ungues descenderit, cultello leniter inter duas ungues aperies, & mundabis deintus, & postea stuppam sale atque aceto infusam applicabis: ac solea sparteæ pes calceatur, maximeque datur opera, ut in aquam ne mittat pedem, sed ubi sicce stabuletur.

alias infimam pedis partem significare, imo sciebam; Vegetium alibi (lib. 1 c. 26. lib. 2 c. 55, 56) *solum ungula*, & *solum calcis* scripsisse; ut hic si *solo sparteo* legere nollem, & *applicabis ad solum*, possem. Neque me fugiebat, ut *ambulet*, improbarem, nimirum sic læso pede; propius tamen ab hac scriptura abesse *stabulet*, quam *stabuletur*, certe autem Virgilium (Æneid. l. 6 v. 286) dixisse: *Centauri in foribus stabulant*. Attamen succurrebat, Vegetium sæpe (lib. 1 c. 29, 56. l. 2 c. 58. lib. 3 c. 41, 43) *stabuletur* scripsisse; *stabulet*, quod meminisse, vix semel (lib. 1 c. 12.) tum vero sive *solo sparteo*, sive *applicabis ad solum*, legissem; alia relinquebantur vel in litterarum vestigiis, vel in sententia, quæ minus placerent. Ob hæc causas Vegetium ad ea, quæ descripserat, Columellæ verba exigere, hic multo denique tutius est visum.



## §. 14.

*Veget. 3, 4, 11 sq.*  
Qui sanguis nisi emis-  
sus fuerit ( 1 ) saniam  
creabit. Quo suppuratio  
etiam ( 2 ) curabitur.  
Nam primo ferro cir-  
cumcisis expurgatur ad  
vivum. Deinde pannis  
aceto, & oleo, & sale  
madefactis impletur,  
mox axungia veteri &  
sepo hircino pari pon-  
dere ferro candenti stil-  
lantibus curatur, & per-  
ducitur ad sanitatem.  
Si sanguis in interiori  
parte ungulæ est, nec  
aperturam facit, & tan-  
tum claudicat animal,  
extrema ipsius ungulæ ad vinum refecantur, & ita remittitur.

( 1 ) *ramicem.* ( 2 ) *sarde* Samb. in marg. ex Cod.

*Colum. 6, 12, 2 & 3.*  
Hic idem sanguis nisi  
emissus fuerit, saniam  
creabit, qui si suppurat-  
verit, tarde procurabi-  
tur: ac primo ferro cir-  
cumcisis, & expurgatus,  
deinde pannis aceto, &  
sale, & oleo madentibus  
inulcatis, mox axungia  
veteri, & sevo hircino  
pari pondere decoctis,  
ad sanitatem perducit-  
tur. Si sanguis in infe-  
riore parte ungulæ est,  
extrema pars ipsius un-  
guis ad vivum refeca-  
tur, & ita emittitur.

Si crederem, hic nihil aliud in Columella esse vi-  
tii, nisi forte procurabitur pro percurabitur, & infe-  
riore pro interiore, Vegetium corrigere hic quo-  
que conarer. At qui credam? Cum de sanguine cer-  
te hæc dici non possint, ferro circumcisis --- ad sa-  
nitatem perducitur, ut neque illa, expurgatur ad vi-  
vum, & pannis aceto, & oleo, & sale madefactis  
impletur: quæ nimirum tumori potius cuidam, &  
sinui videntur convenire. Sambuci Codices pro sa-  
niam habent *ramicem*: qua voce Nonius ( de Propr.  
Serm. ) pulmonem significari, docuit in eo quidem  
Plauti ( Mercator. Act. 1 Sc. 1 ) versu: *Tua  
causa rupi ramices, jamdudum sputo sanguinem*; ut  
notiorem ramicis significatum, & huc minus perti-  
nentem omittam. Quasi vero, inquires, pulmo huc  
magis attineret. Fateor. Tu tamen vide Vege-  
tii caput 56 lib. 2 quod est de *pulmunculo* ad ungu-  
las facto. Hæc invenies: *Ungulam subradis, de-  
inde --- ubicunque pulmunculus fuerit, radis ad vi-  
vum, & adjicies lanamentum* ( lege linamentum, ut

infra quoque & cap. 57 ) ex oleo, & aceto, & sale  
&c. Capite etiam ejusdem libri 61 *pulmunculum*  
natum in dorso, si parvulus fuerit, docet, aperire, ut  
sanies, quam collegerat, egeratur, vel decussatim fer-  
ro secare & eximere, & oleum, acetum, & salem  
continuo addere in plagam. Huc adde lib. 4 c. 19  
tradere compositionem medicamenti traumatici, quod  
absumpta putredine, vivam carnem ad sanitatem redu-  
cit, quo, inquit, ad *cancromatas* plagas, ad *fami-  
cem*, & *cicatrices* reducendas uteris; quibus ex ver-  
bis, ut alia aliter emendanda, sic *famicem* fortasse in  
*ramicem* esse mutandum, suspicaberis, eo magis quod  
in pulmunculi etiam ad ungulam nati curationem  
traumaticum medicamentum fuerat a Vegetio lauda-  
tum. Legemusne igitur, inquires, pro *saniam*,  
*ramicem* & pro *Quo suppuratio*, *Quojus suppuratio*,  
id est, cujus ramicis suppuratio? Ego vero non  
ut quidquam affirmarem, sed ut te ad quærendum in-  
citarem, hæc scripsi.

## §. 15.

*Veget. 3, 4, 13.*  
Si claudicat ex dolore  
nervorum, oleo, & sale,  
genua popliteque, &  
crura confricanda sunt,  
calido aceto, & lini se-  
men aut milium detri-  
tum infusumque aqua  
multa imponendum est.

*Colum. 6, 12, 3 & 4.*  
Si dolore nervorum  
claudicat, oleo, & sale  
genua, popliteque, &  
crura confricanda sunt,  
donec sanetur. Si ge-  
nua intumuerint, calido  
aceto fovenda sunt, & li-  
ni semen, aut milium de-  
tritum, conspersumque  
aqua multa imponen-  
dum.

Excidisse apud Vegetium verba, quæ his responde-  
bant: *Si genua intumuerint --- fovenda sunt*. tam cer-

tum videtur, quam quod certissimum.

## §. 16.

*Veget. 3, 4, 15.*  
Potest etiam radix li-  
lii vel squilla cum sale,  
vel herba sanguinalis  
( quam palaganon græci  
appellant ) vel marru-  
bium ferro aperta sana-  
re. Omnis autem cor-  
poris dolor, si sine vul-  
nere est, recens fomen-  
tis ( 1 ) mellinis discu-  
titur. Vetus autem u-  
ritur. Et supra vulnus  
vel butyrum, vel capri-  
na instillatur axungia.  
( 1 ) *melius* Samb. in  
marg. ex Cod.

*Colum. 6, 12, 5.*  
Possunt etiam ( ut  
Cornelius Celsus præ-  
cipit ) lilii radix, aut  
scylla cum sale, vel san-  
guinalis herba, quam  
πολύον Græci appel-  
lant, vel marrubium fer-  
ro reclusa sanare. Fere  
autem omnis dolor cor-  
poris, si sine vulnere est,  
recens melius fomentis  
discutitur: vetus uritur,  
& supra ustum, buty-  
rum, vel caprinus instil-  
latur adeps.

*Veget. emend.*  
Potest etiam radix li-  
lii vel squilla cum sale,  
vel herba sanguinalis  
( quam *polygonon* græci  
appellant ) vel marru-  
bium ferro aperta sana-  
re. Omnis autem cor-  
poris dolor, si sine vul-  
nere est, recens fomen-  
tis *melius* discutitur &c.

Hic vero quæ defunt, Vegetii ipsius arbitrio po-  
tuerunt omitti: quem pariter potuisse scribere *vulnus*

pro *ustum*, ex iis, quæ supra ad Columellæ caput 7  
adnotata sunt, intelligitur.

## §. 17.

*Veget. 3, 4, 16.*  
Scabies ( 1 ) anatis tri-  
ta oleo defricata: Eo-  
demque remedio rabio-  
si canis sanatur morbus  
vel lupini vulnus illa-  
tum. Vetus quoque sal-  
samentum utramque  
perhibetur plagam cu-  
rare. Ad scabiem quo-  
que præsentior medi-  
cina ista est: si cumula-  
t bubulam sulphurque  
conteritur, admixtaque  
myrrha cum oleo atque  
aceto decoquitur, &  
cum tepescere coeperit,  
alumen scissum tritum  
inspergitur ( 2 ) quod  
medicamentum canden-  
tis olei illinitum prod-  
est.

*Colum. 6, 13, 1.*  
Scabies extenuatur  
tritum alio defricato: eo-  
demque remedio cura-  
tur rabiose canis, vel  
lupi morsus qui tamen  
& ipse imposito vulnere  
vetere salsamento, æ-  
que bene sanatur, & ad  
scabiem præsentior alia  
medicina est, cumila bu-  
bula, & sulphur conte-  
runtur, admixtaque a-  
murca cum oleo, aqua,  
aceto incoquantur. De-  
inde tepescit scissum  
alumen tritum spargi-  
tur. Id medicamen-  
tum candente sole illi-  
tum maxime prodest.

*Veget. emend.*  
Scabies sanatur trite  
alio defricata: eodem-  
que remedio rabiosi  
canis sanatur morsus, vel  
lupini vulnus illatum.  
Vetus quoque salsamen-  
tum utramque perhibe-  
tur plagam curare. Ad  
scabiem quoque præ-  
sentior medicina ista est:  
si *cunila bubula*, sul-  
phurque conteritur, ad-  
mixtaque myrrha cum  
oleo atque aceto deco-  
quitur, & cum tepesce-  
re coeperit, alumen  
scissum tritum inspergi-  
tur, quod medicamen-  
tum candente sole illini-  
tum prodest.

( 1 ) *Scabiosa trita cum.* Samb. in marg. ex Cod. qui hæc ad ( 2 ) inter uncis interponit ( *quo ungatur ad solem fortiter* ).

*Morgagni Opusc.*

H

Si



Si forte videor timidius fecisse, quod *morfus lupini vulnus illatum* non mutaverim; vide an libentius legas *lupi*, aut *lupinum vulnus illatum*, aut etiam *lupi vulnus*. Tamen. Nam quod servaverim oleo, atque aceto pro oleo, aqua, aceto, non modo feci, quia Vegetius hic aquam potuit non probare; verum etiam quia librarii in his Columellæ ipsius verbis describendis labi facile potuerunt. Myrrha quoque pro *amurca* servata est; nam quamvis amurca iterum a Columella (7, 5, 7) adversus ovium, a Cornelio autem Celso (lib. 5 c. 28 sect. 16) adversus & pecorum, & hominum scabiem proponatur; hic tamen etiam myrrham commendat, Dioscorides (lib. 1 c. 67) autem, & Scribonius (Compos. 254) myrrham ex aceto ad impetigines, scabiemque, impositam laudant. Equidem fateor, longe parabilius præsertim ad pecora medicamentum esse amurcam; Vegerius (lib. 4 c. 27) tamen vel synchrisma pro his habet ex myrrha composita. Verum, ut in hisce timidior fuerim; nihil certe in cæteris dubitavi, & præsertim in *candentis olei*, & candente sole mutandis. Non modo enim Columella hoc

requirit capite etiam 31 & 32; Sed Vegetius ipse (qui alibi lib. 3 c. 24 aere candente dixit) uno in capite 71 hujus libri, quod de scabie est, sapius diligenter inculcat. Quo in capite mendum est ex hoc loco corrigendum; ubi enim legitur *aluminis spissi*, legendum est *aluminis scissi*; sic enim etiam alibi tum Vegetius (lib. 1 c. 56. lib. 3 c. 7. lib. 4 c. 27) tum Columella (lib. 6 c. 31 f. 2) id alumen vocant, quod Celsus (lib. 5 c. 2. c. 18 sect. 11. c. 19 sect. 6, 15. c. 20 sect. 1, 2, 3, 4. c. 22 sect. 2, 3) *scissile*, Scribonius (Compos. 4 aliisque passim) autem *fissum* appellat. Eodem in capite pro *fasciculus aricuse*, legendum crediderim, *fasciculus anchuse*, herbæ videlicet, ut tu egregie nosti, a Dioscoride (de Med. Mat. lib. 4 c. 23) & Plinio (Nat. Hist. lib. 22 c. 20) ad lepras, & ulcera commendatæ: itemque *papulis* pro *pabulis* iis in verbis: *Cum spinam, vel lumbos, aut coxas pabulis æstuans contagio pervaserit* &c. denique *cedriæ* pro *cedrinæ*: quas duas postremas emendationes Columella confirmat in iis ipsis duobus capitibus, quæ paulo ante indicavimus.

Veget. 3, 4, 17.

(1) Insecta pestis est bubulum pecori (quam maginimum rustici vocant) cum pellis ita dorso hæret, & apprehensa manibus deduci non possit a costis: quæ res non aliter accidit, quam si bos ex languore aliquo ad maciem deductus est, aut sudans in (2) corpore faciente refriguit, aut si lapsus sub onere vehementer est infusus in pluvia: quæ (3) quandoque perniciofa sunt: custodire debemus, ut cum ab opere redierint boves adhuc æstuantes, anhelantesque vino aspergantur, & offula panis vino infusa faucibus eorum inferatur.

(1) pessima. (2) opere. (3) quoniam Samb. in marg. ex Cod.

Monstrum illud verbi *maginimum*, quod, ut desperatæ emendationis, asterisco apposito ediderant, Matthias autem Martinus nihilominus in suum lexicon receperat, Columellæ ope emendavimus. Affecta hoc morbo animalia *coriagina* alibi (lib. 1 c. 44. lib. 2 c. 6) appellat Vegetius, qui etiam caput hujus libri 54, de *Coriagine* conscribit. Secundum ipsum Columellam rescriptimus *quoniam* pro *quando-*

S. 18.

Colum. 6, 13, 2.

Est & insecta pestis bubulo pecori, coriaginem rustici appellant, cum pellis ita tergori adhæret, ut apprehensa manibus deduci a costis non possit. Ea res non aliter accidit, quam si bos aut ex languore aliquo ad maciem deductus est, aut sudans in opere faciendo refrigit, aut si sub onere pluvie madefactus est. Quæ quoniam perniciofa sunt, custodiendum est, ut cum ab opere boves redierint, adhuc æstuantes, anhelantesque vino aspergantur, & offula adipis faucibus eorum inferantur.

Veget. emend.

Insecta pestis est bubulo pecori (quam coriaginem rustici vocant) cum pellis ita dorso hæret, ut apprehensa manibus deduci non possit a costis: quæ res non aliter accidit, quam si bos ex languore aliquo ad maciem deductus est, aut sudans in opere faciendo refrigit, aut si lapsus sub onere vehementer est infusus in pluvia. Quæ quoniam perniciofa sunt, custodire debemus, ut cum ab opere redierint boves adhuc æstuantes, anhelantesque vino aspergantur, & offula panis vino infusa faucibus eorum inferatur.

S. 19.

Colum. 6, 13 extr.

Quidam fraces vino & adipe commiscant.

Veget. emend.

Aliquantum fraces vino, & axungia commiscant.

Veget. 3, 4, 19.

(1) Aliquantum feces vini & axungie commiscant.

(1) M. J. non habet, Ita Samb. in marg.

Non est dubium, quin ignorantes Librarii, quid essent *fraces*, & quam huc convenirent, ubi oleum, adepsque laudantur, ex *fraces vino* fecerint ipsi *feces vini*. Hæc autem verba non esse supposititia, cum

que, Sambuci codicibus assentientibus; quod nisi fuisset, rescripturi eramus *quandoquidem*. Quod si iidem Codices consensissent; libenter quoque illam vocem *lapsus* induxissem, aut in *lassus* mutavissem, & pro *offula panis* reposuisssem *offula adipis*, nam etsi adjectum est *vino infusa*; sunt tamen etiam capite 70 offula ex butyro & axungia confectæ, quæ dentur *in passo intinctæ*.

princeps Editio ostendit; quæ ex *pervetusto codice* est, tum Columella, cujus ductum Vegetius sequitur, aperte confirmat.

S. 20.

Colum. 6, 14, 1.

Est etiam illa gravis perniciës cum pulmones exulcerantur, inde tussis, & macies, & ad ultimum phthisis invadit. Quæ ne mortem afferant, radix coryli inusta, ita ut supra docuimus, perforatæ auriculæ inferitur, tum porri succus instar heminae pari olei mensuræ miscetur, & cum vini sextario potandus datur diebus compluribus.

Veget. emend.

Est etiam gravis perniciës cum pulmones exulcerantur, unde tussis, & macies ad ultimum vero phthisis invadit. Quæ ne mortem afferant, radix consiliginis — — — — — succus porri instar heminae pari mensuræ olei miscetur, & bibenda sunt cum vini sextario per dies plurimos.

Colum. emend.

Est etiam illa gravis perniciës, cum pulmones exulcerantur; inde tussis & macies, & ad ultimum phthisis invadit. Quæ ne mortem afferant, radix consiliginis ita ut supra docuimus, perforatæ auriculæ inferitur &c.

Veget. 3, 4, 20.

(1) Et cum gravis perniciës, ut cum pulmones exulcerantur, unde tussis & macies, ad ultimum vero phthisis invadit, quæ mortem afferant, (2) radix consiliginis, succus porri, omnium hemina per mensuram olei miscetur, & bibendi sunt, cum vini sextario per dies plurimos.

(1) Est etiam gravis pern. Samb. in marg. ex Cod. qui ad (2) inter uncōs interponit (Cui.)

Hic quoque cum verba aliquot Vegetii, quorum sententia ex Columella cognoscitur, a vetustioribus Librariis oscitanter omissa essent; ab recentioribus *radix consiliginis*, & succus porri conjuncta sunt perinde quasi illa quoque ex oleo bibenda esset. Ve-

rum ita etiam lacer truncusque Vegetius nos admonet, gravissimum mendum in omnibus, quas ad hoc tempus vidimus, Columellæ Editionibus inhæsisse; siquidem *radix consiliginis*, in *radix coryli inusta* eo turpius mutata est, quod Columella, qui se su-



se supra id docuisse testatur, nusquam de coryli radice, sed de radice consiliginis, eaque minime inulta, perforatæ auriculæ inferenda præcepit hujus libri capite 5, §. 3 & 4 idque adversus pestilentiam. Laudatque rursus, ut hoc in loco, in proximi libri capitibus 5, 14 & 10, 7 & adstipulante quidem Plinio (Nat. Hist. l. 26 c. 7) in pulmonariis etiam ovibus & suibus: quamobrem nonnulli Vegetii tempori-

bus (lib. 3 c. 2) hanc herbam *pulmonariam* (non *pulmonaceam*, ut lib. 1 c. 12) vocabant, quam Columellæ lib. 6 c. 5 §. 3 & Plinii loc. cit. & lib. 25 c. 8. ætate, qua inventa est, *Pastores & Veterinarii consiliginem* dicebant. Nostro autem hoc ævo quod habeat nomen, nisi tu, mi Juli, constituas, non video inter rei herbariæ scriptores, quorum alii aliam fuisse existimant, facile convenire.

Veget. 3, 4, 21.  
Nonnunquam & tumor palati ciborum fastidium facit, crebrumque suspirium. Prodest palatum ferro aperire &c.

§. 21.  
Colum. 6, 14, 2.  
Interdum & tumor palati cibos respuit, crebrumque suspirium facit, & hanc speciem præbet, ut bos in latus pendere videatur, ferro palatum opus est fauciare &c.

Vereor ne hic Columella minus integer Vegetio sit. Neque id eo potissimum dico, quod Columellæ Editiones inter se non consentiant, cum Jensoniana habeat, *tumor palati*, & *bos latus pendere*; sed quod verba illa: *& hanc speciem præbet, ut bos in latus pendere videatur*, neque intelligitur, de quo dicantur, & videntur aliquanto magis ad ea, quæ paulo post consequuntur, pertinere: *Si cervix mo-*

*ta, & dejecta est, considerabimus quam in partem declinet*, ut fortasse eo rejicienda sint, legendumque:

*Si cervix mota, & dejecta est, & hanc speciem præbet, ut bos in latus pendere videatur, considerabimus quam in partem declinet.* Nam illa etiam subsequuntur: *Quod si cervix in neutram partem dejecta est.*

Veget. 3, 4, 22.  
(1) Si in operibus contuderit collum, præstantissimum remedium est, sanguis ab aure emissus. At si id totum in tempore quæ vocatur *amati* cum sale tantum & imposito.

(1) *M. J. non habet*, Ita Samb. in marg.

Vegetius in hoc ipso capite, *operis, in opere, & ab opere* scripsit; non *operum*, & in *operibus*, cum idem, quod hic, vellet significare. Itaque hoc exegi ad Columellam, ut ea quoque in tempore quæ facta videntur ex plerisque litteris earum vocum quas reposui. Quod si has credideris penitus intercidisse, retinere poteris in tempore; potuit enim Vegetius hoc addere, atque ita scribere: *At si id*

§. 22.  
Colum. 6, 14, 3.  
Si in opere collum contusum erit, præstantissimum est remedium sanguis de aure emissus: aut si id factum non erit, herba quæ vocatur *avia*, cum sale trita & imposita.

Veget. emend.  
Si in opere bos contuderit collum, præstantissimum remedium est sanguis ab aure emissus: aut, si id factum non erit, herba quæ vocatur *avia* cum sale trita & imposita.

*factum in tempore non erit*, ut Celsus (de Medicina l. 7 c. 12 sect. 1): *Quod si factum statim non est.*

Sed hæc leviora, illud gravius, quod pro *amati* *amati*, verbis in prima Editione obelo confixis, *avia* reposuerim ex Columella, qua tamen de herba nihil memini legisse. Sed de hac etiam infra erit dicendi locus.

Veget. 3, 4, 23 sq.  
Si cervix mota, & dejecta est, considerabimus in quam declinet, & ex diversa parte sanguinem detrahimus ex ea vena, quæ in aure videtur amplissima, quæ (1) *sarcocara* prius verberanda est, & cum intumuerit, ferro aperitur, effluoque sanguine postero die ex eo loco emittitur cruor, & bi duo vacatio operis datur. Tertio vero die levis injungitur labor, & paulatim ad operis consuetudinem revocatur. (1) *sarmento* Samb. in marg. ex Cod.

§. 23.  
Colum. 6, 14, 3 & 4.  
Si cervix mota, & dejecta est, considerabimus, quam in partem declinet, & ex diversa auricula sanguinem detrahemus. Ea porro vena, quæ in aure videtur esse amplissima, *sarmento* prius verberatur: deinde cum ad ietum intumuit, cultello solvitur, & postero die iterum ex eodem loco sanguis emittitur, ac bi duo ab opere datur vacatio. Tertio deinde die levius injungitur labor, & paulatim ad justam perducitur.

Veget. emend.  
Si cervix mota, & dejecta est, considerabimus, in quam partem declinet, & ex diversa sanguinem detrahemus ex ea vena, quæ in aure videtur amplissima, quæ *sarmento* prius verberanda est &c.

Colum. emend.

ac  
bi duo ab opere datur vacatio. Tertio deinde die levis injungitur labor, & paulatim ad justam perducitur.

Ut in Columella pro *levius* rescriberem *levis*, & sententia postulabat, & impellebat Vegetius, cum

Jensonii denique permovit Editio, quæ *levis* habet non *levius*.

Veget. 3, 4, 25.  
Tali vitio comperimus aptum esse medicamentum ex pice liquida, & bubula medulla, hircino sevo, & axungia veteri, oleo quoque veteri æquis ponderibus (1) impositum concoquitur, quo utendum est cum bos ab opere disjungitur, & in piscina (2) in quolibet tumore cervix lavatur, confriaturque diligenter prædicto medicamento, deterfaque diluitur.

(1) *compositum*, (2) *qua bibit* Samb. in marg. ex Cod.

§. 24.  
Colum. 6, 14, 5.  
Tali vitio comperimus aureum esse medicamentum ex pice liquida, & bubula medulla, & hircino sevo, & veteri oleo æquis ponderibus compositum, atque incoctum. Hac compositione sic utendum est, cum disjungitur ab opere, in ea piscina, ex qua bibit, tumor cervicis aqua madefactus subficatur, prædictoque medicamento defricatur & illinitur.

Veget. emend.  
Tali vitio comperimus aptum esse medicamentum, quod ex pice liquida, & bubula medulla, hircino sevo, & axungia veteri, oleo quoque veteri æquis ponderibus compositum, incoquitur: quo utendum est, cum bos ab opere disjungitur; in piscina in qua bibit, tumor cervicis lavatur.

Postrema Vegetii verba sic fere esse legenda, conjicio: *deterfusque confriatur diligenter prædicto medicamento, & illinitur.* Columellam quoque suspicor *Morgagni Opusc.*

ad hunc fere modum scripsisse: *hircino sevo, & veteri axungia atque oleo.* In primis etiam ipsius verbis, *aureum*, an *aptum* legendum sit, dubitavi, præ-



præfertim cum Jensonii Editio non aureum habeat, sed autem. Aureum tamen hic videtur idem esse, ac optimum, sive ut Celsus ( de Med. l. 5 c. 27

sect. 5 ) dixit, pulcherrimum medicamentum: Scorpio ipse sibi pulcherrimum medicamentum est.

Veget. 3, 4, 26.

Celsus quidem (1) iumentum cervici herbam quæ vocatur (2) ama ( ut supra dixi ) contundi & imponi jubet. Quæ (3) cervicem infestant minor est cura. Nam facile sanantur per ardentem lucernam oleo instillato. Melius tamen est custodire ne nascantur. Etiam colla calvescant, quæ non aliter glabra fiunt, nisi cum sudore aut pluvia cervix madefacta est in opere. Quod si acciderit, pulvere lateritio trito priusquam deungatur, bovis colla conspergi oportet. Et cum exsiccati fuerint, exinde oleo iterum infundi.

(1) tumentis (2) avena Samb. in marg. ex Cod. qui ad (3) hoc adnotat: M. J. non habet.

Audacior fortassis hoc in loco tibi videar, nisi in memoriam redeas, communicasse te mecum litteras Humanissimi ac Solertissimi Viri Georgii nostri, in quibus ex vetustissimo Codice Florentino hæc Vegetii particula descripta erat. Eas si relegas, continuo agnosces, quod verba alia in meliorem sedem restituerim, alia mutaverim, unum vero etiam deleverim, ejus codicis auctoritate esse factum cum Columella, cum Vegetio, cum re ipsa consentientis. Non diffiteor, habere, ut solent Codices, etiam quæ discrepent, velut in extremis verbis, cum siccati fuerint, vino & oleo infundi. Et vero, quanquam superius caput cum hoc comparantibus non displicere fortasse possit hæc ipsa scriptura; tamen ut vides, nolui huic uni Codici tantum tribuere in eo, in quo a cæteris, & a Columella dissidebat, ut vino in Vegetio scriberem. Sed contra, quod hic Codex iterum omittit, voce caret, quæ non modo in Columella non est, verum in ipso, aut in Vegetio ne es-

Veget. 3, 4, 28 sq.

Si talum vel ungulam vomer læserit, picem duram & axungiam cum sulphure & lana succida involvito, & candente ferro supra vulnus imposito (1) & ungito: quod remedium optimum facit, si clavum calcaverit, aut acuta testa vel lapide ungula pertunditur: quæ tamen si altius vulnerata est, latius ferro circumciditur, ita inuritur, ut supra præcepi. Deinde ex parte calceata, per triduum aceto suffuso curatur. Quod si (2) vomer intraverit, lactuca marina, quam Græci (3) cyniolam vocant, admixto sale imponitur.

(1) & ure (2) crus vulneraveris (3) tishmallum Samb. in

Hanc ultimam emendationem Celsi ( lib. 5 c. 7 ) etiam locus confirmat: lac caprifici, vel lactuca mari-

Veget. 3, 4, 29.

Subtriti etiam pedes eluuntur calefacta bubulina urina. Deinde favilla farmentorum fervente calcare compellitur, & pice liquida cum oleo vel axungia (1) cornua ejus unguntur. Minus tamen claudicant, si ab opere disjunctis frigida pedes laventur.

(1) superpone Samb. in marg. ex Cod.

In Vegetio, an Librarii extremis in verbis, armenta omiserint, dubium est. Columellam vero non opere disjunctis, ut omnes, quantum memini, habent Edi-

§. 25.

Colum. 6, 14, 6 & 7.

Celsus quidem tumen- ti cervici herbam, quæ vocatur avia, ut supra dixi, contundi, & imponi jubet. Clavorum, qui fere cervicem infestant, minor molestia est: nam facile operanti lucerna instillatur. Potior tamen ratio est, custodiendi, ne nascantur, neve colla calvescant, quæ non aliter glabra fiunt, nisi cum sudore, aut pluvia cervix in opere madefacta est: itaque cum id acciderit, veteri lateri later conteritur, eoque intrito priusquam disjungan- tur, colla conspergi oportet: deinde cum id siccum erit, subinde oleo imbui.

Veget. emend.

Celsus quidem tumen- ti cervici herbam, quæ vocatur avia, ( ut supra dixi ) contundi, & imponi jubet. Clavorum, qui cervicem infestant, minor est cura. Nam facile sanantur per ardentem lucernam oleo instillato. Melius tamen est custodire, ne nascantur, neve etiam colla calvescant, quæ non aliter glabra fiunt, nisi cum sudore, aut pluvia cervix in opere madefacta est. Quod si acciderit, pulvere lateritio trito priusquam disjungan- tur boves, colla conspergi oportet. Et cum siccati fuerint, subinde oleo infundi.

se quidem potest, neuter enim ante dixerat, bobus sudore, aut pluvia madentibus adhibendum esse oleum, ut hic iterum imperare liceat. Atque utinam ex eo Codice intelligi posset verum ejus herbæ nomen, quæ ut editum est in Vegetio, appellatur ama, ut est in Sambuci exemplaribus, avena; ut in Commeliniana Editione Columellæ, habia; ut vulgatiore ejusdem Auctoris scriptura fert, avia, quam ego, non quod haberem, cur hanc magis probarem, sed ne in re incertissima a plerisque dissentirem, in præsentia secutus sum. Sed tu pro tua in Re Herbaria doctrina atque eruditione id videris. Illud quoque me in Columella dubium facit, quod iis verbis, nam facile operanti lucerna instillatur, neque satis respondent illa, quibus est usus Vegetius, neque satis video quæ subest sententia, nisi forte apponi credam iis quæ antecesserunt: si ex toto propter cervicis tumorem jugum recuset, aut ex Vegetio ita rescribi posse, censeam; nam facile sanantur lucerna instillata.

§. 26.

Colum. 6, 15, 2.

Si talum & ungulam vomer læserit, picem duram & axungiam cum sulphure, & lana succida involutam candente ferro supra vulnus inurito. Quod idem remedium optime facit exemta stirpe, si forte furculum calcaverit, aut acuta testa, vel lapide ungulam pertunderit, quæ tamen, si altius vulnerata est, latius ferro circumciditur, & ita inuritur, ut supra præcepi: deinde ex parte calceata per triduum suffuso aceto curatur. Item si vomer crus fauciarit, marina lactuca, quam Græci τισύμαλλος vocant, admixto sale imponitur.

Veget. emend.

Si talum, vel ungulam vomer læserit, picem duram, & axungiam cum sulphure, & lana succida involvito, & candente ferro supra vulnus imposito, & inurito. Quod remedium optime facit, si clavum calcaverit, aut acuta testa vel lapide ungula pertunditur: quæ tamen si altius vulnerata est, latius ferro circumciditur, & ita inuritur, ut supra præcepi. Deinde ex parte calceata, per triduum aceto suffuso curatur. Quod si vomer crus vulneraverit, lactuca marina, quam Græci tishmallum vocant, admixto sale imponitur.

marg. ex Cod.

na, quæ τισύμαλλος a Græcis nominatur;

§. 27.

Colum. 6, 15, 2.

Subtriti pedes eluuntur calefacta bubulina urina: deinde fasce farmentorum incenso, cum jam ignis in favillam recessit, ferventibus cineribus cogitur insistere, ac pice liquida cum oleo, vel axungia cornua ejus linuntur. Minus tamen claudicabunt armenta, si opere disjunctis multa frigida laventur pedes.

Veget. emend.

Subtriti etiam pedes eluuntur calefacta bubulina urina. Deinde favillam farmentorum ferventem calcare compellitur &c.

Colum. emend.

Minus tamen claudicabunt armenta, si ab opere disjunctis multa frigida laventur pedes.

tiones, sed ab opere disjunctis, ut aliis in locis, ita in hoc quoque scripsisse, non videtur dubitandum. Illud in utroque auctore dubitationem affert legentibus;



bus; quod subtritis pedibus, esse *cornua* linenda dicuntur. Fuit cum suspicarer, præsertim Sambuci Codicibus hic variantibus, non *cornua* fortasse, sed *coronæ* esse legendum, de quibus videlicet continuo a Columella (& totidem fere verbis a Vegetio quoque) mentio fit: & deinde suffragines, *coronæ*, ac *discrimen ipsum*, quo *divisa est bovis ungula*, *vetere axungia defricetur*. Mentio quoque de iisdem est in Columellæ capite hujus libri 29, ubi equum probat *duris ungulis*, & *altis*, & *concavis*, *rotundisque*, *quibus coronæ mediocres superpositæ sunt*; ut mirum sit, in latinis, etiam amplissimis lexicis hanc coronarum significationem prorsus desiderari, nisi quod Martinius sic attigit, quasi in bobus dumtaxat, neque Columella, sed Vegetio Auctore, dicerentur. Et Vegetius quidem multo pluribus in locis (lib. 1 c. 13. 25. 26. 38. 56. lib. 2. c. 55. 58. lib. 3. c. 22.) hoc significatu *coronas*, & *coronam* memorat, & in iis lib. 2 cap. 54 quod in caput semel atque iterum mendum irrepsit persimile ejus, quod hic subesse suspi-

bar. Nam jumentis, quæ *contractionem nervorum patiuntur in pedibus*, sic ut *planas ungulas in terram ponere non possint*, cataplasma imponendum dicitur in *omnibus cruribus*, ante *acopo perunctis ab auriculis usque ad genua*, eoque non proficiente, malagma *auriculis esse imponendum*, quod, inquit, *impones in alutam per dies plurimos omnibus pedibus*. Nimirum evidens est, Librarios oscitantes a pedibus ad caput transcendisse, & pro *articulis* (quo nomine peculiariter Vegetius lib. 4 c. 1. 2 crurum partes designat, genua inter, & ungulas positas, & ab his uncias 4 distantes) *auriculis* scripsisse. Verum ne hic quoque a *coronis* ad *cornua* eisdem temere transiisse, affirmarem, verba fecerunt Catonis (de re rust. c. 72); quæ tamen quemadmodum accipienda sint, ipse videris: *Boves ne pedes subterant, priusquam in viam quoquam ages, pice liquida cornua infima ungito*; nam *cornua*, præsertim infima, ipsæ fortasse sunt ungulæ: quod Palladii, aliorumque locis illustrari posse non ignoras.

Veget. 3, 4, 30.

Frequenter etiam vel ab asperitate itineris, vel in proscindendo duritiam soli, aut obviis radicibus, obvolutatus convellit armos. Quod cum acciderit, ex prioribus cruribus sanguis emittitur, si dextram ex sinistro. Et si vehementius utramque vitiaverit, etiam in anterioribus cruribus venæ solvuntur.

§. 28.

Colum. 6, 16, 1.

Sæpe etiam vel gravitate longioris, vel cum in proscindendo, aut duriori solo, aut obviis radici obluatus, convellit armos. Quod cum acciderit, e prioribus cruribus sanguis mittendus est: si dextrum armum læsit, in sinistro: si lævum, in dextro: si vehementius utrumque vitiavit, item in posterioribus cruribus venæ solvantur.

Veget. emend.

Frequenter etiam vel ab asperitate itineris, vel in proscindendo, *durisq* soli, aut obviis radicibus *obluatus*, convellit armos. Quod cum acciderit, ex prioribus cruribus sanguis emittitur: si *dextrum armum* . . . ex sinistro: si . . . . . Et si vehementius utrumque vitiaverit, etiam in *posterioribus* cruribus venæ solvuntur.

Colum. emend.

Sæpe etiam *hos* vel gravitate *longi laboris*, vel in proscindendo, duriori solo, aut obviis radici obluatus, convellit armos &c.

Et si ex Columella præclare intelligitur quid desit apud Vegetium; tamen quia eadem potuit non iisdem verbis dicere, idcirco lacunas malui consulto relinquare, quam temere supplere, præsertim cum Sambuci Codices nihil adjuvarent. ex quibus ad finem usque hujus Vegetii capitis ne unum quidem verbum in ora adscriptum est. Attamen pro *anterioribus* cruribus non dubitavi reponere *posterioribus*, cum jam de *prioribus* dictum esset, ex tota autem hac sententia liqueret, in neutro eorum crurum quæ læsis armis subjiciuntur, venæ sectionem permitti; Cum

autem prima hæc Columellæ verba ita, ut priore loco proposui, in cæteris, quas inspexisse memini, Editionibus depravata sint, nisi quod in Jensoniana *longiore* est pro *longioris*; una autem Juntina emendatio hic esse videatur; hanc potius in emendatione placuit repræsentare, quam conjecturis meis indulgere. Hoc unum ex cæteris retinui, *obluatus*, pro quo in Juntina est *obluendo*, cum apud Vegetium illius, non hujus vestigia in *obvolutatus* animadverterem.

Veget. 3, 4, 31.

Perfractis vero cornibus, linteola sale, atque aceto & oleo imbuta ponuntur, superligatisque per triduum eadem infunduntur. Quarta die tantum axungia cum pice arida & cortice pini pari pondere imponitur, & ad ultimum cum jam cicatricem producant, subito infricatur.

§. 29.

Colum. 6, 16, 2.

Præfractis cornibus linteola sale, atque aceto, & oleo imbuta superponuntur, ligatisque per triduum eadem infunduntur. Quarto demum axungia pari pondere cum pice liquida, & cortice pineo, levigatoque imponitur. Et ad ultimum cum jam cicatricem ducunt, fuligo infricatur.

Veget. emend.

& ad ultimum cum jam cicatricem producant, *fuligo* infricatur.

Colum. emend.

Præfractis cornibus linteola sale, atque aceto, & oleo imbuta superponuntur, ligatisque per triduum eadem infunduntur. *Quarto* demum die axungia pari pondere cum pice liquida & cortice pineo *levigato* imponitur, & &c.

Quod in Columellæ editionibus deerat, ex Vegetio addidimus, *die*; redundans autem *que* induximus, præsertim cum in Juntina legatur, & *cortici pinco levigato lita*. Quæ scriptura cæteroqui, si quid judico, ab Auctoris mente aliena est, id quod Vegetius quoque monstrat. Neque enim Columella hoc dicit, axungiam, & picem, exceptas solido pini cortice, esse imponendas, sed axungiam, picem, eumque corticem pari pondere commixta. *Levigatum* enim hic non est *politum*, sed, ut supra ostensum

est, *diligentius contritum*, & in *tenuissimum pulverem redactum*. Tritum autem corticem pineum & in usu fuisse, & prodesse ad cicatricem inducendam, auctor est Dioscorides (de med. mat. l. 1 c. 74) & alibi (l. 2 c. 62) quoque confirmat Vegetius. Libenter præterea mutassem *Præfractis* in *Perfractis* ex Vegetio, & in hoc vicissim ex Columella *pice arida in pice liquida*; sed nolui nimis fortasse audere.

Veget. 3, 4, 33.

Serpentis quoque ictus mortiferus est bobus, sed & minorum animalium noxium virus. Nam vipera & cæcilia cum in pascuis bos improvide supercumbit, stimulo morsus imprimunt. Araneus, quoque quem Græci *mygalen* appellant, parvi quidem corporis, non parvam solet inferre perniciem,

§. 30.

Colum. 6, 17, 1.

Est etiam mortifer iis serpentis ictus, est & magnorum animalium noxium virus: nam & vipera & cæcilia cum in pascuis bos improvide supercumbit, laceffita onere morsum imprimunt. Musque araneus, quem Græci *σκυτάλεν* appellant, quamvis exiguis dentibus, non exiguum pestem molitur,

Veget. emend.

Serpentis quoque ictus mortiferus est bobus, sed & minorum animalium noxium virus. Nam vipera, & *cæcilia*, cum in pascuis bos improvide supercumbit, stimulo morsus imprimunt. *Mus* araneus quoque, quem Græci *mygalen* appellant, parvi quidem corporis non parvam solet inferre perniciem.

Colum. emend.

Est etiam *mortiferus* serpentis ictus, est & *minorum* animalium noxium virus: nam & vipera, & cæcilia cum in pascuis bos improvide supercumbit, laceffita onere morsum imprimunt. Musque araneus, quem Græci *μυγάλην* appellant, quamvis exiguis dentibus, non exiguum pestem molitur.



De hisce emendationibus satis a me scriptum est ad Cl. Facciolum, nisi quod nescio quo pacto non addiderim Rob. Stephano Petrum Victorium, (Annot. ad Colum.) qui ante ipsum, in veteribus Columellæ exemplaribus scriptum esse *μυγελίν*, animadvertit, hancque esse veram scripturam, ostendit. Commeliniana quoque editio, quam eo tempore nondum vi-

deramus, sic habet. Cæterum in tribus illis, quas postea consulimus, vetustioribus editionibus pro *mortifer iis* est *mortiferus*, quod & Vegetius retinuit. Sic sane magis placet, neque illud *iis* erat quo referres. His de causis repositum est a nobis *mortiferus*.

*Veget. 3, 4, 33 sq.*  
Verum viperæ venenum depellit, supra tumorem, qui inflatur ex ictu, scarificatio ferro facta, ita ut herba quam personam vocant, imponatur trita cum sale. Creditur radix si contusa conatur, vel siler montanum reperitur, & trifolium symonianum, quod fragosis locis efficacissimum nascitur, odoris gravis, bitumini similis, propter quod a Græcis asphalton appellatur, nostri autem propter figuram acutum trifolium vocant.

*Colum. 6, 17, 1 & 2.*  
Venena viperæ depellit super scarificationem ferro factam herba, quam vocant personam, trita & cum sale imposita. Plus etiam ejuldem radix contusa prodest: vel symonianum trifolium, quod invenitur confragosis locis efficacissimum traditur, odoris gravis, neque ab similibus bitumini, & idcirco Græci eam *ἀσφάλτιον* appellant, nostri autem propter figuram vocant acutum trifolium.

*Veget. emend.*  
Verum viperæ venenum depellit supra tumorem, qui inflatur ex ictu, scarificatio ferro facta, ita ut herba, quam *personam* vocant, imponatur trita cum sale. Creditur radix — si contusa *ponatur*, vel siler montanum reperitur, & trifolium *symonianum*, quod fragosis locis efficacissimum nascitur, odoris gravis, bitumini similis, propter quod a Græcis *asphaltion* appellatur, nostri autem propter figuram acutum trifolium vocant.

In Vegetio malui intelligi quid deesset, quam aliis fortasse ac ipse scripserat, verbis supplere. Non possum tamen animum inducere, ut credam, ita reliqua scripta esse a Vegetio, ut ego, exigens ad Columellam, rescripsi. Nam ne ipsum quidem Columellam integrum hoc in loco esse, existimo. Primum verba, ut nunc quidem distincta sunt, inter se non cohærent. Sed fac, ita nos distinguere, *prodest, Vel symonianum trifolium, quod, aut etiam sic, prodest, vel symonianum trifolium. Quod.* Jam quæro, *symonianum* istud quid sit? nomenne quo id trifolium a Latinis appellabatur? Hi vero, ut mox subjicitur, & Scribonius (Comp. med. 163. 165) suo ipse exemplo confirmat, *acutum* vocabant, Græcos secuti, qui ut docet Dioscorides (de med. mat. l. 3 c. 106) aut certe idem Scribonius, *δευτρίφυλλον* etiam dicebant. At enim, ut apud Græcos, sic quoque apud Latinos, plura potuit habere nomina, & fortasse (quæ conjectura est Rhodii Not. ad Scribon. Comp. 163) a Syme insula, Straboni (de situ orb. l. 14) & Plinio (Nat. Hist. l. 5 c. 31) non ignota, Symonianum est nuncupatum. Quasi vero constaret, in ea insula plurimum provenisse, aut ejus facultates ibi primum esse animadvertas. Quæ duo quando penitus ignorabantur, & ejus origo nominis sic cujusque modi ratione quærebatur: mirum est, non fuisse pariter repetitam, aut ab inventore aliquo Simone, aut ab eo Galilææ vico, quem Simoniada, ut auctor est Josephus, (in vita sua) dicebant, præsertim cum in Commeliniana editione ita sit scriptum, *Simonianum*, aut denique a Simo illo Medico, quem cum sæpe auctorem libro primo laudat Plinius, tum vero libro 21 cap. 21, de trifolio nominatim quædam indicat tradidisse; nisi forte ibi pro *Simus quoque medicus*, legendum est, *Scimus quoque ex Medicis*; certe alios qui, *ex Medicis*, alios qui, *e Medicis* legerent, fuisse, video. Quod si conjecturis est indulgendum; vide, quæso, an Columella scribere ad hunc modum potuerit: *Plus etiam ejuldem radix contusa prodest, vel siler montanum. Trifolium, quod invenitur confragosis locis, efficacissimum traditur, &c.* Certe hic verborum ordo lectorem non moratur; quod autem *simonianum* resolvatur in *siler montanum*, hæ sunt causæ. Primum sic esse visum accipio (vid. Martini Lexic. Philol.) etiam Hadriano Junio eruditissimo viro. Deinde apud Vegetium, hunc ipsum Columellæ locum exscribentem, est *siler montanum*. Denique *siler montanum*, auctore Dioscoride (l. 3 c. 51) prodest *contra serpentium ictus*, si modo *λιγυστικόν* Dioscoridis idem est quod *siler montanum*. Sed quoniam cum plerisque

Rei Herbariæ Doctoribus hoc potes negare, imo cum Joanne Ruellio (de nat. stirp. P. 2 c. 146. l. 3 c. 42) fortassis contendere, hoc nomen ipsum, *siler montanum* non ante natum, quam aliqui seleri Massiliense a molli Virgilii (Georg. l. 2 v. 12) *silerè* distinguere voluerunt, quod *arboris genus* esse, tradidit Servius (in locum cit.); idcirco vide, præstetne *siler*, aut *sile montanum* rescribere. Silis enim mentionem faciunt inter alias, quas *aromaticas* nostri vocant, herbas tum Scribonius (comp. med. 126), tum Celsus (de medic. l. 5 c. 25. Sect. 3 c. 23. Sect. 1 & 3), & hic quidem semel, atque iterum in Antidotis, quanquam in Antidoto Mithridatis Almeloveenius ediderit *Sileris*; ut Plinium (Nat. Hist. l. 24 c. 19) reticeam, qui *semen silis* secundum vulgatam quidem lectionem, & Festum (de verb. vet. signif. l. 17), qui *vinum sili conditum* memoravit.

Sed prætermittere non possum Apicium (de arte coquin. l. 4 c. 4. l. 5 c. 5. l. 1 c. 34. l. 3 c. 5), in quo non modo *sil frictum*, & *silis gallici*, sed & diserte *sil montanum*, *silphium*, *mentham siccam* legunt Humelbergius, atque Listerus. Huc adde Vegetium nostrum hoc ipso libro (c. 27 & 40) *radicem panacis*, *sil gallicum*, in medicaminibus ponentem, vel pariter *daucii*, *silis gallici*, *abrotani*, *spicæ nardi*, *sinoantis* (fortasse *Schoenianthi*, ut ex cap. 59 lib. 1 ubi *scinoanthos*) mentionem facientem, alibi (lib. 4 in fin.) etiam *porri festivi*, *porcla*, (leg. ex l. 1 c. 57 *portulacæ*) *sil gallici*, *thus*, *apium*; ut est editum; scribentem. Illud conjecturæ nostræ huic videtur repugnare, quod in Vegetio ita scriptum est, *vel siler montanum reperitur, vel trifolium simonianum*; ut si in Columella *sil montanum* deesse, contendere velimus, aliquid fortasse agamus; si vero *simonianum* in *sil montanum* esse mutandum, hunc laborem frustra sumamus. Equidem librariorum scio haud raro voces paulo ante scriptas perperam iterasse, quas deinde alii cum haud frustra positas crederent, easdem tamen esse non posse, intelligerent, mirandum in modum corruerunt. Id hic quoque accidere potuisse, dicerem, vel rotius aliquem ex jam depravatis Columellæ exemplaribus in ora adscripsisse *simonianum*, quod deinde inter ipsa Vegetii verba receptum sit; hoc, inquam, dicerem, nisi conjecturam nollem alia conjectura confirmare. Itaque hæc omnia in eam partem accipias, qua ad veri similitudinem magis accedere, existimaveris. Vel potius ut scientiæ herbariæ es consultissimus; edissere mihi quid istud sit trifolium symonianum. Id ubi intellexero, continuo omnes conjecturas quam libenter abjiciam.



Veget. 3, 4, 35.

Hujus herbæ succus cum vino faucibus infundatur, atque ipsa folia cum sale trita imponantur in plagam. Quod si viridem minime reperiunt, semina ejus collecta & trita dantur ad potandum cum vino. Radices quoque ejus cum succo caulis tritæ, addita hordeacea farina & sale, cum aqua multa scarificationi superponuntur.

S. 32.

Colum. 6, 17, 3.

Hujus herbæ succus vino mistus infunditur faucibus, atque ipsa folia cum sale trita malagmatis more, scarificationi intenditur: vel si hanc herbam viridem tempus anni negat, semina ejus collecta & lævigata cum vino dantur potanda, radicesque cum suo caule tritæ, & farina, & sale commistæ ex aqua multa scarificationi superponuntur.

Colum. emend.

Hujus herbæ succus vino mistus infunditur faucibus, atque ipsa folia cum sale trita malagmatis more scarificationi intenduntur: vel si hanc herbam viridem tempus anni negat, semina ejus collecta, & lævigata cum vino dantur potanda.

Suspiciari licet, rescribendum esse in Vegetio pro *succo caulis* id quod in Columella est, *suo caule*, præsertim si recte apud hunc scriptum est *radicesque*, ut hæc videlicet omnia tunc imperari intelligamus, cum hanc herbam viridem tempus anni negat.

In Columella quoque an desit *hordeacea*, dubium est. Sane Celsus (de Medic. l. 5 c. 27 sect. 8) in Cherydri & Cerasiis ictu, hordeaceam farinam vulnere imponit, eandemque Paulus (de Re Med. l. 5 c. 12) in ipso de quo sermo hic est, viperæ ictu,

quod & Vegetius noster iterum facit libri hujus capite 79, ubi pro *sphalangii* (ut etiam cap. 77) est legendum *phalangii*, quem errorem ex capite quidem 81 Sambuci Codices sustulerunt. Cæterum quæ emendavimus in nostris ad Facciolatum literis memorantur. Pleraque, & in his vetustiores Editiones, ac Commeliniana, *folia* habent; hæ quoque, sed cum paucioribus, *vino*; Jensoniana, & vetustiores aliæ, *incidunt*, ut vel ipsa literarum vestigia confirmant intenduntur.

Veget. 3, 4, 36.

Est etiam præfens remedium si fraxini cacumina tenera conteras cum sextariis vini quatuor vel olei, expressumque succum faucibus infundas. Itemque cacumina ejusdem arboris cum sale trita læsis paribus superponas. Cæcilie enim morsus tumorem, suppuratumque generat. Idemque facit muris aranei.

S. 33.

Colum. 6, 17, 4.

Est etiam præfens remedium si conteras fraxini tenera cacumina quinque librarum cum totidem vini, & duobus sextariis olei, expressumque succum faucibus infundas. Itemque cacumina ejusdem arboris cum sale trita læsis parti superponas. Cæcilie morsus tumorem suppurationemque molitur. Idem facit etiam muris aranei.

Veget. emend.

Itemque cacumina ejusdem arboris cum sale trita læsis paribus superponas, Cæcilie morsus &c.

Et quæ mutavimus, & quod delevimus, verbum, sententia ipsa Vegetii, & Columellæ comparatio mutanda, delendumque ostenderunt. Comparatio hæc ipsa suspicionem injicit, alia esse in Vegetio partim

mutanda, partim addenda. Fieri etiam potest, ut in Columella sit legendum; *cacumina pond. quinque librarum*. Sed de his nihil in præsentī constituiamus.

Veget. 3, 4, 36 sq.

Sed cæcilie morsus sanatur, si acu ærea locum læsum compungas, & creta cimolea ex aceto oblinis. Muris vero perniciem, si animal ipsum oleo mersum neces, & plagam dentium ex eodem confrices. Quod si non fuerit, contritum cuminum cum picula & axungia, ut similitudinem malagmæ habeat, impositum plagæ perniciem submovet. Quod si antequam tumor discutatur suppuratio fuerit generata, optimum est ignea lamina vel cauterio collectionem aperire, quidquid vitiosum est, inungere, a que ita cum liquida pice & oleo inlinere. Quidam vivum murem araneum creta figulari circumdant, & colla boum suspendunt, morsusque ipsius bestię submovent.

S. 34.

Colum. 6, 17, 4, 5 &amp; 6.

Sed illius sanatur noxa subula ænea, si locum læsum compungas, cretaque cimolia ex aceto linas. Mus perniciem, quam intulit, suo corpore luit; nam animal ipsum oleo mersum necatur, & cum imputruit, conteritur, eoque medicamine morsus muris aranei linitur. Vel si id non adest, humorque ostendit injuriam dentium, cuminum conteritur, eique adjicitur exiguum picis liquida, & axungia, ut lentorem malagmatis habeat. Id impositum perniciem commoyet. Vel si antequam tumor discutatur, in suppurationem convertitur, optimum est ignea lamina conversionem refecare, & quidquid vitiosum est, inungere, atque ita liquida pice cum oleo linere: solet etiam ipsum animal vivum creta figulari circumdari: quæ cum siccata est, collo boum suspenditur; ea res innoxium pecus a morfu muris aranei præbet.

Veget. emend.

Sed cæcilie morsus sanatur, si acu ærea locum læsum compungas, & creta cimolia ex aceto oblinas; Muris vero perniciem, si animal ipsum oleo mersum neces, & plagam dentium ex eodem confrices. Quod si non fuerit, contritum cuminum cum pice liquida, & axungia &c.

Sæpius malo, timidum me tibi, quam audacem videri, velut hic, Nihil enim adhuc mutare me vides in Columella, etsi ex mea ad Facciolatum epistola intelligis, me illuc ferri ut credam, pro humorque ostendit, legendum esse, tumorque ostendit; pro perniciem commoyet, perniciem submovet; pro conversionem refecare, collectionem refecare. Quid in Vegetio? Num censet, quæ non attingi, ea mihi omnia probari? Ipse non sinit Vegetius. Nam capite hujus libri 82, cum hæc adversus murem araneum medicamenta sic iteraverit, ut id, atque alia pariter iisdem de rebus eodem in libro capita me interdum subdubitare coegerint, an hæc priora, de quibus agimus, Vegetii sint; cum igitur hæc medicamenta iteraverit; primum docet, murem in eo oleo

quo merfus est, in putredinem verti oportere; ut conjicere proclive sit, neque id hoc in loco omisisse, ubi apertius describebat Columellam. Tum jubet, cuminum tritum cum pice liquida axungiaque misceri, & ad spissitudinem malagmatis coqui, ut hic quoque suspicari liceat, similitudinem malagmæ in spissitudinem malagmatis, quam Columella vocat lentorem, esse mutanda: attamen Vegetius cum aliis libris (l. 2 c. 50. 51. l. 3 c. 20. 21) tum quarto (c. 15. 17. 20. 21. 23. 24. 27) sæpe malagma, item (l. 4 c. 27) malagmam colticam scribit, ubi colticam videtur legendum; nam supra (l. 4 c. 17. 23) alias proposuerat crudas. Pice autem liquida minus dubitavi rescribere pro picula, & cimolia pro cimolea; sæpius enim alibi (l. 1 c. 13. l. 2 c. 8. 29. 32. l. 3 c. 8) sic recte



recte scribit, ut emendavi; itaque etiam in superiore capite, ubi editum est: *Aures vero scissæ picula oleoque curantur*; non modo pice liquida reponendum arbitror, verum etiam in respondentibus verbis Columellæ (l. 6 c. 7): *At ferro rescissa melius pice, & oleo curantur*, suspicor, liquida esse addendum: eademque illa emendatione utendum in quatuor præterea aliis Vegetii locis (l. 2 c. 24 46. l. 3 c. 70. 71) in quibus scriptum est *picula*. Deinde eodem

Veget. 3, 4, 39 sq.  
Oculorum vitia plurima in illis sanantur. Nam siue intumuerunt, aqua mulsa triticea farina conspergitur & imponitur, siue album in oculo est, salis fossilis Hispani, vel armeniaci, vel cum melle permixti vitium extenuant. Idem præstat trita sepiæ testa, & per fistulam oculo ter in die insufflata. Prodest etiam radix, quam Græci silphion vocant, nostri autem laserpitium, huiusmodi quantum volueris ponderis cum decima parte salis armeniaci, & cum fistula oculo insufflas. Quæ radix tunfa & cum oleo lentisci mixta vitium expurgat. Si genæ humorem profundunt, lacrymisque visus confunditur (quam epiphoram vocant) polenta ex hordeo mulsa aqua conspersa super genas superciliaque imposita reprimat humorem. Pastinaca quoque agrestis, quam armoraceam vocant, cum melle trita oculorum sedat dolorem.

§. 35.  
Colum. 6, 17, 7 & 8.  
Oculorum vitia plerumque melle sanantur: Nam siue intumuerunt, aqua mulsa triticeæ farinæ conspergitur, & imponitur, siue album in oculo est, montanus sal Hispanus, vel Ammoniacus, vel etiam Cappadocus minute tritus, & immixtus melli vitium extenuat: facit idem trita sepiæ testa, & per fistulam ter die oculo inspirata: facit & radix, quam Græci *σιλφίον* vocant, vulgus autem nostra consuetudine laserpitium appellat: huius quantumcunque ponderis decem partes salis ammoniaci adjiciuntur, eaque pariter trita oculo similiter infunduntur, vel eadem radix contusa, & cum oleo lentisci inuncta vitium expurgat: epiphoram suppressit polenta conspersa mulsa aqua, & in supercilia, genasque imposita, pastinacæque agrestis semina, & succus armoracæ, cum melle conlita oculorum sedat dolorem.

illo capite 82 suppurationem lamina ferrea candenti aperiendam esse, scribit; ut hic videantur ignea lamina, vel cauterio non esse sine glossmate. Denique cretam suspendendam in collum dicit; ut nisi hic collo boum ad Columellæ exemplum rescribere placeat, legi minus vitiose possit in colla boum, ubi colla boum vitiosissime legitur, neque res sic plane, ut a Columella, traditur, cum ibi contra desideres nihil.

Veget. emend.  
Oculorum vitia plurima in illis melle sanantur. Nam siue intumuerunt, aqua mulsa triticea farina conspergitur, & imponitur: siue album in oculo est, salis fossilis Hispani, vel armeniaci, vel Cappadocis cum melle permixti . . . . . vitium extenuant. Idem præstat trita sepiæ testa, & per fistulam oculo ter in die insufflata. Prodest etiam radix, quam Græci *σιλφίον* vocant, nostri autem laserpitium: huiusmodi quantum volueris ponderis cum decima parte salis armeniaci . . . & . . . cum fistula oculo insufflas. Quæ radix tunfa, & cum oleo lentisci mixta, vitium expurgat. Si genæ humorem profundunt, lacrymisque visus confunditur (quam epiphoram vocant) polenta ex hordeo mulsa aqua conspersa, super genas, superciliaque imposita, reprimat humorem. Pastinaca quoque agrestis, . . . quam armoraceam vocant, cum melle trita, oculorum sedat dolorem.

Hic quoque in Vegetio præstare credidi, quæ desiderantur, per lacunas indicare, quam audacter supplere. Quod *salis armeniaci* pro *ammoniaci* reliqui; consulto feci, ne *salis armoniaci*; sic enim sæpius apud Vegetium est scriptum; reponerem, mendum videlicet pro mendo substituens. Prima inter verba *melle* addidi, quod flagitabat sententia, quanquam pertinaciter non negaverim, quod nunc in illis scriptum est, scriptum fortasse sic fuisse *vi melilis*. In proximis adjeci id quod manifesto desiderabatur, *Cappadocis*, scripturus *Cappadoci*, nisi Vegetius alibi (l. 1 c. 20) scripisset *salis capadoces*, vel potius *cappadocis*, ut a Sambuco editum est. Postrema autem inter verba lacunam reliqui propterea quia ut pro suo arbitrio Vegetius non omnia quæ Columella, tradere ad eundem modum voluerit; certe usque adeo dissentire in re manifesta non potuit, ut pastinacam agrestem, quam ille ut ab *armoracca* diversam posuerat, *armoraceam* vocari, diceret; quando sylvestrem, non pastinacam, sed raphanum, tum

Veget. 3, 4, 43.  
Odor quoque cimicini super carbones impositi ubi sanguisugam afflaverit, evellet a vulnere.

§. 36.  
Colum. 6, 18, 2.  
Potest etiam per fistulam deusti cimicis nidor immitteri, qui ubi superponitur igni, fumum emittit, & conceptum nidorem fistula usque ad hircinam perfert, isque nidor depellit hærentem.

Dioscorides (de Med. Mat. l. 2 c. 106) tum Plinius (Nat. Hist. l. 19 c. 5) ipse, *armoraciam* ab Romanis appellari, testantur. Neque minus diserte Palladius (de re rust. l. II c. II f. 4) *armoraceam*, inquit, *transferemus ad culta, ut melior fiat, nam hæc agrestis est raphanus*. Itaque si nolumus, Vegetium omnino ad Columellam exigere; at illud tamen conicere, æquum est, ipsum, *Pastinaca quoque agrestis, vel quam armoraceam vocant*, aut alia huiusmodi ratione scripsisse, qua videlicet pastinacam ab armoracea se discernere, ostenderet.

In Columella fortassis plerumque est mutandum in pleraque. Fortasse & decem partes salis ammoniaci adjiciuntur in decima pars salis ammoniaci adjicitur. Certe Aetius (Tetrab. 2 Sermon. 3 c. 38) cum adversus albugines plura commemorasset, ad extremum, sal ammoniacum, tanquam fortissimum pharmacum, posuit; Vegetius autem utramque hanc emendationem præmonstrat.

Veget. emend.  
Odor quoque cimicini super carbones impositi, ubi sanguisugam afflaverit, evellet a vulnere.

Ut de cymino nihil istiusmodi legisse memini, sic vicissim Dioscoridem (l. 2 c. 33), Plinium (l. 29 c. 4), Galenum (de Simpl. med. Facult. l. 11), Avicennam (Canon. l. 2 tr. 2 c. 270. & l. 3. fen. 9 c. 7) scio vim cimicum contra devoratas hircinas

memorare, imo Avicennam, & Auctorem libri tertii de medicamentis quæ ad manum sunt, cap. 103. laudare cimicum fumum ad sanguisugam hærentem gutturi, ut hic Columella, & Vegetius ponunt, excutiendam.



Veget. 3, 4, 44.

Machina quoque describenda est fabrica, qua conclusa cujusvis generis jumenta bovesque curantur, ut & tutus ad pecudem medendum accessus sit, nec luctando quadrupes aut membra conuxet, ac sic remedia despuat. Roboreas asses constringis, solum, quod in longitudine novem pedes debet habere, in altitudinem pars posterior duos semipedem: Pars vero quæ ad priora animalium pertinet quatuor pedes: texuntur ita ut velum in caudam ductum non possit exire. Sed a parte posteriori paululum latiore, a priore strictiore machinam compingi oportet. Cui transversum trigillum ad modum jugi confirmandum est, ad quod equorum capita vel boum cornua reliquantur. Nam reliquum corpus ad temones socios vel funibus alligetur, ut juvamentum præstetur ad medentis arbitrium.

§. 37.

Colum. 6, 19.

Sed & machina fabricanda est, qua clausa jumenta bovesque curantur, ut & propior accessus ad pecudem medentibus sit, nec in ipsa curatione quadrupes reluctando remedia respuat: est autem talis machinæ forma, roboris axibus compingitur solum, quod habet in longitudinem pedes novem, & in latitudinem pars prior dupondium semissem, pars posterior quatuor pedes: huic solo septenum pedum stipites recti ab utroque latere quaterni applicantur: si autem in ipsis quatuor angulis affixi sunt, omnesque transversis sex temonibus quasi viceræ inter seligantur, ita ut a posteriore parte quæ latior est, velut in caveam quadrupes possit induci, nec exire alia parte prohibentibus adversis axiculis: primis autem duobus statumibus imponitur firmum jugum, ad quod jumenta capistrantur, vel boum cornua reliquantur, ubi possunt etiam numelli fabricari, ut inserto capite descenditibus per foramina regulis cervix teneatur: ceterum corpus laqueatum & distentum temonibus obligatur, sicque immotum animal medentis arbitrio est expositum.

Veget. emend.

Machina quoque describenda est fabrica, qua conclusa cujusvis generis jumenta, bovesque curantur, ut & tutus ad pecudem medendum accessus sit, nec luctando quadrupes aut membra convexas, aut remedia respuat. Roboreis assibus compingitur solum, quod in longitudinem novem pedes debet habere, in latitudinem pars prior duos, semipedem, pars vero quæ ad posteriora animalium pertinet, quatuor pedes

texuntur ita, ut velut in caveam ductum, non possit exire. Sed a parte posteriori paululum altiore, ut a priore strictiore machinam compingi oportet. Cui transversum sigillum ad modum jugi &c.

Sicubi in emendando Vegetio audax fui, hic certe fui. Quamobrem acrius hæc omnia perpendas velim, antequam probes. Et primum quod compingendum, vel, si mavis ex alio Columellæ loco in capite hujus libri tricesimo, consternendum aiebat solum, quod in longitudinem novem pedes debet habere, in altitudinem pars posterior duos, semipedem, pars vero quæ ad priora animalium pertinet, quatuor pedes, conferas, quæso, cum Columella sic definiens: quod habet in longitudinem pedes novem, & in latitudinem pars prior dupondium semissem, pars posterior quatuor pedes. Continuo intelliges, quæ apud hunc de latitudine, apud illum de altitudine, & quæ apud hunc de priore parte, apud illum de posteriore conscribi. Eadem enim sunt utrobique mensuræ; nam dupondium etiam si cum Jensoniana editione hic mutare nolis in dipondium, nosti a Columella pro duobus pedibus usurpari non modo, libro 4 cap. 1 f. 3 & lib. 3 cap. 13 f. 5 ut a Beroaldo (Enarrat. in Columell.), & Turnebo (Advers. lib. 3 cap. 18) adnotatum est, verum etiam alibi, & præsertim haud semel lib. 11 cap. 2. nec mirum, quando libro 5 cap. 1 utitur passim quibuslibet affis partibus in geometricis dimensionibus. Quæ cum ita sint; aut Columella ad Vegetium, aut hic ad illum est exigendus. Sed Columellam, cujus scripta multo integriora quam Vegetii, ad nos pervenere, ad hunc exigere, par non est, nisi ubi res ipsa, & apertissima menda flagitant: quod in hoc quidem loco minime accidit. Agitur enim de soli consternendi mensuris, ut post longitudinem, latitudinem definire necesse sit; non altitudinem, quæ hic non ad solum, sed ad totam pertinet machinam, & paulo post a Columella definitur per stipites septenum pedum: quæ descriptionis pars ibi in Vegetio desideratur, ubi nos lacunam reliquimus, in qua & de iis stipitibus, & de temonibus, qui infra commemorantur, opportunus fuit dicendi locus.

Præterea fac, quæ Vegetii proposuimus verba, ea emendationis non egere; quæro, satisne alta machina sit quæ a posteriore parte ne ad tres quidem pedes extollatur? Certe Columella (7, 9, 10), non jam de bobus, sed de suis sermonem habens, has construendas esse, docuit in altitudinem pedum quatuor, ne sus transilire septa queat. At enim de latitudine verba infra facit Vegetius. Ea videlicet, quæ (nisi ut a nobis, aut alia aliqua ejusmodi ratione emendentur) tolli præstet, quam relinqui.

Neque enim satis mensuram definiunt; nisi forte sic intelligas, ut machinam paululum quatuor pedibus ut a tergo latiore, sic a fronte strictiore significent: quod num Columellæ, atque adeo Vegetii sententiæ satisfaciatur, tu videris. Cæterum postrema verba consulto non attigi. Nam pro socios vel funibus rescribere locis, vel funibus (ut est cap. 18 lorum, vel funes) non ita necesse est, ut est socios pro mendo agnoscere. Fortasse etiam pro juvamentum reponendum est jumentum, vel immotum, vel utrumque.

In Columella crediderim pro numelli esse legendum numellæ; nam neque aliter se legere hic ostenderunt Adrianus Turnebus (Adversar. lib. 23 cap. 21), & Georgius Alexandrinus (Enarrat. priscar. voc. Auctor. R. R.), neque alium præterea locum proferri video, quo vox numelli confirmetur. Non ignoro, in Basilii Fabri Thesaurio caput quoque 8 libri 7 f. 6 Columellæ sic indicari, ut videri possit in eo pariter scriptum esse numelli. Verum ita ibi scriptum est: Nonnulli antequam pecus numellis inducant, virides pineas nuces in mulctram demittunt &c.

Hactenus Vegetii tertium & quartum caput libri tertii cum sexto, & tredecim insequentibus libri sexti Columellæ comparavimus. Nunc age, cum parte etiam tricesimi initium quadragesimi quinti libri secundi comparemus.

Veget. 2, 45, 1.

Si (1) armus læsus erit, in medio crure (2) utraq; solventur venæ, & pulverem thuris cum eo qui profluit sanguine copiosissime immisto armi lineantur. Quod si plus profluet quam necesse sit, stercus ipsius jumenti fluentibus imponitur venis & fasciis alligatur.

(1) armos læseris (2) utriusque Samb. in marg. ex Cod.

§. 38.

Colum. 6, 30, 6.

Si armos læserit, aut sanguinem demiserit, in medio fere in utroque crure venæ solventur, & thuris polline cum eo, qui profluit, sanguine immisto armi lineantur, & ne plus justo exnaniatur, stercus ipsius jumenti fluentibus venis ad motum fasciis obligetur.

Veget. emend.

Si armos læseris, in medio crure utroque solventur venæ, & pulverem thuris cum eo qui profluit, sanguine, copiosissime immisto armi lineantur &c.

Colum. emend.

& ne plus justo exnaniatur, stercus ipsius jumenti fluentibus venis ad motum fasciis obligetur.



Secundam Vegetii emendationem illud etiam comprobatur quod, ipsum cum 16 capite Columellæ conferentes, supra vidimus, secandas videlicet esse venas non in crure, sed in cruribus, ubi non alter armus, sed ambo læsi sunt; quanquam id ibi in posterioribus cruribus imperatur.

*Veget. 2, 45, 2.*  
Postero quoque die quasi apophoresis fit, & ex eisdem locis sanguis detrahitur (1) atque similis in omnibus cura procedit. Ab hordeo abstinebitur, fœno sustentabitur exiguo per triduum. Deinde (2) porri tres cyathos olei heminam miscebis, & per cornu faucibus infundes. Post (3) sextum diem lente ingredi cogatur, & cum ambulaverit, mittatur in piscinam vel flumen aut mare, ut natet, cum sparsa & pannis vincto pede.

Ubi (2) ibi habet (succi) sic inter uncōs Editio Sambuci, qui notat in margine ad (1) & (3) M. S. non habet.

Vegetius libro etiam tertio capite 25 f. 4 ita uti hoc in loco est locutus. Nam ubi hydropico periconium (leg. peritonæum) ipsum pungeret, & per fistulam humoris partem extrahere iussit, tum hæc subiicit: *Alia vel tertia die apophoresim* (Samb. Cod. *apophoresim*) quasi faciurus, denuo fistulam appones, humorem ejicies, donec partes totas exiccet, vel per partes totum exiccet, ut Sambuci habent Codices.

Cæterum dubitari licet, sitne Vegetius ex Columella, an vero hic ex illo emendandus, ubi Vegetius habet: *fœno sustentabitur exiguo per triduum. Deinde; Columella autem sic: exiguo fœno dato. Post tridie deinde; Jensoniana Editio, & Juntina ad hunc modum: dato. Post triduum deinde. Quæ Co-*

Columellæ autem, alias etiam indicata a nobis; emendatio usque adeo necessaria, atque evidens est, ut minime opus sit ejus confirmandæ gratia ad Rob. Stephani Editionem trium præterea antiquarum, & Commelinianæ quoque auctoritatem adjungere.

*§. 39.*  
*Colum. 6, 30, 7.*  
Postero quoque die ex iisdem sanguis detrahitur, eodemque modo curetur, ordeo- que abstineatur exiguo fœno dato. Post tridie deinde usque in diem sextum porri succus instilatur cum olei hemina faucibus per cornu infundatur. Post sextum diem lente ingredi cogatur, & cum ambulaverit, in piscinam demitti eum conveniet, ita ut natet.

*Veget. emend.*  
Postero quoque die quasi apophoresis fit, & ex iisdem locis sanguis detrahitur, atque similis in omnibus cura procedit. Ab hordeo abstinebitur, fœno sustentabitur exiguo per triduum. Deinde succi porri tres cyathos, olei heminam miscebis, & per cornu faucibus infundes. Post sextum diem lente ingredi cogatur, & cum ambulaverit, mittatur in piscinam, vel flumen, aut mare, ut natet, cum sparsa, & pannis vincto pede.

lumella in hoc capite adjungit, ea Vegetius non persequitur. Hoc si faceret, haud inutile fortasse esset hæc verba comparare: *Manus uncta inseritur alvo, & obfessi naturales exitus adaperiuntur, exequoque stercore posita cunila bubula, & herba pedicularis cum sale trita, & decocta melli miscentur, atque ita facta collyria subjiciuntur.* Hic ego pro posita arbitror postea esse rescribendum.

Cum autem Vegetius in secundo capite libri tertii et si non omnia, haud pauca tamen ex Columella descripserit; duo hujus generis loca, quorum alterum Columella ex Catone (de Re Rust. c. 103), alterum ex Celso assumit, conferamus.

*Veget. 3, 2, II.*  
Ad interna autem curanda præcipue amurca creditur salutaris, si tantundem aquæ misceas, & animal bibere consuecat. Sed quia licet sitiat, potum fastidiat ignotum, primo cibi asperguntur, deinde aqua exigua potio medicatur, ad ultimum pro mensura miscetur, & usque ad saturitatem sitientibus datur.

*Veget. 3, 2, 29.*  
Visci folia cum vino trita defunduntur in nares.

*§. 40.*  
*Colum. 6, 4, 4.*  
Maxime tamen habetur salutaris amurca, si tantundem aquæ misceas, & ea pecus infuescas: quæ protinus dari non potest; sed primo cibi asperguntur: deinde exigua portione medicatur aqua, mox pari mensura mista datur ad satietatem.

*§. 41.*  
*Colum. 6, 5, 5.*  
Cornelius Celsus etiam visci folia cum vino trita per nares infundere jubet.

*Veget. emend.*  
Ad interna autem curanda præcipue amurca creditur salutaris, si tantundem aquæ misceas, & animal bibere consuecat. Sed quia licet sitiat, potum fastidiat ignotum; primo cibi asperguntur, deinde aqua exigua portione medicatur, ad ultimum pari mensura miscetur, & usque ad saturitatem sitientibus datur.

*Veget. emend.*  
Visci folia cum vino trita defunduntur in nares.

#### §. 42.

Locum pariter quem Columella libro eodem sexto capite 29 f. 4 sq. ex Varrone (de Re Rust. lib. 2 c. 7 f. 2 & 3) Varro autem ex Aristotele (de Hist. Animal. lib. 6 cap. 22), Plinius (Nat. Hist. lib. 11 c. 37) deinde fortasse ex his omnibus, Palladius (de

Re Rust. l. 4 tit. 13 f. 9) denique ex Columella ita sumit, ut haud inutile esset hos omnes scriptores inter se comparare; cum Vegetius quoque libro quarto capite 5 ex Columella descripserit; hos saltem duos inter se conferamus.

*Veget. lib. 4 cap. 5.*  
Manifestum est autem notas corporis cum ætate mutari. Pullis enim bimis & sex mensium medii dentes superiores cadunt, quos lactantes vocant. Cum autem quartum annum agere cœperint, deciditibus his qui canini appellantur, alios supponent. Deinde intra sextum annum molares cadunt. Sexto anno quos primo mutavit, exæquat. Septimo omnes expleantur æqualiter, & ex eo cavatos habere incipiunt dentes, &c.

*Colum. 6, 29, 4.*  
Annorum notæ cum corpore mutantur: nam dum bimus, & sex mensium est, medii dentes superiores, & inferiores cadunt: cum quartum agit annum, iis, qui canini appellantur, deciditibus, alios affert: intra sextum deinde annum molares superiores cadunt. Sexto anno quos primo mutavit, exæquat. Septimo omnes expleantur æqualiter, & ex eo cavatos gerit &c.

*Veget. emend.*  
Manifestum est autem, notas ætatis cum corpore mutari. Pullis enim bimis & sex mensium medii dentes superiores cadunt, quos lactantes vocant. Cum autem quartum annum agere cœperint, deciditibus his qui canini appellantur, alios supponent. Deinde intra sextum annum molares cadunt. Sexto anno quos primo mutaverunt, exæquant. Septimo omnes expleantur æqualiter, & ex eo cavatos habere incipiunt dentes, &c.



Etsi minime ignorabam, in Vegetii libro 1 cap. 17 *catulum lactantem* legi; tamen ut ibi *lactentem* esse legendum, non dubito, ita hic quoque *lactentes* repositi pro *lactantes*; nam in ipso etiam Celso (de Medic. lib. 2 cap. 28, 29) memini *lactentia* pro *lactantia* Viros Doctissimos reposuisse. Quod nihil addiderim, hæc causa fuit. Sciebam, Varronem (loc. cit.) Aristotelem secutum, scripsisse: *equus triginta mensium primum dentes medios dicitur amittere, duos superiores, & totidem inferiores*. Sed vicissim non ignorabam, Palladium (loc. cit.) facere cum Vegetio: *Bimo, inquit, & sex mensium dentes medii superiores cadunt*. Nimirum ita Palladius, & Vegetius Columellam describere, ut suo tamen interdum arbitrio uti potuerint, & quidpiam, si id licere videretur, omittere. In eo tamen Palladius Columellam prorsus sequitur quod ait: *infra, seu mavis, intra sextum annum molares superiores cadunt*; Vegetius quod ad superiores attinet, haud sequitur, iudicio proprio, an Librariorum incuria, illi arbitrari melius poterunt qui hæc callebunt; semper autem, quod supra etiam dicebam, respondentes hosce diverforum Auctorum locos utile erit comparare. Atque utinam Magonis extarent octo & viginti illa volumina ex S. C. in latinum sermonem conversa (vid. Columell. lib. 1 cap. 1 f. 13), unde Columella, ut tot alios, sic illum pariter accepit locum quem alias aliam ob causam expendi, aut sal-

tem hunc quoque ex Columella ut Palladius, ita & Vegetius descripsisset; fortasse id subsidii quod conferendo cum Palladio, non possum, possem, conferendo cum Vegetio, nancisci, ut novam quandam suspensionem meam aut prorsus abicerem, aut satis firmarem. In Vitulorum castratione hæc, de Magonis sententia, sexto hoc libro (c. 26 f. 2) Columella præcepit: *prius, quam ferrum admoveas, duabus angustis ligneis regulis (veluti forcipibus) apprehendere testium nervos ---, quibus comprehensis, statim testes ferro refecare, & expressos ita rescindere, ut extrema pars eorum adhærens prædictis nervis relinquantur*. Hæc Palladius (lib. 6 tit. 7 f. 1 & 2) ita describit: *duabus angustis regulis stagnis (an fagineis, an ligneis, ut infra) sicut forcipibus ipsos nervos apprehendunt ---. His comprehensis, tentos testiculos ferro refecant, & ita recidunt, ut aliquid de his, capitibus nervorum suorum dimittatur hæere*.

Mihi tamen cum utriusque Auctoris verborum seriem, tum rem ipsam attendenti suspicio incidit, in Columella pro *refecare* legendum esse *referare*, in Palladio autem pro *refecant* pariter *referant*. Sed quoniam me Vegetius noster in hoc, atque aliis Columellæ, ut vicissim Columella in pluribus aliis Vegetii locis emendandis destituit, hic ego, nisi tu aliter censes, finem audendi, & scribendi faciam. Vale.

Patavii Pridie Kal. April. MDCCXXIII.

## E P I S T O L A IV.

JO. BAPTISTA MORGAGNUS

JULIO PONTEDERÆ

S. P. D.

**N**Egas, mi Juli, videri æquum, in eos Auctores me finem facere scribendi, in quoste hortor ut pergas scribere, neque dubitas, posse me iterum Columellam, & Vegetium in iis quoque locis emendare, in quibus alter alteri lucem non afferat. Ego vero ut alias fortasse possem, nunc certe vix possum, cum sim, ut nosti, occupatissimus. Experiar tamen; ne hoc negare tibi videar; sed ita experiar, ut in uno, eoque brevissimo, Columellæ capite, in iis autem quæ verbis fere quam paucissimis expediri queant, Vegetii locis omnis hæc versetur epistola.

Sed ne forte credas, hæc me duntaxat polliceri eo consilio, ut facillima quæque persequar, difficiliora declinem, id nimirum Columellæ caput expendam, in quo, ut omnes quidem a me inspectæ habent Editiones, quædam sunt quæ non ego modo, sed Doctissimi etiam Viri intelligere se posse, negent. Est autem libri duodecimi caput 34. quod operæ pretium est videre an revera mendosum sit, & qua ratione emendari aptius possit. Primum autem id caput huc transcribamus.

S. I. Col. 12, 34. De aceto Scyllitico. Qui Scylliticum acetum facere volunt, decem bambatæ in tres amphoras musti mitis aceti acris congium, aut duplum, si non est acre, & in ollam, quæ fert amphoras tres, decoquis ad palmum, id est, ad quartas, aut si non dulce mustum, ad tertias dispumetur: sed mustum desubmassa, & limpidum sit.

Cum plura sunt in his paucissimis verbis, quæ negotium facessunt legentibus, tum duo potissimum sunt intellectu difficillima, *bambatæ*, & *desubmassa*: itaque meminisse potes, Virum totius latinæ linguæ si quis alius, peritissimum Facciolatum nostrum, cum forte vobiscum in eum sermonem venissem, ut duas esse in Columella obscurissimas, & nisi faller, depravatissimas voces, dicerem, continuo ipsum quibus de loquerer, divinasse, & istas ipsas pronunciasse. Nos tamen quæ de iis scripta sint, videamus.

Morgagni Opusc.

mus. Ph. Beroaldus (Enarrat. in Columell.) lego, inquit, *bambatas*, vel *bammatas*, hoc est *scyllas decem liquefactas, rectasque ad intinctum, vel falsuram, quod Græca voce dicitur βάμμα*. Adrianus Turnebus (Advers. lib. 17 cap. 13) *Bambatarum* nomine intelliguntur *scyllæ*, quæ aliquo intinctu conditæ sunt. Romani autem cum Syracusanorum sermone hac in re, ut & in multis aliis, uterentur, potius *bambatas* quam *bammatas* nominant: quod Siculi βάμμα pro βάμμα dicere solerent. In hujus sententiam pedibus ivit Matthias Martinius (Lexic. Philol.), quem ii describere, a quibus post Passeratium, olim Calepini Lexicon auctum est; Hesychii tantummodo addidit testimonium, quo intelligeretur, βάμμα Syraculis dictum esse, quod alibi ἐμβαμμα dicebatur. Ego vero neque sic locutos esse Syracusanos, negaverim, & libens concesserim, βάμμα idem quoque significare quod ἐμβαμμα, id est, *liquamina multiformia, quibus intingimus buccellas escarum, gulæ prorsus irritamenta, vulgo sapes appellat, Plinius autem intinctus vocabat, ut Beroaldus post Georgium Alexandrinum (Enarration. priscar. voc. Auct. de R. R.) adnotavit ad verba illa capit. 55 hujus libri Columellæ: Caterum si velis (sinapi) ad usum conviviorum preparare, cum exaniaveris sinapi, nucleos pineos quam recentissimos, & amygdalum adjicito, diligenterque conterito, infuso aceto.*

Hoc sinapi ad embammata non solum idoneo, sed etiam specioso uteris: nam est candoris eximii, si sit curiose factum. Verum hæc omnia ubi concesserim; non tamen intelligam, qui *bambatæ* latine dici potuerint, & *scyllas* potius quam res quascunque alias intinctu conditas significare. Huc adde, neque Dioscoridem (de Med. Mat. l. 5 c. 21), neque Plinium (Nat. Hist. l. 20 c. 9), neque Paulum (de Re med. l. 7 c. 11), neque Aetium (Tetrab. 3 serm. 1 c. 27), neque Actuarius (de Meth. Med. l. 5 c. 7), neque



neque Nicolaum Myrepsum ( de Compos. Medicam. sect. 37. c. 13, 14, 15 ), neque Marcellum ( de Medicam. c. 20 ), neque Auctores alterius libri de Dynamidiis ( tit. de præcordior. passionib. ), & tertii de medicamentis facile parandis ( num. 205 ) neque vero ipsum qui sequi Columellam solet, Palladium ( l. 8 tit. 8 ) ad acetum scylliticum conficiendum scyllas requirere aliquo intuitu conditas, nisi quis forte Aetii, & Nicolai, eo in loco Aetium describentis, verba illa: *Squilla repurgata, & dissoluta*, aliud significare putet, atque aliorum: *Scylla repurgata & concisa*, sive ut Columella noster paulo ante est locutus, *secta quam tenuissime*. Has igitur omnes ob causas factum credo, ut Mercurialis ( Var. Lect. l. 1 c. 14 ) negaverit, adstipulari se posse Turnebo, *Bambata* vocem non mutandam levibus quibusdam rationibus contendenti; Salmasius ( Plinian. Exercit. in Solin. ad hujus pag. 39 B. ) autem omnino corrigendum in hac voce Columellam censuerit. Lege, inquit, qui scylliticum acetum facere volunt ad embammata. In tres amphoras musti mittis aceti acris congiunt. Tum hæc subjicit: *Scyllino aceto ad embammata utebantur. Sic loquitur Columella infra: vinum myrtiten ad tormina. Vinum scylliten ad coquendum, & corpus reficiendum*. Equidem fateor, sic aliquid incipere me in hoc loco intelligere. Optandum tamen fuisset, ut tria a Viro Doctissimo omitta ne essent. Primum ut doceret, qui hæc cohæreant: *Qui scylliticum acetum facere volunt ad embammata. In tres amphoras musti mittis &c.* Alterum, ut qua erat eruditione, demonstraret, vere antiquos *scyllino aceto ad embammata usos fuisse*. Rhodius ( Not. ad Scribon. compos. 76 ) enim, etsi locum hunc ingeniose correctum a Salmasio affirmat; non obscure tamen indicat, haud satis probari sibi, acetum Scylliticum inter embammata reponi, quod medicamenti loco Veteres quoque habere consueverint; nisi forte ejusmodi embammata iis parata esse, putemus, quibus valetudinis causa aceto scyllite opus esset. Nam ut ego animadverti, & Paulus ( loc. cit. ), & Nicolaus ( loc. cit. ) quandam etiam aceti scyllitici compositionem ( ab hac tamen longe discrepantem ) proponunt, quo auxilio uti solitos, Paulus scribit, & cum cibo ad intinctus; Nicolaus autem docet, potuisse uti pro arbitrio ut intincto, aut ut sapa. Tertium denique illud præstari ab Salmasio oportuisset, ut ostenderet, re ipsa Columellam, facere scyllinum acetum, in hoc capite docere, in quo Scyllas ne memorat quidem, aceti autem exiguum omnino portionem magna cum multi copia admiscet; certe in tot scyllitici aceti compositionibus quot supra me vidisse, indicavi, qui musto uteretur, vidi neminem. Paulus modo ad acetum mel, & sapam addidit in ea compositione de qua novissime indicatum est, usui & cum cibo ad intinctus fuisse, quam acetum mustum scylliticum appellabat. Hæcque eo magis præstare omnia Salmasium decebat, quod ignorare haud poterat, fuisse qui crederent, in hoc capite non aceti scyllitici, sed embammatis conficiendi modum a Columella esse propositum: idque non sine magna, ut opinor, ratione. Nam illud præterea animadverto, extremam capitis superioris particulam vel secundum vulgatam lectionem, vel etiam secundum Salmasii emendationem, cum cæteris quæ eodem capite traduntur, non congruere. Rationes enim primum traduntur duæ vini scyllitis conficiendi ( id quod ejus capitis inscriptio postulat: *Vinum scylliten* ) scylla videlicet aut minore, aut majore pondere in multum adjecta; qui ergo convenit quasi tertiam quandam rationem, eam extremo loco subijcere, quam si sequaris, scylla non in multum, sed in acetum coniecta, non vinum conficias, sed acetum.

Igitur longe alia opus est emendatione, qua adhibita, omnia congruant, nihilque supersit quod obijcias. Primum omnium, superiori capiti non peculiare, ut nunc est, sed commune hoc argumentum censeo præscribi oportere: quomodo condias Vinum, & Acetum Scylliten. Deinde, Latino Latino, & Hieronymo Mercuriale ( loc. cit. ) auctoribus, extrema ejusdem capitis verba, prima au-

tem ejus de quo agimus, hunc in modum distinguenda esse, atque emendanda: *Alii hoc ipsum scyllæ pondus, quod supra dixi, in aceti duas urnas adjiciunt, & per XL dies inesse patiuntur, qui scylliticum acetum facere volunt.*

De Embammate Cap. XXXIV. In tres amphoras musti mittis aceti acris congiunt, aut duplum, si non est acre, & in ollam quæ &c. Vides quam facili emendatione omnia explicata & plana fiant, habitaque multo etiam majore quam a Salmasio, tum rerum, tum scripturæ ipsius ratione, monstrum illud verbi tollatur, quod ab non intellecto a Librariis, & cum verbis a superiore capite distractis confuso hujus argumento ortum erat, *decem bambata*. Illud a Salmasio, quod ipse facile a Turnebo, sumimus, ut pro *mitis* scribamus *mittis*, ne verbum desit sententiæ, ac proximæ etiam locutioni congruens: & quanquam ea quæ sequuntur, aut si non dulce mustum, videantur *mitis* postulare; re tamen vera non flagitant. Unum video posse ex me quæri: censeamne, satis hujus capitis verba naturæ embammatis convenire, multiformis, ut supra dictum est, rei, & ad quam alibi Columella ipse sinapi adjungit. Ego vero usitatus hic, & a Villica parabilius embamma proponi, credo; non omnia. Certe aceto solitos esse antiquos uti ad embammata, tum ex Nicandri Scholiaste intelligitur tradente, *βάρβα*, si solum scribatur, significare acetum, tum ex iis Lexicis Græcis in quibus *bammon* esse dicitur vasculum aceti appositum ad intingendum in mensa, tum vero ex Apicio ( de Arte Coquin. l. 8 c. 2 ), qui jus quoddam, cui acetum addit, vocat *embamma*, tum denique ex Ulpiano docente, *embamma fuisse loco aceti*, ut refert Mercurialis ( loc. cit. ): quæ res, inquit, valde descriptioni *Embammatis Columellæ quadrat, cui magna aceti portio admiscetur*. Verum ego, quanquam aceti id quod satis est, admisceri, video; magnam tamen ejus portionem admisceri, non video; nam multi quatuor & viginti partibus adjicitur una aut altera aceti: In tres amphoras musti mittis aceti acris congiunt, aut duplum, si non est acre.

§. 2. Col. 12, 34. Nunc verba reliqua consideremus: & in ollam, quæ fert amphoras tres, decoquis ad palmum, id est, ad quartas, aut si non dulce mustum, ad tertias dispumetur. Primum hoc verbum *dispumetur* disjungi oportere ab reliquis, ut recte in Commeliniana Editione factum est, perspicient omnes qui attenderint, illa ad tertias esse ad decoquis referenda. Cum autem decoquere ad tertias; qua locutione aliis quoque in locis utitur Columella; decoquere interdum ad unius, alias ad duarum de tribus partibus consumptionem significet, ut ab Rhodio ( Lexic. Scribonian. ) adnotatum est; hic certe priore modo est accipiendum propterea quia aliter accipere non sinunt quæ de dulci, ideoque minus coquendo musto antecedunt, & in ollam, quæ fert amphoras tres, decoquis ad palmum, id est, ad quartas. Quæ ipsa verba cum diligentius attendo, illud præterea intelligo, satis cautæ non esse, cur in amphorarum numero mendum aliquod subesse, credamus. Etsi enim tres amphoras musti, & aceti congiunt, aut duplum decoquere in olla simul uno tempore non possumus, quæ fert amphoras tres, non amplius; tamen; ut omittam, neque non amplius, neque simul uno tempore Columellam addidisse; certe minime necesse est verbis illis hoc dictum intelligi, ut in ejusmodi olla id omne quod dixit, decoquamus, sed illud potius, ut sciamus, satis id esse decoctum, si in olla, exempli causa, quæ ferat amphoras tres, humor ad palmum decreverit. Igitur ut exemplo, & ratione facili tum ad æstimandum, tum ad vasis etiam aliquanto majoribus proportionem accommodandum, verbo autem minime ambiguo Villicæ ad intelligendum uteretur, scripsisse, credibile est, in ollam, quæ fert amphoras tres decoquis ad palmum. Hic velim videas, scripseritne in ollam, ut hoc ipsum quod ego existimo, manifestius significaret, non ita fortassis abfili ratione ac Cato ( de Re Rust. cap. 114 ) in vinum mustum peratri atri manipulum coniecito in amphoram, & Plinius ( Nat. Hist. lib. 14 c. 16 ), manipu-



*nipulos binos tundunt in cadum musti*, & ( ibid. ) in XL sextarios musti absinthii Pontici libra decocta ad tertias partes; quanquam hæc duo Plinii loca non omnes ad eundem modum legunt. Hoc, inquam, videas velim; an potius id Librariorum incuriæ sit tribuendum, qui in olla scribere debuissent; nisi forte reapse Auctor scriptum reliquit in ollam pro in olla, ut Plautus ( Amphitr. A. 1 S. 1 ) mihi in mentem fuit, & Cicero ( Pro lege Manil. ) ut est apud Gellium ( Noct. Attic. l. 1 c. 7 ), in prædonum fuisse potestatem pro in mente & in potestate: quod contra Ovidius ( Metamorph. l. 2 ), utinamque oculos in pectore posses inferere, & ( Fast. lib. 4 ) Venerem gradibus multis in gente receptam pro in pectus, & in gentem; nisi tamen primo loco legendum in pectora, alter vero est aliter exponendus. Quæ atque alia ejusmodi cum mecum reputo, & revoco in memoriam antiquam illam circa communes præpositiones licentiam, de qua Servius admonet ad illud Virgilii ( Æneid. l. 1 ), rapuitque in fomite flammam; neque in hoc Columellæ loco aliquid pro certo audeo constituere, neque in similibus aliis, quorum aliquot attigi in Epistola ad V. Cl. Facciolum, ut ( l. 6 c. 17 ) in pascua supercubuit, ut ( l. 12 c. 46 ) in vasis conficito, ut ( ibid. c. 21 ) conjicitur in urceo fœtali, & si qua sunt alia ejusmodi ( qualia quoque sunt apud Scribonium Compos. med. 157, 220, 271 ) multoque etiam minus ubi semel atque iterum scriptum est ( l. 6 c. 12 & l. de Arb. c. 28 ): cythifum in aquam macerari oportet, fortasse ad imitandum Cæsonem ( de Re Rust. c. 156 ), qui brassicam, inquit, in aquam macerari oportet. Quibus in verbis utriusque Auctoris excipiendis etsi video quam facile Librarii in litteram geminare, & ex aqua facere aquam potuerint; tamen ob ea quæ modo dicebam, ego quidem mutare nihil ausim.

§. 3. Col. 12, 34. Sed ab his levioribus ad illud denique alterum veniamus quod initio dixi esse in hoc capite difficillimum, Turnebus ( Advers. l. 17 c. 13 ) autem monstrum esse in ultimas terras deportandum, pronunciavit. Dispumetur: sed mustum desubmassa, & limpidum sit. Et ipse quidem legendum credidit: sed mustum despuma, ut limpidum sit. Non inconcinne; si id tamen addidisset, quid illo verbo Dispumetur faciamus. Nam si retineas; his idem scriptum fatearis, necesse est. Sin autem inducas; nimium fortasse a Codicum atque Editionum scriptura recedas. Quid ergo est? Nullo, si fieri potest, verbo sublato, videndum est, liceatne aliter illud unum emendare desubmassa, vel, ut quædam habent Editiones, de submassa. Neque enim est, cur putemus, posse ullo modo retineri. Nam verbum masso, quod tanquam Lucretii ( de Rer. Nat. l. 1 v. 667. ) auctoritate in latina Lexica receptum erat, in Lucretio certe ab eruditissimis hominibus non agnoscitur, qui in eo videlicet legunt, mutareque corpus, non massareque corpus.

Quod vero Theodorus Priscianus eodem verbo usus dicitur; neque sic accepit, ut pertinere huc possit, & nihil is scriptor ad Columellam. Massas autem ferri candentes, ut in vinum vapidum, quo acetum fieret, demitti, in quinto hujus libri capite Columella docuerat; ita fortasse in mustum quoque immisissas fuisse, & de ejusmodi nullo hic verba fieri, Amico quidem nostro doctissimo in mentem venerat, sic tamen, ut mecum confiteretur, non esse Columellam ejus generis Auctorem, ut, quemadmodum P. Vegetius ( Art. Veterin. l. 2 c. 19, 41, 53 ), de sub oculo, de sub cirro, de sub ipsis dolorum locis potuisse scribere videatur. Quamobrem etli capite etiam 38 in vini myrtitis confectio in ipsum mustum demitti imperavit massulas quasdam ex myrti baccis confectas, quinimo etli Palladius ( de Re Rust. l. 11 tit. 21 ), ubi de fermento musteorum servando verba fecit, hæc sua illa ætate scribere non dubitavit: ex musto de sub pedibus raptis; &, quod mirabilius est, Florus ( lib. 2 c. 3 ): de sub Alpibus, id est, de sub ipsis Italiæ faucibus; non tamen hæc memoro, ut aliud ostendam quam illud, quævisisse, & tentasse me omnia, si forte id verbum ab omni prorsus mendæ suspicione liberare possem, aut in sententiam aliquam idoneam detorquere, neque tam Morgagni Opusc.

men invenisse. Quæ cum ita sint, neque is ego sim ( quod tu præ cæteris nosti ) qui in emendando multum audeam; facerem quod in desperatis ægris Medici solemus, ut quod vitium tollere me posse diffiderem, huic manum ne admoverem; nisi in G. Josephi Georgii datis ad te litteris aliquid nuper invenissem, quod si tibi non displiceret, mihi quidem, ut in re ejusmodi, placere posset. Scribit enim Vir ille humanitate, diligentia, ingenioque ornatissimus, cum in duobus Columellæ Codicibus Florentinis manu exaratis legatur de submassa, tertium tamen esse in Laurentiana illa Bibliotheca, etnque membranaceum, ante annos circiter ducentos & septuaginta scriptum, & qui ( id quod in Columella minime omittendum est ) Poggii fuit, quo in Codice legitur de summo. Igitur si hujus Codicis auctoritatem secuti, scribamus: Dispumetur: sed mustum de summo, & limpidum sit; existet, opinor, neque obscura, neque ab re aliena sententia, qua videlicet moneatur quidem Villica, ut in Embamma decoquendo, omnem, ut alibi Auctor loquitur, spurcitiem supernatantem subinde expurget; hujus tamen ipsius multo minus fore, si mustum ex quo Embamma factura est, & de summa parte hauserit, & postquam fæces ita subsederint, ut limpidum sit.

§. 4. Veg. 1, 10, 4. In unum Columellæ caput, sicut opus fuit, plura scripsimus. Nunc in plurima Vegetii loca, quam paucissima scribamus, de industria prætermittentes non modo quæ in singulis superioribus epistolis emendare conati sumus, verum etiam quæ Viri eruditissimi Sambucus, & Rhodius jam satis emendavere.

Lib. 1 c. 10 Radicem quoque laseris tonsam. Lego tonsam, ut alibi recte scriptum est: quod etiam comprobant quæ continuo sequuntur: & per fistulam vento haribus insitam; ut sternuturi provocet. Ad eundem modum emendanda, cap. 13 ( l. 4 ) tondes diligenter, & lib. 2 cap. 57 ( l. 3 ) contonde, & lib. 3 cap. 3 contondes, denique cap. 65 ( l. 12. ) herba paretaria ( leg. parietaria ) bene tonsa.

§. 5. Veg. 1, 16, 5. Cap. 16 Mirræ trigonitis, vel ex Sambuci Codicibus troglitæ. Scribendum, Myrrhæ troglodytis, ut capite etiam 68. lib. 3. ubi myrrhæ trigloditis.

Mox, tensedoni uncias 6. Si conferas hanc compositionem cum ea quæ lib. 4 cap. 11 proponitur; intelliges, eandem esse, & cum de aliis fortasse alterutro in loco mutandis dubitabis, tum præclare videbis, pro monstro illo vocis tensedoni scribendum esse puccidani: id quod ea quoque non absimilis portio confirmat quæ hujus libri c. 13 conscripta est. Me non præterit, Sambuci Codices hic habere puccidani. Tamen cum hi sæpe mendosissimi sint, Vir autem Doctissimus Matthias Martinus nihilominus dubitaverit, nec nisi ut conjecturam id proposuerit; majus addere pondus volui similium collatione locorum ex qua diu ante inspectam Sambuci Editionem & Martinii Lexicon hoc didiceram. Sic in proximo quoque capite 19 non Origanum, asium, sed Origanum, allium scribi oportere, collato extremo capite secundo libri 3 cognoveram.

§. 6. Veg. 1, 17, 13. Cap. 17. Yringii radices --- ( yringion autem herba --- cardo sylvestri pene similis. ) Legendum esse eryngii, eryngion, cardo, manifestius est, quam ut ex eodem 2 capite libri 3 confirmari oporteat, ubi hæc eadem, & melius quidem, sunt scripta.

§. 7. Veg. 1, 20. Cap. 20 Compositio habetur suffimentorum eadem quæ lib. 4 cap. 12, nisi quod sunt quadam discrimina, quæ utile erit inter se comparare, hæc præsertim: Primum, yrcos crudi ana uncias 6. Lib. 4 ciceris ( vel ut ex Cod. est in ora, aris ) crudi selibram. Tum, lapidis gagatis masculi, lapidis gagatis fæminæ ana uncias 3. Libro 4 gagatis fæminæ unc. 3, lapidis gagatis unc. 3, melius ex Cod. Samb. lapidis gagatis fæminæ & maris ana unc. 3.

Item, caballiones marinos numero septem, caudas marinas. Lib. 4 caballiones marinos 7, stellas marinas 4, pallas marinas 7, caudas marinas. Videntur



Librarii primo loco a septem ad septem, interjectis verbis omissis, transcurrisse.

Denique, medullæ cervinæ, cedrei, picis liquidæ ana pondera tria. Libro 4 medullæ tedæ pineæ pondera 3, ceariæ pond. 3, picis liquidæ pondera 3. Ex his videtur, primo loco cedri, vel potius cedriæ (sic enim a Scribonio compos. Med. 58, 267, Columella l. 6 c. 32, Plinio Nat. Hist. l. 24 c. 5, aliisque Græcos secutis, vocatur resina cedri) esse legendum. Attamen hæc extant apud Vitruvium de Archit. l. 2 cap. 9 quemadmodum ex cupressu, & penu resina, sic ex cedro oleum quod cedreum dicitur, nascitur; & Plinius (l. 16 c. 11) primus, inquit, tedæ in furnis ferventis sudor aquæ modo fuit in canali: hoc in Syria Cedrium vocatur.

§. 8. Veg. 1, 22, 13. Cap. 22 Vino quoque, & oleo in sole perungendi sunt diligenter, & confricandi, ut corpora eorum calefacta aut repellant, aut perferant perfrictionis injuriam. Lego, non ut in Samb. Cod. perfrictionis, sed, ut sententia postulat, perfrictionis injuriam, qua nimirum voce (ne de Plinio hic quæram) certe & ipse Vegetius alibi (l. 1 c. 10, 42, 56 l. 3 c. 15, 28, 33, 63), & Cælius Aurelianus (Acut. Morb. l. 2 c. 13 l. 3 c. 4, 17. Chron. l. 1 c. 1 l. 2 c. 7 l. 5 c. 1), & Scribonius Largus (Compos. 57, 257, 268, 270, 271) nocivam refrigerationem significant. Ad eundem modum necesse est emendare Vegetium cap. 35, 38 atque etiam 40, quo in capite legitur præfrictione; nam etsi Sambucus ex suis Codicibus plerumque, etiam ubi perfrictione recte legitur, rescribat ad oram perfocatione, aut præfocatione; repugnat tamen sententia Auctoris, & flagitat perfrictione.

§. 9. Veg. 1, 26, 3. Cap. 26 Spartiam calciare curabis. Samb. Cod. Spatio, lego Spartio. Attamen quomodo hunc locum, atque item alterum lib. 2 cap. 57 f. 3, ubi ediderunt spartiam veterem, corrigamus, ostendit alibi Vegetius, ut libro 3 cap. 18 f. 2 quo in loco scripsit, sparteæ calceabis.

§. 10. Veg. 1, 27, 3. Cap. 27 Venas medias sagitta percuties, post decursionem sanguinis cretam impones, sed caute, propter vicinam misturam nervorum. Rescribo: venas medias sagitta percuties, sed caute, propter vicinam misturam nervorum: post decursionem sanguis cretam impones. Cum ipsa rerum natura hunc ordinem flagitat, tum ipsum mox observat Vegetius: quas, inquit, venas medias propter vicinam mixturam nervorum caute transverso phlebotomo percuties, & post decursionem fasciola ligabis.

§. 11. Veg. 1, 29, 1. Cap. 29 Quæcunque passiones plus jumentis periculi inferre consueverunt, & difficilioribus obscurioribusque indigent curis, has primo amplectimur libro, ut & facilius reperiantur quæ in exordiis ipsis occurrent, & legentibus fastidium non possint adferre. De curis quæ prima sunt, febricitantibus itaque animalibus quam primum convenit subvenire. Sic distinguo: & legentibus fastidium non possint adferre de curis quæ prima sunt, febricitantibus &c.

Cap. 38 f. 5 Ideo autem signa passionum causasque divisimus, ne ingratus error noceret, & facilius evidens doctrina curaret. Non ingratus lego, (quid enim hic ingratus?) sed ignoratus error noceret, cui respondet, evidens doctrina curaret.

§. 12. Veg. 1, 38, ext. In extremo hoc capite: mollia de siccato stercore vel de paleis strata præbere, Samb. Cod. & supponere ei mollia, ut paleam.

Verum capite etiam 56 f. 11 hæc sunt: locum arido stercore, vel paleis mollibus adopertum, in quo ante potum animalia volutentur. & lib. 2 c. 9 f. 4 substernes etiam stercore sicca vel paleas, ut provocet ipsa mollietates ad cubandum, & c. 12 f. 7 obrui stercore, ut sudent, & dormiant. Fieri potest, ut fallar; sed tamen libentius legerem stramine, & stramina. Sic Columella ægris jumentis vetus fœnum, vel molle stramentum substerni, jubet.

§. 13. Veg. 1, 42, 5. Cap. 42 Clysterizabis, vel, ut Samb. Cod., clysterizabis etiam ex aqua calida, & oleo, quod cum sale, & melle afro, & nitro, oboque miscebis. De melle afro non memini alibi apud Vegetium legisse; sed libro quidem 3 capi-

te altero, 3 & 24 & 48 & lib. 4 cap. 27 uti ipsum memini afro nitro; imo proximo cap. 52 pariter ut hic in gravissimo ventris dolore, hæc scribere: clysterizabis cum calida, & afronitro, & sale. Igitur hic quoque lego: cum sale, & melle, & afro-nitro.

§. 14. Veg. 1, 54. Cap. 54 Succum itaque viridis coriandri, vel si defuerit, porri sativi.

Hæc verba si in hoc capite servanda sunt; lego, porri sectivi. Sic enim eadem in sequenti sunt scripta; & præterea libro 3 cap. 4, & libro item extremo quarto porri sectivi mentionem invenio, non sativi.

§. 15. Veg. 2, 15, pr. Libro II, cap. 15 Quodcunque jumentum in oculis tritiacem patietur, id est, ut pili aliam palpebram urentes, lachrymas moveant. Hic vero manifestius est quam ut egeat confirmatione, scribendum esse, non tritiacem, neque ex Samb. Cod. tyriacem, sed trichiastim. Vocat id vitii Scribonius (Compos. Med. 230) palpebram pilosam, vel potius sic vocat alterum de duobus quæ Celsus (de Medic. l. 7 c. 7 seu 8) proposuit, ejus generibus, quorum primi (φαλλαστιν Paulus de Re Med. l. 6 c. 8, & Aetius Tetrab. 2 ferm. 3 c. 66 appellant) tres curationes tradit Vegetius, duas in hoc capite, tertiam, ut ego animadverti, in sequenti, quo videlicet temere Librarium contrusit incuria. Cum enim de tribus in eo agat generibus Suffusionis; nihil ad hæc pertinent, quæ inter primi, atque alterius tractationem leguntur: Adversus infestantes pilos tertia cura est &c.; quæ contra si ad finem capitis 15 adjiciantur, tam ibi conveniunt quam quod maxime.

§. 16. Veg. 2, 22, 9 sq. Cap. 22 Sandaricæ uncia 2. An hic, & cap. 67 f. 3 libri 3 ubi scriptum est Sandarici uncias 3, scribendum sit Sandaricæ, videndum est. Sed multo magis videndum est, an quæ mox sequitur, Collyrii nardini compositio ex altera sit emendanda quæ extat libro 4 cap. 27 f. 4. Prima sic habet: opopanax scrupulos 2, violæ uncias 2, spicæ nardi, cassiæ, marrubii ana semiunciam, croci siculi unciam semis, olei semiunciam, & scrupulos 4, piperis albi uncias (Samb. Cod. scrupulos) sex, gummi scrupulos 5. Altera autem sic: Violæ unc. 1, spicæ nardi uncia semis, cassiæ, myrrhæ unc. 3, croci unc. 3, olei cyprini unc. 6, piperis albi unc. 2, cymini unc. 3. Mihi quidem altera ex altera videtur invicem corrigenda; ut alia omittam; in oleo, in marrubio, in cymino. Oleo Scribonius (Compos. 37) in collyrii compositione quadam utitur, sed veteri: quod ipsum Vegetius alibi (lib. 3 c. 47 f. 10) oleo cyprino substituit: cum oleo, inquit, cyprino, vel communi, sed veteri. Credibile ergo est, in prima etiam compositione scribendum esse olei cyprini. De marrubio autem, & cymino equidem non ignoro, hoc adversus oculorum epiphoras, illius succum ad ipsorum acuendam aciem laudari cum ab aliis, tum a Ruellio (de Nat. stirp. l. 3 c. 44, 58). Attamen in collyrio nardino non memini posita, etsi plures hujus compositiones perlegerim, quarum alias ex aliis Auctoribus descripsit Aetius (Tetrab. 2 ferm. 4 c. 113). Contra in his omnibus & myrrha, & gummi ponuntur, quæ duo in Collyriis quoque cæteris frequentissima sunt; & gummi præsertim cur addi soleat, Cornelius Celsus (de Medic. l. 6 c. 6 sect. 3) ostendit. Quin etiam Scribonius (compos. 36) in eo collyrio quod huic consimillimum habet ex croco, nardi spica, casia, pipere albo, neque myrrhæ obliviscitur, neque commis; sic enim Græcam scripturam secutus, scribere solet pro cummis, vel gummis, qua ex scriptura cummi, ut in Celso Librarios perperam fecisse cumini, arbitratur Rhodius (Lexic. Scribon. ad Commis) ita ego in Vegetio idem fere accidisse, suspicor. In hujus igitur prima compositione pro marrubii scribendum myrrhæ, in altera pro cymini scribendum gummi esse, puto; puto tamen, non censeo.

§. 17. Veg. 2, 24, extr. & 2, 25, 2. Cap. 24 aut ego quidem plurimum fallor, aut Librarii idem commisere quod capite 15, ut quæ ad ejus finem pertinebant, intruderent in caput proximum 25.

In hoc enim cum de collectione agatur oris-maturationa, scalpelloque aperienda; non video quem locum illa habeant: Plerique etiam cum ferro exenta fuerint glan-



*glandula*; propter sanguinis fluxum loca uri debere, præcipiunt, &c. quæ vicissim ubi cum extremo hoc capite 24 conjungantur, suam in sedem videntur esse restituta. Sic enim hoc caput nunc finitur: Plerique urenda ( loca videlicet glandularum, vel potius, ut quæ continuo sequuntur, verba flagitant, ipsas glandulas, ut malim legere urendas ) Plerique urendas dixerunt. Sed si parvæ sint prodest, cæterum majores execandæ sunt ferro.

§. 18. Veg. 2, 26, 3. Cap. 26 *Fistulare autem collyrium hac ratione conficies: anisi unciam 1, ferulæ unciam 1, æruginis æris unciam 1, battituræ calcetis unciam 1, cimini semis unciam 1, teres cum aceto &c.* Hoc in loco & plura subesse vitia, & unde plerisque medicina quæri possit, animadvertimus, nimirum ex cap. 16 lib. 4, ubi Collyrium fistulare iterum proponitur ad hunc modum. *Misi libram, ferulæ lib. æruginis lib. calcitis libram, cimini uncias sex, teres cum aceto &c.* Primum igitur pro vegetabili metallicum repono medicamentum, pro anisi videlicet *mysi*, vel potius *mysis*, quod in alterum quoque collyrium fistulare recipitur, eodem cap. 16 subjunctum: *Misi, æruginis, calcitis &c.* Tum pro *ferulæ* lego *feculæ*, de qua erudite, ut solet, Rhodius loquitur in Lexico Scriboniano. Sequuntur illa: *æruginis æris unciam 1, battituræ calcetis unciam 1.*

Si verbum *battituræ* a Vegetio esset; satis doceret Lexicon Medicum, quid significaret: *Battitura* i. e. *squama* v. g. *Battitura æris*. Tum legerem ad hunc modum: *æruginis unciam 1, æris battituræ unciam 1, chalcitis unciam 1.* Sic neque supervacuo hic scriberemus *æruginis æris* ( quamquam sic alibi lib. 2 c. 22 etiam apud hunc Auctorem invenio ) & propius tum ad alia duo proposita ejusdem loca, tum ad totidem Celli ( l. 5 c. 28 sect. 12 l. eod. c. 6 & 7 ) accederemus, in quorum altero, collyrio adversus fistulas addit *vel squamam æris, vel æruginem*; in altero autem *ærugo, chalcitis, mysis, squama æris* inter rodentia, ut mox etiam inter exedentia reponuntur.

Denique pro *cimini semis* ( ut Sambucus edidit *seminis* ) *unciam 1*, lego, ut ratio ponderum compositionis secundæ monstrat, *cimini semiunciam*; si tamen hic magis cuminum retinendum est quam anisum, pro cumino autem quid fortasse posset rescribi, ostendunt ea quæ ad caput 22 adnotavimus. Ex hisce omnibus mendis unum Rhodius ( Not. ad Scribon. compos. 82 vel potius in Auctorum Catalogo ) animadverterat, *ferulæ*, quocum ut libens hic facio; sic ad stipulari nequeo, ubi ( Not. ad compos. 142 ) in extremo superiore capite 23: *fistula si evenerit, ut supra demonstratum est, papyro & collyrio poterit persanari*, legendum conjicit, *collyrio ex papyro*. Nam primum papyrum, deinde exempta papyro, collyrium, quale hic describitur, immitti in fistulas Vegetium jubere, non modo ex hoc, aliisque indicatis ab Rhodio ipso capitibus, verum ex eodem quoque capite 23 satis poterat intelligere, atque adeo ex verbis ipsis quæ emendanda esse, conjiciebat.

Hæc enim, ut modo proposuimus, ita se habent: *fistula si evenerit, ut supra demonstratum est, papyro & collyrio poterit persanari*; demonstratum autem id fuerat capite 13, ubi papyro prius fistulam dilatandam, deinde papyri loco, collyrium indendum esse ex *fistulari medicamento*, traditum fuerat.

§. 19. Veg. 2, 17, 2 Cap. 27 *Alii enim scalpello ( fistulam ) refecari & aperiri jubent, & stringotomio decarnari.* Nisi ex Sambuci Cod. legendum sit *cum rasorio*; & vox *stringotomio* alicubi inter hæc verba servanda sit, ex ipsis litteris apparet, rescribendum esse *syringotomio*; sic enim cum Galeno ( Meth. Med. l. 6. c. 4 ) Græce vocant cultellum incidendis fistulis accommodatum, *σπινγγοτόμιον*.

§. 20. Veg. 28, 5. Cap. 28 *& fuste transversum, ut apertum os habeat, debet accipere.* Ita manifestum est, legendum esse *fustem*, ut tanquam fortuitum errorem operarum fuissem præteriturus, nisi in Sambuci Editione ad illum eundem modum legissem, in qua ne hi quidem errores emendati sunt cap. 6 *polygresto*, pro *polychresto*, & libro superiore cap. 59 *glicerica* pro *glycyrrhizæ*, passim vero *aristologia* pro *aristolochia* &c.

§. 21. Veg. 30. Cap. 30 *Stechatoma est tuber*

quod in se adipem vel pinguedinem continet.

*Aneurisma* est tuber in quo sanguis &c. *Asteroma* &c. Quanquam Sambuci Codices habent *Staphiloma*, & *Anevesma*; nihil tamen est dubii, quin sit reponendum, *Steatoma*, *Aneurysma*, *Atheroma*.

§. 22. Veg. 2, 43, 3. Cap. 43 *quo ( medicamento ) uteris ad consumtionem medellæ.* Legendum crediderim, ad consummationem. Sic enim videtur dici ut cap. 48 donec sanetur, & lib. 3 c. 21 usque dum sanetur, & c. 8 quousque sanitas subsequatur, & c. 9 donec liberetur &c.

§. 23. Veg. 2, 47, 3. Cap. 47 *Primo fracturam recompones, & fascies, mundis scissilibus infusis ex vino & oleo conligatis.* Videtur legendum, & fasciis mundis.

§. 24. Veg. 2, 48, 3. Cap. 48 *Præterea locum, quem curare volueris, inducto philotro decalvas.* Lego *psilothro*. Mox: & phlegmon effundi; licineo quoque intorto cum axungia, & aceto, & oleo loca, de quibus muscus ejectus fuerit, satiare. Vide an pro muscus scribamus mucus; certe pro licineo scribendum *licinio*. sic cap. 22 aceto & oleo linteolis vel *licinio* addito, locum ipsum complex.

Cap. 53. *atramenti sutoricii.* Samb. Cod. veteris. Manifestum est, esse rescribendum *sutorii*, ut scriptum est cap. 49.

§. 25. Veg. 3, pr. 4. Lib. III. Prolog. *Quid de diversorum onerum comparatione referamus.* Videtur legendum *comportatione*; verba enim sunt de boum utilitatibus, & in his etiam de ea quam præstant vehiculis trahendis, & gravioribus oneribus ea ratione quocumque volumus, adducendis.

Paulo infra: *Postremo ut ad providentissimorum virorum scripta redeamus, quorum firmatur auctoritas, justiciam jumentorum cade violenta derelictis, terris ad syderum remeasse consortem.* Quid potest laudabilius reperiri, quam ut nomen *aquissimum*, boum fugaretur interitu? quod dum homicidia fierent, permanebat in terris. Num ita emendabimus: horum firmatur auctoritate, *Justitiam* -- ad syderum remeasse consortium. Certe pro *nomen aquissimum* legendum est *numen aquisissimum*.

§. 26. Veg. 3, 1, 10. Cap. 1 *Aquam quidem istius generis animal non requirit nitidissimam &c.* Sed tamen bubulci diligentius est procurare, ut mundam semper & optimam bibant. Sambuci Codices pro diligentius habent diligentissime. Magis tamen mihi placeret *diligentis*.

§. 27. Veg. 3, 2, 4. Cap. 2 *tres semis uncias squillæ minutatim concisas, præterea radices teneræ popinū effossas & diligenter lotas contondes in pila, & tria ex his pondera addito sextario salis in vini septem sextarios mittes.* Haud inutile est conferre hæc cum iis quæ cap. 75 ejusdem rei gratia proponuntur: *Radix scyllæ, radices populi, quæ Græce ap. pellatur rhamnos ( nam est fuscior & nubellula ) & sales communes quantum sufficit mittes in aquam.* Non inficior, esse utroque in loco alia quæ emendationem desiderent, tamen ex secundo intelligitur, recte in primo Sambuci Codices habere *populi* pro *popinū*, qui tamen Codices in secundo sibi non constant. Vicissim ex primo subit, in secundo esse pro *sales communes* legendum *salis communis*. Cæterum *nubellula* facile videtur mutandum in *rubella*.

§. 28. Veg. 3, 2, 12 & c. 85. Eodem capite 2 quædam sunt cum postremo hujus libri capite comparanda; utroque enim in loco agitur de remediis adversus sumtum inter pabula, gallinæ fumum, & tormina hinc orta. Primo igitur in loco habemus hæc: *Apii seminis uncias 3, cimini sextarium semis, & duas libras mellis commisceas, & tepidum per os iufundes.* In altero autem hæc: *apii seminis deterris uncias 2, & cum vini veteris sextario, & hemina mellis temperas, & per os defundis.* Me non præterit, cuminum ad tormina a Dioscoride ( l. 3 c. 59 ) laudari; ne tamen hic quoque, ut alibi indicavimus, *cimini* scriptum sit mendose, videndum est; vini enim veteris in altero est loco. Mox primo in loco hæc sequuntur: *Gisni quoque cum vino deterere, & per os dare creditur salutare remedium.* *Lixivium* quoque ex arbore ulmi, vel cujuscunque generis ligni cinerem, dummodo bene coctum, cum oleo miscebis, &c.

Qui-



Quibus in altero illa respondent. Tres pilulas gypsi cum vino veteri deterere, & tepidum per os dare, eadem optime sanare firmatur. Lixivium quoque de arbore ulmi, vel cujuscunque generis ligni cinerem, dummodo bene cretum cum oleo miscere. Equidem gisni quid sit, ignoro; sed illud scio, gypsum ingestum vel interficere, ut suo confirmavit exemplo C. Proculijus (Plin. Nat. Hist. l. 36 c. 24), vel dolorem ventris, ut Scribonius (comp. 162) docet, aliaque etiam graviora mala afferre; itemque Scribonium, & Dioscoridem (l. 6 c. 24) adversus gypsum, ejusdem generis auxilium laudare, cujus generis post gypsum, quasi idem posset, hic subdit Vegetius, videlicet lixivium e cinere sarmentorum. Itaque gypsi non facile quidem legerim, praesertim cum pilulas (ut cupressi post Plinium Nat. Hist. l. 17 c. 10 l. 24 c. 5 solet) non videam qua ratione gypsi dicere Vegetius potuerit. Idem lib. 4 c. 8 ad jumenta a morbis vindicanda, & custodienda inter caetera proponit gisni resoluti pastillum unum. Aliquando fuit, cum suspicarer, Librarios pro gith scripsisse githi vel githni, aut ipsum quoque Vegetium scriptum reliquisse githi (nam vulgo, ut Sospater Instit. Gramm. l. 1 auctor est, hoc githi dicebant) & pro hujus pilulis melanthii capitula seminibus foeta esse intelligenda. Sed tu melius, cui non modo loca omnia perspecta sunt Celsi, Scribonii, Columellae, Plinii, Palladii, Marcelli, & si qui alii Latinorum de suo Gith, sive Git mentionem fecere, verum etiam alia quae huc fortasse magis pertinent, pro tua Rei botanicae, & pharmaceuticae singulari scientia, sunt longe notissima. Quod autem primo loco cinerem, dummodo bene coctum, secundo autem dummodo bene cretum, cum oleo miscendum legimus; facile primo etiam loco bene cretum legere oportet, praesertim cum Sambuci Codices utrobique habeant bene cribratum, & cap. 46 haec, consentientibus Codicibus, edita sint: Lixivium quoque cineris diligentissime cretum cum oleo optimo temperabis.

§. 29. Veg. 3, 2. 21. Porro quae infra leguntur: Panacem supplantariis comparas, fortasse ita legenda sunt: Panacem de septisariis comparas. Denique in illis: Sed & totum (animal) suffumigare percommodum est, ut ab eodem morbo perniciosus expellatur; videtur scribendum, morbi perniciosus expellatur.

§. 30. Veg. 3, 8, 2. Cap. 8 Alii Authores a, qua calida testes cum dolent fovendos esse duxerunt, suffumigandos etiam viridibus foliis, cypressique arboris specialiter mederi testibus creditur. Sed si defuerit testes ardentes nihilominus in aqua calida mitti, & inde suffumigari. Hic vero, ut caetera nunc omittam; aut tadas ardentes, aut testas candentes rescribendum esse, arbitror. Sic a Columella (l. 7 c. 5) vetus hominis urina testis candentibus inusta proponitur. Sic ipse Vegetius testa candenti scripsit lib. 2 cap. 55; capite autem 28 candentes lapides, ut & hujus libri capite 49 adhibet haud absimili ratione ad suffumigia; quin ipso capite superiore haec habet: lotium vetus & putridum in vase supponitur, & lapides molares ferventes mittuntur, animal sagis diligentissime usque ad ungulas operiatur, ut vapore lotii venae testium sudent.

§. 31. Veg. 3, 9. Cap. 9 Potiones dabis, stercus suillum quotidie ex vino, aut in aqua dulci, donec liberetur. Si extrinsecus adhibendum juberet stercus suillum; nihil mirarer; sic enim imperat cap. 77. Per os autem dare qui possit, praesertim quotidie, cum post Columellam (l. 6 c. 5) adeo perniciosam bobus esse docuerit capite 2, diserteque dixerit (f. 14): si porcinum stercus bos devoraverit, statim pestilentiam contagionis illius mallei sustinere morbi. Legemusne igitur stercus ovillum? Hujus certe vel libram ingerit, capite 16.

§. 32. Veg. 3, 10, 1. Cap. 10 Aphodilli herbae in Asphodeli herbae mutare facile est; at tascedeas emendare, difficile. Super renes, inquit, hoc anacolli- ma oportet imponi; bulbos tascedeas vivas contusas, allia quinque, anagallici libram, quae omnia pariter bene trita commiscis. Sic enim Librarii capite etiam 15 perperam scripserunt: & commiscis boni vini cotylas quatuor pro commiscis. Simile anacolli- ma pro-

ponitur cap. 18 quod juvat inspicere: Bulbos rufos triginta, cochleas vivas triginta, anagallici libram 1, &c. Non ignoro, hic Codices Sambuci pro cochleas vivas habere cochlearia vini; vitiose tamen, ut puto. Nam anacolli- ma quoque Absyrti, de quo libr. 4 cap. 22 habet cochleas contusas X, bulbos XX. Sed & potio libr. 1 cap. 56 tradita, libro autem 4 cap. 8 repetita, & ad Chironem Auctorem relata, primo quidem loco habet hyssopi fascies duas (leg. duos) cochleas germanas XV, bulbos XV; secundo autem hyssopi fascies duos, cochleas germanas purgatas quindecim, bulbos quindecim. Quae cum ita sint; facile adducor ut credam, ubi tascedeas legitur, cochleas esse rescribendum. Fortasse etiam in tribus prioribus ejus verbi litteris numerorum vestigia relicta sunt; ut legendum sit, exempli causa, bulbos triginta, 5 cochleas vivas contusas &c.

§. 33. Veg. 3, 12, 1. Cap. 12 Animalibus otiosis & pigris contingit expletura sanguinem mingere. Rescribendum est, contingit ex plethora. Soliti autem sunt Vegetii Librarii scribere plethura pro plethora, ut lib. 1 c. 25, 26 lib. 2 c. 29 l. 3 c. 44 &c. ut contra stercoris pro styracis; sed hic magis etiam perperam scripserunt steracis.

§. 34. Veg. 3, 15, 2 sq. Cap. 15 Et si diffi- culter mingit, dysuria appellatur. Sed quando guttas per veretrum mittit cum labore, stranguria dicitur. Quum in totum non potest mingere, dysuria appellatur. Manifestum est, in postremis verbis mendum esse, & ischuria pro dysuria reponendum.

Cui hac ratione succurris: de pectore venas pungis, & sanguinem quantum videbitur detrahis, & sic accipitur lavamentum. Praeterea manum tepidam cum oleo in anum mittis, & si qua stercorea inveneris intus, quia impedimentum praestant, attrahis. Videtur scribendum lavamentum, & extrahis. Sic cap. 65 ex qua compositione recens causa sanabitur, vetus sentiet lavamentum; & cap. 59 manum unctam in anum mittes, & stercus extrahes, & libr. 1 c. 35 per anum injecta manu stercus extrahatur.

Bestiola quae appellantur vulpestres, araniae similes, cum devoratae fuerint, animal praefocant. Cum haec inter ea recenscantur quae sumta urinam supprimunt; proclive est cum Matthia Martinio (Lexic. Philolog.) intelligere, scribendum esse buprestes, praesertim cum Sambuci Codices habeant buprestes. Melius idem Codices habent buprestem in capitis 78 inscriptione, ubi editum fuerat; quemadmodum initio quoque ejusdem capitis inemendatum extat; bustrepem. Quod autem buprestes scribuntur esse araniae, seu potius aranea similes, rescribendum alicui fortasse videatur cantharidis. Sed ego nimirum nolo nimis audere.

§. 35. Veg. 3, 16, 2. Cap. 16 cerae uncias 2, lardi libram unam, piperis unciam semis, picula semunciam diligentissime tundes. Hoc in loco pro picula legere, ut in aliis fecimus, picis liquida vel id videtur prohibere quod diligentissime tundenda dicitur. Quid ergo legemus? Animadverti ad solutam alvum adstringendam, cujus rei gratia haec imperantur, Vegetium lib. 2 c. 6 semel, atque iterum lenticulam commendare: quod ante fecerat Corn. Celsus (de Medic. l. 4 c. 19). Itaque haud multum ab eo absum, ut legam lenticulae.

§. 36. Veg. 3, 17. Cap. 17 lino subtili constringuntur ipsae verrucae, in causticum crudum imponitur & sponte decidunt. Videtur legendum, hinc causticum.

§. 37. Veg. 3, 18, 3 & 5. Cap. 18 in crisma etiam perunges in sole. Rescribo, Synchrisma etiam. Vid. libr. 4 c. 27 & 18 quod ita inscribitur: Compositio synchrismae.

Tunc animal (claudum) capistro trahunt, & sensim currunt, alius lorum vel funes tenet, lassus sequitur, & subito dum animal currit, recta ad se coxas ipse cum impetu trahit, si sonuerit, scias loco suo redisse. Conjicio, sic esse emendandum; alius lorum, vel funes tenens laxos, sequitur.

§. 38. Veg. 3, 23, 2. Cap. 23 Malleus (morbos vocatur) quod pestilentiae internocivum contagium facit. Et si in Sambuci Cod. est internae causa cibi, tamen nihilominus videtur legendum internecivum.



*Potionem componis hujusmodi* : Gallici lib. unam , hyssopi libram 1, abrotani libram semis , aristologiae rotunda lib. semis , manna succari uncias 3, trixaginis uncias 3.

Vix dubitandum videtur quin ante Gallici vox aliqua interciderit ; quænam autem ea fuerit , difficile est divinare . Silis Gallici , ut alias ad te scripsimus , alibi invenitur mentio apud Vegetium .

Nardi autem Gallici ( Scribonius Compos. Med. 177 nardum celticam vocat ) apud Celsum ( l. 5 c. 25 sect. 6 ) , Columellam ( l. 12 c. 20 ) , Plinium ( Nat. Hist. l. 12 c. 12 l. 21 c. 20 ) , aliosque est mentio . Ad hunc locum tamen videtur id magis pertinere , quod proximo cap. 24 cum iisdem fere legitur medicaminibus quæ hic leguntur : *agallici , castorei , abrotani uncias singulas , trixaginis uncias duas , manna croci unciam unam , succari unciam , hyssopi unciam unam* . Illud perincommode accidit , ut *agallici* scriptura non integra esse videatur . Quid enim , quæso , *Agallicum* est ? Venit aliquando in mentem ut legerem *agarici* , vel potius *agallochi* .

Verum ; ut alia mittam ; cum Sambuci Codices in eo quo de quærimus , loco capitis 23 habeant *Anagallici* ; hic quoque proclive est credere scriptum fuisse *anagallici* : quæ tamen vox , ut apud Vegetium frequentissima est , ita quid significet , est usque adeo obscurum , ut credibile sit , ipsam quoque mendo non vacare . Certe loca quædam sunt in quibus *anagallici* legere maluissem , nisi in Rhodium ( Not. in Scribon. Compos. 83 ) incidissem , qui docte , ut solet , *ali gallici* legendum ostendit capite quidem 54 & 56 libri primi . Et sane iis in locis convenit radix symphiti , quam *alum gallicum* a quibusdam vocari , docet Scribonius ( Comp. 83 ) : idque confirmare animadverto Sambuci Codices qui in primo eorum locorum pro *anagallici* habent *consolidi majoris* , capite autem 11 ejusdem libri *alligalici* . Equidem adeundem modum emendari oportere , crediderim , libri 2 caput 6 & fortasse etiam 9 ; item libri 3 capita 10, 18, 65, 69, 70, & facile insuper 68, neque minus libri 4 capita 9, 27 & 8 præsertim cum in hoc , ut etiam in 69 libri 3 Sambuci Exemplaria habeant *symphiti* .

In hisce enim omnibus locis *ali gallici* idoneus esse usus potest , quemadmodum etiam in libri 3 capite 67 in quo Editio princeps habet *argallico* , eodem nempe errore quo apud Cælium Aurelianum ( Morb. Chron. l. 5 c. 2 & l. 2. c. 12 ) legitur *admixta radice argallici* , quod Græci *σύνκροτον* vocant , itemque *argallici* radicem , atque foliorum ejus succum , videlicet pro *ali gallici* , ut Viri Doctissimi esse emendandum , admonuerunt . ( \* ) Sed cum hæc fatear ; illud vicissim a te peto , ut etiam atque etiam videas , num aliis nonnullis Vegetii locis , in quibus pariter *anagallicum* legitur , eadem conveniat emendatio .

Atque ut omittam non modo libri 1 caput 43, verum etiam ipsum caput 49 libri tertii , videas in primis velim loca duo , de quibus hic potissimum agimus , capitis videlicet 23, ubi Sambuci Codices habent , ut dictum est , *anagallici* , & capitis 24, ubi idem videri potest esse legendum . Num hic quoque probabimus *ali gallici* an aliud aliquid eorum quæ venerant mihi in mentem , an vero legemus *allii gallici* ? Nam , ut Rhodio assentiamur recte arbitranti , in Marcelli ( de Medicam. ) capite 17 non *allium gallicum* sed *alum gallicum* esse scribendum , nimirum ubi Marcellus Scribonii verba describit ; non tamen video necesse esse , ut nusquam *allium gallicum* scribi posse , credamus . Neque hoc tantum dico ob alium locum Marcelli capite 20 ; verum etiam , idque potissimum , ob Vegetii caput 18 lib. 1, cujus capitis hoc est initium : *Pro physico autem & anniversario remedio tradidit ( Chiron ) ulpicum beticum vel allium majus , quod quidam gallicum vocant , capitella singula &c.*

§. 39. Veg. 3, 27, 5. Cap. 27 quod est de tympaniticis : Præterea hyssopi uncias 4, alei viridis manum plenam . Videtur legendum *allii viridis* ; quemadmodum cap. 43 pro *alei purgati grana viginti & unum* , rescribendum *allii* ; nam Plinius quoque Valerianus ( de Re Med. l. 1 c. 8 ) ita est locutus , tria

grana allii . An vero capite etiam 50 pro *altei uncias* 2, legere oporteat *allii uncias* 2, diligentius videndum est .

§. 40. Veg. 3, 28, 4. Cap. 28 *medulla cervinae libram unam , manna thuris uncias quatuor , depli uncias tres &c.* Hic *bdellii uncias tres* facile esse rescribendum iis omnibus videbitur , qui cum hunc omnem locum inspexerint , tum vero cum libri 4 capitibus 14, 15, 20, 23 atque aliis in quibus *bdellium* inter ejusdemmodi remedia proponitur , vel perfunctorie comparaverint .

§. 41. Veg. 3, 38. Cap. 38 *Quod si permanferit bulimus , similæ heminas cum sextario vini infundes , & per cornu digeres . Quod iter agerit ( Samb. Cod. egerit ) inciderit bulimus , ubi necessaria desunt , terram faucibus infundes &c.* Vel deest similæ heminarum numerus , vel , ut Sambucus edidit , est rescribendum *hemina* , Cætera sic malim rescribere : *Quod si iter agenti inciderit bulimus &c. vel si iter egerit , & inciderit bulimus .*

§. 42. Veg. 3, 48, 2. Cap. 48 *camomillam illyricam ( idem nos trace ) & herbam artemisiæ in aqua decoquis , &c.* Rescriberem , *chamomillam illyricam , item nostratem* ; si *chamæmelum illyricum* a Medicis interdum laudari , meminissem , ut *irim illyricam* sæpissime , memini . Quod si quæras , cur igitur ita non emendem : *chamomillam , illyricam iridem & nostratem* ; id nimirum obstat quod hæc potio lethargico jumento paratur ; omnes autem irides somnum accersunt , non auferunt : quod tute scis Dioscoridem ( de Med. Mat. l. 1 c. 1 ) , aliosque docuisse . Verum ut alia sunt in hoc capite quæ emendationem desiderant ; ita mirum non esset , si quod alibi accidisse haud semel , ostendimus , illud hic quoque contigisset , ut Librarii quidpiam ad superiora pertinens capita , in hoc oscitanter contrusissent .

§. 43. Veg. 3, 55, 8. Cap. 55 *cum succo ptisanæ in qua ( atro ) decoctum est . In ora adscriptum est : alias ( acyo ) Facile sic emendandum crediderim : in qua acron decoctus est .* Nam lib. 1 cap. 56 ( f. 18 ) cum ptisanæ sextario aliisque acronem falsum porci pinguis , vel longanone , vel si porcina defuerint , caput hadinum depilatum cum pedibus suis &c. decoqui jubet in aqua cisternina , donec acron ille , vel certe caput hadi liquecat , & dissolvatur ab ossibus : quod iterat lib. 4 cap. 8. Libro etiam hoc tertio cap. 66 pinguis , inquit , porcinus acro decoquitur , donec omnis caro solvatur , abjectisque ossibus universis &c. In Hippia tria , *ἀκρον χοίρειον* . Apud Celsum ( de Medic. l. 2 c. 20 l. 4 c. 7 ) , trunculique suum , & summa trunculorum .

§. 44. Veg. 3, 64, Cap. 64 *Post alumen , axungiam , salem in vino conteres , offas facies & ex melle deficies , ita ut aqua calida ( fomentetur ) & si facultas suppetit , cum ejus decocto assidue fomentare non desinas .* Ita Sambuci codices . Ego vero malim quomodo primum editum fuerat , ita ut aqua calida , & si facultas suppetit , cum evisco decocta assidue fomentare non desinas . Quid enim hic est ejus decoctum ? Eviscum autem ( etsi ita frequens herba est , ut mirum sit de hac dici , si facultas suppetit ) certe aliis quoque locis , ut libr. 4. cap. 14 & 27 ; memoratur a Vegetio , qui videlicet maluit Galerum ( de Simpl. Fac. l. 6 ) aliosve Græcos imitari scribentes *εβίσκος* , quam cum Latinis scribere *hibiscum* : quamquam non modo Scribonius ( Compos. Med. 80, 82 ) *ebiscum* sed & Plinius Valerianus , & qui Macri nomine circumfertur , Versificator , *eviscum* dixere , ut ab Rhodio ( Not. in Scribon. comp. 80 ) quem miror hæc versatissimi ab ipso Auctoris Vegetii loca omisisse , adnotatum est . Non negaverim tamen , lib. 4 cap. 14 extr. pro *evisci uncias* 3, legendum fortasse *visci uncias* 3 ; cum illo ipso capite *visci italici uncias* 3, & *visci pondera* 2 diserte editum habeamus .

§. 45. Veg. 3, 66, 1. Cap. 66 *radicis tracontiae unciam 1, gentianæ unciam 1, centaureæ unciam 1. Sambuci Codices habent radicis tragontæ : Lego , radicis dracontiae .* Cujus nomine radicis dracontæ , & dra-

( \* ) Add. quod 3, 23, 4 in Corbejensi fuit *sal Gallicum* .



dracontii (Samb. Cod. dragunteæ) pariter cum gentiana, & centaurea mentionem facit Vegetius lib. 1 c. 59 & 60. Adderem etiam II; nisi ibi Sambuci Codices haberent draganti pro dracontii.

§. 46. Veg. 3, 84, 3. Cap. 84. Hac enim sola ratione nec hydrophobus fiet, & imminens crimen evadet. Rescribendum imminens discrimen, præsertim cum ea antecedant: Canis rabiosi morsus & jumentis, & hominibus exitium inferre consuevit; & alibi (l. 3 c. 15) scriptum sit: Vesicæ indignatio urinæ difficultatem, immo præsens discrimen importat.

Samsuci quoque grana, vel succum de foliis, aut de cortice exprimes, & cum vino veteri dabis in potu. Sed tunc efficax est hæc potio, si de eo samsuco dederis, quæ non in terra, sed in alia arbore fuerit innata. Sambucos innatas salicibus vidisse te, scio; quo magis credo assensurum mihi sic emendenti, Sambuci quoque grana, & de ea Sambuco. Dioscorides (l. 4 c. 168) quoque, & Plinius (Nat. Hist. l. 24 c. 8) adversus canum morsus commendant sambucum: neque video qui possit de sampsiuchi cortice succus exprimi, sive parthenium, sive marum, sive amaracum sampsiuchi nomine intelligamus, aut etiam; ut cætera omittam; qui in alia enasci arbore, quasi ipsæ quæ arbusculæ essent, humiles istiusmodi herbæ dicerentur.

§. 47. Veg. 4, 6, 7. Lib. IV, cap. 6. Perfici equi solius ambulaturæ quadam gratia discernuntur a cæteris, gradus est minutus & creber, & qui sedentem deletet & erigat, nec arte doceatur, sed naturæ veluti jure præstetur. Inter colatorios enim, & eos quos totonarios vulgus appellat, ambulaturæ eorum media est, & cum neutri sint similes, habere aliquid creduntur ab utrisque. Certum est, legendum hic esse, cum neutris sint similes, an autem colatorios, & totonarios emendare necesse sit, & potissimum qua ratione emendare deceat, incertum est. Primam tamen harum vocum facile crederem mutandam esse in totularios, modo hi a totonariis sic satis differrent. De hac altera videndum est caput 56 libri primi; si tamen is locus integer est: Parthi ipsos equos, quos vulgo Trepidarios, militari verbo Tottonarios vocant, ita edomant ad levitatem, & quadam blandimenta veturæ, ut Asturconibus similes videantur. Hic Carolus du Fresne (Glossar.) Trepidarios legit, recte, ut opinor; deinde conjicit legendum esse Trottonarios, vel Trotarios, qua de re amplius videndum est.

§. 48. Veg. 4, 9, 6. Cap. 9. Præterea fœni græci sextarium bene purgatum fervere facies, primamque aquam inter initia fervores effundes, addesque aquæ sextarios V. Apparet, scribendum omnino esse, inter initia fervoris. Eadem libro 3 cap. 70 sic traduntur: Præterea fœni græci sextarium separatim mittis in cacabum, & cum fervere cœperit, primum aquam fundes, post addis aquæ sextar. V.

§. 49. Veg. 4, 10, 2. Cap. 10. vini tenetani vel alterius austeri sextarios 2. Vinum eo nomine, quod meminerim, nunquam legi. Hæc legi quidem apud Galenum (Meth. Med. l. 7 c. 6) Nobile (vinum) voco, quod austerum est, non Sabinum modo, verum etiam Adrianum, & Albanum, & Arsinium, & Titacazenum, omniaque id genus. Sed Titacazenum hic reponendum non affirmaverim. Litteris quidem huc tria magis accedunt, quæ a Martiale (Epi-gr. l. 1, 106 l. 10, 48 l. 13, 119 l. 1, 27 l. 7, 52 l. 2, 53 l. 3, 49), aliisque memorantur, Nomentanum, Laletanum, Vejentanum; an vero horum aliquod vi etiam, atque natura, in præsentia non decerno.

§. 50. Veg. 4, 11, 1. Cap. 11. cathimæ butrotis selibram, resinæ ustæ selibram. Videntur hæc ad eam quæ hic proponitur, confectioem non attinere. Certe lib. 1 c. 16 ubi eadem confectio tradita est, non reperiuntur. Verum quocunque ea pertineant; non cathimæ butrotis, neque, ut Sambuci Codices habent, casmiæ, butyri, sed facile cadmiæ botryitidis legendum est, ut nunc est apud Cellsum (l. 6 c. 6 sect. 6), vel botryodis, ut olim erat, vel botryitidos, ut alicubi apud Scribonium (Comp. Med. 24). Hæc illa est quæ judicio Dioscoridis (l. 5 c. 46), Plinii (Nat. Hist. l. 34 c. 10), Aetii (Tetrab. 1 Scrm. 2 c. 57) optima exillimatur.

§. 51. Veg. 4, 13, 3. Cap. 13. scieni, piperis nigri, piperis longi, manna croci, betonica, catiæ nigrae. Cum alia sunt in hoc capite quæ emendationem desiderant; tum vero hæc sunt, in quibus pro scieni lego scæni, quod cum aliis aromatibus quæ ad hunc quoque pulverem requiruntur, memoratur a Columella (l. 12 c. 20). Pro catiæ autem nigrae lego casia nigra, vel potius acacia nigra quæ videlicet ex maturo conficitur semine, ut Dioscorides (l. 1 c. 115) etiam adnotavit. Vegetius acaciam nigram libro quoque 2 memorat cap. 34; & nonnulla alia quæ cum acacia satis congruunt, in aliis etiam hujus Quadrigarii Pulveris descriptionibus reperiuntur.

§. 52. Veg. 4, 14, 1. Cap. 14. humectata siccatur, laxata constringit, luxata parat, læsa confirmat. Scribo, luxata reparat.

In Caustico Pelagonii, bituminis libram, armonici uncias 6, costi uncias 6. Legendum armoniaci (id est ammoniaci) uncias 6. Hæc enim continuo sequuntur: Verum cætera decoquis in cacabo fictili novo, qui cum refrixerit, addis asphaltum, & armoniacum, & costum pro mensura qua scriptum est. Sic cap. 27, ubi Synchrisma primum describitur; pro armoniæ pond. 3, lego armoniaci, vel gutta armoniacæ, sive armeniacæ (rectius ammoniacæ) pond. 3. Nam gutta armoniacæ editum est apud Vegetium hoc ipso cap. 14, & gutta armeniacæ l. 3 c. 68 &c. Guttam autem ammoniacam, vel ammoniaci Scribonius Largus, Plinius Valerianus, Theodorus Priscianus, alique Medici Scriptores Latini sæpenumero vocarunt id quod major Plinius (l. 12 c. 23 l. 24 c. 6) Hammoniæ lacrymam, vulgo autem Ammoniacum, vel Gummi Ammoniacum appellant.

Mox in Pelagonii ejusdem Malagmate (l. 4) visci pondera 2, glutinis uncias 3. Rescribendum videtur glutinis uncias 3. Nam libro etiam 3 cap. 66 cum esset scriptum: in cacabum mittis glutis taurini semunciam, aceti acerrimi hemina dimidia conjungitur, & fervet ut quilon (fortasse chylus) fiat; Joannes Rhodius (Lexic. Scribon. ad Gluten) emendavit, glutinis taurini, ut est apud Scribonium: quanquam Celsus (lib. 5 c. 2 &c.) (id quod neque Rhodium fugit, & magis huc pertinet) gluten simpliciter scripsit. Non sum nescius, Matthiam Martinium, & qui olim in Calepini Lexico augendo Martinium exscripsere, hæc ex Sosipatro producere: Hæc glus glutis, alii gluten dixerunt. Quæ si certa sunt, neque Rhodii neque nostra emendatio necessaria est. Omnes tamen a nobis inspectæ Sosipatri Editiones, videlicet princeps Neapolitana, Basileensis, & Hano-viensis, glus glutinis habent, non glus glutis.

§. 53. Veg. 4, 17. Cap. 17. Calcis vivæ libras 2, sinopidis Alexandrini libram, ficus sicca uncias 6, axungia quantum sufficit. Lego sinapis Alexandrini in hoc malagmate, quemadmodum in alio, quod semel atque iterum est apud Galenum (de Compos. Medic. Local. l. 9 c. 2) invenio, sinapis Alexandrini, nasturtii, utriusque sextantem. Plinius (l. 19 c. 8 l. 12 c. 7) quoque sinapis semen optimum Egyptium dicit, qui etiam diserte de Alexandrino sinapi loquitur. Sed & apud Vegetium nostrum idem memorari video libro 3 cap. 46 & præsertim hoc libro 4 cap. 27 in Traumatico ad flegmonas tollendas, in quo ponit, sinapis Alexandrini unc. 6, fici asæ unc. 3, axungia veteris uncias 6, aceti scrup. 3; ut libro 2 cap. 49 ab ipso adhibentur ficus sicca cum sinapi confusa mixto aceto, solemnem videlicet, atque antiqua Medicorum consuetudine ab Dioscoride (l. 2 c. 48) etiam, Plinioque (l. 20 c. 22) inculcata. Est vicissim ubi pro sinapis facile sinopidis legendum sit, ut libro 3 cap. 6 l. 2. Quod enim ibi legitur sinapis pontici, videtur scriptum esse a Vegetio sinopidis ponticæ, de qua Plinius (l. 35 c. 5) sinopsis inventa est primum in Ponto: inde nomen a Sinope urbe, & de qua ipse etiam Vegetius lib. 4 cap. 10 ubi sinopidis pontici pastillos tres addit potioni contra vermes, quod egregie consentit cum iis quæ ab Aetio (Tetrab. 1 serm. 2 c. 5) traduntur: Lumbricos etiam pota detrahit (rubrica) Primas omnium habet Sinopica appellata. Præterea libro quoque 1 cap. 44 duabus potionibus adversus lumbricos, alteri sinopidis pontici pastil-



*pastillos totidem; alteri unciam Vegetius addiderat, quo in capite ut recte indicavit Rhodius ( Not. ad Scribon. Compos. 42 ) sinopidis ponticæ esse legendum, ita in capite etiam 10 libri 4 faciendum est.*

§. 54. Veg. 4, 22, 2. Cap. 22 *propulei unc. 3, olei veteris uncias 6, axungia veteris libram, olei savirensis lib.* Olei *savirensis* mentionem apud alios; quod meminerim; inveni nunquam; *sabini* sæpissime.

Num Vegetius scripsit *savirensis*? certe scribere solet *sarina*, ut lib. 1 c. 17 lib. 3 c. 2 lib. 4 c. 13 & 27. Cæterum non *propulei* legendum hic esse, sed *propoleos*, indicio etiam sunt Codices Sambuci, in quibus capite 14 non est, ut in Editionibus, *propulei*, sed *propoleos*, quomodo legendum esse etiam capite 27 & semel atque iterum capite 23; quanquam in hoc Sambuci editio habet *populei*; non multum credo dubituros qui loca hæc omnia inter se comparaverint.

§. 55. Veg. 4, 27, 9. Cap. 27 *Aliud iterum verumque commonentes, ut diligenti cura passionum occurratur exordiis.* Nam etiam incurabiles agritudines, si præsentes fuerint *vi*, medentis arte vincuntur. In veteratas causas etiam faciles, curari sæpe non posse legi. Videtur rescribendum, si recentes fuerint.

Facile etiam pro *Aliud iterum verumque commonentes*, legendum sit, *Illud iterum iterumque commonentes*. Sic Quintilianus ( Instit. Orat. l. 2 c. 13 ) *id maxime præcipiam, ac repetens iterum iterumque monebo*; imo sic Virgilius ( Æneid. l. 3 v. 435 ): *Unum illud tibi, nate Dea, præque omnibus unum Prædicam & repetens iterumque iterumque monebo.*

§. 56. Veg. 4, 28, 19. *Causiticum ad nervorum dolores conficiunt etiam picis britiæ pond. 1 & semis, vini (inei) pond. 1 semis.* Legendum *picis brutiæ*, & nisi plurimum fallor; *vini amminei*. Sambuci Codices cap. 14 f. 1, 15, 23 f. 2, 25. quibus omnibus in locis *picis britiæ* editum est, recte habent *picis brutiæ* a Scribonio, Columella, Plinio, Dioscoride, Galeno memoratæ. Iidem Codices lib. 2 cap. 22 ubi editum est, *vini amenii veteris sextarii tres*, habent *vini aminæi*, qua ratione scriptum est apud Celsum lib. 6 c. 6 ( sect. 21 ), aliisque in locis a Rhodio ( Not. in Scribon. Compos. 257 ) adnotatis, in quibus ipse scribendum censet *aminei*, ut pariter in Scribonio, ubi editum erat *aminei*. Contra Keuchenius ( Not. ad Samonici caput de solut. ventris ) ex græcis latinisque monumentis plura profert quibus, improbata a Rhodio, scriptura servetur. Sed cum utramque probari posse, Turnebus ( Advers. l. 29 c. 26 ) ostenderit, videlicet *aminei*, & *amminei*; nos qui hujus vestigia in proposito loco invenimus, eandem hic nobis servandam existimavimus.

*Malagma ad nervos claudos. Sepi hircini libram, mollicidenæ selibram, resinæ libram, æruginis selibram. Lego molidenæ, sive molybdænæ.*

Erant alia plura verborum monstra, nedum leviora errata, quæ in Vegetio emendari possent. Sed hæc mihi ob occupationes properanti in præsentia satis; utinam tibi nimium multa. Vale.

Patavii XI. Kal. Majas M DCC XXII.

## PARTIS SECUNDÆ FINIS.



Lectores poterunt hæc saltem sic emendare:

pag. 10. l. penult. ( b ) Monument. = ( b ) Marches. Monument. p. 11. c. 1. l. 34. inunctione = inunctione p. 13. c. 2. l. 52. diis - dis p. 22. c. 1. l. 10. fœminæ - fœmina p. 24. c. 2. l. 22. latissi - clarissi p. 26. c. 1. l. 17. ut - tu p. 27. c. 2. l. 33. is - eis p. 30. c. 1. l. 31. complectem - complectens c. 2. l. 6. pilonarvis = pilonavis p. 31. c. 1. l. 12. eos p. 32. c. 1. l. 58. gis in - gis, in c. 2. l. 57. ex ædi - exædi p. 33. c. 2. l. 40. tempore - tempora p. 35. c. 2. l. 5. su - sua p. 39. c. 1. l. 35. plures - plures p. 47. c. 1. l. 71. venustioribus - vetustioribus p. 48. c. 2. l. 71. ergo. ego p. 51. c. 2. l. 12. dicebat - decebat p. 65. c. 2. l. 48. locis - loris p. 67. c. 2. l. 47. restasque - redactasque p. 70. c. 1. l. 12. penu - pinu l. 45. sanguis - sanguinis p. 72. c. 1. l. 69. perniciosam - perniciosam p. 74. c. 2. l. 5. scani - schani p. 75. c. 2. l. 28. utinam - utinam ne



IN SENATE  
JANUARY 11, 1894  
REPORT  
OF THE  
COMMISSIONERS OF THE  
LAND OFFICE  
IN RESPONSE TO A  
RESOLUTION PASSED  
BY THE SENATE  
MAY 1, 1893  
RELATIVE TO THE  
LANDS BELONGING TO  
THE UNITED STATES  
IN THE DISTRICT OF  
COLUMBIA  
AND  
THE ADJUTANT GENERAL'S  
OFFICE  
WASHINGTON  
GOVERNMENT PRINTING OFFICE  
1894

THE DISTRICT OF COLUMBIA  
LAND OFFICE  
WASHINGTON  
JANUARY 11, 1894  
REPORT  
OF THE  
COMMISSIONERS OF THE  
LAND OFFICE  
IN RESPONSE TO A  
RESOLUTION PASSED  
BY THE SENATE  
MAY 1, 1893  
RELATIVE TO THE  
LANDS BELONGING TO  
THE UNITED STATES  
IN THE DISTRICT OF  
COLUMBIA  
AND  
THE ADJUTANT GENERAL'S  
OFFICE  
WASHINGTON  
GOVERNMENT PRINTING OFFICE  
1894

TABLE OF CONTENTS



THE DISTRICT OF COLUMBIA  
LAND OFFICE  
WASHINGTON  
JANUARY 11, 1894  
REPORT  
OF THE  
COMMISSIONERS OF THE  
LAND OFFICE  
IN RESPONSE TO A  
RESOLUTION PASSED  
BY THE SENATE  
MAY 1, 1893  
RELATIVE TO THE  
LANDS BELONGING TO  
THE UNITED STATES  
IN THE DISTRICT OF  
COLUMBIA  
AND  
THE ADJUTANT GENERAL'S  
OFFICE  
WASHINGTON  
GOVERNMENT PRINTING OFFICE  
1894



JO. BAPTISTÆ  
MORGAGNI

P. P. P. P.

OPUSCULORUM

MISCELLANEORUM

PARS TERTIA.



VENETIIS,

MDCCLXIII.

~~~~~

EX TYPOGRAPHIA REMONDINIANA.

SUPERIORUM PERMISSU, AC PRIVILEGIO.



— vade, liber: si veneris unde, requirent ;  
Æmiliæ, dices, de Regione viæ.

*Martial. lib. 3. Epigr. 4.*



3

ILLUSTRISSIMIS ET NOBILISSIMIS VIRIS  
 V E X I L L I F E R O  
 AC CÆTERIS FOROLIVII  
 CONSERVATORIBUS  
 OMNIQUE  
 SENATUI FOROLIVIENSI

Joannes Baptista Morgagnus S. P. D.



UOD in extrema illa Epistola posui, qua Adversaria Anatomica Sexta Vestris, PATRES ILLUSTRISSIMI, Decessoribus ante hos tres & quadraginta annos dedicavi, si bonorum omnium largitor DEUS vitam mihi, viresque suffecisset, futurum fortasse olim qui me, nullis aliis subsidiis, quam labore, & diligentia, instructum, nonnihil tamen in Re Anatomica egisse, nec fuisse omnium postremum, existimaret; id nunc relegens, gratus quidem agnosco, ab Divina Beneficentia datum esse mihi virium satis, vitæ autem vel plus quam satis; an aliquid tamen dignum Civitate nostra adhuc præstiterim, neque scio, nec, si sciam, dicere ausim. Hoc scio, nihil me unquam ne subscevis quidem horis ab Anatomæ studio abstraxisse, nisi forte aut Eruditis Amicis, alia interdum ex me quærentibus, non respondere non possem, aut fervida æstas a cadaveribus perscrutandis avocaret. Quo anni tempore cum haud semel istuc secederem; ipse me carissimæ Patriæ, & vicinarum Urbium aspectus hortari videbatur, ut quidquid daretur otii in ulteriori earum rerum investigatione consumerem, quibus de rebus jam duas Patavii Epistolas scripseram. Itaque duodecim alias apud Vos scripsi, vel potius fudi, sperans, datum iri tempus recensendi, siquando, uti constitueram, ad Vos redirem, ut ubi primos egissem annos, ibi postremos absolverem. Nunc vero cum me, præter jam summam senectam, affectamque valetudinem, haud una, minime Vobis ignota, causa consilium mutare coegerit; pro me Epistolas saltem ipsas ad Vos remitto, quales eæ cunque sunt. Nam, præter unam, aut alteram, non relegi qui scirem, nisi istic perfici non posse, alia videlicet, atque alia, in quibus hæsitabam, cum de proximis, tum de nostra præsertim Urbe perquirendo, & sciscitando. Sed Docti, & historiarum, ac loco-



rum periti tum nostrates, tum ex reliqua Æmilia Viri quod mihi non licuit, ipsi præstabunt tanto, opinor, libentius, quod me cognoscent nusquam plus Patriæ, quam vero, quantum mihi notum esse potuit, tribuisse. Neque enim falsas laudes, sed veras tribuere, ea demum germana in Patriam pietas est. Quam si in aliis etiam, quibuscunque permissum est, rebus me & præsentem, & absentem præstitisse, perspectum habetis; quæso a Vobis, PATRES ILLUSTRISSIMI, ut extremum hoc grati, obsequiosique erga Vos animi testimonium, benigne accipere, & qua me semper Humanitate, eadem meos quoque posteros complecti velit. Valete.

D. Patavii Postridie Idus Octobris CIO IDCC LXII.





Epistolæ hæ quatuordecim Historico-Criticæ nunc primum prodeunt, Æmilianæ dictæ, non modo quia pleræque olim scriptæ fuerant in Æmilia; sed & quia omnes ad Antiquitates, & Geographiam attinent partis non modicæ illius Provinciæ, sicuti subiecta hic singularum argumenta, & summa capita statim ostendent.

I.



*OVUS Accusator Flavii Blondi super Patria Cornelii Galli refellitur. artic. 1. & seqq. Accusatoris errores ostenduntur. 10. & seqq. Inter hæc, de versibus agitur, Gallo suppositis. 12. & seqq. Quo Lycoris tempore Antonium in Galliam secuta sit. 15. Quo anno Gallus sit natus. 16. Et cur Forojuliensis esse non potuisse videatur. 17. Lycoris quæ fuerit. 18. & seq. De ea Ciceronis loci, & Plutarchi adversus Interpretes quosdam illustrantur. 19. & seqq. Galli genus quale. 24.*

II.

*Scribendi hanc Epistolam causa. 1. Errant qui Bedesim, & Vitim eundem amnem fuisse, putant. 2. De duobus Foroliviensium fluminibus uter Bedesis fuerit, quomodo inquirendum. 3. Nec Polentani, nec Veneti Ravennam his fluviis cinxerunt. 4. Neque horum infra Ravennam confluentes Plinii tempore, & pluribus insequentibus sæculis esse potuerunt. Ibid. & seqq. Inter hæc, Agnelli Ravennatis duo loci emendandi, & errores quidam Cluverii indicantur. 6. Montonum fuisse Bedesim Plinio, Ronchum autem Vitim, conjicitur. 7. Et circa hunc ballucinationes Alberti, Ferrarii, Baudrandi ostenduntur. Ibid. Cur Plinius Montonum omisisse videri possit. 8. Ronchum ipsi fuisse Vitim, confirmatur. 9. & seqq. Quæ inter, error Cluverii, & Asseclarum de antiqua Solona evidentissime retegitur. 10. Geographi plerique, & eorum Tabulæ in duobus illis fluviis graviter peccant. 11. Vitis in Plinio sit legendum, an Utis. 12. & seq. Quod art. 7. conjectum fuerat, confirmatur. 14. & seq.*

III.

*Hujus, & sequentium Epistolarum argumentum. 1. & seq. De quinque fluviis in Ravennæ æstuarium olim influentibus primum Padus consideratur. Unus de Padi alveis per mediam Ravennam ferebatur, non tamen, ut quidam Interpretes Dantis credunt, hujus ætate. 3. Unde is alveus inciperet, & Augusta, non angusta, Fossa dicendus. 4. Hujus amplitudo quomodo contracta, ut nulla jam sit, non sine errore Geographorum. 5. 6. Agnelli de hac Fossa loci illustrantur. 7. & seqq. Inter hæc, quædam de porphyretico Theoderici sepulchro ab Agnello tradita, cum posterorum autem Scriptis difficile concilianda, attinguntur. 10. Et Butrium ubi fuerit, conjicitur. 12.*

IV.

*De secundo, & tertio flumine agitur, Anemone, & Bedesi. De Anemone errores quidam Geographorum indicantur. 2. Errant qui italice Amone credunt, non Lamone esse dicendum, & quomodo vox illa prima nata sit. 3. 4. & unde alia Anemonis nomina. Ibid. Circa ejus finem errores Geographorum. 5. Bedesis. In duobus amniculis ex quibus oritur, error in Dante intelligendo: tum errores alii in Tabulis Geographicis. 6. Quo primum tempore supra urbem fuerint unum in alveum corrivati. 7. & seqq. Et quales huic, & quando pontes impositi. 10. De antiqua utriusque amniculi per urbem via, & quæ hinc consequantur. 11. Agnel.*



*Agnelli loci qui ad Bedesim videntur spectare, considerati. 12. 13. Alia de Bedesi. 14.*

V. De quarto, & quinto flumine, Viti, & Sapi. Vitis nomen confirmatur. 1. Ronchi nomen ab Roncho castello deductum: de ponte alio alio tempore illi imposito: & vetus Inscriptio ad pontem quomodo legenda. 2. Unde Aquæductus sit etiam vocatus, inquiritur: ubi de Templo, & rure ejusdem nominis. 3. An ab Aquæductu Theoderici. 4. aut Romanorum potius: ubi alia de Aquæductu Ravennate. 5. Quæ Galeatæ ad Theoderici Palatium, & Aquæductum spectare possent, quæsitæ. 6. In marmoribus ad Templum de quo art. 3, & haud ita procul sitis, frustra quæ ad Aquæductum spectarent, quæsitæ: ubi & de columella ad illud Templum conspicienda agitur, indicaturque quid fuerit, & cur gemina Inscriptio litteris inter se adversis insculpta. 7. Boccaccii de Fluminibus locus expenditur, indeque aliquid contra Cluverium deducitur. 8. Aliorum errores in aliis Ronchi nominibus. 9. Sapis. De hoc recentium Geographorum errata, an ob versum Lucani. 10. De eo versu plura. Ibid. & seqq. Inter hæc aliæ aliorum hallucinationes notatæ. 11. 12: ubi & de Crustumio oppido, apud Anastasium Bibliothecarium memorato. Sapis quo tempore a Classensi portu, si unquam tamen in eum influxit, aversus fuisse videatur. 14. & seqq.

VI. Ravennæ æstuaria quibus limitibus circumscriberentur ad mare præsertim, & primum orientem versus. 1. Classensis portus amplitudo, & auctor. 2. Num Plinius, ut plurimi ajunt, scripserit, Pharum portus hujus fuisse maximum omnium Rom. Imperii: & num sacra turris S. Mariæ in Portu is Pharus fuerit: cujus Templi qui conditores credantur, & quo tempore. 3. Classensis Phari fundamenta, quæ alibi reperta dicuntur. 4. Musæum opus, in quo is Pharus representari creditus est, describitur. Classis oppidi, & Cæsareæ limites indicantur. 5. Classis oppidum cur exstructum: & quod usque ad tempus apud illud fuerit classis Romanorum. 6. & seqq. Inter hæc quæritur, ad quem de tribus Valentinianis Vegetius libros miserit de Re Militari; nisi potius ad Theodosium II. misit. 7. Classense oppidum ad quod usque tempus perstiterit. 9. De Cæsarea & via, & oppido. 10. De ponte Candiani, & num fluvius ullus fuerit eo nomine, isque aquis præsertim copiosissimis. 11. & seqq. Inter hæc, errores notantur Geographorum, aliorumque. 12. 13. Quis fluvius in veteri Inscriptioe videatur intelligendus nomine Badrini. 14. & seqq. De Vatreno flumine, & quomodo legendus, accipiendusque sit Martialis locus. 15. 16. De Vatreni influxu in Padum non semel mutato. 17.

VII. De littore Ravennate ad occidentem. 1. 2. Considerantur quidam Agnelli loci. 3. & seqq. De portu Ravennate. 6. & seqq. Qualis locus ubi Ravenna primum condita est: & quomodo, & qua de causa non ipsa a mari; sed mare ab ipsa recesserit. 8. & seqq. & quibus sæculis. 11. Cause mutationum portuum Ravennæ. Ibid. & seqq. Qualis Ravennam missa fuerit Inscriptio quæ sub Pontificis Statua insculperetur. 18.

VIII. Argumentum sequentium Epistolarum. 1. In Padi primis duobus alveis errores Geographorum. 2. & in Vatreno. 3. & in Silva Lucana. 4. De Contignolæ oppidi Conditoribus. Ibid. Errata Geographorum in Anemone fluvio. 5. Mutiliana an Castrum Mutilum Livii. 6. & seqq. Antiqua Solona ubi perperam quæsitæ. 9. Ubi fortasse quærenda sit. 10. Errores Geographorum in fluviiis Foroliviensibus. 11.

IX. Forum Livii quando conditum. 1. Neque obstat Strabonis, & Melæ silentium. 2. Quatenus Livia dictum sit, ubi de duabus Inscriptionibus. 3. Cur paucæ supersint. In his duæ celebres ob adscripta Consulium nomina. 4. Conditum Forum



rum inter amniculos duos. 5. Eius antiqua tum longitudo, tum latitudo modica; ditio autem olim ampla. 6. 7. Cur ejus viæ quatuor majores vocentur Suburbia. 8. De pontibus, alteri amniculorum impositis, & restitutis cum Inscriptione, quæ quomodo legenda. 9. Peculiarium nominum quibus singula Suburbia, & Portæ appellantur, causæ inquiruntur. 10. Portæ olim plures quatuor. Muri, fossæ, & tres Arces quibus urbs muniretur, quando incipi, aut restitui potuisse videantur. 11. De urbis foro antiquo, & novo, hujusque ornamenti, & de multis in urbe turribus. 12. Cænobia quædam quo tempore edificata. 13. Episcoporum quatuor Foroliviensium nomina indicantur, Episcoporum Catalogo, in quo desunt, addenda. 14. Quomodo eorum Chronologia reddi exactior possit. 15. & Prætorum Foroliviensium seculo XIII. nomina ad duodecim nosci queant. Ibid. Causæ recensentur, quare antiquiora Civitatis Documenta interciderint, incendia præsertim, quorum maxima suo quodque tempore indicantur. Ibid.

X. De Cornelio Gallo Poeta, & primo Ægypti Præfecto rursus agitur, & primum quomodo distinguendus ab aliis qui cum eo confusi fuerant. 1. 2. Gesta aliorum, perperam ipsi tributa, & vera ipsius distinguuntur. 3. & seqq. Credibilior ejus mortis causa. 6. & modus certus. 7. Eius Scripta quæ supposita, quæ dubia, quæ certa, & hæc quod usque ad tempus servata. 8. 9. Quo in pretio fuerit apud alios Poetas. Ibid. & 10. Ad ea quæ de Cytheride, & de tempore quo Antonium secuta sit, in I. Epistola scripta sunt, adjungenda. 11. Alia de Gallo tum dubia, tum certa. 12. In ejus Patria definienda difficultates. 13. Eorum qui Forojuliensem fuisse, contendunt, rationes, & ad has responsio. 14. & seqq. Inter hæc, de multiplici vocis Forojuliensis significatione. 17. & 18. 19. plura de Foro Julii Narbonensi. Ratio, cur Foroliviensis potius credendus sit Gallus. 20. 21.

XI. De Blondo primum agitur: ejusque nomen Flavium fuisse, confirmatur, & quod nomen Avo fuerit, ostenditur, unde quædam deducuntur. 1. Blondi probitas: & quidpiam quod in Recineri Episcopum dixit, de Decessore, non de optimo ejus Successore Nicolao Hasteo, omnino esse intelligendum. 2. Scriptum quoddam Blondi, quod ineditum Oxonii extare dicitur, esse Italiam ejus Illustratam videri: Hujus, & Romæ Instauratæ libri quam difficiles scriptu, & quam utiles eo tempore. Ibid. Quot occupationibus distentus, illos, & Historias scripserit: Quanti, & a quibus ejus Scripta, & diligentia fierent; non pari tamen æquitate ab aliis quibusdam. 3. 4. Patriam non plus quam æquum esse videretur, amasse ostenditur. 5. Eius fides in illa quoque Inscriptione defenditur, quæ attinet ad Rubiconem. 6. 7. Quid censendum sit, queritur de regula quadam Foroliviensi, ad Sextum Rufum Historicum spectare credita. 8. & seqq. De Hieronymi Mercurialis Vita, Meritis, & Scriptis editis, & ineditis plura, & circa hæc, illamve non paucæ quorundam hallucinationes notatæ. 11. & seqq. De Jacobo a Turre, aliisque Foroliviensibus Philosophis, Medicis, &c. 16. & seqq. De Cardinalibus, & Episcopis. 12.

XII. Reditur ad fluvios Forolivienses. Agitur de Viti, oppidisque ipsi adjacentibus, notatis erroribus Geographorum. 1. 2. Galeatæ varia nomina, quam fuisse olim Municipium, Mervaniolam dictum, confirmatur. Ibid. & seqq. Errata Geographorum. 6. 7. Arcis Meldulensis Inscriptiones tum editæ notatis erroribus, tum ineditæ cum adnotationibus proponuntur. 7. & seqq.

XIII. Primum de Pineto Ravennate, tum de Foro Popilii, & Bertinorio verba fiunt, erroribus sive Geographorum, sive aliorum adnotatis. 1. & seqq. Inter hæc, de positu illius Fori, & vicinarum urbium scribitur. 3. & de antiqui Raven-



- natis *Anonymi Cosmographia*. 4. tum de *Inscriptione*, perperam ad *Forum Popilii* spectare credita. 5. *Bertinorii* priscum nomen aliter ab aliis propositum. 7. 8. Nomen *Petræ Honorii*, illi datum, in quam gravem errorem quosdam olim, & nuper induxerit. 9. & seqq.
- XIV. Denique de *Sapi* fluvio, adjectisque ipsi urbibus sermo habetur, & primum de *Sarsina*. 1. & seqq. ubi errata notantur tum in ejus nomine scribendo, tum in ipso, & *Bobio* intelligendo. Quid *Sapinia Tribus*. 5. *Cæsena* nomen, erroresque circa ipsum. 6. Cur dicta *Curva*, & *Flavia Papia*. 7. 8. De vinis *Cæsenatibus*. 9. *Cervia* nec perverusta, nec tamen valde recens urbs est. 11. 12. Quid locus fuerit dictus *Ad Novas*, & de vico ad portum *Cæsenatem*. 13. & seqq. Ubi & dubitationes quædam super controversia de vero *Antiquorum Rubicone*. 15. & seqq.







# EPISTOLA ÆMILIANA I.

Joannes Baptista Morgagnus Georgio Viviano Marchesio Equiti,  
Viro Clarissimo atque Eruditissimo S. P. D.



**E**xpectanti mihi jam diu certum hominem, per quem *Eruditas* E. M. A. G. *Epistolas*, ut Amici Auctoris a me peterant, ejus nomine ad Te mitterem, sero, atque adeo tertio ante hunc factum est die, ut librum ipsum in fasciculum complicanti in oculos forte incurreret nomen, quod in illarum postrema crebro repetitum est, nostræ Civitatis. Chartas explico, attente inspecio, paginam unam, aut alteram perlego. Quid quæris? Dicam grandem invenio impactam Blondo nostro, quod in iis qui *Italia Illustrata* inscribuntur, libris Cornelium Gallum fuisse docuerit Foroliviensem. Ea me res tamen vix mediocriter affecisset, nisi iis verbis actam vidissem, quæ non opinionem, sed fidem Blondi, tanquam in manifesta fraude, atque fallaciis deprehensi, vehementer etiam atque etiam incusarent. Nam civis noster fuerit, an non fuerit Gallus, vos Historici videritis; nos in re istiusmodi, nec primum modo, aut nudiustertius controversa, utrum statueritis, haud ita ægre laturi sumus. Blondum vero, quem nostrum fuisse quisquam, quod sciam, nec unquam negavit, neque ullo modo negare potest, quis eripi nobis, æquo animo patiatur? Eripitur autem, cum sciens in historiis esse mentitus, cum fucum omnibus facere voluisse, cum dolo malo codices Bibliothecæ Vaticanæ corrupisse dicitur, ut fallacias istas suas, atque mendacia comprobaret. Quis enim, obsecro, est Blondus? Historicus certe est, Historiæque Instaurator nobilissimus. Quis est autem Historicus? Nonne is, cui si fidem adimas, nihil omnino, nisi infamiam, relinquis? *Mendaci enim homini*, quod ait Tullius (a), *ne verum quidem dicenti credere solemus*. Nobis igitur Blondum eripit qui talia de Blondo affirmare, atque inculcare non dubitat. Neque modo summi Historici gloriam eripit; mendacis, & flagitiosi nebulonis, si Superis placet, ignominiam relinquit.

2. Multa sane, ac varia de Blondo multorum judicia collegit Blountius (b). In iis tamen nemo unus est, qui fallacem hominis animum diserte arguat, & istiusmodi facinora objiciat. Non desunt, inquit, quod te non fugit, Sabinus, qui ab eo *veritatis fidem multis in locis requirant*. Num ab sciente, & per fraudem simulante? Nihil ejusmodi. Imò qui libere se loqui, proficitur, Gifanius *Omnia*, inquit, *ut libere dicam quæ sentio, meliore fide tradi-* Morgagni Opusc.

dit, quam eventu: ut pote is, qui nonnulla, quibus ea perquirenda dederat, temere crediderit. Nam per se omnia videre potuisse, absurdum est credere: cum nec ex autore uno, sed pene innumeris, atque illis ipsis ambiguis & variantibus, multa quærenda essent.

3. At enim Eusebii codices minime variant; sed omnes, quod se ostendisse, ait Epistolæ Auctor, omnes, inquam, sive typis, sive calamo exarati in eo conveniunt, ut *Forojuliensem* Gallum habeant. Imposuit igitur nobis Blondus, cum *Foroliviensem* Eusebio dici, affirmavit. Verum, ut typis exscriptos Eusebii codices, quos Blondus (id quod ostendimus infra (\*)) videre non potuit, seponamus; qua tandem ratione demonstrare Accusator queat, in nullo eorum qui calamo scripti sunt, *Foroliviensem* legi? cum tu, Vir Cl. (c), in optimo illo qui Cæsennæ in celeberrima, vetustaque Bibliotheca asservatur, inveneris *Forolivien.* idemque luculenter scriptum viderit Parens tuus Vir Præstantissimus, & de patria historia non secus ac tu, egregie meritis (d), in aliis præterea duodecim, antiquis omnibus, aliis alio tempore, ab aliisque Scriptoribus exaratis, quos Romæ inspexit, sex quidem in Bibliotheca Vaticana, duos in Urbinate, quatuor in Palatina, præter eos quos in Parisiensi, in aliisque scriptos extare, indicaverat Præsul, & J. C. Eruditissimus Peregrinus Maserius (e). Quorum codicum etsi nullus extaret; non tamen hinc fieret, quine eorum qui Blondi temporibus extare potuerunt, & quibus ipse potissimum usus sit, plures ad istum ipsum modum se habuerint. Quinimo si omnes aliter se habuissent; tunc rogatus Blondus esset ab Doctis omnibus, ut exemplaria proferret quorum auctoritate id docuisset; ipsi vero nullum quod ostenderet, in promptu fuisset: quod Virum prudentissimum non vidisse, aut si ipse non vidisset, ne Doctos quidem cæteros homines jam tum continuo visuros fuisse, quis adduci possit, ut credat?

4. Quid? quod indicia minime defuissent, Eruditos homines ante Blondum nostrum in Eusebii scriptis idem legisse. Ne longius quæram; bina in tuis probatissimis Libris (f) invenio. Alterum, a Francisco Petrarca, ut tute in emendatissima ejus Editione animadvertisti, Gallum dictum esse *Foroliviensem*. Alterum, *Foroliviensem* quoque fuisse appellatum in Chronico quod Ferrariæ extat, Auctore quidem incognito, sed anno 1304. scribendi finem faciente. Tertium vero indi-

B

cium

(a) De Divinat. l. 2. (b) Censura Cel. Author. pag. 465. (\*) n. 7.  
(c) Vit. Viror. Illustr. Foroliv. l. 2. c. 5. (d) Supplem. Istor. di Forlì l. 1. (e) Ibid.  
(f) Vit. cit. c. cod. 5.



cium ipse nobis Accusator suggerit, *Foroliviensem* item legi in Guilelmi Pastrengi libello, Venetiis quidem typis edito, sed Petrarchæ temporibus scripto. Nam quod ille subjicit, nullam ei libello habendam fidem propterea quia gravissimis scateat mendis; profecto id minime efficit, ut is ipse, de quo disceptatur, locus in mendo cubet.

5. Sed faciamus (quod facile tamen non est faciendum) faciamus, inquam, eorum culpa qui sive typis, sive calamo Pastrengum, Petrarcham, & incognitum illum Auctorem describere, *Foroliviensem* esse scriptum qui scribi debuerat *Forojulienfis*, perfacili sane, sed in utramque tamen partem, errore, quem haud semel accidisse, non unus animadvertit, & Accusator non ignorat; num forte ante Blondi ætatem eundem homines errorem admittere non potuerunt? At si potuerunt; qui fieri igitur possit, ut constet, omnes Blondi tempestate Eusebii codices *Forojuliensem* habuisse? Hoc vero nisi liquido constet; neque illud sane constare potest, Blondum quidem sic invenisse; sed primum, quod Accusator affirmat, ex *Forojulienfi Foroliviensem* Gallum fecisse, in eumque finem Eusebii scripturam manifesto adulteravisse.

6. Sed tam gravis in talem Virum editæ accusationis, atque adeo condemnationis quænam præterea sunt argumenta? Enimvero hæc; tanquam ejus fraudis indicia certissima, sive, ut diserte vocantur, *infallibilia*, adjiciuntur. Romæ in Ottoboni Cardinalis Amplissimi Bibliotheca calamo exaratos Eusebii codices habere *Forojulienfis*; quosdam autem in Vaticana qui post Blondi ætatem sunt scripti, binosque item antiquiores habere *Forolivienfis*, in quibus tamen perspicue apparet, vocem abrafam fuisse *Forojulienfis*, ut littera L alium in locum transferretur, & *Forolivienfis* legeretur. Hoc vero, inquit Accusator, a Blondo, ut qui apud Pium II. Pontificem gratia florebat, *malitiose* factum est; infelicitè tamen: nam qui ut omnibus imponeret, omnia Eusebii sive typis, sive calamo scripta exemplaria corrumpere magnam cum cura debuisset; is ne in paucis quidem codicibus adulterandis ea uti potuit industria, ut in his ipsis *pravæ suæ voluntatis*, *ausique minime laudandi* veltigia non relinqueret.

7. Permirum tibi videri, non dubito, hæc Erudito Viro excidisse. Neque id eo dico, quod nihilattinebat typis exscripta Eusebiani codicis exemplaria hoc loco memorare, quæ non nisi circa annum 1475. (hoc est a Blondi obitu qui in annum incidit 1463. (g), duodecimum) primum exiisse, Vir docet cum in aliis, tum præsertim in rebus ejusmodi versatissimus Joannes Albertus Fabricius (h). Neque vero dico propterea quod a veri similitudine alienum est, Blondo qui jam diu apud tres Pii Decessores eodem loco fuisset, non nisi postremis iis annis in mentem venisse, ut Pontificios vitaret codices, nec potius ante, quam ex auctoritate Eusebii scriberet *Italia Illustrata Regione VI.* Gallum fuisse *Foroliviensem*: hoc enim octo annis ante scripsisse, quam Pius Pontifex crearetur, qui anno est creatus 1458. non unus ejusdem *Italia Illustrata* locus indicat, sed hi in primis duo, quorum alter *Regione III.* est, alter IX. Hic Veneti, inquit, *Veronam annos jam XLV. obtinent*, qua quidem anno 1405. esse potitos, ex ipsis Venetorum Historiis constat. In illo autem altero loco, *quantum præsentis anno celebratur Jubileus*, quem nemo nescit anno 1450. fuisse celebratum. Quid ergo potissimum mirandum est? Illud nimirum, quod in ejusmodi in tantum præsertim Virum criminatione nihil pensi videtur habuisse Accusator, ut quæreret; certe nihil habuit, ut lectores doceret; præter illos, quos dixit, duos, num sint alii in Bibliotheca Vaticana Eusebii codices Blondo antiquiores, & qua in his ratione locus quo de agitur, scriptus sit: num duo illi, Blondi ætate, qua Bibliotheca Vaticana longe minus libris instructa erat, in ea fuerint; an postea, cum magnæ factæ sunt accessiones, & unde illati: num ea tantum vox in iis codicibus, an aliæ quoque; hæc autem eo-

dem, an alio modo rescriptæ inveniantur: præsertim vero ea mutatio num Blondi ætate recentior, an vetustior esse videatur; quod postremum si haud facile constitui posse, existimet; multo difficilius esse, fateatur, id constituere quod ipse tamen sine ulla dubitatione constituit, illam sive doctæ manus emendationem, sive imperitæ depravationem, Blondi malitiosæ calliditati esse imputandam; quanquam cujus fuisset calliditatis flagitium tantum sic admittere, ut qua re inauditum antea, ut Accusator contendit, mendacium statim atque propositum foret, tuendum esset, ea ipsa re mendacium magis eo quidem tempore se proderet?

8. Nam quod ait, ingeniosissimos, præstantissimosque homines facile superbia obcæcari, ut nonnunquam audeant quæ nemo præter ipsos auderet, idque ad Blondum transferre non dubitat; in hoc vero cogor perspectam alibi ejus æquitatem desiderare. Cum enim ex eo quem libello adjecit, Indice supra defendisse Trissinum viderem; inspicere placuit, num suis æque ac alienis, insensus foret. Hæc igitur inter alia inventi, Trissinum quiddam, si minime verum esset, scripturum non fuisse; neque enim tantum Virum decere potuisse id scribere in quo mendacii convinci posset: aliquot autem ante paginis, *presumptionibus non esse judicandum, sed clarissimis argumentis, & probationibus l. fin. C. de probat.* Merito quidem, & recte hæc omnia. Illud non recte, quod pro Vicetino valeant; pro *Forolivienfi* non valeant: pro illo valeant, ne cuiusdam inventi laudem amittat; pro hoc non valeant, ut flagitii turpissimi, & ab ejus genere, dignitate, moribus omnino abhorrentis, damnetur.

9. Quid enim magis alienum ab homine (i) vetusta atque inclyta stirpe nato, & cujus fidem ita Patria spectatam habebat, ut adolescentem adhuc Mediolanum ad publica tractanda negotia legaverit; ita autem Prudentissima Venetorum Respublica, ut suos inter cives, atque Administratos retulerit; ita Eugenius IV. Pont. Max. ut ad eandem, & Florentinam Rempublicam gravissimis de rebus legatum miserit, & sibi ad vitæ usque exitum a secretis habuerit; ita porro deinceps Nicolaus V. Callistus III. Pius II. ut hoc idem omnes tantum, & tam circumspiciendum Munus eidem concedere non dubitaverint; ita demum quicumque cum eo vixerant, ejusque integerrimos perspexerant mores, ut eo jam mortuo, tum videlicet cum liberiora hominum sunt judicia, vitam ejus Campanus vitæ Catonis esse crediderit comparandam. Quid, inquam, magis alienum ab ejusmodi homine qui toto longissimæ vitæ spatio tot, tam variis, tamque perspicacibus Dominis in ejus generis officiis, atque negotiis fidem semper probavit suam, quam per fraudem, atque fallacias universis hominibus in historia imponere, ejusque rei gratia sanctissimæ Bibliothecæ codices adulterare?

10. Quid ergo est? Accusatorem, qui non minori hæc asseveratione affirmat, & toties inculcat, ac si intimis Blondi cogitationibus interfuisset, codicesque adulterantem vidisset, ipsum, inquam, Accusatorem facile sensurum fuisse, existimo, quantum hæc ejus criminatio a veri similitudine abhorreret, & quanto gravioribus opus fuisset argumentis ad talis tantique Viri famam, estimationemque honestissimam labefactandam, si aliquanto magis quam videtur fecisset, ad ea quæ in istam conjiciebat Epistolam, attendere animum voluisset. Quod ne temere, aut remale dicendi voluntate, a qua longissime absum, dixisse me, putes; quæso a te, ut saltem Dionem Cassium gravissimum Historicum in manus sumas, & quæ de Cornelio Gallo scripsit, attente relegas, tum vero cum his ea quæ de eodem Gallo in ista affirmantur Epistola, conferas.

11. Hunc igitur se interemisse *tertio & quadragesimo suæ ætatis anno*, affirmatur traditum etiam ab *Dione, & Ammiano Marcellino*. Verum cur neutrius testimonium proferuntur, aut loci indicantur? præsertim cum Vossii, cum Gyraldi, cum Criniti, cum Jacobi Philip-

(g) Ibid. c. 4. (h) Confer Biblioth. Græc. Tom. 6. & Biblioth. Ecclesiast. in cap. 81. Hieron. de Vir. Illustr.

(i) Vit. Supra laud. l. 2. c. 4.



Philippi Bergomensis, cum Joannis Jacobi Hoffmanni sollicitè indicentur, & proferantur, qui ætate, & auctoritate tanto inferiores sunt Marcellino, multoque magis Dione, qui Eusebium ipsum antecessit, quem tamen Auctorem hi juniores, fere omnes, ad Galli annos *historiarum lumine illustrandos* producti, unum videntur exscripsisse. Quid quæris? Nihil quidquam de Galli annis invenio, mitto apud Marcellinum, qui ejus mortem sic in transitu attingit (k), sed ne apud Dionem quidem, ex instituto de hac scribentem (l). Quid ergo Auctori Epistolæ imposuit? Quantum ex iis quæ alio in loco affert, conjicio, verba imposuerunt Lil. Greg. Gyraldi, in eandem sententiam tradentis, Gallum *tertio & quadragesimo suæ ætatis anno sua sibimet manu, teste Dione, Eusebio, & Ammiano, mortem accersisse*. Verum hos quos ipse quoque laudare voluit Auctores, si attente, ut par erat, diligenterque inspexisset; Gallum sibi quidem manus attulisse, ab his omnibus traditum vidisset, quo autem vitæ anno, hoc vero neque ab Dione, neque ab Ammiano traditum invenisset, gravemque hunc Gyraldi errorem (si tamen ipsius Gyraldi est; neque enim sic legitur in nitidissima, eademque accuratissima ejus Editione) convincere multo facilius potuisset, quam aliquanto leviorum alterum, quem paulo infra convincere magno labore conatus est.

12. Nimirum Gyraldus a *plerisque credi*, scripserat; non ipse affirmate asseveraverat; credi, inquam, Galli id epigramma, quod de *Virgilii morte ad Augustum* legitur,

*Temporibus latis tristamur, maxime Caesar,  
Hoc uno amisso, quem fleo, Virgilium &c.*

Auctor vero Epistolæ, ut Galli non esse, evincat, sibi chronologicis accurate subductis rationibus constituendum existimat, quo Virgilius anno, & quo item Gallus desierint vivere. Sed ut quærere omittam, utrum in postremo hoc anno constituendo sibi satis ipse constiterit, qui infra conjici tantum, non constitui hunc posse, fateatur propterea quod ob variantes Chronologorum opiniones incertus sit; sane multo expeditius fuisset commemorare, Dionem (m), qui Galli mortem proponit *Augusto VIII. Statilio Tauro Consulibus*, eundem triennio post, sive *Augusto XI. Consule cum Calpurnio Pisone*, mortem proponere, & nobile funus Marcelli, Octaviæ filii, quarum rerum Virgilium (n) quoque luculentam videmus mentionem fecisse, & quod consequitur, Gallo superstitem fuisse. Aut si ne hoc quidem satis expeditum videretur; mirum certe est, multo expeditissimam ejus epigrammatis Gallo abjudicandi rationem Auctorem Epistolæ non attendisse, qui semel, iterum, sæpius ex multorum, sed ex Donati præsertim auctoritate, cui Servii (o) quoque auctoritas addi potuisset, inculcaverit, quartum Georgicorum librum, quæ a medio usque ad finem laudes Galli continebat, jubente postea Augusto, fuisse a Virgilio in Ariltæi fabulam commutatum.

Cur enim id jussit Augustus? Nimirum quia Gallo, ut Veteres illi indicant, & Auctor fatetur, Augustus ex amico jam factus erat inimicus, quæ & mox Gallo causa moriendi fuerat. Quid igitur aut jam mortuus de Virgilii obitu, aut inter inimicos habitus, amice ad Augustum scribere potuisset, ac cætera quidem læta, id sibi unum triste accidisse, significare, quod Virgilius migrasset e vita?

13. In ea quoque Elegia quæ nomine inscripta Cornelii Galli ab juniore Aldo edita est, perlegenda, & cum Dione, aliisque Historicis conferenda si paulum modo attentum animum adhibuisset; Galli esse illam posse, nullo modo judicasset. Nam primum omnium, ipsum Elegiæ repugnat initium, quod ne exscribere quidem possum, quin continuo fucum sentiam, & alterius, unde sumptum est, initii, Epistolæ videlicet M. Cœlii (p), veniat in mentem. Sic enim ea inci-

*Morgagni Opusc.*

pit Epistola, *Tanti non fuit Arsacem capere, Seleuciam expugnare*; Elegia autem sic,

*Non fuit Arsacidum tanti expugnare Seleucen,  
Italaque ultori signa referre Jovi:*

At vero annis aliquot post Galli mortem interjectis, hoc est M. Apulejo, P. Silio Consulibus, tum demum a Dione (q) de signis scribitur a Parthis ad Augustum remissis; remissis, inquam, non per bellum unquam, aut *expugnationem* relatis; imo Parthorum Rege *verito, ne bello ab Augusto impeteretur*, Augusto autem hanc rem magnæ sibi laudi ducente, quod *præliis prius amissas res citra ullum certamen recepisset*.

14. Neque magis cætera conveniunt quæ in eadem Elegia memorantur,

*Pingit & Euphratis currentes mollius undas,  
Vitricesque Aquilas sub Duce Ventidio.*

*Qui nunc Crassorum manes, direptaque signa  
Vindicat Augusti Cæsaris auspiciis.*

*Parthe tumens animis, & nostra clade superbe,  
Hic quoque Romano stratus ab hoste jaces.*

Quæro hic, ecquando Ventidius *Augusti auspiciis* Parthos profligaverit? Neque enim tum dici potest, cum aut Labieno, aut Pharnapate, aut Pacoro ipsos cientibus, aut ducentibus, profligavit. Nam tunc Ventidius, homo Antonianarum semper partium, ideoque cum M. Antonio a Cicerone (quem Romæ comprehendere voluisse, docet Appianus (r)) in Philippicis (s) proscissus, & ab Senatu hostis eo tempore judicatus (t), deinde vero ausus Cæsaris, tunc Triumviri, milites Alpium transitu prohibere (u), & a Planco desertos Antonianos post Perusiam captam colligere (x), tum, inquam, in Antonii ejusdem provincia, atque adeo, ut diserte in Liviana Epitome (y), & L. Flori (z) libris, & Appiani (a) positum est, *Antonii legatus*, hujus, non Cæsaris, auspiciis Parthos superavit; quamobrem Antonio, non Cæsari, ob eas Ventidii victorias, decretas esse supplicationes, & triumphum, ab Dione (b) traditum est. Reliquum est igitur, ut quis dicat, mortuo Antonio, Cæsare autem (quod versus iste significat) Augusti appellatione ornato, novam hanc Ventidium, Seleucia expugnata, relatisque Crassi, & Antonii signis de Parthis victoriam reportasse. Verum, ut Dione etiam seposito, Paterculum (c), Plutarchum (d) Justinum (e), Appianum (f), A. Gellium (g), Julium Frontinum (h), L. Florum (i), Sext. Ruffum (k), Orosium (l), Eutropium (m), atque alios, quos sciens prætereo, inspiciamus qui de Ventidio mentionem fecere, ut prima illa prælia commemorari videmus, sic de hoc postremo nihil invenimus; sed ne invenire quidem possumus, cum de signis ab Rege Parthorum, non vi, & præliis, imo potius belli metu compulso, ad Augustum remissis, ab Dione cæteri, quos nos quidem legisse meminimus, Historici non dissentiant. Quod si id inveniri etiam posset; nihil tamen ad Gallum Elegia ista pertineret, quippe qui ab Antonii morte Ægypto præfuit; non sub Ventidio militavit, quod de se indicat, vel potius fingit quicumque Elegiæ auctor est, parum, ni pessime fallor, in Romana Historia versatus, qui istam Gallo Elegiam supposuit.

15. Et tamen hæc quæ de Ventidio in ista attinguntur, non dubitat Epistolæ Auctor iis ipsis convenire temporibus quibus Gallus Lycoridem maxime deperibat: quæ tempora cum ea nimirum sint quæ Virgilius X. Ecloga designavit,

*--- indigno cum Gallus amore periret;*

certe si eam ipse attente Eclogam perlegisset; non id facile censuisset. Non etsi ejus initium, & finis Eclogæ post alias omnes, atque ideo post C. Asinii Pollionis Consulatum, cujus quarta meminit, scriptam significant; tamen quibus de temporibus in ipsa agatur, satis illa erudito homini indicant,

B 2

Galle,

(k) Rer. Gestar. l. 17. (l) Rom. Hist. l. 53. (m) Ibid. (n) Æneid. l. 6.  
(o) Comment. in Bucol. Virgil. Eclog. 10. (p) inter Familiar. Cicer. l. 8. Epist. 14. (q) Rom. Hist. l. 54.  
(r) De Bell. Civ. l. 3. (s) XII. XIII. XIV. (t) Vid. A. Gell. Noct. Attic. l. 15. c. 4.  
(u) Vid. Dion. l. 48. (x) Vid. Appian. de Bell. Civ. l. 5. (y) l. 127. & 128. (z) De Gest. Rom. l. 4. c. 9.  
(a) l. de Bell. Parth. (b) l. 48. & 49. (c) Hist. l. 2. c. 78. (d) in Anton. (e) Epit. l. 42. c. 4. (f) l. cit.  
(g) c. 4. cit. (h) Strategm. l. 1. c. 1. & l. 2. c. 2. & 3. (i) c. cit. (k) De Hist. Rom. (l) Hist. l. 6. c. 16.  
(m) Hist. Rom. l. 7.



*Galle, quid insanis? inquit, tua cura Lycoris  
Perque nives alium, perque horrida castra secuta  
est,*

itemque illa, quæ cum proximis *versus Galli esse de  
ipsius translato carminibus*, in Commentario Servius  
docet,

*Alpinas ab dura nives, & frigora Rheni*

*Me sine sola vides: ab te ne frigora lædant.*

*Ab tibi ne teneras glacies secet aspera plantas.*

Quæ sicuti cum proximis versibus poeticum simul & amatorium Galli ingenium longe melius, fideliusque nobis exhibent, quam quæ sub ejus nomine circumferuntur; ita iis temporibus ostendunt (mitto, num Lycoris, quod Elegia ista obtrudit, desiderio, curaque Galli ægrotaret) num quidquam negotii Parthis cum Ventidio esse posset. Cum enim istum *alium*, de quo Virgilius, testetur Servius, fuisse *Antonium euntem ad Gallias*; nullum poterit isti rei tempus aptius inveniri, quam cum Antonius Quæstor creatus, ad Julium Cæsarem in Galliam ulteriorem ab Urbe reversus est: quo de reditu hæc in Ciceronis Philippica II. *Quæstor es factus: deinde continuo sine S. C. sine sorte, sine lege ad Cæsarem cucurristi: id enim unum in terris egestati, æri alieno, nequitia, perditis vitæ rationibus perfugium esse, ducebas.* Nam quo primum tempore in Galliam Antonius ad Cæsarem iverat, non ex Urbe, sed ex *Ægypto* (quod eadem Philippica docet) profectus erat. Ex quo autem Romam venerat e Gallia ad Quæsturam petendam, hujusque voti compos factus, ad Cæsarem redierat, inde Romam nisi confecto bello Gallico, reversum non esse, ex duobus postremis de Bello hoc libris intelligitur; ex quibus cum in Alefiæ obsidione, tum deinceps in proximis hibernis, annoque insequenti in vastandis Eburonum finibus, in Bellovacis in officio continendis, denique rursus in hibernis usque ad Comii Atrebatensis deditio-nem, quod ultimum Gallici belli opus fuit, fideli, & assidua Antonii opera esse usum Cæsarem, cognoscimus. Porro annus in quem incidit Alefiæ obsidio, is fuit, quod libri VII. initium ostendit, quo propter P. Clodii cædem Cn. Pompejus Magnus Consul III. creatus est: paulo autem ante eam cædem Antonium Romæ Quæsturam petiisse, ex laudatæ Philippicæ duobus locis perspicue apparet, si cum ejus Orationis loco quam Tullius edidit pro Milone, conjungantur. In hac enim legimus, *nuper a M. Antonio eundem quem Milo tunc occiderat, Clodium nuper, inquam, eo compulsus fuisse, ut se, fugiens, in scalarum tenebras abderet.* In illa vero, *cum tu, M. Antoni, Clodium in foro, spectante populo R. gladio stricto infecutus es, negotiumque transgisses, nisi ille se sub scalas tabernæ librariæ conjecisset: deinde, aliquot interjectis paginis, tu a me observatus in petitione quæsturæ: quo quidem tempore P. Clodium, approbante populo R. in foro es conatus occidere.*

16. Noli mirari quod fusius hæc persequar, Vir Cl. Neque enim eo dumtaxat pertinent, ut intelligatur, ubi fuerit, & quid egerit Antonius isto temporis intervallo quod Plutarchus in ejus Vita transilivit, aut (quod ad susceptum sermonem attinet) quo Gallus tempore maxime Lycoridem deperibat, eo tempore nihil Ventidio cum Parthis fuisse, quorum hi tunc ferme Crassos cæciderunt, & Romana signa ademerunt, Ventidius autem, ut Gellius (n) docet, cum Julio Cæsare in Galliis est versatus. Sed eo etiam pertinent, ut magis magisque suspicemur, Gallum, cum se ipse interfecit, aliquanto majorem natu fuisse, quam plerique existimant, & Epistolæ Auctor contendit. Ab eo namque anno quo Pompejus Consul III. fuit, numerandi initio facto, sine autem in eo quo Consul VIII. fuit Augustus, quo nimirum tempore Galli mortem ab Dione proponi, supra memoratum est; anni certe sunt septem & viginti. Hos igitur si de tribus & quadraginta, quam Gallo ætatem tribuunt, detrahimus; relinquetur nempe, ut natus annos circiter sexdecim, non modo jam totus esset in amoribus, horumque causa usque adeo insaniret; sed, quod multo minus credibile est, tantum poeticis stu-

diis jam excelleret, ut *divinus poeta* a Virgilio ipso vocari posset, atque Apollo induci qui cum illo colloqueretur. Quæ, atque alia ejusdemmodi si quis forte malit sic intelligere, ut illi convenient tempore quo Virgilius scripsit, non tempore isti de quo scripsit; haud satis scio, quantum in omnibus id liceat, præsertim cum Gallus isto ipso tempore sic loquens inducatur,

*Ibo, & Chalcidico quæ sunt mihi condita versu*

*Carmina, pastoris Siculi modulabor avena.*

Verum hæc satis sit attigisse, cum Veterum nemo, ut supra ostendimus, proferatur qui Galli ætatem definiverit præter Eusebium; hujus autem exemplaria, quod Auctor Epistolæ confitetur, inter se non consentiant, eaque fortasse causa fuerit, quod alii XLIII. alii LXIII. plerique XLIII. annos tribuant: quibus tamen in numeris describendis quam facile potuerint librarii peccare, frequentissimi eorum in ejusmodi rebus errores demonstrant.

17. Quanquam sive major, sive minor placeat istorum numerorum, cum major eo nos ducat, ut Cn. Pompejo Strabone, L. Porcio Catone Coss. minor vero, ut Q. Hortensio, Q. Cæcilio Metello Coss. natum Gallum inveniamus, Julius autem Cæsar non nisi post Consulatum suum Primum, hoc est undecimo post hos, uno & tricesimo post illos Consules anno, in Galliis, & Illyrico cum imperio fuerit; apparet certe, planius fuisse declarandum ab iis qui Corn. Gallum, non *Foroliviensem*, sed *Forojuliensem* maluerunt, quid sibi vellent, aut qua ratione rem intelligerent; ab iis, inquam, qui cum Auctore Epistolæ confitentur, *utrumque Forum Julii ab Julio Cæsare fuisse fundatum.* Sed hæc tu melius persequi poteris, Vir Cl. atque item quærere, an *Gallus Cornelius*, quem Asinius Pollio, in litteris ad M. Tullium (o), *familiarem suum* dicit, & quem Sebastianus Corradus, ac Bernardinus Rutilius Cornelium Gallum fuisse, putant (p) de quo Asinius idem in litteris superioribus, *quod familiarem meum in tuorum numero habes, opinione tua mihi gratius est: invideo illi tamen, quod ambulat, & jocatur tecum; quærere, inquam, poteris, an Poeta is fuerit, de quo in præsentia sermo est: certe nec tempora prohibent, & doctissimis hominibus ejusmodi Virorum amicitia conveniunt.*

18. Jam enim mihi, his omisissis, illud vicissim ostendendum est, quam alia, atque alia in proposita Elegia ei non convenient Lycoridi quam Gallus adamabat. Nam hæc certe, quod Servius docet suis tum in laudatam Virgilii Eclogam X. tum in VI. Commentariis, in Theatro cantabat, nec secus atque Origo, & Arbuscula; quæ nobiles eodem tempore meretrices erant, & mimæ, ipsa quoque scortum, & mimæ erat, Cytheridis cognomine in Urbe, & per Italiam notissima. Erat eadem præterea, quod ibidem tradidit Servius, Voluminii liberta, illius, opinor, Voluminii, ad quem, & de quo nonnullæ extant Ciceronis Epistolæ, illa in primis quæ huc maxime pertinet, ad Papirium Pætum (q). *Accubueram hora nona. Dices ubi? Apud Voluminium Eutrapelum: & quidem supra me Atticus, infra Verrius, familiares mei. Miraris, tam ex hilaratam esse severitatem nostram? Audi reliqua. Infra Eutrapelum Cytheris accubuit. In eo igitur, inquis, convivio Cicero ille, Quem adspectabant, cujus ob os Graii ora obvertebant sua? Non mehercule suspicatus eram, illam affore: sed tamen ne Aristippus quidem ille Socraticus erubuit, quum esset obiectum, habere eum Laida. Habeo, inquit, non habeor a Laide. Hunc Voluminium ipsum quoque mimum fuisse, inveniemus, si cum Petro Victorio (r) eundem esse, censebimus, quem in Philippis captum in Antonii, & Cæsaris castris, Bruti milites occiderunt. Sic enim de eo Plutarchus (s), *Inter hos viri quidam erant Voluminius mimus, & Sacculio histrio captivi.* Sane intimum fuisse Antonio, cum propter Cytheridem verisimile est, tum vero ex M. Tullio satis constat sive in Philippicis, ut mox apparebit, sive ubi ad Atticum scribit (t), *Quod autem aditus ad Antonium difficilior esse dicitur; scripsit**

ad

(n) supra cit. l. 15, c. 4. (o) in Epist. Famil. Cicer. l. 10. Epist. 32. (p) Adnot. in ejusd. l. Epist. 31.  
(q) l. 9. Epist. 26. (r) In l. 7. Epist. 33. (s) in M. Bruto. (t) l. 15. Epist. 8.



ad Eutrapelum, ut is ei meas litteras redderet. Neque est cur miretur aliquis, M. Tullium apud mimum accubuisse, aut ad mimum ejusmodi epistolas, quales in extremo libro septimo ( u ) videmus, scripsisse. Nam & mimus esse potuit litteris instructus, salibus vero etiam magis debuit, & iis temporibus quibus id factum, scriptumque in parte per se ipsæ Epistolæ ostendunt, Volumni Amicis qui tum sane plurimum poterant, ipsique propterea Volumnio Cicero blandiebatur, aliter post cædem Julii Cæsaris, & in illa rerum Antonii inclinatione sentiens, alioque in numero hominem habens, ut in Philippica XIII. Addite illa naufragia Cæsaris amicorum Barbas, Cassios, Barbatios, Polliones: addite Antonii collusores, & sodales, Eutrapelum, Melam, Cælium, Pontium, Crasscium, Tironem, Mustelam, Petissium, comitatum relinquo: duces nomino. Erat autem præfectus fabrum Antonii P. Volumnius ( si modo hic Eutrapelus est ) quem Cornelius Nepos in Vita Attici iterum, ac tertio memoravit, & quantum familiaritate ac potentia Antonii ( id quod timuerat Cicero ) in proscriptione abusus sit, exemplo ostendit L. Julii Calidii, quem multo elegantissimum poetam, --- neque minus virum bonum, optimisque artibus eruditum, --- propter magnas ejus Africanas possessiones, in proscriptorum numerum P. Volumnius absentem retulit.

19. Cæterum sive Volumni Eutrapeli, mimi videlicet mima, Cytheris liberta fuit, sive conliberta; profecto cum Volumni alicujus liberta fuerit, nomen illi ab nomine patroni Volumniam fuisse, de eaque illud intelligendum censeo, quod in II. Philippica exprobratur Antonio, aperta lætica, Mima portabatur: quam ex oppidis municipales homines honesti, obviam necessario prodeuntes, non noto illo, & mimico nomine ( id est Cytheridem ) sed Volumniam consalutabant: sequebatur rheda cum lenonibus, comites nequissimi: rejecta Mater amicam impuri filii, tanquam nurum, sequebatur. Quin imo sic esse omnino intelligendum, Ciceronis optimus interpret ipse Cicero docet, hæc scribens ad Atticum ( x ), Hic tamen Cytheridem secum lætica aperta portat: altera uxorem. Septem præterea conjunctæ læticae amicarum; hæ sunt amicorum. Vide quam turpi letho percamus! Eodemque pertinent quæ ad eundem in Epistolis proximis ( y ) Tu Antonii leones pertimescas, cave. Nihil est illo homine jucundius: & ( z ) Hoc quidem melius, quam collega noster ( in Augurato videlicet ) Antonius; cujus inter lectores lætica Mima portatur.

20. Nec vero est ( ut quando cœpimus, nonnullos Ciceronis locos de Antonii vita, & Cytheridis conditione magis illustremus ) non est, inquam, cur in eo multum hæreamus, quod in Philippica mater, in Epistolis uxor; in illa lenones, in his leones commemorantur. Neque enim hæc ejusmodi sunt, ut alterum ab altero excludatur: esse una omnia potuere; modo uxorem intelligamus, non Fulviam P. Clodii ( ut Paulus Manutius ( a ) ) cujus nimirum alter vir Curio etiamtum vivebat, & quæ cum Cleopatram absentem non tulerit, multo minus Cytheridem præsentem pellicem tulisset; sed faciliorem aliam aliquam de prioribus Antonii uxoribus, sive Fadiam ( b ) ex qua liberos suscepit, Q. Fadii libertini hominis filiam, sive Antoniam illam de qua in II. Philippica, filiam ejus ( id est patruum tui ) sororem tuam ejecisti, alia conditione quaesita, & ante perspecta: quem ad locum haud satis video cur hæc adnotaverit Lambinus, sororem tuam ) immo uxorem tuam legendum, ,, Octaviam scilicet, quam exegit Antonius, Fulvia ,, domum intromissa ,, nam si filia patruum; soror igitur patruelis: itaque mox iterum de eadem Cicero, sorori & uxori tuæ: item si filia patruum; filia igitur alterius Antonii; Antonia igitur certe: num vero etiam Octavia appellata? quam vereor, ne quis Lambinum, pereruditum alioquin hominem, suspicetur, uxores Antonii, & tempora confudisse! Nam certe

Antonius Octaviam exegit; sed C. Octavii, non C. Antonii patruum, filiam, neque ut Fulviam domum intromitteret, qua videlicet jam mortua, aut, quod nonnulli tradunt, dimissa, Octaviam duxerat ( c ).

Fuit tamen aliquando cum ita cogitarem, posse aliquem fortassis prima illa ex Epistolis verba ad hunc modum legere, Cytheridem secum lætica aperta portat alteram uxorem; ut perinde sit, ac si uxor esset, aut loco uxoris, quomodo alibi idem scripsit non tantum ( d ) me --- sicut alterum parentem --- observat, verum etiam ( e ) qui alterum se Verrem --- putaret, &, dixisset, --- non se decumanum esse Apronium, sed Verrem alterum. Eam autem lectionem videbantur commendare quæ II. Philippica non objicit solum, ut eo quem produximus, loco, Mater amicam impuri filii, tanquam nurum, sequebatur; verum etiam exaggerat, ut his, aliquid enim salis ab uxore Mima trahere potuisti: & frugi factus est. Mima illam suas res sibi habere, jussit: ex duodecim tabulis causam addidit: exegit. Quam porro spectatus civis, quam probatus, cujus ex omni vita nihil est honestius, quam quod cum Mima fecit divortium. Huc illud addebam, qui id in Philippica de Matre exprobrasset, eum multo minus de Uxore suam ipsa pellicem sequi coacta, ibi fuisse taciturnum.

21. Quod vero ad leones attinet; non me fugit, ex eo Epistolarum loco suspicatum esse Petrum Victorium ( f ) id quod postea adversus Hieronymum Ferrarium defendit ( g ), etiam in Philippica II. legendum esse rhedam cum leonibus. Illud miror, cum ei defensionem duo Veterum Scriptorum testimonia obstare viderentur, alterum Plinii majoris, Plutarchi alterum; hujus Virum Doctissimum non meminisse, illi vero in hunc modum satisfecisse ut diceret, id negligentiae illius scriptoris assignandum, qui in temporibus lapsus sit, ut in multis aliis rebus sæpe peccat: & certe majorem fidem Ciceroni habendam esse rerum, quæ ipsius ætate factæ sunt, quam Plinio, qui multis postea sæculis vixit; quasi vero non constaret ex Suetonio ( h ), & Xiphilino ( hh ), eam Vesuvi montis conflagrationem, qua Plinius, ut Sororis Filius ( i ) docet, sex & quinquaginta annos natus occubuit, sub Tito contigisse, Ciceronem vero eodem quo Panfa, atque Hirtius Consules, anno interfectum fuisse, ex Dione ( k ), aliisque non liqueret: ex quibus intelligi posset, inter Ciceronis finem, & Plinii vivendi initium ne septuaginta quidem annos intercessisse. Sed multa, multa, inquam, sæcula num sic forte ibi accepisse Victorium putabimus, ut in II. de Officiis ( l ) ( neque id, si recte legamus, necessario ) accipiebat ( \* ) Muretus? Cæterum hæc Plinii ( m ) erant verba, posterius, quam is Philippicæ locus ferat, tempus designantia. Jugo subdidit leones, primusque Romæ ad currum junxit M. Antonius, & quidem civili bello, cum dimicatum esset in Pharsalicis campis, non sine quodam ostento temporum, generosos spiritus jugum subire illo prodigio significante; nam quod ita vestus est cum mima Cytheride, supra monstra etiam illarum calamitatum fuit. Plutarchus quoque ( n ) non nisi post Pharsalicam pugnam hæc narrat de Antonio: cujus Auctoris verba primo loco proferam, ut latine ab Leonardo Aretino reddita sunt, qui ut vitiosissimis uteretur Plutarchi codicibus; tamen vel ex Cicerone intelligere poterat, quam falleretur sic vertens. Erat inter maxime familiares Antonii Sergius mimus, & Cytheris quidam ex eadem palæstra mulierculam amans. Hoc comitatu Antonius peragrabat Italiam lætica delatus, quam haud pauciores quam matris ejus comitati sequebantur. --- Ducebantur & leones ad rhedam ligati. Quanto melius qui postea ( o ) sic reddidere. Erat Sergius mimus unus ex iis qui plurimum apud Antonium poterant, & Cytheris ex eadem palæstra, quam mulierculam adamabat. Hanc, urbes peragrans, circumducebat lætica. Læticam ejus non minor comitatus, quam matris ipsius, sequebatur, --- Leonibus

( u ) Epist. Famil. cit. 33. & prox. præced. ( \* ) l. 10. Epist. 12. ( y ) Epist. 15. ( z ) Epist. 18.

( a ) Comment. in hunc locum. ( b ) Philippic. II. III. XIII.

( c ) Vid. Plutarch. in Anton; Dion. l. 48. & 50; & Livian. Epit. l. 127. ( d ) l. 5. Epist. Famil. Epist. 8.

( e ) In Verr. l. 5. & 3. ( f ) Explic. suar. in Cicero, Castig. in l. 10. Epist. ad Attic. ( g ) Variar. Lect. l. 16. c. 3.

( h ) ( hh ) In Tito. ( i ) l. 3. Epist. 5. & l. 6. Epist. 16. ( k ) l. 47. ( l ) c. 17. ( \* ) Var. Lect. l. 10. c. 8.

( m ) Nat. Hist. l. 3. c. 16. ( n ) In Antonio, ( o ) Ex Edit. Xylandri, & Crusier.



nibus juncti currus. Jam vero si quis malit Victorio quadantenus adstipulari; per me licet, sic tamen ut Plinium non plus dicere concedamus, quam dicat. Scilicet hoc ait quidem, post Pharsalicum prælium id primum Antonium fecisse Romæ; at extra Urbem tamen idem fecisse, aut certe attentasse anno ante, neque ipse, neque vero Plutarchus negat. Cicero vicissim, ut id factum indicat anno ante; sic post Pharsalicam pugnam non modo iterum factum non negat; sed dat nobis tanquam ansam ad idem conjiciendum, cum in Philippica II. postquam illam superioris anni itinerum Antonii cum Cytheride peragrationem descripsit, quam paucissimis interjectis versibus, in quibus pugnam illam designat, hæc subjicit. *Victor e Thessalia Brundisium cum legionibus revertisti. --- Venisti Brundisium, in sinum quidem, & in complexum tuæ Mimulæ.* --- Italiæ rursus percurratio, eadem comite Mima; ut cætera quæ paulo antea, atque adeo modo dixerat, etsi ipse fastidii vitandi causa fortasse reticeat, nobis tamen proclive sit suspicari.

22. Cæterum illas Antonii cum Cytheride percurrationes primas cum inter ea posuerit Tullius, quæ notiora omnibus essent, qui in Italia tum fuere, quam sibi, qui non fuit; fuerit tamen & ipse, ut Epistolæ ad Atticum ostendunt, cum mense Majo ejus anni qui annus prælium Pharsalicum antecessit, per Campaniam fierent; hinc licet intelligi, reliquis mensibus per cæteras Italiæ regiones productas esse; ut revera Antonius horum flagitiorum vestigiis omnia municipia, præfecturas, colonias, totam denique Italiam impresserit. Alteræ autem percurrationes, aut certe famosæ Antonii cum ista meretricula volutationes non ante desiere, quam (p) ab Julio Cæsare, a bello Africano in Urbem reverso, castigatus, tandem aliquando turpi ista vita relicta, uxorem accepit Fulviam, cui, diserte narrat Plutarchus, per ludum servili ipsum veste litteras illas amatorias reddidisse, quæ in II. Philippica exagitantur, quarum erat litterarum caput, sibi cum illa Mima posthac nihil futurum: omnem se amorem abjecisse illinc, atque in hanc transfudisse: quanquam fidem non religiosissime præstitisse, significare videtur Cicero, qui post Cæsaris cædem cum ad Atticum fictis, ut sæpius solet, nominibus scribit (q) *Hic autem noster Cytherius, nisi victorem, neminem victurum*; a Petro quidem Victorio cum aliqua, a Paulo autem Manutio sine ulla dubitatione dicitur (r) sic a Cytheride mima Antonium appellare.

23. Quorsum a nobis hæc omnia satis superque de Cytheride congesta sunt? Nimirum ut tanto clarius appareat, num isti ultimæ sortis, & inquinatissimæ fœminæ ullo modo convenient quæ in supposita Gallo Elegia quasi de ingenua puella, & Augusto jam rerum potito, adhuc intacta, pudicaque scribuntur,

*Æqua tamen matris causa est; cupit illa paternam Impleat ut pulchra filia proba domum.*

& infra,

*Quid loquor ab demens? roseæ nec flore juventæ,  
Nec capitur missis lux mea muneribus.*

Et tamen Lycoridem cum meretricem, tum certe Volumnii fuisse libertam, Epistolæ Auctor non ignorabat. Sed ut parum attente Elegiam istam legerit, illud quoque indicio est, quod in ipsa de Lycoride esse dictum, non dubitat, quod de lena, ut proxime superiora cætera, tam aperte dictum est, quam quod apertissime,

*Multa quoque affingit, mentitur & omnia,  
Sed nimis multa de versibus.*

24. Nunc quæ de Galli tum genere, tum Præfectura, tum criminibus scribit, ex parte saltem aliqua cum vetustis Historicis, præsertim vero cum Dione conferamus. Igitur etsi apud Petrum Crinitum legerat, fortuna Gallum tenui fuisse, penesque infima; nihilo tamen minus nobilissimum censet, nonnullis ductus argumentis, quæ hic expendere longius foret. Mihi vero Suetonii verba, ex quo Crinitum sumpsisse id video, cum Dione conferenti, non levis hæret dubitatio, Siquidem cum ille hæc scripserit (s).

Augustus Salvidienum Rufum ad consulatum usque, & Cornelium Gallum ad præfecturam Ægypti, ex infima utrumque fortuna provexerat; Dio, in Salvidieno quid infima fortuna fuerit, his verbis ostendit (t). *Salvidieno, obscurissimo genere nato, pascenti gregem, flamma e capite emicuit.*

25. Verum de Galli genere cum certiora non suppetant; de Præfectura videamus. Quærit Epistolæ Auctor, cur Augustus Corn. Gallum neque Consularem, neque Prætorium Virum; neque adeo Senatorem Ægypto præfecerit. Cujus exempli ut novitatem animadversam, ita causam indicatam ab summo Norisii Cardinalis ingenio fuisse, arbitratus, Viri hujus longe. Eruditissimi verba profert, eique adstipulans plaudit. Verum si de Gallo scripturus, eum Historicum ex quo plura, eaque certiora de Gallo habemus, sibi paulo attentius inspiciendum existimasset; alibi, & jure quidem meritoque, peracre Norisii ingenium laudasset, hic autem satis sibi esse, credidisset, Dionem, cujus Norisius ipsa fere verba, non modo sententiam sequitur, hæc scribentem (u) producere. *Ægypto autem tributaria facta Cornelium Gallum Augustus præfecit. Multitudo sane hominum, urbium, ac agrorum, ac mores ejus gentis leves, tum copia annonæ, & pecuniæ efficiebant, ut non modo committere provinciam Senatori nulli auderet, sed & proficisci in Ægyptum potestatem, nisi ipse nominatim alicui permisisset, omnibus adimebat: adeo enim suspectos Ægyptios studii novarum rerum habebat, &c.*

26. Attamen hic recte credidit Norisio. Quid? ubi male de Galli criminibus Gyrardo credidit, illa affirmanti: scribit & Dion historicus lib. LIII. *Proculejum, cum aliquando Cornelio Gallo occurreret, nasum & os manu compressisse, id scilicet significantem, non alicui tutum esse, illo præsentem nec loqui, nec respirare; tantæ namque fuit Gallus insolentia. Alius quoque, licet ignotus, ad eum cum testibus quibusdam accessit, &c.* Profecto neque hæc Epistolæ Auctor inter Galli crimina retulisset, neque ad ejus ambitionem pertinere, existimasset, neque hinc argumenta trahi posse, censuisset, e quibus intelligeretur, Gallum ex ulteriore Gallia fuisse; si laudatum a Gyrardo Historicum potius, quam Gyrardum, hunc perperam describentem, sibi legendum, atque attendendum putasset. Nam apud Dionem tantum abest, ut illa de Gallo scripta sint; de proditore, & accusatore Galli Valerio Largo ob istam ipsam Galli socii, & convictoris sui delationem scribuntur (x). Ea enim Largi adversus Gallum perfidia exposita, hæc ab Dione subjiciuntur. *Certe Proculejus ita de Largo sensit, ut obviam eo forte facto, nares suas, osque manu compresserit, iis qui secum erant, significans, ne respirare quidem, Largo præsentem, quenquam tuto posse. Alius quidam Largum accedens, adhibitis arbitris, Largo ipse ignotus, percontatus est, notusne ei esset, & abnegante id Largo, rem in tabulis adsignavit: quasi vero homo improbus non possit etiam ignotum calumniis impetere.*

27. Erant alia quæ istam cursim legens Epistolam, animadverteram, unde constaret, minus diligenter, minusque attente scriptam esse, ut ubi Joannem Gbellinum Auctor redarguit, quasi Blondi mortem quinquennio maturius posuisset, quando eo reapse anno quo mortuus est, 1463. posuisset, adversus Vossium admonuerant Viri Eruditissimi a quibus Litterarum Italiæ Ephemerides (y) conscribuntur: vel ubi ex eo quod Henricus Palladius Corn. Gallum sine ulla dubitatione Aquilejensem fecerit, ex eo, inquam, continuo infert, recte eos scripsisse qui Gallum Foro-Juliensem; perperam qui Vicetinum, Foroliviensem, aut Tusculum vocarint, præsertim cum ipse mox neget, hanc se probare Palladii opinionem posse nullius veteris Scriptoris auctoritate subnixam: aut ubi ex Q. Æmiliani Cimbriaci facto qui Forijulii Civitatem quam vulgo appellant, ipse Julium appellabat, indicium evidens esse, pronunciat, Forum-Julii nihil esse aliud quam istam ipsam Civitatem; cum tamen continuo hoc addat, se vero Julium, & Forum-Julium diversas esse urbes

(p) Vid. Philippic. II. & Plutarch. Vit. cit. (q) l. 15. Epist. 22. (s) Explic. & Comment. cit. in hunc locum.  
(r) in Augusto c. 66. (t) l. 48. (u) l. 51. (x) l. 53. (y) Tom. 12. pag. 277.



*urbes censere*: ex quo intelligitur, dicendum fuisse, illud Æmiliano sic esse visum; non sic esse. Erant hæc, atque ejusdemmodi alia, quæ a me præterita sunt libenter, cum temporis angustia plura persequi prohiberent, & ea quæ attigi, satis essent mihi in primis, non insectandi causa hæc proferenti, sed dumtaxat demonstrandi, non ea animi attentione istam ab Erudito Viro conscriptam Epistolam fuisse, ut mirari plurimum oporteat, quod in Blondi nostri estimationem, & fidem nonnulla exciderint, quæ, si se ipse collegisset, si in quem scriberet, quid scriberet, quibus argumentis scriberet, secum reputare voluisset; nunquam facile, ista præsertim ratione fuisset scripturus. Testatur hoc probus Viri animus, & honeste ac liberaliter institutus, eaque in primis mo-

destia, atque docilitas testantur, quibus finem ita facit Epistolæ suæ, ut siquid humani in ea scribenda passus sit, non id se pertinaciter defensurum, imo libenter verum, siquis forte ostendat, agniturum profiteatur. Ego vero, ut ipsi de eruditione, ceterisque ornamentis omnibus concedam; in eo certe me ab ipso vinci nunquam patiar, quod ad honestissimum veri studium, & facilem demonstrati erroris confessionem attinebit. Quamobrem tibi, Vir Cl. tuique similibus Viris de his quæ, ut potui, properanter dictavi, cum judicium libenter permitto, tum polliceor, quod a vobis judicatum fuerit, eo me libentissime staturum. Vale.

D. Patavii VII. Kal. Jun. MDCCXXVIII.

## EPISTOLA ÆMILIANA II.

Joannes Baptista Morgagnus Simoni Mariæ Poggio e Soc. Jes.  
Viro Clarissimo Eruditissimoque S. P. D.

**S**uperiore autumno cum forte essem Forolivi, meque inde secum JULIUS ALBERONIUS Cardinalis Amplissimus, Flaminia Legatus, Ravennam duxisset, novumque illorum Fluminum alveum, Cataractam, Pontem, & navigabilem Fossam mihi ipse (quæ summa ejus est benignitas) commonstrasset; primum quidem tanta subiit admiratio, quantam utique hinc tot Operum magnitudo, hinc temporis quo præsertim Pons ejuscemodi perfectus fuerat, brevitatis incredibilis postulabat. Ut vero admirationem illam non sustulit quidem, sed minuit ejus qui curaverat, Legati eximia solertia, providentia, mentisque præstantia in multo maximis rebus spectata; alio paulatim, ut sit, atque alio animum cœpi & cogitationem convertere, interque hæc ad fluviorum quibus erat Pons impositus, antiqua nomina, quæ statutis nuper ad caput utrumque Pontis marmoribus inscripta legebam, *Bedesis*, & *Vitis*. Eorum enim veniebat in mentem, quæ multa, & varia, atque adeo inter se pugnantia de illorum vocabulis persæpe in Scriptorum monumentis jam olim, cum aliud agerem, animadvertisse mihi videbar; pigebatque eotempore, ac propemodum subpudebat, longe aliis, quibus distentus semper fueram, occupationibus factum esse, ut, siquis forte ex me quæreretur, necdum respondere pro certo possem, quemadmodum Latini eos appellare amnes consueverint, quos ego primos omnium aspexissem, ut qui meam quoque Patriam, ut probe nosti, quamvis laxius in parte, quam Ravennam, intercipiunt. Quæ me cura magis sollicitum habuit, cum mox Patavium redeunti negotium ab Legato Amplissimo datum est, ut quoniam CLEMENTI XII. P. M. tot, tantorumque, de quibus supra dictum est, Operum Auctori Munificentissimo Statua quamprimum Ravennæ in foro ponenda erat, de verbis ei Statuæ subscribendis cogitarem, ageremque etiam, si mihi videretur; cum Joanne Poleno Marchione, & Jacobo Facciolato Viris Clarissimis, mihiq; & publice docendi officio, & amicitia conjunctissimis. Hæc fuerunt causæ, cur meorum Anatomicorum libris paulisper sepositis, Geographos, & Historicos in manus sumperim, hisque diligenter inspectis, plura quidem, commodius olim, & cum plus otii fuerit examinanda (\*), in medio reliquerim; nonnulla autem de prisca memoratorum fluminum appellationibus, quantum quidem licuit per angustias temporis, quantumque esset rei præsentis satis, constituerim. Quæ quando abs te, Vir Eruditissime, atque Humanissime, requiri, certior fio, protinus, qualia ea cunque sunt, simul inserviendi, simul tui exquirendi judicii causa, libentissime exponam.

2. Apud Græcos Scriptores frustra nomina quævisi nostrorum annium. Ex Latinis autem qui utrumque nominaverit, præter Plinium reperio neminem. Ejus hæc verba sunt (a). *Ab eo (Rubicone) Sapis, & Vitis, & Anemo; Ravenna Sabinorum oppidum cum amne Bedese*. Quibus ex verbis illud contra quorundam opinionem, plane efficitur, de quo a te scio primo loco esse quæsitum, alium Vitim esse, alium Bedesim.

3. Uter autem, quod secundo loco quærebas, is sit quem nunc *Ronchum*, uter quem *Montonum* vocitamus, id vero longe difficilius mihi quidem videtur posse constitui. Neque enim locus est ullus, quod sciam, Latinorum Scriptorum, unde alterutrum perspicue appareat: quo fit, ut minus sit nobis mirandum, posterorum alios in alias, atque inter se adversas, ivisse sententias. Siquid tamen video; in hac tanta difficultate is omnium optimus conjector fuerit, qui invenire possit, *Ronchus*, an *Montonus* Plinii ætate propius Ravennam afflueret. Qui enim tunc propius affluebat, eum *Bedesim* a Plinio vocatum esse, intelligitur.

4. Non me fugit, Blondo civi meo longe aliam de *Bedesi* sententiam fuisse. *Cingunt*, inquit (b), *Ravennam amnes duo Bedisum facientes: quorum qui ad dexteram, Montonus; qui ad sinistram, olim Vitis, nunc Aqueductus dicitur: & alio in loco (c), amnem, quem juncti sub urbis mœnibus ii torrentes efficiunt, Bedesum veteres appellant Scriptores*. Quibus ex verbis duo consequuntur, quorum ut alterum probari, sic alterum facile improbari non potest. Nam si primi omnium Polentani; quod postremo a te quærebatur, aut Veneti iis fluviis Ravennam cinxissent; Blondus certe, qui intra centesimum annum ex quo primi imperare cœperant Ravennatibus, in vicina urbe natus erat, Venetis autem imperantibus, scribebat, rem adeo ignorare non potuisset, ut vel Plinii tempore ad eundem modum se habuisse, existimaret. Verum ut in illo errare non facile poterat, ita in hoc erravisse, complura indicant, quæ hic a nobis haud unam ob causam attendi juvat.

5. Primum quidem cum Strabonis ætate (id quod minime ignoras) (d) *intra paludes ita Ravenna posita esset, ut aquis diffusa, pontibus, ac lembis peragraretur*; veri non est simile, intra septuaginta circiter annos rerum faciem usque adeo fuisse mutatam, ut non modo fluviorum alveis duobus, ut nunc, cingeretur, sed & tertius infra urbem extaret alveus in quem uterque confluerent, & sic ad mare, ut adhuc conspiciamus, pervenirent, quando, Strabone quidem scribente (e), *cum a mari fierent inundationes, non medio-*

(\*) Videantur nunc Epistolæ sequentes. (a) Natur. Hist. l. 3. c. 15. (b) Ital. Illustr. Reg. 6.  
(c) Histor. Dec. 3. l. 8. (d) De Situ Orbis l. 5. (e) Ibid.



mediocrem urbs ipsa acciperet maris partem, adeo ut universa cœnoscitas, hinc fluctu marino, hinc fluminibus alluentibus, tetrum medicaretur odorem. Certe is qui paulo post Plinium, Ravennæ fuit, Martialis non ita locorum mutatam faciem significat, cum & æquoream Ravennam vocat (f), & dulcis illic aquæ penuriam non uno joco satis indicat (g). Sed neque is qui anno prope quadringentesimo a Plinii morte, Ravenna transiens, Sidonius reticuit (h) se se hinc salsum portis pelagus impingens, hinc cloacalem pultem fossarum; ut in medio undarum sitiret: quia nusquam vel aquaductuum liquor integer, vel cisterna defecabilis, vel fons irriguus, vel puteus inlimis. Porro insequenti etiam sæculo & Cassiodorus, & Procopius, quorum hic se Ravennæ cum Belisario fuisse, testatur (i), ille autem ibi & natus est, & diu vixit, haud multo aliter urbis ejus situm proposuerunt. Cassiodorus enim, quantum ex Jornande intelligimus, qui ejus *Chronica de Gothis* in compendium redegit (k), urbem illam inter paludes & pelagus descripsit (l) in modum insulæ, influentium aquarum redundatione conclusam. Procopius autem ab illa, inquit (m), pedestrem exercitum excludunt aquæ, quibus Padus amnis, quem & Eridanum vocant, e montibus Gallicis eo decurrens, aliique fluvii navigabiles, & lacus urbem illam undique ambiunt; tum illas quotidianas marini æstus reciprocationes describit, quas antea Claudianus (n) indicaverat, utque accessum maris expectarent qui res vitæ usibus accommodatas e mari in urbem commercii gratia, aliamve ob causam inferre volebant.

6. Quæ si omnia diligenter attenderimus; fluvios quidem in æstuaris, sive, ut Silius (o) loquitur, in stagna paludosa Ravennæ se se effudisse, intelligemus; certos autem, ut nunc, alveos habuisse, quibus ejus cingerent mœnia, & tertium præterea infra urbem, in quem, ut adhuc videmus, confluentes, ad mare tenderent, qui Bedesis vocaretur, non facile existimabimus (\*\*), præsertim cum Padus accederet, isque, si quis alius, proxime Ravennam ambiret. Audi enim Sidonium (p). Ravennæ oppidum duplex pars interluit Padi, cætera pars alluit: Qui ab alveo principali molium publicarum discerptus objectu, & per easdem, derivatis tramitibus exhaustus, sic dividua fluente partitur, ut præbeant, mœnibus circumfusa, præsidium, infusa commercium. Padum autem, hoc est Padi aquarum certam partem etiam eo quo Plinius scribebat, tempore Ravennam pervenisse, hæc ejusdem verba docent (q). Padus Augusta fossa Ravennam trahitur, ubi Padusa vocatur, quondam Messanicus appellatus (\*\*\*). Quibus in verbis et si quædam sunt ab aliis aliter & descripta, & intellecta, aliis in hac Fossa, & circumjectis stagnis, aliis in eo unde hæc deducebatur, Spinetico Padi alveo Padusam agnoscantibus, de qua Virgilius (r), & Servius (s), & apud hunc Valgius, tum etiam Vibius Sequester (t), Claudianus (u), aliique meminerunt; tamen quod nobis hic satis est, ab nemine video in controversiam vocari, præsertim cum Padum Ravennam pervenisse, & alii postea, quos supra laudavimus, suis ipsi oculis conspexerint, & Jornandes ex Cassiodoro idem vel fusius doceat (x), cujus verba operæ pretium fuerit perpendisse. Nam primum a septemtrionali plaga, inquit, ramus illi (Ravennæ urbi) ex Pado est, qui fossa vocatur Asconis. Unde corrigendus, aut certe explicandus fuerat, ab Rubeo (y) etiam dico, duplex Ravennatis Agnelli locus (z), videlicet extra portam S. Victoris non longe a fluvio, qui vocatur Fossa-Sconti: & extra civitatem in loco, qui dicitur Fossa-Sconii, juxta fluvium. Deinde Jornandes continuo hæc subjicit. A meridie idem ipse Padus, quem solum fluviorum regem dicunt, cognomento Eridanus, ab Augusto Imperatore altissima, sive, ut alii habent codices, latissima fossa demissus, qui septima sui alvei

parte mediam influit civitatem. Ad ostia sua amœnissimum portum præbens, classem CCXL, sive, ut in aliis libris, CCL. navium, Dione referente, tutissima dudum credebatur recipere statione. Non ego quidem, ut Cluverius (a), Jornandem, vel potius Cassiodorum, Virum doctissimum, quasi barbarum, & omnis abstrusioris antiquitatis ignarum, hic reprehenderim. Neque enim, ut Cluverius, intelligo inducentem Padum in urbem a meridie; sed postquam eam interluebat, jam a meridie spectandum proponentem in ea videlicet Fossa, quam Cluverius ipse (b), fretus per vulgato ab ea ferme plaga Fluminis veteris cognomento, ab Augusto conjicit in Classensem usque Portum fuisse productam. Itaque (nisi quid præterea a libris forte peccatum est) paulo aliter Jornandis verba interpungerem; unde is facilius, quem proposui, intellectus existeret. Inducto autem a septemtrionibus in urbem Pado, in oppositam autem plagam usque ad Classem perducto eâ aquarum copiâ quæ tanto Portui esset utilis, non video sane, quæ per Padum traduci exiguæ præsertim, ut sæpe sunt, aquæ, alveique nostrorum fluminum possent, ut Ravennam primum, quod nunc faciunt, a septemtrionibus, & a meridie ambirent, deinde in communem alveum coirent, qui Bedesis appellaretur; nedum qui portum constitueret, ut Rubeus (c) loquitur, quem Plinius Besedum appellavit: Quanquam nec Besedum in optimis quidem exemplaribus, sed Bedesim, & hunc non portum, sed amnem Plinius memoravit: & qui ante Augustum ad Ravennam, neque exiguus, fuerat portus, is aut commune universi illius itagni, non peculiare certi amnis, ostium fuit, aut si certi amnis, cur fuisse eorum fluminum potius, quæ sæpenumero, ut torrentes solent, nullam propemodum aquam convehunt, quam illius Fossæ censebatur, quæ multo, ut credunt, Augusto antiquior, apud Plinium tamen Augustæ Fossæ nomen tulit? Hæc enim, sive, ut plerisque placet, pro ostio primo Padi a Plinio proposita fuit, sive non fuit; certe aquam jugiter, quippe ex Pado acceptam, vehebat. Cæterum in tanta rerum vetustate, ac tot mutationibus illius oræ, per mihi mirum videtur, non dubitasse Cluverium tradere (d), vel IIC. annis ante Christum natum, imo etiam prius, ostium eam Fossam habuisse idem, quod Montonem & Ronchum amneis apud Ravennam in mare effundebat: qui nunc, inquit, Ravennatium dicitur portus, vulgo porto di Ravenna: quando ex Rubeo (e) scire poterat, anno 1563. id est annis ante vix LX. cum portus Ravennas ad Orientem hibernum positus, oblimatus arena, naves non exciperet, alio facto Viti, Montonique fluminibus alveo, ad Orientem æstivum traductum esse: tantum abest, ut quod ante duo & viginti sæcula fuisset, pro certo posset constituere! Mihi vero ea omnia quæ diximus, perpendenti, ne Plinii quidem ætate hæc videntur flumina suum sibi communem alveum infra urbem, ostiumve habere potuisse.

7. Quem ergo, inquis, fluvium designare voluit Plinius, cum scripsit Ravenna cum amne Bedese? Illud videlicet, ut supra dixi, qui de fluvii duobus nostris in paludes propius Ravennam tunc influebat. Uter autem eo tempore propius influeret Montonus, an Ronchus, quædam possunt conjecturæ indicare. Mitto illam quæ ex Rubeo capi fortasse potest, scribente (f), primum Ravennæ baptismatis fontem in ea urbis parte constitutum ferri, quæ ad Arietem dicebatur, a fluvio, cui proxime accedit, nomen sortita: quem nunc fluvium vulgari vocabulo Montonem appellamus. Mitto alias, quæ ab Ronchi longe majori, quam Montoni, Ronchi, inquam, & Classensis Portus, in quem aquam inferre oportebat, vicinitate trahi conjecturæ possunt, ut illuc potius quam Ravennam deflexisse Ronchum, putemus: & sane Desiderius Spretus (g) qui in ea Civitate ante extremum sæculum

(f) l. 13. Epigr. 21. (g) l. 3. Epigr. 55. 56. (h) l. 1. Epist. 5. (i) De Bello Goth. l. 2. c. 29.  
(k) Præf. ad Hist. de Reb. Goth. (l) c. 29. (m) l. 1. c. 1. (n) Panegy. de VI. Consul. Honor.  
(o) De Bello Punic. Sec. l. 8. (\*\*) Videri nunc potest etiam Epist. IV. n. 14. (p) Epist. cit. 5.  
(q) l. 3. c. 16. (\*\*\*) De hac Fossa videri nunc potest Epist. III. (r) Æneid. l. 11. (s) in eum locum.  
(t) De Flumin. (u) Panegy. cit. (x) c. 29. cit. (y) Hist. Ravenn. l. 3.  
(z) Libr. Pontific. P. 2. in Vita S. Maximiani c. 1. & 5. (a) Ital. Antiq. l. 1. c. 35. (b) Ibid. c. 28.  
(c) Hist. cit. l. 1. (d) c. 35. cit. (e) Hist. cit. l. 10. (f) Ibid. l. 1. (g) De Urbis Raven. amplitud. l. 1.



lum XV. florebat, cum de Classensi Portu vel suo tempore jam prorsus inutili, atque adeo nullo verba faceret, huiusque rei causam, de qua in parte amplius videndum est (\*), Blondum (b) secutus, fuisse, non dubitaret, *Sapis fluvii*, & aliorum qui portum illum facere consueverant, aversionem; nam aliud, inquit, in mare ostium, quod Gervasium dicitur multis ante sæculis sibi Sapis fluvius effecit: alii vero ad Urbem declinantes, Adriaticum mare aliud per ostium influunt; his quidem verbis et si Ronchum pariter, Montonumque indicare voluit; qui tamen cursum utriusque per superiora loca perspectum habeat, is intelliget, olim Montonum Ravennæ propiorem, quam Ronchum, fuisse. Sed his, aliisque præteritis, ea potius conjectura in præsentia utemur, quam *A. quaduflus* nomen suppeditat, quo Ronchum accolæ, non Montonum, vocitarunt. Nam etsi Leander Albertus, qui, ut plures alii, mirum in modum quæ hos ad fluvios attinent, confundit, utrumque Aquæductum appellari, scribit (i); tamen & Blondus (k), & Rubeus (l), qui, non de alienis, ut illi, sed de propriis loquebantur fluminibus, ut Forolivienses quoque Historici (m), ostenderunt, id nomen Roncho fuisse peculiare. Itaque vel Albertus ipse, non de Montono, sed de Roncho diserte hæc tradidit, quæ latine hic reddam. *Apud ipsum Ronchum (quem Ravennates Aquæductum appellant propterea quia hic ejusdem fluminis alveus artificum manu factus fuit ad multa passuum millia, sicut etiam perspicue apparet) tribus a Ravenna mill. pass. aspera illa & cruenta contigit pugna sacratissimo die Paschatis Resurrectionis Christi anno 1522. (sic) inter Gallos & Hispanos &c.* Certum est, apud Ronchum anno 1512. (non apud Montonum anno 1513. ut scribunt (n) Ferrarius, & Baudrandus, qui in anno tamen non errat) pugnam illam esse pugnatam. Haud equidem inficias iverim, Montonum olim per *Gattinellam vil. lam secundo ferme ab urbe Ravenna lapide, in paludes influxisse*, quando Rubeus (o) ejus rei cum vetusta ipsa monumenta sane multa fidem facere, testatus est, quæ ipse anno a partu Virginis MCCLIII. scripta, in *Divi Vitalis Tabulario* legit, tum fluminis septa, & molas frumentarias, juxta *Divi Michaelis viam*, secundo ab urbe milliario, dum ad coquendos lateres fornax ab illis Monachis effoderetur, repertas. Non ideo tamen necesse est, ut fluvius, cujus violentiam ex Foroliviensibus Historiis (p) scimus, alias etiam, & nominatim anno 1461. ruptis aggeribus, novum sibi alveum fecisse, agrosque vel prope Ravennam inundasse; non, inquam, necesse est, ut quo monumenta illa indicant, eodem antea quoque influxerit, totus præsertim; neque enim facile Blondus, ut supra a nobis positum est, novum tantæ deductionis opus ignorare potuisset: aut si eodem totus influxit; non ei tamen alveus ad multa passuum millia, ut Roncho, parari debuit, nec certe ipse, ut hic, Aquæductus vocatus est. Hæc de utriusque fluminis ad Ravennam antiquiore cursu, quæ etiam abs te quærebantur, mihi ad hoc tempus comperta, faciunt, ut Bedesim Plinio Montonum potius, quam Ronchum, dictum fuisse, conjiciam. Quod si ille Bedesis; hic igitur Vitis Plinio fuerit.

8. Illud hoc loco me interrogari posse, scio, cur Plinius igitur, cum (\*\*) *Sapim*, & *Vitim*, & *Anemonem* ordine memoraret, non Bedesim Viti, & Anemoni interjecerit, quando Montonum inter hos duos fluere, neque ipsis minorem, videmus; sed a Viti continuo ad Anemonem; ab Anemone autem Ravennam, & ad Bedesim transiliverit? Ego vero id a Plinio ob eam rem esse factum, censeo, quæ ut Montono, non Roncho, peculiaris est, ita Montonum, non Ronchum, Bedesim a Plinio nominatum esse, confirmat. Scire licet, Montonum fieri ex amniculis duobus, quorum nomina quæ apud Maginum (q) leguntur, neque vulgus, neque nostri agnoscunt *Morgagni Opusc.*

Historici. Sed dexterum, Dantis (r) ætate, dictum *Acqua cheta* esse, constat; sinister, id est Roncho propior, olim *Acqua viva* appellatus est (f). Hi non, ut modo videmus, ita & quondam supra Æmiliam viam, sed infra hanc confluebant. Dexter enim dexterum, sinister sinistrum vetusti Fori Livii perstrin-gebat latus; unde videlicet factum est, ut quæ utrinque additæ sunt postea, urbis partes Suburbia vocatæ sint, hodieque vocitentur, alterum quidem *Sclavonia*, alterum *Gottognorum*, quarum appellationum causas, in vulgus editas, hic referri nihil attinet, præsertim cum minus sint fortasse probandæ. Sed de his alias (\*\*\*): nunc ad amniculos redeamus. Quorum sinistrum secundum dexterum latus olim fluxisse ejus campi, qui amplissimum nunc est urbis nostræ Forum, cum Paulus Bonolus (t) ostendit prolatis verbis ex antiquo *Sermone* qui sub nomine S. Petri Damiani circumfertur, nempe S. Mercurialis corpus sepultum est non longe a Livienſi Urbe ultra Amnem in optimo Mausolæo, ubi ad laudem sui nominis Basilica est constructa; tum illud idem ex vetustis monumentis constare, docuit Generosus Eques, utrique, dum viveret, Minervæ deditus, Sigismundus Marchesius (u), qui & unum produxit, unde non obscure qui loca probe norunt, intelligant, eundem fluvium tunc vocatum fuisse *Beseze*, qua in voce antiquissimi nominis vestigia mihi quidem apparere videntur, *Beseze*. Dexterum autem amniculum ea transiisse, qua depressus locus, & fortasse etiam nomen indicat Monasterii S. Mariæ della Ripa, præclare pons demonstrat antiqui operis, qui a proximis olim ædibus Gentis nobilissimæ, Moratinorum nomen servat, ab Romanis quondam, cum Æmiliam viam munirent, impositus, ut magni lapides, iique in vetustissimum fornicem commissi, ostendant, nunc, quamvis in eadem via, plane inutilis, aggestaque humo, & adjunctis ædificiis pene obrutus, ut vix nobis civibus sit notus. Cum ergo priscum Livii Forum inter amniculum utrumque non multo aliter ac usque adhuc Ravennam vidimus inter duos amnes, jaceret; non secus ipsi ac Ravennæ, contigit, ut incolæ ab redundantibus utrinque aquis pericula subinde veriti, detrimenta aliquando experti, de utroque superius conjungendo, amovendoque cogitarent. Itaque ergo qui antea infra Æmiliam viam confluebant, jam supra hanc unum in alveum, urbis portam quæ ad occidentem solem spectat, ut nunc videmus, prætergredientem ante aliquot sæcula coacti sunt, cujus facti memoriam ut olim supra urbem locus servabat, ab novo alveo *Flumen novum*, quod ex antiquis apparet monumentis, vocatus, sic infra urbem locus qua sinister amniculus antea ferebatur, hodieque retinet, quem *Flumen mortuum* appellamus. Hæc cum ita sint; plane intelligis, quæ Plinius, cum aliquanto majora flumina, quæcunque in eo tractu Æmiliam interfecabant viam, ordine memoraret, duos illos, ut qui, si cum iis conferrentur, parvi erant amniculi, potuerit, ut solebat, omittere; eisdemque posteaquam in unum, cæteris æqualem, amnem confluxerant, cum propius Ravennam in ea stagna influentes videret, ibi denique commemorare. Quod cum ita proprium Montoni fuerit, ut Roncho nunquam convenerit; sane & nobis hæc peculiaris causa est, cur Montonum potius, quam Ronchum, Bedesis nomine a Plinio esse designatum, existimemus. Quid vero Geographum eruditum Abrahamum Ortelium permoverit, ut constanter, si quis alius, in hac maneret sententia, plane ignoramus. Sed certe ipse cum diserte scripſisset (x), *Bedesis fluvius prope Ravennam*, Plinio. Montone H. Rubeus vocat, cumque multis post annis, secundis curis (y) plura in perdifficili Opere mutavisset; in his quidem verbis nihil mutavit.

9. Igitur ut Montonus Bedesis, ita Ronchus Plinio Vitis fuerit, præsertim cum ad cæteras conjecturas accedat servatum apud superiores Ronchi accolæ

C

Vi-

(\*) Videri nunc potest Epist. V. n. 16. (b) Ital. Illustr. Reg. 6. (i) Descrit. di tutta Italia Reg. 14.  
(k) Reg. cit. 6. (l) Histor. Raven. l. 1. (m) Bonoli Istor. di Forlì l. 1. (n) Lexic. Geogr. ad vocem Vitis.  
(o) l. 1. cit. (p) Marchesi Supplem. Istor. l. 8. (\*\*) Vid. supra, n. 2. (q) Italia. Tav. 36.  
(r) Dante, Inferno Cant. 16. (f) Bonoli l. 1. cit. (\*\*\*) Videri nunc potest Epist. IX. n. 10. (t) l. cod. 1.  
(u) Supplem. cit. l. 3. (x) Synonym. Geogr. ad vocem Bedesis.  
(y) Thesaur. Geogr. ad eand. vocem.



Vitis nomen. Quod enim Bonolus ( *z* ) sua ætate a Meldulensibus etiam tum fieri, adnotavit, ut Ronchum ipsi Vitis nomine designarent, idem vel ulterioribus in locis hoc quoque tempore servari, sum certior factus ab Josepho Verlicchio, Docto Medico, meique amantissimo. Cum enim is in præsentia Galeatæ versetur, quam Mevaniolam ( *\** ) Romanorum Municipium fuisse, non dubito, ad Ronchi ripam, neque ita procul ab ejus fontibus, positum; quærenti mihi per litteras, quibus vocabulis non modo ejus loci incolæ, sed & agricolæ id soleant flumen appellare, continuo respondit, *vulgo vel ab agricolis ipsis vocari Bidente, & Viti, ab nonnullis autem Etruscis Ubbidente*. Cum vero *Bidentis* nomen & ipsi, & mihi inde ortum videatur, quod ad confluentes ejus fluminis fontium situm, atque adeo interjectum erat Bledæ oppidulum, de quo plura quæ hujus loci non sunt, Forolivienfes Historici attigere, *Pieda*, aut *Bida* in communiore accolarum sermone dictum; non est cur id vocabulum, aut alterum in quod est corruptum, hic nos moretur, in iis *Bedesis*, quod plures faciunt, vestigia incassum quærentes. Reliquum est igitur Vitis nomen, quod unde natum sit apud agrestes præsertim homines, nisi a vetusta illa, quasi per manus tradita, Vitis appellatione, haud facile reperies.

10. Sed ne forte credas, me hodiernis vocabulis plus æquo tribuere ad res antiquissimas inquirendas, non cogitantem fortasse, quam sæpe ejusmodi ratio minus cautos homines in errorem conjecerit; sic habeas velim, non modo id me cogitare, sed & vereri maxime consuevisse ex quo animadverti, fucum inde esse factum Viris gravissimis, & in Re Geographica exercitatissimis Cluverio ( *zz* ), Sansonio ( *a* ), Cellario ( *b* ), & cæteris qui hos sequuntur. Ne enim longius abeamus ab iis fluminibus de quibus nobis sermo est; *Solona*, inquit Cluverius, *a qua oppidani Solonates, haud dubie id fuit oppidum, quod III. millia supra Forum Livii in sinistra - Montonis amnis ripa, vulgo hodie adpellatur Città del Sole; quidpe pleraque per Italiam oppida, quorum nomini vox Città, sive Cività, id est Civitas adposita est, eâ ipsâ antiquitatis suæ indicium faciunt. Et fuisse hoc tractu Solonam circa Sarsinam, & Ariminum, antiquus quoque testatur lapis*. Testatur certe, ideoque a nobis propius has urbes quæsitæ est, ut alias dicemus ( *\*\** ); ibi vero ubi Cluverius, recenti nomine deceptus, *haud dubie invenisse credidit*, nullo modo quærenda fuit. Nam quod nos a Majoribus accepimus, idem confirmatum leges ab Historico non ignobili Scipione Admirato ( *c* ), qui ubi narrat, Cosmum Magnum Etruriæ Ducem anno 1565. constituisse novum ædificare oppidum, quod sibi propugnaculi loco esset, prope Salsubium ad fines Agri Forolivientis, hæc subjicit, quæ in latinum sermonem vertam: *cujus oppidi cum primus lapis secundum consuetos Ecclesiæ ritus a Sacerdote ponendus esset, repente autem cælum undique nubibus esset opertum; ea tantum pars, ubi novum oppidum fundandum erat, Solis radiis aperta relicta est. Quod signum cum fausti loco ominis haberetur; inde illa Civitas Solis est nuncupata*. Itaque oppidum non e ruinis excitatum, sed in nudo agro tunc primum conditum annis vix quindecim antequam Cluverius nasceretur, tantum huic nominis fallaciâ imposuit, ut pro vetustissima *Solona* habendum esse, non dubitaret. Quod minus tamen est mirum, quam ejusmodi hallucinationem intra annos centum, & quod excurrit, necdum fuisse animadversam, cum in Scriptis & Tabulis vel recentissimis Virorum alioqui Eruditissimorum retineri videamus: quos, & eos quos supra nominavi, silentium saltem admonere debuerat Leandri Alberti, & præsertim Blondi, qui ei loco adeo vicinus erat. Cum enim vel exigua quæque Italiæ oppidula, & ea in primis quæ antiquiora esse, suspicabantur, cum alibi, tum in ea vicinia, ut Castrum Mutilum, de quo alias ( *\*\** ) fortasse videbimus, percererent; veri simile non erat, Solonam, siqua ejus rudera, aut si modo nomen ibi eorum ætate superes-

set, necdum si tunc Civitas ista Solis extaret; fuisse omnino præterituros. At si in agnoscenda Solona tantos Viros nominis decepit similitudo; quanto magis mihi cavendum est, ne in antiquo Viti internoscendo præsens mihi Vitis nomen imponat. Igitur ita aliquid tribuo præsentī nomini, ut cæteris conjecturis plus tribuam: quanquam multis ante sæculis idem nomen eidem flumini datum video in Vita SS. Hilari, & Olybrii, Rubeo ( *d* ) nota. Hi enim Theoderici regis ætate prope Galigatam (nam sic etiam aliquando ea quam supra memoravi, Galeata dicta est) vixisse scribuntur ( *e* ) in excelso atque edito monte, sub quo Vitis amnis defluit, ab incolis, ut aliqui arbitrantur, *Bidens* adpellatus. Non sum nescius, hæc a Cluverio ( *f* ) exagitari. *Haud procul inde, inquit, est fons fluvii, qui supra Æmiliam viam & oppidum Faventiam ( Forum Livii voluit scribere, ut ante me animadvertit Holstenius ( g ) ) vulgo Ronco, infra vero Bedeso vocatur. Hunc imperiti illi geographi antiquæ barbari Bidentem adpellarunt, eundemque opinati sunt esse, qui apud Plinium vitiato jam tum vocabulo legebatur Vitis: quum disertissimis verbis Plinius longe diversum faciat ab hoc Bedesim*. Quod ultimum sicut ultro fateor; ita Ronchum Bedeso ab accolis usquam appellari, nescio. Verum ut qui eam Vitam scripserunt, barbari fuerint; non inde tamen conficitur, quin eo jam tempore ei flumini Vitis nomen tribueretur. Quod si illi barbari; num & Blondus ( *b* ), & Guicciardinus ( *bb* ), & Jovius ( *i* ), & Rubeus ( *k* ); ut plures alios sciens præteream a quibus idem factum est; imperiti, & barbari fuerunt? Cum his nostri Historici summo consensu fecerunt, & faciunt: nec memini in doctum aliquem ex nostratibus Virum incidisse, qui non idem censeret.

11. Nec tamen nego, fuisse ex Italis, atque Externis, sed ex his præsertim, complures quibus contra ac nobis visum sit; ut Montonum Vitis, aut certe Ronchum Bedesis nomine designaverint. Quorum plerorumque auctoritas ut in cæteris apud me habet, ita in hoc quoque magnum pondus haberet, si in his fluviis designandis, describendis, delineandis eosdem sibi probe cognitos fuisse, ostenderent. Verum ex quo Leander in eorum descriptione, si Rubei ( *l* ) verbis uti licet, *cacutivit*, dici non potest in quanta plerique alii rerum confusione versentur, cum recentia ipsa, atque inter accolas certa, & pervulgata fluviiorum vocabula, ac loca unde originem capiunt, aut qua fluunt, incredibilem in modum permisceant, & pugnantia inter se loquantur ( *\*\*\** ). Quid vero de Tabulis dicam? quarum in aliis Ronchus, in aliis Montonus, in quibusdam Anemo prorsus omittitur. Nempe ex harum inspectione videtur factum, ut Vir cæteroquin Eruditissimus Montonum fuisse Anemonem crediderit, Ronchum Bedesim, ignobilem autem torrentem Vitim, Sunt qui Anemonem Ravennæ a meridie appingant; sunt qui in Anemonem Montonum pingunt delinentem: sunt qui Sapim fuisse Vitim, existimare videantur. Quidam Ronchum sic delineant, ut ab oriente sole perstringat Bertinorium: quod ut Forum Druentinorum esse potuerit; sic cum Procopii *Petra Pertusa*, quam nunc *Furlo* vocitamus, in hac tanta Geographiæ luce, qua Leonardus Aretinus carebat, confundi posse ( *\** ), non putabam. Nonnulli, & Præstantissimi quidem Viri, eundem proponunt Ronchum, Ravennam a septemtrionibus alluentem. Neque minus Illustres sunt, qui Montonum Ravennæ appingunt ad meridiem, non minori profecto hallucinatione, quam cum Vatreum, & Anemonem suæ quemque urbi ab occidente sole. Denique alii Ronchum adeo ad Forum Livii admovent, ut Sapim ad Cæsenam: alii idem Forum inter Ronchum. & Montonum pari intervallo medium faciunt; alii Montoni confluentes Solonæ illi commentitiæ propiores, quam ei Foro: ne quidquam de iis dicam, qui Forum ipsum Ravennæ, quam Faventiæ, vicinius delineant. Ab his ego, aut ab aliis qui eisdem sequuntur, alia omnia diligentius pervestigata esse, credam quam antiqua nomina eorum fluminum, quorum præsentia vocabu-

( *z* ) l. 1. cit. ( *\** ) Vid. Epist. XII. n. 4. & seqq. ( *zz* ) Ital. Antiq. l. 1. c. 28. ( *a* ) Tab. inscripta Italia Antiq. ( *b* ) Notitia Orbis Antiq. l. 2. c. 9. n. 89. ( *\*\** ) Videri nunc potest Epist. VIII. n. 9. & seq. ( *c* ) Ist. Florent. P. 2. l. 35. ( *d* ) Hist. Ravenn. l. 3. ( *e* ) apud Cluver. c. 28. cit. ( *f* ) Ibid. ( *g* ) Annotat. in Ital. Antiq. Cluverii ad hunc loc. ( *h* ) Ital. Illustr. Reg. 6. & Hist. Dec. 3. l. 5. ( *bb* ) Ist. d' Ital. l. 10. ( *i* ) Vit. Leon. X. l. 2. ( *k* ) Hist. Rav. l. 1. l. 8. &c. ( *l* ) l. eod. 1. ( *\*\*\** ) De his, & sequentibus, videri passim poterunt quæ sequuntur Epistolæ. ( *\** ) Vid. Epist. XIII. n. 9. & seqq.



cabula, origines, cursum, positum usque adeo intelligam negligenter esse quæsitâ, cum hæc tamen sint in propatulo; illa jaceant in obscuro: hæc ipsis auribus, atque oculis percipiantur; ad illa non nisi per conjecturas accedere possimus. Quarum ut nostras acceperim, ita si eorum vicissim quæras; multum vereor, apud eorum quidem plerisque, ullas ut possis invenire. Nam aut nullas proferunt, aut iis ferme videntur niti, quæ ex illis quæ supra dicta sunt, facile convellantur.

12. Sed quoniam Philippus Cluverius eorum sententiæ est constantissime patrocinator, neque is in præsentibus rebus inquirendis eadem quam in plerisque aliis notavimus, negligentia fuit; quid tandem proferat Geographus certe, si quis alius his postremis sæculis, doctissimus, & in veteribus monumentis versandis exercitatissimus, a quo dudum in hac controversia pendent cæteri, præsertim qui sunt inter ipsos doctiores, atque illustriores, videamus. Quod ita faciemus, ut simul vox *Vitis* sitne in Plinio retinenda, an vero in *Utis*, ut Cluverio placet, mutanda, discipiamus. *Inter hunc amnem (Anemonem) & Sappin duo sunt flumina memoratu digna* (inquit Cluverius (m)), qui hæc ne, relegisse quidem videri potest) *uno ore in mare exeuntes apud Ravennam, quam utrinque cingunt, ab occasu, vulgari vocabulo Montone, ab ortu Bedeso; sed qui superiore sui parte Ronco vocatur. Hic quum sit ille Plinii Bedesis; sine controversia alter erit is, qui in omnibus exemplaribus hætenus vitiato vocabulo legitur Vitis: quod haud dubie ipse Plinius scripsit Utis: unde obliquus casus fiebat Utentis; ut in Bruto agro Trais Traentis erat, qui nunc est vulgo Tronto; & in Trojano Asia agro Simois Simoentis: nempe Græca formatione. Duo hic præcipua affirmat Cluverius, alterum, Ronchum esse Plinii Bedesim; alterum, Plinium non scripsisse Vitis, sed Utis. Ab hoc incipiamus.*

13. Locus est Livii (n), ut præclare nosti, ubi Gallorum transitu aliorum alio tempore, in aliasque inter Alpes, & Padum Italiæ partes exposito, tum Bojorum Lingonumque, qui cum jam inter Padum, atque Alpes omnia tenerentur, Pado ratibus trajecto, non Etruscos modo, sed etiam Umbros agro pepulere; intra Apenninum tamen se se tenuere; ad extremum hæc in vulgarioribus libris addebantur. Tum Senones, recentissimi advenarum, ab Usente flumine usque ad Athesim fines habuere. Cum duo hæc ultima fluviorum nomina cum iis minime convenirent, quæ cæteri Historici, neque cum his quæ Livius ipse aut modo docuerat, aut mox erat traditurus; Sigonius (o) extitit qui id princeps animadverteret, profitereturque, sibi dubium non esse, quin esset legendum pro Athesim, Æsim; hunc enim Senonum extremum fuisse terminum, Veteres Scriptores prodidisse. De altero autem flumine in quo Livius citeriores statuit Senonum fines, hoc est inter ipsos, & Bojos Lingonesque, qui jam Etruscos, atque Umbros ultra Apenninum expulerant, sic censuit Sigonius. De Usente in iis locis flumine nihil adhuc comperi. Veteres libri habent Utente, mira inter se consensione, ut Vite legendum esse videatur. Vitis autem amnis meminit Plinius in iis locis. Usens est in Campania. Neque in aliis præterea Scriptis, si quando hæc aut de Livii sententia, aut de sua attigit, aliter, quod sciam, scribendum putavit. Nam & Livium docere, ait (p), Senones ab Vite flumine usque ad Æsim fines habuisse, & ipse ita scripsit (q), Boii quidem a Tanaro amne usque ad Vitim; Senones autem a Viti usque ad Æsim, & (r) Ultra Æsim tenuerunt Galli Senones, ut opinor, usque ad Vitim. Igitur Sigonius quidem apud Livium potius Utente mutandum esse censuit in Vite, quam apud Plinium Vitis in Utis. Cluverius contra, haud dubie ipsum Plinium scripsisse Utis, affirmare non dubitat. Vidimus antea cum pariter affirmaret, Solonam haud dubie ibi fuisse, ubi nunquam fuit. At enim antiqua Livii exemplaria mira consensione habent ab Utente: quod præter Sigonium, & Cluverium, confirmat is qui Livium, MSS. Codicum collatione recognitum Oxonii Morgagni Opusc.

edidit, Th. Hearnus. Ego vero cum id non omnino (\*\*) diffitear; Plinii tamen Codices & vetustos, & recentes vel multo majori consensione habere *Vitis*, mihi contendere posse videor, quando præter Cluverii ipsius confessionem, in omnibus exemplaribus ita legi; non modo olim Dalecampius, qui cum manuscriptis codicibus attentissime Plinium contulit, & Gelenius item, ac Pintianus, qui idem se fecisse professi sunt, sed neque Joannes Harduinus, incredibili Vir eruditione, & diligentia præditus, qui Plinium nostra ætate accuratissime recensuit, variantem ullam lectionem ad eam vocem adnotavit. Quin ne conjecturæ quidem Cluverii tantum tribuit, ut ipsam memoraret. Itaque neminem, quod sciam, ad hoc tempus habemus, qui Plinium ediderit aliter, ac *Vitis* scribentem. At id vocabulum, inquit Cluverius, in omnibus hætenus exemplaribus vitiatum est. Sic tamen in longe etiam vetustissimis legebatur, quippe cum in perantiqua illa SS. Hilari, & Olybrii Vita supra viderimus diserte fuisse scriptum, monte, sub quo Vitis amnis defluit, indicio manifestissimo, quemadmodum apud Plinium vel iis sæculis id vocabulum legeretur. At apud Plinium vitiato jam tum vocabulo legebatur Vitis. Hæc nimirum sunt Cluverii responsiones, atque rationes, cur Plinianus *Vitis* in *Utis* mutandus sit; quasi vero nemini vicissim liceret haud dissimili ratione suspicari, vitium fortasse in Liviano Utente delitescere, præsertim postquam Sigonius, non mediocri Vir judicio, ibi Vite esse legendum, existimavit. Quid ergo est? Etsi cum Cluverio pro eo ac meretur, liberaliter agere mihi placet, ultroque hoc addere, multo facilius ab oscitantibus librariis *Utis* in *Vitis*, quam *Vite* in *Ute* mutari potuisse; tamen ejus sententiam si quis conjecturæ loco proponat; non improbo: si ut monitum necessario servandum; non acquiescam. Nam quid Plinius ipse haud dubie scripserit, nescio; quid in omnibus ejus codicibus legatur, video.

14. Nunc ad alterum, quod Cluverius pariter affirmat, veniamus, illum Plinii Bedesim esse Ronchum: Quid ita? Quia Ronchus ad Ravennam vulgari vocabulo Bedeso appellatur. Quod Cluverius ex Leandri Alberti Descriptione (f) videtur sumpsisse. Rubeus (t) tamen, qui certe, ut dixi, Ravennas erat, neque ita multo post Leandrum scribebat, id ignorabat; nam Ronchum quidem, vel, ut ab aliis, Aqueductum vocari, dixit; Bedesim non dixit: imo Leandrum ea in parte cæcutivisse, ut ante etiam retuli, pronuntiavit. Verum fac, Bedesim; quod nec ipse tamen unquam audivi; ad Ravennam appellitari. Si quis propterea esse Bedesim Plinii, affirmet; at ego ex contrario esse Plinii Vitim, contendam propterea quia ab superioribus accolis revera, ut ostensum est supra, dicitur Viti. Igitur cum ista Cluverii ratio facile concidat, qua una, ut videtur, permotus, Ronchum esse Plinii Bedesim, affirmavit; simul & hoc concidit, & illud quod hinc colligebat, alterum flumen esse Vitim, sive, ut ipse malebat, Utentem illum, quo a Boiis Senones dividebantur: nisi forte ex hoc ipso posse alteram duci rationem multo firmiorem, putabat, cur Montonus Vitis, & quod consequeretur, Ronchus esset Bedesis existimandus. Ego vero ut Livii Utentem fateor Bojos a Senonibus divisisse; ita ex hoc non video sequi, Utentem in Montono potius, quam in Roncho, esse agnoscendum. Quin veri similis putaverim, quando quidem nihil est in Veterum Scriptorum locis quod aliter hic rem se habuisse; præclare ostendat; veri similis, inquam, putaverim, fuisse ejusmodi fines ex conventionem inter amicam utramque gentem constitutos in paulo majori flumine, quale est Ronchus, quam in minori, quale videlicet magna ex parte est, fuitque Montonus, quippe ab ostio ad confluentes usque par Roncho, inde vero ad summum usque Apennini jugum in duos illos amniculos divisus. At enim si in Roncho eos fines constituimus; Ravennam Boiis, eumque agrum in quo Forum Livii est, assignabimus: quæ Cluverius adjudicavit Senonibus. Nos vero, si non

C 2

Clu-

(m) Ital. Antiq. l. 1. c. 28. (n) Histor. Dec. 1. l. 5. (o) in Scholiis ad eum Livii locum.  
 (p) De antiquo Jure Ital. l. 1. c. 16. (q) Hist. Bonon. l. 1. (r) De ant. Jure Ital. c. cit.  
 (\*\*) Vid. Epist. V. n. 8. in fin. (f) Descrizione di tutta Italia Reg. 14. (t) Hist. Ravenn. l. 1.



Cluverium, at Ptolemæum fortassis sequemur, tanto clariorem Geographum, tantoque vetustiorē, quem Cluverius ipse (u) fatetur, hæc ex Veterum monumentis desumpsisse, videlicet Senonum; *Æsis fluminis ostium*, Sena Gallica, Fanum Fortunæ, Pisaurum, Ariminum. Bojorum Gallorum; Rubiconis amnis ostium, Ravenna, Padi fluminis ostium. Quo in loco si Ptolemæus illos Bojorum fines spectavit, qui, deletis Senonibus, fuerunt; non inde tamen liquet, Ravennam quoque non ad Bojos antea, sed ad Senones attinuisse; quando Livius, cujus verba produximus supra, ante Senonum adventum, docuit, Bojos Lingonesque, Pado ratibus trajecto, non Etruscos modo, sed etiam Umbros, quorum fuisse Ravennam constat, agro pepulisse. Sin Ptolemæus eos attendit Bojorum terminos, qui, florentibus Senonibus, fuerant, quod potius ejus sermone videtur significari; tum vero Livianum Utentem propius Rubiconem esse quærendum, apparet de Ptolemæi quidem sententia: qua sane quicunque standum censeret, is minime probaret, si Cluverio plus æquo obsequentes, ex fluvii nomine qui ab Ravenna longius abesset, de Ravennatium fluviorum nominibus ita, ut ipse, statuissemus; aut in Plinio censuissemus, haud dubie *Vitis* in *Utis* esse mutandum; Quanquam si Ravennam, & Forum Livii Boiis potius, quam Senonibus, tribuerimus; non Ptolemæum tantummodo, verum etiam ipsum Cluverium sequemur. Neque enim hic semper in contraria videtur perstitisse sententia, quippe qui alibi (x) Boiis, non Senonibus, Forum Livii diserte attribuit, Senonesque non semel ait (y) inter Ravennam & Anconam urbes incoluisse.

15. In hac tanta rerum antiquitate, atque obscuritate non imprudenter ab Italis Doctissimis factum censeo, ut postquam Cluverium perlegissent, in nostris tamen fluviis latine appellandis eam quam a Majoribus quasi per manus acceperant, consuetudinem

non desererent, aut si forte novitate capti, deseruissent, ad eandem postmodum se referrent. Sic Cæsenatus Historicus, Vir in primis doctus atque eruditus, Scipio Claramontius, qui Montonum *Vitim*, Ronchum *Bedesim* in quibusdam quidem Scriptis (z), contra autem in aliis (a), ut nos solemus, nominaverat, Simeoni filio procul dubio auctor fuit, ut in Apologia quadam pro se scribenda (b) consuetudinem Rubei, Ronchum cum Blondo *Vitim* vocitantis, non improbare. Sic; ut alios præteream; Vir ætate hac nostra singulari eruditione, doctrinaque ornatissimus Benedictus Bacchinius, cum in iis quæ ad Agnellum Ravennatem adnotavit (c), Ronchi meminisset, Rubeumque laudasset, sine ulla addita animadversione, Ronchus, inquit, qui *Vitis Antiquorum* creditur.

16. Hæc igitur omnia cum ita essent; mihi, atque his quos in consilium adhibui, Clarissimis Viris præstare visum est, ut quid Cluverius censuisset, iis quidem quibus par erat, commemoraretur, at sub Statua tamen quæ Ravennæ in Foro ponenda erat, ita, si iisdem videretur, utriusque fluminis nomina perscriberentur, ut communior apud nostrates sententia fert, utque jam gemino in lapide ad Pontis capita legebantur, ne forte qui alia in Foro, alia ad Pontem animadverteret, non de iisdem utrobique fluminibus agi, existimaret. Tu vero, Vir Eruditissime, si præter ea de quibus quæsieras, multo plura in his Litteris invenies; pro tua Humanitate sic reputabis, me propter occupationes cæteras, & angustias temporis non satis spatii habuisse, ut, seligendo, brevior essem, tum illud spectasse, ut qua es Prudentia, & Eruditione, quanto plura essent quæ tecum communicarem, tanto plura forent, de quibus judicium acciperem tuum. Vale.

D. Patavii XVIII, Kal. Quintiles CIO MDCC XXXVIII.

## EPISTOLA ÆMILIANA III.

### AD AMICUM.

**Æ** Gre tuli, te qui sæpius in Patria esse soleas, hoc potissimum tempore abesse. Huc enim veneram ea mente, ut super iis rebus longos sermones conferremus quas annis ab hinc quatuor nunquam ex me quærere destitisti. Ex quo enim me inter Academicos nostros hic differentem audiveras secundum ea quæ duabus Epistolis, tecum postmodum communicatis, altera ad Marchesium (a), altera autem ad Poggium (b) scripseram; primum coram, tum deinde per litteras sæpenumero petisti, ut quidquid in singulis prætermittens, in aliud tempus rejecissem, id tecum omne communicarem. Igitur quod gravioribus assidue distentis occupationibus, facere antea non potui, habebam in animo nunc facere, cum hic videlicet otii aliquid futurum esset, tuaque me doctrina, & eruditio non mediocriter in ejusmodi perquisitionibus, sicuti sperabam, juvare posset. Verum quando sic accidit, ut quæ per colloquia non liceat, ea per epistolas sint tractanda; noli tu committere, ut si meis ipse partibus non desuero, tu desis tuis; sed postquam omnia perscripsero, tu vicissim de singulis quid sentias, candide, ut soles, diligenterque rescribito.

2. In Epistola ad Poggium; in ea enim præsertim sunt plura; quæ fusius alias examinanda reliquimus; illud præcipue occurrit cum per se dignum quod inquiratur, tum ad cætera ordine persequenda satis com-

modum, quæ olim facies rerum esset late undique circum Ravennam. Etsi enim in illa Epistola attigimus quæ tunc proposito satis essent; tamen & quædam accuratius poterant, & singula fusius perquiri. Igitur cum recte ab Rubeo (c) scriptum sit, fuisse eam urbem *inter marinas undas, & in æstuariis sitam, & quinque fluminibus, Pado scilicet, Anemone, Montone, Viti, & Sapi, circa eam olim confluentibus, cinctam*; nunc juvabit hæc singula expendere, & a fluminibus, atque adeo a Pado initium ducere.

3. Plinius (d) ubi illud scripsit, Padus, quia largius vomit, septem maria dictus facere; ibi continuo, quasi ejus septem ostia enumeraturus, hæc subjicit. *Augusta fossa Ravennam trahitur, ubi Padusa vocatur, quondam Messanicus appellatus. Proximum inde ostium magnitudinem portus habet, qui Vatrei dicitur. -- Hoc ante Eridanum ostium dictum est, aliis Spineticum ab urbe Spina, quæ fuit juxta, -- Auget ibi Padum Vatreus amnis ex Forocorneliensi agro. Proximum inde ostium Caprasia, dein Sagis, dein Volane. --- Inde ostia plena, Carbonaria, ac fossiones Philistina, quod alii Tartharum vocant. Nisi in ea voce plena, de qua nonnunquam dubitavi, subesse mendum, suspicemur, sexti ostii nomine sic depravato; necesse est, ut, sicuti indicavit Sabellicus (e), & disertius Volaterranus (f), unum Padi ostium fuisse agnoscamus ad Ravennam, quo septem illorum ostiorum constet numerus.*

(u) Ital. Antiq. l. 1. c. 28. (x) Introduct. in Geograph. l. 3. c. 25. (y) Ital. Ant. l. 1. c. 17. & 18.  
(z) Cæsen. Hist. l. 8. & 12. & 14. (a) Appar. Hist. P. 2. (b) Content. Apolog. de Cæsen. Triumph. l. 1.  
(c) Observat. ad Vitam S. Apollinar. (d) Epist. I. (e) Epist. II. (f) Hist. Raven. l. 1.  
(d) Nat. Hist. l. 3. c. 16. (e) Rer. Venet. Dec. 4. l. 1.  
(f) Comment. Urban. l. 4. Reg. Transpad.



rus. Hæc sententia postea Hondii ( *g* ) fuit, & ante hunc Cluverii ( *h* ), qui huc traxit non modo quod in Itinerario est, Antonino adscripto, ab *Ariminore-cto itinere Ravennam* M. P. XXXIII. Inde navigantur *septem maria*, sed & illa quæ in Epistola ad Poggium ( *i* ) produximus, Jornandis verba, de Ravenna loquentis, Padus *SEPTIMA sui alvei parte mediam influit civitatem*. Quin etiam ii qui apud Rubeum ( *k* ) indicantur, versuum Dantis Interpretes, quibus versibus Franciscam illam Guidonis Polentani, Ravennæ domini, filiam, suam Patriam sic describentem induxit ( *l* ).

*Siede la terra, dove nata fui,*

*Sù la marina dove il Pò discende,*

*Per aver pace, co' seguaci fui,*

plerique existimabant, Dantem sequutum fuisse veterem cursum, quo Ravennam circumdabat, atque interfluebat Padus: quanquam, ut facile videre potes, minus necessaria hæc erat interpretatio, nec Franciscæ conveniens, cum hujus ætate Dantes, quippe Ravennæ versatus, ibique, non multo pluribus, quam triginta, annis post ipsam mortuus, egregie sciret, non amplius Padum Ravennam interfluxisse; Montonum enim, ut alias ad te scribentes ( *m* ) demonstrabimus, non in Padum eo tempore, sed in mare influxisse, Dantis alii versus ostendunt. Neque tamen vel priscis temporibus necessarium est, ampliorem quandam, si cum cæteris Padi conferas, hujus partem illuc se inferentem intelligere; quando Plinius haud aliud scripsit, quam Padum *Augusta fossa Ravennam trahi*. Quæ primum fossa quanta fuerit, deinde vero quanto contrarior facta sit, ac demum ut nulla, videamus.

4. Ex Spinetico, qui diu fuit omnium maximus, Padi alveo fossam de qua Plinius loquitur, initium cepisse infra Vatrei fluminis confluentes, ex ipso proposito ( *n* ) Plinii loco manifestum est. Ille enim alveus ordine erat ex sex reliquis Ravennæ propior, augebaturque Vaterno amne ex Foro cornelienfi agro, quod minime fieri potuisset, si fossam poneret supra confluxum incepisse ejusdem amnis. Neque enim amplius ei confluxui fuisset locus, interjecta hac inter Vatreum, & Padum fossa. Itaque in stagna, non in Padum, influxisset Vatreus haud secus ac proximi, quas postea memorabimus, fluvii ex Faventino agro, & Foroliviensi: quos quidem in Padum haud confluisse, non modo silentium Plinii indicat, de Vaterno fluvio, non adeo his majori, cæteroquin loquentis, imo illius alvei Padi ostium portum Vatrei dictum esse, scribentis; sed etiam Foroliviensis agri longior ab eo alveo distantia, & declivior in stagna Ravennatæ situs confirmant. Inde igitur, unde indicavimus, deducta fossa Ravennam fuit; non a Ferrara usque, unde, nisi benignius interpreteris, deducere videtur Philippus Ferrarius ( *o* ). Padusa, inquit, Padoa Polybio, Canal di S. Alberto, fossa Padi, quæ & Messanicus fluvius, & Fossa angusta, teste Plinio, vocatur, qua a Ferrara Ravennam usque navigatur. Et alia sunt in his verbis quæ aliter dicta vellem; sed illud præsertim, quod hic perpendendum est, *Fossa angusta*. Nam qualis ea cunque fuerit ante Augustum; tamen ne ducentis quidem ante hunc annis angusta esse potuit, si vel tunc pro uno Padi alveo, & ostio acceptam fuisse, recte conjicit Cluverius ( *p* ). At Plinii tempore, quod cum Ferrario spectamus, pro ejusmodi alveo, & ostio acceptam, largius certe vomuisse, & unum ex septem illis maribus fuisse, intelligis: quo igitur modo angusta fuerit, live ad Ravennam in Adriaticum Sinum se effunderet, live potius secundum Cluverii conjecturam ex Jornandis loco, a nobis alias ( *q* ) descripto, ad Classensem illum amplissimum portum efficiendum ab Augusto producta esset? Ab hujus igitur nomine totam fuisse deinde Fossam *Augustam* vocatam, nec nisi oscitantia librariorum mutata aliquando in Plinio litterula, *angustam* scribi cœptam esse, multo veri similis est, præsertim cum

ignorarent illi, quam latos alveos effossos Latini sæpe fossarum nomine designassent, ut alibi cum *Fossam Marianam, Drusianam, Papirianam, Clodiam* dixere; imo hic etiam in Padi alveis, cum unum, qui nunc est omnium maximus, *Fossiones Philistinas*, ut propositus Plinii ostendit locus, vocarunt. Cæterum plures Docti etiam Viri, qui sæculo scripsere huic nostro propioribus, *angustam* legere perrexerunt, iis quas ipsi videbant, & ego infra commemorabo, hujus Fossæ angustis, ut opinor, in errorem inducti.

5. Igitur neque rem incredibilem in modum amplifico, ut Fossam hanc unum quandam ex latissimis Padi alveis fuisse, credam, neque contra usque adeo extenuo, ut cum Rubeo ( *r* ) ipsis Virgilii, Pliniique temporibus fuisse censeam *modicum rivum, & fossam, atque amniculum*, quo Padi aqua Ravennam derivabatur, olim Messanicum appellatum, sic ut; quod etiam scribit ( *s* ); neque ea in mare fossa influeret, sed per paludem, in qua sita Ravenna --- erat, funderetur, dispergereturque. Scilicet quid priscis illis esset, fieretque temporibus, minime ex iis erat quæ deinceps acciderunt, existimandum. Limus enim simul cum aqua tum ex Spinetico Padi alveo, tum ex Anemone demum, & Bedesi in fossam hanc sensim quidem, sed per sæcula inductus, primum fecit qualem Rubeus, vel initio fuisse, credidit, pro uno ex septem Padi alveis non agnoscendam, tum deinde sæculis aliis additis, effecit denique ineptam illi navigationi, cujus tandiu præbuerat usum. Nam certe sub ipsa ferme Augusti tempora hæc ab Strabone ( *t* ) scripta sunt. Ex Placentia Ravennam per Padum navigatio est *dierum duorum, noctiumque totidem*. Sæculo autem V. quo Sidonius ( *u* ) navigationem pariter per Padum, descripsit suam, etsi ex certo hujus verbo, de quo disputare hic nolo, visa est Rubeo ( *x* ) illa arctior fossa, & fortasse in parte facta jam erat; tamen & Padum ea ratione qua a me alibi ( *y* ) scriptum est, memoravit, qui interlueret, allueretque Ravennam, & quam expedito itinere ad hanc appulerit, non obscure ostendit. *Brixillum oppidum*, inquit, *dum succedenti Emiliano nautæ decedit Venetus remex, tantum ut exiremus, intravimus, Ravennam paulopost cursu dexteriore subeuntes*. Sub initium quidem Sæculi IX. fossam hanc Rubeo ( *z* ) crediderim jam *navigari nisi minoribus navigiis*, non potuisse, sic tamen ut rursus multo quam esset antea, sæculis videlicet proximis, *navigabilior facta sit*. Certe Liutprandum ( *a* ) sæculo X. scripsisse, video, Othonem I. Cæsarem *Papiæ navim conscendisse, ac per Eridani alveum Ravennam usque pervenisse*. Sed non sic facile eidem Rubeo ( *b* ) credam, sæculo XIV. ostium hujus fossæ, in quod Padus influebat, obstructum fuisse, & jam tum alveum remansisse palustris aquæ plenum, quod & nunc, inquit, cernimus. Namque ut minime hic quæram, num id revera significent verba, quibus nititur, Joannis Boccacii in libello de Fluminibus, neque iis alia opponam ex ejusdem Philocopo ( *c* ) ubi Philei iter narrans, Ravenna, ait, per Padum Mantuam venisse; Blondus ( *d* ) utique, & Spretus ( *e* ), quorum alter post medium sæculum XV. est mortuus, alter ante extremum idem sæculum Ravennæ florebat, Rubeo non obscure adversantur, cum Blondus hanc fossam in Padum tunc scripserit *navigia perferre*, Spretus autem in fluvium Eridanum derivare.

6. Cæterum jam ante Blondi ætatem non negavero tum limo usque & usque convecto, tum ob aquarum in Spinetico alveo imminutionem, aquæ etiam quæ in fossam hanc influebat, copia magis magisque imminuta, fossæ & altitudinem, & latitudinem usque adeo decrevisse, ut pro uno Padi alveo amplius agnoscere non potuerit. Nec tamen propterea ab eodem Blondo ( *f* ) scriptum oportuit, constare, a Pado semper duodecimo milliario abfuisse Ravennam, & hoc nomine arguendum Procopium, quod eam urbem traderet a Pado mediam fuisse divisam. Nam neque is, sed

( *g* ) Ital. hodiern. Descript. ( *h* ) Ital. Antiq. l. 1. c. 28. & 35. ( *i* ) n. 4. ( *k* ) Hist. cir. l. 6. ad A. 128.  
 ( *l* ) Inferno Cant. 5. ( *m* ) Epist. IV. n. 6. ( *n* ) supra, n. 3. ( *o* ) Lexic. Geogr. ad vocem Padusa.  
 ( *p* ) Ital. Ant. c. 35. cir. ( *q* ) Epist. II. n. 6. ( *r* ) Hist. cir. l. 1. ( *s* ) l. 6. ( *t* ) De Situ Orb. l. 5.  
 ( *u* ) l. 1. Epist. 5. ( *x* ) l. 6. cir. ( *y* ) Epist. II. n. 6. ( *z* ) Hist. cir. l. 5. ( *a* ) Hist. l. 6. c. 6.  
 ( *b* ) Hist. cir. l. 1. ( *c* ) l. 4. ( *d* ) Histor. Dec. 3. l. 8. ( *e* ) De Urb. Ravenn. amplit. &c. l. 1.  
 ( *f* ) Hist. Dec. 1. l. 4.



sed ut alias ( g ) utriusque prolatis verbis ostendimus, Sidonius, & Jornandes hoc tradiderunt, & vere quidem: nec cum Procopius ( h ) Ravennam decurrere Padum, scripsit; aliud quam quod ipse, & tot veteres Auctores conspexerant, scripsit; quamvis Blondus ob tantam rerum mutationem nec videre amplius posset, nec agnoscere. Hujus tamen ætate Ravennæ mœnia secus Montonum amnem illa etiamtum fossa attingebat ( i ): quo post initium quoque seculi XVI. propemodum pervenisse, ex ipso Rubeo ( k ) apparet. Tunc enim cum Ravenna immeritisimo direpta est, ad Hadrianam ferme urbis portam fuisse Ferrarienses naves, commemorat, quæ a Pado per Fossam Messaniam commeatum Gallo exercitui Ferraria debebant; ut ne tum quidem Padum obstructum fuisse ad Padum ejus fossæ ostium videatur. Idemque ad eandem illam portam sub ætate eam fossam pervenisse, confirmat ( l ) quæ tamen tunc cum scriberet, jam distabat secundo ferme ab urbe lapide. Verum ante medium illud sæculum XVI. cum eadem fossa ob cœnum fundo inherens, jam esset navigationi inepta, --- per fossam percolam --- usque ad D. Petri in armentario, inde per --- paludes breviora via novam fuisse perductam, idem Rubeus ( m ) docuit. Quem si diligenter ii qui ab eo tempore ad hunc diem scripserunt, Geographi perlegissent Ortelius ( n ), Merula ( o ), Cluverius ( p ), Hondius ( q ), Ferrarius ( r ), Baudrandus ( s ), Cellarius ( t ): ut alios, & in his recentissimos præsertim omitram; haud commisissent, ut qua via, sua quisque ætate Canalem S. Alberti duci, cernebant, eadem quoque ductam illam vetustissimam Fossam credidisse viderentur. Sed & is Canalis, quem jam stagnantem, vadosum, arctumque adeo, ut remis non pateret locus, nonnulli eorum conspexerant, is, inquam, obstructo ad Padum ostio, denique eo redactus est, ut ne ipse quidem, etsi ab recentissimis ponitur, occurrat amplius, vix aliquo sui, ut superiore mense vidi, alicubi vestigio relicto.

7. Miraris fortasse, me super hac Fossâ nullum produxisse locum Ravennatis Auctoris, qui IX. scribebat sæculo, eamque Fossam, nec semel, commemoravit, ut a me in alia Epistola ( u ) indicatum est. Ego vero de industria huc distuli, ne seriem temporum longius abrumperem, si antea locos illius proferrem, hosque illustrare, quo ad ejus possem, conarer. Is fuit Abbas S. Mariæ ad Blachernas, cujus Liber Pontificalis a Viro Doctissimo ætate nostra editus, & Præfationibus, atque Observationibus ornatus est; Agnellus, qui & Andreas appellatus. Nam & ipse de se in Vita S. Maximini scripsit, nomine Agnellus, qui Andreas vocabatur; & Scholasticus quidam in verbis ejus libro præfixis,

nomine dictus

A puero Agnellus fuit, Andreasque juvenia.

Quod ne factum credas cum in sacram Monachorum Familiam adscriberetur; animadvertite quod de ipso Viri Eruditissimi tradiderunt, fuisse Ravennatem, & Presbyterum, non Monachum, etsi Abbatis titulum gessit. Vide igitur, num attingere id forte possit ad aliquam Ravennatis Ecclesiæ consuetudinem; non ad eam tamen quam ex sæpius laudato Rubeo ( x ) didici ad sua usque tempora viguisse, ut alterum infanti nomen imponeretur, cum sacro tingebatur lavacro ---, altero nomine appellaretur, cum inducebatur in templum, adhuc ante fores existens: sic ut omnibus essent Ravennatibus duo nomina, cum tamen eo deinde solo uterentur, quo appellabantur ad baptismatis lavacrum. Hoc ritu me, inquit Rubeus, qui dum Divino beneficio sacro fonte ablueret, Hieronymi nomine sum vocatus, ad ipsas templi fores, Eusebii --- nomine appellavit. Nunc quando is vetus Scriptor quis fuerit, vidimus; quid de fluviis scripserit Ravennæ proximis, videamus. Plura sunt in Vita Felicis ( y ),

in quibus ante hoc decennium Cl. Wesselingius ( z ) non illaudabilem operam posuit. Illa cum Blondus ( a ) olim legisset, recte quidem in parte censuit, magnam ostendere fluviorum, populorum, & locorum regionis mutationem; sed illud in primis non recte, Padum Bononiæ tunc propinquum ea Agnelli descriptione plane ostendi. Scilicet Blondum illa in errorem adduxerunt verba, Coriandri campos, & loca omnia circa phalanges armata, Bononienses transmissio Eridano parte Lionis servant, sive, ut cum Wesselingio malumus legere, portum, de quo alibi ( b ), Leonis. Apparet autem minime necesse esse, ut propterea Padus tunc esset Bononiæ vicinior, quando & Sarinates, procul distita in montibus civitas, paulo ante iussi fuerant ad littora & portus, sive ad Cerviam, ut Wesselingius mavult, urbem maritimam, excubare. Contra apparet ex aliis etiam Agnelli verbis in eo capite, & proximo superiore, Padum fuisse non procul Ravenna: ad cujus defensionem tot populi acciti fuerant adversus Theodorum patricium, & Siculæ classis præfectum, ut vel ex Blondo eodem ( c ) constat, & Bernardo Justiniano ( d ). Hunc Theodorum, ignotum quendam ex silentio, opinor, Agnelli, hujus Editor, alioquin Eruditissimus, vocat ( e ). Qui egregie huc adnotat ( f ), ex memoratis ab Agnello excubiis omnibus fortassis agnosci posse, qui per ea tempora ( post initium scilicet sæculi VIII. ) essent Exarchatus fines, a Sarsina videlicet Ravennam usque. Faciem præterea circumpositi Ravennatis agri agnoscere proclive, & Eridanum non longe ab urbe fluxisse intermedio campo, quem Coriandri vocabant, ad cujus fluminis Ostia Portum extitisse, ubi merces, militesque exponi solebant. Sed de his, & de aliis quæ in Felicis Vita sunt, alibi ( g ) erit opportunior scribendi locus.

8. Nunc quæ in Joannis, qui Felici successit, Vita ( h ) ab Agnello scripta sunt, diligentius expendamus. Simul enim quædam ex modo indicatis, simul plura alia illustrabuntur, ad propositum attinentia. Primo capite mentio fit Portæ, quæ dicitur Vicus salutaris, quæ erat juxta fluvium Pantheum, mox vero & alterius Portæ, quæ pergit ad Vicum Leprosum, ubi est pons ex basibus factivis, sive, ut habet Codex, factus. Altero autem capite hæc, a nobis magis attendenda, scribit Agnellus. Ravenniani egressi sunt ad eum ( Ducem quendam Græcum ) more præliandi in campum Coriandri. Qui simulata fuga terga dantes, cum pervenissent ad stadium Tabulæ, ubi pro signo terminus lapideus fixus est, reversi &c. Tum narrat, ut Græci revera ipsi cæperint fugere, infra dromonibus putantes se liberare. Tunc nostri, inquit, circumdederunt eos cum cymbis & carabis, & irruentes super Byzantios, omnes interfecerunt, & corpora eorum in Eridanum præcipitaverunt; & sic fuit, ut per annos VI. ex Patheremo ( vel ut Codex habet, Pathereno ) nullus inde unquam piscem comederet. Unus, an plures, & qui fluvii utroque capite sint ab Agnello designati, & prope, an procul Ravenna, & ad quam plagam hæc quæ narrantur, acciderint, tunc coniciemus, cum prius quid huc adnotaverit Doctissimus Editor ( i ), modeste, & pro veri dumtaxat studio in rebus perobscuris expenderimus. Fluxius, inquit, qui hic non longe a Padi ostiis fluxisse indicatur, primum quidem Pantheon corrupte, secundo Pateremus dicitur. Fossam fuisse censeo ex vicino Padusæ stagno fluentem, quæ piscosa Ravennatibus, uti Padusa ipsa, de qua Virgilius, piscosove amne Padusæ.

9. Quam ad plagam esset fluvius Pantheus, a Porta juxta quam erat, intelligendum est. Ea duxisse videtur ad Vicum Salutarem, ut altera, ubi pons erat, ducebat ad Vicum Leprosum, seu Leproforum. Agnelli Editor non ignoravit, dubitavisse notarum marginalium ( in Codice ) Auctorem an ea quæ ibi dicuntur, intelligi deberent de Civitate Classis, quæ per

( g ) Epist. II. n. 5. 6. ( h ) De Bello Goth. l. 4. c. 1. ( i ) Italiæ Illust. Reg. 6. ( k ) Hist. Ravenn. l. 8.  
 ( l ) l. 1. ( m ) l. 9. ( n ) Synon. Geogr. in Padusa ( o ) Cosmogr. P. 2. l. 4. c. 11.  
 ( p ) Ital. Illust. l. 1. c. 35. ( q ) Ital. universal. Descript. ( r ) ( s ) Lexic. Geogr. in Padusa &c.  
 ( t ) Norit. Orb. ant. l. 2. c. 9. n. 126. ( u ) Il. n. 6. ( x ) Hist. Raven. l. 11. ( y ) P. 2. c. 3.  
 ( z ) Adnot. ad Veter. Rom. Itinerar. ad Iter ab Urbe Mediol. ( a ) Hist. Dec. 1. l. 10. ( b ) Epist. VII. n. 7.  
 ( c ) l. modo cit. ( d ) De Orig. Urb. Venet. & c. l. 9. ( e ) Obs. ad Felic. Vit. n. 3. ( f ) Ibid. n. 4.  
 ( g ) Epist. VII. n. 7. ( h ) P. 2. ( i ) Obs. ad Johan. Vit. n. 5.



per eam occasionem subversa sit; ob id fortassis, quod porta Vicus Leprosi ad Classensem urbem ingressum præberet, nec Editor negat, potuisse tum Classensem primum occupari; Ravennam deinde. Ego vero etli ex Agnelli contextu video, duas illas Portas unius fuisse ejusdemque urbis; nam dum omnes cives concurrerent ad defendendam primam illam Portam quæ ad Vicum spectabat Salutarem, alteram quæ ducebat ad Vicum Leproforum, aperuit proditor; tamen in hoc arguendo non immorabor; imo duos illos Vicos ad urbem Classensem attinuisse, comprobabo. Nam primum hæc apud Rubeum (k) lego, se ad Classense oppidum conferret, in vicum, cui Leproforum cognomentum erat, tum illa quoque (l) Sepultus (S. Severus) est in Classe oppido, haud procul a regione, quam salutarem vocabant, quo loco --- insequentibus temporibus ejus nomini erectum templum est. Ipse autem Agnellus in Vita S. Severi (m) hujus Ecclesiam memorat sitam in civitate dudum Classis, non longe a regione quæ dicitur Salutaris usque in præsentem diem, sive, ut alio in loco (n) in regione, quæ vocatur Vico Salutaris. Itaque ex his qui producti sunt, Rubei, atque adeo Agnelli locis satis comprobatum vides, illas quas ex ipso memoravimus, Portas, & quod consequitur, fluvium Pantheum, quem juxta alteram esse, dixit, ad eam spectasse plagam a qua Classense oppidum positum erat. Igitur si Patheremum, locumque pugnae, ab Agnello indicatum, ad diversam plagam fuisse, ostendero; dubitabis continuo, num ex corrupta Patheremi voce factus sit Pantheus, & num uterque unus idemque fuerit fluvius.

10. Id vero ex aliquot conficiam Agnelli locis, cum eo de quo hic quærimus, collatis, in quibus, veluti in eo, Coriandri campus, & stadium Tabulæ memorentur, simul autem indicetur Porta, aut Aedes aliqua, aut fluvius denique, cujus positum ad diversam fuisse Ravennæ partem, non ignoremus. Igitur cum in Vita S. Liberii III. (o) legamus extra Portam Artemetoris non longe ad stadium Tabulæ prope campum Coriandri; patet, id quod quærimus, planum fore, si constet, quo Porta illa pertineret. Constabit autem ex Vita S. Johannis I. (p). In hac enim postquam Agnellus de Theoderico rege multa narravit, quæ hujus loci non sunt, in iisque quod ejus temporibus a parte Aquilonis ab omnibus visum fuerit calum ardere, quæ Borealis, ut opinor, Aurora videlicet num inter cæteras connumeretur, ex historiis non ita pridem collectas; tum illud subjicit, sepultum esse in Mausolæum, quod ipse edificare jussit extra portas Artemetoris, quod usque hodie vocamus ad Farum, ubi est Monasterium S. Mariæ, quæ dicitur ad memoriam Regis Theoderici. Igitur liquet, portam Artemetoris ad tam diversam a Classensi urbe partem spectasse, quam illa diversa est, ubi Aedem sacram videmus Rotundam vulgo appellatam, illam videlicet cui pro tecto saxum unum impositum est ea amplitudine, & crassitudine, ut quamvis in ejus dimensionibus recentes Scriptores non mediocriter inter se discrepare, animadvertamus; mirum tamen omnibus sit, illuc attolli potuisse. Ex iisdem Scriptoribus etiam est qui, credibile esse, ajat, hanc Aedem fuisse, olim Mausolæum, & probabiliter Theoderici, an oblitus, id pro certo esse ab Agnello traditum? an huic fidem non adhibens? quem tamen antiquum Auctorem rudem quidem, sed diligentem, ac fidelem, in patriis præsertim rebus, ab Eruditis hominibus haberi, constat. Ille idem quoque censuit recens Scriptor, magnum illud vas porphyriticum quod apud Ravennates habitum semper est, hodieque habetur pro loculo in quo ejus Regis corpus conditum fuerit, non, satis firma ratione pro eo haberi; cum persimile, labri sit cujusdam fontis. De hoc tamen vase post ea quæ paulo ante descripsimus, continuo hæc subjicit Agnellus. Sed, ut mihi videtur esse, sepulchro projectus est Theodericus, & ipsa urna, ubi jacuit, ex

lapide porphyretico valde mirabilis, ante ipsius Monasterii aditum posita est. Quod ego tum factum crederem, cum Mausolæo illo pro sacra Aede Catholici uti voluerunt, sepulchro videlicet impii hominis extra ipsam asportato; ut minus intelligam, a quibus, aut quando post Agnelli tempora, imo post annum 1286. quod vivebat Auctor Chronica, Agnello adjecta, quippe eadem quæ Agnellus, de loco ubi tunc erat id sepulchrum, confirmans; a quibus, inquam, eventum id fuerit in summum verticem ejusdem Aedis, præsertim cum in eo vertice ne antea quidem Agnellus fuisse dicat. Et tamen non modo Rubeus (q), ab Agnelli Editore (r) propterea notatus, scripsit, anno 1509. tormenti ictu ex eo vertice dejectum esse; sed & Thomajus (s), Rubeo ætate major, id, suo propemodum tempore, accidisse, testatus est, in hoc uno discrepans, quod ille casu, hic militum avaritia factum, ajat, & æris, quo illud affabre elaborato opertum erat, cupiditate. Addit hic sepulchri dimensiones, docetque, a quibus, cum ibi jaceret humi; in forum postea translatum sit. Nunc autem haud procul a S. Apollinaris Templo quod in urbe est, spectatur ad imam veteris cujusdam palatii partem quod Theoderici ipsius fuisse, dicunt, adjecta eadem Inscriptione quam Thomajus, cum primus esset inter suæ Civitatis Sapientes, de horum consilio in marmore insculpendam curaverat. Sed omnes, quas sic in transitu attingi, de sepulchro Theoderici dubitationes, tibi discutiendas relinquo, & cæteris qui forte Rubeum, a quo certe Agnellus perlectus fuerat, nihilominus tueri velint.

11. Portam autem (ut illuc redeam) Artemetoris circa eum locum fuisse, liquet, ubi fuit, & adhuc est Porta Anastasia. Hæc enim apud Spretum (t) lego. In Mariæ, ut appellant, in rotundo, eidem portæ Anastasiæ satis propinquo. Hanc Hadrianæ, sive (ut idem (u) mavult dictam ab antiqua Familia) Andrianæ portæ proximam, postea, ut nunc etiam, Clausam; tametsi iterum reclusit Julius II. Pont. Max. unde Julia quoque dicta est, vocitatam esse, scio (x). Sed num in voce Artemetoris mendum latet, legendumque est S. Victoris? Suspicionem hanc mihi ingerit ad primum propositum maxime faciens Agnelli locus (y) morabatur extra portam S. Victoris non longe a fluvio, qui vocatur Fossa-Sconti in Basilica B. Eusebii in Episcopo, quod Vivimundus Episcopus temporibus Theoderici Regis edificavit. Aedes autem hæc B. Eusebii erat prope eum quem supra memoravimus, Coriandri Campum: itaque in Litteris Pontific. A. 1262. inter cæteras ad Ravennatem Ecclesiam spectantes hæc quoque ita nominata est S. Eusebii prope Campum Coriandri, ut apud Rubeum (z) legissem mini. Quam ne aliam forte esse credas, quam quæ modo ex Agnello memorata est; hæc ejusdem cum prioribus verba confer (a) Ecclesiam S. Eusebii ---, quæ sita est non longe a Campo Coriandri extra urbem ---, quam edificavit Vivimundus Episcopus anno 23. Theoderici regis. Sed non tam laboro de porta Artemetoris fortasse in S. Victoris mutanda, quam de fluvio qui vocabatur Fossa-Sconti pro Fossa Asconis, ut indicavi alias (b), accipiendo, aut etiam in hanc commutando, præsertim cum alter Agnelli locus (c), quamvis aliqua fortasse verborum mutilatione, aut transpositione vitiatum, in eo certe quo de agimus, magis ad propositam a me lectionem accedat: hæreticos ejecerunt extra civitatem (Ravennæ) in loco, qui dicitur Fossa-Sconii, juxta fluvium, lapidibus obruerunt &c. Fossa autem illa, Augusta olim apud Plinium vocata, cujus gratia tot Agnelli verba perpendenda suscepimus, postea dicta etiam est Fossa Asconis, ut primum, quantum novimus, ex eo apparet Jornandis loco quem alibi (d) produximus. Quod nomen a Geographis creberrime usurpatum, servare malumus, quam ex novissime prolatis Agnelli verbis conjicere in Fossa Asconii esse mutandum, aut quam suspi-

(k) Hist. Ravenn. l. 1. (l) l. 2. (m) P. 1. c. 2. (n) in Vita Petri Sen. P. 2. c. 1. (o) P. 1.

(p) Ibid. c. 3. (q) Hist. Rav. l. 8. (r) Obf. ad Vit. S. Joh. I. (s) Hist. di Ravenna P. 2. c. 1.

(t) De Urbis Ravenn. Amplit. l. 2. (u) Ibid. (x) ex Rubeo Hist. Rav. l. 7.

(y) P. 2. in Vita S. Maximian. c. 1. (z) Hist. cit. l. 6. (a) P. 2. in Vita S. Agnelli c. 2. (b) Epist. 2. n. 6.

(c) in cit. Vita S. Maxim. c. 5. (d) Epist. 2. n. cod. 6.



suspiciari, factum esse ex corrupta apud eos qui Plinium quondam descriperint, voce *Messanicus*. Scripsit enim, ut initio (e) posuimus, Padus *Augusta fossa Ravennam trahitur, ubi Padusa vocatur, quondam Messanicus appellatus*: sive autem hoc nomen Spinetico Padi alveo tribuit, ut contendit Cluverius (f), sive Augustæ eidem fossæ, ut plures intellexerant, hodieque intelligunt; nihil prohibet quo minus credamus, ut hi alteri sequioribus sæculis, ita alios superioribus accipere, & librariorum postea vitare potuisse. Sed hæc tu videris: nos hic, ut diximus, maxime usitatum nomen servare malimus Fossæ Asconis; quamquam Fossa ista, quocunque modo apud Jornandem, & Agnellum legamus, eadem videtur esse apud utrumque cum ob scripturam non ita absimilem, tum ob locum præsertim in quo ab utroque designatur. Jornandes enim sic indicat, *A septentrionali plaga ramus illi (Ravennæ) ex Pado est, qui fossa vocatur Asconis*. Agnellus autem ponit, ut vidimus, *non longe a campo Coriandri*, quem, ut *stadium Tabulæ*, fuisse *extra portam artemetoris*, hanc autem eodem quo illa quæ nunc *Clausæ* dicitur, & quod consequitur, ad septem triones spectasse, ostendimus.

12. Itaque & locus pugne illius quæ ab Agnello narrata est (g), ad eandem attinebat plagam. Nam Ravennates egressi sunt ad præliandum in *campum Coriandri*, & mox, simulata fuga, ad *stadium Tabulæ* pervenerunt. Quem igitur fluvium ibi dicemus illum fuisse, quem Patheremum Agnellus vocavit? Editor fossam fuisse censet ex vicino Padusæ stagno, & quidem non longe a Padi ostiis, fluentem. Quam ego conjecturam minime video cum Agnelli narratione consentire. Ravennates enim ait a stadio Tabulæ reversos, in hostes irruisse, omnesque interfecisse, & corpora eorum in Eridanum præcipitavisse, & sic fuisse, ut per annos VI. ex Patheremo nullus inde usquam piscem comederet. Si corpora dixisset in Padusæ stagnum, aut in fossam ex hoc deductam præcipitasse; pateret utique, cur pisces in hac captos abominarentur. Sed præcipitasse in Eridanum, dixit; igitur abominatio illa in pisces cadit, qui in Eridano caperentur. Itaque ne diutius te morer; Fossam ego Augustam, sive Asconis, quam in isto loco fuisse, vidimus, tum Eridanum, tum Patheremum ab Agnello hic dictam esse, credo, Eridanum quidem; nam Padi erat alveus, ut supra (h) demonstratum est; Patheremum autem, sive, ut in Codice est, Patherenum, ut voce uteretur, apud Ravennates suos magis tunc nota, ut opinor, atque usitata, certe nunc quoque haud omnino obsoleta, cum in recentissima topographica ipsorum Tabula (i) hujus Fossæ vestigia inscripta videam utroque nomine *Fossa Augusta*, & *Badareno*. In hac autem voce erunt fortasse qui tum Padi, tum Ravennæ, quæ Zosimo auctore (k) *Rhene* dicta est, utrumque vocabulum sibi videantur invenire, *Paderhenum* quasi Padum Ravennatem interpretantes; aut si *Paderemum* legas, quasi Padum per eremum traductum. Nam & templum V. an VI. ab Ravenna lapide S. Petro ædificatum sæculo IV. ideo in *Eremitario* dictum fuit, ut Rubeus (l) scribit, quod locus ille --- prope fossam, qua de loquimur, *Messaniam*, solitudo, & eremus quidam est. Nec tamen eremum semper fuisse, ostenderunt urnæ sepulchrales viginti duæ, & antiquæ Inscriptiones amplius sexdecim, quas suo tempore, anno videlicet 1665, haud ita procul ab loco ubi sacra illa Aedes fuerat, effossas scribit Seraphinus Pasolinus (m), tum luculentius demonstraverant multa ibi marmorum vestigia, pontiumque, & intercolumniorum sub aquis ab Rubeo (n) olim conspecta, unde a pene immemorabili æva submersam illuc regionem populosissimam credebat significari. Quem Rubei locum si Cluverius (o) animadvertisset; hæc fortasse attinere existimasset ad Butrium: quod ut fretus ipse Tabula Itineraria, ibi ponit VI.

ab Ravenna lapide, & ad Asconis Fossam appingit; sic velim scire, quibus Auctoribus recentissimus Scriptor nitatur, qui, etiamnum Butrium illud extare, contendit, oppidulum agri Ravennatis. Unum igitur fluvium; ut illuc revertamur; in loco prælii, ab Agnello narrati, fuisse, diximus, & quo nomine, & quam ad Ravennæ plagam; ut nihil restet aliud, nisi ut procul, an prope urbem fuerit, conjiciamus. Non procul autem fuisse, credimus primum ex duobus illis Agnelli locis (p) inter se comparatis, altero de Theodorici Mausolæo *extra portam Artemetoris*, altero de stadio tabulæ prope Campum Coriandri *extra portam Artemetoris*: nam si eadem utrobique locutione usus, *extra portam* in primo significat Mausolæum portæ vicinum; cur in altero illud stadium, & illum Campum procul distita significaverit? Deinde cum dixit in prælii narratione *ad stadium Tabulæ*, ubi pro signo terminus lapideus fixus est, sive septem hæc ultima verba ab Agnello ipso scripta sunt, sive ex codicis ora in qua olim, explanationis causa, adjecta essent, in textum irrepsissent; mihi videtur stadii unius ab urbe intervallum significasse: in eoque, & in illo alio loco ubi *ad stadium Tabulæ* nunc legimus, malim legere *ad stadii Tabulam*, hoc est ad marmoream tabulam, stadium (ut lapides in viis solebant millia passuum) indicantem.

13. Nunc illud abs te interrogari me posse, scio, fluvius ille Pantheus, quem Agnelli Editor (q) ab hac ipsa parte fuisse, censuit, nos autem ab omnino diversa, id est a Classis parte, fuisse, ostendimus, quis igitur esse videatur? Nempe idem fortasse, sicut ille credidit, Patherenus, cujus nomen librariorum culpa in *Pantheus*, si ita velis, mutatum sit; sed non ea tamen sui alvei parte prope quam prælium, & victoria Ravennatum ab Agnello descripta sunt, imo illa ulteriore alvei parte qua, postquam per mediam urbem fluvius traductus fuerat, ad diversam omnino plagam pergebat, quemadmodum supra (r) a nobis commemoratum, alia autem Epistola (s) Sidonio, & Jornande auctoribus, ostensum est. Qui fluminis per urbem transitus Agnelli quoque auctoritate videtur posse confirmari, ubi in Vita S. Neonis (t) describens triclinium *infra* (hoc est, ut intelligere solet *intra*) *Episcopium Ursianæ Ecclesiæ*, ait, *in pariete, parte Ecclesiæ pingere iussit, & in alio pariete super amnem posito &c.* Eodemque fortasse attinet quod in Vita legimus S. Barbariani Confessoris Ravennatis, cum Agnello ex antiquo *Lectionario* edita, *non longe a fluminis ponte*. Adibat autem tunc Barbarianus illud Templum quod ipsius rogatu, *Placidia D. Joanni Baptista* --- *juxta domum suam*, extruendum curaverat, ut Rubeus (u) ad annum 438. idem factum paulo aliter narrans, significat. Verum quia etiam S. Neonis obitus tribus ante sæculis accidit, quam id acciderit cujus occasione fluvius ille Pantheus est ab Agnello memoratus, & sæculis pariter fere tribus antea Sidonius Ravenna transierat, ante duo autem, ut creditur, Jornandes scripserat; idcirco ad interrogationem tuam dubitanter respondi. Nam quod alicui videri potest huc attinere Rubei locus (x). Anno 1208. *urbis Ravennæ fluvios defodientes, atque expurgantes, illum præsertim, qui ante aedes, quæ fuerant Joannis Ducis, ad pontem Caurellum, ante domum Bonhomii erat, usque ad portam Ursicinæ Gattulum*; vereor, ne malint alii hæc de Bedesi, Viti-que accipere, qui, magis magisque tot sæculorum intervallo æstuariis ac stagnis quæ circumerant, immunitis, jam producti essent ad Ravennam intercipientam, & quibusdam etiam locis, ab additis postea suburbiis, aut suburbanis ædibus sejungendam.

14. Sequitur, ut de Anemone, cæterisque amnibus, olim in ea stagna influentibus, sermonem habeamus. Hunc vero in proximas Litteras rejiciemus, Vale,

(e) n. 3. (f) Ital. Antiq. l. 1. c. 35. (g) Vid. supra, n. 8. (h) n. 3. & seq.

(i) Ragguaglio istor. delle Diverf. de due Fiumi Tav. 1. (k) apud Rubeum Hist. Ravenn. l. 1. (l) Ibid. l. 2.

(m) Lustr. Ravennati P. 6. (n) Hist. cit. l. 5. (o) Ital. Ant. l. 1. c. 28. (p) Vid. supra, n. 9.

(q) Vid. supra, n. 8. & 9. (r) n. 4. & 6. (s) Il. n. 4. (t) P. 1. c. 1. (u) Hist. Ravenn. l. 2. (x) Ibid. l. 6.



## EPISTOLA ÆMILIANA IV.

**D**E quinque fluminibus, superioris Epistolæ initio propositis, quæ priscis temporibus circa Ravennam confluebant, primo, quod ex Pado erat, eadem Epistola, quo ad ejus licuit, exposito, proximum est, ut de Anemone, Montono, Roncho, & Sapi verba faciamus.

2. Anemonis Tullium meminisse libro III. de Natura Deorum, scripsit Ortelius (a), quod ad oram quoque Lexici Geographici Philippi Ferrarii (b) adscriptum video: sed in Tullio non invenio. Sic cum Leander (c) Anemonem affirmasset Antonino dictum; Paulus quidem Merula (d) confirmavit, nec tamen in Itinerario quod vulgo Antonini vocitant; sed in Tabula Itineraria *Animo* legitur. Plinius (e) post Sapi, & Vitim revera Anemonem memoravit. Sed non omnes, ut nos, & plerique, pro Faventino; quidam certe pro Forolivienfi amne acceperunt, eo videlicet quem *Montone* appellamus, sive quod Pliniani vocabuli Anemonis vestigia sibi in ea Italica voce invenire videantur, quasi non magis extarent in hac altera *Lamone*, qua Faventinum fluvium vocamus; sive quod in nonnullis Tabulis veterem Italiam repræsentantibus, ut in quadam Ortelii (f), in aliaque a P. Bertio (g) edita Cluverii nomine nulum ad Faventiam appictum flumen conspexerint; sive tandem quod alius alium, & Exteri præsertim hac in re Italos sequuntur. Sic Jo. Harduinus (h) Vir cæteroquin Eruditissimus, credere potuit Coronellio (i), hic autem Malatestæ Portæ (k): quem tamen jure meritoque ob id fuisse reprehensum a Scipione Claramontio (l), nihil potest magis ostendere, quam inepta, ut in manifestis defendendis erroribus necessario accidit, Jacobi Villanii (m) responsio ad illam Claramontii reprehensionem. Hunc autem ideo manifestis erroribus accensio, quia si id ponas; consequatur necesse est, a Plinio amnem cæteris quos ibi nominat, haud minorem, Faventinum videlicet, omisum esse. Quæ una poterat animadversio recentissimo Scriptori dubitationem eximere, nihil, ut videtur, inter propositam paucorum opinionem, & eam quæ plerisque communis est, statuenti.

3. Sed ut plerique Plinianum Anemonem agnoscere in Faventino fluvio non dubitant; sic eorum qui in utralibet sententia sunt, alii quidem italicum nomen ejusdem fluminis esse *Lamone*, sine ulla hæsitacione censent; alii vero, & præsertim; id quod in vocabulo mireris nostro; Externi sentiunt aliter, & *Amone* omnino esse, contendunt. Quorum plerisque imposuisse credo majorem vocis hujus, & Anemonis similitudinem; ut L litteram non ad ipsam, sed ad italicum spectare articulum, existimarent. Verum ea littera, quantum video, longe aliam ob causam addita est. Scilicet sequioribus sæculis regionis hujus homines pro Anemone dicere cœperunt *Alamonem*. Constat id ex Faventinorum, & Forolivienfium *Chronicis* manu exaratis. Nam in una illarum, ad sæculum XIII. attinente, hæc verba produci video a Franc. M. Saliceto (n) *fecit edificare unum aliud castrum ab alia parte fluminis Alamonis*: in altera autem, quæ ex nostris est, & ob Auctorem vulgo appellatur *Chronica Moratina*, inter ea quæ ad illud idem sæculum spe-

ctant, hæc lego; *Clusa Communis Faventia, quæ erat in flumine Alamonis*, & rursus infra, *fluminis Alamonis*. Vides igitur, ut ex corrupta latina facta sit ab nostratibus vox *Lamone*. Quod cum dico, non illud nego, me in eadem Moratina Chronica mox legisse in *valle amonis*, & Julium Cæsarem Tondutium (o) tradere, Jo. Galeatium primum ex *Manfredis Comitum Vallis Amonis*, & Faventia Vicarium inscribi cœpisse. At simul ajo, eundem Tondutium (p) docere, in latine exaratis Faventinorum monumentis pro *Anemo* scriptum esse per compendium, aut syncopen *Amo*: neque propterea in communi usu fuisse video, ut italicè dicerent *Valle d' Amone*, sed *Val di Lamone* (q): quin eos video qui e re finitimorum esse existimaverunt, ut hæc Vallis primo potius, quam altero, nomine vocaretur, non illud ab Anemone fluvio, sed ab Lybico, si Superis placet, Hamone repetendum esse, contendisse (r).

4. Cæterum hujus fluvii apud nos vocabulum si quis forte Italis nonnullis credidit esse *Amone*; is minime attendit, Ferrarium (s), Maginum (t), Coronellium (u), & si quis est alius ejuscemodi, sua, quod haud inficior, laude dignus; eum tamen neque singulari linguæ nostræ, neque peculiari hujus, hujus, inquam, Italiæ partis notitia, neque auctoritate, cum his qui *Lamone* scripserunt, esse comparandum. Princeps est Dantes, Vir suo sæculo doctissimus, & linguæ nostræ in primis parens, & in hac regione versatus, cujus versus ita scriptus est, ut suspicari non possis, operarum culpa articulum voci temere adhæsisse (x).

*La città di Lamone, e di Santerno*, pariterque scripta est præclari ejus Interpretis Christophori Landini expositio, *Intende Faenza, appresso della quale corre il fiume Lamone: & Imola, ove corre Santerno*: nec aliter scripsit Interpres alter Alexander Vellutellius. Quod si Geographos quæris; Raphaelem Volaterranum (y) lege, ac Leandrum Albertum (z); & vide, num, quod aliquis videtur obtrudere, *Amone* scriperint, an potius *Lamone*: quos cum Abr. Ortelius (a), & Paulus Merula (b) secuti sint; Cluverius (c) quoque, & Cellarius (d), & his recentiores Exteri sequi potuissent; non scribere, Anemonem vulgo nunc *Armone*, *Ammone*, & *Amone* dici. Historici denique nostrates, & ii præsertim, quibus in his maxime standum est, Faventini Cavina (e), & Tondutius (f) non alio passim eum amnem appellant nomine, quam *Lamone*. Quos si Cluverius, quippe posteriores, vidisse non poterat; at Rubeum poterat, gravem sane vicinæ Civitatis, & totius pene *Æmiliæ* Historicum. Hic autem diserte scripsit (g) *Anemo, quem Fantinum, Lamonem, Rafanarium, & Santernum vocant*. Unus esse error primum videtur in ultimo nomine, ut omnes jamdiu suspicari vel ex iis potuerunt, quæ apud Dantem, ejusque Interpretes legi, diximus. Cætera nomina sine ulla dubitatione vera sunt, alterum, uti ostendimus, in regione universa notum, duo reliqua in agro potissimum in quem is amnis defluit, Ravennate, primum quidem, quasi Faventinum per syncopen dicerent, tertium autem a Rafanaria, ut opinor, de-

D du-

(a) Thesaur. Geogr. (b) ad *Anemo*. (c) Deser. d'Ital. Reg. 14. (d) Cosmogr. P. 2. l. 4. c. 23.  
(e) Nar. Hist. l. 3. c. 15. (f) in Theatr. Orb. (g) Theatr. Geogr. veter. T. 2. (h) ad cit. Plin. loc. not. 12.  
(i) Teatro delle Città &c. Tav. intitol. Pianta di Ravenna colle propos. &c. (k) Epist. ad Clementin.  
(l) Appar. Hist. P. 2. (m) Arimin. Rubic. (n) Neoter. Hist. Favent. Script. Confut.  
(o) Favent. Hist. Breviar. (p) Hist. di Faenza. (q) Vid. Repliche del Cavina in difesa &c.  
(r) Vid. Salist. cit. (s) Lexic. Geogr. cit. (t) Italia. Tav. Romagna.  
(u) Corso Geogr. Univers. Tav. Territor. di Ravenna. (x) Interno Canto 27. dell' ediz. dell' Accad. della Crusca.  
(y) Comment. Urban. l. 4. (z) Deseriz. d'Ital. Reg. 14. (a) Synon. Geogr. & Thesaur.  
(b) Cosmogr. P. 2. l. 4. c. 23. (c) Ital. Ant. l. 1. c. 28. & 36. (d) Notit. Orb. Ant. l. 2. c. 9. n. 92.  
(e) (f) locis cit. (g) Hist. Rav. l. 1.



ductum, castello Ravennatum proximo finibus Faventinorum, quod non semel ab his captum, & incensum, ab illis autem restitutum, & ab his denique dirutum Tondutius ( *b* ) memorat sæculo XI. & XII. Id castellum ad Anemonem fuisse, indicat Blondus ( *i* ), cum, trajecerat, inquit, *Anemonis vada, quæ vocant Rafanaria, sexto ( a ) Zagonaria milliario distantia*, ab Ravenna autem decimo. Nam & Rubeus ipse ( *k* ) *Anemonem fluvium*, ait, eo loco *Rafanarii nomen accipere*, qui est *decimum circiter lapidem ab urbe ( Ravenna ) remotus*. Ad idem autem exemplum opinari licet, factum esse Anemoni ultimum nomen in ea saltem parte agri Ravennatis, qua rus præterfluebat *Santerna* dictum. Id rus in Magini Tabula ( *\** ) indicatum videbis.

5. In stagna autem quæ erant circa Ravennam, influxisse Anemonem Plinii tempore, superiore Epistola ( *l* ) mihi videor ostendisse, Secunda autem ( *m* ) propositum de hoc & proximis amnis Plinii locum sic illustrasse, ut cum jam liqueat, cur ipse Bedesim non inter alios, sed seorsum memoraverit ad Ravennam; credere non possim, te Cluverio ( *n* ) adstipulaturum, qui eum locum censuit paullo incuriosius a Plinio consignatum, multoque minus causam, quam protulit indicii sui, probaturum, nimirum quod *Anemo non in mare Adriaticum inter Ariminum, & Ravennam, ut reliqua ista flumina, sed ultra Ravennam in Padum defluat*. Scilicet quid fieret Plinii ætate, ex eo existimabat, quod fieri videbat sua, non secus ac quia Anemo nostro tempore in mare influit, non defuerunt Viri Docti qui, senescente Romano Imperio, in mare pinxerint defluentem. Ille vero etiam Blondi ( *o* ) temporibus *nec Adriaticum mare, nec Padum attingens, in eam primus delabebatur paludem*, quæ supra Augustam Ravennatem Fossam incipiebat: & vix denique avorum Rubei ( *p* ) ætate in Padum est traductus. Atque ut intelligas quo ipsum loci natura ferret; vel postea ruptis aggeribus, in eandem iterum paludem effluxit, unde paulo ante Rubei ipsius ( *q* ) tempora denuo in suum alveum, & in Padum retrahendus fuit. Quin denique natura vicit, Padoque prorsus relicto, Anemo ubi paludes fuerant, illac ad mare via facta, in hoc influxit, & adhuc influit ostio antea paulo minus, nunc autem, idque Artis opera ( *r* ), magis a Ravenna diffuso; ut si Dantes ad nos rediret, id quod ceu peculiare Montoni scripserat ( *s* ), sibi intelligeret esse mutandum, & ad Anemonem transferendum.

6. Ejus enim tempore jam per se in mare contendeat Montonus, quod non petiisse cum Plinius viveret, sed Bedesim nomine in stagna influxisse, & propius quidem urbem Ravennam quam fluvios cæteros, proxime ante ipsum ab eodem Plinio memoratos, non hic a nobis est repetendum. Confirmanda potius ea sunt, & magis magisque illustranda quæ de hujus amnis duplici origine, & singularum nominibus ac progressu, & in unum alveum tum vetere, tum recentiore confluxu, de aliisque ejuscemodi Secunda Epistola posita sunt. Quorum aliqua tamen per se ipsa leviora videri possunt, non sunt tamen cum a Forolivienſi ad Forolivienſem scribantur, patriarum antiquitatum studiosum. Igitur versus, quos paulo ante indicabamus, Dantis hi sunt. ( *t* )

Come quel fiume c' ha proprio cammino  
Prima da monte Veso in ver levante  
Dalla sinistra costa d' Apennino,  
Che si chiama Acqua cheta suso avante  
Che si divalli giù nel basso letto,  
Et a Forlì di quel nome è vacante,

Rimbomba là sopra San Benedetto

Dell' Alpe, per cadere ad una scea;

& quæ sequuntur. Quibus in versibus cum quidquam quod improbarent, nec Guicciardinus ( *u* ), nec Bonolus ( *x* ), nec alii, quod sciam, offenderint, haud satis intelligo, præsertim postquam ne quis hoc loco sic erraret olim admonuerat Landinus ( *y* ); haud satis, inquam, intelligo, quæ Viro, alioquin Docto, veri dissimilitudo, atque adeo falsitas inesse visa sit, quasi Dantes hujus originem fluminis poneret in monte Veso, id est Vesulo, qui mons ultra Augustam Taurinorum est; cum aliud non significat, nisi hoc unum, si quis ab eo monte incipiens, spectare pergat fluvios omnes, quicunque inde ad nos usque ex sinistro Apennini latere nascuntur, fore ut inveniat, hunc de quo loquimur, primum esse qui non per Padum, neque per Padusam, sed proprio alveo ferretur in mare, Dantis quidem tempore. Hic igitur fluvius, qui superiore illa parte, haud procul a montano olim S. Benedicti Cœnobio, *Acqua cheta*, facile per ironiam, ut ex productis versibus mihi videtur, appellatus, cum ad urbem nostram accesserat, non eodem amplius, sed alio, Montoni videlicet, nomine designabatur. Infra hanc autem cum altero olim confluebat, quem *Acqua viva* dictum fuisse, ab nostris Historicis ( *z* ) traditum est, & tum denique ex duobus istis amniculis justum flumen efficiebatur. Nunc vero eorum singulis alia esse nomina, primo quidem *Fagnone*, alteri *Fiumana*, ut Magini quidem Tabula ( *a* ) indicat, Geographos video non dubitare. Sic Cluverius ( *b* ), sic Baudrandus ( *c* ), sic alii præterea utuntur altero eorum nominum. Sic recentissimus Scriptor utroque utitur, diserte Maginum sequens. Nobis vero unde hic ea vocabula acceperit, ignotum est, quando neque Majoribus ex eorum scriptis, neque montanis accolis ex ipsorum responsionibus cognita esse, nedum usitata, deprehendimus. Quæ de *Fagnone* potissimum dicta volumus. Nam *Fiumana* vici saltem esse nomen, propter quem primum labitur amniculus, nemo ignorat Forolivienſium. Quem ad vicum an olim castellum, sive oppidum attineret, quod in tabulis testamenti nobilis Dynastæ Francisci Paulucci ( *d* ) sic memoratur *Salti di fiumana di Raibi*, tu videris. In iis enim tabulis sequuntur *Flumana* proxima Castella *S. Cassiano in Pennino, Pietra d' Appio, &c.*, simulque videris, num forte conjici inde liceat, quid esset *aqua Rabi*, amniculus videlicet de quo loquimur, an potius canalis ex eo deductus, in quo uno excipitur, anno 1212. a Præatore, & Senatu Forolivienſi, ne frumentariæ molæ ponantur a Monachis S. Mercurialis ( *e* ). Bini enim Canales, ut nosti, singuli ex singulis illis amniculis molendi potissimum causa a Forolivienſibus deducti sunt, alter, isque multo longior, ut per urbem traductus, ad Ronchum usque flumen pertineat ab *Aqua viva*, alter vero brevis ab *Aqua cheta* in Montonum derivatus: quorum hunc etſi Alexander Paduanus ( *f* ) inchoatum ait anno 1443., tamen intelligere ex eodem ( *g* ) possis, tunc utiliore potius redditum esse aqua altius deducta, & certe antea fuisse; cum anno 1356. ab Ægidio Cardinali scribat castra esse posita inter eum Canalem, & flumen. Sed brevior hoc Canali seposito, de altero dumtaxat longiore verba fieri, intelligito, cum infra, Canalem nominabimus. In quo recentissimus ille Geographus deceptus est, cum aquam accipere scripsit a duobus amniculis *Fagnone*, & *Fiumana*; sed in his magis, cum postquam infra Civitatem Solis inter se communicarunt, se cedere iterum, ait, ut rursus inter se accedant ad Forum Livii. Illi enim amniculi semel, haud amplius, inter se accedunt, communicant, & in unum confluunt, idque

( *b* ) Hist. cit. ( *i* ) Hist. Dec. 3. l. 2. ( *k* ) Hist. cit. l. 7. ( *\** ) Tav. cit. ( *l* ) n. 4.

( *m* ) n. 2. & seqq. ( *n* ) Ital. Ant. l. 1. c. 36. ( *o* ) Ital. Illustr. Reg. 6.

( *p* ) Hist. Rav. l. 1. ( *q* ) Ibid. ( *r* ) Ragguaglio della Divers. dei due Fiumi.

( *s* ) Vid. n. seq. ( *t* ) Inferno Canto 16. ( *u* ) Ist. di Italia l. 10. ( *x* ) Ist. di Forlì l. 1.

( *y* ) Comm. sopra questo luogo di Dante. ( *z* ) Vid. Epist. II. n. 8. ( *a* ) Ital. Tav. 36.

( *b* ) Ital. Ant. l. 2. c. 4. ( *c* ) Lexic. in Civit. Solis ( *d* ) Vid. Vecchiarezan. Hist. di Forlimpop. P. 2. l. 3.

( *e* ) Vid. in eor. Codice Gambero p. 51. ( *f* ) Croniche di Forlì M. S.

( *g* ) Supplem. alle stesse.



idque passibus, ut nosti; supra hanc urbem circiter quingentis; non, ut in illa Magini Tabula, bis mille quingentis. Quæ Tabula cum eadem perperam & Canalis, & communis amniculorum alvei latitudinem proponat, alveus autem ad Canalem accedat; facile imposuit, in eumque errorem adduxit, a quo veracior Coronellii Tabula (b), vel obiter inspecta, opportune abducere potuisset.

7. In communem autem alveum, non illum dico, quem infra urbem antiquissimis temporibus fuisse, alias (i) demonstravi, sed hunc quem videmus; ut artis opera corrivos amniculos fuisse, constat; sic quo tempore id factum sit, repugnantibus inter se Majorum monumentis, non liquet. Nam Bonolus (k) quidem id factum scripsit ante annum 1057. a Scarpetta I. Ordellafo, non Domino illo scilicet, sed Capitaneo Forolivii, qui & Canalem eadem fere via qua fluviolus *Aquaviva* antea perrexerat, in civium commodum perduxerit, eique Canali pontes imposuerit duos, alterum a Pane, alterum ab Equitibus nomen ferentes. Et sane in antiquis Chronicis, quæ, cum hæc scriberem, in manibus habebam, ab ipso Alexandro Paduano descripta (l), eadem quæ tradidit Bonolus, illi Ordellafo tribuuntur, nisi quod pontes ii duo ita memorantur, ut antea fuisse, & sub ipsis flumen transiisse videatur. Cæterum in tabulis testamenti cujusdam, ab eodem Bonolo (m) indicatis, mentio fit anno 1178. Fluminis novi, & Molendinorum *Calanchi*: & ipse in Tabulario Reverendissim. Canonicorum Forolivien- sium Documenta esse, scio, Canalem commemorantia A. 1193. & 1194. prope Molendinum, quod in urbe adhuc est, Ripæ nuncupatum. Sed his omnibus, atque aliis ejuscemodi, quæ postea indicantur, plura sunt quæ adversari videantur. Primum in antiquis Cæsenæ Chronicis hæc legimus, *Anno Dom. MCCV. ductum est canale aquæ per medium Civitatis forlivii*. Quæ secutus est Claramontius (n): Alexander autem Paduanus (o) non modo aliis ex Chronicis hoc descriperat, *A. Dom. 1205. derivatio ex flumine ducta per urbem forlivii*; sed & in propriis Chronicis scriperat, eo ipso anno id factum, deducta aqua ex flumine *Calancho*, sic videlicet eundem appellans amniculum, quem *Aquaviva* fuisse olim, diximus, & in collectis quoque ab eo Chronicis nuncupatum videmus. Sed præter hanc tantam, quam & Bonolus (p) animadvertit, & discutere conatus est, in Canalis deductione discrepantiam, plura extant Documenta quæ post annum illum 1057. in urbe fluvium commemorant, ut in Tabulario Monasterii S. Mercurialis quoddam est quo anno 1092. mentio fit de *fluvio percurrente* a latere domus posita in hac Civit. *Livi: quæ vocatur figline*: qua in ultima voce etsi tanto magis hæreo, quod & infra habetur, *in Civitate Figline quæ vocatur Livia*; tamen nullum est dubium, quin utroque loco sit Forum Livii intelligendum: itemque alterum, quod anno 1202. diserte memorat duas domos positas in Forlivio in Burgo nostro super flumen constituto. Mitto alia sciens, quæ vel serius in urbe fluvium designant, ut testificationes, & sententiam latam die 22. Octobris A. 1231. (q) ex quibus intelligas, tunc flumen haud ita procul fuisse distitum ab sacra Æde, non S. Thomæ Apostoli, quemadmodum alter ex Historicis nostris credidit, sed, ut ibi diserte scriptum est; *S. Thomæ Cantuariensis*, condita circa A. 1208. a Tederico Malgenero, instaurata autem postea, ut nunc videmus, eodem illo urbis nostræ loco. Quonam igitur modo credibile sit, ante annos 174. illud ipsum flumen supra urbem fuisse alio corrivatum, quod flumen etiam tum per urbem flueret, suumque primum servaret alveum? cui, nec sane plurimis ante illam sententiam annis, novum pontem

Morgagni Opusc.

imposuisset Prætor Forolivien- sis, non ita dignum, si non flumini, sed Canali fuisset impositus, marmoreo adjecto monumento, & iis quidem verbis, de quibus alias (r) ad te scribam.

8. In dissidio tamen hoc tanto cum illud inter plures constet, quod paulo ante (f) indicatum est, Canalem fuisse, si non circa A. 1057. at certe A. 1205. per mediam, ut videmus, urbem perductum; satius est, ut conjecturis quæ in contrariam sententiam rapiunt, minus tribuentes, inde illud primum eliciamus, flumen igitur abductum alio fuisse aut eodem anno 1205. aut antea potius; cur enim Canali opus esset in ea urbe per quam pergeret amnis fluere? aut quam fieri ratione posset, ut eundem per hanc alveum & Canalis, & amnis haberent? Tum deinde videndum est, quo liceat modo dissidium tollere, conciliatis inter se discrepantibus monumentis. Quid igitur, si dicamus, vel postquam abductum fuerat flumen, ei tamen unde abductum fuerat, loco, ob diuturnam consuetudinem mansisse, ut sit, nihilominus fluminis nomen? Quid, si Canalem ipsum fuisse nomine fluminis vocitatum? Sic animadverti, vicinum quondam nostrum Matthæum Vecchiazzanum (t) in Documento quodam scripto anno 1214. quo suburbia, aliæque partes Fori Popilii describuntur, verba hæc *juxta aquam fluminis, & usque ad flumen*. de canali esse interpretatum, non secus atque in Brevibus, ut vocant, Litteris Honorii Pontificis anno datis 1223. Quin etiam cum illam eandem sententiam referat (u) quam in Forolivien- si Æde S. Thomæ latam diximus (x) anno 1231. non flumen ipse memorat, sed canalem.

9. Re igitur utro volueris modo explicata, facile dissolves pleraque omnia, quæ me olim retinebant, ne amniculum *Aquaviva* crederem ante annum 1231. in alterum qui superiore parte Danti fuit *Acquacheta*, esse derivatum. Hoc vero factum esse ante annum 1205. ex iis quæ mox subjiciuntur, testimoniis intelliges, unde & quædam altera tolli possit dubitatio. Erit enim qui forte quærat, num fluvius hic in quem supra urbem fuerat corrivatus amniculus *Aquaviva* primis quidem post eam corrivationem temporibus eodem perrexerit alveo fluere, & sub Romano ponte, quem Moratinorum vocant, subire; an continuo in novum effossum alveum, quem videlicet etiam nunc cernimus, exceptus, ab eoque ponte abductus fuerit. Dubitandi causam hinc affert Bonolus (y), qui olim quidem unum modo amniculum, postea autem utrumque sub eo ponte fluxisse, affirmat; inde vero tollit illa ipsa ratio, quæ una movere potuit ad corrivationem alterius amniculi in alterum efficiendam, metus videlicet, ne in urbem aqua redundaret. Quod enim fuisset consilium, quam metuerent duos in alveos divisam, eam omnem, unum in alveum conjunctam, per urbem traducere? Accedit non facilis in urbe alvei dilatatio, nec sana spes utriusque fluvioli aquas posse transire sub illo uno fornice, qui olim ab sapientissimis hominibus constructus esset ad alterius tantummodo transmittendas. Certe ex ipso Canali quem ab altero derivatum diximus, effusa aqua anno 1595. omnem inundavit urbem (z): ex communi autem amniculi utriusque alveo, extra ipsam quidem, sed nimis prope ipsam perducto, nonnunquam adeo redundavit, ut per proximam urbis portam ingressa, plures usque ad illum pontem diruerit domos anno 1384. (a) anno autem 1461. usque ad sacras Ædes pervenerit S. Hieronymi, & S. Blasii. (b)

10. Igitur ex illo ipso facto unde primam conjunctorum amniculorum notitiam habemus, alvei quoque habemus utrumque extra urbem perducen- tis. Anno 1201. inquit Rubeus (c), *se se Faventini magno impetu in Forolivianos pedem refe- rentes*

D 2

(b) Territor. di Forlì. (i) Epist. II. n. 8. (k) Istor. di Forlì l. 3. (l) Raccolta di Croniche &c.  
(m) Istor. cit. l. 3. (n) Cæsen. Hist. l. 8. (o) Raccolta cit. (p) l. 3. cit.  
(q) in Tabulario Canonicor. Foroliv. (r) Epist. IX. n. 9. (f) n. 7. (s) Hist. di Forlimpop. P. 1. l. 11.  
(u) Ibid. l. 12. (x) n. 7. (y) Istor. cit. l. 1. (z) Marches. Suppl. l. 11.  
(a) Chronic. M. S. Paduan. (b) Marchesi Supplem. cit. l. 8. (c) Hist. Rav. l. 6.



rentes ad amnem Montonem, qui ante suburbium Sclavoniae fluit, intulerunt. Hoc autem factum cum referant non una vetera monumenta, ab Alexandro Paduano collecta (d), & hic quoque in propriis Chronicis, & Claramontius (e), & Tondutiis (f) in suis quisque Historiis commemorant; nemo ipsorum est qui Montonem ibi non ponat anno illo eodem 1201. Eo igitur anno jam Montoni alveus extra urbem erat, ubi donec singuli amniculi suos intra urbem servarunt alveos, certe esse non potuerat. Antea igitur in unum corrivati fuerant alveum, & hic extra urbem perductus. Quod si pontibus opus fuerat qui singulis antea imponentur; tanto magis ponte opus fuit qui utrique. Sed quo hic primum tempore exstructus fuerit, non liquet. Illud tantum liquet, jam anno 1384. lateritium fuisse, cum tanta aquae vis, quantam eo anno, Paduano auctore, fuisse, diximus (g), lateritium Montoni pontem, ut idem scribit (h), dejecit. Pro eo autem ligneum pontem A. 1389. esse factum, confirmat. Qui cum saepe eadem causa abreptus, ut A. 1433. & A. 1483. & saepe quoque relictus esset; de lateritio rursus exstruendo cogitatum est ante A. 1513. Sed & hunc qui, uno fornice nixus, pulcherrimus, commodissimusque perfectus fuerat, vis aquae abstulit A. 1557. Denique is quem nunc cernimus, magis fortasse pulcher, & commodus, trino autem fornice subnixus, architecto Casare Mengolo Ravennate, cum A. 1610. inchoatus fuisset, A. 1613. absolutus est. Quae singula ex eodem Paduano (i) excerpere, & hic universa commemorare neque ab re alienum esse, & tibi certe pergratum fore visum est.

II. Antequam hæc de qua diximus, utriusque amniculi in unum alveum corrivatio supra urbem artis opera efficeretur, alter fuerat eorum confluxus, a natura, ut videtur, nec multo infra urbem, effectus. Jam enim in ipsa urbe alterum ad alterum valde convergere coepisse, indicia sunt, si hunc quidem paulo infra amplissimum urbis nostrae forum Canalis flexum occasum versus spectemus, quem Canalem magna ex parte deductum ajunt qua amniculus Aquaviva defluerat, inde vero situm illius pontis quem alteri amniculo ab Romanis fuisse impositum, cum Æmiliam munirent viam, Fabius Oliva (k), Alexander Paduanus (l), & quotquot ex nostratibus inspexerunt, nunquam dubitarunt. Quem ego pontem, quantum pars finit quæ adhuc extra humum exstat, cum attente inspicerem, magnosque, ex quibus constructus est, lapides valde inter se dispares cernerem, & minus affabre commissos, si latus pontis excipias quod spectat ad septemtriones, animadverti, fornicem non recta, sed valde oblique positum, eoque simul conversum, & alveum cui impositus fuerat, evidenter ostendat ab occidente sole ad orientem inclinasse, & quod consequitur, non ante, sed pone vetustam Ædem, quæ proxima est, Divinæ Triadi sacratam, perrexisse. Qua ex animadversione tria proclive est deducere. Primum, cum Moratini, ut nostrates appellant, Chronica hæc habeant, *sepultus fuit (S. Mercurialis primus Forolivienſium Episcopus) in Ecclesia S. Trinitatis de Forolivio, quæ tunc erat Ecclesia Cathedralis, & extra ac juxta civitatem prope flumen, & stratum Flamineam*; contra autem Paduanus (m) scribat, amnem inter suburbium, & Templum illud Cathedrale fluxisse, sicque id Templum intra antiquam urbem fuisse; videri in hoc dissidio illis potius Chronicis, quam Paduano, assentiendum. Alterum, quod ex primo sequitur, Ædis S. Mariæ Ripæ appellationem, non a proxima, ut quondam suspicabamur (n) ripa fluminis esse ornam, quippe quod ab ea vel magis distaret, quam a fronte vicini Sacrosanctæ Triadis Templi, sed ut Paduanus (o) docet, illuc id nominis

secum Moniales attulisse, quæ antea degerent ad Canalis ripam, ubi vel olim Ædes fuerat, S. Joannis, ut apud Marchesium (p), *in flumine*, vel, ut in Canonicorum Tabulario æst ad A. 1123. *super flumine* quondam vocitata, sive fluminis nomine Canalem accipias, ut supra (q) indicavimus, sive amniculum, de quo loquimur; nam etsi ante A. 1205. ex plurium consensu deduximus, extra urbem fluxisse; tamen si cuidam singillatim monumento habere fidem velimus, nullum profecto extare novimus, quo freti id multo ante A. 1178. (r) indicari, affirmemus. Tertium est denique, eundem fluviolum, quantum ex memorato pontis ejus positu æstimare licet, eam ipsam Ædem versus, quam modo dicebam, S. Joannis contendisse; non, opinor, ut ibi cum altero conflueret; neque enim Canalis quem illuc ab opposita plaga ferri videmus, toto tractu secundum Aquavivæ amniculi alveum perductus dicitur; sed dumtaxat ut ad hunc alterum convergeret, mox non ita multo infra urbem, ut inveteratum ibi nomen indicat, *fluminis mortui* (s) confluxurus.

12. Cum duo igitur amniculorum confluxus fuerint, priscus infra urbem, novus autem supra, quem adhuc videmus; ab utro, an ab neutro sit deductum Montoni nomen, videndum est. Paulus enim Bonolus (t) ex novo repetit, duobus videlicet amniculis, tanquam duobus arietis cornibus, in unum alveum convergentibus; quasi vero non idem de prisco quoque confluxu dici posset, aut confluxus ejusmodi non pluribus aliis quorum nullus sic vocatur, amniculis communes forent, quando hæc videlicet causa fuit, ut Bonolus quidem existimat, quamobrem Prisci plerisque Fluvios bicornes finxerint. Mihi igitur id nomen ex neutro confluxu repetendum videtur, ex novo autem multo minus, si quidem hæc Agnelli (u) verba, S. Apollinaris in Basilica Beata Euphemie, *quæ vocatur ad arietem, primitus baptismum fecit*, secundum ea sint quæ Rubeus (x) scribit, intelligenda. *Primum baptismatis fontem*, inquit Rubeus, *in ea urbis parte constitutum ferunt, quæ ad Arietem dicebatur. a fluvio, cui proxime accedit, nomen sortita: quem nunc fluxum vulgari vocabulo Montonem appellamus, in ipsius Tribuni domo, quam S. Apollinaris templum fecit ac consecravit: & infra, Tribuni domum ad Arietem amnem, jam diu a se templum consecratam, Divæ Euphemie (Aquilejensi) dicavit. --- Is autem locus extra urbem dicebatur, quod urbs ab ea parte nequaquam mœnibus erat circumdata. Facile qui hæc cum iis conferant quæ de primo Forolivienſium Templo Divinæ Triadi sacro paulo ante (y) dicta sunt, extra urbem, & ad flumen exstructo, tanto veriora existimabunt, quod utrobique primos illos Episcopos cernent urbium frequentiam vitasse, fluminum autem vicinitatem, baptismatis ritui, qui tunc erat, maxime opportunam, esse secutos. Verum antea præstat Eruditissimum Agnelli Interpretem (z) audire, qui adversus Rubeum animadvertit, tunc S. Apollinarem latere oportuisse, itaque non templa, nec basilicas extruxisse; sed Agnellum locum, ubi primum Fideles baptizati sunt, exprimere, Ecclesiamque, quod solet, post evoluta tempora ibi erectam indicare intendisse, & nil præterea. Quid igitur? si nos quoque, Doctissimi Interpretis exemplum secuti, animadvertamus, non ea quæ Rubeus habet, Agnellum scripſisse, nec de amne, prope eum locum, tempore S. Apollinaris, fluente, nec de nomine quod amni, aut ei loco esset illo quidem tempore: potuisse autem & flumen, quod tunc satis absuisse, ostendimus (a), propioribus Agnello temporibus ad eum locum accedere (quanquam ne id quidem Agnellus dicit) & id nominis utrumque accipere: itaque Agnellum, ut eum omnibus indicaret locum; non quo S. Apollinaris ætate, sed quo sua vocabatur, nomen posuif-*

(d) Raccolta di Croniche &c. (e) Casen. Hist. l. 8. (f) Hist. di Faenza P. 2.  
 (g) n. 9. (h) Chronic. cit. (i) Ibid. & Supplem. (k) Vita M. S. di Caterina Sforza.  
 (l) Chronic. M. S. cit. (m) Chron. cit. (n) Epist. II. n. 11. (o) Chron. cit. (p) Supplem. l. 9.  
 (q) n. 8. (r) Vid. supra, n. 7. (s) Vid. Bonol. Idor. di Forlì l. 2. (t) Ibid. l. 1.  
 (u) Lib. Pontif. P. 1. c. 1. (x) Hist. Rav. l. 1. (y) n. 11. (z) Obs. ad cit. Agnelli locum n. 3. (a) Epist. II. n. 7.



posuisse. Nec vero dicas, quo igitur modo ibi baptizabat, si id aberat flumen? ideo enim aberat, quod alterius fluminis, id est Padi, aquæ tunc passim Ravennam circumfluebant (b). Et sane eum ipsum locum diu post sæculum illud primum aquis fuisse circumfufum, Agnellus indicat in Vita Martini (c) qui post initium vivebat sæculi IX. *Munivit, inquit, hic Antistes Ecclesiam B. Euphemie, quæ vocatur ad Arietem, quam olim aqua dominabatur. Quibus ex verbis discimus, inquit Agnelli Interpres (d), Ecclesiam hanc antiquitus aquis circumfufis inædificatam, quæ Martini ævo in sicco erat, quod jam tum ex alluvionibus excrecente solo mare distaret. Sed huic mare fuisse vicinum, haud crediderim; neque enim ut ab hac distinguerent alteram Beatæ Euphemie Ecclesiam, potuissent a mari discrimen accipere, ut factum videmus ex Vita S. Probi (e): juxta Ardicam Beatæ Euphemie, quæ vocatur ad mare. Qua de altera Ædícula Rubeum (f) quoque video meminisse.*

13. Sed gravior mihi oritur dubitatio super interpretatione prioris illius Agnelli loci. Neque enim tantummodo ad Arietem, sed & in Bedente fluvio, & in mare S. Apollinarem, ait, multos baptizavisse. Ibi autem Interpres duplici nomine unum eundemque fluvium non dubitat indicari; quod fere cum Montonis Italica significatione & Arietis, & Bedentis, seu Bidentis vocabula conveniant: quanquam ex Rubeo (g) sciat, Bidentem ab incolis dictum alterum fluvium, Ronchi nomine aliis indigitatum. Verum ne hoc quidem animadvertit Vir alter Doctissimus, qui de Bedente alia Agnelli verba in Vita Felicis (h) interpretans, Bedentem veterem amnem appellat, inquit, qui Plinio Bedesis, Bidens recentioribus: & infra, Bidens est, quem vulgus Montonem nominat; cur autem, „vetus amnis?“, Arbitrer deficere vocem, „Uten-“, „tem“, : quem enim medio ævo Bedentem, & dein Montonem, quod ejusdem significationis vocabulum, dicebant, eum veterem fuisse Utenem, a Sigonio & Cluverio felici opera Livio L. V. c. 35. redditum, existimabant, sicuti ex Aëtis S. Hilarii & Olybrii cognitissimum est. Scilicet Bedesim, & Utenem, quem in Plinio pro Viti contendit reponendum esse Cluverius (i), & quem tamen alium ac Bedesim, recte ex Plinii ipsius verbis (quod & nos evidentissimum ducimus) esse, non dubitat, Bedesim, inquam, & Utenem eundem, si Superis placet, fuisse amnem ponamus, necesse est, si Montonum Bidentem esse, & huc attinere Acta velimus Sanctorum illorum: in quibus nimirum sic memoratur Vitis amnis, ab incolis, ut aliqui arbitrantur, & mox ab ipso Actorum Scriptore Bidens adpellatus, ut nemini qui sciat, quid Galigata sit, quæ ibidem ei fluvio proxima dicitur, dubium esse possit, quin ibi Ronchus, non Montonius, significetur. Sed & Blondus (k) Ronchum Bidentis nomine diserte designavit, illum Scriptorem, aut potius montanos accolæ secutus, quos propter vicinitatem vel magis quam Rubeus (l), audivisse poterat utentes, ut etiam nunc, eo vocabulo, apud ipsos, ut opinor, nato ob eam facile causam quæ a me alias (m) indicata est. Quo ut quemquam non memini esse usum cum iis Auctoribus sive antiquitate, sive auctoritate comparandum, ut Montonum significaret; sic etiam quod Agnellus ait, S. Apollinarem in Bedente fluvio baptizasse, non de Montono ipse quidem ausum intelligere; sed de Roncho potius, ut quem eo tempore Ravennam pedibus adiri potuisse, conjicio, ut alio loco (n) declarabo.

14. Montonum autem propius Ravennam quidem tunc defluxisse, ut Plinii Bedesis fuerit, in stagna tamen exceptum, & per hæc ab urbe divisum, & alias (o) ostendimus, & continuo, scrupulis, siqui forte restant, exemptis, confirmabimus. Suspiciari enim fortasse potes, Montonum, & Ronchum, tam-

etsi in æstuaria influerent, Ravennæ circumjecta, suum vel per hæc alveum singulos, suumque iter servasse, non secus ac per Veneta æstuaria Medoacus; cujus fuisse alveum affirmant, qui magni Canalis nomine mediam Venetiarum urbem interfluit, ejusque demum portum efficit: Sic igitur olim Ravennam quoque, ut annis superioribus cernebamur, intercipi utroque amne potuisse, & infra illam ex utriusque confluxu Bedesim fieri, & vetustissimum Ravennæ portum, ut Blondus (p) opinabatur, adstipulante magna ex parte Cluverio (q) ubi ostium, scribit, *Afconis fossam habuisse idem, quod Utenem, & Bedentem amneis (vulgo nunc sunt Montone & Ronco) apud Ravennam in mare effundebat, aut ubi (r) hos fluvios in ipsis æstuariis delineat in mare contententes. Ego vero ut in Medoaco, aliisque fluminibus perenni aquarum copia præditis id facile agnoscam; non idem tamen de illis dicam, quæ, ut nostra hæc, torrentium in modum nonnunquam sint plena, sæpius autem, æstate præsertim, perexilia, & pene sicca; ut arenæ, æstu maris in stagna invecetæ, ipsorum alveos prius oppleant, quam nova tandem aliquando a fluviis importata aquarum copia eandem queat per æstuaria tenere viam. Quod si certos illos per æstuaria alveos hi nostri servassent Plinii tempore; cur, quæso, alterum dumtaxat ad Ravennam, non utrumque memorasset? aut si Bedesis nomine, ut Blondus censuit, neutrum, sed cæcum quendam, & sub æstuariis latentem utriusque alveum designavit, alveumque ejusmodi, quod difficile creditu, amnem appellavit; cur igitur inter Sapim, & Anemonem alterum tantummodo recensuisset nostrorum amnium? Nec vero hoc factum putes propterea quod Montonus fortasse tunc influeret in Anemonem, quemadmodum Tabula quadam pingitur, hoc sæculo edita, quæ Italiam medii ævi repræsentare dicitur, aut quod influeret in Spineticum Padi alveum, ut in ea Cellarii (s) Tabula quæ inscribitur Italia Propria, delineatur. Hoc enim satis, ut opinor, a me supra (t) reiectum est; illud vero nullius, quod sciam, auctoritate Scriptoris, nulloque monumento nititur, quod nostrates Historici, aut Faventini, aut Ravennates commemoraverint. Quin ne tunc quidem cum Forolivienfes A. 1217. (u) inimicitias, ut sæpe olim, cum Faventinis exercentes, disjectis Montoni aggeribus, hujus cursum in hostium agrum avertissent, in Anemonem influxisse, reperio; sed ut declivitas soli ferebat, magnam ejus agri partem septem ipsos annos late inundasse, & denique, si huc spectant, ut arbitror, multa illa monumenta quæ se Rubeus (x) legisse, scribit; per Gattimellam villam secundo ferme ab urbe Ravenna lapide, in paludes influxisse. Sic etiam A. 1461. (y) cum sibi ob ingentem aquæ vim novum alveum fecisset; multa, ferme Ravennam usque, rura obruit, neque in Anemonem tamen deflexit. Igitur, ne Plinium sine causa damnemus, reliquum est, ut ad illa redeamus, secundum quæ alias (z) ostendimus, Montonum, propius Ravennam in æstuaria excipiendum, Bedesim ab ipso fuisse nominatum.*

15. Tunc autem simul ostensum est (a), non eadem cadere in Ronchum, quem cæteroquin haud ignoramus a multis creditum esse Bedesim, Montonum autem Vitim, sive, ut alii malunt, Utenem, sic tamen ut aliqui inconstantia ipsa sua dubitare videantur, in quibus præter Coronellium (b), eum quoque invenies qui annis superioribus de vero Rubicone librum emisit, si quæ scribit nomina cap. 14. (c) & 17. (d) cum iis conferas quæ cap. 1. (e) & quæ ter habet cap. 20. (f), & quæ in Tabula inscripsit quam exhibet cap. 8. Scio quoque, inter illos haud deesse qui Ortelii (g) non scripturam, neque sententiam; utraq; enim pro nobis est; sed tria quæ is habebat (h), Plinii exemplaria secuti, Be-

sedis

(b) Ibid. n. 6. (c) P. 2. c. 1. (d) Obs. ad Martin. Vir. n. 1. (e) P. 1. (f) l. cit. (g) Ibid. (h) P. 2. c. 3. (i) Vid. Epist. nostr. II. n. 12. & seqq. (k) Hist. Dec. 3. l. 1. (l) Hist. Rav. l. 3. (m) Epist. II. n. 9. (n) Epist. V. n. 16. (o) Epist. II. n. 6. (p) Ibid. n. 4. (q) Ital. Ant. l. 1. c. 35. (r) Tab. Gall. Circumpad. (s) Notitia Orb. Antiq. (t) n. 5. (u) Raccolta di Cron. M. S. &c. (x) Hist. Rav. l. 1. (y) Cron. M. S. del Padovani: e Marchesi Supplem. l. 8. (z) Epist. II. n. 7. (a) Ibid. (b) Ravenna con le proposte Divers. &c. e Descriz. di Forlì. (c) n. 4. (d) r. 11. (e) n. 7. (f) n. 13. (g) Synonym. Geogr. (h) Thesaur.



*sedis* scribant. Verum ut Cluverius, qui antea ( *i* ) scripserat ad eundem modum, postea meliores, puto, codices nactus, *Bedefis* passim ( *k* ) scriptum reliquit; sic facere alios video fere omnes; sunt enim adhuc qui Gaudentium Merulam ( *l* ) mendoso, ut videtur, co-

dice usum, in Tabula sequuntur non ita pridem vulgata *Italia Antiqua*, Roncho nomen *Hedefis* inscribentes. Sed quæ ad Ronchum, & Sapim attinent, proximis Litteris habebis. Vale,

## EPISTOLA ÆMILIANA V.

**E** Tsi Ronchum flumen, de quo, & Sapi has tibi Litteras pollicitus sum, a pluribus scio, & præstantissimis quidem Viris, qui Montonum fuisse Vitim, existimant, Bedefim appellitari; causæ tamen quæ superioribus Epistolis propositæ sunt, illis me assentiri, non sinunt. Itaque Bedefis nomen, ut in proximis etiam extremis Litteris constituimus, Montono relinquentes; jam, quod consequitur, Ronchum a Plinio vocatum fuisse Vitim, non dubitabimus, hac ipsa consecutione, ac rationibus alias productis, & Illustrium etiam Virorum, quos videlicet, si opus sit, illis opponamus, consuetudine, & auctoritate permoti. Blondus enim, Jovius, Guicciardinus, Rubeus, Claramontius, Bacchini in his fuere alias ( *a* ) a nobis laudati. Quibus ut præluxerat antiquus Actorum Scriptor Sanctorum Hilari, & Olybrii ( *b* ), sic Blondo præterea astipulati sunt suo quisque tempore alii aut nostræ, aut vicinarum Civitatum Historici, Fabius Oliva ( *c* ), Alexander Paduanus ( *d* ), Paulus Bonolus ( *e* ), Sigismundus Marchesius ( *f* ) nostrates, Ariminenses autem Malatesta Porta ( *g* ), & Jacobus Villani ( *b* ), & Foropopiliensis Matthæus Vecchiazanus ( *i* ). Qui omnes, ut laudati Rubeus, & Claramontius, Ravennatum, & Cæsenatum Historici, tanto facilius, ut opinor, exemplum Forolivienfis Blondi secuti sunt, quod & ipsi Ronchum scirent Galeatæ, & Meldulæ non ab oppidanis modo, sed & ab agricolis *Vitim* appellari. Ut vero supra Galeatam monticolæ illi vel in Actis Publicis *Bidentem* vocant, sic inde vulgo nominari *Vitim* etiam nunc, scio, non secus atque in agro Forolivienfi, & Ravennate, & in Civitate utraque nunc dicitur Ronchus, aut Ronchi flumen, Blondi ( *k* ) autem ætate, & postea quoque ( *l* ) Aquæductus vocitabatur.

2. Ronchi nomen Rubeus ( *m* ) ab oppido deductum tradit, quod is fluvius alluebat, ab rure autem ipsi attiguo Bonolus ( *n* ). Utrumlibet ego veri similis existimo, quam ipsum flumen ei ruri, aut oppido nomen dedisse. Ipsum enim fluvium multo sæpius nostrates solent *flumen Ronchi* appellitare, quam Ronchum, quo nomine rus potius attiguum designant, aut tumulum terreum satis grandem, in quo sacra Ædes ejus rursi extructa est, olim autem erat, non oppidum, quod sciam, sed militare castellum A. 1283. ut Marchesius ( *o* ) scribit, ædificatum, quod ut apud ipsum, ita apud Alexandrum Paduanum ( *p* ) ad A. 1331. *la bastia al ponte del Ronco* video nominari, parvam quidem arcem, sed opportuno loco positam. Scilicet ibi secundo, ut nosti, ab urbe lapide is fluvius interfecat Æmiliam viam, ut ponte fuerit jungenda. Primam impositi pontis notitiam Chronicis antiquis deberemus Cæsenatibus, libro cum ad alia nostratibus utili, tum ad multorum nomina cognoscenda qui Forolivienfium *Capitanei* sæculo XII. & duobus insequentibus fuere; in iis enim, & in Prætoribus recensendis minus sollicitos Historicos fuisse nostros, quam Faventinos, videor animadvertisse; huic igitur libro notitiam deberemus illius pontis ex-

structi A. 1263; nisi lapis id docens, qui Paduanii ( *q* ) ætate latebat, rursus exstitisset antequam Bonoli prodirent Historiæ ( *r* ). Quæ scripta sunt in eo lapide, ad te mitterem, nisi mallet, a te, cum in Patriam redieris, legi; in pariete enim extat contra illam sacram Ædem, neque a me qui perattente olim, & nuper inspexi, verbum ultimum lineæ sextæ quæ de *Capitaneo* est populi Forolivienfis, visum fuit esse, ut Bonolus habet, *Gratiani*, multoque minus, ut Chronica illa Cæsenatia, & ex iis Paduanus, Grardnj; sed evidenter GRAIDANI. Quod cum tu quoque perspexeris; a te petam, ut siquid forte de illa nobili, ut opinor, Stirpe, aut de ejus Patria notum habeas, mihi significare ne graveris. Cæterum eum tunc pontem lateritium fuisse, idem tradidit Paduanus ( *s* ), quod ex eo lapide non apparet. Quin Paduanus ipse ( *t* ) scribit, A. 1432. lateritia pilarum fundamenta jacta esse, quibus pilis ligneus pons imponeretur: quod porro iterum factum esse, perhibet, A. 1584. ( *\** ) cum usus desit ratis qua transeuntes ultro citroque transvehebantur. Pons enim tum A. 1483. ( *u* ), tum A. 1491. ( *x* ), eoque anno bis, ut ligneum tunc fuisse, facilius credas, aquarum vi disiectum fuerat. Quod periculum cum A. 1619. immineret ( *y* ); Forolivienfes lateritium fecerunt, quo adhuc utimur, commodissimum, & prælongum pontem, quippe fornicibus septem subnixum, quorum tres medii amplissimi sunt. En tibi collecta quæ apud Historicos dispersa legi ad pontem Ronchi attinentia; Ronchi, inquam; nam *Ronconis* nomen, quo appellari hunc amnem, Ortelius ( *z* ) prodidit, Forolivienfibus ignotum est.

3. *Aquæductum* vero, quod idem habet, Blondi temporibus fuisse vocatum, & certum est, & nos quoque diximus paulo ante ( *a* ). Sed quando, & quam ob causam ita cœperit appellari, operæ pretium est inquirere. Ante annum 897. ita fuisse nominatum, credat aliquis fortasse ex Documento Donationis Dominici Archiepiscopi Ravennatis ( *b* ), in quo fundus quidam a quarto latere dicitur terminatus *Aquæducto* ( sic ). Qua de re nobis pronunciare nihil licet, cum tres cæteri, qui nominantur, termini hoc tempore sint ignoti. Nec minus, vel potius magis antiquum usum ejus nominis alii existimabant, qui perverus Templum sciant, Roncho flumini satis propinquum, Sanctæ Mariæ *Aquæductus* a multis jam sæculis vocitatum fuisse, hodieque cum toto illo rure, quod tertio circiter lapide ab urbe abest, Forolivienfibus vocitari. Nam in Canonicorum Tabulario præter Documenta plura quæ A. 1100. & 1101. id Templum sub eo nomine commemorant, membranæ extant scriptæ quidem A. 1220. sed in quibus Lutifredus Archipresbyter Plebis *Aquæductus* se Documenta *antiquissima* vidisse, testatur, quæ ostenderent, annis amplius quingentis Plebem *Aquæductus* ad Canonicos spectavisse. Verum esse possunt qui Aquæductus appellationem, non a propinquo flumine, sed aliunde ortam esse, contendunt. Primum namque animadverto, Alexandrum Paduanum ( *c* ) iter describen-

( *i* ) in Tab. Ital. edita in Theatro Geogr. Vet. P. Bertii T. 2. ( *k* ) Ital. Antiq.  
 ( *l* ) De Gallor. Cisalpin. Antiq. l. 2. c. 18. ( *a* ) Epist. II. n. 10. ( *b* ) Ibid. & n. 13.  
 ( *c* ) Vita M. S. di Caterina Sforza. ( *d* ) Supplem. alle Croniche M. S. ( *e* ) Ist. di Forl. l. 1.  
 ( *f* ) Supplem. delle stesle l. 1. ( *g* ) Vid. Clementin. Raccolt. Ist. l. 1. ( *h* ) Ariminens. Rubic.  
 ( *i* ) Hist. di Forlimpop. P. 1. l. 2. ( *k* ) Ital. Illustr. Reg. 6. ( *l* ) Epist. II. n. 7. ( *m* ) Hist. Ravenn. l. 1.  
 ( *n* ) Ist. cit. l. 1. ( *o* ) Supplem. cit. l. 4. ( *p* ) Cron. M. S. ( *q* ) Ibid. ( *r* ) Ist. cit. l. 4. ( *s* ) Cron. cit.  
 ( *t* ) Supplem. ejusd. ( *\** ) Cron. cit. ( *u* ), ( *x* ), ( *y* ) Ibid. ( *z* ) Synonym. Geogr. ( *a* ) n. 1.  
 ( *b* ) in Tabulario S. Mercuriali. ( *c* ) Cron. cit.



bentem Pontificii Exercitus paulo ante cladem Ravennatam, tradere, Forolivio digressum, castra metatum esse ad flumen Ronchi, qua, rivus influit, diſtus Aquæductus, indeque ad rus usque Durazani, se extendisse, iterumque annis post quinque iter Ducis Urbinatis narrante, scribere, motis castris, trajecisse Ronchi flumen prope aquæductum, & rus petiſſe quod vocamus *Fornò*. Itaque ex narratione utraque patet, majorem quandam fossam quæ in fluvium aquam infert ex ea parte ruris Aquæductus quæ ad extremam viam attinet quam *Baronzole* nuncupamus, Aquæductum vocitatam esse, & facile ei ruri nomen tunc dare potuisse, cum vel multo amplior fortasse, & profundior olim esset, quam nunc videamus. Sed & aliam esse video causam multo vetustiore, multoque digniore, unde ista non ejus dumtaxat Templi, sed & ipsius fluminis appellatio duci potuerit: in cujus causæ disquisitione si paulo fusius, & diligentius hic morer; id tibi non modo non molestum, sed gratum potius futurum spero.

4. Cluverius (d) ex Vita, sæpius a nobis commemorata, Sanctorum Hilari, & Olybrii confessorum, ut inquit, *Ravennatium* hæc profert. *Presidente Symmacho Romæ, Olybrius quidam Ravennas -- monachus factus, in Galigatensi cœnobio vigeat: per hos enim dies adolescens Etruscus, Hilarus nomine, diligentius Deo operam & studium navaturus, passibus mille juxta Galigatam, Ravennatis diœcesis, in excelso atque edito monte, sub quo Vitis amnis defluit, ab incolis, ut aliqui arbitrantur, Bidens adpellatus, se se constituit. Et infra. Verum tanta solitudinis ab Hilario atque Olybrio plurimum expetita quies ab Theoderico rege perturbata est: qui ad eas radices Apennini, unde, ut aliqui putant, Ravennam aquam adduxerat, juxta Bidentem amnem adeis sibi magnificas, quo succedere (sic) interdum solebat, construxit: cœpit enim frequentari Hilari cœnobium. Antiquum hoc sane est cum rerum aliarum, tum aquæ a Theoderico Ravennam ductæ monumentum. Nam quod Cluverius, cujus opinionibus Vitis nomen hic refragatur, ex his ipsis verbis apparere, ait, haud perinde antiquum esse auctorem, qui hæc conscripsit: quippe qui diu post Theodericum regem fuerit; non aliunde, opinor, hoc potuit arguere, nisi ex iis verbis, ut aliqui putant, diu post ea tempora scribentem significantibus. Quid vero? si ea verba, sicut illa quoque ut aliqui arbitrantur, diu postquam cætera scripta fuerant, ab aliquo secus opinante adscripta, ex ora, ut fit, inter ipsa Auctoris verba translata sint. Quæ si tibi suspicio, propositum veteris hujus Scriptoris locum relegenti, non improbanda videatur; nihil jam hoc quidem loco prohibebit, quo minus eam Vitam a Paulo, Hilari discipulo, scriptam putes, sicuti ab Rubeo (e) traditum est. Qui cum simul confirmet, anno 502. Theodericum aquam Ravennam deduxisse, cujus formam (hoc nomine, inquit, aquæductum appellabant) suo sumptu instaurasset, quæ longis ante temporibus solo aquata fuerat; nimirum nobis ad memoriam reducit vetustius hujus aquæductus testimonium, quippe Cassiodori (f), vivente Theoderico, atque adeo, ut ex formula D. N. apparet, regnante, hæc scribentis. *His Coss. (Avieno Jun. & Probo) D. N. rex Theodericus aquam Ravennam perduxit, cujus formam sumptu proprio instauravit, quæ longis ante fuerat ad solum redacta temporibus.**

5. Verum si hic aquæductum instauravit; quis antea Ravennam perduxerat? Augustus? an Tiberius Claudius? qui eam urbem muro cinxit, ut ex litteris ad portam auream incisus Flavii Blondi (g), & Bernardi Justiniani (h) temporibus, & postea apparebat. Namque ut Ravenna stagnantibus circum aquis oblideretur; ea erat Romana potentia, eæ opes, ut vel per paludes fundamenta jacere fornicum non dubitarent, quibus niti aquæductus possent: quin priusquam Julius Cæsar Rempubicam invaderet, via ali-

qua fuerit, necesse est, qua videlicet Ravenna ipse discedens, e convivio, ut Appianus (i) scribit, & curru invehens, sive mulis, quod ait Suetonius (k), e proximo pistrino ad vehiculum junctis profectus est. Quod si illi, aut successorum alius aquæductum Ravennam perduxerant; at hic Martialis ætate collapsus aliqua ex parte jam esset, oportet, illic non semel, ut alias (l) commemoravimus, dulcis aquæ penuriam significantis. Sin eo tempore necdum aqua illuc fuerat deducta; at fuit certe inter illius, & Sidonii ævum, imo ante Sidonium diu, quippe qui Anthemio Romæ imperante; ut ex iis quæ de nuptiis Ricimeris attingit libro I. Epistola V. colligere proclive est; Ravenna transierat, hoc est sex circiter lustris priusquam Theodericus aquæductum instauraret longis antea, ut dixi (m) collapsum temporibus. Et sane quam Sidonius dulcis aquæ inopiam Ravennæ invenerit, eadem, alias quoque (n) a nobis laudata, ostendit Epistola, & iis quidem verbis, quæ tunc male habitum possint aquæductum significare. *Nusquam, inquit, vel aquæductum liquor integer, vel cisterna defacabilis, vel fons irriguus, vel puteus illimis.*

Sed post Theodericum quam diu aquæductus Ravennæ manserit, aut rursus instaurari potuerit, ex Inscriptione intelligi posset Ravennate (o), si SMARAGDUM, cujus nomen in ea legitur, Smaragdum Exarchum fuisse, constaret, quod propter lapidis, in quo cæteroquin hæc sunt AD NECESSARIAM IN-AQVÆ DVCTVM EJUSD. CIVI-, non unum ob temporis injurias defectum scire non licet. Anniadverti quoque, ab Agnello (p) in cujusdam funeris descriptione hæc narrari. *Puer mortuus est in villa, quæ dicitur Aureliacus, longe ab urbe (Ravenna) milliario XII. juxta Aquæductus prope Herculem. -- Herculeſes antecedeabant -- & ibant -- per viam Aquæductus --, & pervenerunt usque ad pontem Odionis. --- Tunc exeuntes omnes de civitate &c. Tunc collo levatus virorum, perductus in Monasterium S. Euphemie in S. Callinico, ibi sepelierunt eum. Tunc ingressa in civitatem turba plorante &c.* Sed ubi esset Aureliacus, ubi Hercules, ubi pons Odionis, & ubi Monasterium illud S. Euphemie, cum Interpres omnino fileat, nec alii quos hactenus consului, libri indicent; haud aliud mihi videor hinc posse discere quod ad rem facere queat, nisi illam Aquæductus partem XII. saltem lapide ab Ravenna fuisse disſitam, & fuisse in Ravennate agro viam, Aquæductus nuncupatam. Quæ si ad propositum spectat, ut opinor; eo minus contemnenda sunt, quod non modo hac nostra, sed & Blondi (q) ipsius ætate nullum Ravennatis Aquæductus extabat vestigium, quod sæculo IX. quo Agnellus scripsit, videtur extitisse, & si non a Galeata usque, quod oppidum, si rectam lineam ducas, XXI. lapide ab Ravenna abest; certe satis longe ab hac urbe deductum fuisse.

6. Et sane si a fonte aliquo; non a flumine; du-cenda Ravennam aqua fuit; non est dubium, quin longo intervallo fuerit petenda: quæ enim montium radices ab Ravenna propius absunt, eæ recta pariter linea ducta, lapide absunt, minimum, XV. Quærenti autem mihi, an indicia ulla prope Galeatam extarent aquæ inde usque deductæ, Verlicchius meus, jure meritoque in alia Epistola (r) laudatus, dum Medicum olim ibi ageret, cum alia respondit ad S. Hilari Cœnobium, & Theoderici Palatium juxta cum locum attinentia, tum præsertim plura, unde proum sit de aquæ illinc deductione existimare. Eorum omnium summa huc redit. Galeatæ oppido mons imminet ad occidentem solem, in cujus vertice Templum est, S. Hilari dictum, cujus ibi corpus jacet. Sed Cœnobium nullum superest, inde olim fortasse ad radices ejus montis translatus meridiem versus, ubi supra Galeatam locus est Monasterium adhuc vocatus, unde marmora, columnæ, bases, & ejusmodi alia ædificii magni indicia eruta sunt. Porro infra Galeatam ad septemtriones locus est alius quem vocant *Sagittam*,

(d) Ital. Antiq. l. 1. c. 28. (e) Hist. Rav. l. 3. (f) Chronic. (g) Hist. Dec. l. 1. 3.  
(h) De Orig. Venet. l. 5. (i) De Bell. Civil. Rom. l. 2. (k) De duodec. Cæsar. l. 1. (l) Epist. II. n. 5.  
(m) n. 4. (n) Epist. II. n. 5. (o) Vid. Maffei Offer v. Letter. Tom. 4.  
(p) Libr. Pontific. P. 2. in Vita Johannis VII. (q) Hist. Dec. l. 1. 3. (r) Epist. II. n. 9.



*gittam*, ex quo etiamnum inter crassissima fundamenta, nobilium marmorum laminæ; & tessellati operis fragmenta educuntur, quo loco nemo incolarum est, quin constanter ajat, Palatium fuisse Theoderici regis: & vero multo minus quam locus quem Monasterium appellant, a Galeata distat, & ab Roncho fluvio, quem ibi Bidentem, aut Vitim vocitant; ab hoc enim, ad orientem solem adito, centum circiter abest passibus, ab illa autem ducentis: quæ sedes videlicet perbelle congruit cum iis quæ de eo Palatio in Vita S. Hilari, itemque in perantiquo lapide scripta sunt, qui in ædícula visitur, ab hujus Templo non multum distita, quo in lapide illud, quod REX THEODERICVS condidit PALATIUM IVXTA FLVVM ( sic ) BIDENTEM GALIGATE ( sic ) PARTIBVS, disertè memoratur. In eo igitur loco quem *Sagittam* diximus appellitari, marmoreum non mediocris magnitudinis labrum, & plumbeos etiam tubos, sed diametro senis circiter digitis transversis non majori, annis superioribus repperunt. Aquæ autem ductus, quali opus fuisset ad aquam Ravennam usque deducendam, nulla aut ibi, aut circa ea loca extant vestigia, nec unquam extitisse, meminerunt. Et plures quidem in iis regionibus scaturigines sunt optimarum aquarum; sed deductioni recto tramite Ravennam versus saxei interjecti montes obstant, per quos si forte immanibus sumptibus via fuisset aquæ excavata; perdifficile foret, ne in longis adeo tractibus cuniculi, sic diutissime duraturi, usquam essent animadversæ. Quæ cum ita sint; reliquum est, ut si Theodericus quas sibi salubres Galeatæ aquas expertus erat, eas voluit Ravennam versus deducere, & in veterem, ab se instauratum, Aquæductum inferre, easdem lateritio opere conclusas secundum declivem fluminis cursum ad priscum usque Aquæductus initium perduxerit, quod ad radices montium, ut diximus, esse oportuisse, manifestum est, si a fontibus ipsis aqua arcessebatur. Nam si a fluvio; ne illud quidem opus erat, ut ad XII. ab Ravenna lapidem Aquæductus perveniret.

7. In hac tantæ rei perantiquæ obscuritate sicuti quidquam pro certo affirmare non licet; sic vicissim liberum cuique est conjicere, Aquæductum ad magnos saltem tractus secundum Ronchi fluminis ripam, ubi magis recta est, protrahi potuisse, eoque murum crassissimum fortasse attinuisse, quem in ejus ripa secundo, an tertio ab Ravenna lapide vi aquæ nuper esse resectum, accepimus. Conjicere quoque licet, inde huic nomen flumini Aquæductus esse factum: pariterque illi de quo supra ( *f* ) diximus, S. Mariæ Templo Aquæductus appellationem adjunctam fuisse, quod juxta illud aqua duceretur, aut in amplum quodpiam castellum, Aquæductui inserviens, recipere-tur. Quæ conjectura an forte comprobari posset inspectis, lectisque marmoribus quæ ibi, aut non ita procul extare audiveram, cum aliquando scire ave-rem, & ea loca adiissem, etsi nihil ad illam rem de-prehendi; tamen quæ viderim, hic tibi non reticebo. Apud Templum illud marmorea columna est: quam statim ac conspexi, inter millares referri posse, existimavi. Neque enim quod passuum numerus haud appareat, propterea non illarum simillima est: quia fuisse potest is numerus aut temporum, aut ho-minum injuriis sublatus; utrarumque autem manife-sta non desunt indicia; prætereaque inferior columnæ pars inter saxa abdita est, ut inspicere nequeat tota. Nec quia Imperatorum nomina insculpta habuit, i-deo non milliaris credenda est; imo vero ob id ma-gis. Solebant enim ejus generis columnis eorum Im-peratorum nomina inscribere, qui aut illac transitori essent, aut vias instaurandas, aut collapsos vetustate milliares lapides restituendos, ut ex Antiquitatis mo-numentis constat, mandassent. Quod si nostrates Hi-storici, & ii qui ab ipsis laudantur, videre tot ejus-modi lapides potuissent, quot ætate hac nostra in pu-blicum Veronense Museum importati sunt, neutiquam mirati essent, cur in columna de qua loquor, ad sin-gula extrema singulæ extarent Inscriptiones litteris in

altera alteri adversis, ut quæ nunc inferior est, & Imperatoris Constantii nomen perspicue adhuc inscul-ptum servat, non, ut superior, recte positas litteras legenti offerat, sed inversas: neque id Sculptoris lu-dibundo ingenio, aut sæculi ignorantia tribuissent: neque oblitteratum in superiore Inscriptione nomen idem fuisse, quod inferior habet, Constantii, existi-massent, imo alterius, & facile ejus qui ipsi, aut Magno Constantino patri inimicus fuisset, puta Ma-gnæntii, aut Maxentii. Scilicet victis qui antea re-gnabant, eorum nomina aut eradebantur e mil-liari lapide, aut hic saltem invertebatur, defossa-que ea quæ superior fuerat, parte, ut legi illa non possent, in opposita, quæ exstabat, parte nomen in-scribebatur victoris. Sic in Museo Veronensi colu-mella spectatur quæ prius in Maxentii honorem scul-pta, conversa postea fuerat ad Crispi, & Constanti-ni gerenda nomina, quemadmodum legere poteris apud Virum Cl. Amicum meum Josephum Bartolum ( *t* ) nunc Regium Augustæ Taurinorum Professor-rem, qui ut de aliis ad illud Museum attinentibus, sic pererudite de his quoque rebus scripsit. Tu cum in Patriam redieris, fac nostram inspicias columnam, si forte in tertio ejus, quæ nunc contra ac deberet, su-perior est, Inscriptionis versu facilius sit tibi, quam mihi fuit, LIBERTATIS legere, non LIBERALI-TATIS, quo in verbo, sicuti & in columnæ longi-tudine, minus probo alterum nostrorum Historico-rum, quem in verbis aliis quibusdam magis fortasse probare possim, in aliis neutrum. Hæc de columna. De marmoribus autem per Templi proximi pavimen-tum disjectis certior factus sum, nullas usquam in iis litteras apparere. Porro si flumen transgressus, rus adieris non paulo longius ab urbe nostra distitum, S. Petri, ut appellant, *Quinti*; majores quidem colu-mnas e græco marmore videbis, quæ hinc & hinc fo-res ornant ædium Nobilis Monsignanæ Gentis, qui-bus in ædibus mentas etiam spectavi, e crassissimo porphyretico marmore non ita pridem exsectas, quod marmor antea non bene cognitum, ideoque impoli-tum, neglectumque in via jacebat, ut columnæ illæ quoque prope Templum jacuerant ejusdem ruris. Sed nusquam litterarum quidquam invenies, ne in Tem-pli quidem limine eam C. CLODI PAVLINI se-pulchralem Inscriptionem, quam apud Marchesium ( *t* ) habemus. Ex quo enim ibi pridem conspexe-ram, postea Ravennæ, quo translata fuerat, inter tot alias agnovi quæ parietes atrii cujusdam ornant Palatii illius Archiepiscopalis. Sed etsi marmora alia quædam ex eo rure Forum Livii translata esse novi-mus ( *x* ) sub finem sæculi XV. ex quibus in Cathe-drali Templo sacra aquæ vasa ab excellentibus Scul-ptoribus efformarentur; nulla tamen eorum, præter Clodianum illud, litterata ibi fuisse, scimus, & quod consequitur, nihil inde erui a nobis potuif-se, quo conjecturam illam nostram confirmare-mus.

8. Cæterum ea conjectura, de causa videlicet, un-de Aquæductus nomen Roncho flumini impositum fue-rit, non ea denique censenda est, ut facile ejusmodi causa sit illi causæ antefenda, quam ab Ravennati-bus, ut videtur, acceptam, Leander tanquam mani-festam produxit, nosque alias ( *y* ) probavimus, & adhuc probamus, nimirum quia ejus *fluminis alveus artificum manu factus fuit ad multa passuum millia*, sicuti etiam Leandri ipsius ætate perspicue apparebat, idcirco Aquæductum esse appellatum. Alveum autem ideo parandum fuisse, credimus vel ut Ronchus a Classensi portu averteretur, vel ut stagna, Ravennæ circumjecta, in quæ se antea effuderat, multo faci-lius siccarentur. In Montonum igitur deductus infra, sed propius Ravennam, hinc cum eo diu ad mare defluxit donec minus urbi periculosum creditum est, si longiore infra hanc intervallo confluerent: id quod anno 1647. præstitum legimus ( *z* ). Nec vero ab his quæ modo scripsi, me illa retrahunt, quæ Ami-corum aliquis interdum objecit, verba Joannis Boc-caccii ( *a* ). *Ufens fluvius est Gallia cisalpina: inter quem*

( *f* ) n. 3. ( *t* ) Differraz. I. P. 2. ( *u* ) Supplem. Ist. I. 1. ( *x* ) Vid. Vecchiazzan. Hist. di Forlimpop. P. 2. l. 15.  
( *y* ) Epist. II. n. 7. ( *z* ) Ragguaglio della Diversi. de' due Fiumi. ( *a* ) Tract. de Flumin.



quem & *Athesim* fluvium *hifefones* ( sic ) habitare: qui Romanos apud *Alliam* expugnare ( sic ), qui ex *alpi*bus cadens fuit in *Padum*. *Ufens* alter a superiori fluvius est *Volscorum* haud longe a *Terracina* in *Tyrrhenum* defluens. Quæ obijciens verba, ut minime obsecrum esse ex *Livio*, & *Sigonio*, in alia *Epistola* ( *b* ) a me laudatis, qua ratione videantur hæc emendanda; ita ex illa *Epistola* eadem ( *c* ) constare, agebat, *Ufentem* de quo *Boccaccius* primo loco dicit, *Ronchum* esse debere, aut, si cum *Cluverio* facias, *Montonum*: & quod consequitur, a *Boccaccio* dici, non in mare, non in circumjecta *Ravennæ* stagna, sed fluere in *Padum* alterutrum nostrorum fluminum, contra atque a me superioribus etiam *Litteris* ( *d* ) statutum esset. Hæc igitur obijcienti sic respondi: verba illa *Boccaccii* qui ex *alpi*bus cadens fuit in *Padum*, ad *Athesim*, ut illis temporibus, a me credi esse referenda: at si illi secus videretur; me *Boccaccii* quidem auctoritatem ejusmodi in rebus magni esse faciendam, non minus fateri, quam *Rubeus* ( *e* ) cum illum dixit horum locorum fuisse maxime peritum, & frequentare consuevisse urbem *Ravennæ*: *Boccaccium* tamen quis dicere auderet, harum rerum fuisse *Dante* peritorem, qui *Ravennæ* domicilium constituit? *Dantem* autem, ut demonstrassem ( *f* ), *Montonum* recta & per se in mare influentem descripsisse. Quæ fieri igitur posset, ut *Boccaccii* ætate, qui annis duobus & quinquaginta post *Dantem* est mortuus, adhuc in *Padum* *Montonus* fluere? aut si in mare hic fluebat, qui inter *Padum*, & *Ronchum* est interjectus, quæ fluere in *Padum* tunc posset *Ronchus*? Cæterum etsi in producto *Boccaccii* loco, quod ad nomina attinet, quædam a librariis vitata sint, ut cum pro *Senones* scripserunt *hifefones*; non ipsos tamen, sed vetustos quibus ille utebatur, *Livii* codices culpandos esse, manifestum est, in quibus nisi pro *Æsim* *Athesim*, & pro *Ufente* *Ufente* legisset, non illa de *Pado*, neque illa de *Volscorum* *Ufente* scripsisset. Cum enim ait *Ufens* alter a superiori, superius quoque *Ufens* dixerit, necesse est. Unde nimirum discamus licet, non omnes igitur antiquos *Livii* codices ab *Ufente* flumine habuisse, ut illi ponunt qui miro eorum consensu freti, propterea in *Plinio* *Utis*, non *Vitis*, contendunt ( *g* ) esse legendum.

9. Sicuti autem vetustius id nomen *Vitis* apud *Fo-rolivienfes* quidem, & *Ravennates* olim intercidit, sic etiam alterum *Aqueductus* quacunque de causa, & quandocunque impositum fuerit, denique prorsus obsolevit; ut jam diu ex his, aut illis nemo sit qui alio quam recentiore vocabulo, *Ronchi* videlicet, non utatur. Itaque haud unam ob causam displicet *Clementinii* ( *b* ) locus, *Acquedotto, già chiamato Ronco, Fiume, e dagli Antichi Riso*. A quibus enim, quæso, *Risum* unquam dictum esse, invenisti? aut a quo nostratum superiore etiam sæculo *Aqueductum* potius, quam *Ronchum*? Quod si ita *Clementinius*; minus utique mirandum esset, quod ab externis *Clarissimis* *Viris* hoc tempore scribatur, „vocari nunc „*Fiume Acquedotto* „ nisi Auctorem laudarent *Maginum* ( *i* ), qui certe in ea *Tabula* qua ipsi nituntur, inscripta *Romagna*, huic ita flumini nomen adscripsit *Bedese*, o *Ronco già fiume acquedotto*. Sed de *Roncho*, ut nunc quidem, satis.

10. De *Sapi*, qui postremus est quinque amnium, circa *Ravennam* olim, ut *Rubeus* ( *k* ) scripsit, confluentium, hæc nuper tradiderunt iidem *Clarissimi*, quos modo indicabam, *Viri*, „*Sapis*, *Italiæ* flumen „prope urbem *Isaurum*: nomen illius nunc est *Sa-vio*, & quoniam hoc flumen *Cæsenam* transit, vocatur quoque *Rio di Cesena*. „ Sed nulla præter *Sarlinam*, & *Cæsenam* urbs est prope quam hic amnis fluat: neque ulla in *Italia* urbs quæ *Isaurum* appelletur. Quod si *Pisaurum* scribere voluerunt, cujus flumen, *Pisaurum* pariter nuncupatum, *Isaurum* dictum legimus apud *Lucanum* ( *l* ); nimis longo ab ea urbe intervallo, pluribusque interjectis fluviiis, hic *Sa-Morgagni Opusc.*

*pis* distat. Num fucum fecit vexatissimus ille ejus *Poetæ* versus ( *m* ).

*Crustumiumque rapax, & junctus Isapis Isauro?*  
Quo de versu cum meam alias sententiam quæsieris; hic ita aperiā, ut quamvis nonnulla alio attinentia videri possim interjicere; fere omnia tamen ad rei pleniorē explicationem faciant, pleraque autem ad *Sapim* spectent, de quo dicere institui. *Isapim* pro *Sapi* apud *Strabonem* ( *n* ) legi, negari non potest. Dubium tamen est, num ita ille scripserit, an potius *I* littera temere ab librariis præfixa sit, uti videtur *Casaubono* ( *o* ). *Cluverius* ( *p* ) certe dubitat, ut qui non modo in *Itineraria Tabula Sabim* legat, sed neminem præterea *Veterum* videat qui *Sapim* non scripserit. Sic enim *Plinius* ( *q* ), *Silius* ( *r* ), *Lucanus* ipse ( *s* ). Nam in proposito versu non omnes *Codices* habent *Isapis*, sed aliquot *Sapis*, ut duo certe qui ab *Hugone Grotio* ( *t* ) laudantur, propterea non ita ut vulgo, quod aliqui videntur credere, sed *juncto Sapis Isauro* hic legente, & auribus quidem minus ægre ferentibus, quam *Isapis Isauro*; minus, inquam; nam in lectione etiam *Grotii*, aut *Cluverii* ( *u* ) *junctus Sapis Isauro*, ingratus restat duarum ultimarum vocum concursus non secus atque in ea quæ mox proferetur, *Blondi*, *junctus Idaspis Isauro*. Itaque; ut me prorsus aperiā tibi; suspicatus sapius sum, describentium culpa concursum hunc natum esse, cum *Lucanus* fortasse scripsisset, ea tamen ratione, quam infra dicam, *Pisauro*. Hoc enim verum, & certum nomen est, non urbis modo, sed & fluminis, ut paulo ante indicabam, urbem illam præterfluentis, quod ex *Plinio*, *Vibio*, & *Siculo Flacco* liquet, ab *Ortelio* ( *x* ) laudatis, itemque ex *Aggeno*, quem addit *Cluverius* ( *y* ). Sed *Isaurum* quoque dici, apud unum, quod sciam, ex *Antiquis* est, *Vibium* ( *z* ), idque ex uno hoc *Lucani* loco: quem ne propterea ita scripsisse, contendas, tum adnotatio faciet *Francisci Hesselii* ( *a* ) admonentis, in membraneo optimo *Vibii* Codice, qui *Revii* fuerat, id ipsum deesse, tum animadversio insuper nostra, non alibi facile apud *Vibium* adeo interrumpi sententiam, ut ibi, si id additamentum Auctoris sit, non aliorum, a quibus hunc *Hesselius* censet ( *b* ) multis esse in locis interpolatum. Quod si tu mecum suspicaris, *Lucanum Pisauro* scripsisse, neque cum *Cluverio* ( *c* ), quem tamen aliqui sequantur, inducere in animum potes, metri causa dixisse *Isauro*; suspicaris quoque necesse est, alium quam *Sapis*, aut *Isapis*, aut *Idaspis*, proxime scripsisse vocem, ut puta & *juncta Aprusa Pisauro*. Exempli gratia hoc dico; non quod mihi exemplum hoc placeat ( non una enim de causa displicet ) sed ut veri similia tu excogites. Namque hæc eo dumtaxat pertinent, ut vel magis quam apud alios hætenus fuerit, dubiam tibi reddant propositi versus lectionem.

II. Veruntamen fac, certum esse, atque ita omnino, ut vulgo hic legitur, scripsisse *Lucanum*; qua tandem ratione explicabis, cur disjunctos adeo conjungat fluvios *Isaurum*, & *Isapim*? Neque enim hic circa *Pisaurum* est, nec circa *Ariminum*, quod *Ortelio* ( *d* ) excidit, propterea apud *Ferrarium* ( *e* ) notato; sed juxta *Cæsenam*: neque *Isaurus* haud longe a *Cæsena* est, ut scripsit *Boccaccius* ( *f* ); sed milia passuum circiter XXXV. quod ait *Porta* ( *g* ), vel potius aliquanto plura: ne XXXV. cum *Braschio* ( *h* ) dicamus; hæc flumina distant inter se, & interjecta habent alia plura, nempe ut nulla nisi celebriora, & a *Plinio* ( *i* ) memorata spectemus, *Rubiconem*, *Aprusam*, *Ariminum*, & ipsum, quod *Lucanus* in eodem versu recte disjungit, ut mox dicemus, *Crustumium*. Nec vero te satis mihi facere posse, existima, si *Lucanum* dicas in fluviiis nominandis qui in mare influunt sive hoc superum, sive inferum, quasi de industria, ut *Poetam* fere decet, ordinem quo natura dispositi sunt, neglexisse: *Virgilium* quoque, ut animadvertit summus alioquin ejus admirator

E

Ma-

( *b* ) II. n. 13. ( *c* ) Ibid. ( *d* ) IV. n. 6. ( *e* ) Hist. Rav. l. 1. ( *f* ) Epist. IV. n. 6. ( *g* ) Epist. II. n. 13.  
( *h* ) Raccolt. Hist. di Rimin. l. 5. ( *i* ) Italia. ( *k* ) Vid. Epist. III. n. 2. ( *l* ) Pharsal. l. 2. ( *m* ) Ibid. v. 406.  
( *n* ) De Situ Orb. l. 5. ( *o* ) apud Brasch. de vero Rubic. c. 2. ( *p* ) Ital. Ant. l. 1. c. 28.  
( *q* ) Nat. Hist. l. 3. c. 15. ( *r* ) De Bello Punico l. 8. ( *s* ) vers. cit. ( *t* ) Not. in Lucan. ( *u* ) c. 28. cit. §  
( *x* ) Thesaur. Geogr. ( *y* ) Ital. Ant. l. 2. c. 5. ( *z* ) De Fluminib. ( *a* ) ad hunc locum in sua *Vibii* Edit.  
( *b* ) Ibid. in Præfat. ( *c* ) loc. cit. ( *d* ) Thesaur. cit. & Synonym. Geogr. ( *e* ) Lexic. Geogr. ad *Isapis*.  
( *f* ) Tract. de Fluminib. ( *g* ) apud Clement. Raccol. cit. l. 1. ( *h* ) De vero Rubic. c. 11. n. 16. ( *i* ) Nat. Hist. l. 3. c. 15.



Macrobius ( *k* ), nullum in commemorandis regionibus ordinem servasse, sed locorum seriem saltibus lacerasse: quin illum pariter quem Vir Doctus excipit, Silium anxie istiusmodi observationis securum in iis ipsis fuisse versibus ( *l* ) qui e contrario indicantur quasi ex ordine flumina Umbrorum describentes; nisi forte cum ait, *Hos Æsis, Sapisque lavant*, & mox interjectum Metaurum nominat, ordinem servasse credendus est, aut cum ab his ad ea quæ in Tyberim influunt, transgressus, ad Rubiconem redit, & hinc revertitur ad Tyberim. Nam ut vera hæc esse, fatear, mirumque propterea non esse, si Lucanus quoque ab illis Italiae fluviiis qui sunt ad orientem solem, ad eos qui ad occidentem sunt, interpositos transiliendo, decurrerit, & mox ad eos quos diversa omnino parte prætermiserat, ad eos, inquam, quamvis non omnes, etiam haud ignobiles, resiliaverit; illud tamen adhuc mirabor, & abs te quæram, cur in tanto numero non alios quam Isapim, & Isaurum junctos esse, diserte scripserit: qua voce si quod Porta ( *m* ) credidit, nihil aliud, nisi etiam, pariter, similiter, necnon, significare voluisset, hoc est non secus unum quam alterum, ex Apennino oriri, & in Hadriaticum mare descendere; quærendum adhuc restaret, cur de his duobus potissimum id dixisset, quod commune est cæteris ad idem mare pertinentibus. Quæ omnia cum Blondus ( *n* ), opinor, videret, in hoc autem versu, ut diximus, *Idaspis* legeret; hoc esse censuit torrentis nomen qui e regione Montis Abbatis *Isauro* revera jungitur. Leander ( *o* ) vero sententiam eandem secutus est, nisi quod cum *Sapis* legeret in Lucano, eum autem torrentem qui contra Montem Abbatis *Isaurum* subit, *Albs* vocari audiret; huic quoque *Sapis*, non *Idaspis*, fuisse nomen, commentus est, cum melius fortasse, quando aliquid comminisci volebat, *Salbis* fuisse, aut *Salpis* dicere potuisset, idque a librariis in notius sibi vocabulum *Sapis* postea mutatum. Verum utriusque, & Leandri in primis opinionem vel nuper notatam fuisse, video ab aliis quidem propterea quod *Sapis*, qui Cæsenam alluit, non influit in *Isaurum*, quasi vero non de alio *Sapi* qui in eum influeret, Leander diceret; ab aliis vero quia *flumen Macerata quod est Ufens* ( *Chiento nunc* ) *Sapim* *Lucani* interpretetur, quod non intrat *Isaurum*, quasi ea quam ibi, Leander nominat, *Macerata* urbs esset ad *Chientum* sita; non oppidum, *Macerata* quidem & ipsum dictum, sed, ut diserte Leander loquitur, *Mactrata montis Feretrani*. Ipsi vero fluvium qui in *Isaurum* influat, quærendum esse, admonentes, *Annis est*, inquit, *oriens ex monte, Urbinum prope, boream versus excurrans, & Isaurum ingrediens, ut in tabulis præsertim Magini 46. Ducat. Urbini. Anonymus est: cur non is antiquitus Sapis dictus, vel Isapis?* Quid vero, si hic idem confluxus indicaretur, quem tanto antea Blondus, atque adeo reprehensus ab ipsis Leander proposuerant? Eundem autem esse, invenies, si in illa ipsa Tabula minorem fluviolum secutus qui prope Urbinum Hortense natus, inde Boream versus descendit, animadvertas, quo loco in majus denique influat, & multo altius ortum flumen, *Isauri* videlicet nomine infra designatum. Confluxus igitur locum eundem esse quem Blondus, & Leander indicaverant, esse, perspicies, nempe contra Montem Abbatis, ut nominatim docet non ea modo, sed & altera Magini Tabula, quæ inscribitur *Picenum*. Dixi autem Urbinum Hortense, ut latine id quod *Urbino* vulgo nunc vocant, significarem; alterum enim fuit *Metaurense*, Hortensi superius ultra *Metaurum*: quod cave, ne tibi, ut Cellario ( *p* ), aliisque, esse videatur *Castellum Durante*. Hoc enim *Clementinius* ( *q* ) docet, anno demum 1284. ædificari cœptum esse a Gulielmo Durante, quem Jurisconsulti *Speculatorem* appellant, ut eo traduceret incolas *Castelli Riparum*, quod ante biennium ab hostibus Pontificis Maximi dirutum fuerat.

12. Nolim tamen, quæ pro Leandro dixi, immerito accusato, in eam partem accipias, quasi ejus, aut Blondi sententiam probarem. Cur enim Lucanus, qui nobiles Amnes, ut diximus, prætermisisset, de torrente ejusmodi, vel fluviolo sollicitus esset? aut unum hunc *Isauro* immissum indicaret, qui fluvios in majores alios influentes in omni ista ipsorum enumeratione nusquam memorasset? neque enim veri simile est, cum *Rutubam* posuit, aliam quam *Ligusticam*, a Plinio ( *r* ) quoque commemoratam, quæ per se in mare delabitur, noluisse, quando altera quæ in Tyberim defluere credita est, uno, quod sciam, inter Veteres auctore nititur. Vibio, isque ubi hanc in Tyberim fluere, si vulgatis libris credimus, scripsit, ibi a Simlero in *Tyrrhenum* legitur, quod ex Hesselio ( *s* ) didici. Credas fortasse, Lucani Interpretes *Sulpicium Verulanum*, & *Omnibonum Vicentinum* aliquod lumen ad propositum versum recte explicandum attulisse. Ego vero neutrum consului, cum certior factus essem, *Sapim* primo fluvium credi *Mitionem* ab *Auximo* defluentem, alteri autem *Cæsenæ* flumen: eidemque *Crustumium*, unde is versus incipit, *fluvium* dici, qui præterlabitur *Ariminum*. Hic vero non *Crustumium* est, sed *Ariminus*. *Crustumium* autem non est quidem inter *Anconam*, & *Pisaurum*, sicuti quodam loco Cluverio ( *t* ) excidit; sed inter *Pisaurum*, & *Ariminum*, a quorum illo secundum *Magini Tabulam* ( *m* ) millia passuum abest circiter novem, ab hoc duodecim, & quemadmodum utrique huic urbi suum est flumen, singularum nomen retinens apud Latinos, sic *Crustumium* quoque dicitur idem cum appposito olim oppido habuisse nomen, nec latine solum, verum etiam italice, ut *Concha* utrumque appellaretur. Sed Cluverius ( *x* ) etsi *Crustumium* oppidum noverat a Vibio, & ab *Sulpicio*, de quo modo dictum est, diserte ponit, veretur tamen, ne ista *Pisauri*, & *Arimini* similitudine decepti, ex suspitione id potius, quam ex vero, scripserint, quum nulla, inquit, hujus rei apud historicos, geographos, itinerarios, aliosve auctores ne levissima quidem extet suspicio. Veteres autem, opinor, intelligit. Nam *Boccaccium* ( *y* ); quanquam hic sæpius describere *Vibium* solet; *Blondumque* ( *z* ), & *Leandrum* ( *a* ) illud agnovisse oppidum, non poterat ignorare: imo utrumque horum tradidisse, *absorptum mari oppidum Concham eminentes aquis muros, turresque per æquoris tranquillitatem ostendere*: quæ Blondus cum scriberet, in Monte, ut mox ait, *Scutolo* degebat, ne decimo quidem lapide illinc distito; ut vere, an secus hæc dicerentur, per facile posset sciscitando cognoscere. Omitto *Franciscum Berlinghierium*, qui in *Geographia* sua ( *b* ) etruscis versibus descripta, & anno, sicut audio, edita 1470. hæc habet

*Hor vedi Concha rio, che si dilegua,  
Il quale hà Concha sommersa nell'onde.*

Omitto alios multo his recentiores, & nominatim *Maginum* ( *c* ), qui *Concham* in mari proximo extantem paululum appinxit his adscriptis verbis *Conca Città profundata*. Hoc autem is minus mirabitur qui aliis urbibus idem accidisse, non ignoret, neque *Italis* solum, sed & *exteris*, sicuti vel ex hoc apparet *Ovidii* loco ( *d* )

*Si quaris Helicen, & Buran Achæidas urbes,  
Invenies sub aquis: & adhuc ostendere nautæ  
Inclinata solent cum mœnibus oppida mersis.*

Sed si Cluverio, ut diximus, non satis antiquus auctor videbatur Blondus, cui extitisse id oppidum, crederet; at erat certe longe vetustior *Blondo Anastasius Bibliothecarius* ( *e* ), qui *Ravennam*, *Ariminum*, *Pisaurum*, *Concam*, *Fanum* commemorat in optimis quidem Codicibus ( *f* ): quanquam & in iis qui habent ( *g* ) *Pisaurum*, *Concassano*, aut ( *h* ) *Pensaurum*, *Confanum*, aut ejusmodi aliud, quid legendum sit, ex prioribus obscurum esse non potest. Quæ autem ratione, & causa id oppidum, sive prisca, sive, ut ex

Plinii

( *k* ) Saturnal. l. 5. c. 15. ( *l* ) De Bello Punico l. 8. ( *m* ) loc. cit. ( *n* ) Ital. Illustr. Reg. 5.  
( *o* ) Descript. di tutta Italia Reg. 13. ( *p* ) Notitia Orbis Antiq. l. 2. c. 9. n. 233. ( *q* ) Raccolt. Ist. cit. l. 3.  
( *r* ) Nat. Hist. l. 3. c. 5. ( *s* ) in cit. Vibii Edit. Adnot. ad hunc locum ( *t* ) Ital. Ant. l. 1. c. 28.  
( *u* ) Romagna. ( *x* ) Ibid. l. 2. c. 5. ( *y* ) Tract. de Flumin. ( *z* ) Ital. Illustr. Reg. 6.  
( *a* ) Descript. di tutta Ital. Reg. 14. ( *b* ) l. 3. c. 4. ( *c* ) Tav. cit. Romagna. ( *d* ) Metamorph. l. 15.  
( *e* ) Vit. Pontif. in Stephano III. ( *f* ) Reg. Maz. & Thu. Ambrosian. 2. & 3. ( *g* ) Ambrosian. 4. ( *h* ) Ambrosian. 1.



Plinii silentio arguitur, sequiore conditum ætate, ita aquis dirutum, & opertum sit, nulla ut ejus vestigia nunc maneant, incertum est. Mare enim, ut ad Ravennam patet, superioribus saltem sæculis ab littore potius recessisse, verisimile est, quam hoc, oppidumque occupasse; ut reliquum sit, vel terræ magno aliquo motu littus subsedisse, vel etiam incurrente fluminis vi oppidum sensim dejectum esse, atque absumptum. Crustumium enim non sine causa ab Lucano *rapax* dictum est, quippe ob multiplices, & sæpe mutatos alveos latum, & transeuntibus periculosum, quandocunque in subitum, & rapidissimum cursum imbris incitatur, in vicinos, undè oritur, montes se effundentibus. Nec longius inde abest præaltus ille ampliusque mons, a Carpegno oppido, ut Blondus (i) scribit, nominatus, prope quod, sed diversa ex parte situm idem memorat *Monasterium Sextini*, ubi quæ dicit *multa extare vetustatis monumenta*, scias velim, non omnia periisse, cum apud me videre possis tredecim latinarum Inscriptionum exempla, non ita pridem ex marmoribus ejus oppiduli singulari diligentia descripta. Quæ ab Docto, & elegantis ingenii Medico Camillo Brunorio eo libentius accepi, quod cum Inscriptionum illarum quædam sub hujus initium sæculi fuerint effossæ; non omnes adhuc esse editas, puto. Cæterum Carpegnum oppidum id fuit, unde Guido ille dictus est, quem nobilem, & liberalem Virum non, Areostus quidem in suo XIV. de Pur., gatorio Cantu, ut Externi quidam Viri Clarissimi scribunt; sed Dantes, Poematis ejus auctor, laudavit. Jam vero illuc revertamur.

13. Nam de flumine Crustumio, inquires, satis explicasti Lucani versum; de Sapi autem, se cum Isaurum conjungente, necdum quid sentias, aperuisti. Ego vero cum ostenderim, cur nulla mihi ejus conjunctionis placere possit expositio, eo redeam necesse est, ut in versu quem satis incertæ lectionis supra (k) demonstravi, non id scripsisse Lucanum, credam; aut si forte scripsit, idem hic illi accidisse, ajam, quod alio in fluvio, Timavo videlicet, accidisse, nunc inter doctissimos quosque constat. Et sane si quæ de Timavo hinc ab Historicis, & Geographis, inde vero a Poetis scriptum habemus, quorum pleraque omnia olim collegerat Leander (l), attente perpendamus; facile intelligemus, non ut Virgilium (m), sic & Lucanum (n) explicari, & defendi posse, ut qui nimis diserte cum Aponi fontibus Timavum conjunxit, C. mill. pass. intervallo disjunctum; non secus ac si proximus fuisset Medoacus: quibus in rebus alios post se tum Poetas, tum Geographos in errorem induxit, hos autem vel postquam admonuerat Boccaccius (o), id falsum esse. Quæ animadversio cautiores facere debebat eos præsertim qui hinc, Poetarum geographiam haud semper esse valde exactam, non ignorant, ne propter Lucanum facile Isapim, & Isaurum conjungerent, sive Sapim tum prope Pisaurum, tum juxta Cæsenam fluere, existimarent.

14. Nolim hic quidem expectes, ut de Sapis origine, & superiore alveo, unde Sapinæ Tribui nomen est ortum, aut de lateritio ponte, ipsi olim apud Cæsenam imposito, sermonem habeam; hæc enim in nostris dumtaxat fluviis spectavimus. De Sapi igitur illud reliquum est, ut quo ipse olim, & alii vicini amnes influerent, videamus. Sapim autem illuc olim influxisse, ut amplissimum illum, & celeberrimum faceret Classensem portum, a Blondo nostro traditum est. Cum enim hunc perangustum, & nullum propemodum sua ætate factum videret; hujus rei causam esse, non dubitabat, Sapis fluvii, qui illum facere consuevisset, aversionem, quippe qui decem ab eo portu passuum millia aliud in mare ostium quod Gervasium dicitur, multis ante sæculis sibi effecisset, quemadmodum scripsit in Historiis (p). In Italia autem Illustrata (q) sæculorum eorum numerum definivit, Morgagni Opusc.

cum Sapis, inquit, ad annum nunc plus minus sexcentiesimum ipsam illabebatur Candiani vallem, efficiebatque portum in primis Italiae celeberrimum. Quod volumen cum circa medium sæculum XV. conscripserit, ut alias (r) demonstravimus; apparet, annum indicasse circiter 850. sive medium sæculum IX. Quod tempus nimis amplificaverit, an potius contraxerit Blondus, videndum est.

15. Rideas procul dubio, si scribam, in aliquem me incidisse, qui de Sapis aversione a Candiani valle acciperet hunc Rubei (s) locum. Anno 1504. Aloysius Diedus Patricius Venetus deducto Sapi, qua Cerviensem, Ravennatemque agrum interfuit, molisque frumentariis prope rus Canutium, pari civitatum, atque accolarum commodo, suo sumptu extructis, adem etiam pro tempore excitavit. Manifestum est, de Sapis aqua in canale deducta, qua molæ frumentariæ agerentur, hic verba fieri. Sapim enim ipsum inter Cerviensem, Ravennatemque agrum diu antea fluxisse, præter Blondi, aliorumque testimonium, vel Rubeus (t) indicare poterat, cum A. 1116. donatos memoravit agros illos omnes --, ubi D. Gervasii Hospitium edificatum erat, omniaque illa quæ cum essent juris Ecclesiæ Cerviensis -- a vado Buccamezzo ad portum fluminis Sapis pertinebant, termino horum prædiorum -- usque ad medium Sapis adscripto. Sed hujus cursum a Candiani valle fuisse ad mare jam aversum vel prius quam Blondus statuerit, ex Agnello probare me posse, credo. Hic enim cum in Vita Felicis (u) qui anno obiit 716. hæc jussa ponat, Popilienses viri adhuc Sapis portu --. Coloni decumani speculantur juxta portus Candiani; profecto indicat, jam tunc alium Candiani, alium Sapis fuisse portum. Quod si ob hujus fluminis aversionem jam tum portus Classensis tantum acceperat detrimenti; imo vero si circa medium sæculum VI. vel potius ante ejus initium eo redactus erat, ut qui aliquando portus fuerat, spatiosissimos hortos ostenderet arboribus plenos, verum de quibus, ut Fabius ait, non penderent vela, sed poma; credendum videtur, jam tunc inde Sapim aversum fuisse, cum hæc scripta sunt verba; scripta autem sunt eo quo indicabam, tempore non tam ab Jornande (x), quam a Cassiodoro, cujus Chronica de Gothis sic ille in compendium redigebat. At si hæc quæ descripsimus, non a Cassiodoro fuisse scripta, sed ab Jornande interjecta, suspicaris propterea quod apud Procopium (y) legeris, Belisarium classem frumento, aliisque rebus ad victum commodis onustam celeriter navigare jussisse ad portum Classis; ita autem Romanos vocare Ravennæ suburbia, ubi portus est; animadvertas velim, inter annum 536. in quem is cadit Procopii locus, & annum 552. quo scripsisse Jornandem, censent, non satis quidem intervalli esse, ut credi possit, tantam illam rerum mutationem accidisse: itaque ad ejusmodi locos qui ad annos etiam spectent non paulo posteriores, satius fortasse dici posse, tantam etiam partem amplissimi ejus portus superfuisse, ut classi mediocri excipiendæ par esset; etsi pars reliqua multo major post aversum alio Sapis cursum in hortos mutata esset. Ne vero hæc a me temere dicta putes; Itinerarium, quæso, inspicere Hierosolymitanum, sive iter Burdegala Hierosolymam A. 333. factum describens, ut ex Cl. Ceillierio memoratur in Actis Eruditorum Lipsiensibus (z), sive quod scriptum videtur circa postremos Imperii M. Constantini annos, quæ sententia est Cl. Wesselingii (a), satis ad priorem accedens; Magnus enim Constantinus anno obiit 337; in eo certe Itinerario hæc invenies. Ravenna, Sapis XI. Ad Novas XI. Rubico fl. III. Quæ si conferas cum recentiore Cluverii (b) per idem littus, Ravenna, Classe III. Ponte di Savio VIII. Santa Maria del Pino III. Cervia II. Porto Cesenatico V. Fiumicino III; reperies nimirum, quinque ante quam Blondus posuerit, sæculis ibi Sapim fuisse ubi nunc videmus, & quod consequitur jam tum a

E 2

Classis

(i) Ital. Illustr. Reg. 6. (k) n. 10. (l) Descriz. cit. Reg. 18. (m) Æneid. l. 1. v. 244.  
 (n) Pharsal. l. 7. v. 192. & seqq. (o) Tract. de Flumin. (p) Dec. 1. l. 4. (q) Reg. 6.  
 (r) Epist. 1. n. 7. (s) Hist. Rav. l. 8. (t) Ibid. l. 5. (u) Lib. Pontif. P. 2. c. 3.  
 (x) Hist. de Reb. Getic. c. 29. (y) De Bello Goth. l. 2. c. 29. (z) Supplem. Nov. Tom. 2. Sect. 5.  
 (a) in Dissert. illi Itinerario præfixa. (b) Ital. Antiq. l. 1. c. 28.



Classis portu ad mare inter Classem, & Cerviam, seu locum mavis, ubi Cervia postea condita est, cursum avertisse.

16. Eo rem adduxisse videor, ut non modo fatearis, contractum nimis a Blondo fuisse tempus, ex quo Sapis deserit in Candiani vallem influere, Classensem portum facturum; verum etiam, ut fortasse suspiceris, num unquam influxerit, & ad portum illum pertinuerit, præsertim cum ante Blondum id nemo, quod sciamus, docuerit, distetque adeo ab illo portu ejus ostium fluvii, tantumque absit, ut ejus portus gratia illuc is fuerit deducendus, ut avertendus potius inde fuerit, si natura eo descendisset, quippe qui, ut ejusmodi amnes, & proximi certe quique solent, arenæ terræque tantum invehere potuisset, ut portum denique totum oppleret. Nec tamen hæc sunt hæ rationes, ut suspicioni isti plurimum credam tribuendum. Namque ut ab novissima incipiamus; innumera sunt in rebus ejusmodi, quæ utilia antea visa, ob idque effecta, experientia demum inutilia, atque adeo noxia deprehenduntur. Itaque hujus etiam fluminis in illum portum deductio ex eo censu esse potuit, ut noxa, temporis decursu dumtaxat agnita, posteros permoverit, ut inde eum amnem averterent, quo decepta spes Majorum induxerat, & quod consequitur, non aversio, ut creditur, sed inductio ejusdem illum portum labefactarit. Quod vero nunc Sapis ostium ab loco ubi is portus fuerat, intervallo tanto distet, minime licet inficiari; sed per breve intervallum est, nec passuum 1300. si Coronellii inspicias Tabulam (c) qua Ravennatem agrum proponit, quo intervallo Sapis alveus a Masulli, ut nunc appellant, Valle determinatur, inquam influeret, si eadem linea pergeret, nec mare versus se se inflecteret; ejus autem Vallis extremum alterum a Templo S. Apollinaris in Classe 800. passibus non di-

stat; ut pronum sit intelligere, Sapis olim in stagna, Ravennæ circumjecta, facile influere, & per ea ad Classensem portum deduci potuisse. Postremo quod ad Veterum attinet testimonia, nulla quidem produci video; sed quondam tamen prisca non defuisse monumenta, arbitror, unde id didicerit Blondus, & quibus permoti sint, ut cum eo facerent, tot Clari Viri, in quibus Volaterranus (d), & Leander (e) fuere, & ex Ravennatibus Thomajus (f), & hoc major Spretus (g), cujus verba ita Blondo ad stipulatum ostendunt, ut insuper docuerit, non Sapis dumtaxat fluvium, sed & alios portum Classensem fecisse, ab hoc autem aversos pessumdedit, cum aliud in mare ostium -- sibi Sapis fluvius effecit, alii vero ad urbem declinantes, Adriaticum mare aliud per ostium influere cœperunt. Quod ego de Roncho potissimum dictum accipio, ut quem & propiorem Classi esse scimus, & si in laudata Coronellii Tabula spectemus, defluxurum fuisse, cernimus, juxta memoratum S. Apollinaris Templum, si eodem, quo superius, cursu mare versus perrexisset, neque inflexus per alveum, ut supra (b) dictum est, manu paratum, Ravennam deductus esset. Itaque si olim e re esse, crediderunt, ut Sapis in Classensem portum inducerent; e re quoque credere debuerunt, ut & Ronchum in eundem immitterent: quem propterea, quippe per oppidum Classis; aut juxta illud traditum, Ravenna pedibus adiri potuisse, conjicimus. Neque ab hac conjectura abhoruisse videtur Ortelius (i), cum ei flumini quod Roncho responder, ad Cæsaream, hoc est inter Classem, & Ravennam, impositum Candidum pontem indicavit. Quo de Ponte, quem alii Candiani fluminis fuisse, ajunt, simulque de cæteris quæ in illo eodem littore olim spectabantur, proximis Litteris videbimus. Vale.

## EPISTOLA ÆMILIANA VI.

DE quinque Fluminibus quæ circa Ravennam olim confluebant, Epistolis tribus superioribus tantum scripsimus, quantum tibi satis fore, existimavimus. Stagna autem, & æstuaria, in quæ se illa primis temporibus effundebant, & in quibus, interque ipsas marinas undas ea fuerat urbs condita, quibus limitibus continerentur ab ea quidem plaga quæ nunc Faventiam, Forum Livii, & Cæsaream spectaret, non est facile constituere; quanquam tanto spatio, quantum expeditus viator uno die conficiat, maris æstu affluente, se extendisse tum etiam cum Procopius (a) scripsit; ni forte mendum aliquod subest, videantur. A plaga autem opposita, quæ ad mare videlicet conversa erat, etsi veri simile est, non multo aliter se rem habuisse, quam in iis littoribus quæ inter Veneta æstuaria, & mare interjecta cernuntur; pauca tamen pro certo affirmari possunt, eaque ferme ad Cæsaream tempora, & quæ deinceps consecuta sunt, pertinentia. Sic proxima ostensum Epistola est (b), Julii Cæsaris ætate viam fuisse per quam curru vectus Ravenna discederet ad R. P. opprimendam. Quæ quoniam via ad Rubiconem ducebat; proclive est intelligere, per littus fuisse ductam, ubi Classis postea, & inter hanc, & Ravennam Cæsarea condita sunt. De eo igitur littore quod inter mare, & eam stagni partem interjectum erat, quæ Sapi flumini erat propior, primum ut se haberet cum duobus illis oppidis, & celeberrimo portu ornatum est, deinde ut postea, & nunc se habeat, sermonem instituemus; ut initio inde sumpto, deinceps ad Ravennam

ipsam, & ad illa quæ huic ab opposita plaga adjacent, aut adjacent, transeamus.

2. Et primum de Classensi portu, ut qui non modo ante duo illa oppida factus est, sed causa fuit cur ipsa postea conderentur, verba facturum, principio illud pono quod ex Jornande (c) habemus, *Eridanum ab Augusto Imperatore altissima*, sive, ut in aliis est codicibus, *latissima fossa demissum, qua septima sui alvei parte mediam influeret Ravennæ civitatem, ad ostia sua amenissimum portum præbuisse, classem CCXL.* sive, ut alii habent codices, *CCL. navium*, Dione referente *tutissima dudum creditum recipere statione*. Hæc autem cur Augustus, jam rerum potitus, fecerit, licet ex Suetonio (d) intelligere. *Classem Miseni, & alteram Ravennæ*, inquit, *ad tutelam superi & inferi maris, collocavit*. Nam etsi Cluverio (e) concederemus, quæ ipse ex M. Tullio, Vegetio, & Tacito produxit, eam vim habere, ut adversus Suetonium ostenderent, non id primum ab Augusto fuisse institutum, ut classis in statione esset apud Ravennam; etsi ipsi cum Rubeo (f) ex Appiano (g) addamus, Augustum, cum adhuc in eo esset, ut Sexto Pompejo obsisteret a scedere discedenti, *naves longas ex Ravennis accersivisse*; non inde tamen sequeretur, aut hinc sequitur, Ravennatum quoque veterem portum eum fuisse, ut posset tot simul, quot diximus navibus, quandocunque opus esset, aut si non tot, multis saltem, æque commodam, ac tutam stationem præbere. Et Lucas quidem Holstenius (h) ubi Horatius (i) scripsit

De-

(c) Corso Geogr. Univ. (d) Comment. Urb. l. 4. (e) Descrip. cit. Reg. 14. (f) Hist. di Rav. P. 1. c. 3.  
(g) De Urb. Rav. Amplit. l. 1. (h) n. 8. (i) Theatr. Orb. Terr. in Tab. alias inscripta Italia Gallica.  
(a) De Bello Goth. l. 1. c. 1. (b) n. 5. (c) Hist. de Reb. Ger. c. 29. (d) in August. c. 49.  
(e) Ital. Ant. l. 1. c. 28. (f) Hist. Rav. l. 1. (g) De Bello Civil. l. 5. (h) Annot. in Ital. Ant. Cluver.  
(i) Art. Poet.



*Debemur morti nos nostraque, sive receptus*

*Terra Neptunus classes aquilonibus arcet,*

cenfuit, sine dubio intellexisse portum Ravennatum ab Augusto extructum ad tutelam Classis Superi maris, cum vetus Scholiastes Ostiensis portum intellexisset, a Cluverio (k), ab ipsoque Holstenio redargutus, ab illo quidem propterea quod Ostiensis portus ab aliis post Augustum Imperatoribus extructus fuit; ab Holstenio autem quod non aquilonibus, sed austro potius obiectus est, Ravennas vero directe oppositus est septentrioni. Verum, ut Holstenio tamen respondere Scholiastes posset, aquilones Poetam pro quocunque vento dixisse; ita scire ex te aveo, an se pariter tueri iis liceat qui de Classensi portu loquentes, nimis, quasi Plinio auctore, id ædificium extollunt quod ad ejusdem ostia extructum fuerat ad salutem non eorum qui in portu erant, sed illorum qui ipsum petebant.

3. Scilicet ex quo Blondo (l) excidit, nimis, ut opinor, fidenti memoriæ suæ, scripsisse Plinium, in hujus portus ostiis turrim fuisse phaream omnium maximam, quas Romanum ubique habuit Imperium, idque in Historiis quoque (m) iteravit; hoc ipsum ex Plinii auctoritate Desiderius Spretus (n), Bernardus Justinianus (o), Thomas Thomajus (p), Hieronymus Rubeus (q), alique confirmarunt; ut nostro etiam tempore non defuerint qui affirmarent, superasse ergo hanc turrim Pharum Alexandria, cui locus fuit inter septem mirabilia Orbis terrarum. Nunc tu si de Pharo hoc Ravennate quidpiam in Plinio esse, inveneris præter hæc (r) Usus ejus, id est Phariæ turris, nocturno navium cursui ignes ostendere ad prænuncianda vada, portusque introitum: sicut jam tales compluribus locis flavant (an flagrant) ut Puteolis, ac Ravennæ; fac sciam. Sed Rubeus cum denique in Historiarum suarum Indice (s) hæc scripsit; Pharos ad Candiani focem quomodo esset extructa, cognosci ex Herodiano potest: illudque addidit, cum sacra turris D. Mariæ in portu Ravennati, ea fere adificata ratione videatur, quam describit Herodianus, facile adducor, ut conjiciam, Pharon esse potuisse; tunc sane videtur oblitus, se iisdem in Historiis (t) Plinium de Pharea turri ad ejusdem portus ostia testem laudasse, tanta videlicet ut majorem ullam Imperium Romanum non haberet. Quid enim turris ejus Templi ad illam Alexandria, cujus magnitudo ab Luciani Scholiaste (u) cum Ægypti pyramidibus comparatur, eaque fuisse dicitur, ut cum incredibili esset altitudine, inferioris tamen partis latitudinem haberet, quæ dimidium altitudinis æquaret? Videsis hanc sacram turrim a Coronellio (x) delineatam, qui & ipse; ut recentiores alios omittam; ad antiquissimum Pharon refert ab Romanis ad portus Candiani, ostia extructum, sicut Herodianus describit, intelliges sane ubi ejus magnitudinem turris ex appiecto Templo æstimaveris, haud esse dignam, non dico quæ cum Alexandrina illa conferatur, sed quæ ad celeberrimum Classensem portum attinuisse existimetur. Certe ne illius quidem proportionem dimensionum ostendit, quæ proportio modo commemorata est. At enim ad Pharorum formam accedit, ab Herodiano (y) descriptam, qualem in plerisque nummis conspiciamus ad Cæsarum consecrationem attinentibus, ut imo suggesto ampliori alia deinceps, atque alia imponantur eo angustiora semper, quo superiora. Accedat sane; quanquam ex duobus, haud amplius, suggestis id satis æstimari non potest; & Pharos quoque, si vis, fuerit. Sed num Classensis? an ejus potius ad quem Templum illud extructum est, portus, unde ipsum videlicet cum adjuncto Cænobio Portuensis nomen accepit? Utrumque autem, nimirum & Cænobium, & Templum circa initium sæculi XII. ædificatum esse in portu Ravennati, ex Rubeo (z) constat, qui Petri conditoris obitum ponit A. 1119,

hunc a S. Petro Damiani R. E. Cardinali distinguens contra, ac fecerat Thomajus (a), Dantem (b), sed non omnino, securus: cujus Poetæ interpretes Landinus, & Vellutellius obliti videntur, non semel peccatoris cognomen virtutis causa sibi sanctissimos Viros sumplisse. Num idem quod Thomajus, voluisset antea Spretus (c), cum Templum Mariæ in portu scripsit Petrum quendam peccatorem Romanæ Ecclesiæ Cardinalem erexisse, an quod postea Hieronymus Fabbri (d) qui Petrum de Honestis conditorem hujus Templi posuit, a Petrarcha (quod ipse ait, ego in iis quæ hic laudat, de Vita Solitaria Scriptis invenire necdum potui) etiam celebrati, denique an minori ibi extructa ædicula Andreas Septemcastellius Sancto illi Cardinali, quod Thomajus scribit, præverit, an cum Petro de Honestis, quod ajunt alii, se peccatorem nominante, majorem Ædem inchoaverit, non hic mihi necesse est quærere, cum de tempore quod indicavi, nemo repugnet, quod sciam; Thomajus autem aperte conveniat. Quo sane tempore Classensem portum eo demum redactum fuisse, ut portus nomine posito, minime ipse intelligeretur, cum ex iis conjici potest quæ Litteris superioribus (e) scripta sunt, tum ex iis magis poterit quæ his ipsis (f) scribentur.

4. Huc illud accedit, alium hujus portus qui Templo de quo dicebamus, nomen dedit (g), alium fuisse Classensis locum. Itaque Blondus (h), & Justinianus (i) Phari Classensis nulla fundamenta, nullas reliquias extare, sed cum omnibus vestigiis interisse, scripserunt, cum eo videlicet loco quærerent, ubi eum fuisse oportebat. Quo loco tamen Desiderius Spretus (k) ejus Phari fundamenta nuper reperta memoravit, quemadmodum & molem quandam etiam tum conspici, affirmabat miræ magnitudinis, ac structura, quæ, ut apparebat, pro portu olim aquarum fluctibus obiecta fuerat. Quæ etsi, ut optandum fuerat, minime docuit, quo intervallo a S. Apollinaris Templo, & quam ad plagam distarent; tamen fuisse in classensi loco, significavit, confirmavitque cum de musivo antiquo opere quod Ravennæ in S. Martini in cælo aureo nunc etiam visitur, sermonem habens, in eo, simul cum Classis oppido, & portu, maximam illam turrim phaream evidentissime ostendi, non dubitavit (l). Quam etsi ego non facile, ad indicatam autem ab Herodiano formam, ibi nullam prorsus agnosco; tamen haud ita procul a Classensi oppido ab Spreto fuisse intellectum, manifestum est.

5. Nunc quando in musivi hujus operis mentionem incidimus, non a Spreto dumtaxat, sed a Blondo quoque (m) tantopere laudati, ut elegantissimum omnium veterum, aut novorum in Italia esse, dicat; quale haud ita pridem spectaverim, non reticebo, cum ad Classis portum, de quo loquor, & oppidum, de quo sum mox locuturus, attinere existimetur; ut quorum nulla vestigia nunc extant, imagines saltem eorum, tunc cum utrumque extabat, descriptas, non neglexisse videamur. Igitur id quod novissime dixi, Templum, quod nunc S. Apollinaris in urbe vocant, ingressis, & ad lævam suspicientibus occurrit statim illud quod dicebam, musivum opus, sane pervetus, sed coloribus, aureo præsertim, satis vividis. Portam a sinistris altam exprimit, parallelogrammi forma, quasi auro clausam. Attigua ei portæ a dextris sunt mœnia oppidi, ut videtur, cujusdam, & ad horum dexteram est mare, non valde patens in latitudinem, quippe quod inter illa mœnia, & columnam, vel potius pilam quasi quandam apparet, qua picturæ latus dexterum absolvitur. Eam pilam, etsi ab longi temporis injuriis nonnihil detrimenti retulit, ad lineam tamen vides ascendere, nec quodquam ostendere indicium Phari, pro quo, ut opinor a Spreto accepta est. Caterum in mari illo tres oblongæ naves in transversum positæ spectantur; dromones, & triremes appellat Blon-

(k) Ital. Ant. l. 3. c. 3. (l) Ital. Ill. Reg. 6. (m) Dec. 1. l. 4. (n) De Urb. Rav. Amplit. l. 1.  
(o) De orig. Urb. Venet. l. 5. (p) Hist. di Raven. p. 1. c. 3. (q) Hist. cit. l. 1.  
(r) Nat. Histor. l. 36. c. 12. (s) ad vocem Pharos. (t) l. cit. (u) M. S. cit. ab Jo. Vossio ad Pomp. Mel.  
(x) Ravenna Ant. c. Mod. (y) Hist. l. 4. (z) Hist. cit. Rav. l. 5. (a) Hist. cit. p. 1. c. 4.  
(b) Paradiso C. 21. (c) l. 1. cit. (d) Sagre Memorie di Ravenna. (e) n. 15. (f) n. 12.  
(g) Vid. Epist. VII. n. 12. (h) (i) Hist. loc. cit. (k) l. 1. cit. (l) l. cit.  
(m) Hist. l. 4. cit.



Blondus quas in portu pictura indicet, qua & Classense oppidum quale fuerit indicetur, idque tantis, ut idem ait, ædificiis ornatum, ut stupendum sit, nulla ipsius fundamenta, nullam partem præter ædem S. Apollinaris, quæ adhuc extat, insignis, alicubi nunc inveniri: quanquam hanc S. Apollinaris Ædem, de qua, ceu de Classis parte, Leander (n), Cluverius (o), Baudrandus (p), alique passim ad eundem modum loquuntur, extra muros Classis fuisse, ex Rubeo, qui & corpus S. Apollinaris docuit (q) extra eosdem muros sepultum esse, intelligi potest, ut contra, S. Severi corpus conditum esse, ejusque Templum extructum intra Classis muros, vel ex iis patet, quæ in alia Epistola (r) a nobis producta sunt. Quod S. Severi Templum cum distare videamus (s) a Templo S. Apollinaris perticis Ravennatibus circiter trecentis; hinc licet intelligere simul ubicerta pars Classis esset, simul quam ad plagam pars reliqua tenderetur ejusdem oppidi, scilicet meridiem versus, cum ejus spatii quod ad oppositam plagam inter Ædem S. Severi, & Ravennam interest, videlicet quingentarum perticarum, magna pars relinquenda Cæsareæ sit, quam inter Classem, & Ravennam fuisse, constat. Sed de Cæsarea dicemus postea.

6. Jam vero ut cætera quæ ad oppidum Classis atinent, absolvamus, porta, & mœnibus instructum fuisse, cum musicum illud opus ostendit, tum causa propter quam extructum fuit, confirmat. *Castra enim hiberna Classiariorum*, ut Pighius (t) loquitur, paranda fuerant in perpetuum tempus; itaque & tutelæ, & disciplinæ causa muro cingenda. Nec dubito, quin Navalîa etiam fuerint muro comprehensa, eaque, ut pro tanta classe, non modica, quo videlicet & infirmæ naves subduci, ac refici, & novæ construi, & ubi armamenta parari, & servari possent. Ad naves autem construendas opportuna adeo erat Pineti vicinitas, ut tunc primum aut confitum, aut excultum fuisse credi possit: qua de re videbimus alias (u). Ad milites igitur, ad turmas, ad socios navales, ad fabros maximæ classis excipiendos, locumque his præbendum idoneum quo suum exercerent munus, iis caltris opus fuit quæ oppidi magnitudinem æquarent. Fuisse autem apud Misenum, & Ravennam cum classibus singulas legiones, & ad præfectum classis Ravennatum quot tribuni, & navarchi pertinerent, atque ut hi assidui essent in gubernatoribus, atque remigibus, & militibus exercendis, Vegetius (x) docet: extantque Inscriptiones adhuc multæ ad classem Ravennatem, & ad eos qui in ipsa militabant, aut munera gerebant, spectantes, quemadmodum quæ ad Miseni classem atinent, apud Capaccium (y) leguntur. Sed illarum, cum essem Ravennæ, non paucas vidisse memini, si cum iis conferas, quas Spretus (z) edidit non diligenter descriptas, ut puta quæ L. Licinii memoriam servat, in qua ut mendas omittam cæteras, exempli gratia ut qui vixerit Ann. XXXV. idem militaverit Ann. XXV., certe Tr. Class. Patr. Raven. fuisse non potest, qui continuo natione Dalmata dicatur, sed Classis Prætorix Ravennatis; ut facile scriptum fuerit quod in alia vidi CLASS. PR. Sed de Ravennatibus hujus generis Inscriptionibus si plura cupis, Maffei Litterarias Observationes (a) lege. Porro ut Misenum, sic & Ravennatum militum castra fuisse etiam Romæ, sive ut in Urbem aliqua de causa venientes haberent ubi disciplinam servarent, sive ut tironibus, ad supplendam alterutram classem conscriptis, præsto esset locus in quo degerent, donec Misenum, aut Ravennam mitterentur, invenies unde credas apud Famianum Nardinum (b). Cæterum de classe ipsa Ravennate cum sæpius meminerit Corn. Tacitus (c); hic juvat unum, aut alterum ex ultimis duntaxat locis proferre. Lucilius Bassus classis Ravennatis præfectus, ambiguos militum animos, quod

magna pars Dalmatæ, Pannoniique erant, quæ provinciæ Vespasiano tenebantur, partibus ejus aggregaverat: & mox, Trierarchi magno tumultu Vitellii imagines invadunt, &c. Denique post multa ac varia interjecta, Ad has copias e classicis Ravennatibus legionariam pro Vespasiano militiam poscentibus optimus quisque adsciti Classem Dalmatæ supplere. A tempore autem Vespasiani ad Severi usque ætatem minime dubium est, quin ibidem classis fuerit, hæc scribente Spartiano (d), dum hæc egit Julianus, Severus classem Ravennatem occupat. Sed ab eo anno, qui fuit 193. ad quem usque annum perstitit, minus facile dixerò, quam ante annum 455. jam prorsus deluisse. Quod ut ostendam, quo tempore libros de Re Militari Vegetius scripserit, mihi antea videntum est.

7. Cum enim hos miserit ad Valentianum Augustum, hoc est ad Valentinianum (Valentinianus enim Augustus nullus est) Valentiniani autem tres fuerint, quorum primus anno est mortuus 375. alter anno 392. tertius anno 455.; mentionem autem Vegetius (e) faciat Divi Gratiani, mortui videlicet, hujus autem mors contigerit circa annum 383. recte propterea cum Callario (f) negant, Valentiniano primo scripsisse Vegetium. Sed alteri, ajunt, eoque ponunt ante annum 400. Mihi vero conjecturæ sunt, non alteri scripsisse, sed tertio, qui anno imperare cœpit 425. Nam si secundo scripsisset; non ejusmodi in loco (g) Gratianum nominasset, quippe hujus fratrem; erant enim eodem Valentiniano I. patre, alia matre; sed nomine Gratiani omisso, tempus, vel potius rem duntaxat indicasset; ostendit enim, quanto detrimento a Gratiano id peditibus quod postulabant, indultum sit, ut ferreos thoraces, galeasque deponerent; nam sic congressi contra Gothos, multitudine sagittariorum fuerant, ut ait, sæpe deleti, & tot clades contigerant, quæ usque ad tantarum urbium excidia pervenerant. Non videtur autem illud militibus a Gratiano permissum, nisi post annum 378. quando Valente patruo, quocum imperaverat, mortuo, ipse cum Valentiniano II. tum septenni, Imperator esse perrexit. Valente enim imperante, milites in ejus exercitu armorum gravatos sarcinis ostendit Ammianus Marcellinus (h), eundemque exercitum vallo, sudibus fossaque firmato. Quibus ex rebus duabus indicia duo existunt, ad Valentinianum II. minime scripsisse Vegetium, ut qui ait (i), multos annos esse quibus nullus fossa, vel aggere, valloque mansurum circumdet exercitum, & infra, hæc ex libris discenda quæ usu antea servabantur, sed omissa diu nemo quæsit. Vide enim, num hæc illi narrare posset qui anno sit mortuus 392. Alterum autem indicium petendum est ex illis tot cladibus exercitum, & tantarum urbium excidiis per Gothos illatis, quæ si ab anno 378. ad annum 392. accidisse, non legis, legis autem postea sub Honorii imperio quæ Radagaisus, quæ Alaricus, quæ Athaulfus, Gothorum reges, Italiæ, & Romæ detrimenta, clades, excidia attulerint; nimirum intelligis, significari a Vegetio non quæ ante Valentiniani II. mortem, sed quæ ante Valentiniani III. imperium fuere. Huc illud accedit, post Gratiani mortem, nihil fere de Valentiniano II. legi, nisi fugam, restitutionem, & necem; ad III. autem Valentiniani imperium, ut gravia quædam, sic læta etiam spectare, ut præsertim victoriam de Attila Hunnorum rege in bello adversus hunc primo, aliaque in Italia, in Gallia, in Persia prospere gesta. Utrum igitur a Vegetio (k) dictum credemus continuis victoriis ac triumphis --- domitorem omnium gentium barbararum, & (l) cunctos Imperatores felicitate --- præcellere Valentinianum II. an III.? Ut enim aliud quid adulandi consuetudini datum velis; tantum tamen datum esse, non credes, ut mendaciis apertissimis

(n) Descrit. di tutta Ital. Reg. 14. (o) Ital. Ant. l. 1. c. 28. (p) Lexic. Geogr. in Class. (q) Hist. Rav. l. 4. (r) III. n. 9. (s) Ragguaglio della Divers. dei due Fiumi Tav. 1. (t) Hercul. Prodic. (u) Epist. XIII. n. 12. (x) De Re Milit. l. 5. c. 1. & 2. (y) cit. ab Holsten. in Annot. ad Ital. Ant. Cluver. (z) cum libris de Ravenn. Amplit. (a) Tom. 2. (b) Roma Antica l. 3. c. 10. & l. 7. c. 11. (c) Annal. l. 4. l. 18. l. 19. (d) in Didio Juliano. (e) l. 1. c. 20. (f) Prolegom. ad Cur. Post. de Barbarism. (g) c. cit. (h) Getar. rerum l. 31. (i) l. 3. c. 10. (k) Prolog. l. 2. (l) Prolog. l. 4.



mis rideri potius Imperator videretur, quam laudari. Quin ego, ne tecum quidquam dissimulem; cum præter felicitatem, præcellentem moderationem, castimoniam, indulgentiam, studiorum amorem illi ad quem scribitur, tribui ( *m* ) videam; suspicatus interdum sum, an non potius allocutus Vegetius sit Theodosium II. qui cum Valentiniano III. annos imperavit viginti quinque, laudemque promeritus est clementiæ, religionis, sapientiæ, sacræque doctrinæ. Et sane P. Scriverius ( *n* ) testatur, Palatinum Vegetii codicem optimæ notæ habere, non ad Valentinianum, sed ad Theodosium. Ad quem si malles Vegetium scripsisse; non tamen id primis illis factum esse temporibus crederes, cum anno 408. cœpit cum Honorio imperare, sed annis posterioribus, in quos magis ea cadunt omnia quæ commemorata sunt. Igitur, ut concludam denique; ad utrumlibet Vegetius scripserit, non ante annum scripsisse videtur 400. sed annis potius post id tempus non ita paucis, nec tot tamen, ut ultra Martium excurratur anni 455. quo mense Valentinianus, quinto post Theodosium anno, mortuus est.

8. Vegetius autem non modo illud scripsit ( *\** ) de navalis belli artibus ideo pauciora dicenda sunt, quia jamdudum pacato mari, cum barbaris nationibus agitur terrestre certamen; sed hoc etiam ( *o* ) vel magis a nobis attendendum, Apud Misenum ergo, & Ravennam singulæ legiones cum classibus stabant. Curenim non dixisset stant, sed stabant, nisi jam stare desiissent? desierant autem, quia jamdudum pacato mari, in promptu habere expeditas classes, & diligenter exercitatus non erat opus. Itaque & cætera quæ ad naves spectabant, quibus præerant præfecti utriusque classis, sic posuit omnia, ut dixerit ( *p* ) pertinebant, erant, habebant, exhibebant; ut appareat, non quæ tum essent, sed quæ antea fuissent, memorasse. Quando autem esse desiissent, pro certo non constat: etsi producta Vegetii verba jam diu indicant desiisse ante Valentiniani III. tempora; nam quid paulo dumtaxat ante hujus ætatem fieri consueffet, non opus alioquin fuisset significare. Sed quodcumque desierint; ab eo usque tempore veri simile est in conservando portu, & sive amnium, sive Augustæ Fossæ ad eum pertinentium influxu minorem adhiberi curam & diligentiam cœptam esse, ut sensim minus capax classium fieret, & denique eo redigeretur, ut Blondi ( *q* ) ætate nec scapham piscatoriam, lembumve perferret. Quamvis autem ante initium sæculi VI. ut alibi ostendimus ( *r* ), magna portus ejus pars videatur in spatiosissimos hortos fuisse mutata; ibidem tamen indicatum est, tantam ejus superfuisse partem, ut eo ipso sæculo, si non ingentes, aliquas tamen classes, ut a Belisario missam, exciperet: quod & mulivum confirmat opus de quo supra ( *f* ) dictum est, triremes, & dromones, ut Blondus ( *t* ) loquitur, in Classensi portu ostendens, si factum quidem est, sicut idem tradit, & Spretus ( *u* ) conjicit, tempore Theodati regis Gotthorum, adversus quem a Justiniano Belisarius est missus. Nam Thomajus ( *x* ) ipsum, in quo est, Templum ab Justiniano conditum scribit, cujus imaginem supra Templi portam interius ad ingredientium dexteram, Uxoris autem ad sinistram, mulivo pariter opere expressam memorat, sed vel tum brevi, ut verebatur, perituram: Justiniani tamen faciem adhuc extare, certior factus sum, cernique posse ab iis qui podium Mulicorum, supra eandem portam nunc constructum, ascendant. Idem quoque Thomajus fuisse indicat, qui sacram illam Ædem a Theoderico Gotthorum rege ædificatam censerent: quibuscum ipse facere non videtur. Ego in re incerta nihil definio, nisi quod ob Justiniani, & Uxoris imagines, mulivo pariter opere effictas, minus longe a veri similitudine abire credo qui in proximo pariete, eodem picturæ genere expressum Classense oppidum quoque, & portum, Justiniano imperante, fuisse ajat. Siqui ta-

men esse malint, aut post hujus tempora additum; aut Theoderico regnante, pictum; ut hi in tempus non multo antè retrahent, idest ante sæculi VI. initium, sic illi retrahent in tanto posterius eo quod cum Blondo diximus, quanto magis ab Justiniani ætate ad inferiorem accedent.

9. Classensis tamen oppidi imaginem ex vero describi post annum 722. non potuisse, certum est. Mansit illud quidem vel postea quam Romana classis in eo portu stare desiit. Quin etsi hujus classis causa, ut supra ( *y* ) indicavi, oppidum portui additum esse, non dubito; tamen, ut verum fatear, nullum, quod meminerim, apud veteres Scriptores de oppido testimonium extat, donec Romani in eo portu classem habuerunt. Nam quod nonnulli Clarissimi Viri, Ortelium ( *z* ) secuti, Spartianum laudant, quasi in Didii Juliani Vita id oppidum memorasset; profecto Spartiani verba, quæ superius quoque ( *a* ) producta sunt, Severum Classem Ravennatem occupasse, non oppidum, sed naves significant: neque enim ita oppidi unius occupatio ad summam rerum attinebat, ut in tanta brevitate a Spartiano, qui urbes ibi provinciasque omnes silet a Severo occupatas ( *b* ), commemorari debuisset. Sed post illa tempora, manentis oppidi plures meminerunt. Sic Rubeus ( *c* ) Auctores habuit, ut scriberet, Alaricum initio sæculi V. inter Ravennam, & Classem oppidum castra locasse. Sic Procopius, cujus locum superiore Epistola ( *d* ) protulimus, sæculo VI. Classem vocari, dixit, Ravennæ suburbia ubi portus est. Eodemque sæculo Jornandes scribens ( *e* ), de tribus tum manentibus Ravennæ partibus ultimam esse Classem, docuit. Agathius ( *f* ) autem quæ illo ipso contingerant sæculo describens, Aligerum ad Classes castellum in Ravennati agro situm, ubi Narsetem morari, didicerat, venientem proponit. Postea vero, sed eodem sæculo, a Clephi, Longobardorum rege, Classense oppidum captum, & majori ex parte spoliatum, ut ea gens tenuerit vel post Clephis mortem duce Feroaldo, memorat Blondus ( *g* ), qui & Classem scripsit ( *h* ) cum antea, tum maxime beati Gregorii temporibus Episcopum habuisse. Eodemque auctore ( *i* ) novimus, alterum Feroaldum, Spoletanorum ducem, idem oppidum furto cepisse, Liuthprandi autem jussu illæsum dimisisse. Sed postea ( *k* ) Liuthprandum ipsum aggressum oppidum Classense, civium inter se dissidentium prodicione occupasse, diripuisse, & diruisse. Id vero factum esse A. 722. Cluverius ( *b* ) agnoscit, apud quem laudatos non uno loco Auctores invenies, unde sua acceperat Blondus, cui in præsentia malimus credere, quam illos pervolutare. Illuc tamen & Anastasii ( *m* ), si recte legatur, locus attinet. Luitprandus --- Ravennam progressus --- castrum pervadens classes captas abstulit plures: ubi Cl. Vesselingius ( *n* ) legendum censet Classe capta; sed quid, si sic, castrum pervadens Classis, captos abstulit plures. Quin etiam vox illa pervadens ex alia aliqua male descripta nata esse credenda est, ut puta pervertens, quando cum iis quos laudavimus, non dubitamus tunc evertisse. Itaque Guido Presbyter Ravenhas, aut quicumque is fuit qui Geographiam illam consarcinavit, quæ nunc sub Anonymi Ravennatis nomine circumfertur, vel revera scripsit sæculo VII. vel si IX. aut post IX. ut aliis videtur, alienis additamentis corruptus est, cum quasi suo tempore extantes ponat ( *o* ) Civitatem Casaream, & Classis. Agnellus enim, qui sæculo scripsit IX. vœ tibi, inquit ( *p* ) Ravenna misera vicina destructæ Classis, idemque significans, ait ( *q* ) in civitate dudum Classis.

10. Ab eodem autem Liuthprando pessundata eodem tempore Casarea est, sicuti tradit Thomajus ( *r* ). Quam ut Civitatem ab Anonymo fuisse positam, modo dicebamus. De hac, inquit Rubeus ( *f* ) magnam invenio apud omnes scriptores silentium. Antiquissimos,

opi-

( *m* ) Ibid. ( *n* ) Animadv. 1. ad Vegetium. ( *\** ) Prolog. l. 5. ( *o* ) l. 5. c. 1. ( *p* ) Ibid. c. 2.  
 ( *q* ) Hist. Dec. 1. l. 4. ( *r* ) Epist. V. n. 15. ( *f* ) n. 5. ( *s* ) l. cit. ( *u* ) De Rav. Amplit. l. 1.  
 ( *x* ) Hist. di Rav. P. 1. c. 4. ( *y* ) n. 6. ( *z* ) Synonym. Geogr. ( *a* ) n. 6.  
 ( *b* ) Vid. eund. Spartianum in Severo. ( *c* ) Hist. Rav. l. 2. ( *d* ) n. 15. ( *e* ) Hist. de Reb. Get. c. 29.  
 ( *f* ) De Bello Goth. l. 1. ( *g* ) Hist. Dec. 1. l. 8. ( *h* ) Ital. Illustr. Reg. 6. ( *i* ) Dec. 1. cit. l. 10. ( *k* ) Ibid.  
 ( *l* ) Ital. Ant. l. 1. c. 48. ( *m* ) Vir. Pontif. in Gregor. II. ( *n* ) Adnot. in Itinerar. ubi de Ravenna.  
 ( *o* ) l. 4. ( *p* ) Lib. Pontific. P. 1. in Vita S. Severi. ( *q* ) Ibid. ( *r* ) Hist. di Rav. P. 1. c. 3. ( *s* ) Hist. Rav. l. 4.



opinor, intelligit. Sed nec eos qui Classense oppidum memorarunt, antiquissimos fuisse, ostendimus ( *t* ). Quin Sidonius, qui ante Procopium, & Jornandem scripserat, cum de Ravenna loquens, ait ( *u* ) *veterem civitatem, novumque portum*, hoc est Classensem, media via Casaris, ambigas utrum connectat, an separet; ideo videtur mihi verbo usus illo connectat, quod non via nuda esset, sed crebris utrinque in urbis modum ædibus ornata. Certe pro Ravennæ urbis parte Casaream posuit Jornandes ( *x* ). Trino, inquit, urbs ipsa vocabulo gloriatur, trigeminaque positione exultat, idest, prima Ravenna, ultima Classis, media Casarea. Nec vero in hoc hallucinari potuit, ut Ortelius ( *y* ) censuit, quod ex tribus unicam faceret; hæc enim potius Ravennæ suburbia fuisse. Nam Cassiodorus describat Ravennatem: quanquam id nobis satis est quod dat Ortelius, suburbium fuisse; suburbium enim via profecto nuda non est. Sed nec diu nuda esse utique potuit, cum domus, tabernæque haud procul a Classensi portu, & oppido parandæ fuerint, quibus exciperentur suis cum mercibus mercatores incolæ, advenæque, & qui victui opportuna militibus venditarent; neque enim propolis, & mercatoribus in Romanorum castris, sed extra ipsa erat locus. Porro Casaream a Longino Exarcho fuisse fossa, valloque septam, ex Blondi auctoritate Pighius ( *z* ) scripsit; tunc opinor, cum sub rege Clephi Longobardi, ut diximus, Classense oppidum tenentes, Exarchum, ut Blondus ( *a* ) ait, in prope contigua civitate Casarea --- dies noctesque agitabant: quam & Feroaldo duce agitare perrexerunt. Desiderius autem Spretus ( *b* ) Ravennates scribit Casareum castellum, parum ab urbe distans, condidisse: quod postea etiam muris cinxerunt, quorum adhuc fundamenta visuntur. Certe cum Alberonius Cardinalis Amplissimus annis superioribus novo amnium alveo inter Ravennam, & Classem ducto pontem imponendum curaret, jaciendisque fundamentis altius humus effoderetur, saxum stratum inventum est quasi antiquæ cujusdam viæ, Casareæ fortassis illius, de qua Sidonii verba produximus. Minus autem dubitarem, si eadem omnibus de ejus, & Casarei oppidi loco sententia esset. At Pighius ( *c* ), ut Classense oppidum fuisse, censet, in superiore portus ac faucium cornu a regione Ravennæ, ita in medio portus vertice versus mediterranea Casaream oppidulum; ut continuis fere trium oppidorum edificiis semicirculari forma portus Classensis locupletissime coronaretur. Blondus vero, & Leander, si Ortelio ( *d* ) credimus, & Rubeus quoque, si Ortelio, & Ferrario ( *e* ), Casaream fuisse, ajunt, ubi nunc S. Maria in Portico, nimirum S. Maria in Portu; in Portico enim apud Leandrum est per errorem, quem Ortelius, & Ferrarius, & Maginus ( *f* ) retinuerunt. De Casarea autem Cellarius mentionem non fecit, quod viderim.

II. Nunc quando de Classensi portu, & de oppidis duobus quæ in littore erant ad eum portum attinente, satis dictum est; de fluminibus quæ ad idem littus pertinebant, nonnulla adjiciamus. De Sapi autem & de Roncho, & de fossa a Pado in portum illum producta, cum satis jam videamur dixisse ( *g* ); reliquum est, ut de aliis qui in eo littore ponuntur, omnibus verba faciamus. Et pontem quidem in littore illo fuisse a pluribus memoratum Scriptoris, certum est. Eorum primus est Cassiodorus ( *h* ), qui Odoacrem cum Erulis Ravennæ egressum nocturnis horis ad pontem Candidiani a Theoderico memorabili certamine superatum esse, tradidit. Sed Jornandes ( *i* ) etsi post illum scripsit; eum tamen pontem fuisse ante annos octoginta, idest initio sæculi V. indicavit, cum Alaricum nullo penitus obsistente, ad pontem, ait, applicuisse Candidiani, qui tertio milliario ab urbe aberat Ravennæ. De eodem ponte utrumque locutum es-

se, non videtur dubita dum ob aliquam nominis varietatem. Librariorum enim culpa factum est, ut aliis in exemplis aliter legamus, ut & Candidium in Cassiodoro, & Condiniani in Jornande. Certe Rubeus ( *k* ) qui hanc scripturæ varietatem animadvertit, eundem esse pontem, non dubitavit, inter Ravennam, & Classensem oppidum. Blondus autem ( *l* ) de iisdem rebus loquens, eundem locum designaverat, Halaricum videlicet Ravennam inter, & Classensem oppidum in loco qui dicitur Candianum, confedisse, pariterque ( *m* ) Theodericum in patentibus Candiani campis bis prælio Odoacrem superasse, & paulo ante, Theoderici castra secundum littus ad orientalem plagam fuisse in loco cui Candiano est, eratque tunc nomen. Et sane vel nunc idem nomen servat locus, & sæculo saltem IX. haud aliter vocatum esse, ex Agnello ( *n* ) constat, qui Theodericum memorat in campo, qui vocatur Candiani, & alibi ( *o* ) nominat portus Candiani; ut evidens mendum sit apud Ortelium ( *p* ), Ferrarium ( *q* ), & recentissimos quosdam, scribentes ex vitioso aliquo Blondi exemplari Cardiano pro Candiano. Quæ cum ita sint; facile ego quidem Cluverio ( *r* ) dabo, Cassiodorum quoque scripsisse Candianum, Jornandem autem Candiani. Sed non propterea aut illi, aut aliis continuo assentiar, Candianum fuisse fluvium, indeque Pontem, & Portum, & Campum Candiani dictum. Nam Candianum ut est, sic Blondo auctore, etiam erat, non fluvius, sed locus: quem autem campum dicimus aut Padi, aut Tiberis, aut alterius fluminis? Portum vero sæpius a loco, & pontem quoque aliquando nominamus. Itaque & quod ex portu Classensi supererat, Candiani portum, & pontem qui aut Sapi, aut Roncho, aut Augustæ Fossæ prope Classem esset impositus, Candiani pontem dicere poterunt.

12. At enim fluvius hodieque apud Classem, inquit Cluverius ( *s* ) vulgo vocatur Candiano, aquis copiosissimis, non tam e fonte suo, quam e circumjunctis paludibus collectis, in portum Augusti defluens. Permirum esset, si portus Augusti, quem Blondi temporibus jam nullum fuisse, vidimus ( *t* ), centesimo & quinquagesimo post anno iterum per se extitisset, ut videri a Cluverio posset, itemque cum Blondus ( *u* ) parva Candiani sive vallis, sive stagni ostia esse, dixerit, in eamque vallem influere parvos torrentes, Avellam ( sive, ut paulo infra, Avexam ) & Bevanum appellatos, hosque parvos esse, Leander quoque ( *x* ), & Rubeus ( *y* ), & quicumque viderunt, summa, ut in re evidentissima, consensione affirmaverint; Cluverium tamen ibi flumen aquis copiosissimis conspexisse. Quid? quod Avexa, sive ut vulgo appellitant, Avefa illuc non pervenit. Descendens enim ex agro Bertinorisiensi, Æmiliam quidem viam, ut recte Blondus ( *z* ) indicat, & Leander ( *a* ) diserte tradit, interfecat, Forum Popilii ad orientem solem perstringens; inde vero contra atque ipsi docuere, ne passus quidem ter mille emensa, in Ronchum influit duodecim, minimum, pass. mill. supra Candianum, ut vel melius a Coronellio ( *b* ), quam a Magino ( *c* ) ostenditur, qui tamen & ipse in Ronchum, sed paulo inferius, immittit. Male igitur hac etiam de causa quis credat Paulo Merulæ ( *d* ) sic oram illam maritimam describenti, Candiani Amnis, nunc Paludis, ostium sequitur. Inde Torrens est Avefa, mox Bedefis fluvius, aut Jodoco Hondio ( *e* ) qui sic, Candianus, Avefa, Bedefis. Unde vero Blondi errorem extitisse, dicemus? Ex eo fortasse, quod de duobus parvis torrentibus quos in Candiani vallem videbat influere, cum alterum Avellam ab accolis vocari, audiret, hunc, nominis similitudine, ut fit, deceptus, haud alium esse, quam notam sibi in Æmilia via Avefam existimaverit. Ravennatem Rubeum ( *f* ) audiamus. Candiani palus, inquit, sensim ipsa quoque in continentem de-

gene-

( *t* ) n. 9. ( *u* ) l. 1. Epist. 5. ( *x* ) Hist. de Reb. Get. c. 29. ( *y* ) Synonym. Geogr. ( *z* ) Hercul. Prodic.  
 ( *a* ) Hist. Dec. 1. l. 8. ( *b* ) De Ravenn. Amplitud. l. 1. ( *c* ) l. cit. ( *d* ) Synonym. cit. ( *e* ) Lexic. Geogr.  
 ( *f* ) Italia. Tav. Romagna. ( *g* ) Epist. V. n. 14. & seqq. & supra, n. 2. & Epist. III. ( *h* ) Chronic.  
 ( *i* ) Hist. de reb. Get. c. 29. ( *k* ) Hist. Rav. l. 2. & 3. ( *l* ) Hist. Dec. 1. l. 1. ( *m* ) l. 3.  
 ( *n* ) Lib. Pontif. P. 1. in Vita S. Jo. l. c. 3. ( *o* ) P. 2. in Vita Felic. c. 3. ( *p* ) Thesaur. Geogr. in Classis.  
 ( *q* ) Lexic. cit. in Classis. ( *r* ) Ital. Ant. l. 1. c. 28. ( *s* ) Ibid. ( *t* ) supra, n. 8. ( *u* ) Ital. Illustr. Reg. 6.  
 ( *x* ) Descrip. di tutta Ital. Reg. 14. ( *y* ) Hist. Rav. l. 1. ( *z* ) ( *a* ) locis cit.  
 ( *b* ) Corso Geogr. Univ. Tav. Territ. di Forlì. ( *c* ) Italia. Tav. Romagna. ( *d* ) Cosmogr. P. 2. l. 4. c. 11.  
 ( *e* ) Ital. hodiern. Descrip. ( *f* ) Hist. cit. l. 1.



generat. Quanquam enim Bevanus, & Avella, seu, ut ajunt, Bevanella, parvi torrentes, aliquot aliis in se exceptis torrentibus, in hanc confluant, & vicini in eam agri aquas emittant ---; tamen --- exigua palus reliqua est, quæ in dies minuitur, semperque magis minuta est. Quod certe, si copiosissime, ut brevi post Rubeum tempore scripsit Cluverius, per eam aquæ defluerent, non facile accidere potuisset. Vides præterea, nullum ab Rubeo Candianum fluvium, qui illac transeat, memorari, nullum a Coronellio (g) appingi; sed Bevanum tantummodo, & Bevanellam. Quin hanc animadvertes a Coronellio Fosso, illum Condotta nominari; quanquam Maginus (h), qui ex parte aquarum utriusque Candianum fecit; omnibus f litteram, quasi fluvii essent, adscripsit. Sed cum Bevanus ipse torrens sit parvulus; quid Bevanellam esse, credes?

13. Verum cum littera illa f, a Magino adscripta, facile imposuerit Joanni Harduino Viro quidem Eruditissimo, sed regionum harum non satis perito, ut cum Plinium (i) explicaturus, quæreretur (k), quis post Sapim versus occidentem solem fluvius proxime sequatur, apud Maginum autem forte videret proximum a Sapi Bevanum pro fluvio propositum; scribere non dubitaverit *Vitis est Bevano*. Quam ejus opinionem cum ab recentissimis Scriptoribus referri, videam; non expendi; operæ pretium esse, duco, ut tibi quod æque ac mihi, nec semel, perspectum fuerit, ad memoriam revocem. Scilicet Bevanus ex agro Bertinorienfi, non secus atque Avefa, ortus, sed hac angustior, & plerumque etiam ficior, minorique ponticulo obductus qua Æmiliam secatur viam, scrobis potius paulo grandioris, quam torrentis in modum, se offert iis qui Foro Popilii a tergo relicto, Cæsenam versus contendunt; ut nisi quis admoneatur, ne attendat quidem; tantum absit, ut a Plinio qui Avefam proximam, aliquanto majorem neglexerit, pro eo flumine propositum censeat, quod Utentis nomine apud Livium a Boiis Senones dividebat.

14. Igitur si Bevanus, & multo magis, ut consequitur, Bevanella parvi adeo torrentes, neque tamen a Blondo, Leandro, Rubeo sunt omitti; quanto minus fluvium, siquis fuisset, copiosissimis aquis Candianum eodem in littore prætermisissent! Et tamen, si Cluverium (l) audimus, ibi præter Candianum, fluvius erat insuper, & est alter, neque is mediocris. In Candianum, inquit, confluebat Badrinus amnis; qui & ipse uberrimis aquis, Classen monasterium præfluens, vulgo nunc adpellatur Fossato grande; atque in ostium Candiani protinus infra Classen influit. Ego vero, si forte hujus fossæ sub alio nomine illi meminerint quos modo nominavi; quantula fuerit, jam dixi. Sin alia, ut apud Maginum (m), res est; hoc ipsum, quod ab illis omitta est, non antiquam esse, ostendit, aut si forte antiqua, minoris quam duo torrentes quos nominarunt, faciendam. At enim antiqua res est, inquit Cluverius. In ea enim fossa, five potius in eo amne, quem Badrinum tunc appellabant, circa annum 580. Drocultus classe cum Longobardis confliens, magno adjumento fuit, ut hi ex Classensi oppido pellerentur. Quod ex Paulo Diacono (n) constare, ait, & præsertim ex Droculti epitaphio,

*Inde etiam, retinet dum Classen fraude Feroaldus,  
Vindicet ut Classen, classibus arma parat.*

*Puppibus exiguis decertans amne Badrino,  
Bardorum innumeras vicit & ipse manus.*

Pro vero quidem Cluverius contenderet, si Langobardorum, qui tunc Classen oppidum retinebant, vires nulla alia pugna frangi potuissent, nisi quæ in amne fieret prope illud oppidum fluente. Sed cum fluvii qui in ea vicinia sunt noti, alio omnes nomine, quam Badrini, vocarentur, alios autem comminisci, ut est a me ostensum, non liceat; mihi sane ex quo illud epitaphium legi, certum fuit, non prope Classen id flumen, sed diversa in parte esse querendum.

15. Itaque in mentem veniebat quærere, an pro Badrino legendum esset Butrino, an Bodinco: ut si Morgagni Opusc.

primum legerem, Asconis Fossam intelligerem, quam Poeta qua Butrium olim (o) præterfluebat, amnem Butrinum vocasset; nam & Butrii incolæ Butrinos esse dictos ex Stephani Epitome ostendit Cluverius (p): sin Bodinco legerem, ipsum intelligerem Padum, eo quoque nomine, ut apud Plinium (q) est, appellatum. Verum cum Auctorem quærerem, quo alterutram conjecturam firmarem; in Blondi (r) locum incidi, quo simul Droculti istius, Suevi ducis, quem ipse Dotrulam appellat, navalem illam pugnam cum Feroaldo, & Longobardis describit, simul flumen indicat in quo pugnatum; unde veriore elicere illius conjecturam nominis proclive est. Narrat enim, Dotrulam, cum Brexillo oppido, quod suis conservaverat copiis, secundo Pado classem duceret, & ad Spineticum hujus ostium properaret, obvium habuisse sua cum classe Feroaldum, qua tunc Vatreus amnis in Padum influebat. Qui cum se ad Vatrei ostium continens, quotidie prælio decertaret, hoc multo superior, quod dromonibus vehebatur, cum suis Dotrula linitibus scaphisque imposuisset; obtinuit tamen in Vatreo Dotrula, repulsumque Feroaldum mari ad Classense oppidum, cujus deinde facta est deditio, persecutus est. Sed & Rubeus (f) de hoc duce verba faciens qui auxilium tulit Zmaragdo Exarcho, Classis oppidum obsidenti, & mox navibus qui mari alluebatur, admotis recuperanti, navale illius prælium cum Longobardis attingit ad Spineticum Padi ostium: quanquam epitaphium longe aliter se habens producit, in quo nulla fluminis mentio est, mire hic variantibus Pauli Diaconi codicibus, ut alii habeant sicut Rubeus protulit, in aliis pro Badrino legatur manifeste errore Brandino, alii autem quos Lindenbrogii editio repræsentat, ita omnino habeant, ut supra cum Cluverio descripsimus. Verum quando in neminem incidi qui hoc tempore ajat id se epitaphium vidisse, quod Ravennæ olim ante limina Templi S. Vitalis positum fuerat, ut quid revera in eo legatur, scire possimus; alterutrum, si vis, ponamus, aut nullam in eo fluminis fuisse mentionem, sicque non erit Cluverio causa, ut hinc amnem comminiscatur Badrinum, qui in Candianum influeret, aut revera in eo epitaphio fuisse, ut Cluverius ponit, amne Badrino, sicque tam ex Blondi, quam ex Rubei narratione longe alibi id flumen statuamus, legentes videlicet, aut certe ob facilem apud Veteres V in B, T in D, E in I mutationem intelligentes amne Vatreo. Quod facientes, simul quandam Cluverii (t) suspicionem magis infirmari, animadvertemus. Cum enim in antiqua Tabula Itineraria Saternus legatur pro Vatreus; hanc in Plinio (u) vocem corruptam suspicabatur, idque eo magis quod vel nunc Itali Vatreum appellamus Santerno. Sed quæcunque causa fuerit, cur in ea Tabula legatur Saternus, quod forte ab recentiore manu est; certe si VI. sæculo, ut latine Vatreum scriberent, Badrinum scribebant; num Saternum, an Vatreum illa haberent, quibus tum utebantur, id est vetustissima, Plinii exemplaria, manifestum est. Cluverius tamen ipse eam sibi suspicionem magna ex parte exemerat Martialis versibus: quos quoniam ea explicatione illustravit, quæ ad propositam Blondi narrationem tuendam fortasse conducatur, nos quoque hoc loco recensebimus.

16. In eo libro quem Martialis in Gallia nostra Togata ab se scriptum fuisse, diserte monet (x), indeque, id est Foro Cornelii (y) ubi scripserat, Romanam missum, ut plura sunt quæ ad urbem Ravennam attinent (z), ubi etiam nuper (a) fuerat eo tempore, sic quoque Epigramma (b) est, quod, si non secus ac Cluverius, legamus, viam ostendat per quam Poeta ex Forocorneliensi agro transibat Ravennam. Nautas enim quibus utebatur, dicit

*Vatreo, Eridanoque pigriores,  
Quorum per vada tarda navigantes,  
Lentos figerent ad celeuma remos,*

*& sicuti mox pergit,  
tam placidas vagi per undas  
Tota luderent otium carina.*

F

Verum

(g) Corso cit. Tav. Territ. di Ravenna. (h) Tav. cit. (i) Nat. Hist. l. 3. c. 15. (k) Ad hunc loc. Not. 12.  
(l) Ital. Ant. l. 1. c. 28. (m) Tav. cit. (n) Langobard. rer. l. 3. c. 19. (o) Vid. Epist. III. n. 12.  
(p) c. 28. cit. (q) Nat. Hist. l. 3. c. 16. (r) Hist. Dec. 1. l. 8. (f) Hist. Rav. l. 4. & 6.  
(t) Ital. Ant. l. 1. c. 35. (u) Nat. Hist. l. 1. c. 16. (x) l. 3. Epigr. 1. (y) Epigr. 4. (z) Epigr. 5. 6. 90.  
(a) Epigr. 6. (b) Epigr. 66.



Verum quidem est, vitiatos esse in his versibus antiquos codices, præsertim autem pro *Vatreno*, *Eridanoque* habere *Veterno*, *resinaque*. Sed verum quoque est, verba hæc metro ipsi, nedum sententiæ repugnare, cui certe illa etiam repugnant, quæ Viri Doctissimi (c) substituenda olim censuerant, *Vejentone*, *asinaque*, haud animadvertentes, sequi hæc *Quorum per vada tarda navigantes*; nam quod in codicibus quibusdam *Quorsum* legatur, non *Quorum*, sic neque sententia perspicua est, & in eo quem ante oculos habeo, vetusto, & manu exarato libro planissime scriptum est *Quorum*. Illud vero animadverterunt alii, qui aut *Aternoque*, *Sapique*, aut *Aternoque*, *Vitique* maluerunt. Sed ut bene fluviorum nomina viderunt hic esse reponenda; sic illud non bene, quod isti neque omnes sunt navigabiles, & siqui sint, non uno tamen, ut Epigramma requirit, eodemque die sunt navigabiles propter immanem inter Aternum, & alterutrum reliquorum distantiam, denique siquando ob auctam aquarum copiam navigabiles sint, non tardo, lentoque sunt motu, nec tam placida lenitate. Horum autem omnium cum objici nihil possit iis qui cum Cluverio rescribendum censeant *Vatreno*, *Eridanoque*, imò iidem illis quoque adjuventur codicibus, in quibus *Vatro*, aut *Vatrina*, aut *Vaterno* legebatur; cur non propositam lectionem sequamur? convenientem præsertim locis in quibus tunc versabatur Martialis, neque, ob velociorem, sicuti verentur aliqui, *Vatreni*, aut *Eridani* cursum, Epigrammatis sententiæ repugnantem. Neque enim Martialis propius Forum Cornelii navem conscenderit, necesse est, ubi *Vatreni* aqua concitatore fertur motu, quippe quæ montibus unde is amnis descendit, adhuc propinquior, eoque minus ut plurimum alta est; sed iusto infra illud Forum interjecto spatio, ubi videlicet tum lentior, tum altior esset. Neque *Eridani* vox hic ferme aliter accipienda est atque Epistola III. (d) exposuimus, ubi de Augusta Fossa verba fecimus, id est de primo illo Padi alveo Ravennam ducto quem Liutprandi temporibus, quemadmodum ibi (e) dictum est, etiamtum sic designabant, ut Ottonem I. scripserit *per Eridani alveum Ravennam usque pervenisse*. Nec tamen *Padusæ* quoque nomine indicare destiterant, quam *Valgius*, ut *Cluverius* ait, non alia ac Martialis in isto Epigrammate, voce usus, *placidam* vocabat.

17. Igitur cum ex Martialis versibus ita ut legendi videntur, lectis, explicatisque intelligatur, olim per *Vatrenum* linitibus, & scaphis navigari consuevisse; mirum accidere non debet, si eo in fluvio *Dotrulæ* milites, ejusmodi naviculis impositi, adversus Longobardos pugnaverint, eosque in fugam conjecerint, ut a *Blondo* (f) narratum est. Quod si for-

te id minus veri simile videatur propterea quia *dromones* quibus Longobardos inectos dixit, *Vatrenum* subire non potuerint; aut sic intelligas in *Vatreno* pugnatum, ut in hujus ostio, ubi ob Padi confluum altiores aquæ erant, majores naves constiterint, aut etiam *Vatreni* nomine dictum accipies ipsum *Spineticum* Padi ostium, quod nunc *Primarium* vocitant; ut ibi prælium confectum sit, ubi *Rubeus* (g) indicavit. *Plinius* sane, ut alias (h) vidimus, postquam *Augustæ Fossæ* ostium proposuerat, alia Padi ostia ordine recensens, *proximum inde ostium*, inquit, *magnitudinem portus habet, qui Vatreni dicitur*, & mox, quasi ejus nominis rationem prolaturus, hæc subjicit. *Auget ibi Padum Vatrenus amnis ex Forocorneliensi agro*. Scilicet hæc causa fuit, cur post *Vitim*, & *Anemonem*, proximum ex non minoribus quidem fluviis *Vatrenum* superiore capite (i) non memoraverit, quippe non eo quo illi, sed in *Padum* influentem. In hunc autem ad illud ipsum ostium influxisse, *Blondus* quidem (k) ob ea *Plinii* verba non dubitabat; ut sic minus ejus narratio ab *Rubei* narratione distaret; quanquam suo tempore ferebatur, *Vatrenum averso pene viginti mill. cursu novi nominis ostia in padusam, & Padum habere, Zaniculum appellata*. Sed me illa quæ alibi (l) indicata est, causa credere omnino cogit, inter *Spineticum* Padi ostium, & confluum *Vatreni*, intervallum aliquod fuisse jam *Plinii* tempore, qui ubi illa scripsit, & *Padum* scripsit *Augusta fossa Ravennam trahi*; ut quod dixit ibi, non in ostio significare censeam, sed propius ostium quam nunc putemus. Et in ostium quidem ipsum longe antiquissimis temporibus influxisse *Vatrenum*, eoque nomen *Vatreni portus* attulisse, non negaverim, qui advecto ulque, & usque limo, & arena, Padi alveum sibi semper ultiores ripas in mare produxisse, eoque ostium a *Vatreni* confluenta abduxisse facile existimem. Sed & *Vatrenum* ab ostio recessisse ipsum quoque, putaverim, sive obstaculo aliquo obstructo, sibi viam superius in Padi alveum paraverit, sive homines fecerint: qui nunc contra ut inferius confluat, effecerunt. Cum enim *Blondi* ævo tantum a Padi ostio distaret, quantum paulo antedictum est, nec *Magini* (m) ætate is mutatus esset confluentis locus; nunc certe cum per eum Padi alveum superioribus mensibus navigaremus, ostium quo annis proximis *Vatrenus* in *Padum* influxerat, multo inferius quam in *Tabula Magini*, fuisse vidimus, novum autem quo nunc influit, vel inferius aliquanto apertum spectavimus. Sed de antiquo *Vatreni* portu hæc attigisse satis sit. Jam vero de portu *Ravennate* scribendum est. Quod proximis *Litteris* faciemus. Vale.

## EPISTOLA ÆMILIANA VII.

**B**adrinus amnis, quem *Cluverius* *Classensi* oppido proximum credidit, nos autem in extremo ad ostium *Spineticum* Padi alveo, aut in *Vatreno* flumine, illuc, aut non multo superius influente agnoscendum esse, ostendimus, a *Classensi* littore, & ab huic proxima *Ravenna* nos ad diversam omnino plagam abduxit. Quamobrem juvat de eo primum littore verba facere quod ab illo Padi alveo *Ravennam* versus se extendens, stagna atque æstuarium ex ea quidem parte a mari dividebat; ut denique in portu *Ravennate*, inter *Classense*, & hoc littus comprehenso scribendi finem faciamus.

2. Pauca autem de hoc littore nobis attingere licebit propterea quod illa quæ in ipso, aut prope ipsum fuerunt, fere omnia a nobis sunt antea considerata, *Butrium* videlicet, de quo conjecturam pro-

posuimus nostram (a), & *Augusta Fossa* de qua bene multa ad te scripsimus (b), simul de *Coriandri Campo*, & de *stadio Tabulæ* (c), ab *Agnello* memoratis, verba facientes. Reliquum est igitur, ut de *Theoderici Palatio*, & de *Æde S. Mariæ ad Blachernas* nonnulla scribamus eo diligentius, quod utriusque loci cognitio videri potest utilis ad ea quæ de portu sequuntur, accuratius disquirenda.

3. Vir Doctissimus a quo *Agnelli* primam editionem habemus, scripsit (d), *Ecclesiam S. Mariæ ad Blachernas extra Ravennæ Pomærium fuisse eo loci, ubi cum Palatium non admodum ingens Odoacris regis extitisset, Palatioli vocabulum usque in recentiora tempora perduravit*. Quæ si ita sunt; satis est alterius novisse locum, ut amborum sciamus. Verum si ea perlegantur quæ de utroque scri-

(c) Vid. apud Farnab. in Comm. ad hoc Epigr. (d) n. 3. & seqq. (e) n. 5. (f) supra, n. 15.  
(g) Vid. ibid. (h) Epist. III. n. 3. (i) c. 15. l. 3. (k) Ital. Illustr. Reg. 6. (l) Epist. III. n. 4.  
(m) Italia Tav. Romagna. (a) Epist. III. n. 12 (b) Ibid. n. 3. & seqq. (c) Ibid. n. 12. (d) in Præfat. n. 16.



scripta sunt ab Agnello, qui, ut alias (e) dixi, Abbas fuit, & quidem, ut mox confirmabitur, S. Mariæ ad Blachernas; vereor, ne aliud alio loco fuisset, opinemur. De eo enim palatio hæc tradidit (f), & abiit ad Ariminum, & venit exinde cum Dromonibus in Portu Leone, ubi postea palatium modicum edificare iussit in Insula non longe a littore Maris, ubi nunc Monasterium S. Mariæ esse videtur infra balneum non longe ab Ravenna milliario VI. Quæ etsi de Odoacre dicta esse, scripturam magis quam sententiam attendentibus videri possunt; tamen de Theoderico accipienda esse, adeo certum est, ut non Blondus modo (g), & Rubeus (h), & Wesselingius (i) sic intellexerint, sed & ipse Agnelli Editor (k), quasi eorum oblitus quæ supra posuerat. De Templo autem S. Mariæ ad Blachernas hæc ab Agnello indicata sunt (l). Dum in Monasterio meo Beata & semper Virginis Mariæ, quæ vocatur ad Blachernas, residerem, quod est fundatum non longe a Guandelaria. Confer, quæso, utrumque locum, & num de uno eodemque Monasterio loquatur, existima. Huc adde alterum ipsius locum (m). Exarchus quotidie concurabat ad Monasterium S. Mariæ, quod vocatur ad Blachernas. Nonne quotidiana hæc ventitatio suburbanum potius indicat Templum, quam dissitum pluribus passuum millibus? Nonne idem confirmatur quandantenus ipso Blachernarum nomine quo Græci hoc Templum vocabant ad illius exemplum, quod, ut apud Procopium aliosque legisse videor, prope mœnia Constantinopolis in littore maris Justinianus Deiparæ extruxerat eo loco quem Blachernas dicebant. Denique idem ostendunt antiqui de Agnello versus, ipsius libro præfixi.

Talis & iste sedens tectis nimiumque superbis  
Quæ Genitor procerus cecit sibi jure paterno  
Sede suburbanis Ravennæ, quæ vocatur  
Antiquo Blacherna locis de nomine structa,  
In Genitricis honore Dei, Dominique Mariæ.

Quos ad versus facilius intelligendos vide, an faciant quæ Agnellus post primum illum quem produximus, locum, in quo sermo est de Theoderici palatio, continuo subiecit. Et nunc in nostris temporibus prædictum palatium servos meos demolire iussi, & Ravennam perduxim in edificio domus meæ, quam a fundamentis edificavi jure materno. Rescriberem fortasse paterno, ut secundi versus scriptura, & lex carminis indicant. Viderem quoque, num vox proxima, quæ tertio in versu prima est, Sede, an Æde legenda sit. Hæc, inquam, facerem, nisi incertum mihi esset, ad idem, an ad aliud ædificium Agnelli verba, & versus illi spectarent. Sed quocunque spectent; ii sane versus Blachernarum locum suburbanum fuisse, ostendunt.

4. Veruntamen Eruditissimum Agnelli Editorem ista fortasse illius verba permoverunt, ut S. Mariam de Palatiolo, & S. Mariam ad Blachernas idem Monasterium fuisse, crederet, quod Agnello, nisi Abbas illius fuisset, ut certe hujus fuit, non facile licuisset, quod restabat de proximo Theoderici palatio demoliri, ejusque rudibus uti ad propriam domum ædificandam. Itaque S. Mariam de Palatiolo, quam sæculo X. fuisse juris, scripsit (n), Abbatis S. Pauli de Urbe, nunc autem (o) S. Vitalis Casinensium Monasterio unitam, haud magno spatio Ravenna distantem, non dubitavit fuisse S. Mariam ad Blachernas, idque haud obscure ex Johannis Angeloptis Vita indicasse Agnellum ipsum cap. 3. Sed quod ad illam palatii demoliendi facultatem attinet, eam potuit ab iis qui tum Ravennæ imperitabant, obtinere: quod vero ad istum quo nititur, Agnelli locum; releges; idem enim est quem primo loco (p) produxi; & non longe quidem ab Ravenna fuisse illud S. Mariæ Monasterium, videbis, milliario tamen VI. num ergo suburbano, ut illud S. Mariæ ad Blachernas fuisse, Morgagni Opusc.

ostendimus, erat loco? At tu duplex forsan mendum in iis Agnelli verbis latere, suspicaberis, alterum ubi legimus infra balneum fortassis pro eo quod scriptum fuerit, in Blachernis, alterum in numero illo VI. qui multo minor fortasse fuerit ab Agnello adscriptus, nimirum IV. Neque tamen, numerum vel ad hunc modum rescribendo, efficeres, ut S. Maria in Palatiolo eadem fuisset quæ S. Maria ad Blachernas. Quid ita? inquires. Nempe quia Palatiolum non est suburbanum. Neque enim magna attentione digna sunt quæ de ipso apud recentissimos quosdam Scriptores leguntur, hoc est, Palatiolum nunc esse Ravennæ suburbium ingenti amplitudine, quod ita cum vero convenit, ut cum eo ipso quod modo dixerant, Cæsaream, Classem, & Palatiolum bellorum, injuriis esse destructa. Palatiolum quidem destructum fuit, sed non ab hostibus, idque Agnelli tempore, ut paulo ante (q) dictum est: & Templum quoque S. Mariæ in Palatiolo, ipsum quidem vi belli, dirutum fuisse a Piccinino, ex Hieronymo Fabbri (r) discimus, tunc videlicet cum ille anno 1438. in eam Insulam quam a Palatiolo & Fabbri, & Rubeus (s) Palatiolam vocant, transivit ea ratione quam hic, & Blondus (t) exposuere. Sed loci tamen ubi illa in Insula ea esset sacra Ædes, ita adhuc memoria superest, ut Coronellius (u) hanc diserte adscripto nomine S. Maria in Palatiolo designaverit quarto circiter ab Ravenna lapide. Igitur etsi in propositis Agnelli verbis pro milliario VI. facili errore in unius siglæ transpositione legendum, ut supra dixi, crederes IV., non tamen conficeres, Ædem hanc adeo suburbanam fuisse, ut fuisse alteram S. Mariæ ad Blachernas, ostensum est.

5. Nunc ut intelligas, quantum hujus utriusque Ædis locum novisse profit ad ea quæ de portu Ravennate disquirenda restant; ille est a nobis locus Agnelli (x) proferendus, cujus particulas quasdam Epistolis superioribus (y) consideravimus. Sint tuta, inquit, littora, & per omnes vigiliæ portus. Sarxena excubet, Cervia æquoris ad novas Papiæ armis Flavia. Instet, quæ curva vocatur, Cæsena. Popilienses viri adhæreant Sapis portu juxta conscendunt fluctus marinos. Coloni decumani speculentur juxta portus Candiani. Livenses accolæ instent in littore curvo. Bedente vetere amne castra Faventina scrutentur post Lachernum portum, & Eridani ora. Corneliensis acies lustret Corniandri campos & loca omnia circa phalanges armatæ. Bononienses transmissio Eridano parte Lionis servant. Hic est locus universus: in quo ut evidens est, littora de quibus agimus, omnesque portus eodem ordine quem secuti hætenus sumus, commemorari; sic & menda esse complura, manifestum est. Et horum quidem aliqua tolli posse, propemodum despero. Nonnulla tamen egregie sustulit Cl. Wesselingius (z), qui ut probabiliter, sicut alibi (a) dictum est, rescripsit Sarxena excubet Cerviæ, sic optime emendavit quod sequitur, legens videlicet Æquoris ad Novas Papiæ armis Flavia. Quibus tamen cum verbis continuarem ipse instet, quæ curva vocatur, Cæsena. Sic enim & sententia absolvitur, & ab suis adjunctis cognominibus Cæsena non disjungitur: quod ostenderem (b), si nunc vacaret a proposito longius divertere: quamobrem nec quæram hic (c), quis locus ille esset ad Novas dictus. Sequuntur illa quæ cum de Sapi, & Classensi portu, & Candiano scriberem (d), satis jam attigi: & probabiliter a Wesselingio leguntur Popilienses viri adhæreant Sapis portui, juxtaque conscendant fluctus marinos. Coloni decumani speculentur juxta portus Candiani. In his tamen vocibus, quas minime ille explicat, Coloni decumani subesse mendum, suspicor: quas ego antequam vitiarentur, ut fit, describentium inscitia, aut incuria, ad incolas Comacini attinuisse, ex eo conjecerim, quod, si illas excipias, non facile alias invenias in hoc universo

F 2

Agnel-

(e) Epist. III. n. 7. (f) Lib. Pontif. P. 1. in Vita S. Jo. I. c. 3. (g) Hist. Dec. 1. l. 3. (h) Hist. Rav. l. 3.  
(i) in Adnot. ad Itinerar. ab Urbe Mediolanum. (k) in Observ. ad cit. Vitam n. 7.  
(l) Ibid. in Vita S. Petri I. c. 2. (m) Ibid. P. 2. in Vita S. Theod. c. 2. (n) in Præfat. n. cit.  
(o) in Observ. ad Vitam Mauri Schism. n. 2. (p) n. 3. (q) Ibid. (r) Sagre Memor. di Rav. (s) Hist. Rav. l. 7.  
(t) Hist. Dec. 3. l. 8. (u) Corso Geogr. Univ. Tav. Territor. di Rav. (x) P. 2. in Vita Felic. c. 3.  
(y) Epist. III. n. 7. Ep. IV. n. 13. Ep. V. n. 15. Ep. VI. n. 11. (z) Adnot. ad Itinerar. (a) Epist. III. n. 7.  
(b) Vid. Epist. XIV. n. 7. & seq. (c) Vid. ibid. n. 13. & seq. (d) Epist. VI.



Agnelli loco; quæ ad eos spectare potuerint; spectasse autem aliquas, apparet ex Blondi (e), Justiniani (f), Thomaii (g), & Rubei (h) lectione, qui, Ravennatum adjutores in eo ipso periculo de quo Agnellus hic loquitur, memorantes, magno omnes consensu Comaclenses diserte connumerant. Quin Blondus apertissime ostendit, se hunc quem consideramus, Agnelli locum in iis nominandis esse secutum. Hæc enim, inquit, *descriptio ab Agnello, qui propinquus illis temporibus fuit, accuratissime facta, magnam ostendit fluviorum, populorum, & locorum regionis mutationem. Cervienses enim, & Comaclenses, nunc pene nulli, copiose fuerunt manus.* Quæ cum de Cerviensibus etiam lego, Cerviamque a tribus præterea quos laudavi, Historicis inter eas quæ Ravennatibus auxilio fuerunt, civitates primo pariter loco memoratam animadverto; facile adducor ut credam, aliquid ibi deesse, ubi supra Wesselingius legit, *Sarxena excubet Cerviæ*, probabiliter quidem, ut dixi, si alios quam codices ab Doctissimo Editore Agnelli repræsentatos, non spectemus. Sed Historici illi aliter scriptis, & fidelioribus, ut puto, codicibus utebantur. Quos inter is, facile vetustissimus, fuit quem perlegisse, & quæ e re sua essent, inde excerpisse videtur Rubeus (i), & quem postea questus est, *superioribus annis ab Ravenn. Archiepiscopatus Bibliotheca sublatum, nullibi inveniri.*

Quæ de nostratibus proxima sunt apud Agnellum, *Livienses accolæ insistent in littore curvo*, nec Wesselingio, nec mihi ea esse videntur, ut mutationem requirant. Secus quæ de Faventinis sequuntur. Hæc ille ita rescribenda esse, censuit, *Beden-tem veterem Utentem amnem castra Faventina scrutentur.* Quæ si de Roncho dicta accipias; possim fortasse non improbare: non possim autem, si de Montono, ut fufius alibi (k) indicatum est. Hactenus hæc, quæ, ut vides, ad littus attinent quod superiore Epistola spectavimus: ideo autem hic attingimus, ut luculentius appareret, eodem quo nos, ordine Agnellum hinc ad diversam plagam transilisse; ab ea autem per littus alterum ad Ravennatem demum portum venisse. Attendas igitur quæ porro adjecit de littore hoc altero; ea enim sunt quæ ad portus attinent reliquos, & ad quæ recte intelligenda utile est novisse ubi duæ illæ essent Aedes sacræ, S. Mariæ ad Blanchernas, & S. Mariæ in Palatiolo.

6. Ea autem ad hunc modum legenda esse, censuit Wesselingius. Post, *Saturnum portum, & Eridani ora Corneliensis acies lustret. Coriandri campos, & loca omnia circa phalanges armatæ, Bononiensis Eridano transmissio portum Leonis servant.* Mihi vero magis placeret, si inter duas illas voces circa, & phalanges majori distinctionis nota interpolita, minori autem inter lustret, & Coriandri, aciei Corneliensi præter Vatrei portum, & Augustæ Fossæ initium lustrandos insuper daremus in proximo littore Coriandri campos, & loca omnia circa; phalangibus autem Bononiensibus, trans Augustam Fossam traductis, locum præcipuæ curæ servandum assignaremus, portum Ravennatem. Sed Wesselingius, cui Saturnum, id est Vatrei portum primo quidem placuerat hic legere pro Lachernum, maluit postea Blachernum rescribere, siue Blachernarum, qui videlicet portus cognomen traxisset a Sacratio Virginis Mariæ ad Blanchernas. Et negari quidem non potest, sic minus a voce quæ legebatur, Lachernum recessisse. Sed ut Vatreus, seu Vatrei portus notissimus est (l); sic Blachernus omnino ignotus; qui si quis fuit, cum haud minus quam Blachernæ, suburbanus fuerit; non videtur a portu Ravennate aut diversus fuisse, aut longe abfuisse, ut puta si forte eas Fossæ Augustæ oras quæ Ravennam attingebant, usu dumtaxat spectato, portum vocassent minus propria significatione, sed vulgari consuetudine, ut nunc Romani ripas Tiberis duobus in Urbe locis portus vocitant. Vides quo descendam, ut ratione aliqua tuear Viri Cla-

rissimi cogitatum. Namque ab Ravennate portu; ut proposita requirit partitio, non diversum fuisse quæ crederem, cum alterum Blachernum portum, alterum autem portum Leonis in ista una, eademque enumeratione dictum ab Agnello viderem, & alterius custodiam Corneliensibus, alterius Bononiensibus assignatam! Non puto autem, a te illud ex me requiri, ut portum Leonis eundem ac portum Ravennatem fuisset, ostendam. Satis id ex Rubeo, cum Agnello, aliisque Historicis collato, omnibus, tibi in primis esse manifestum, censeo. Nosti enim, Rubeum (m) ubi Odoacrem narrat a Theoderico Ravennæ obsessum, hunc scribere *Arimino naves aliquot castellis munitas, Dromones Græci vocant, advehi in Ravennatem portum imperavisse, quo ab ea etiam parte obsidio acrius instrueretur.* Hoc autem illud ipsum est quod Agnellus, ut initio diximus (n), de Theoderico narravit; & abiit ad Ariminum, inquit, & venit exinde cum Dromonibus in Portu Leone. Neque obstant quæ continuo subjecit, *ubi postea palatium modicum ædificare jussit in Insula non longe a littore maris, ubi nunc Monasterium S. Mariæ esse videtur infra balneum non longe ab Ravenna milliario VI.* Nam etsi hæc a nobis de Palatiolo, & de Aede S. Mariæ in Palatiolo ita ut par erat, explicata sunt (o), utrumque autem multo majori ab Ravenna intervallo distare, ostensum est, quam tunc portus Ravennas distare posset; tamen illa Agnelli vox ubi si quod a primo videtur, significaret, in ipso portu indicaret fuisse palatium ædificatum, quod nec veri simile esset, & Agnello repugnaret ibidem in Insula ædificatum dicenti, quam Rubeus (p) describit, ubi etiam, ut dictum est (q), Palatiolam vocat.

7. Sed quoniam Vir Cl. Agnelli Editor (r) ad proposita illius verba adnotavit, *loci faciem adeo immutatam esse, ut difficillime conjici possit, ubi Palatium Theoderici, Portusve Leonis fuerit;* me quoque juvat admonere, non illum ipsum locum in quo utrumque fuit, digito indicari nunc posse; sed tamen satis esse, si palatium prope Aedem S. Mariæ in Palatiolo fuisse dicatur, Portus autem Leonis ibi, ubi tunc Ravennæ erat portus: quem urbi proximum fuisse existimo Theoderici temporibus, nec fortasse ita procul ab ejus Mausoleo, Rotunda nunc vocitata, si in verbis quidem Agnelli, alias (s) a nobis de eo productis, quod ipse ædificare jussit extra portas Artemetoris, quod usque hodie vocamus ad Farum, si, inquam, duo ista ultima verba ad Farum sic accipienda credis, quasi turrim quandam Phaream significarent. Utcunque id est; satis, ut dixi, in præsentia est, Portum Leonis illum tunc fuisse, ex quo uno urbs, alioquin undique obseffa, advectam mari annonam accipere potuisset, nisi dromonibus fuisset clausus. Itaque Blondus (t) quanta id factum rerum in urbe penuria consecuta sit, narrat, simulque Ravennatem portum tunc portellionem fuisse dictum; nam apud Agnellum, quem in ea narratione auctorem laudat, non legisse Portu Leone, aut parte Leonis, vitiato ibi, ut opinor, codice, videatur: quanquam unde id Leonis nomen provenerit, & num tuto nunc rescribatur Leonis, pro certo dicere non ausim. Vides interim, unde Blondus Portellionem tunc appellatum crediderit: quod, aut Portilii nomen, ab illo acceptum Leander (u), & deinceps alii, inter quos Rubeus (x), & Coronellius (y) iterarunt. Sed Paulus Merula (z) cum Ravennatem portum affirmat vel nunc Portellionem vulgo dici --- quod Classensi illo multo minor, æque vera tradit, ac cum ibidem, Sidonii verbis abusus, alibi (a) a nobis descriptis, Classensem fuisse, ait, veterem portum, novum autem hunc Ravennatem; quasi vero hic ante Classensem, si non tantis classibus, at alicui certe stationem, ut in aliis posui Litteris (b), non præbuisset.

8. Cum vero hunc Ravennatem portum dico; cave, aliter a me dictum credas, ac paulo ante declaravi.

(e) Hist. Dec. 1. l. 10. (f) De Orig. Venet. l. 9. (g) Hist. di Rav. P. 1. c. 8. (h) Hist. Rav. l. 4.  
 (i) Ibid. l. 5. (k) Epist. IV. n. 13. (l) Vid. Epist. III. n. 3. & Epist. VI. n. 17. (m) Hist. Rav. l. 3.  
 (n) supra, n. 3. (o) Ibid. & n. 4. (p) Hist. cit. l. 7. (q) supra, n. 4.  
 (r) in Observ. ad Vit. S. Jo. l. n. 7. (s) Epist. III. n. 10. (t) Hist. Dec. 1. l. 3.  
 (u) Descrip. di tutta Ital. Reg. 14. (x) Hist. cit. l. 1. (y) Ravenna Ant. (z) Cosmogr. P. 2. l. 4. c. 23.  
 (a) Epist. VI. n. 10. (b) Ibid. n. 2.



ravi. Qua utinam declaratione Cluverius ( c ), alii-  
que uli essent, qui cum de vetere loquuntur Ra-  
vennae portu, ibi videntur ubi sequioribus fuit sæ-  
culis, indicare, quasi tunc obliti essent, eam  
urbem primum inter marinas undas, & æstuarium con-  
ditam, a mari autem deinde magis magisque receden-  
te remotam, portum primo propiorem, mox semper  
magis atque magis dissitum habuisse. Nam quodcun-  
que fuerit tempus quo Ravenna esse cœpit, & qui-  
cunque populi qui eam condiderint, quarum contro-  
versiarum neutram hic a me agitari, necesse est; il-  
lud certe inter omnes constat, antiquissimis conditam  
fuisse temporibus: locus autem in quo condita est,  
in mediis undis videlicet, cœnofoque fundo, ac rerum  
omnium egeno, quemadmodum Tondutius ( d ) loqui-  
tur, ut necessitatis potius fuisse videtur, quam electio-  
nis, ita conditores significat, libertatis, ac vitæ amo-  
re impulsos, cum cederent numero sive Etruscorum,  
sive novi alicujus populi, suas in sedes irruentis, il-  
luc confugisse, ibique tutam sibi sedem paravisse qua  
parvæ insulæ inter undas nonnihil exstabant; siquidem  
vel Procopii ( e ) tempore animadverto, Ravennam  
etiamtum clementer edito sitam fuisse loco. Qualis au-  
tem primis temporibus fuisset, ex ea licet descriptio-  
ne conjicere, quæ Tiberii ævo edita est. Intra palu-  
des, inquit Strabo ( f ), urbs maxima Ravenna posi-  
ta est, tota ligneis compacta ædificiis, aquis diffusa,  
pontibusque, ac lembis peragrata. Cum a mari fiunt  
inundationes, non mediocrem accipit maris partem.  
Quod si vel tunc erat ad istum modum; sane intelli-  
gis, haud in eo laudandum esse Cluverium ( g ),  
quod in Tabula qua Umbriae Antiquæ Descriptionem  
proposuit, terræ aliquid inter Ravennam, & mare in-  
terjectæ appinxit. Serius omnino hoc accidit, ut Si-  
donii, Procopii, Jornandis descriptiones ostendunt.  
Sidonius enim; ut alios ejus locos omittam; ea de  
urbe sermonem habet in hunc modum ( h ), in qua  
palude indefinenter rerum omnium lege perversa, muri  
cadunt, aquæ stant: turres fluunt, naves sedent: -- si-  
riunt vivi, natant sepulti: quæ postrema duo verba,  
cum in omnibus quæ præcedunt, & subsequuntur,  
contraria poni, animadverterem, aliquando suspicatus  
sum ita esse legenda potant sepulti. At certe anno  
467. suum illac iter serio describens ( i ), se se hinc  
falsum portis pelagus impingens memoravit. Procopius  
autem ut se res haberent anno 536. proponens ( k ),  
stadiis duobus interpolatam Ravennam ait, quo minus  
maritima esset ( id est, ut Rubeus ( l ) explicat, fuisse  
a mari procul circiter 250. passus ) & nihilominus  
( m ) quotidie -- diluculo mare, in morem flumi-  
nis, tanto spatio, quantum expeditus viator uno  
die conficiat, in terram effundere se se, & naves  
pati in media continente: itaque navigia ad urbem  
ipsam perferri. Jornandes denique ( n ) cum an-  
no, ut credendum videtur, 552. Ravennæ si-  
tum describeret ( neque hunc ex Dionis deperdi-  
to loco, quod Cellario ( o ) excidit, forte ut sit in  
longis Operibus, minus attendenti, de Classensi dum-  
taxat portu Dionem ab Jornande laudari ) urbem il-  
lam dixit inter paludes, & pelagus, interque Padi  
fluenta uno tantum patere accessu: -- super mare Jo-  
nium constitutam, in modum insulæ influentium aqua-  
rum redundatione concludi; habere ab oriente mare, --  
ab occidente vero habere paludes, per quas unus angu-  
stissimus introitus, ut porta, relictus est; lego enim ex  
parte, ut in Ambros. Cod. ex parte, ut Cluverio  
( p ) quoque legendum esse visum est. Cernis, ut  
hoc primum tempore de uno tantum introitu, eoque  
angustissimo, per paludes ad occidentem solem reli-  
cto, verba fiant, Procopius ( q ) certe pedestrem e-  
xercitum, inquit, ab Ravenna excludunt aquæ, quibus  
Padus amnis, e montibus Gallicis eo decurrens, alii-  
que fluvii navigabiles, & lacus, urbem illam undique  
ambiunt.

9. Unde autem factum dicemus, ut angustissimus  
ille trames per medias paludes apparere inceperit, &  
mare quoque ad 250. passus ab urbe removeri? Sci-  
licet flumina quæ in eas diximus paludes confluere,  
limo sensim, sed semper in vecto, partem tandem so-  
li aliquam minus profundam extulerant. Eadem quo-  
que in mare denique limum importantia, illius oras  
longius protulerunt, & mare ipsum, procellis præ-  
sertim agitatum, dum ad eandem arenam impulit,  
magis magisque littus extulit, ipsumque ulterius pro-  
duxit. His potissimum de causis accidit quod Pytha-  
goras se quoque vidisse ajebat apud Ovidium ( r ).

vidi factas ex æquore terras. --

Eque paludosa siccis humus aret arenis.

Sic Herodotus ( s ) Ægyptum esse dicebat Nili do-  
num. Atque, ut ad maria redeamus Italica, sic Lan-  
ciscus ( t ) intra annos non totos 150. littus ad Ti-  
beris ostium passibus plus mille in mare se produxisse,  
certa observatione demonstrat; & ne longius ab A-  
driatico nostro abeamus, & pervetusta exempla Pata-  
vinæ oræ omittamus adeo auctæ, ut vicus ostendit  
( u ), qui nunc corrupto nomine *Auriacus* appellatur,  
dictus a majoribus ora lacus, quod ad eum usque lo-  
cum -- paludes stagnarent; Braschius ( x ) testatur,  
non modo antiquam *Turrim* vicini *Portus Cæsennatici*,  
quæ anno 1302. -- constructa fuit ad ejusdem tutelam  
in margine littoris maris, ab hoc jam nunc distare se-  
re per mille passus; sed & ( y ) *Turrim* alteram,  
postea excitatam, & ipsam jam distare ab ostio *Portus*  
400. fere passus. Quod si quo propiora sunt magno-  
rum fluminum ostia, eo plus littoribus additur limi;  
animadvertas velim, oræ maris Ravennati proximum  
fuisse *Spineticum Padi* ostium, id est, ut non  
semel diximus, illius alvei qui inter cæteros *Padi* lon-  
go sæculorum spatio maximus fuit, eamque convexit  
limi copiam, ut si verum Strabonis ( z ) ætate tra-  
debatur, *Spina*, quam olim urbem ad illius ostium  
alvei constructam unda maris alluerat, tunc *XC. a ma-  
ri stad. distans*, in mediterranea jaceret. Fac igitur co-  
gites, limi ab eo alveo advecti partem eo motu Ra-  
vennam versus fuisse compulsam, quo perspectum est,  
Adriatici Sinus aquas, secundum littora Illyrica ab o-  
riente occasum versus tendentes, in reditu secundum  
Italiæ littora ab occasu ferri orientem versus. Sed ut  
limum nullum præter eum spectemus quem *Monto-*  
*nus*, & *Ronchus* sequioribus sæculis importarunt,  
quid ei acceptum ferendum sit, & *Magini*, & cæte-  
rorum deinceps Tabulæ præclare ostendunt, quarum  
pleræque ad commune utriusque ostium, aut contra  
ipsum & brevia, & tumulos, nonnullæ quosdam et-  
iam quasi aggeres utrinque in mare longius productos  
commonstrant. Denique his omnibus si redundan-  
tium fluviorum alluviones addantur, quæ crebro iis-  
dem sæculis circa Ravennam contingere, satis multæ  
erunt causæ unde intelligamus, non productum modo  
ulterius in mare littus, sed ita solum fuisse altius fa-  
ctum, ut quod in urbe anno 536. etiamtum, ut di-  
xi ( a ), paulo magis quam circumjectum, exstabat,  
annis superioribus effodiendo inventum sit ( b ) unum  
circiter *Bononiensem* pedem depressius superficie maris  
in mediocri & quotidiano æstu, quod vetustius pavi-  
mentum planissime ostendit *Metropolitanæ Basilicæ*,  
circa annum 400. ædificatæ. Et quamvis urbanum  
solum ruderibus subinde per tot sæcula superjectis  
multo altius hanc præsertim ob causam fieri debuif-  
se, non negem; tamen & urbi circumjectum solum  
tanto magis quam olim fuerat se extulisse, manife-  
stum est, quanto minus hoc tempore est spatium quod  
in quotidiano maris æstu aquæ occupant, quam illud  
esset, quod Procopii tempore diximus ( c ) occupas-  
se.

10. Igitur uti eæ quæ propositæ sunt, causæ sen-  
sim quidem, sed aliæ interdum, aliæ semper, aliæ  
minus, aliæ magis suas vires exeruere, ita sensim  
sem-

( c ) Ital. Ant. l. 1. c. 28. & 35. ( d ) Favent. Hist. Breviar. ( e ) De Bello Goth. l. 1. c. 1.  
( f ) De Situ Orb. l. 5. ( g ) Ital. Ant. ( h ) l. 1. Epist. 8. ( i ) l. cit. Epist. 5. ( k ) c. cit.  
( l ) Hist. Rav. l. 3. ( m ) secund. vers. Maitreii. ( n ) Hist. de Reb. Get. c. 29.  
( o ) Notit. Orb. Ant. l. 2. c. 9. n. 90. ( p ) Ital. Ant. l. 1. c. 28. ( q ) c. cit. ( r ) Metamorph. l. 15.  
( s ) in Euterpe. ( t ) Animad. in Plin. Villam. ( u ) Vid. Justinian. de Orig. Vener. l. 4.  
( x ) De vero Rubic. c. 14. n. 19. ( y ) c. 6. n. 10. ( z ) De Situ Orb. l. 5. ( a ) n. 8.  
( b ) Acad. Inst. Sc. Bonon. T. 2. P. 2. Opusc. 1. ( c ) n. 8.



semper, sed nonnunquam tardius, alias citius mare visum est ab urbe recedere donec revera tanto intervallo distare cœpit, ut crediderint aliqui, non mare ab ipsa, sed ipsam, aut certe magnam ejus partem a mari recessisse, introrsum videlicet, nova, ut non paucis contigit urbibus, ædificatione retractam. Quorum opinionem a vero esse prorsus alienam, per facile est demonstrare. Porta enim illa quam ob operis magnificentiam, & marmorum nobilitatem Auream dicebant (nam (d) ex duabus maximis constabat portis, quibus minores utrinque adstabant, marmoribus autem ornabatur ejusmodi, ut multa ob pretium, & raritatem Federicus II. Cæsar digna crediderit quæ, inde abstracta, Panormum mitterentur (e)) illa igitur Porta, quam eandem esse quæ a Tiberio Claudio anno æræ, cujus est mihi usus, vulgar. 42. Ravennæ cum muris data fuerat, inscriptæ litteræ testabantur, præclare omnibus ostendit ad annum usque quo penitus diruta ea Porta est, 1582. non alio urbem translata esse. Cluverius autem (f) cum duo poneret, alterum, Fossam Augustam mediam Ravennam divisisse, alterum, ejus Fossæ alveum ibi fuisse ubi nomen adhuc superest *Fluminis veteris*; ex his adferre, non dubitabat, magnam tum urbis partem ab orientali fuisse prædicti *Fluminis veteris* parte infra confluentes nunc *Bedesis & Utentis*: quo etiam illud Procopii jam recte congruat, ubi tradit, eam, „ duum stadiorum intervallo remotam fuisse, quo minus esset „ littorea „. Verum, ne hic quæramus, num quod Jornandes (g) dixerat, Padum mediam civitatem influere, Sidonius autem (h) interluere, significet in duas æquales partes dividere, numve qua nomen superest *Fluminis veteris*, illac Fossa Augusta transisset; magnæ istius, quam tanto propius mare fuisse, Cluverius dicit, Ravennæ partis, & portionis item illius non parvæ, quam inter eas confluentes duorum fluminum, & præsentem urbem ponat, necesse est, cur ædificium, imo vestigium superfuit nullum, cum alia diu superfuerint, & quædam adhuc supersint quæ aut multo ante Sidonii, & Jornandis tempora, aut paulo post ipsa in præsentis urbe, aut extra ipsam condita fuerant, ut puta Porta, de qua dictum est, Aurea, Ædes S. Martini in cælo aureo, Ædes S. Vitalis, Mausolæum Theoderici, Classensis Ædes S. Apollinaris, & alia id genus? Illud præterea quo Cluverius credit opinionem confirmari suam, hanc, si recte attendamus, omnino convellit. Si veterem urbem eo pervenisse, ponamus; intervallum inter eum locum, & mare idem est, inquit, quod erat Procopii tempore. Ego vero ajo, si Cæsenas littus, Ravennæ proximum, intra quatuor sæcula tantum excrevit, & in mare productum est, quantum superius (i) ostendimus; credi non posse, Ravennæ littus intra decem sæcula; tantum enim, imo plus temporis inter Procopii, & Cluverii ætatem intercessit; nihil omnino crevisse: neque credi igitur posse, Ravennam eo pervenisse Procopii tempore, quo nimirum si pervenisset, nihil omnino intra decem sæcula littus crevisset.

II. Cum igitur constet, Ravennam ubi nunc videmus, ibi etiam olim fuisse, & quæ, Tiberio imperante, aquis diffusa, pontibus lembisque peragrabatur, sub Justiniani imperio jam mare dissitum habuisse ad passus 250. nunc autem habere ad passus amplius 4000; ex me quæres, extentne Majorum testimonia, unde scire liceat, a Tiberio ad Justinianum, & ab Justiniano ad hanc ætatem quæ littoris accessiones, & quæ portus mutationes quo tempore ad Ravennam sint factæ. Mihi vero alia quidem incerta sunt; alia certa. Incertum exempli gratia est quod scribit Claramontius (k), Honorio imperante (imperavit autem ab anno 395. ad 421.) Ravennam fuisse *instar Venetiarum nunc, totam lembis, & pontibus (ut dicit Suetonius) peragratam*. Undecunque id haurerit Claramontius; Suetonius certe nihil habet ho-

rum, nec habere quidquam potuit de Honorii temporibus is qui anno floreret 117. At enim hæc de Ravenna tradiderat Strabo. Vero: & nos hujus locum supra (l) produximus. Sed creditu difficile est, qui status Ravennæ fuerat sub Tiberio, eundem fuisse sub Honorio, præsertim cum Ulpiani, imo Celsi J. C. ætate jam in ea urbe hortos haberent homines etiam neque prædivites, neque primarii. Constat enim ex *Digestorum* libro 17. (m), referente Ulpiano, Celsum respondisse super ædificiis, quæ, mandante Aurelio Quietō, *hospes hujus Medicus fecerat in hortis, quos Medicus ipse habebat Ravennæ, in quos omnibus annis valetudinis causa secedere solebat Aurelius*. Quod si forte dubitas, an is Celsus fuerit P. Juventius Celsus, quem sub Trajano, & Hadriano alii floruisse docent, alii autem multo juniorem faciunt fortasse quia Spartianus (n) non illum, sed *Julium Celsum* nominat inter Jurisconsultos qui in consilio ab Hadriano habebantur; satis est ponas id quod manifestum est, illud ejus responsum ab Ulpiano fuisse relatum, cujus eximii Jurisconsulti ignorari ætas non potest. Etsi enim anno 221. quod Viris excidit alioquin Eruditissimis, occisus non est a Caracalla, qui anno 217. ipse occisus fuerat, imo ab ejus successore Alexandro tanti factus est, ut, quod Lampridius (o) scripsit, *ideo summus Imperator fuerit, quod ejus consiliis præcipue rempublicam rexit*; tamen si vel Alexandro superstes fuit, qui eum saepe a militum ira objectu purpuræ summæ defenderat; non videtur mox effugere potuisse Maximini crudeles manus, qui, teste Capitolino (p), *omnes Alexandri ministros variis modis interemit*; ut ad annum 236. quo Maximinus trucidatus est, non pervenisse putem Ulpianum. Et certum quidem est quod ex producto consequitur loco gravis hujus Auctoris. Attamen longo post ea tempora intervallo illud quoque certum est, *omnibus Venetis monumentis testantibus* apud Bernardum Jultinianum (q), simul Paulum Exarchum Ravennam a terra oppugnasse, simul Venetorum classem a mari adortam, & ad urbis mœnia applicitam esse, ut *majorum navium mali, atque antennæ armatis onerate, murisque pontibus injectis incubuerint*. Quod, Rubeo (r) pariter confirmante, cum anno acciderit 725. non satis potest cum Procopii (s) descriptionibus conciliari, nisi effusum post annum 536. amplum, profundumque a portu ad ipsa usque urbis mœnia canalem dicas, per quem gravissimæ naves tuto possent ad hæc usque perducere, & si res posceret, inde reduci. Veri autem simile est, ejusmodi canalem illum ipsum alveum fuisse qui aquam Fossæ Augustæ per urbem tractatæ vel omnem olim, vel ex parte saltem aliqua, ex quo ea Fossa ad Classensem portum producta fuerat, ad Ravennatem portum perducere solebat, Procopii tempore fortasse oblitatus. Honorio enim, de quo paulo ante diximus, VI. Consule, id est Anno 404. ejus iter Ravenna Romam sic describere incepit Claudianus (t)

*antiquæ muros egressa Ravenna*

*Signa movet, jamque ora Padi, portusque relinquit*

*Flumineos, certis ubi legibus advena Nereus  
Æstuat, & pronas puppes nunc amne secundo,  
Nunc redeunte vehit, nudataque littora fluctu  
Deserit, Oceani lunaribus amula damnis;  
Latior hinc Fano recipit fortuna vetusto.*

Quæ certe commodius non possis explicare, quam si ponas, primum illum Padi alveum, videlicet eam Augustam Fossam in qua primum Padi ostium agnovimus (u), etiam tum portibus inservientem, Ravenna egressis, & pedestri itinere Romam versus tendentibus occurrisse. Veri quoque simile est, posteaquam eadem Fossa ad illam tandem aquæ inopiam redacta est, ut neutri jam inserviret portui, sed naviculas dumtaxat ex Spinetico Padi alveo Ravennam usque perferret, tunc in reliquum ejus Fossæ alveum, qui

(d) Vid. Rubei Hist. Rav. l. 11. (e) Ragguaglio della Diversi. de' due Fiumi. (f) Ital. Ant. l. 1. c. 28.

(g) Hist. de Reb. Get. c. 29. (h) l. 1. Epist. 5. (i) n. 9. (k) Cæsen. Hist. l. 4. (l) n. 8.

(m) tit. 1. lege 16. (n) in Hadriano. (o) in Alexandro Severo. (p) in Maximinis.

(q) De Orig. Venet. l. 10. (r) Hist. Rav. l. 4. (s) De Bello Goth. l. 1. c. 1. (t) De VI. Honor. Consul.

(u) Epist. 111. n. 3.



qui videlicet inter Ravennam, & mare interjiciebatur, hinc Montoni, inde Ronchi aquam fuisse inductam ea spe, ut circumjecta urbi stagna, in quæ illa antea effundebatur, sicarentur, ut quod munimentum urbi adimeretur stagnis exsiccatis, circumductis circa mœnia amnis suppleretur, denique ut suus Ravennæ portus, hujusque cum urbe communicatio aliqua conservaretur.

12. Sed quo hæc tempore facta sint, æque incertum est, ac quo primum tempore turris illa pharea; si pharea tamen fuit; ad Ravennatem portum extructa sit, quam sacræ turris usum Ædi S. Mariæ, in portu dictæ, nunc præbere, alibi (x) memoravimus. Ea sacra Ædes ab urbe abest perticis Ravennatibus quingentis viginti, a mari autem quingentis; ut cum circa initium sæculi XII. sicut ostendimus (y) condita sit; ubi tunc esset Ravennæ portus, ex ejusdem Ædis cognomento præclare appareat. Quod ut certum est, ita certum quoque esset, aliquot ante sæculis ibidem illum fuisse portum, si turrim illam revera phaream fuisse, constaret. Neque enim extructa esset postea quam Ravennæ antiqua dignitas, frequentia, mercatura jam valde erant imminutæ. Illa enim quæ lignea, ut diximus (z), tota fuerat Tiberii temporibus, a Claudio postea muris & marmorea speciosissima Porta, a Galla autem Placidia, & ejus filio Valentiniano, a Theoderico, ab Exarchis, aliisque Græcis, magnificis Templis, Ædibusque, atque auro in iis, & non uno celebri musivo opere, ac marmoreis præsertim quantivis pretii columnis ornata, quas Blondus (a) Constantinopoli, & Roma ex palatio Pinciano advectas fuisse, tradit, eadem ex quo neque Imperatoribus neque Regibus, neque Exarchis sedem amplius præbere cœpit, ornamenta quidem illa retinuit, sed non hominum frequentiam illam tantam, quæ navigationi assiduæ, & mercaturæ occasionem afferebat, præsertim cum auctæ interea Venetiæ ad se rem nauticam fere omnem, ut Rubei ipsius (b) verbis utar, & mercaturam, navigationemque traduxissent, quippe ad emporium multo commodius tum ad transvehenda Orientis aromata in Pannonias, Germaniamve, tum ad accipienda; neque enim brevibus, quæ circa Ravennæ littus, Procopio auctore (c) in mare ad XXX. saltem procurrunst stadia, majores a Veneto littore arcentur naves, neque postquam portum subiere, quo minus in mediam pergant urbem prohibentur, quod Ravennæ post imminutam aquarum profunditatem amplius non licebat; ne quid de aeris minori tunc facta certis præsertim anni temporibus salubritate dicam postquam maris æstus ob auctam littoris altitudinem ad circumjecta urbi stagna haud amplius perveniebat, neque fluxu aquarum, ac refluxu agitabatur aer, atque expurgabatur, nec quidquid erat corruptius, in mare procul asportabatur, ut antea fieri consueverat, quemadmodum, de Vitruvii sententia, loquitur Rubeus (d), qui insuper maris falsedinem addit, quæ quid Venetiis prættet, Ludovicus Testius (e) Amicus, dum viveret, nollet ostendit. Ob has igitur aut omnes, aut plerasque causas cum Ravennæ opes, & mercatura decrescere cœpissent circa annum 816. ut idem fatetur Rubeus (f), turris pharea neque tunc potuit, neque postea, sed superioribus temporibus omnino debuit ædificari.

13. Ravennatis portus quæ olim fuerit ab urbe distantia, ex antiquis Scriptoribus, & monumentis clarius ostendere non licuit, quam hætenus facere conatus sum. Nec vero id mirum adeo in tanta rerum antiquitate. Illud mirum, ubi ad propiora nobis sæcula ventum est, de ea distantia videri neque inter Auctores convenire, neque interdum unum, eundemque satis secum consentire Scriptorem. Nam Blondus (g) cum circa annum scriberet, ut alibi (h) ostendimus, 1450. distare a portu secundo milliario Ravennam, tradidit. Bernardus autem Justinianus (i)

qui Historiam non ita multis post annis condebat suam, quippe ipsa necdum absoluta anno mortuus 1489. hanc urbem ait ab aquis recedere passuum plus quam tribus millibus. Rubeus denique cum suas Ravennates Historias iterum anno ederet 1589. distare, ait (k), altero tunc fere milliario Ravennam a mari; suorum autem patrum ætate multo minus fuisse distantem. Alio autem loco (l) supra dixerat, eam tunc a mari, qua parte Septentriones respicit, bina passuum millia; ad Orientem vero hibernum, quatuor abesse; verum mox abesse, inquit, a mari supero quod ad Orientem Solem spectat, millia passuum duo. Scilicet videndum est, an intelligere hic potuerit ad Orientem æstivum; Blondus autem, & Justinianus an alius aliam spectaverint plagam; multo enim magis in mare producitur littus qua ab urbe ad mare lineam contra Orientem æquinoctialem sic ducas, ut neque ad dexteram, neque ad sinistram partem obliqua feratur, quam si utrolibet, & præsertim ad Orientem æstivum, magis aliquanto inclinetur. Quod non accideret, si littus ipsum parallelam Ravennæ lineam servaret; illud vero diu convectis a communi Ronchi, & Montoni alveo arenis, ibi quo lineam ducendam dixi, in duos quasi aggeres ulterius procurrit, de quibus supra quoque (m) memoratum est. Itaque ibi nunc extrema ora ab urbe distat mille, & quadringentas circiter perticas Ravennates, quarum ducentas quinquaginta æquare passus mille facile intelliges libro inspecto qui Ragguaglio Istórico inscribitur della Diverfione dei due Fiumi il Ronco, ed il Montone dalla Città di Ravenna (n).

14. Quod si arenæ, ab duobus illis amnis importatæ, semper omnes adlaterata in eos aggeres ita secessissent ut & satis spatii relictum esset ad naves excipiendas, nec arenis ipsis ad fundum labentibus hic altior fuisset factus; sane eorum nihil accidisset quæ homines denique coegere, ut alium ad veteris latius alveum, portumque effoderent; ut confluxus utriusque amnis mutarent locum; ut ab urbe ad mare pararent Fossam mercibus transvehendis; postremo ut amnium alveos tum peculiares, tum communem longius ab Ravennæ muris amoverent. Quibus de singulis rebus cum pauca subjecero; finem continuo scribendi faciam. Igitur vetus Ravennæ portus si non eam capacitatem servaverat, ob quam anno 1177. (o) de classe Friderici Imperatoris a Venetis victa triremes quatuor in portum se Ravennatem recepere; at is saltem erat etiamtum anno 1512. (p) ut duæ naves post infandam illam Ravennæ direptionem spoliis nobilioribus onustæ -- dum e Ravennati portu enavigare contenderent una cum ceboce remorum quadraginta, a Venetis duabus navibus caperentur: quod Petrus Bembo (q), quem Rubeus laudat auctorem, factum ait in Ravennæ portu. Sed postea hic idem portus, qui ad Orientem hibernum positus erat, cum oblimatus arena (sicut Rubeus (r) tradit) naves non exciperet, alio facto Viti Montonique fluminibus alveo, ad Orientem æstivum traductus est anno 1563.

15. Verum limo arenaque sensim quidem, sed crebro depositis cum fundus hujus quoque novi portus, & alvei altior factus esset; accidit denique miserranda illa Ravennæ inundatio sub finem Maii A. 1636. Cumque inter cætera ad ejusmodi infortunium in posterum præcavendum auxilia, confluxus utriusque amnis mutatio proposita esset; hæc anno 1647. ut alias (s) diximus, perfecta est. Scilicet ex quo illi ad cingenda utrinque urbis mœnia perducti fuerant; sub ipsis mœnibus, ut Blondus (t) loquitur, sive paulo infra urbem, ut ait Rubeus (u), jungebantur. Tunc autem Montoni alveus longius ab Ravenna productus, bis mille propemodum passuum ab hac intervallo in communem cum Roncho alveum deductus est,

16. Ut

(x) Epist. VI. n. 3. (y) Ibid. (z) supra, n. 8. (a) Hist. Dec. 1. l. 3. (b) Hist. Rav. l. 5.  
(c) c. 1. cit. (d) Hist. cit. l. 1. (e) Disinganni int. all' aria di Venez. (f) Hist. cit. l. 5.  
(g) Ital. Illustr. Reg. 6. (h) Epist. I. n. 7. (i) De Orig. Venet. l. 1. (k) l. 6. (l) l. 1.  
(m) n. 9. (n) pag. 75. Vid. & Tab. 1. (o) Vid. Rub. Hist. Rav. l. 6. (p) Ibid. l. 8.  
(q) Hist. Venet. l. 12. (r) Hist. Rav. l. 10. (s) Epist. V. n. 8. (t) Hist. Dec. 3. l. 8.  
(u) Hist. cit. l. 1.



16. Ut vero portus qualiscunque Ravennæ conservaretur, simulque via minoribus navigiis pateret quæ a portu ad urbem traherentur; anno 1654. ( x ) Fossa ducta est, quæ ab Ravenna ad portum Candiani pertineret, Panfilius Canalis ab Innocentii X. qui tunc erat Pontifex Maximus, cognomine appellata. Is portus qui jam Blondi tempore ( y ) ex tanta illa amplitudine eo redactus fuerat, ut nec scapham piscatoriam, lembumve perferret, a Magino ( z ) autem, nec immerito, prorsus omissus, tunc iterum, ut sunt rerum vicissitudines, portus nomen recuperasse visus est.

17. Sed cum remotus ab Ravenna Montoni, & Ronchi confluxus novæ inundationis metum, qui sæpenumero intentabatur, nequaquam arceret, Candiani autem portus qualiscunque, arena aggesta minus in dies, minusque utilis redderetur; aliud in rem utramque auxilium quæri cœptum est. Itaque cum vel postquam anno 1721. communis utriusque fluminis alveus brevior aliquanto redditus fuerat, periculum nihilominus inundationum urgeret; ad illud tandem auxilium quod olim anno 1563. ( a ), & sæpius deinde agitatum fuerat, Ravennates redierunt, ut fluvii procul a mœnibus averterentur. Igitur nihil spei amplius, ut antea, positum est aut in confluentis infra urbem, aut in communis alvei mutatione, qui a confluyente ad mare pertinens, Blondo, & nonnullis qui aquarum, undique Ravennam olim cingentium, immemores, secuti ipsum fuerant, Plinianus Bedefis videbatur ( b ). Sed supra urbem inchoato opere, Eustachio Manfredio, & Bernardino Zendrino Mathematicis Præstantissimis docentibus, novus alveus effossus est, qui primum per firmissimam Cataractam omnes Montoni aquas, præter eas quæ in canalem derivarentur ad frumentarias molas agitandas; tum deinde omnes quoque Ronchi aquas excipiens, urbe procul a sinistris relicta, eo pergeret, ut inter veterem, & Candiani portus in mare influeret. Qui quoniam alveus tum Romanam viam, tum Panfiliam Fossam, minus alioqui, ut dictum est, utilem factam, interfecaret; Romanæ quidem viæ prospectum est lateritio Ponte, septem fornicibus nixo, incredibili celeritate perfecto; pro Fossa autem Panfilia, nova Fossa denique excavata est quæ ab urbis mœnibus incipiens, & a sinistris alvei fluminum veteris ad

mare perducta, mercibus ultro citroque transvehendis inserviret, ad ostium autem suum necessariam portus utilitatem præberet, ut in præsentis rerum statu, non contemnendam; si cum antiquo conferas, modicam. Hinc enim olim fuerat Classensis ille amplissimus portus, inde autem Vatrei, uterque per Augustam Fossam cum Ravenna conjunctus, medius quoque inter utrumque Ravennas antiquus portus, quem eadem pariter Augusta Fossa cum urbe jungebat. Nunc vero hinc Candiani portus, inde Pirotoli, exiguus uterque, & ab Ravenna disjunctus, ut nisi media inter utrumque hæc nova Fossa urbem cum mari conjungeret; Ravenna tot olim, tantisque portibus prædita, ne tenuis quidem hoc cum mari commercium esset habitura.

18. Hæc de portu Ravennate habui quæ ad te scriberem. Inter quæ ea quoque commemoravi, quæ omnibus, non modo tibi, notissima annis superioribus accidere. Neque enim prorsus omittere illa debui, quæ mihi primam tot Litteras scribendi occasionem præbuerunt. Scilicet cum latina quærerem nomina Montoni, & Ronchi, quæ Ravennæ in foro sub Pontificis beneficentissimi statua scriberentur; in plura alia incidi quæ ad fluvios illos, aliosque proximos, & ad urbes singulis aditas, Ravennam in primis, & Forum quoque Livii attinerent, nec viderentur pleraque prorsus indigna de quibus ad Amicos Doctissimos scriberem, ut in obscuris propter vetustatem, dubiisque rebus suo me, quandocunque possent, iudicio adjuvarent: id quod a te præsertim & quælibet, & expecto, alia quæ supersunt, si id non negaveris, fortasse additurus. Nunc vero quæ ex me quæris, verba subijciam qualia tunc misi Ravennam Pontificiæ statuae subscribenda: faciamque id tanto libentius quod omnia quæ novissime commemoravimus, ita comprehendunt, ut novi alvei, & Fossæ longitudinem ( quippe in utroque, & in alveo præsertim M. P. VII. majorem ) non omittendam fuisse, indicent, eamque per siglas usitatiorē apud Latinos more significandam; non incitiæ Sculptorum quæ non ea tantum in re se prodidit omnibus, relinquendam. Hoc quoque nolui nescires. Vale.

( x ) Bonoli Ist. di Forlì l. 12. ( y ) Vid. Epist. VI. n. 8. ( z ) Italia Tav. Romagna.  
( a ) Rubci Hist. cit. l. 10. ( b ) Vid. Epist. II. n. 6. & IV. n. 14.



# CLEMENTI XI. PONT. M.

QVOD AD AVERTENDAS AB RAVENNA EIVSQ. AGRO INVNDATIONES  
BEDESIM FLVVIVM CATARACTA MVLTIPPLICIS VSVS EXSTRVCTA  
IN NOVVM ALVEVM M. P.....

DE DVXIT  
IN EVMDQM. VITIM  
IMMISIT

QVOD ROMANAM VIAM EO ALVEO INTERRUPTAM MAGNIFICI  
OPERIS PONTE  
COMMITTIT

QVOD AB VRBE AD MARE PER M. P.....; FOSSAM  
PERDVXIT  
IN EAMQ. CORRIVATIS AQVIS FAGILIORI MERCIVM TRANSVECTIONI  
PROSPEXIT

S. P. Q. R.  
PROVIDENTISSIMI PRINCIPIS MVNIFICENTIAE DEVOTVS  
STATVAM P.  
A. S. CIO IOCC XXXVIII.

INCHOATA CATARACTA ET ALVEVS BARTH. MASSAEO  
ABSOLVTA OMNIA IVLIO ALBERONIO  
S. R. E. CARDINALIB. FLAMINIAE LEGATIS.



## EPISTOLA ÆMILIANA VIII.

Quod scribis, eorum quæ hætenus ad te misi, alia esse ejusmodi, ut addi nihil possit, alia, de quibus amplius quærendum putes; in altero tuam agnosco humanitatem, in altero ingenuitatem: & cum de utroque gratias agam; ago, mihi crede, de hoc majores, acturus maximas, si me ut dubitantem laudas, ita adjuves quærentem. Hac spe mittam cætera quæ requiris, inde initio ducto, unde cepi Epistola III. a Pado videlicet, ac Padusa, ut proximos ordine Æmilie fluvios deinceps sequens, ab iis qui occidenti soli propiores sunt, ad eos perveniam qui orienti sunt viciniore ex iis quidem de quibus ad te scribens egi, aut certe non multo pluribus. Sic enim de urbibus quoque, & oppidis quæ eorum plerisque adjacent, poterò ex ordine tantum dicere, nihil ut ferme reliquum sit in iis quas ad Poggium, & ad Marchesium, & ad te quoque Epistolas scripsi, quod pro mea hac mediocritate, & rerum magnæ sæpe difficultate, sæpe obscuritate non illustraverim.

2. Padi alveum quem olim omnium fuisse maximum, constat, mirum est, in ea Cellarii (a) Tabula, quæ inscribitur *Italia Antiqua*, in aliisque non pleniorum pingi cæteris alveis. De eo alveo loquor cui nunc Primarii nomen est, & quem Cellarius adscriptis litteris *Padusam* s. *Spineticum* vocat. Non levior, quamvis in re minoris momenti, Magini Tabulæ (b) errorem habent, vicum S. Alberti ad illam ejusdem alvei oram proponentes, quæ a Comacini parte est, nisi forte, ut aliquando inaudivimus, ibi tunc erat: nunc certe ad oram oppositam, ad quam bene Coronellius (c) exhibet, esse videmus illum vicum, a nobis, aliisque memoratum, cum de Augusta Fossa, inde Ravennam perducta verba fierent (d). Hanc Fossam, sive hunc Plinio, ut ostendimus (e), primum de septem Padi alveum, omitti video in illa Cellarii Tabula qua antiqua ostenditur *Gallia Cisalpina*. In ea autem quæ hac ætate vulgata est Tabula, Italiæ faciem exhibente, ut inclinante se Romano Imperio, fuisse creditur, neutrum quidem eorum deest quæ apud Cellarium desiderantur. Nam & Padi alveus qui in Spineticum ostium definit, maximus est pictus, & Fossa addita, quamvis nullo adscripto nomine, quæ ab eo alveo Ravennam pertinet. Sed circa hanc urbem nullum apparet stagnum, nulla æstuarium, contra atque rem etiamtum se habuisse, alias (f), a nobis ostensum est.

3. De Vatreno aliis Litteris (g) satis mihi videor scripisse, nisi quod Geographorum quosdam in eo lapsus qua Cornelii Forum præterfluit, aperte non indicavi. In illa igitur Cellarii Tabula quam secundo loco (h) memoravi, flumen ei Foro nullum appingitur. In ea autem qua Vir Cl. de l'Isle præsentem expressit Italiæ faciem, appictum Imolæ cernimus, non, ut est, ad orientem solem, sed ad occidentem; ut omittam, non denique in Padum, ut debebat, sed in paludem quandam induci. Geographi autem alii recentissimi, ut recte illud fecerunt quod de ejus altiore in Padum influxu visi sunt diffidere Magini Tabulis, sic utinam quem hæc delineant, Imolæ canale non pro altero duorum in quos se Vatreus divideret, alveo accepissent, cum fossa tenuis sit, manu facta, in quam Forocornelienses tantum aquæ ex flumine derivant, quantum satis sit ad frumentarias molas agitando. Sic enim verior eorum descriptio esset: nec aliquis facile scripisset, Imolam in parva esse insula, quam insulam faciat Vatreus.

4. Ab illis vero iisdem Geographis minus mirum

est fuisse minoris proximi amnis suo loco mentionem omissam, quando Vatreus ipsum in Cellarii Tabula omnino præteritum esse, vidimus (i). Is tamen minor amnis in vetusta Peutingeriana Tabula, in qua Vatreus desideratur, non est prætermisus, cum inter Forum Cornelii, & Faventiam *Sinnus sit flumen* indicatum. Senium alii vocant cum nostratibus. Circa hujus finem Paulus Merula (k) *Silvam* esse, ait, *Lucanam*, deinde & *Padanas Silvas*, de quibus videndus est, inquit, *Solinus in Polyhist. cap. 23.* Sed eo capite Solinus agit de transalpina Gallia, non de cisalpina, nec ibi quidquam de iis silvis, ut neque capite 7. quo de Italia verba facit. Verum tamen est, haud ita procul a Senio esse Luci, sive, ut nunc vocitant Lugi oppidum non ignobile. Ad ipsam autem Senii oram quæ ab occidentis parte est, oppidulum est, *Cotignola* dictum, unde Sfortia illi extiterunt, qui militari virtute inclyti, post Vicecomites Mediolanensibus imperarunt. Id oppidulum A. 1276. conditum fuisse a Foroliviensibus, sicque a Foroliviensi Cotoniory Suburbio appellatum, Historici ajunt nostri; negant Faventini, freti Documentis, ut Kavina (l) loquitur, antiquissimis, fundum in quo illud postea ædificatum est, eodem nomine designantibus, itemque Chronicis, a Tolosano suo ad A. usque 1226. quo mortuus est, perscriptis, in quibus ad A. 1217. inter oppida, & loca a Faventinis munita Cotignola quoque nominatur. Huc illud insuper accedere, animadverti, quod in Monumentis Historicis legi Alidosiæ Gentis (m), Joannem Antonium Flaminium in Forocorneliensium Annalibus, manu exaratis, memoriæ mandasse, cum circa A. 1260. ab Ravennatibus, & Faventinis Cotignola obsideretur, Silvium Alidosium, suorum auxiliis in eam parrem ductis, obsidionem solvisse. Quæ etsi ita sint, aliamque insuper ejus nominis causam fuisse, ostendant; non tamen satis fortasse convincunt, ante A. 1276. oppidum illud extitisse, cum Tolosanus non oppida solum, sed & loca memoret opportuna, quæ tunc munierint Faventini, potueritque, ut illis temporibus, turris aliqua paucis adjunctis munitis & defendi, & obsideri. Quo spectare quædam videntur verba quæ in Collectione Historiarum, manu Alexandri Paduanii conscripta, legisse memini ex vetustis Chronicis excerpta, in hanc sententiam. A. 1277. aliis 1276. Faventinorum, & Foroliviensium exercitum substituisse rure Cotignolæ (nella villa di Cotignola) ibique aggeribus, & fossis locum egregie munivisse. Ut ut est; non oportuit, a Kavina (n) vicinos insimulari, quasi illa in re *fabulas ipsi confinxissent*, a Tondutio autem (o) nominatim Bonolum accusari. Leander enim Albertus (p) tanto antea discrete tradiderat, Cotignolam, ædificatam esse A. 1276. a Foroliviensibus, & Faventinis. Hieronymus autem Rubeus (q) *Forolivianam Rempublicam*, scripsit, extrui oppidum Cotignolam jussisse A. 1276. Atque; ut alios sciens omittam; Matthæus Vecchiazzanus (r) Forolivienses ait, Faventinis id petentibus, oppidum, ædificasse, & incolis implevisse Forolivio missis, iisque majori ex parte e suburbio Cotoniory, unde Cotignolæ nomen. Quorum certe Historicorum nemo fuit Foroliviensis, omnes autem ante Bonolum scripserunt, qui non plura dixit, quam Vecchiazzanus. Sed ut magis magisque intelligas, non hæc Bonolum esse commentum; scias licet, in Chronicis Jacobi Moratini, antiquo caractere scriptis, & ab A. 1058. ad A. 1473. perductis hæc me legisse ad A. pertinentia MCCLXXVI. Dominus Guido de Mon-

(a) Notit. Orb. Ant. (b) Italia Tav. Romagna, e Duc. di Ferrara. (c) Corso Geogr. Tav. Territ. di Ravenna, (d) Epist. III. (e) Ibid. n. 3. (f) Epist. VII. n. 8. (g) Epist. VI. n. 15. & seqq. (h) supra, n. 2. (i) supra, n. 3. (k) Cosmogr. P. 2. l. 4. c. 8. (l) Repliche in dista &c. XXVIII. (m) Memorie Stor. della Famiglia Alidosi. n. 23. (n) Replic. cit. (o) Prelud. alle Hist. di Faenza. (p) Descrip. di tutta Ital. Reg. 14. (q) Hist. Rav. l. 6. (r) Hist. di Forlimpop. P. 1. l. 14.



Montefeltro, & Comes Rogerius, & Commune Forlivii, & Faventini -- obsident Bagnacavallum, & jussu Communis Forlivii, & Comitum Guidonis præfati construitur oppidum Cotignolæ ad injuriam illorum de bagnacavallo, & defensionem districtus Faventini: quas causas etiam Leander attigerat. Alexander autem Paduanus, qui cum plura inspexisset, excerpissetque Majorum Scripta, Chronica propria ante Bonolum confecerat, cum ad eum annum pervenisset, non ea tantum scripsit quæ modo retuli, sed hæc insuper, quæ latine reddita adscribam, Comes Guido præfatus oppidi reliquit Petrum de Farris, militum ducem Foroliviensem, qui cum domum haberet suam, non secus ac multi ex præcipuis ejus militibus in Cotinorum Suburbio, idcirco oppidum appellavit Cotignolam. Sed de his ut volueris, ipse existimabis.

5. Nunc a Senio ad flumen Anemonem transeunti, qui ab ea parte unde sol oritur, Faventiam perstringens, ipsam ab adjecto suburbio dividit, prætereundum non videtur, perperam igitur ad oppositam plagam Faventiæ appingi in iis quas supra (f) memoravi, Tabulis Cellarii, & de l'Isle. Quod vero idem flumen in Tabula quæ, inscripta *Italiae Veteris Specimen*, in Ortelii Theatro proponitur Orbis Terrarum, eo perductum sit, ut ab Oriente perstringat Ravennam, id absurdum est adeo, ut verbis satis non possit exprimi. Verum; ut ad Cellarium redeam; illud quoque in ejus pictura desideres, fluminis originem multo altius fuisse delineatam; non in planitie, procul a montibus, & Faventiam propius. Et quoniam de distantis mentionem injecimus; hoc quoque improbabis, Faventiam pingi multo magis distitam a Foro Livii, quam a Foro Cornelii, mirum in eo qui (t) ex Antonini Itinerario hæc ponat, *Forum Livii Faventiam M. P. X. Forum Cornelii M. P. X.* quæ etsi plerique ajant; nostratibus tamen, quibus ut tota ea via frequentior est, sic proclivius est intervallum utrumque inter se comparare, aliquanto illud videtur brevius quod inter Patriam nostram, & Faventiam interest, quam quod inter hanc, & Cornelii Forum; ut inter Faventiam, & Forum Livii ne tota quidem M. P. X. esse, agnoscamus; tantum abest ut recentissimos probemus Geographos qui M. P. circiter XI. esse, referunt. Quos etiam miramur in verbo *Faventia* nullam de Hispanorum Faventia mentionem injicere, cum tamen veteres Inscriptiones in quibus Faventini commemorantur, sæpius ad Hispanos illos spectent, quam ad hos Italos.

6. Indicatum est paulo ante, Anemonem ex Apenninis montibus alte oriri, unde Anemonem aucturus Martianus quoque torrens defluit, prope quem Mutiliana est, quemadmodum ad Anemonem est Marradium, utrumque oppidum ad orientem solem, utrumque ad montes pertinens, sed multo altius secundum, de quo obiter mentio fiet; cum ob quosdam Livii locos, aliasque aliorum opiniones non pauca sint facienda verba de primo. Hoc a nuperrimis Geographis urbs parva dicitur duodecimo circiter a Faventia lapide. Sed decimo, non duodecimo, neque urbem, sed oppidum, ut est, nobile, & antiquum esse scribitur ab Historico Faventino Tondutio (u). Antiquum dicit, respiciens ad Livii 31. librum, & 33. in quibus *castrum* Bojorum *Mutilum* memoratur, quod alii Mutilianam ipsam fuisse, credunt, aliis ex illius ruinis Mutilianam exstructam putantibus. In primis invenio Flavium Blondum (x), Raphaelem Volaterranum (y), Leandrum Albertum (z), & qui ante hos duos, paulo videlicet post Blondum, scripsit, Franciscum Berlinghierium (a), cujus rudes quantumvis versus ob id etiam tibi describam, ut vera esse quæ de Italica Anemonis appellatione alias (b) ad te scripsi, ex his pariter intelligatur.

Vedesi Modigliana, al tempo antico

Detta Mutillo, posta nella valle

Morgagni Opusc.

Che Anemon face, & Lamone hor l'esplico.  
Quel divide Faenza.

Ad eisdem accessit Abrahamus Ortelius (c), Paulus Merula (d), Scipio Claramontius (e), Philippus Ferrarius (f), a quo dissentire non videtur Baudrandus (g), denique; ut alios omittam; Anonymus Mediolanensis (h). Ex iis autem qui in secunda fuerunt sententia, satis est nominare Philippum Antonium (i), cujus hæc sunt verba, latine reddita: „Mutiliana, prope quam Mutilum fuit antiquus locus. „ Contra alter Faventinorum Historicus Petrus M. Kavina (k) Mutilianam fuisse Mutilum, negat, quia ne anno quidem 1195. erat Mutilum in via quæ juxta Mutilianam ducta in Etruriam tendebat, ut neque olim ex Antonini Itinerario. In hoc enim sub lemmate *Iter a Faventia Lucam*, tantummodo ad M. P. XXV. *Castellum* occurrit. Sic enim *Iter* illud incipit *In Castellum M. P. XXV. Annejanum M. P. XXV. Florentiam M. P. XX.* Utrum tandem vult Kavina, sub finem sæculi XII. Mutilianam necdum extitisse? an extitisse? Si extitisse; ea nempe olim Mutilum fuisse potuit. Si non extitisse; obliviscitur testimoniorum ex quibus constat, Mutilianam jam sæculo fuisse X. Blondus (l) enim docuit, Mutilianam fuisse ante quingentos annos, id autem, ut alias (m) ostendi, anno scribebat 1450; fuisse, inquam, nobilis familie Comitum, qui Guido cognomine per Flaminiam & Etruriam floruerunt. Claramontius (n) autem in primo, inquit, Othonis adventu (incidit hic in annum 951.) inter ejus procures, imo propinquos fuit Vido illi affinitate junctus. Hic ab Othone Mutilianæ comitatu donatus -- in Italia consedit familie -- Guidiorum auctor. Quin Rubeus (o) non modo ad A. 967. scripsit, Widonem Mutilianæ Comitum fuisse ab Othone confirmatum; sed & circa A. 923. Mutilianum oppidum memoravit: & ne quæ Rubei de eo oppido sententia fuerit, dubitemus; ad A. 1166. ad hunc modum locutus est (p) in *Flaminia prope Mutilum, Comitum Guidonis oppidum*. Ipse denique Tondutio (q) agnoscit, A. 925. Mutilianam in Guidiorum potestatem venisse. Quod vero ad Itinerarium attinet, Antonini dictum, quod ea in parte vitiis non carere, Cluverio (r) certum est; non quæram, an *Castellum* illud, quod Kavina fortasse Castrum Mutilum fuisse videbatur, fuerit id oppidum, quod fere in ruinis jacens, vulgo dicitur *Marradi*, ut opinabatur idem Cluverius; certe *Marradium*, nunc in ruinis minime jacens, M. P. XX. est supra Faventiam; multoque minus an fuerit *Castellense municipium*, quod a Frontino de Colonia memoratum, cum hoc *Castello* componit Goësius haud sane bene, ut censuit Cl. Wesselingius (s), qui in Piceno illud municipium fuisse, ostendit. Illud potius dicam, cum ea Itinerarii pars scripta est, tunc Castrum Mutilum aut in vicum esse potuisse redactum, aut in ipsa via non esse. Certe Livius neque non exiguum, neque in via illiusmodi fuisse, indicavit: ut plane indicavit, ad illud patuisse iter per Tribum Sapiniam, quam in valle per quam Sapis fluit, extitisse, nemo negat, & nos cum de Sapi amne locus erit verba faciendi (t), hac de Tribu iterum dicemus.

7. Qua ex re sumi ratio potest qua Cluverio (u) fortasse satis fiat, qui Mutilum, non in Mutiliam, sed in Medolo, oppido in montibus supra Mutinam sito, sibi ponendum existimavit, astipulantibus Cellario (x), & recentissimis Geographis, qui eum quoque locum in Italia urbem mutarunt. Quod si nominum spectantes similitudinem, illud fecerunt, facilius certe fuerat Mutilum in Mutiliana, quam in Medolo, invenire, ut fuisset quoque in castro quodam Mutilene, si forte novissent, in agro proximo Regii Lepidi castrum hoc nomine extitisse initio sæculi XII. (y). Sed alia illi magis spectarunt, ut puta in his Livii (z) verbis de L. Furio consule, per tribum Sapiniam

G 2

in

(f) n. 3. (t) l. 2. c. 9. n. 89. (u) Prelud. cit. (x) Ital. Illustr. Reg. 6. (y) Comment. Urb. l. 3.  
(z) Reg. cit. 14. (a) Geograf. in terza rima l. 3. c. 9. (b) Epist. IV. n. 3. & seq. (c) Synonym. Geogr.  
(d) Colmogt. P. 2. l. 4. c. 23. (e) Cæsen. Hist. l. 3. (f) (g) Lexic. Geogr.  
(h) Dissert. de Ital. med. ævi Sect. 16. n. 83. (i) Delle Antich. di Sarfina Disc. 1. (k) Faventia Rediviva.  
(l) Ital. Reg. 6. cit. (m) Epist. I. n. 7. (n) Hist. cit. l. 5. (o) Hist. Rav. l. 5. (p) l. 6. (q) Prelud. cit.  
(r) Ital. Ant. l. 1. c. 28. (s) in Adnot. ad vetera Roman. Itinerar. (t) Epist. XIV. n. 5. (u) c. 28. cit.  
(x) Notit. Orb. Ant. l. 1. c. 9. n. 81. (y) Vid. Affaroli Mem. del Monast. di S. Prosp. di Reggio P. 2. n. 38. (z) l. 33.



in Bojos venit: Jam castro Mutilo appropinquabat, cum veritus, ne intercluderetur simul a Boiis, Liguribusque, eadem via qua adduxerat, reduxit; spectarunt, inquam, Ligurum vicinitatem; nam alioquin non esset veritus Consul, ne ab Liguribus intercluderetur; quasi vero Ligurum fines, vel ipsis fatentibus, non usque ad Arnū extenderentur, possentque ideo Ligures per viam de qua paulo ante (a) dictum est per Anemonis vallem Mutilianam versus descendere. Spectanda vero simul erat Sabinia Tribus per quam venerat in Bojos Consul, via multo Mutilianæ, quam Medolo, propiore: spectandumque simul, num tuto ut Mutilianæ, ita Medolo appropinquare Consul posset, quando Bononia, inter hoc, & Sabiniam Tribum interjecta, a Boiis adhuc tenebatur, ut ea ostendunt quæ Livius continuo subjicit, conjunctos mox utriusque Consulis exercitus primum Bojorum agrum usque ad Felsinam oppidum populates peragravisse: eamque urbem, ceteraque castella, & Bojos fere omnes --- in deditioem venisse. Sed hæc tu melius, atque alia quæ Cluverius congerit, examinabis: neque enim mihi, quamvis non omnia quæ ponit, facile probanti, tempus nunc est ea persequendi, præsertim cum de Mutilo illo Bojorum Castro disputare etiamnum malim, quam aliquid pro certo constituere.

8. Illud potius statuam, Mutilam neque cum Medolo, neque cum Mutiliana, quacum a quibusdam confusam video, ullo modo posse confundi. Nam quæ Mutila mons est in Sabinis, uti ex Frontino de qual. agr. adnotavit Holstenius (b), ut ad neutrum illorum referri possit, satis per se patet. Idem vero patet de Mutila, quod Istriæ oppidum fuisse, mox ostendimus: quamvis Ortelius (c) id de quo diximus, Flaminie in Italia oppidum Mutilianam, sive ut nostratum vulgus appellat, Modianam, esse Mutilam Obsequenti, non dubitat, ut neque Ferrarius (d), neque Merula (e), idem repetentes. Sed Julius Obsequens nullam, quod sciam, de Mutila facit mentionem. Facit vero Contr. Lycosthenes, qui de Prodigis ea supplevit quæ deerant apud Obsequentem, Dionysium, Eutropium, Orosium, aliosque, & in his Livium secutus, quanquam non omnia ex hoc excerptis quæ poterat, & quæ, qualiacunque revera essent, ejus postulabat institutum, ut puta cap. 31. ubi de Romanorum ad Thrasymenum cæde prodigia omittuntur Flaminio Consuli inter movendum facta, in primisque in signo quod evelli non poterat. Cum igitur Lycosthenes scribat (e), Mutilam, & Faveriam vi captas, & deletas; nollem, qui Lycosthenem ab Obsequente non distinxere, pro Faveria, ut sit, inter celeriter legendum, Faventiam forte legissent. Verum præterquam quod ibi de Istria a Lycosthene verba fiunt; perspicuum est ex iis quæ nominat, & oppidis, & Consulibus, eum locum ex Livio (f) excerptisse, cujus ipse contextus ostendit, Mutilam, sive ut ipse vocat, Mutiliam vi captam, & deletam a C. Claudio Pulchro Consule fuisse in Istria: quod & ea Livii verba aperte confirmant, ubi post narratam Ne-factii, & Mutiliæ, & Faveriæ expugnationem, Istria tota, inquit, trium oppidorum excidiō, & morte regis pacata est. Bene igitur Cellarius (g), & ante ipsum Cluverius (h), qui Mutilam in Istria ponunt, sed incerta sede: quanquam Cluverius, cum scripserit, quibus locis (Mutila, & Faveria in Istria) fuerint, plane ignoro; nisi oppidum Medolino Mutilæ vocabulum ferre credas, mirandi occasionem dedit, cur igitur Mutilam mediam fere inter Polam & Ne-factium in ipsa Istriæ ora maritima delineaverit (i). Geographi recentissimi ne memorant quidem. Cellarius in Tabulis non Mutilam modo, sed utrumque etiam de quo dictum est, Mutilum omittit: cum Mutinense Cluverius, & Sanfonius posuerint, alter in Tabula Galliæ Circumpadanæ, alter in Tabula Italiæ Antiquæ, prætermisum ab iis qui Tabulam qua facies refertur Italiæ sub inclinationem Romani Impe-

rii, proposuerunt. Sed hi eam sunt, in qua erant; sententiam secuti, Mutilum nostrum, non Mutinense, Livii Mutilum fuisse. Itaque nostrum dumtaxat pinxerunt, sed medium, quod satis probare nequeas, inter Montonum, & Anemonem, apud quem ut non sit, veluti Ferrarius (k) scribit, Anemoni certe est, quam Montono, propior; minus tamen improbandi, quam Cluverius, si ejus Tabula est quæ inter Geographiæ Veteris Tabulas aliquot Abrahami Ortelii, illius fert nomen. In hac enim ut Faventiæ nullus appingitur fluvius, sic denique supra originem Ronchi, qui ibi perperam vocatur Besedis, Mutilum ponitur.

9. Sed in illa alia quam modo memorabamus, Tabula non modo Mutilum, sed & Solonæ oppidum medium locatur inter Anemonem, & Montonum, ut in Sanfoniana quoque, in hac tamen sic, ut Montono magis aliquanto sit propinquum, cum omnino ponendum esset ad hujus ripam, quemadmodum ab Anonymo Mediolanensi pictum est, a Cluverio (l) autem, Cellarioque (m) descriptum. Vocant hi, non Solonium, ut ille, neque, ut Sanfonius, Soloniam; sed cum plerisque Solonam; quippe veterem, de qua mox dicitur, Inscriptionem respicientes, in qua Curatori legebatur Solonatum, ut aliqui respiciunt etiam Plinii (n) locum, Regienses a Lepido, Solonates, saltusque Galliani: quibus in verbis ut sint quæ aliter, & recte, sicut alias (o) videbimus, ab aliis legantur; tamen nisi quod Baudrandus (p) legit Solinates, ceteri legunt Solonates, nemo, quod sciam, Soloniates. Et sane huc nihil attinet Solonium urbs Etruscorum, ex qua validum missum esse Romulo auxilium, Dionysius scribit Halicarnassæus (q), neque Solonius, qui, ut Cicero (r) explicat, erat campus agri Lanuvini, neque demum ὁδὸν urbs Allobrogum Dioni (s), quanquam eadem in Epitome Livii (t) Solon appellatur; longius enim absunt hæc omnia ab eo de quo scribimus, tractu. In quo tamen nec illi fuisse videntur, ut verum fateamur, Plinii Solonates, si quos inter populos ipse memoret, attendamus. Inscriptio autem ad populos multo propiores ei de qua hic agimus, regioni attinere non modo visa est Cluverio, aliisque, sed & omnibus videbitur, quicumque & fuisse Arimini sciant, & sic habuisse.

C. GALERIO C. F. ANI. IVLIANO  
EQ. R. QVAESTORI DVVMVIRO  
CVRATORI SASSINATIVM  
CVRATORI SOLONATIVM  
FLAMINI PATR. COL. AVG  
ARIMIN. ADVOC. PVBLIC.  
AMANTISSIMO DECVRION  
AMANTISSIMO CIVIVM  
SPLENDIDISSIMVS ORDO ARI  
MINENSIVM MERITIS FIDEI  
BONITATIS INNGCEN  
TIAEQVE EIVS.

Descripti autem qualem Antoninus (u) Vir diligens proposuit, ut ab Ariminenfibus Illustribus uno, itemque altero, accuratissimo antiquitatum Observatore, acceperat; namque ut postea a Clementinio (x), & a Garuffio (y) exhibita est, mancā esse, animadverti, nedum, quod ultro apparet, ut a Cluverio (z). Qui tamen cum Sassinates non omiserit; Solonates haud ita procul a Sassinatibus, & Ariminenfibus quæsit, ut in hoc laudandus, sic laude majori dignus, si vel propius utrisque eorum, Solonates quæsitisset. Verum fallaci quadam nominis similitudine deceptus, non satis accessit. Ad ripam enim substitit nostri fluminis Montoni, sive, ut proprie loquamur, sinistri de duobus amniculis qui confluent in Montonum, ad eamque ripam infra Salsubium, non dubitavit, se invenisse Solonam. Salsubium dictum fuisse olim oppidum quod nunc appellant Castrum Carum, post Blon-

(a) n. 6. (b) Adnot. in Thesaur. Geogr. Ortel. (c) Thesaur. Geogr. (d) Lexic. Geogr.  
(e) Cosmogr. P. 2. l. 4. c. 23. (f) l. 41. (g) Notit. Orb. Ant. l. 2. c. 9. n. 155.  
(h) Ital. Ant. l. 1. c. 21. (i) Ibid. Tab. Venet. Hist. &c. (k) Lexic. Geogr. (l) l. 1. cit. c. 28.  
(m) c. 9. cit. n. 89. (n) Nat. Hist. l. 3. c. 15. (o) Epist. XII. n. 2. (p) Lexic. Geogr. (q) Orig. l. 2.  
(r) De Divinat. l. 1. (s) Rom. Hist. l. 37. (t) l. 103. (u) Delle Antich. di Sarfina Disc. 1. P. 1. c. 5. in fin.  
(x) Raccolt. Ist. di Rimini. l. 1. (y) Lucern. Lapidar. c. 1. (z) c. 28. cit.



Blondum (a) tradunt Berlingherius (b), Leander (c), alique plures, idque a falsis aquis ibi, aut in vicinia existentibus: ego Salsubii nomen, nisi quod Holstenius (d) Ligorium indicat, ex lapide veteri id proferentem, legisse non memini apud antiquiorem Anastasio Bibliothecario (e), si tamen emendatione standum est in ora Regii Codicis adnotata; legere enim solent *Forum Pompilii*, *Forum Livii*, cum *castro Suffubio*; ut lectiones omittam alias, *Sassusio*, *Sassubrio*, *Susubio*, *Sulubrio*. Ut ut est, Castrum Carum, sive, ut Claramontius (f) vocat, Castrorum oppidum est quod cum Bonifacius IX. pretio XI. mill. florenorum sub finem sæculi XIV. vendidisset Florentinis, hi tamen tunc quidem habere non potuerunt, obsistentibus, cum Bononiensibus, Foroliviensibus nostris, quorum agri erat, & a quorum mœnibus non distat sex, ut recentes scribunt Geographi pass. millibus, quando recte idem distare ad quatuor Forolivio docent Civitatem Solis, quæ arx est infra Castrum Carum posita intervallo passuum vix octingentorum. Arx hæc sicuti Civitatis vocabulo, præter rem, meritumque imposito (parvo enim semper fuit, & adhuc est ambitu, neque incolæ inquilinosque habuit, cum scribebat Cluverius, quadringentos, nunc autem vix plures habet ducentis, neque Episcopum habet proprium, ut quæ semper nostro subjecta fuerit) sicuti, inquam, Civitatis vocabulo Baudrandum (g), aliosque decepit, qui urbem *Italiae* esse, scripserunt, ita appellatione *Solis* apposita in errorem traxit Cluverium, qui veterem Solonam esse, non dubitavit. Hic si verum conjecisset, ut præter alios Præstantissimos Viros quos in Epistola ad Poggium (h) nominavi, ipse quoque creditur Harduinus (i), nedum Anonymus Mediolanensis (k), atque alii recentes Scriptores; omnino erat, ut diximus, in eorum Tabulis qui in eadem fuerunt sententia, ad amnis quem memoravimus, ripam Solonæ oppidum appingendum. Sed quando in Epistola illa (l) perspicue demonstravimus, Civitatem Solis nec antiquam esse, & Solis vocabulo appellatam ab eo quod forte accidit dum conderetur anno 1565. & quod consequitur, veterem Solonam esse non posse; videndum est porro, num hujus sedem conjicere liceat alio potius loco qui cum Inscriptione illa magis conveniat.

10. Philippus Antoninus (m), quem supra laudavimus, Vir doctus, & regionum harum de quibus loquimur, peritissimus, suspicatus est, Solonates fortassis ibi fuisse, ubi nunc Solianum est, nobile, cum ipse scriberet, oppidum Malatestarum, in finibus situm Diœcesis Ariminensis. Videbis in iis Magini Tabulis (n) quibus aut Romandiola, aut Urbini Dicitio proposita est, in montibus pictum qui inter Sarsinam, & Ariminum interjiciuntur; ut si rectam lineam ab illa ad hanc urbem ducas, inter utramque medium invenias. Nec dubitari quidem potest, quicum Inscriptione illa in qua Solonates simul cum Sarsinatibus, & Ariminensibus memorantur, id oppidum valde conveniat quod inter hos medium sit. Et si idem poterat, sicuti Antoninus ait, plurimum simul Civitatum esse Curator; quanto magis poterat vicinarum inter se? Nec vero quod in Civitate Solis, id in Soliano objici potest, recens esse oppidum, & ab recenti casu aliquo eam appellationem nactum. Non valde quidem antiqua est ejus instauratio. Cum enim esset oppidum & ipsum per se insignis, & præaltis turribus, & pratorio egregie munitum A. 1312. solo æquatum est; ut verbis utar Rubei (o), apud quem pro Soliano scriptum esse *Salianum* errore operarum eo diligentius cavendo, quod & Salianum, longe aliud oppidum, in Cæsennate agro ab ipso alibi (p) memoratur, Historici alii ostendunt, idem excidium narrantes, in quibus sunt Claramontius (q), & productus ab ipso Auctor Chronici Cæsennatis, &

Cæsar Clementinius (r); hi enim omnes diserte; non de Saliano, sed de Soliano id referunt; quamvis ultimus anno proponat 1311. A quo tempore cum esset instauratum, anno iterum 1358. idem, aut maximum certe detrimentum retulit a Comitibus Landi militibus, quod a Tritemio Abbate traditum esse, in Collectaneis legi de Cæsennæ Civitate, manu scriptis Antonii Ragonesii; ut mirum non sit, cum A. 1312. capax esset domuum trecentarum, aut eo amplius, ut est apud Clementinium patrem (s), postea in descriptione oppidorum Ariminensium, quam Clementinius filius (t) exhibet institutam ante A. 1384. domos non haberet plures una & septuaginta. Vel sic tamen ad A. 1495. ab Rubeo (u) hoc oppidum, imo ad A. 1498. etiam a Bembo (x) cum ejus agro memoratum est Soliani nomine. Verum ut ejus instauratio non sit pervetula, nec antiquiora de ipso inveniam testimonia, quam apud Clementinium patrem (y) qui sub A. 1186. Documentum commemorat in quo Solianum nominatur, anno autem 1215. ex Chronicorum omnium consensu refert, Soliani Dominam Joanni Malatestæ nupsisse, ex eoque tempore Solianum fuisse Malatestarum; tamen ob id ipsum quod anteriora de hoc oppido ignoramus, nihil prohibet perantiquum ejus initium, nomenque suspicari: certe donec quispiam nobis felicius sit in anno quo conditum fuerit, & in causa alia nominis reperienda, ut veterem Solonam fuisse, pro certo non affirmabimus, sic neque cogemur Antoninii conjecturam prorsus abjicere, ubi hoc oppidum nunc est, ibi olim forsitan fuisse Solonates.

11. Nunc a Soliano, quo nos traduxerat Solonatum perquisitio, ad Civitatem Solis, sive ad sinistram de duobus amniculis qui in Montonum conflunt, redeuntibus, perpauca de hoc addenda restant ad ea quæ fuscæ alias (z) de iis amniculis, de eorumque antiquo confluentis loco, & de Montoni ipsius reliquo alveo scripta accepisti. Sunt igitur errores præterea aliquot in Geographorum Tabulis indicandi, ut in Cluverianis (a) duobus, quarum altera inscribitur *Umbria Antiqua Descriptio*, altera *Gallia Circumpadana*, Montoni origo non ex amniculis binis, sed simplex, cum duplex Anemonis in eadem secunda Tabula non omittatur: ut in Kavina (b), & Braschi (c) Tabulis amniculorum confluentis non modo supra urbem nostram, sed vel multo superius quam nunc sit; nedum quam antiquis sæculis, cum supra esset nullus; mirum in iis Scriptoribus qui Foro Livii adeo vicini fuerint; ut in Tabula Italiae Medii Ævi ab Anonymo Mediolanensi proposita, Montoni alveus Faventiae propior, quam nostro, quod perstringere ad occidentem solem deberet Foro, aliquanto graviore errato quam in Sansonii Tabula quæ inscribitur *Italia Antiqua*, ubi idem Forum pingitur medium inter Montonum, & Ronchum. Non unus vero notandus est error in illa Ortelii Tabula qua *Italia Gallica sive Gallia Cisalpina* describitur. Nam præterquam quod Forum ipsum Livii vicinior ponitur Ravennæ, quam Faventiae, & hæc longe propior Foro Cornelii, quam Foro Livii, Forum hoc ultimum Montonus perstringit ab oriente sole. Bis quoque in fluminibus nostris Tabula peccat, qua Vir Cl. de l' Isle Italiae faciem, ut suo erat tempore, delineandam suscepit. Neque enim Ronchum usquam ponit, quasi in rerum natura non esset, Montonum autem eo perducit, ut non ad illud ad quod debebat, sed ad oppositum demum fluat Ravennæ latus. De Montoni autem origine, & fine quæ Ferrarius (d) memorat, nisi æquos inveniant Lectores, longius a vero aberrare videri possunt. Ex *Apennini mont. radicibus emissus*, in *Thef. Ling. Lat. flux. Sabinorum longissime hinc distantium scribitur*. Sed in Thesaurio illo fluvii finis spectari potuit secundum ea Plinii (e) verba, *Ravenna Sabinorum oppidum cum amne*  
Bede-

(a) Ital. Illustr. Reg. 6. (b) Geogr. l. 3. c. 9. (c) Descrip. di tutta Italia Reg. 14.  
(d) Annot. in Thef. Geogr. Ortelii. (e) Vit. Pontif. in Steph. III. (f) Cæsenn. Hist. l. 15. (g) Lexic. Geogr.  
(h) Epist. II. n. 10. (i) ad Plin. l. 3. c. 15. not. 26. (k) Dillert, de Italia med. ævi Sect. 16. n. 83.  
(l) n. eod. 10. (m) Delle Antich. di Sars. Disc. 1. P. 1. c. 6. (n) Italia. (o) Hist. Rav. l. 6.  
(p) Vid. in ear. fin. Indic. Scripturar. (q) Cæsenn. Hist. l. 12. (r) Raccolt. Ist. di Rimini. l. 5. (s) Ibid.  
(t) l. 6. (u) Hist. cit. l. 7. (x) Hist. Rer. Venet. l. 4. (y) Raccolt. cit. l. 4. (z) Epist. IV. n. 6. & seqq.  
(a) Ital. Antiq. (b) Faventia Rediviva. (c) De vero Rubic. Tab. cap. 8. (d) Lexic. Geogr. in Bede.  
(e) Nat. Hist. l. 3. c. 15.



*Bedese*. Necdum enim Cluverius (f) opinionem proposuerat suam, legendum ibi esse *Thessalorum*, non *Sabinorum*: quanquam ut qui Ravennam condiderint, incertum est, sic contra non unius semper fuisse olim populi oppidum, sed modo hujus, modo illius, ut alius alium pervicerat, ejeceratque, negare poterit nemo. Quod vero dicatur Montonus ex *Apennini radicibus emissus*, cum revera ex altiori ejus parte utramque originem ducat, id ita fortasse tueri licet,

ut de alveo in quem bini fluvii confluunt; dictum putemus; neque enim ab eo confluxu permagno nunc intervallo distant Apennini radices; non de altissimo fluviorum initio. De quorum sinistro cum satis scripserimus, si quid autem de altero addendum superest, id ad antiquum Livii pertineat Forum; propterea in Epistolam proximam, qua de Foro ipso videndum est, differemus. Vale.

## EPISTOLA ÆMILIANA IX.

Forum Livii suo ipsum nomine a quo sit conditum, ostendit, ab Livio nimirum aliquo, ut Forum Lepidi, Forum Sempronii, & ne longius ab nostro abeamus, Forum Cornelii, & Forum Popilii a Lepido, a Sempronio, a Cornelio, a Popilio quopiam condita sunt, a Viris, inquam, inter Romanos illustribus, dum Consulibus, Proconsulis, aut alterius potestatis nomine cum imperio ibi degerent, ubi ea Fora condiderunt. Ex iis Viris nonnulli qui fuerint, & quod consequitur, quo sæculo ea esse Fora inceperint, satis constat; de reliquis non item; sed per conjecturam est inquirendum. Itaque cum Galliæ nostræ qui Livii cum imperio præfuerint, præter Salinatos duos, Marcum videlicet, & Cajum, nusquam appareat, quorum alteri anno ante æram vulgarem 207. alteri 188. in Consulatu provinciam obtigisse Galliam, ex certissimis liquet Historiarum monumentis (a); ab alterutro hoc conditum fuisse Forum, & præsertim a Cajo, sub quo provincia quieta fuit, videtur esse conjiciendum.

2. Nec vero conjecturæ huic obstat Strabonis (b) silentium, cum Foro Cornelii, Faventia, Cæsena minime Forum quoque Livii commemorantis, etsi inchoata jam æra vulgari, quippe sub Tiberio, scriberet. Scilicet non id sibi proposuerat Strabo, quemadmodum ejus libros versantibus proclive est animadvertere, ut singula nominaret loca, non Orbis dico, sed Italiæ. Certe non ita diffitum a nobis Pisaurum ne ibi quidem, ubi Ariminum, Senam, & Fanum Fortunæ, memorat. Pisaurum tamen, ut luculentus auctor Livius (c) memoriæ prodidit, anno ante æram vulgarem 184. colonia deducta jam fuerat. Sic multo minus illius qui paucis post Strabonem lustris Italiam descripsit, Pomponii Melæ (d) silentium obstat, ut qui tametsi loca enumeret quamplurima, tamen in littoribus ferme subsistens, adeo in mediterraneis pressus est, ut de Æmilia nostra quidquid inter parvum Rhenum, & Ariminum fluvios intercedit, præter Bononiam; nam Ravenna ipsi in maritimis est; prorsus omittat. Quod si non modo quo tempore hic floruit, nimirum Claudio imperante, sed vel diu antea Forum Livii non extitisset; qui fieri mox potuisset, ut sub Claudii Successore Nerone scribens (e) M. Valerius Probus (f) haberet has notas FR. L. & I. FO. L. earumque alteram interpretaretur *Forum Livium*, alteram vero *In Foro Livii*? Apparet igitur, Strabonem, si Italus fuisset, non secus ac Plinius (g), fuisse scripturum *Cæsena*, *Claterna*, *Forum Clodii*, *Livii*, *Popilii*, *Truentinorum*, *Cornelii*, *Licinii*, *Faventini* &c. nec vel in tanta sua brevitate de octo quatuor; si tamen quatuor, ut Forum Livii, tunc erant; præteritum.

3. Hactenus, ut vides, a Foroliviensibus Scriptoribus non recessi. Quibuscum in iis quoque libenter facerem quæ de Livia quali altero nostræ urbis, aut partis ipsius nomine tradiderunt. Sed antiquissimis temporibus id nomen fuisse in usu, nec ipsi probant, neque ego apud idoneos Auctores invenio. Ab iis ta-

men non dissentio, qui a Poetis, etiam olim, esse illam appellationem usurpatam interdum, ajunt, saltem adjectivi instar, velut in antiquo eo lapide quem ab Aldo in *Orthographiæ Ratione* (h) laudatum, Galeatæ adhuc in majori Templo extantem, me petente, non semel inspexit, & diligenter descripsit Verlicchius meus. Sub tympano, ut vocant, ad cuius lateta singula singuli sunt sculpti delphini, & in quo solemnes illæ siglæ extant D. M. grandibus, & pulchris litteris leguntur nomen, & cognomen Rubriæ Tertullæ; anni, menses, dies quos Juvenis illa vixit, tum prænomen, nomen, cognomen mariti, qui lapidem posuit, quanquam prænomen dubium reddiderunt injuriæ temporis. Sequuntur denique, sed minoribus litteris, hendecasyllabi sex versus, quorum penultimi initium non apparet quomodo legerint *Et tantum*, cum *Inanium*, perperam quidem, sed unde verior a te excogitetur scriptura, insculptum esse vel repetita inspectione videatur. Habet autem idem versus, non, ut minus bene ediderunt, *linquit*, sed *liquit*. Cæterum quod ad propositum nostrum attinet, versus primus sine ulla dubitatione sic legitur

*Livia me tellus aluit, geminamque sororem.*

Hic me fortasse interpellares, quærendo, cur non illam potius Inscriptionem memoraverim, in agro Foroliviensi circa A. 1678. effossam, quæ in stylobate, cujus in altero latere patera, in altero quædam quasi tabella apparebat, sculpta erat in hunc prorsus modum

D. M. LIVIA. PO  
LA. SEX. F. D  
O. LIV. PAR  
CABVS. M  
E

quæ sic interpretatus dicitur Vir harum rerum peritissimus, *Diis Manibus Livia Pola Sexti Filia Domo Livia Parcabus Monumentum Erexit*. Ego vero cur non memoraverim dicam, cum tu mihi dixeris primum, an valde probes illud *Parcabus*, quod in nulla memini Inscriptione vidisse, qui in multis certe viderim *Parcis*, deinde hoc potius, quomodo, si interpretationem istam sequaris, siglas duas primas cum postremis duabus, utrasque autem cum *Parcabus* iplis concilies, demum, idque multo magis, an ipse insperis, & hoc saltem, nihil inter describendum in littera aliqua peccatum esse, confirmaveris.

4. Sed ut sint dubitationes hæ, atque aliæ inanes meæ; certe nullum præter hæc duo servatum antiquum marmor esse, scio, quod ad nostræ urbis appellationem attinere visum sit. Minus autem id mirum esset, si ex locis Cassiodori a Kavina (i) indicatis, liqueret, ut ipse existimabat, quadratos inutiliter Faventiæ jacentes lapides, Theoderici jussu, ad Ravennæ ædificia construenda fuisse transvectos; cur enim non item qui apud nos jacerent? Verum si eos Cassiodori locos (k), quod nos fecimus, inspicias; ne unum

(f) Ital. Antiq. l. 1. c. 28. (a) Liv. Hist. l. 27. & l. 38. (b) De Situ Orbis l. 5. (c) Hist. l. 39.  
(d) De Situ Orbis l. 2. c. 2. (e) Vid. Euseb. in Chronic. (f) De Not. Roman.  
(g) Nat. Hist. l. 3. c. 15. (h) ad vocem Genitrix. (i) Faventia Rediviva.  
(k) Variat. l. 2. Epist. 7. l. 3. Epist. 9. & 10. & l. 5. Epist. 8.



unum quidem reperies, qui ex vicinis Ravennæ urbibus transvectos significet, sed contra, non unum qui diserte ex longe distitis, & per mare deportandos, imo & aliquem, non ad Ravennatiam, sed ad Tridentinæ regionis ædificia spectantem. Temporum igitur, & minus eruditorum sæculorum vicissitudines culpandas credo, si alia marmora ruinis, & humo obruta, alia in fundamentis defossa, aut intra parietes abscondita, alia in alios usus conversa nos lateant, casu aliquo seris nepotibus revelanda, sicuti plura, apud proavos occulta, avis nostris, & parentibus se se obtulerunt, quæ omnia tandem nostrates Historici, & præsertim Sigism. Marchesius ( *l* ) vulgarunt, nonnulla in urbe, cætera in agro adinventæ. Ex quibus Numina quæ hic ethnicorum tempore colebantur, & gentium aliquot nomina sive indigenarum, sive inter Romanas nobilium, quæ traductæ huc fuerant, cognoscuntur, quamvis ad earum libertos, aut servos, ut pleraque etiam alibi solent, nonnulla attinent, ut siglæ, aut verba ipsa ostendunt, velut in eo quod hominum, & temporum injuriis male habitum, vix amplius legi potest, integrius fortasse cum olim ab Smetio ( *m* ) inspectum est; nam sive, ut ab ipso, sive ut ab nostratibus proponitur, spectes; *Felicitati a Contubernal.* positum fuisse, non dubites, conservæ igitur. Duo vero inter cætera præstant, cum habeant illorum nomina qui Consules erant eo tempore, unde annum, ut in altero etiam diem, scire liceat quo posita sunt. Hoc *Materno & Bradua*, Primum vero *M. Cornelio Gaetego C. Erucio Claro Cos.* Quorum marmorum utrumque, & præsertim hoc Primum quanti faceret præclarus veterum Inscriptionum Judex Sertorius Ursatus, ex Posthumo ejusdem Opere ( *n* ) satis perspicitur. Quin ad Vulgares Fastos emendandos ad A. Christi 170. post Ursatum usus est Doctissimus Cardinalis Norisius ( *o* ) diserte citata hac *Inscriptione Foroliviensi*, cujus ope ad alias etiam circa eorum Collegium Consulum dubitationes tollendas processit, ex ea rescribens *M. Cornelius Cethegus. C. Erucius Clarus*. Sed a Pagio quoque eandem hanc Inscriptionem fuisse laudatam, adnotavit Eruditus Casinensis Abbas, Collega, dum viveret, meus Jo. Antonius Ursatus ad Opus, quod modo indicabamus, Avi sui. De aliis autem marmoribus vetustis Foroliviensibus mox loquendi occasionem habebimus.

5. Et si ex antiquis Civitatis nostræ Chronicis apparet, Majores non dubitasse, quin magna ad Livii Forum accessio facta ab iis esset qui olim incoluissent locum passibus supra hoc mille quingentis ad meridiem videlicet, simulque ad occidentem solem, ut ibi resecta sæpe fundamenta prisca murorum, sepulchra, & templorum ruinæ indicare videbantur ( quamquam, ne de sepulchris hic quidquam dicam, templa quorundam Numinum Ethnici in agro potius, quam intra urbes, ædificabant ) ab nemine tamen, quod meminerim, negatum legi, Forum ipsum Livii inter amniculos duos fuisse conditum, quos Epistola II. ( *p* ) & IV. ( *q* ) italica vocabulis *Acqua cheta*, & *Acqua viva*, singulorum veterem describens cursum, memoravi. Inter illum igitur, sive sinistram ad occidentem solem, & inter hunc, sive dexteram ad orientem Romani illi sapientes Viri Forum construxerunt, salubritatem aeris, & munditiem a præterfluente utrinque aqua, & hujus optimæ copiam, & naturalis cuiusdam adversus hostium irruptiones munimentis opportunitatem secuti. Ibi autem construxisse, marmora indicant vetusta, quibus in nulla urbis nostræ parte majora, eademque magis ornata, sunt effossa, quam in ea quæ inter amniculos illos duos erat interjecta. Effossa ea sunt patrum nostrorum ætate, & multa quoque simul erant quæ effodi potuissent, nisi ædium fundamenta, illis imposita, prohibuissent. Candida sunt, & affabre elaborata duo quæ ex iis marmoribus in publico extant, alterum epistylum, alterum arcus portio, utrumque ea magnitudine, arcus autem portio in tanta magnitudine ea curvaturæ parvitate, ut im-

manis arcus, & amplissimi ædificii partes cuncti qui inspiciant, fuisse agnoscant. Haud ita procul reperta est a fossoribus Inscriptio, in qua verbum AEDIF. legitur, sed dimidiata, sic tamen dimidiata, ut Aurelio Antonino, & Lucio Vero Imperatoribus, id est anno æræ vulgaris secundum diligentes Chronologos, ut tardissime, 169. eorumque jussu a Præfecto, aut Milite aliquo *Legionis XXII. Primigeniæ* ædificium fuisse exstructum, ut ab nostratibus ( *r* ) explicatum est, non difficulter intelligatur. Num vero ad eandem quæ hic diutius confederit, an ad aliam Legionem spectent marmora duo sepulchralia, quæ ut novissime tunc reperta, in Supplementi sui calce Marchesius proposuit, alterum ad juniorem militem, natione Dalmatam, alterum, magnitudine, & ornamentis insigne, ad Primipilum Legionis pertinens, cum Legionis in neutro numerus, aut nomen appareat, divinare nemo potest. Sed horum alterum in agro, alterum extra antiqui, de quo loquimur, Fori terminos inventum fuit, nimirum ubi Monasterium est Sanctæ Claræ.

6. Quamvis enim legamus, priusquam urbis nostræ proferretur pomerium, fossam olim, & mœnia fuisse ubi Templum nunc est Sancti Blasii, ab opposita autem plaga ubi Sacram modo videmus Ædem Sancti Antonii in Ravaldino, quæ antea fuerat Sanctæ Mariæ Majoris; tamen fortasse ne illuc quidem prisca temporibus Fori perveniebat latitudo, a septemtrionibus videlicet ad meridiem. Ab occidente autem ad orientem solem terminos duo illi quos supra ( *f* ) nominavi, definiebant amniculi. Cum enim dexter per latus sinistram fluere ejus campi, qui nunc urbis Forum est, & adverso in latere Templum habet in quo corpus S. Episcopi Mercurialis, facile II. conditum est; in antiquo Sermonem cujus verba Epistola II. ( *t* ) retulimus, sacrum illud corpus *sepultum esse* dicitur *non longe a Livienſi Urbe ultra Amnem*; igitur extra urbem. Sinister autem amniculus ab opposita plaga urbem terminabat. Etenim cum sicuti ostensum est Epistola IV. ( *u* ) pone sacram Ædem fluere, Triadi Sanctissimæ dicatam, quæ Ædes Cathedralis tunc erat, & in qua propterea corpus S. Mercurialis I. Foroliviensium Episcopi primum fuerat sepulturæ mandatum; cum igitur pone illam Ædem fluere, ipsa Ædes in vetustis, quæ ibidem laudavimus, Chronicis fuisse dicitur *extra, ac juxta civitatem prope flumen*.

7. Dum vero de antiquis urbis nostræ terminis tum in latitudinem, tum in longitudinem hæc scribo, me abs te non puto reprehensum iri, quasi inter nimis angustos fines ipsam coarctarem. Neque enim ignoras quod Dionysius tradidit Halicarnassæus ( *x* ); *urbes parvas morem fuisse condendi Priscis*; credo, quia multo essent publici domini, quam propriæ quisque domus, & quod consequitur, urbis amplificandæ cupidores, ut quam tanto facilius adversus hostem tueri possent, quanto arctiore haberent gyro comprehensam. Noſtri autem cives ut ditionem extendere suam sive per se, cum Rei Publicæ formam servarent, sive per eos ex suis fere civibus qui ipsis præfuerunt, & quinque olim, aut sex urbibus, oppidis autem amplius quadraginta imperitaverint, cum Tabula ostendat, Bonoli Historiis id confirmantibus, præfixa; hic commemorare non est opus. Sed potius quibus denique additamentis parvam olim urbem amplificaverint, videndum est.

8. Igitur cum ejus longitudo duobus, ut dixi, amniculis definiretur, id est non major esset, quam illa pars Æmiliæ viæ, quæ inter pontes duos interjicitur, quorum alter a Moratinis, alter a Pane accepit nomen, singuli singulis impositi amniculis, tam celebrem viam interfecantibus; adjectum utrinque magnum est additamentum. Scilicet hinc præter illum, quem paulo ante ( *y* ) diximus, campum, nunc Forum non modo urbis nostræ, sed totius propemodum Italiæ amplissimum, quidquid ad Portam usque extenditur quæ orientem spectat; inde vero quidquid ad Portam usque

( *l* ) Supplem. Istor. l. 1. e l' Aggiunta in fine. ( *m* ) apud Gruter. p. 973. 4. ( *n* ) Mæmi Erud. Lett. 6. ( *o* ) Epist. Consular. ( *p* ) n. 8. ( *q* ) n. 6. & seqq. ( *r* ) Vid. Supplem. cit. l. 2. ( *f* ) n. 5. ( *t* ) n. 8. ( *u* ) n. 11. ( *x* ) Origin. sive Antiqu. Roman. l. 1. ( *y* ) n. 6.



usque pertinet occasum respicientem, veteri urbi paulatim additum est. Unde causa apparet, quare ædificia quæ a singulis iis pontibus ad singulas illas Portas Æmiliam continent viam, Suburbia dicta fuerint, & adhuc dicantur. Ad horumque similitudinem, quæ duas alias ipsas quoque bene amplas longasque vias comprehendunt, a Foro ad totidem Portas ducentes, quæ videlicet ad meridiem est, & quæ ad septemtriones conversa, Suburbia a Forolivienfibus vocantur; quando alia via, Equitum olim dicta, quamvis a Foro ipsa pariter incipiat, & si qua alia, ampla sit, nec minus longa, quam Æmiliæ pars illa, ipsi ferme parallela, quam dixi inter duos pontes contineri, nunquam Suburbium appellata est, aut appellatur, nimirum quia non addita fuit veteri urbi, sed ab eadem fuerat comprehensa.

9. Nunc priusquam causas peculiarium nominum Suburbiorum quatuor perquiram; de altero quem paulo ante memorabam, amniculorum ponte nonnulla ex me quæri posse, scio. Nam qui alias (z) de altero illo satis scripserim, & ab Romanis, cum Æmiliam munirent viam, impositum esse, confirmaverim; cur non ab iisdem eodem tempore, eandemque ob causam hunc quoque alterum impositum fuisse putem? Ego vero id quidem puto, nec tamen pro certo affirmo, ut qui neque ullis in manu exaratis Chronicis, nedum per typos editis libris ejus rei mentionem, aut indicium offenderim, neque cum paulo ante ætatem meam ad Pontem hunc ipsum Panis illud exstructum sit Publici Palatii latus quod meridiem spectat, ab iis qui tunc vivebant, & mecum diu vixerunt postea, audiui unquam, in jaciendis altis ejus ædificii fundamentis lapides repertos esse, quales, ut in altero illo Ponte videmus, procul dubio debuissent, si pons, aut fundamenta pontis, ab Romanis constructi, ibi olim subsuissent. Quin legere potes apud Bonolum (a), Pontem Panis ab Scarpetta illo I. Ordelaffo ædificatum; & alveo amniculi tunc videlicet cum in Canalem conversus fuerat (vel potius antea) impositum, corruisse, itaque A. 1214. a Forolivienfi Prætoris esse restitutum, ut lapis ostendit Palatii proximo parieti affixus. Qui tametsi id factum doceat ad honorem & publicam Civitatis utilitatem, non tamen marmoreum pontem fuisse, perhibet, nec vero credibile est, sed verisimilius lateritium tum quando ab Ordelaffo fuit ædificatum, tum quando postquam corruerat, a Prætoris est restitutum; ut omnibus, & conditione in primis eorum temporum pensitatis, ligneum ante Ordelaffum fuisse, credam. Porro in eo lapide sculpta Inscriptio cum uti a Bonolo (b) descripta est, Prætoris illum sic proponeret, ut qua ex domo esset, intelligeret nemo; denique cum huc secessissem ætate anni 1742. & alia quærerem, forte accidit, ut in hunc lapidem conjicerem oculos, & cum propter antiquam litterarum formam, verborumque compendia fieri non posse perspicerem, ut siglas notasque in lapide altius posito satis dignoscerem; ectypum mihi exemplum molli gypso appresso, & mox siccato parandum curarem. Quid quæris? Vix inspexeram, cum præclare cognovi, Prætoris illum *Guarinum*, ut legerant, de *Scovicale*, fuisse legendum de *Sancto Vitale*, id est de nobilissima Gente quæ etiamnum Parmæ ornamentis omnibus conspicua floret, cognomento italico *Sanvitali*. Quod autem mihi, idem cunctis visum est Litteratis tum qui simul aderant, Amicis, tum qui postea apud me inspexerunt; ut propterea mirabundi in libello quodam, hic perpaucis post annis edito, traditum viderint, ad illud usque tempus quo is libellus prodiit, perperam nostrates in eo lapide legisse de *Scovicale*, cum legere de *Sancto Vitale* (id nimirum quod se mecum antea legisse, & pervulgasse, sciebant) debuissent. Verum ne propter istiusmodi nugæ a proposito digrediamur; tu, cum redieris, exemplum, quod dixi, meis in ædibus asservatum, fac inspicias, & siquid præterea quod me fugerit, qua es peritia, & diligentia, animadverteris, me doceas. Tunc etiam videas, velim, an recte censeam, Pontem de quo loquimur, lateritium tunc fuisse, ut lateritium illum quoque alterum fuisse, non est cur dubitem,

quem olim eidem amniculi alveo ibi imposuerunt; ubi a Foro initium capit Equitum via, Equitum propterea Pontem in Chronicis appellatum, in Documento autem, ad annum 1294. spectante, quod in Tabulario extat Monasterii S. Mercurialis, *Arcum* etiam *Fluminis* dictum; Bonamicus enim quidam nominatur *contrata S. Thomæ Apostoli prope Arcum Fluminis*, cujus Apostoli Templum, nunc S. Caroli scis vocari, & quam proximum esse illius initio viæ. Arcum igitur, seu Pontem hunc lateritium fuisse, commonstrare videtur fornicata illa quasi substructio, ex lateribus constans, cui paries impositus est dexter ad initium ipsum ejusdem viæ. Veri enim simile est, huic quoque Ponti, aut magnæ saltem ejus parti idem quod alteri, longo temporis decursu accidisse, ut corrueret, nec tamen iis qui restituerunt, visum esse in pristinam altitudinem restituendum, tum quia operæ pretium non esset, tum ne hic, ut in Panis Ponte restituendo contigerat, via acclivis fieret, & se in minime necessarium culmen attolleret.

10. De Suburbiorum autem, Portarumque ad quas singula eorum pertinent, appellationibus sic existimo, duarum causas paulo facilius credi posse, quam reliquarum. Nam qui Ravaldini Portam, & quod consequitur Suburbium sic dicta velint quod ad Ravaldinum castellum ducerent, haud dissimilem apud alias quoque Civitates in suis quibusdam Portis appellandis consuetudinem spectare videbuntur. Et Suburbium S. Petri siquis forte id nominis traxisse, mecum suspicaretur, ab adito S. Petri Templo quod vocant in Scoto; noli propterea quod nunc *Ædiculam* esse, videas, minus credere ejusmodi suspicioni. Ex antiquis enim Documentis (c) constat, anno 1170. cum aliis Templis *Parochialibus* fuisse recensitum, quin ejus, ut videtur, Rectorem nomen suum ad hunc modum olim adscripsisse, *Presbyter Tedericus basilicæ S. Petri in Scoti interfui, & subscripsi*. Non me fugit, Viros in perantiquis Chartis versandis exercitatissimos animadvertisse, in iis *splendidum basilicæ nomen nonnunquam tenuibus quoque fanis tribui*. Quod etsi quis contenderet in isto quoque accidisse; non ille tamen certa inficiari ratione posset, *Parochiali* dignitate quam ad annum usque retinuit 1464. (d), vel iis temporibus fuisse præditum circa quæ contigerit, ut Suburbium illud urbi adderetur, & ab ipso quo nullum propius tunc habebat, Templo nomen acciperet. Sed quas causas proferunt, cur Sclavoniæ, & Gottognorum Suburbia ad hunc modum sint appellata, quam ratione tueamur, si quis forte ajat, videri sibi non eas esse quæ pari facilitate admittantur propterea quod primæ ad retrusa adeo pertineant tempora, ut nullius æqualis Scriptoris testimonio, nullo idoneo veterum Documentorum indicio possint comprobari; alteræ autem cum aliæ ab aliis adducantur, vel ob hanc ipsam varietatem dubiæ fiant? Et sane; ut primas libentissimi seponamus, nihil ex ea in qua sunt, opinione detrahentes, & secundas tantummodo perpendamus; si nostrates eam appellationem inde esse ortam volunt quod Gothorum pars locum illum incoluerint, tunc videlicet cum Ravennæ debebant eorum Reges, & fuisse ab eo usque tempore, id est a sæculo V. aut VI. ad nostra servatam, & propterea *Gottognorum* Suburbium scribunt; non possunt iidem cum de Cotignolæ adificatione agitur, id oppidum, ut alias (e) retulimus, dicere, sic fuisse nominatum, quia Forolivienfes illuc missi anno 1276. ex suburbio hoc essent, quod ubi ea de re loquuntur, scribunt *Cotognorum*. Sed & hæc extra controversiam non esse, tunc pro veri studio facti sumus, ut illam a Gothi denominationem *Gottognorum* per tot sæcula conservatam esse, ex vetustioribus tabulis non apparere, aut nobis certe, in iis quærentibus, nusquam occurrisset, ingenuè fateamur. Illud occurrit potius quod mihi occasionem præbuit longe aliam suspicandi originem nominis Cotognorum. Quam suspicionem, qualis ea cunque est, ut pridem cum Academicis nostris, sic tecum modo communicabo, sperans, non minus facilem, simplicemque, & quod consequitur, verisimilem tibi fortasse videri posse, quam paulo ante com-

(z) Epist. II. n. 8. & Epist. IV. n. 11. (a) Istor. di Forlì l. 3. (b) Ibid.  
(c) Marchesi Supplem. l. 3. & l. 2. in fin. (d) Ibid. l. 8. (e) Epist. VIII. n. 4.



communicatam; ut cum illis pariter, de causa nominis Suburbii S. Petri. Scilicet Documenta extant plura, in quibus mentio fit de *fundo*, qui vocatur *Cotogneto*, de *fundo dicto Cotogneto*, vel *Cotogneti*, & de *Codigneto*. Tria leges in Marchesii Supplemento ( *f* ) quorum primum ad annum attinet 962. alterum ad 1160. tertium ad 1189. Et erat quidem is fundus extra urbem; sed extra eam campus etiam erat qui nunc est Forum, nedum qui non ita procul ab eo campo siti erant fundi ad eam plagam de qua nunc loquimur, nempe ad orientem solem. Quos inter fundos cum eum quoque fuisse, constat, qui dicebatur *Plegadicius*, intra urbem postea conclusus, ut Templum olim, & Xenodochium significabant dicta S. Mariæ in *fundo Plegadicio* ( *g* ), & vel magis quod ipse in antiquis Chartis legisse memini, *S. Maria de Pace fundi Plegadizi*, huic autem fundo contiguum fuisse fundum *Cotognetum*, ex primo illorum quæ indicavi, Documentorum appareat; proclive est suspicari, ab hoc fundo intra urbem simul comprehenso, & fortasse magnam novi Suburbii partem faciente, Suburbii nomen esse ortum *Cotognorum*, ut italice cydonias malos, quarum plurimis ille fundus esset confitus, appellamus, & quemadmodum *cotonea* mala, Plinio testante ( *h* ) Latini vocabant, ita nos quoque *cotogni* vocamus earum poma.

11. Verum ut Suburbia hæc quatuor neque omnia, cum veteri sunt urbi addita, eodem tempore ad eam quam nunc videmus, longitudinem producta sunt, nec quæ inter Suburbium & Suburbium comprehensæ sunt aræ simul, sed deinceps, domuum, Templorumque ædificationibus excoli potuerunt; sic alius alio tempore ambitus esse debuit totius urbis. Attamen cum angustiore fuit ambitu, pluribus instructa erat Portis, quancum, ut modo est, ampliore. Etsi enim Merloniam quam vocabant Portam non adnumeret, quippe quam, cum Ravaldini Suburbium in longitudinem auctum est, in Ravaldiniam Portam mutarunt; Valeriana tamen, & quæ Sancti Blasii primum, deinde cum ampla quæ ad eam pertinebat, via producta, & ipsa ulterius translata est, Sanctæ Claræ dicta ( ut de alia sileam, quæ *della Rotta* appellabatur ) occlusæ postea sunt, ut ne vestigium quidem supersit.

Qui vero muri, aut quod vallum, & fossa urbem ad septemtriones; & ad meridiem tunc munirent, cum amniculi ad orientem, & occidentem solem muniebant, incertum est. Vix memini in Documentis ad annum spectantibus 1189. hæc legisse, *ab uno muro Civitatis usque ad alium, sicut Civitas antiquitus fuit constructa*, in aliis autem mentionem *Fossati Veteris*. Postea vero quam abductis alio amniculis urbs amplificata est, & muris cincta, & perducta extra hos fossa instructa fuisse, constat. Neque enim nisi hæc omnia jam fuissent; certe muri dirui, vallum demi, fossæ expleri ante finem sæculi XIII. jubente Pontifice, qui Italus haud erat, non potuissent: quam calamitatem Casena quoque ( *i* ) tum ferre coacta est. Et Forolivienfes quidem ineunte sæculo XIV. restituere muros cœperunt. Sed aut alio ex alio impedimento suborto, non perfecerunt, aut, quod credibilius est, eorum partem sic diruerunt longi temporis injuriæ, ut anno 1472. cum ex dimidio circiter deessent, a Pino Ordelaffo, additis insuper propugnaculis refectioni sint: quanquam ne tunc quidem ab omni parte perfecti esse credendi sunt, si post duos & viginti annos refici ad æqualem, ne dicam ad majorem, tractum, & pinnis instrui debuerunt; utrumque enim lego in libris Chronicis. Pinus autem Arcem Ravaldiniam, a Petro Cardinali Bituricense ante centum annos jam inchoatam, sicut Bonolus quidem ( *k* ) scripserat ( nam quomodo idem confirmare Marchesius ( *l* ) potuerit, minime video, qui tradiderat ( *m* ), ab Ægidio Cardinali Sabinense duodecim ante annis non inchoatam, sed & impensis non modicis fuisse perfectam ) eam, inquam, Arcem Pinus sic amplificavit, & longe magis quam erat, munitam reddidit, ut inter primas Pontificiæ ditionis iis temporibus

Morgagni Opusc.

bus censeretur. Antea vero quam illa inchoaretur, Arx jam erat altera ad Portam S. Petri, cum Ægidio Cardinali, Pontificis Legato, se Forolivienfes dediderunt A. 1359. Tertiam autem postea ad Sclavoniæ Portam ædificavit Balthasar Cardinalis Cossa A. 1407. His duabus Arcibus partim hominum, partim etiam temporis injuriæ; Ravaldiniæ vero non nisi temporis obfuere intra hos annos ducentos quinquaginta. Quam ob rem, & ob ejus amplitudinem factum est, ut ab illis vel Arcis nomine amisso, hanc unam Arcis vocabulo adhuc appellemus.

12. Priusquam urbs amplificaretur, & magna murorum corona, atque Arcibus muniretur, forum quidem habuit amplum, quod nunc campum vocitant Cathedralis Basilicæ: quo in campo fuisse Prætoris Palatium vel anno 1276. ex summo Chronicorum librorum consensu liquet. Sed multo amplius, quo nunc utimur, Forum extra urbem, ut supra ( *n* ) indicatum est, in modum patebat agrestis campi, qui dicebatur Vineæ Abbatis propterea quod ad Monasterium attinebat S. Mercurialis, cujus Præsul five Monachis præfesset, ut ante finem IX. sæculi ex vetustissimo Documento præfuisse constat, iisque Cluniacensibus, sive, ut diu postea priusquam ibi conviverent Vallis Umbrosæ Monachi, non præfesset, Abbas semper est appellatus. Itaque Sacra ejus Monasterii Basilica, huicque addita circa annum 1180. ea Turris quæ non ob summam dumtaxat altitudinem, verum etiam ob externæ, internæque structuræ elegantiam vel his temporibus spectabilis est, ut campum antea, sic postea Forum exornarunt. Cui ab opposito latere ornamento fuit Palatium Publicum, ab Ordelaffis præsertim exædificatum sæculo XV. non sine altis porticibus, quarum columnæ ut lateritiæ sint, artificio tamen commendantur. Palatii turrim quis primus extruxerit, legisse, in præsentia non memini. Sed ante ea tempora extiterit, necesse est, si anno 1385. ut in Paduanii Chronicis vidi, & confirmat Bonolus ( *o* ), horologium in ea collocatum fuit. Turribus præterea, nonnullis etiam præaltis, domus quoque potentium civium passim instructæ, siqua in alia, in nostra urbe olim conspiciebantur, nedum Sacræ Ædes. Harum vero Turres suo quæque elaborato in conimodum pinaculo ornabantur, ut in paulo vetustioribus adhuc videmus. Nam quod in quibusdam nunc desit, casu aliquo factum est, qualem de sua ad A. 1433. in Chronicis indicavit Magister Hieronymus de Bursellis ex Prædicatorum Familia.

13. Præter maximum de quo dictum est, Forum, areas urbs nostra habuit, habetque complures. Nam præter eam quam ad Cathedrale Templum commemoravi, alias adhuc, & præsertim quatuor ante Cœnobita totidem, a sæculo usque XIII. patentes, videmus. Cœnobita ea sunt Eremitarum S. Augustini, Servorum S. Mariæ Virginis, & Familiarum tum S. Francisci, tum S. Dominici: quanquam Eremitæ illi exeunte eo sæculo, & quas post illos nominavi, haud multis, quod sciam, ante lustris urbem incoluerunt, cum ex Familiis quos postremo dixi, altera eodem sæculo non ita multum progressa, altera autem, id est S. Francisci, medium facile prætergressa in urbe fuerint. Sic autem loquor propterea quia etsi Breves quas vocant Litteras, easque autographas, legerim Innocentii IV. datas Lugduni XII. Kal. Maii Pontificatus anno VII. quibus Litteris facultatem ei Familiæ confirmat jam antea ab Apostolico Legato concessam, *habitationem*, quæ extra Civitatem Foroliviensem erat, *transferendi intra Civitatem eandem*; tamen cum authenticum Documentum attendo, a Marchesio ( *p* ) memoratum, ex quo apparet, anno 1266. necdum fuisse id Cœnobium exædificatum; non difficile intelligo, jure a Bonolo ( *q* ) dissentire Marchesium, cum longe aliud sit posse, aliud efficere. Caterum quod in areis quæ ante Cœnobita sunt Familiarum istarum, deest, in reliquis minime desideratur, ut Palatiis denique, sicut aliæ plures urbis partes, & magnificis Ædibus sint exornatæ.

14. Sed inter majores areas quæ intra amplificata

H

mcc.

( *f* ) l. 3. ( *g* ) Vid. Supplem. cit. l. 4. ad A. 1294. & l. 11. ad A. 1341. ( *h* ) Nat. Hist. l. 15. c. 11.

( *i* ) Marchesii. Supplem. cit. l. 4. ( *k* ) Ist. di Forl. l. 7. ( *l* ) Supplem. cit. l. 6. ad A. 1372.

( *m* ) l. 5. ad A. 1360. ( *n* ) n. 6. ( *o* ) Ist. cit. l. 7. ( *p* ) Supplem. cit. l. 4. ( *q* ) Ist. cit. l. 3.



mcenia relicta fuerant, non omittenda est quæ Episcopi Vineæ olim dicebatur, ubi Episcopales Aedes, quas alibi alio tempore fuisse, legimus, denique, ut adhuc videmus, exstructæ sunt. Verum præ his quæ in Canonorum Tabulario, in aliisque poteris invenire, dignum illud quod inquiras existimabis; neque enim ego nisi in Excerptis quibusdam ex eo Tabulario vidi; scilicet in Documento ad annum spectante 1193. mentionem fieri trium Forolivi Episcoporum, quorum nomina in horum Catalogo ante Alexandrum I. qui post eos extitit, nusquam reperiuntur; sunt autem Rainerius, Tedericus, & Oddo. Cujus Oddonis, & quidem ut Foroliviensis Episcopi, A. 1021. nomen in Excerptis aliis video ex Tabulario Archiepiscopalis Ecclesiæ Ravennatis (r). Quin etiam in iisdem (f) Rodolphum legi Forolivi Episcopum qui Ravennati interfuit Synodo sub Arnaldo Archiepiscopo A. 1016. Nunc si in Episcoporum nostrorum Catalogo, quem Marchesius exhibet in calce Supplementi sui, mecum animadverteris, inter Ubertum qui A. 962. & Joannem qui A. 1072. Ecclesiæ nostræ præerant, neminem scribi; facile intelliges, Rodolphum, & Oddonem in longo illo intervallo esse addendos; num vero etiam Rainerium, & Tedericum, in medio relinquo. Sunt enim & alia intervalla supra Ubertum, & infra Joannem ad Alexandrum usque, ad quæ referri ab iis possint qui sciant, quo anno Episcopi fuerint; nam fuisse, prima Excerpta ostendunt; intervalla autem ut alia interdum breviora esse possint, alia longiora, & ratio monstrat, & res ipsa confirmat: vides enim in Catalogi ea parte perlegendæ quæ ad propiora nobis attinet sæcula, eoque minus erroribus obnoxia est, accidisse, ut modo tres intra annos, imo intra duos, Episcopos tres haberemus, alias ut eundem ad triginta annos, aut eo amplius. Quod si Deus nostrum omnium annuat votis; multo serius nos deferet is qui Foroliviensi Ecclesiæ nunc præest (t) ea probitate, eaque simul Prudentia quæ ex doctrina existit, & ex prævia in gravissimis rebus exercitatione, ornatus, ut cum jam diutius, quam Decessorum, quod sci-mus, quisquam, præfuerit, nemo tamen sit cui videatur satis longo tempore præfuisse.

15. Excerpta illa Ravennatis, quæ summæ erga me Humanitati debeo Casinensis Præulis Eruditissimi Zinnanii, non illud solum quod ad Episcopos eos nostros attinet, me docuerunt, cum Catalogo de quo dixi, eorum nomina, & tempora conferentem, verum etiam quædam unde Catalogi chronologia fortasse posset exactior reddi. Huc adde, Prætorum nomina For-

roliviensium, in quibus perquirendis minus solliciti fuisse videntur nostrates, me ad duodecim in iisdem Excerptis animadvertisse omnia inter annum primum, & nonagesimum secundum sæculi XIII. suo quodque anno adnotata: quæ tibi alias, si volueris, libenter singula describam. Sed nostratibus, mihiq; adeo ipsi ignoscendum est, si propter plura urbis, nonnunquam pene totius, incendia, pleraque absumpta Majorum monumenta ad Historicos nostros, multoque minus ad me pervenire non potuerunt. Namque ut illud omittam incendium quod A. 1089. creditur accidisse; aliud ex vetustis Documentis contigisse intelligitur A. 1126. aliudque A. 1383. Memorabile autem præ cæteris fuit quod inter hæc duo, anno videlicet 1173. impiorum hominum scelere excitatum, adeo se extendit, ut Templum ferme omnia, nedum proximas domus comprehenderit, & quod ad propositum nostrum vel magis attinet, Episcopi Aedes, & Monasterium S. Mercurialis, ut Chartas antiquissimas, quæ utrobique, & in Monasterio præsertim, asservabantur, consumpserit. Sed anno quoque 1276. igne ab Ordelaissis, & Orgogliosis injecto, Publicum Prætoris Palatium conflagravit. Quin posteaquam Ordelaissis, qui jam tum Civitatis imperium aucupabantur, eo denique potiti essent, insequenti sæculo cum Franciscus ex ea Gente dominaretur, tabulas quas post gravissimum illud incendium Monasterium, ut potuit, rursus coegerat, rursus ipse combussit; ut, quod Paduanus in Chronicis ad A. 1359. adnotavit, Legatus Pontificis, recepta Civitate, mox cogere debuerit, siqui forte aliquarum ex iis tabulis exempla haberent, ut ii Monasterio traderent.

Ad incendia casus accesserunt prope innumeri, cum cives alii aliis partibus addicti, eoque inter se diu, ac sæpius dimicantes, modo has, modo illas domus funditus evertabant, modo alio emigrabant: vel cum tabellionum hæredes quas diligenter servare debuissent tabulas aut inscitia, aut dolo, aut longi temporis oblivione interciderere sinebant; neque enim ante annum denique 1588. Tabularium Publicum institutum est, quo tabulæ omnes inferrentur. Itaque jam diu sublati causis fere omnibus propter quas antiquiores Chartæ perierunt, multo facilius erit Posteris ea cognoscere quæ his postremis sæculis acciderint, quam superioribus fuerit Historicis nostratibus illa reperire quæ vetustissimis temporibus hic contigerunt. Quorum utrumque in scribendis ad te propediem Litteris experiar, de quibusdam excellentibus nostris Civibus tum magis, tum minus antiquis nonnulla additurus. Vale,

## E P I S T O L A Æ M I L I A N A X.

Nunc Epistolam (a), quam ad Marchesium Equitem, Sigismundi Equitis, & Historici filium, anno misi 1729. in manum sumens, & quæ de Cornelio Gallo, & de Flavio Blondo, te audiente, inter Academicos nostros non semel disserui, memoria repetens, accipe quæ de utroque ad eam Epistolam additurus. Quod tanto pressius faciam, quanto plura eorum quæ tunc scripsi, aut disserui, interea contigit, ut a Viris Eruditissimis confirmarentur.

2. Primum omnium, ut quo de Gallo in Academia verba facerem, omnes intelligerent, dedi operam, ut cum Galli circa eadem tempora plures fuerint ab Antiquis Scriptoribus memorati, cæteri ab nostro, qui Poeta eximius, & primus Ægypti Præfectus fuit, non difficile internoscerentur. Viri enim Doctissimi nominis similitudine decepti sunt. In quibus esset primo loco ponendus Servius, si, de nostro loquens, hæc verba in Eclogam X. Virgilii scripsisset, *Hic est Cælius Asinius orator, Asinii Pollionis filius*. Sex enim hæc postrema verba eo libentius credidero, ab imperita manu in Servii contextum fuisse intrusa, quod Vossius (b) in suo exemplari defuisse, testatur. Nec

sane Servius is erat, qui aliam esse Corneliam Gentem, aliam Asiniam, posset ignorare, & Asinium hunc, non Augusto, sed Tiberio imperante, ut est apud Tacitum (c), mortem obiisse. Contra autem Passeratius, cum de Cornelio quodam Gallo quem in Perusino bello periisse sciebat, interpretaretur Propertium (d), nescio quomodo versus & ejusdem Poetæ, & Ovidii, manifesto ad nostrum pertinentes, ita protulerit, quasi ad illum mortuum in Perusino bello attinerent; quando, ut alia omittamus, constat, Perusinum bellum decem annis ante quam Ægypti potiretur Augustus, eique Gallum præficeret, contigisse. Neque magis scio, quomodo ibidem cum de Gallo Ægypti Præfecto Servium laudasset, hæc continuo subjecerit, *Fuit & alter Gallus Cornelius Ægypti præfectus*, & de hoc eadem retulerit quæ Servius de suo. Nonne hic de uno duos, ut paulo ante de duobus Corneliiis Gallis unum, videtur fecisse? Nisi enim quem Propertius ibi, & quem Servius nominant, pro uno accepisset; non potuisset illud continuo adjicere, *fuisse & alterum Gallum*, id est secundum; nam mox cum alium proponat, *Tertium* dicit. Cum hæc igitur ne quis cum Passeratio falleretur, attigissem; tum alia addidi

ne

(r) N. 3243. (f) F. 2333. (t) Thomas Taurellus Foroliviensis. (a) Epist. I.  
(b) De Historic. Græc. l. 2. (c) Annal. l. 5. (d) in Eleg. 21. l. 1.



ne quem Casauboni auctoritas in errorem traheret, qui in suis tum in Strabonem, tum in Suetonium Adnotationibus de duobus pariter, id est de nostro Cornelio Gallo, & de Ælio Gallo unum fecerat eo faciliore errore, quod uterque Ægypti Præfectus fuit; sed Cornelius Gallus omnium primus, Ælius vero Gallus tertius, cum secundus fuerit inter eos interjectus Petronius. Quæ series ipsa, cum peculiaribus singulorum gestis; a Strabone (e) uno eodemque loco proposita, si ab eo Strabonis Interprete paulo attentius fuisset inspecta; Cornelium, & Ælium unum eundemque non credidisset, ut neque alii Claro Scriptori in mentem venisset suspicari, ab iis qui Strabonem olim descripsérant, forte, aut incaute truncatum Cornelii nomen in Ælii nomen transiisse. Cur enim tot aliis locis qui ad Ælium attinent, cum truncassent; illo uno qui revera ad Cornelium spectat, integrum descripsissent? Imo cur librarii cæteri in iis qui pertinent ad Cornelium, nunquam mutilassent; in iis autem qui ad Ælium sive apud Plinium (f) latine, sive apud Josephum (g), & Dionem (h) græce, semper Ælius, Αἴλιος scripsissent? Quæ cum attendo, non miror, præter unum Jo. Albertum Fabricium (i), alium neminem, quod meminim, Doctorum Virorum qui post Casaubonum res has attigerunt, ipsi esse adstipulatum: quin Vossius ipse, qui rem primum (k) in medio reliquerat, a Casaubono postea (l) non obscure dissensit. Apertissime autem dissensere Henricus Valesius, uterque Gronovius, Scherpezeelius, Spanhemius, Grævius, Burmannus, alii, quorum tunc libros singulorum diserte indicavi.

3. Sic Gallo nostro ab iis quibuscum facilius confundi poterat, aut confusus fuerat, se juncto (quis enim qui illius exitum sciat, aut a Gallo Luperi fratre (m), aut ab illo Plinii (n) Cornelio Gallo, quorum alter in castris cecidit, alter vero in venere obiit, non continuo distinguet?) proclive deinde fuit quæ perperam nostro, aut quæ recte tribuerentur, demonstrare. Tributum autem fuerat, quod primus Romana arma in Arabiam intulisset, & quod primum ejus auspiciis, aut certe eo Ægyptiis præfecto, ex Muris portu centum & viginti mercatoriarum naves ad Indiam tractus enavigarint. Hæc autem ad Ælium Gallum, non ad Cornelium, referenda esse, ex Strabone (o) liquet: quin etiam quod ad Arabicam illam Ælii Galli expeditionem attinet, ex Plinio (p) quidem, & Dione (q) confirmare licet; nam quod ex Galeni quoque libro de Antidotis addebat Valesius (r), majorem Viri Doctissimi diligentiam desidero, cum in eo libro (s) Galenus utique antidotum describat Ælii Galli, qua Casarem liberavit; sed cujus Ælii, non modo an illius qui Arabiam primus invaserit, toto eo libro ne verbum quidem. Contra vero jure meritoque Cornelio Gallo tribuitur quod *Heroum urbem quæ defecerat, cum paucis copiis ipse receperit*, & quod *in Thebaide seditionem, propter tributa, exortam facile compescuerit*; utrumque enim Stabo (t) diserte testatur. Cujus hæc verba ultima ut minime favent iis qui Thebas illas, unde Thebaidis nomen est ortum, ab eodem Gallo funditus everfas esse, non dubitant, sic neque alia tantum favent, quantum putant, ubi paulo superius, tunc *vicatim habitari eam urbem (Thebas)* dixit, & *nonnulla ejus vestigia servari*; continuo enim addit quæ magnitudinem declarant, *longitudinem quidem LXXX. fere stadiorum, & esse in ea templa quam plurima, magna ex parte a Cambyse mutilata*. Cur enim qui antiquius excidium memorat, recentius omisisset? & si, Cornelio præfecto, immani ista fuisset amplitudine, quæ olim, ut est apud Tacitum (u) septingentis millibus hominum qui arma ferre possent, conveniebat; quomodo tam facile diruta esset? Malim igitur Strabonem secundum ea quæ Ammianus (x) scripsit, interpretari, a Pœnis primum oppressam, deinde postquam reparata fuerat, a Cambyse (quod vel melius mox ostendam ex Plinio) pessumdatam, antiquissimæ suæ magnitudinis vestigia quidem servasse, cives autem inter hæc, & circum, longe minori sem-

Morgagni Opusc.

per numero, quasi per vicos habitavisse, itaque ipsos magis fortunis, quam urbem ædibus, everfos fuisse a Cornelio Gallo, quem proprie ibi locutus Ammianus *exhausisse*, ait, *civitatem, plurimis* (si credere hoc tamen licet (y)) *interceptis*, ut propterea *furtorum arcesceretur*. Ad Cambysem igitur refero quod alii ad Gallum ex Juvenale (z)

Atque *vetus Thebe centum jacet obruta portis*; ad Gallum vero quod iidem ex Pausania (a) ita proferunt, quasi scripsisset, *Thebas ad nihilum redactas*; cum ego ex Loescheri interpretatione sic legam, *Quæ vero opibus olim valebant, Thebæ Ægyptiæ, & Minya, tum Orchomenus, jam minus habent ad felicitatem, quam qui re est mediocri homo privatus*.

4. Nec vero facilius crediderim quod Cornelio Gallo tributum legi ab nonnullis sequiorum sæculorum Scriptoribus, obeliscos everfarum Thebarum ab eo Romam esse missos. Proclivius esset assentiri, nisi Strabonis ipsius, id est Tiberii ætate inter vetera *Thebarum magna vestigia mansissent structis molibus literæ Ægyptiæ*, sicut a Tacito, Germanici iter describente (b), traditum est. Quin manebant etiam Vespasiani tempore, cum Plinius (c) de obeliscis verba faciens, a Thebaicis initium duxit. *Obeliscus est Thebis*, inquit; sequor enim libentius qui sic legerunt, lectionem comprobante quod paulo post dicit, *Sunt & alii duo*, & quod de primo ait, *admiratione ejus effectum esse, ut cum oppidum id expugnaret Cambyses rex, ventumque esset incendio ad crepidines obelisci, extinguere ignem juberet molis reverentia, qui urbis nullam habuerat*. Ammianus (d) autem, qui sæculo, ut nosti, scribebat IV. se Thebis obeliscos vidisse plures, testatur, *aliosque jacentes, & comminutos*. Quod si præter eos quos memoravimus, alii, ut in tanta urbe, fuissent, qui a Gallo missi essent Romam; vix credi posset, Plinium, de obeliscis qui jam tum Romæ erant, ita scribentem (e) ut a quo, & unde advecti essent fere singuli, non omitteret, ipsumque Ammianum ferme idem facientem, & maximum omnium, suo tempore importatum, addentem, & Thebas, ut diximus, & Gallum eodem loco, nec verbis paucissimis, commemorantem, nullam mittentis Galli, nullam a Thebarum urbe avecti obelisci injecturos fuisse mentionem.

5. Contra vero sunt quæ Cornelio Gallo negare possit nemo, ut quod accepto a Pinario Scarpo exercitu Parætonium subito occupaverit: quod M. Antonium ad Parætonii murum accedentem cum magnis & navalibus, & terrestribus copiis primum ne suos blanda oratione corrumpere, tubarum cantu opportune imperato, ut Antonium audire nemo posset, deinde eruptione facta, inde repulerit; quod illius naves in portum illexerit, moxque per latentes antea sub aquis, attractas catenas intra portum concluderit, ibique partim incenderit, partem submerferit. Hæc certe omnia quemadmodum ut Augustus pervinceret, maximo adjumento fuerunt, sic diserte ab Dione (f) tradita sunt. Nec Plutarchus (g) reticet, quomodo partitis cum Proculejo officiis effecerit, ut Cleopatra suis cum thesauris viva in Augusti, id summopere cupientis, potestatem veniret.

6. Et hæc quidem fortis, sagacisque ducis pro Imperatore suo facta ita certa sunt, ut quæ maxime. Qua autem potissimum culpa in ejusdem offensionem inciderit, cum post vulgatam Augusti indignationem, multæ, ut sit, & Dio (h) commemorat, in Gallum conjectæ fuerint, incertum est. Illam tamen credere malim quæ una post ejus mortem ab Ovidio (i) ad Augustum ipsum scribente, memorata est, nempe quod *linguam nimio non tenuerit mero*. Dignior enim ejusmodi culpa fuit ea commiseratione ob quam Augustus, re melius postquam Gallus a Senatu damnatus, se occiderat, pensitata, & *illacrymaverit, & vicem suam conquestus sit, quod sibi soli non liceret amicis, quatenus vellet, irasci*, sicut ab Suetonio (k) traditum est. Quod autem non Suetonius modo, & Servius in Eclogam Virgilii X. Gal-

H 2

lum

(e) De Situ Orbis l. 17. (f) Nat. Hist. l. 6. c. 28. (g) Antiquit. Judaic. l. 15. (h) Rom. Hist. l. 53.  
(i) Biblioth. Lat. l. 1. c. 14. (k) l. 2. cit. c. 6. (l) De Poetis Latinis. (m) apud Propert.  
(n) Hist. cit. l. 7. c. 55. (o) l. cit. 17. & 2. (p) Hist. cit. l. 6. c. 28. (q) l. cit. 53.  
(r) apud Gronov. ad Amm. Marcellin. l. 17. c. 4. (s) c. 1. (t) l. cit. 17. (u) Annal. l. 2.  
(x) Gestar. Rer. l. 17. (y) Vid. infra, n. 6. (z) Satyr. 15. (a) De tota Græcia l. 8. (b) l. 2. cit.  
(c) Nat. Hist. l. 36. c. 9. (d) l. 17. cit. (e) c. cit. 9. & 11. (f) Rom. Hist. l. 51. (g) in Antonio.  
(h) l. 53. (i) Trist. l. 2. (k) in Augusto c. 67.



lum in Augusti amicis, sed Augustus ipse, cujus verba ista refert Suetonius, diserte posuerit, confirmare nos debet in laudabili Ovidiani loci (l) interpretatione retinenda,

*Tu quoque, si falsum est temerati crimen amici, Sanguinis, atque animæ prodige Galle tuæ.*

Cum enim tum Largus, qui temulenti Galli verba, tanquam ingrati, & malevoli in Augustum animi indicia, ad hunc detulerat (m), tum Augustus in Galli amicis fuerint, vocem illam *temerati* num ad Largum potius proditæ amicitiae scelere pollutum, quam ad Augustum, si vera fuisset Largi delatio, a Gallo violatum referemus? Nempe, si frequentiore respiciamus Latinorum consuetudinem, ad Augustum. *Temeratum* enim de eo fere cui injuria illata sit, non de eo qui intulerit, quantumvis scelesto temeratore, dictum invenimus. Sic Livius (n) *sepulcra majorum temerata & violata*. Sic Virgilius (o) *templa & temerata Minervæ*. Sic ille quem hic interpretamur, Ovidius (p) *hospitii temerata sacra*. Quod tanto minus improbabis, si Augusto, tanquam sacro, aras adhuc *præsenti* fuisse *positas* (q) memineris.

7. Ille autem alter Ovidii versus

*Sanguinis, atque animæ prodige Galle tuæ,*

quippe a contemporaneo Poeta scriptus, supervacaneam reddit ad eos responsionem, qui videntur Gallum credere ab alio potius, quam ab se ipso, interfectum fuisse. An vero uno se vulnere interemerit, quod Ammianus (r) significat iis verbis, *stricto incubuit ferro*, antiquioris, imo Galli æqualis, & paulo post ejus mortem scribentis Auctoris Propertii dubitationem injiciunt hi versus duo (s)

*Et modo formosa quam multa Lycoride Gallus*

*Mortuus inferna vulnera lavit aqua;*

nisi forte, ut Poeta, de multis loquitur vulneribus Galli animo ab amata Lycoride inflictiis: quanquam in hoc disticho, sive hac, sive alia ratione explicato, mihi semper aliquid desiderari posse visum est, unde dilucidius fiat.

8. Hactenus quæ Gallus revera gesserit, aut pertulerit, præcipua attigimus. Nunc quæ scripserit, videamus, a certis pariter incerta, & multo magis supposita secernentes. Neque enim dubium est amplius, quin omnia quæ Cornelii Galli inscripto nomine circumferuntur, supposita ipsi fuerint, sive illa amatoria sint carmina, sive alterius sint argumenti, ut de Elegiis præsertim, & de illo in Virgilii obitum Epigrammate a nobis quoque ad Marchesium scribentibus (t) peculiari non una ratione demonstratum est. Sed incerta sunt alia, etiam quæ nonnullis videntur certa, ut Ciris, Virgilio alioquin a plerisque adscriptum Poema, & in Pollionem Oratio, de qua miror esse qui non dubitent, quando is unus, qui ex Veteribus eam memoravit, Quintilianus (u) non obscure dubitabat. Sic enim ait; *in Oratione Labieni, sive illa Cornelii Galli est, in Pollionem*. At quæ certo scimus a Gallo fuisse scripta, a longo iam tempore interciderunt. Nam præter unum versiculum, a Vibio Sequestre (x) nobis servatum, & versus illos quos in Virgilii Ecloga X. indicavit Servius *Galli esse, de ipsius translatis carminibus*, cum alios habeamus nullos; fieri non posse videtur, quin si post Vibii, & Servii ætatem paulo diutius Galli Scripta superfuissent, de tot qui consecuti sunt, Auctoribus aliquis se eximium Poetam legisse, significasset, ejus versu, aut sententia saltem quapiam producta. Diu autem est ex quo uterque illorum extiterunt. Nam Servium illum ipsum contemporaneum fuisse Macrobi, satis ex hujus Saturnaliorum libris Pancratius Masvicius (y) ostendit. Macrobio autem, qui sæculo floruit IV. posterior non videtur fuisse Vibius, ut qui juniorem Lucano Poetam non citet, quem admodum adnotavit Hesselius (z). Illum autem Galli versum de Hypæne flumine Vibium ex aliquo de ejus libris Amorum sumplisse non æque affirmaverim, ac Virgilium illos quos indicat Servius, teneros adeo & patheticos, ut inde quod scripsit Fabius (a); in

Elegiis Tibullo, & Propertio Gallum fuisse *duriorum*, de versuum structura potius, quam de teneris affectibus, intelligendum videatur.

9. Porro eodem Auctore Servio (b) pro certo scimus, Gallum & Euphorionem *translulisse in Latinum sermonem, & Amorum suorum de Cytheride scripsisse libros quatuor*. Ad translatum autem Euphorionem non modo, judice etiam Quintiliano (c), ea spectant quæ Gallus in illa X. Virgilii Ecloga dicens inducitur,

*Ibo, & Chalcidico quæ sunt mihi condita versu*

*Carmina, pastoris Siculi modulabor avena;*

Sed & alia in Ecloga VI. ad quæ hæc adnotavit Servius, *Hoc autem Euphorionis continent carmina, quæ Gallus translulit in sermonem Latinum*. Quod quidem non ita accepturum te scio, quasi verbum verbo reddidisset, sed potius ut Euphorionem, eadem fere argumenta tractando, & scribentis colorem, ut loquitur Probus Grammaticus, sequendo, non magis imitatus sit, quam æmulatus. Neque enim, nisi ita esset; eam ibi translationem spectans Virgilius, laudes in Gallum contulisset. illas quæ summo conveniunt Poetæ, cui *Phæbi chorus adsurrexerit omnis*, id est omnes Musæ. Sed & Amorum libros quanti faceret, Virgilius ostendit, cum ex iis versus in suam, ut diximus, translulit Eclogam. De aliis autem non modo qui centum post annis floruerunt, Poetis, ut puta Martialis (d), sed & qui eodem quo ille, vixerunt tempore, nihil attinet dicere, præsertim cum de Propertio supra indicatum sit; Ovidii autem tot extent loci quibus eos libros dilaudavit, ut propterea fortasse Blondo (e) acciderit, inter eos qui de Gallo mentionem fecerunt, cum Ovidium in animo haberet, Horatium nominare. Nam præter locos quos ex Tristium libro II. & ex Amorum III. supra attulimus, sunt alii, ut bini libro III. de Arte Amandi, tertius libro II. de Remedio Amoris, quartus Amorum libro I. quintus Tristium libro IV. in quorum plerisque cum Galli amatorias Elegias aut laudaverit, aut per universum terrarum orbem celebres dixerit; in postremo præluxisse illum cæteris ejusmodi carminum Latinis Scriptoribus, ostendit. Nam cum de Tibullo verba faciens, dixisset,

*Successor fuit hic tibi, Galle,*

hæc subjecit,

*Propertius illi,*

*Quartus ab his serie temporis ipse fui.*

Quæ omnia tanto pluri facienda sunt, quod Ovidius, & Propertius post Galli mortem, & Augusto dominante, scripserunt; de cujus intimis animi sensibus, nisi magni quidam eodem tempore alii Poetæ cautius forsitan dubitassent; credibile est, ipsos quoque Gallum laudaturos fuisse. Quæ potius causa reddenda fuerat, cur Græcus quidam Scriptor, Augusti æqualis, inter cæteros Poetas Gallum omiserit, quam, ut nuper vidi, excogitanda altera a vero prorsus abhorrens, quod necdum ejus carmina, quippe adhuc viventis, & Aegypto præfecti, innotuissent; certe enim tunc vivebat, neque adhuc ab Augusto provectus fuerat, cum ejus carmina in manibus erant omnium, & Virgilii Eclogis inserta.

10. Quod si necdum innotuissent, vivente Gallo; num credimus, Parthenium, Græcum ipsum quoque Scriptorem, illi, ut Jo. Albertus Fabricius (f) commemoravit, *Erotica sua inscripturum fuisse*? Intelligo Elegias suas in *Venerem*, de quibus Suidas (g) inter multa alia a Parthenio scripta, fecit mentionem, cum ipsum tradidit, debellato Mithridate, a Cinna captum, & postea manumissum propter doctrinam, *vixisse usque ad Tiberium Casarem*; ut permirum sit, ab Doctis Viris qui hoc minime ignorarent, videri cum Parthenio illo confusum, de quo, cum esset cubiculo Domitiani præpositus (h), Epigramma extat Martialis (i). Pertinet autem ad Cornelii nostri laudem scire, quæ esset Parthenii poetæ existimatio. Hæc autem non vulgaris fuerit, oportet. Neque enim Tiberius, qui, ut ab Suetonio (k) traditum est, *artes liberales utriusque generis studio-*

(l) Amor. l. 3. Eleg. 8. alius 9. (m) Dion. l. cit. 53. (n) Hist. l. 16. (o) Æneid. l. 6. v. 841.  
(p) Heroid. 17. v. 3. (q) Horat. Epist. l. 2. Epist. 1. v. 15. (r) l. 17. cit. (s) l. 2. Eleg. 23.  
(t) Epist. l. n. 12. & seqq. (u) Instit. Orat. l. 1. c. 5. (x) De Fluminib. ad Hypænis.  
(y) Præfat. ad suam Virgil. Edition. (z) in sua Vibii Edit. (a) Instit. cit. l. 10. c. 1.  
(b) in Eclog. Virgil. 10. (c) Instit. c. 1. cit. (d) l. 9. Epigr. 73. (e) Ital. Illust. Reg. 6.  
(f) Biblioth. Lat. l. 1. c. 14. (g) Historic. in Parthenius. (h) Vid. Sueton. in Domitiano c. 16.  
(i) l. 4. Epigr. 45. (k) in Tiberio c. 70.



*studiosissime coluit*; & fecit Græca poemata, non solum in his imitatus esset Euphorionem, de quo supra diximus, & Rhianum, de quo Suidas (l), & hunc de quo loquimur, Parthenium; verum etiam horum Poetarum scripta, & imagines, publicis bibliothecis inter veteres & præcipuos auctores non dedicasset. Quin idem Parthenius, si de hoc melius, quam illud Martialis Epigramma, Viri Docti locum Macrobiani (m) indicarunt; videri potest præceptor Virgilii ipsius fuisse. Macrobius enim hujus versum cum græco quodam altero conferens, hic versus est, inquit, Parthenii, quo grammatico in Græcis Vergilius usus est.

II. De Cytheride autem, quam Lycoridis nomine, in Amorum libris celebravit Cornelius, cum ad Marchesium plura scripserimus (n); pauca supersunt quæ in eorum confirmationem addamus. Igitur quod in illa Ciceronis Epistola ad Atticum (o) pro altera uxore legere malebam (p) alteram uxorem, nunc magis placet, cum in Lipsii inciderim locum (q) ubi eandem Paulo Manutio lectionem proposuit, sed VIII. ex librariorum, opinor, errore Epistolam indicans, & vix ullam sic legendi rationem afferens; ut non unam me haud pœniteat protulisse. Pariter nec me prorsus pœnitent, tempus quo Cytherides, relicto Gallo, M. Antonium in Galliam secuta est, non post Mutinensem Octaviani victoriam, sed paulo ante Clodii cædem statuisse (r). Video quidem, sic a me Gallum, annis, si non ita multis, at certe pluribus ante quam plerique credant, jam natum esse ponendum. Sed & alii sunt qui antea natum existimaverint, & in describendis numerorum siglis tum facile peccari potest, tum sæpe alias peccatum est, & qui secus putant, non videntur satis attendisse, de duobus illis temporibus quibus Cytherides Antonium potuit in Galliam sequi, utrum credibilius sit. Num quando apud Mutinam prostrato, fuso, occiso illius exercitu, cum admodum paucis, nocte tectus, metu perterritus, ut Tullius loquitur (s), fugit, neque in Galliam illam penitissimam, quam hæc significant ex Galli carminibus (t)

*frigora Rheni*

*Me sine sola vides;*

sed in Galliæ partes, Italiæ proximas, ambigua spe; si Lepidus, & Plancus, ibi cum legionibus degentes, quod Patriæ debebant, præstare vellent, iisque præterea incommodis, quæ Plutarchus (u) narrat, gravissimis conflictatus, quippe in turpi ac nuda fuga, ut Paterculus (x) eam vocat. Et si tunc a Mutinensibus castris fugientem secuta est; ecquando in illa venisse, dicemus? Num forte cum Antonius Roma proficiscens ad D. Brutum e provincia expellendum, in hanc venit, eumque, se Mutinæ tuentem muris, obsedit? an postea? Utrumlibet dicamus; non tamen eâ provincia erat Gallia quam Cornelii producta carmina indicant; sed hæc citerior: neque ad obsidentem transire poterat, Consul, & Octaviani copiis inter Mutinam, Romamque interjectis: & siqua transisset; nec quod Cornelius sciebat, & in Elegiis querebatur, id Fulviam latere potuisset, quæ, ut zelotypa uxor erat, nequaquam eo ipso tempore pro Antonii indeunitate assiduus precibus Senatores fatigasset, ad eorumque pedes cum fletu, & ejulatibus, ut narrat Apianus (y) se prosternere voluisset. Contra vero, si mecum ponas, Antonium paulo ante quam Clodius a Milone occideretur, in Galliam redeuntem, secutam esse Cytheridem; nihil quidquam ex illis obstat. Transalpina Gallia, ex qua iterum ut in Germaniam transiret, Cæsar pontem circa ea tempora flumini Rheno imposuerat, ab Antonio illius Quæstore adibat. Nihil eunti impedimento erat, ne Fulvia quidem: necdum enim uxorem hanc duxerat. Hæc fecerunt olim, & adhuc faciunt, ut Galli querimoniam de Cytheride Antonium secuta, in hoc quod modo

indicabam, tempus aptius cadere mihi quidem videantur, & quod consequitur, de Galli ætate fortassis aliter, quam plerique credunt, existimandum. Certe autem hallucinati sunt ii qui cum Cytheride fuisse Antonium in Galliam scribunt L. Antonio, & P. Servilio Isaurico Coss. Eodem enim anno quo Pansa, & Hirtius Coss. obierunt, & profugit, & Triumvir mox factus est M. Antonius; Lucius autem, ejus frater, non modo insequentis anno quo Plancus, & Lepidus Consulatum gessere, Consul non fuit, ut neque Servilius Isauricus; sed anno post hos proximo.

12. Cæterum Cornelium nostrum fuisse Gallum illum Cornelium, quem, ut familiarem suum, Asinius Pollio, sicut ad Marchesium scribens (z) memoravi, Ciceroni commendasse videtur, eo mihi credibilius fit, quod etiam postea cum Pollione illum conjunctum invenio ad eam quæ Triumvirum jussu veteranis fiebat militibus agrorum divisionem, ut in Virgilii ea quæ Donato tribuitur, Vita legitur, sive, ut ait Servius (a) ad exigendas pecunias ab his municipiis, quorum agri in Transpadana regione non dividebantur. Ad utrumlibet enim munus a Pollione, qui apud Triumviros plurimum poterat, commendatum esse, non difficile conjici potest. Et fieri quoque potest, ut chartæ quædam species ideo vocaretur Corneliæ, quod nostro Gallo Ægypti præfecto, ibi primum confecta sit, ut Isidorus tradit apud Fabricium (b); nam et si Plinius (c) ubi tot alia memorat chartarum genera, id nomen filet, potuit eandem alio vocabulo designasse. Prænomen Cornelii Cajus, an Cneus fuerit, cum alii hoc, alii illud voluerint, sicut adnotavit Fabricius (d), & facilis in ejusmodi prænominibus describendis error sit; plerique tamen Cajus maluerunt. Cognomen autem Gallus ab regione in qua ortus, an aliunde traxerit, dubitantes satis est animadvertant, si a patria regione traxisset, cum id cognomen multis adeo in utraque Gallia natis esset commune; futurum non fuisse, ut Poetæ eo uno vocabulo, tanquam ipsius peculiari, ad Cornelium hunc significandum uterentur. Sed ubi ubi natus sit; qua de re mox videbimus; credemusne illis qui ex perperam intellecto Propertio, Gallo Majores tribuunt antiqua nobilitate præstantes? an aliis qui, id rejicientes, ex equestri tamen ordine Gallum fuisse, ostendi posse, contendunt Dione, & Tacito auctoribus, ubi de Ægypti Præfectis loquuntur? Ego certe in Dione (e) legisse memini, sicut alibi (f) etiam scripsi, Augustum, qui Ægypti Præfectos instituit, id lege cavisse, necui Senatori, imo, ut lego in Tacito (g), necui Equiti Romano illustri liceret, nisi permissu, Alexandriam introire: tantum abest, ut Equites vellet esse Præfectos. Quod si voluisset; poterat tamen Gallum, non equestri loco natum, jubere Equitem fieri, ut Ovidius (h) loquitur, *fortune munere*, quando ad officium illud amplissimum provehebat, & ex infima quidem fortuna, non secus ac Salvidienum, qui obscurissimo genere natus, paverat gregem, quorum illud scis ex Suetonio (i), hoc autem ex Dione (k) me alia Epistola (l) ostendisse.

13. Sed tamen hic sive per Majores, sive, quod apud Sapientes præstantius est, per se nobilis Cornelius quam urbem ortu nobilitavit suo? Multæ sane, gravesque sunt causæ, cur id perdifficile sit constitueret. Illa prima: cum ex Antiquis nemo præter Eusebium proferatur qui de ejus Patria quidquam scripserit; sintne revera ex Eusebio (m) hæc *Cornelius Gallus Foroliviensis poeta &c.* Dubitandi autem causa est, quod in græco Eusebii textu, ab Scaligero vulgato, vox illa quæ ad Patriam attinet, omnino deest. At si illam non habet Eusebii textus; habet, inquis, Sancti Hieronymi latina versio, sive in ejus græco extaret Codice, sive ab ipso addita sit; admonuit

(l) Historic. cit. in Rhianus. (m) Saturnal. l. 5. c. 17. (n) Epist. I. n. 18. & seqq. (o) l. 10. Epist. 12. (p) n. 20. (q) Epistolic. Quæst. l. 4. Epist. 11. in fin. (r) n. 15. & seqq. (s) Philippic. 14. (t) in Ecloga Virgil. 10. (u) in Antonio. (x) Hist. Rom. l. 2. c. 61. (y) De Civil. Rom. Bell. l. 3. (z) Epist. I. n. 17. (a) ad Eclog. Virgil. 6. (b) Biblioth. Lat. Supplem. P. 1. l. 1. c. 14. (c) Nat. Hist. l. 13. c. 12. (d) Bibl. Lat. l. 1. c. 14. (e) Rom. Hist. l. 51. (f) Epist. I. n. 25. (g) Annal. l. 2. (h) Trist. l. 4. Eleg. 10. (i) in Augusto c. 66. (k) Hist. cit. l. 48. (l) l. n. 24. (m) Chronic.



nuit enim in Præfatione ad versionem hanc suam; plurima se addidisse quæ intermissa videbantur, in Romana maxime historia, in qua cum esset ipse quoque versatus, & post Eusebium quidem, sed eodem tamen sæculo scriberet; perinde est ac si ab Eusebio haberemus quod ab S. Hieronymo additum sit.

Verum altera est dubitandi causa, num *Forolivienſis* Sanctus Vir scripserit, an *Forojulienſis*? facilis enim in altera voce pro altera describenda librariorum lapsus: & sane alia in aliis codicibus occurrit, nec si omnes codices eandem haberent; inter Forojulienſes, & nostrates controversia de Galli Patria esset exorta. Quid igitur primi ajant, primum attendamus.

14. Is qui fusius quam cæteri ex illis super hac controversia scripsit Præful Eruditissimus, cujus librum anno post ejus mortem sexto Romæ editum, id est anno 1742. modo acceptum ab Amicis, legebam, negat, ullum Eusebii extare codicem qui ante medium sæculi XV. sive ante Blondi Italiam Illustratam scriptus sit, nec habeat *Forojulienſis*, idemque negat de optimis quæ e typographorum officinis prodire tandem cœperunt editionibus, tum de præstantioribus, qui ante id quod diximus tempus, aut postea quidpiam circa hanc rem attigerunt, Scriptoribus. Quin videri, ait, non potuisse S. Hieronymum scribere *Forolivienſis* propterea quia vox hæc ad significandos Forolivii cives tunc erat ignota, cum hi ad sæcula usque Blondo proxima *Livienſes* dicerentur.

15. Verum ut ab hoc quod postremo retulimus, incipiamus; quidquid sequioribus sæculis fieri cœperit, efficiet nunquam, ut quod melioribus fiebat Sanctus ille Vir, latinæ linguæ scientissimus, facere non debuerit. Neque enim ignorabat, cum Latini, ut ex Plinio satis constat, Forocornelienses, Forosempronienſes, Foropopulienſes, Forovibienſes, Foroneronienſes, Forojulienſes dixissent, ad eandem normam Forolivienſes quoque esse dicendos. Scripserit, exempli causa, suo IX. sæculo Agnellus ( *n* ) *Livienſes accolæ insistent in littore curvo*, & mox *Corneliensis acies lustret Coriandri campos*. Nunc certe si quis meliora imitari vellet sæcula, ut *Forocorneliensis*, ita scribere deberet *Forolivienſes*. De Scriptoribus autem qui sive priusquam Blondus primus, quod illi ajunt, in Eusebio legeret *Forolivienſis*, anno videlicet 1450. sive post eum annum hanc rem attingendi occasionem habuerunt, plures quidem secum facientes producant. At certe nec sibi defuerunt nostrates, Petrarcham, Pastrengum, Bergomatem, & alios, atque alios pro se adducentes: esse autem qui his possint adjici, vel ipsi fatentur qui secus sentiunt; ut nos pariter fateamur, & alios esse qui addi possint pro ipsis. Quin de editionibus quoque, imo & de codicibus hæc eadem dicimus, ad quos denique veniendum est; nam ex codicibus editiones, & assensus, aut dissensus hac in re Doctorum hominum pendet. Ut enim quisque legit, ita ejusmodi quidem in re & judicat, & edit; facilis autem est, ut ante diximus, & per se patet, & sæpius reapse contigit, hac in voce describentium error, isque in utramque partem. At enim universi codices, ante annum 1450. scripti, habent *Forojulienſis*. Sed quid si in vetustissimum aliquem codicem, ex quo, ut non raro accidit, cæteri descripti sint, se jam is error intrusisset? aut potius quid, si in plures quidem, sed non in omnes? Fatentur enim denique, esse & Romæ, & alibi ad duodecim, in quibus legitur *Forolivienſis*. At illud addunt, esse eos omnes post id tempus quod diximus, scriptos. Unum enim descriptum fuisse A. 1448. alterum esse ejusdem ætatis, reliquos ex scripturæ judicio esse posteriores. Quam vereor, ne judicium istiusmodi nonnullos aliquando fallat: sane codices qui annum habere adscriptum dicuntur, descripti non fuerant postquam Blondus Italiam edidisset suam, ut quam A. 1450. ut alibi ( *o* ) demonstravi, adhuc scribebat, in eaque suam hanc Eusebii lectionem. Huc adde, Vaticanis, quos

octo esse fatentur, codicibus Amicum nostrum, qui nuper inspexit, duos præterea quos illi inter num. 242. & 246. prætermiserunt, esse adjiciendos, animadvertisse. Extare enim n. 243. & n. 245. membra neos codices qui certe habent *Forolivienſis*, in calce vero hæc adscripta alter quidem *Transcripta*, & completa summa diligentia pridie Kal. April. An. Dom. 1441. primus autem *Antonius Marii Florentinus Civis*, & *Notarius transcripsit Florentiæ Anno Domini 1435. 13. Kal. Decembr.* Quem Antonium esse eundem illum *Antonium Marii filium Florentinum*, a quo descriptum codicem fuisse, dicunt, A. 1448. etsi dubitandum non videtur, & de his quæ mihi conferre non licuit, liberum tibi sit, ut volueris, existimare; tamen ubi omnia pensitaveris, dubium mihi non est, quin saltem interea, cautius locutum, esse, dicas, Præsulem alterum, prioris illius civem, & ipsum quoque Eruditissimum, cum Eusebii codices *Forojulienſis* habere, affirmavit, non omnes quidem, sed eos quos ut magnæ auctoritatis laudabat. Sed & nostrates si multos versandi antiquos codices facultatem, longa itinera suscipiendo, sibi compararent; fortasse alios non imparis auctoritatis codices qui pro se facerent, invenirent: & præter alios quos produxerunt, non est, opinor, Chronicum illud contemnendum, Ferrariæ extans, cujus verba protulit Marchesius filius ( *p* ), ut ipse alibi ( *q* ), sed nimis presse, memoravi. Cum enim ab Orbe condito incipiens, non ultra annum perveniat 1324. & cætera quæ Eusebius habet de Gallo referens, hunc Forolivienſem faciat; certe diu ante Blondum sic in Eusebio videtur lectum fuisse.

16. Non alienum hic fuerit animadvertere, qua ratione isti qui ab nostratibus dissentiunt, factum credant, ut librarii, & typographi sæpe adeo peccaverint *Forolivienſem* pro *Forojulienſi* scribendo. Credere autem se, dicunt, id factum, quia ab suo illo magis, quam ab nostro Foro distiti, & hoc Viris ornatissimo non tam dignitate, quam litterarum copia illustribus, ad hoc potius, quam ad illud certa quædam inter describendum spectare, existimarint. Est sic loquentium Humanitati ( qua utinam erga nostrates quosdam mortuos uti voluissent ) est, inquam, habenda gratia, imo etiam referenda; nam & ipsorum, aliorumque tum dignitate, tum eruditione perornatum est Julii Forum; ut non immerito fortasse alio loco dicant, suum inter cætera omnia quæ ab Julio habent nomen, celeberrimum esse, ac notissimum. Sed hoc ipsum ( ut omittamus, amplissimam certe Forojulienſem Regionem vel typographis longe magis esse notam, quam unam urbem Forolivienſem, debere ) hoc ipsum igitur quod dicunt, hic pro Forolivienſibus facit. Sic enim librarii; ut pro centenis, quæ in promptu sunt, bina, haud amplius, afferamus exempla; sic, inquam, librarii, cum eum describerent Jornandis ( *r* ) locum in quo Ataulfum narrat uxorem duxisse Placidiam Forolivii, non dubitarunt in Codice Ambrosiano scribere *Forojulii*, tametsi evidens esset error; Jornandis enim verba sunt hæc in *Forolivii Emilia civitate*; ut potuerit quidem Garetiſ, quemadmodum ipsi visum est, rescribere *Forocornelii*; sed *Forojulii* nemo posset. Sic quoque in Itinerario quod Antonino adscribitur, etsi manifestum est, inter Ariminum, & Derthonam Livii quidem esse Forum, Julii autem esse non posse; librarii tamen ( *s* ) *Foro Julii* scripserant ( *t* ). Quod si ubi Auctorum verba ipsa, & propositum admonere debebant, ne sic in Civitatem nostram peccarent, abrepti alterius celebri nomine peccarunt; quanto facilius in Eusebio, cujus verbis convinci nequirent, idem facere potuerint, non est dubitandum.

17. Sed fac paulisper, quod necdum constat esse faciendum, fac, inquam, in Eusebio non peccasse, & legendum esse *Forojulienſis*; num liquet continuo quod quærimus, nempe qua in urbe natus sit Gallus? Non liquet sane. Primum enim animo occurrunt populi quos Plinius ( *u* ) nominat *Forojulienſes Transpadanos*.

( *n* ) Lib. Pontific. P. 2. in Vita S. Felicis c. 3.

( *o* ) Epist. I. n. 8.

( *p* ) Vit. Viror. Illustr. Foroliv. l. 2. c. 5.

( *q* ) Epist. I. n. 4.

( *r* ) De Reb. Getic. c. 31.

cum Notis Gareti

( *s* ) sub titulo Iter ab Arimino Derthonam.

( *t* ) Vid. Wesseling. ad hunc locum.

( *u* ) Nat. Hist. l. 3. c. 19.



nos. Quos si pro iis omnibus accipiamus qui Regionem quam nunc Foro-Juliensem dicimus, late incoleant; cui potissimum eorum aut urbi, aut oppido Gallum tribuamus, addubitantes, num Aquilejæ negare omnino, præciseque poterimus? Jam Q. Fabio Labeone, M. Claudio Marcello Coss. (x) eo colonia deducta fuerat, non civium quidem Romanorum, sed Latina, at Corneliam tamen Gentem ibi floruisse, constare dicitur ex antiquis lapidibus; tametsi quo sæculo, non dicatur, & alii non desint lapides in Æmilia quoque, unde & ibi probari idem possit. Mirari igitur non oportet, quod Viri Docti haud defuerint qui Aquilejæ quoque Gallum attribuerent. Quibuscum etiam qui faciant, vellem animadvertisset is qui pro Foro suo contra nostrates fufius, quam contra quosque alios, disputans, Tondutium (y) potius, & Kavina[m] laudat, quasi emunctæ naris iudices, quippe vicinis Foroliviensibus Gallum negantes. Utriusque autem, etsi neutrum contemno, ut ne hic cæteros errores arguam, satis est duos indicare, illius quidem ubi Horatii damnat Interpretes, quod in Staberii cujusdam (z) (quem eundem fuisse, existimat ac Staberium qui in quodam antiquo marmore ex cognomine ipsi videtur Faventinus fuisse) in Staberii igitur testamento perperam exposuerint

*Frumenti quantum metit Africa,*  
minime cogitantes, ab nemine id dari posse; sed posse, & sic exponendum fuisse, quantum metitur in fundo quodam, Faventinæ urbi proximo qui Africa nuncupatur; quasi vero non per eandem manifestam hyperbolem id Horatius dixisset per quam alibi (a)

*Quidquid de Lybicis verritur areis.*  
Kavina autem (b) ut Municipium quoddam Flaminium fuisse, probet, ad vetustum marmor provocat Forosempronien[se], positum C. Hedii Vero; quo in marmore cum inter cæteros Hedii titulos hi quoque legantur *Patrono. Municipi. Flaminii*, quasi quid Flamen esset, oblitus, ex Hedii sacra dignitate nomen fecit Municipii. Quo de errore, ut ab nostratibus jam redarguto; hic alia non addo. Sed illuc redeo. Ut Gallum Tondutius Aquilejensibus tribuit, sic Kavina generatim Foro-Julien[s]ibus; ut Region[i] universæ, an Civitati assignaverit, incertum sit.

18. Sed etsi Civitati assignasset; esset tamen dubium, quam Civitatem intellexisset non modo in tota ea Regione, sed & extra ipsam. Nam, ut Aquilejam seponamus, & Julium Carnorum, cujus a Plinio (c) indicati oppidi, olim nobilis, nunc vici, & locum, & antiqua, nec spernenda, vestigia videntur primus, cum ipse quæreret, agnovisse æque generosus, ac doctus Historicus Bernardus Justinianus (d); ut hæc igitur seponamus, & ea tantum quæ Fora vocantur Julii, spectemus; Plinius non modo extra Foro-Juliensem Regionem, sed & extra Italiam commemorat. Extra illam Regionem, cum inter Umbros enumerat (e) *Foro-Julien[s]es cognomine Concubien[s]es*. Extra Italiam vero, cum in Narbonensis provinciæ ora (f) *Forum Julii* proponit, *Octavianorum coloniam, quæ Pacensis appellatur, & classica*. Quem Plinii locum æqualis propemodum Scriptor illustrat Tacitus (g), ubi Italiæ proximum, *Galliæ littus rostratas naves præfedis*, scribit, *quas Ætiaca victoria captas Augustus in oppidum Foro-Julien[s]e miserat, valido cum remige*; ut Augusto auctore, & victoriæ illius spectato tempore, jure meritoque in Vita Cn. Julii Agricola, socii sui, dicere hunc potuerit *vetere, & illustri Foro-Julien[s]ium colonia ortum*. Pomponius Mela (h) an ad Augustum respiciens, scripserit *Octavianorum*, an ad Legionem VIII. Pacensem, *Octavianorum*, mihi quidem incertum est. At certe *Forum Julii* scripsit; ut anno ab Julii Cæsaris morte circiter nonagesimo idem quod postea, ut diximus, & Plinius, & Tacitus, & Gallia ad hoc usque tempus, nomen retineret Julio Cæsare vivente impossi-

tum, ut ex Munatii Planci unis & alteris ad Cicero[n]em Epistolis (i) intelligitur, altero ab illius obitu anno datis. Antea autem quam illud conderetur Forum, ibi aliud, alio fortasse nomine, oppidum nulum fuisse, ex Scriptorum, & præsertim ex Cæsaris ipsius silentio apparet, sive ubi de Bello Gallico, sive ubi de Massiliæ oppugnatione verba faciens, non unam ejusmodi loci commemorandi occasionem habuisset. Verum ut ad Italiæ Regionem Foro-Juliensem revertamur; illud præcipue in ea Forum spectandum est, quod præ cæteris ad se Gallum pertinere, contendit, & de se Eusebium, aut hujus Interpretem, non de ullo alio Julii Foro, locutum esse, non dubitat propterea quia si de alio aliquo esset locutus, discriminis aliquam notam apposuisset; *Urbes enim minus clara, ne cum clarioribus ejusdem nominis misceantur, distinctis cognominibus indigent: non perinde clariores, quæ splendore suo minorum nomina obruunt*. Non ad me, sed ad alia, de quibus dictum est, Julii Fora, & præsertim ad Narbonensem attinet, videre, an quando Eusebii Chronicon scriptum, aut latine redditum fuit, id est antequam insequentibus sæculis Aquileja a barbaris dirueretur, videre, inquam, an tunc in Carnis hoc Julii Forum cætera ejusdem nominis obrueret splendore suo. Meum est tantummodo animadvertere, necdum mihi accidisse, ut certum de Foro hoc testimonium antiquius legerem, quam quod VIII. denique sæculo perhibuit Paulus Diaconus (k) hisce verbis. *Hujus Venetiæ Aquileja civitas extitit caput, pro qua nunc Forum Julii, ita dictum; quod Julius Cæsar negotiationis forum ibi statuerat, habetur*.

19. Cum igitur plura sint Julii Fora; certum esse non posset, cui Gallum, etsi *Foro-Julien[s]is* in Eusebii Chronico legendus esset, tribueremus. Quantumvis obscurum illud sit Concubien[s]e; obscuris etiam ex locis Viri possunt Clarissimi exister[e], cujus rei non pauca produci possent exempla. Sed tamen si obscuro placeat illustrem locum præferre; num jure licet, ut Concubien[s]e, ita Narbonensem Forum despiciere? primum *illustre*, ut paulo ante cum Tacito dicebamus, deinde in quo, ut Julia erat, sic & Cornelia Gens esse poterat, denique aptum adeo ad alendos Viros & militari virtute, & litterarum cultu, qualem fuisse Gallum, constat, longe excellentes; ut tantum ducem, quantus Agricola erat, & tam disertum Scriptorem, quam Agricola filius fuit Julius Græcinus, produxerit. Colonia enim illuc missa fuerat militaris, & Foro illi proxima erat Massilia, græcis florens studiis, ibique propterea, ut Agricola[m] scimus Philosophiæ, ita Græcinum quoque eloquentiæ operam dedisse, conjicimus. Noli putare, hæc a me dici, ut Gallum Italiæ eripiam; cum haud aliam ob causam dicam, nisi ut ostendam quod susceperam, si Gallum Foro-Juliensem esse, credamus; in graves nos dubitationes incidere de certa ejus Patria statuenda.

20. Contra si in Eusebio Foroliviensis legatur; non modo populus; civitas est nulla, quod sciam, præter nostram, quæ Forum Livii dicta sit, aut dicatur. Nullo hic adjuncto est opus, ut Forum a Foro distinguatur: nulla hic concertatione, utrum sit alteri alterum præponendum. Quid? quod jam anno 1729. in Litteris ad Marchesium (l) argumentum illud proposui, quod nostros inter Academicos postea, ut res tulit, me repetentem audivisti, nempe cum in Eusebio legere non liceat *Foro-Julien[s]is*; reliquum esse, ut legatur *Foroliviensis*. Illud autem non licere, demonstravi propterea quod si vel minorem illam quam plerique ponunt, Gallo cum se interemit, ætatem, nedum si majorem tribuamus, & si Julii Cæsaris ætatem, ac Munerum quæ idem gessit locum, tempusque spectemus, fieri non posse, patebit, ut ullum, cum Gallus est natus, Forum usquam esset, cui Julii nomen impositum foret, & quod consequitur,

(x) Livii Hist. l. 39. vers. fin. (y) Hist. di Faenza P. 1. (z) Horat. Serm. l. 2. Sat. 3.  
(a) Carmin. l. 1. Ode 1. (b) Faventia Rediv. (c) c. 19. cit. (d) De Orig. Urb. Venet. l. 7.  
(e) l. 3. c. 14. (f) Ibid. c. 4. (g) Annal. l. 4. (h) De Situ Orb. l. 2. c. 3.  
(i) inter Epistolas Cicer. ad Familiar. l. 10. Epist. 15. & 17. (k) De Gestis Langobardor. l. 2. c. 14.  
(l) Epist. l. n. 17.



tur, unde ex Patria Gallus dici posset Forojulien-  
sis.

21. Cujus argumenti vim eo majorem esse, fatebe-  
ris, si scias, quid, ut illam effugerent qui ab nostra-  
tibus dissentiant, coacti sint excogitare. *Livius*, in-  
quunt, *lib. XXIX. cap. XLV. A. V. DLXIX. M.* Claudio Marcello, & *Q. Fabio Labeone Coss. L. Julio*  
*Prætori creato Galliam* (cisalpinam scilicet) *evenisse,*  
*tradit, ad quam jussus est maturare, quum Galli transal-*  
*pini per saltus ignotæ antea viæ in Italiam transgres-*  
*si, oppidum in agro, qui nunc Aquilejensis est, ædifi-*  
*carent: Gallia ergo tunc regio hæc nostra appellabatur:*  
*inque hac Forum ab se dictum prætor L. Julius anno*  
*ante Christum natum 183. condidit; quumque postea C.*  
*Julius Cæsar præ L. Julio clarus alia Fora condiderit,*  
*hujusce conditor vulgo habitus est.* Quis hæc legens  
sine ulla hæsitazione asseveranter prolata, credere pos-  
set, de Foro ab L. Julio prætor condito Livium ne  
unum quidem verbum habere? Sed tu Livium inspi-  
ce, non libro quidem XXIX. (sic enim, aliisque in  
numeris designandis sæpissime peccant) sed XXXIX.  
nec solum capite XLV. pro quo alios indicare video  
XXX. verum etiam propius libri finem, ubi ad Gal-  
los illos Auctor redit in Italiam transgressos. Neutro  
loco diserte scribitur, L. Julium revera in eam regio-  
nem pervenisse; nedum ibi Forum condidisse, ullo  
modo indicatur. Cum sic esse ut dico, inveneris;  
miraturum te, scio, id ab iis esse affirmatum, qui  
non semel hæc inculcaverint, quidquid juniores *anti-*  
*quis Scriptoribus indictum produnt, id omne commini-*  
*sci, & de rebus antiquis, nullo antiquorum testimonio*

*prolato, differentes a viris emunctæ naris contemni:*  
mitto cætera quæ nonnunquam ad elevandam aliorum  
fidem pronunciarunt. Sed ego illud præterea miror,  
pro C. Julio Cæsare, in Re & Bellica, & Litteraria  
immortalis nominis Viro, sui Fori conditorem ma-  
luisse L. quendam Julium, de quo nihil aliud, nisi  
prætorum creatum, & fortis beneficio in Galliam mis-  
sum fuisse, scimus. Nimirum comminisci aliquid o-  
portuit, ut quo anno Gallus natus est, Forum istud  
Julii extitisse videretur.

22. Hæc de Gallo habui quæ ad te scriberem, si  
quid forte in rebus adeo antiquis hallucinatus sim,  
non minus errores, quorum convincar, nunc agnitu-  
rus, quam olim in extrema ad Marchesium Epistola  
(*m*) spopondi. In illa enim id mihi potissimum  
proposueram (*n*) ut Blondi fidem, non ut Gallum  
civem fuisse nostrum, defenderem. Quid ergo, inquis,  
tot de Gallo & tunc, & hoc tempore scripsisti? Ego  
vero scripsi, quia sive ex hac, sive ex alia Patria  
fuerit, dignus certe est de cujus & veris, & falsis  
tum gestis, tum carminibus quid sentiendum sit, in-  
quiratur. Neque enim Forojulienfes illos imitari ve-  
lim, qui suum Gallum fuisse civem, *dubitari posse,*  
*non credunt.* Sed eosdem in plerisque laudo quæ de  
illo copiose eruditeque scripserunt. Laudo etiam vel  
magis, quod Blondum vitiasse Eusebianos codices,  
nusquam diserte affirmarunt. Quo de Viro, sicut ini-  
tio pollicitus sum, de aliisque nonnullis qui inter  
nostrates præstiterunt, cum quædam in proximis Lit-  
teris attigero; ad ea revertar quæ nostrarum solent  
Epistolarum esse argumentum. Vale.

## EPISTOLA ÆMILIANA XI.

**F**lavio Blondo, a quo propter ejus mentionem su-  
perioribus Litteris non semel injectam, has juvat  
incipere, idem apud Vossium (*a*) accidit quod ipse  
Cornelio Gallo in Eusebii Chronico non dubitabat  
accidisse, nimirum ut describentium culpa ex Foroli-  
viensi persæpe fieret Forojulienfis; adeo facilis hic er-  
ror est; sed ex Blondi ipsius Scriptis facillime emen-  
dandus. Ex quibus tamen cum pariter haud difficile  
esset rationem petere componendi ortam de ejus nomi-  
ne controversiam; nihilominus diu plerique contra ac  
verum fuerat, non Flavium, sed Blondum ejus esse  
nomen, existimarunt; quasi ipse id quod vix tandem  
animavderum in hanc rem est, non scripsisset (*b*)  
*in quinque Blondis natis nostris, qui litteris omnes pro*  
*ætate sunt pleni, itemque Abbas Matthæus Blondus,*  
*nobis frater germanus.* Quin illud quoque ab nemine,  
quod sciam, antea adnotatum, cum inter Academicos  
nostros publice sermonem haberem, audivisse memine-  
ris, mihi ejus Historias (*c*) versanti hæc verba oc-  
currisset, *Avumque ego meum Gasparem Blondum sæ-*  
*penumero dicentem audivi.* Quæ ideo verba hic repe-  
to, quia non modo ad id confirmandum quod dice-  
bam, verum etiam ad cognoscendum valent, quam a  
vero aliena esset Viri olim Eruditissimi (*d*) conje-  
ctura credentis, esse hoc potuisse Blondi nomen *Fla-*  
*vio di Antonio di Biondo Ravaldini.* Namque, ut Pa-  
tri nomen Antonio fuerit, quod ex quadam apparere  
accepi Blondi subscriptione in Concilio, opinor, Flo-  
rentino; Avo certe, non Blondo, sed Gaspari fuit,  
quem eundem esse, puto qui ad A. 1385. in quodam  
catalogo apud Bonolum (*e*) *Gasparinus Blondus* no-  
minatur. Sed amplius quam aliqui ex nostratibus cre-  
dunt, quærendum putaverim, num Blondorum Gens  
ad Ravaldiniam attineret. Nam quod in altera hac  
Gente unus quidam extiterit qui Blondus Ravaldi-  
nius vocaretur, sic vocari potuit, etsi nihil ei cum  
Blondis esset: certe autem cum is viveret (*f*) anno

1423; Familiæ originem præbere non potuit Blondi  
nostri, cujus Avus anno circiter 1345. septennis erat,  
ut ex Historiis Nepotis (*g*) proclive est intellige-  
re. Quod si in Chronicis Alexandri Paduanii ad A.  
1493. itemque in Collectione aliorum Chronicorum,  
manu ejusdem Alexandri scripta, Præsul ille diu in  
Romana Aula versatus, & dum Cæsena Romam redi-  
ret, interemptus, vocatur Caspar quondam Blondi de  
Ravaldiniis Forolivienfis; videndum tamen est, an  
non potius quam Flavii nostri, filius fuerit Blondi  
illius Ravaldinii, quem vixisse diximus anno 1423.  
præsertim cum Paduanus in Supplemento ad sua Chro-  
nica sæpe Blondum nostrum memorans ad A. 1434. &  
insequentem, Blondum semper nominet nullo alio ad-  
juncto cognomine, & honorifico quidem, sed minus  
honorifico quam quo Blondum illum de Ravaldiniis  
præfixo titulo semel atque iterum nominavit. Fieri  
tamen posse, fateor, ut ex aliis quæ ipse non vide-  
rim, Chronicis mea hæc dubitatio tolli queat. Ve-  
rum ego non alia mente hæc scripsi, nisi ut rationes  
appareant ob quas mihi interea videri dixerim hac de  
re amplius esse quærendum.

2. Nec tamen propterea quidquam de Flavii nostri  
prænobili genere, quod aliunde cognoscimus, detra-  
ctum volo. Sed quantumvis antea illustre fuerit,  
multo illustrius fuis ipse tum moribus, tum scriptis  
fecit. Quorum de utrisque, aut certe de illis cum  
alias (*h*) presse quidem, sed plura scripserimus; sa-  
tis hic erit nonnulla adjecisse. Qua fide in primis,  
& qua in gravissimis rebus prudentia fuerit, cum Mu-  
nera a tot continenter Pontificibus Maximis ipsi con-  
credita, & commissæ ab illis, nedum a Patria, lega-  
tiones ostendant; de harum una, quam Eugenio IV.  
mandante, gessit simul cum Episcopo *Recanatenfi*, est  
quod admonendum censeam. Scilicet ne quis iterum  
fallatur, Episcopi ejus loco Nicolaum Hassteum intel-  
ligens; animadvertendum est, Hassteum non modo ut  
civem,

(*m*) Ibid. n. 27. (*n*) n. 1. (*a*) De Historic. Lat. l. 3. (*b*) Ital. Illustr. Reg. 6. (*c*) Dec. 2. l. 10.  
(*d*) Dissert. Vossian. 5. (*e*) Istor. di Forlì l. 7. (*f*) Marchesi Suppl. l. 6. all' A. 1423. (*g*) l. 10. cit.  
(*h*) Epist. I. n. 9.



civem, verum etiam ut affinem a *litteris*, *moribus*, & *bonitate conspicuum*, non semel a Blondo ( *i* ) jure meritoque laudatum, Recineti quidem fuisse Episcopum, sed non eo tempore quo illa fuit gesta legatio. Necdum enim Eugenius Florentiam venerat ubi Halteum Recineti, & Maceratae creavit Episcopum anno 1440. cum ea ad Florentinos ab Decessore quodam Haltei legatio suscepta est, Successoris adeo dissimili, ut de illo cum loqueretur Blondus scripserit ( *k* ) *ut attollit indignos fortuna*. Ex Blondi autem Scriptis quæ inedita adhuc creduntur, cum videam illud quod Oxonii esse dicitur calamo exaratum, inscriptumque de *Cosmographia Italiae* memorari; suspicionem tibi aperire aulam meam, an forte exemplar quoddam sit, antequam typographia institueretur, descriptum, Operis quod ipse Auctor edidit, omnesque habemus, *Italia Illustrata*. Hujus enim regiones, *urbes*, *oppida*, *lacus*, *flumina*, *montesque* secundum prisca singulorum nomina, id quod ibi Blondus facit, recensere; quid aliud est quam hujus Orbis partem describere? Sic etiam de *Roma Instaurata* libri ab aliquo inscribi poterant *Topographia Romæ*. Utcunque id est; quanti laboris, & quantæ simul utilitatis ea Blondi Scripta fuerint eo tempore, haud facile est nisi illis existimare qui cogitent, neque ipsi alios qui idem tentassent per ea sæcula præluxisse, neque antiquos intelligi potuisse Scriptores, nisi traderetur, quibus nominibus quas Italiae partes, & quæ Urbis loca designassent. Quotus autem quisque tum fuisset qui posset intermortuam Historiam restituere, & ab inclinatione Romani Imperii ad ætatem usque suam, quod ille præstitit per unum & triginta libros, deducere?

3. Nunc si hos, aliosque libros ab homine, si quis alius, ab adolescentia usque ut plurimum occupatissimo editos esse, cogitabimus; tanto major erit admiratio. Modo Mediolani, modo Romæ, modo Venetiis, modo Florentiæ, modo Ferrariæ, modo alibi gravissimis negotiis districtus, alias etiam Arcibus pro Eugenio recipiendis, aut consilio militum Ductoribus adjuvandis intentus ( *l* ), nonnunquam adversus hostiles incursiones e munitis locis egressus, ut Brixiae ( *m* ) cum Petrum Lauretanum, Virum artibus belli, pacisque clarissimum, repentino hostium incursum audito, e porta, ut erat inermis, erumpentem, impavide est comitatus, homo igitur ejusmodi quam ratione dare interea operam lectioni, & studiis poterat, ut cum tandem aliquando otii aliquid nactus esset, secederet ad libros conscribendos? Et tamen ita dabat, ut nescias, magisne propter libros, an propter integerrimos semper mores gratia floruerit magnorum Principum, & amicitiiis summorum Virorum.

4. Sed ut de Scriptis dumtaxat dicamus; quid de ejus *Italia Illustrata* Franciscus Barbarus, ea Vir doctus, & estimatione, quid autem de *Historiis* Doctorissimus Pontifex Pius II. judicaret, inde manifestum est, quod ille ( *n* ) Præfationem scriptam reliquit in Italiam Illustratam ad Neapolitanum Regem Alphonsum, cujus illam jussu Blondus scripserat; Pius autem ipse Blondi Historias, ut notum est, in compendium redegit. Post hæc supervacuum esse puto Blondi Operum editiones, & e latina in italicam linguam versionem commemorare. At enim aliqui majorem in eo diligentiam, aliqui id quod gravissimum est, fidem desiderarunt. Quorum utrisque respondendum est. Primi igitur, si ut æquum fuerat, animadvertissent, quot, ut supra dicebamus, & quam variis distentis occupationibus, quot, & quo tempore edidisset; *plura enim in Historia scripsit*, ut Gifanius ( *o* ) ait, *quam recentiorum quisquam, omnemque nobis*, ut laudatus Pontifex ( *p* ) loquitur, *vetustatem aperuit*, idque illo rudi adhuc sæculo, quod merito Morgagni Opusc.

addit Jovius ( *q* ); si hæc, inquam, animadvertissent, Blondi potius diligentiam laudassent, quam inevitabiles occupatissimo homini quosdam lapsus, eo potissimum tempore, & in tanto quærendarum ejusmodi rerum numero, mirati essent. Negligentiam certe si in illo offendissent peritissimi Historiarum Auctores; nunquam Bernardus Justinianus ( *r* ) scripisset, *Blondus olim familiaris meus, scriptor sane cætera diligens*, neque M. Antonius Sabellicus ( *s* ) *Blondum diligentissimum temporum computatorem* dixisset. Verum his, aliisque opponunt duos, quorum alterius Annales, si operæ pretium fuisset edere, a Blondi ætate ad hanc usque in pluteis non laterent; alterius autem edita superiore sæculo Defensio Procopii rarissima est; ut neque illos, neque hanc inspicere possimus. Bonolus tamen noster ( *t* ) & Defensionem hanc viderat, & responsionem promiserat: quanquam ei qui Blondum legerit, an Procopii librum, an hujus in latinum versionem culpæ oporteret, aperte, candideque ambigentem ( *u* ), nulla pro ipso responsio necessaria videri possit.

5. Attamen si duobus iis libris errores quidam Blondi, vel potius temporis ( quales interdum agnovimus nos ipsi quoque ) accusari dicerentur; minus graviter, imo facile id esset ferendum, neque propterea dubitandum esset, jure, an secus ab Hieronymo Rubeo ( *x* ), qui iudex in historia sane erat idoneus, Flavius noster ornatus fuerit nomine *gravissimi historiarum scriptoris*. Verum ad ejus elevandam fidem libris illis niti aliqui se posse, credunt, quasi non solum quæ conficta essent ab aliis, retulisset, sed & ipse confinxisset. Enimvero non sunt ejusmodi accusationes in Illustres præsertim Viros sine evidentissimis probationibus intentandæ. Cujusmodi probationes afferri non potuisse ab eo qui Blondum vitiasse Eusebii Codices, ut Gallum fingeret Foroliviensem, asseverabat, ego olim in Epistola ostendi ad Marchesium missa ( *y* ): ostendique simul id quod nec raro incautis accusatoribus solet accidere, quot ipse errores inter accusandum admisisset. Sic etiam nuper cum alterum quendam legerem diserte, & sine ulla dubitatione scribentem, Blondum voluisse Patriam suam illustrare corrupto Eusebii loco; pro argumentis quo crimen istud convinceretur, errores offendi, in his illud, Servium in Virgilium tradidisse, Gallum fuisse Forojuliensem. Nimirum ibi memoria incautum accusatorem fefellit: nec tamen id valde miratus sum, cum recorderer, eundem alibi, dum pariter accusaret, adeo memoria lapsus esse, ut Amicum & meum, & suum Dominicum Gulielminum, qui, ut norunt omnes e Bononiensi Gymnasio Patavium concesserat, ubi & vivendi finem fecit, ipse qui alio in libro hæc quæ dico, scripserat, contra agit, postquam Patavii Mathesim, & Medicinam docuerat, ad Mathesim tradendam Bononiam transivisse. Sed ad Blondum redeo, a Patriæ amore transversum actum ad corrumpendos, si Superis placet, Eusebii Codices. Scilicet ut falsum Patriæ honorem adderet, verum sibi dedecus parere voluisset! Ut ingenuus erat, noluisse; ut prudentissimus, etiam si vellet, id sibi succedere non posse, perspexisse, alias ( *z* ) a me satis ostensum est. Quod si in scribendo ad augendam Patriam Illustrium Virorum Natalibus fuisset intentus; neque in Italia Illustrata ( *a* ) Pontificem Romanum Paschalem II. ( sic enim, non I. legere oportet ) Bledæ, quæ prope Sutrium in Etruria est, tribuisset, neque in Historiis ( *b* ) *Paulum Diaconum, Aquilejensem*, neque Berengarium I. Imperatorem, Ducem Forojuliensem, *Roma oriundum* scripisset; sed alienam horum trium originem saltem, quod poterat, filuisset. Ut enim de duobus tantum, illo videlicet Pontifice, & hoc Imperatore, nihil ipse pronuncians, dicam; ignorare non poterat Blondus quæ de hoc, ut

I

cive

( *i* ) Ital. Illustr. Reg. 5. & 6. ( *k* ) Hist. Dec. 3. l. 6. ( *l* ) Hist. Dec. 3. l. 5. ( *m* ) Ibid. l. 3.  
 ( *n* ) Vid. Diatrib. Card. Quirini ad Barbari Epist. ( *o* ) Observ. in Lingu. Lat. ( *p* ) in Europæ Hist.  
 ( *q* ) in Viror. Illustr. Elog. ( *r* ) De Orig. Urbis Venet. l. 15. ( *s* ) Hist. Rer. Venet. Dec. 1. l. 10.  
 ( *t* ) Ist. di Forl. l. 9. ( *u* ) Hist. Dec. 1. l. 4. ( *x* ) Hist. Ravenn. l. 7.  
 ( *y* ) Epist. l. ( *z* ) Ibid. ( *a* ) Reg. 2.  
 ( *b* ) Dec. 2. l. 2.



cive suo, Forolivienſes ex vetuſtiſſimarum tabularum teſtimonio, aſſentientibus inſuper quibuſdam exteris Scriptoribus, vel olim contenderent: De Paſchali autem idem expectarent quod ipſe de Plauto, & Camaldulenſi Ambroſio ſcripſit (c), eum quoque Pontificem in vetuſto Patriæ noſtræ agro fuiſſe genitum, Bledæ videlicet, in Etruriæ quidem finibus, ſed non prope Sutrium, imo prope Galeatam quærendæ: neque enim, niſi ex veteribus Documentis, indicatum videri Panvinio, & Ciaconio fuiſſe, ut de Paſchali hoc II. ſcribentes, ea traderent quæ apud Marchesium filium (d) legeris, Panvinius quidem, *Bledenſis Tuſcus, alias ex vico Provinciæ Flaminie Galleata*, Ciaconius vero, *In Tuſcia natus, alias Flaminia, quod Galliata Comitatus oppidum eſt*, Bledæ videlicet. Ex cujus oppidi veſtigiis, ad fontium Vitæ, ut ad Poggium (e) ſcripſi, confluentes adhuc agnoſcendis, & vel magis ex tabulis quas idem Marchesius (f) diſerte indicat, non diu antequam Blondus naſceretur, imo ex parte eodem ferme quo natus eſt, anno obſignatis Bledam hanc & revera exiſtiſſe, & ipſi ignotam eſſe non potuiſſe, manifeſtum eſt.

6. Quod ſi Blondus alia quæ ejus animum magis fortalle moverent, ut veri amantes Hiſtorici debent, ſecutus, ne hæc quidem, eſſi poſtea ab Exteris etiam quibuſdam non improbata eſſe, vidimus, opinioni ſuæ Civitatis conceſſit; credemusne, quidquam, ut aliis faveret Civitatibus, conſinxiffe? Intelligis, me de vexatiſſima illa ad Rubiconem Inſcriptione jam loqui. Blondus Forolivienſis, inquiunt, & quaſi ad ejus exiſtimationem imminuendam Patria faceret! Blondus, mox iterum inquiunt, Forolivienſis, ut primus Scriptor eſt qui hanc edidit Inſcriptionem, ita continuo dubium oritur, an non ab ipſo conſicta ſit. Væ poſthac Scriptori cuique a quo primum aliquid antiquum, de quo poſteri ambigant, referatur monumentum; ſi iſtiusmodi inferendi ratio pro legitima admittatur. Equidem nec ſcio, nec ſcire cupio, a quo primum iſta prolata fuerit dubitatio. Quæ ſi cum Blondus viveret, orta eſſet; proclive ipſi fuerat ubi id vidiffet marmor, dicere; nam *etiam nunc*, inquit (g), *viſitur*. Sed certe non ſine injuriâ ſuſpiciones in mortuum conjiciuntur, qui ſe non poteſt defendere. Barbara, inepta, ab Auctoribus qui de Cæſare trajiciente Rubiconem ſcripſerunt, non memorata, in cæteris provinciarum limitibus inuſitata, denique omnino ſpuria ſit illa Inſcriptio, ut Cluverius cenſuit Italiæ Antiquæ libro I. capite non 18. ſed 28; ex ipſo enim hæc repeti video: & ex Auguſtini, & Gruſeri judicio, quorum pariter cenſuram recoquunt, quantum volunt falſa & conſicta ſit: num propterea conſinxit Blondus? num alius conſinxiffe, & marmor inſculpendam curaffe non potuit, quod Blondus vidit? De hujus enim fide, & probitate hic agimus; non de exacto iis temporibus in veris a falſis monumentis internoſcendis judicio. Quamobrem non hic quæremus, an alii hoc ipſo tam illuſtri ſæculo in ejuſmodi rebus, in aliſque ad hoc, ut putant, propoſitum attinentibus, interdum non fallantur, imo, ut demonſtrare facile poſſemus, in Suetonii verbis quæ ad Cæſarem pertinent, & M. Tullii quæ ad eundem pertinere credunt, ſententiis intelligendis. Sed alia potius de Inſcriptione hac ſine cujuſquam offenſione animadvertemus.

7. Non videtur ad annum Piſatellum fuiſſe, cum Blondus inſpexit, id marmor; nam *loco motum* dicit (h), *in quo ab initio fuerat poſitum*. Certe autem non erat, cum centefimo anno poſtquam Italiam Illuſtratam ſcripſerat Blondus, ſuam Italiæ Deſcriptionem edidit Leander Albertus (i), qui cum illac ſæpe tranſiſſet, & diligenter quæſiviſſet, nunquam tamen videre potuiſſe, teſtatur, ideoque conjicit, aut alio translata, aut humo fuiſſe obruta. Quo magis mirum eſt, ſi Jo. Sulpitius, & Phil. Beroaldus Comm. in Lucanum marmor adverterint, pauciora quidem verba, ſed eandem quam illa Inſcriptio, ſen-

tentiam habens, ad Luſi fluminis ripas, qua pariter Leander, Beroaldi utriuſque ætate vivens, tranſierat; ſed nullam de eo marmore mentionem fecit. Hujus alterius marmoris verba proferit idem qui ab duobus illis animadverſum dicit, Ariminenſis Bibliothecæ Cuſtos Joſephus Malateſta Garuſſius (k). Quin etiam addit, olim in Palatio publico exiſtiſſe Inſcriptionem multo longiorem, neque eandem modo ſententiam, ſed perpaucis mutatis, aut omiſſis, eadem verba (quæ deſcripta exhibet) continentem quæ in illa altera ad Piſatellum ut barbara, ineptaque reprehenduntur. Garuſſii liber paulo ante finem prodiit ſæculi ſuperioris. Itaque facile nanciſci poteris, & quomodo hæc omnia ita uti ſcribit, eſſe potuerint; ſi tantæ hæc facis; inquirere, nec minus ubi, & quando illa quæ nunc ad Piſatellum Inſcriptio eſt, neque ab Leandro videri potuit, reperta fuerit. Ego enim ad aliam tranſeo, de qua aliquid fortalle a me expectas.

8. Scilicet non ignoras, Hiſtoricos noſtros ſepulchralem Inſcriptionem producere, haud procul ab urbe ad Montonum flumen effoſſam, hæc tantummodo habentem

#### T. PAPIR. ET S. R. HISTORICO

nec dubitare, quin Gentis inter Romanas nobiliſſimæ Papiſiæ ſoboles aliquando inter nos fuerit, Sextus autem Rufus; ſic enim ſiglas illas duas S. R. interpretantur; ſi Forolivienſis non fuerit, ſaltem Forolivi ſit mortuus. Nimirum vox illa *Hiſtorico* permoveere homines potuit ad duas eas ſiglas ita, ut dixi, intelligendas. Eſſi enim ſcirent, ut opinor, apud eos qui de Notis Romanorum ſcripſerunt, ejus prænominis, & nominis ex ſimplici R. & S. interpretationem facile non inveniri; tamen cum inter Hiſtoricos referri ſcirent Sextum Rufum, Virum Conſularem, cujus ad Valentinianum Auguſtum Epitome extat Romanæ Hiſtoriæ; ad eum ſpectare ſiglas, quas dixi, cenſuerunt. Cum Bonolus (l) inventum hunc lapidem ſcribat, dum pons Montono impolitus ædificaretur (id quod fieri cœptum eſt, ut alibi (m) indicavi, anno 1610.) reſectis in fluminis ripa veſtigiis parvi templi, itemque urna cum cineribus, eoque lapide, horum autem utrumque in bibliotheca Paduanorum ſervari; hæc legenti mihi ſubiit bibliothecam illam adire, & quidquid huc faceret, diligenter inſpicere. Fiſtilem quidem urnam ſepulchralem vidi, nullis in labro, ut ſolent aliquæ, notis, aut litteris inſcriptam; ſed pro lapide tegulam antiquam, non parvam, ejusque in parte ſimilem, quam Urſatus (n) exhibet ſiguli nomine inſculpto, non impreſſo, L. BLAN. In ea autem de qua loquor, antequam fornaci committeretur, impreſſæ fuerant litteræ per ſigillum oblongum (cujusmodi, ſed breviora, idem quem modo laudabam, habet Urſatus (o)) regulæ inſtar quæ latitudine eſſet circiter pollicis; itaque ex impreſſo cavo modice extant litteræ ſic ſatis pulchræ, quamvis aliæ de induſtriâ aliis longiores, nullo, ſi cautius inſpicias, puncto, ſed certis tantummodo locis per intervalla in ſiglas potius, & notas, quam in verba, diſtinctæ. Et nullum quidem eſt dubium quin legendum ſit T PAPIR, & ſi vis, etiam ET. Sed deinde ſequitur ſigla S, & poſt hanc intervallum ſine cujuſquam litteræ quæ olim ibi fuerit, indicio ullo, tum nota ſequitur quæ a primo ex litteris XH conſtare videatur; reapse tamen, ſi attentius inſpexeris, non eſſe X cognoſces, quippe cum ſiniſtra deſit hujus litteræ pars ſuperior, & nihil in ipſa nota ſit quod eam ſuppleat partem, ſicuti nihil eſt quod faciat ut ſi non X, litteram R repræſentet. Denique poſt intervallum, notam hanc ab inſequentibus omnino diſjungens, legitur IST, vix apparentibus in tegula, oblique ibi olim fracta, ſupremis partibus litterarum proximarum, quæ ut OR eſſe potuerint, ſic etiam non eſſe potuerunt. Itaque intelligis, num in tegula hac legere *Sexto Ruſo Hiſtorico* nobis liceat,

9. Quæ

(c) Ital. Illuſtr. Reg. 6.

(d) Vit. Viror. Illuſtr. Forolivy. l. 1. c. 4.

(e) Epist. II. n. 9.

(f) c. 4. cit.

(g) Ital. Reg. 6. cit.

(h) Ibid.

(i) Region. 14. ubi de via Æmilia

(k) Lucerna Lapidar. c. 2.

(l) Ist. di Forlì l. 1.

(m) Epist. IV. n. 10.

(n) Monum. Patav. l. 1. S. 4.

(o) Ibid.



9. Quæ cum ita essent, & tanto minus ad Rufum illum Historicum Inscriptionem hanc spectare posse, animadverterem, si, quod Fabricius (p), alique malunt, Epitomes Auctor non Sextus Rufus vocatus esset, sed Rufus Festus, cujus nominis in ea tegula nullum prorsus extaret vestigium; cogitare cœpi, an istæ litteræ ad nomen potius attinerent Figuli, aut Figlinæ in qua tegula fuisset facta. Imprimi enim solita fuisse ejusmodi nomina, neque una de causa & lateribus, & tegulis, legisse mēmineram in erudita Octavii Falconerii ad Carolum Datum Epistola (q), & in sæpius a me laudatis Patavinis Sertorii Ursati Monumentis. Sed prima illa verba *T. Papir.* cum ad Figulum non magis spectasse, suspicarer, quam vox *Servilia* in tegula quadam apud Ursatum (r), nec cætera ad Figlinam designandam facere viderentur; regulam, præsertim cum ejusmodi urna conjunctam, eodem referri posse, cogitabam, quo suam istam Ursatus, ad sepulchri videlicet locum, & conditi in eo nomen indicandum. Neque illud obstabat quod non videretur e re Figuli sigillum faciendum curasse ad unam tegulam inscribendam; nam *Serviliæ* quoque nomen, cum ejus tegulam attente considero, per sigillum fuisse impressum, agnosco, & ad sepulchrorum quorundam testum non paucis tegulis opus fuisse, credibile est, aut fieri etiam potest, ut servus qui Familiæ custodiret majora quædam sigilla, ad Figulum cum his mitteretur, ut molles adhuc tegulas obsignaret.

10. Cum primum quidem hæc, atque alia in mentem venissent; illud mox subiit, ut Paduaniorum scripta versarem, si forte, ut tegulam, urnamque erant nahti, ita aliquid adnotatum de his reliquissent. Non pœnituit illa versasse. Nam primum de Sexto Rufo nihil quidquam; ut videantur, quod & ego facio, voluisse, liberum esse omnibus ita ut quisque melius crederet, Inscriptionem hanc legere, atque explicare. Deinde etsi neque de *T. Papirio* quidquam dicunt; ea tamen narrant, per quæ hallucinationem Bonoli, quod ad hanc Inscriptionem attinet, primum de medio tollamus, tum alia quæ in conjiciendo spectari hic possint, adjiciamus. Alexander igitur Paduanus suis in *Chronicis* refert, cum forte Montoni ripa certo quem indicat, loco octingentis circiter ab urbe passibus corruisset; in ruinis tegulam de qua sermo est, repertam esse, & cum ea urnas duas, cineres continentes, quarum altera tunc fracta stimulum ferreum in fundo habebat, altera autem integra vigesimo quinto post anno ab eo qui invenerat, Alexandro ipsi donata est, ut tegula Patri suo, qui in bibliotheca locavit, ab eodem antea donata fuerat. Idem autem Alexander, qui anno vivebat 1636. occasionem habuit quæ modo diximus, narrandi ab re persimili, de qua in *Chronicis* iisdem suis scribebat, ad XV. sæculum pertinente. Scilicet anno 1461. cum alte fodiendum esset prope ipsa urbis mœnia, & fluvium Montonum, nec tamen in hujus ripa, fossore multas antiquitatis reliquias invenisse, interque eas templi pavementum, musivo opere elegantissime factum, ad hæc, sepulchra complura suis cum Inscriptionibus, ibidemque numismata magno numero aurea, argentea, ærea, ab egregiis magistris perfecta. Inter eas autem Inscriptiones fuisse quæ istam ipsam scripturam haberet quam altera cum duobus illis urnis ex ripa ejusdem fluminis, sed alio & loco, & sæculo, fortuito, ut dixi, delapsa. Vides igitur, nec tempus, nec locum recte a Bonolo (s) fuisse inventæ hujus Inscriptionis propositum, & cum binæ eodem prorsus exemplo repertæ sint, unam esse memoratam. Atque utinam ex Documentis unde Alexander didicit, primum illam fuisse inspectam, simul didicisset, aut certe descripsisset, in marmore esset sculpta, an lateri impressa; ne de cæteris dicam quæ multæ cum illa erant; quanquam pavimenti, & numismatum elegantia satis indicat, ad perantiqua sæcula attinuisse. Optandum tamen fuerat, ut illud sal-

*Morgagni Opusc.*

tem quod modo dicebam, adnotare potuisset. Nam eadem insculpta marmori Inscriptio illam de Figuli nomine in tegula suspicionem exemisset; at pariter impressa tegulæ auxisset, eoque magis quod ejusdem hominis esse duo sepulchra non possunt. Quod si dicas, alterum fortasse patris fuisse, alterum filii; eodem enim & prænomine, & nomine utrumque esse, nihil prohibet, imo & cognomine, ut, exempli causa, hæc tria eadem in *M. Tullio Cicerone* tum parente, tum filio fuerunt; id, inquam, si dicas; continuo quæram, cætera quæ post *T. Papir.* sequuntur, aut alterum simul hominem conditum, aut alia quædam significantia, quomodo & patris, & filii sepulchris potuerint esse communia? Nempe ad commenta confugiamus, necesse est: ad quæ tamen, aliqua saltem ex parte, etsi altera in marmore, altera in tegula fuisset Inscriptio, nihilominus erat, ut video, confugiendum. Quapropter in tegula utramque fuisse, tu facile, credo, existimabis, & ad figulos potius, quam ad sepultos, attinuisse. Qua de re ut melius conjicias, si forte conferre quidquam possit; quomodo Inscriptio in Paduaniorum Collectione, & *Chronicis* sit descripta, cognoscere; utrobique enim descripta est; sic habeto, eam partem in qua legenda incerti esse possumus (ut ex iis quæ perattente inspiciens supra (t) adnotavi, proclive est intelligere) sic ab illis repræsentari *S. X. HISTOR.* Et de hac Inscriptione hætenus. Nunc ad eos qui certe & nostri excellentes fuerunt cives, & propiores nobis tempore, jam redeamus.

11. Hieronymi Mercurialis eximia de Re tum Medica, tum Litteraria merita Patriam, non solum dum ipse viveret, sed etiam longo adeo ab ejus obitu annorum spatio illustrarunt, illustrabuntque donec in pretio erunt optimæ Litteræ. Erant hæc quidem, cum ipse est natus, extra eas tenebras, in quibus invenerat Blondus; sed tamen iis adhuc magna ex parte carebant homines subsidiis, quibus nunc abundant ad quodcunque velint antiquitatis, & siue humaniorum, siue graviorum studiorum genus facile excolendum. Itaque fuerunt Mercuriali singula propemodum per se vestiganda, quæ in Græcorum, Latinorumque monumentis erant dispersa, ut immortalibus, præsertim Artis Gymnasticæ, & Variarum Lectionum, editis libris Medicos, Eruditosque omnes juvaret. Quapropter non modo inter Italos, sed inter Exteros quoque multi Viri non minus grati, quam docti, extiterunt qui de Mercurialis Vita, & Scriptis, alii alio tempore, plura tradiderint, atque adeo ætate hac nostra præ cæteris duo, alter Gallus, alter Germanus. Ille *Cl. Nicéronius* est, qui ut de Viris aliis Illustribus, sic de Mercuriali *Commentariolum* (u) Parisiis edidit anno 1734; hic vero *Fridericus Boernerus* Professor Vitembergensis meritissimus, qui anno 1751. Brunsvigæ emisit singularem *Commentationem de Vita, Moribus, Meritis, & Scriptis Hieronymi Mercurialis Foroliviensis*. Horum ego utrique, ut de nostro Inclyto Cive egregie sunt meriti, non mediocriter obstrictum me sentio, & quando nihil est per quod eorum benefactis respondeam, nisi pauca quædam indicando, quæ, si forte rursus sua illa scripta sint edituri, adjicere libenter possint; tu interea videas, velim, an hæc quæ continuo subjiciam, non indigna sint quæ, ubi mittendi occasio detur, ad ipsos mittantur; mihi certe ad perficiendam quam proposuerunt, historiam videntur attinere.

12. *Cl. Boernerus* (hujus enim *Commentatio* in manibus est; *Nicéronii* autem libri jam diu est cum fuerunt) primum omnium rogandus est, ut si quando alias scripturus sit *Forum Livii satis celebrem in Umbria urbem*, pro Umbria Æmiliam substituat; deinde vero ut quæ ab Italis hoc sæculo de Mercuriali sunt edita (quæ facile ob locorum distantiam ipsi nota esse non poterant) pleraque inspiciat. Edita

I 2

autem

(p) Bibliot. Lat. (q) Lettera sopra l'Iscriz. d'un mattone &c. (r) l. 1. cit. S. 5. (s) Vid. supra, n. 8.  
(t) Ibid. (u) Memoires pour servir à l'Hist. des hommes illustr. T. 26.



autem fuerant quædam anno 1726. ab duobus quorum neuter alterum potuerat legere, Collega meo Papadopolio in Historia Gymnasii Patavini ( *x* ), & Cive meo Marchesio filio in Vitis Virorum Illustrum Foroliviensium ( *y* ), tum nonnulla a me quoque scripta, alioque missa Aprili mense anni ejusdem priusquam legere eos possem, quamvis non ante annum 1728. Lugduni Batavorum vulgata, in Epistola Anatomica Prima ( *z* ), denique etiam illa quæ a Collega, eodemque Amico meo summo tradita sunt, Marchione Celeberrimo Joanne Poleno in Præfatione ( *a* ) ad nova Supplementa utriusque Thesauri Antiquitatum Romanarum, Græcarumque. His igitur Scriptis Italorum inspectis, Mercurialem Philosophiæ, & Medicinæ Doctorem esse creatum, idque die 18. Aprilis A. 1555. non Patavii, ut præeunte Tomafino ( *b* ) credidisse omnes videntur, sed Venetiis in Almo illo Medicorum Physicorum Collegio, ex Marchesio, qui primus omnium, quod sciam, id scriptis mandavit inspecto Privilegio ejus Doctorali, cognoscet: quod confirmare, si opus sit, ipse possum, quocum pridem, quippe ab anno usque 1718. in idem Collegium perbenigne cooptato, Acta illa communicavit is qui ex eodem est, ejusque simul Tabularius, Vir Doctus Nicolaus Pollarolus. Sic ubi ab Amplissimo Venerorum Senatu huc vocatus Mercurialis scribitur anno 1569. ut in prima Medicinæ Practicæ Schola Trincavellio succederet, an Fracantiano, die autem 21. Octobris id munus esse auspicatus; ex Papadopolo scire licebit, vocatum, ut succederet Fracantiano, quanquam antea par erat credere Antonio Riccobono ( *c* ) collegæ Mercurialis, & Tomafino ( *d* ), qui constanter non uno loco idem scripsit, nec sibi repugnasse, crediderim, cum primo loco annum adscripsit 1569. altero autem annum 1570. Secundo enim loco de tempore quo docere incepit; primo autem de tempore quo conductus est, mihi videtur esse locutus. In eo potius typographi, quam ejus, errorem esse, existimo, quod primo loco legamus 1569. 21. Octobris, cum S. C. extet eo quidem anno, sed 5. Octobris, nec Senatus cogi soleat 21. Octobris, nec veri simile sit, eum qui Romæ esset, cito adeo de S. C. certiore fieri, se ad longum iter parare, & hoc conficere, & paulisper quiescere potuisse, ut docere Patavii inciperet 21. Octobris die. Utinam ad eundem modum & ibidem, & in Elogiis excusare possem Tomafinum. Namque ibidem ait, Mercurialem ad sanandum Maximilianum II. Imperatorem ivisse anno 1583. qui annus erat septimus a Maximiliani morte! Pro illo igitur anno, ut recte censuit Boernerus, scribendum fuisse 1573. vel ex Cæsareo constat Diplomate, quod cum magnis præmiis Mercurialis retulit, anno hoc, non illo, Viennæ datum 10. Octobris, ut testatur Marchesius. Culpa tamen in Tomasini typographum non potest conjici, quæ potius in operas cadit Riccoboni, cum hic ignorare non posset, Collegam suum anno 1583. quem annum ejus expressit typographus, illud iter non suscepisse. Operarum igitur error, ut sit, in Tomasini librum octogesimo post anno scribentis, facile transivit, ex eoque libro in alios plures, & nominatim etiam in Papadopoli Historiam. Sed neque in Elogiis facile est a Tomafino culpam omnem in operas rejicere, cum dies quo vivere Mercurialis desiit, ad hunc modum indicatur anno C15. 15. CVI. XIII. Idibus Novembris. Quis enim ejus quidem anni, & mensis diem IX. five majus V. Idus intelligat? aut quomodo calamo, vel typis describentes pervertere adeo potuerint? Scilicet non videtur Auctor relegisse. Cui parcendum, si alios nobis, & nostratibus parcere velimus. Quorum alicui id excidit, quod nollemus, & a nobis tamen satius est, quam ab Exteris, ut de illo factum est, emendari. Bononiæ annos duodecim commoratus certe non est Mercurialis, neque inde an. 1599. Pisas conductus est. Satis erat; ut alios præteream; Alidosium ( *e* ) inspexisse, qui Externos recensens Bononiensis Gy-

mnasii Professores, & quamdiu in eo docuerint, adnotans, Mercurialem incepisse, tradit anno 1587. & ad annum usque 1593. perrexisse. De anno autem quo Pisas transierit, magis mirum est, nonnullos jam antea eundem errorem erravisse. Qui cum inter Hieronymi Mercurialis Opera *Prælectiones Pisanas*, a Cornacchino, ejus per illos annos auditore, recensent; vel hinc intelligere debebant, quam a vero alienum esset quod affirmabant, tandem anno 1599. Auctorem contulisse se Pisas.

13. Sed ad Boernerum ut redeam, qui & de hoc, & de Hieronymi obitu meliores est Auctores secutus; ex Marchesio qui plura de eodem scripsit ab aliis. ommissa, scire potuisset, quæ hujus conjux, quot filii, & filiæ, quæ tabulæ testamenti fuerint, alia id genus; præsertim vero quod ad ejus edita, aut inedita Scripta attinet. Ineditum Codicem extare, Marchesius indicat, Ravennæ in Camaldulensium Monachorum Bibliotheca, Hieronymi ipsius manu scriptum, continentem *Problemata quadam Plutarchi e græco in latinum ab illo conversa*, hisque *Appendicis loco annexam Constitutionem Anni MDLVII. incipientem a Vere circa æquinoctium usque ad Aprilem mensem sequentis Anni MDLVIII. cum pestis defæviret Patavii*, ubi Mercurialis Constitutionem dietim scripsit. Manifestum est, inter describendum, errores in annorum numeros irrepsisse, cum Mercurialem iis annis Patavii fuisse, non modo non constet; imo vel ex ipsius de Pestilentia Lectionibus constet, hunc morbum anno 1576. Patavii maxime sævisse. Quod vero inter illa quæ ab ipso edita sunt, ponere videtur Marchesius quam Jacobus Gronovius ( *f* ) tradiderit a Mercuriali esse elucubratam de *Potionibus*, & *Eduliis Antiquorum Mantissam*; credo equidem, illi qui Marchesio id retulit, fucum esse factum ab aliquo librorum Indice. Gronovius enim Mantissam illam, ut diserte fatetur, ipse composuit ex *Variis Mercurialis Lectionibus*. Scilicet quatuordecim capita ex I. II. IV. & VI. earum Lectionum libris selegit, eaque, ut sibi liberum erat, interdum ne ordine quidem librorum, nedum capitum, servato, disposuit. Sed an certo Gronovius ordine disposuerit, an omnia quæ ad propositum sibi argumentum attinerent in libris illis, acceperit, & contra an caput aliquod, minus ad eam rem pertinens, sumpserit, non est hic quærendi locus. Satis est indicasse, ista omnia a Mercuriali olim fuisse edita. Qui libellum ante ista etiam vulgaverat; imo priusquam duos & viginti annos exegisset, cum Patavii litterarum studiis operam daret, libellum, inquam, vulgaverat paginarum omnino triginta, inscriptum *Nomothelasmus*, seu *Ratio lactandi Infantes Authore Hieronymo Mercuriali Foroliviensi*. Patavii M. D. LII. præfixa Epistola, data ibidem, eodemque anno *sexta Augusti die*, sicuti alias ( *g* ) scripti, rarissimum hoc opusculum in bibliotheca mea asservari, dicens, ex qua Marchesius, & Polenus citant. Est forma, ut vocant, octava: & typographi quidem nomine, sed non signo carens, ex quo *Typographiam* agnoscamus. In libro enim medico Gasparis Gabriellii Patavini in *Quæstionem Hieron. Boniperti* sub eodem signo hæc verba inveni *Patavii In Officina Fabriana Jacobus Excudebat M. D. L.* Quæ addere huc volui, non quod hoc Mercurialis opusculum cum iis sit quæ postea edidit, comparandum; sed quod primi omnium, & raritatis gratiam habeat, propter quam non est, cur miremur, a Majoribus nullo modo, a Boernero autem sic esse memoratum, ut inter Auctoris Opera affecta vel incerta repone-ret his verbis, *Ratio lactandi infantes*. Vid. Schenck. *cujus testimonio extat MS. in Bibliotheca Martiana*.

14. Sed neque calamo, neque typis descriptum Mercurialis Galenum Græco-Latinum ad veterum librorum fidem restitutum, ac notis illustratum usquam extare, magis crediderim, quam Boernerus, qui hæc Erythræi verba de Mercurialis Hippocrate acci-

( *x* ) l. 3. S. 2. c. 22. n. 104. ( *y* ) l. 2. c. 3. ( *z* ) n. 81. ( *a* ) n. 36. ( *b* ) Elog. Viror. Illustr. T. 1.

( *c* ) Comment. de Gymnas. Patav. l. 2. c. 30. ( *d* ) Gymnas. Patav. l. 3. c. 10. & l. 4. ad A. 1570.

( *e* ) Li Dottori Forest. che in Bologna hanno letto Filos. &c. ( *f* ) Thesaur. Antiquit. Græcar. Edit. Venet. T. 9.

( *g* ) Epist. Anat. l. n. 81.



accipienda esse, non dubitat, pro quo Galenum is scripserit. Sic tamen cum intelligere non possem Riccobonum, qui inter edita a Mercuriali cum recte ponat *Hippocratis Opera omnia Græce, & Latine*, eaque *Scholiis illustrata*; continuo hæc adjicit *Galenii opera latine conversa, ab eodem emendata*; quærere inceperam, an aliquot Galenii Opera, jam ab aliis latine reddita, ipse quoque, ut Gadaldinus, aliique Medici fecerunt, emendasset, cum in Petrum Castellum (b) incidi, qui sequi se Riccobonum professus, hunc ita descripsit *Galenii opera Latine conversa, & emendata*: neque aliter in Elogiis habet Tomalinus: quin Papadopulus ante cætera Hieronymi Scripta diserte hæc ponit *Galenii Opera omnia latine reddita, & emendata*. Mihi vero cum Juntarum illam Galenii Editionem, quæ præcedentium omnium absolutissima censetur, nonam versarem, vix hæc contigit animadvertere quæ ad Mercurialem pertinerent, in Prolegomenis quidem *Epistolam ad Lucam Antonium Juntam, in qua de Ordine Librorum Galenii*, in Classe autem Quinta *Judicium de Libro Theriaces ad Pisonem*, denique in Fragmentis hoc unum quod ad rem proprie faceret, *Fragmentum Comm. Galenii in 11. Lib. Epidem. Hippocratis, Hieronymo Mercuriali interprete*. Quæ si quis velit ad cætera hujus Scripta addere; per me licet: Sin ad ea probanda quæ paulo antea nominati retulerunt; nescio adhuc, qui possint astipulari.

15. Cæterum præter ea quæ Eruditi Viri, & in his Boernerus, ex Lindenio adnotarunt, an alia Mercurialis supersint inedita, si forte ex me quæras; inficiari non ausim. Ostendit enim mihi Petrus Scanelius, Foroliviensis Patricius optimarum litterarum studiis deditus, eoque etiam nomine utriusque nostrum amicissimus, Consilia Medica, latina alia, alia italica, Mercurialis manu scripta, gemino Volumine comprehensa, ex quibus nulla esse quæ non sint edita, sine diligenti examine asseverare non possem. Hoc memini, dum cursim versarem, in Epistolam incidisse; qua venenum, & quod consequitur, pestem non posse per epistolas communicari, adversus communiorum, & si vere loquendum est, tutiorem sententiam contendit. Hoc etiam memini ab Amico altero non semel audivisse, Forolivii in Tabulario Monachorum Vallis Umbrosæ librum extare signatum littera R, quo Index contineatur Bibliothecæ Hieronymi Mercurialis. Denique cum duo videam de Sæmo hoc Viro esse vulgata, alterum a Papadopulo, alterum ab Erythræo, quæ ut illi perhonorifica sint, cum vero tamen, quod unice in historia spectandum est, non omnino convenient, mihi haud reticenda esse, censeo. Papadopulus scribit, *plurimum impendisse Hieronymum in extruendo basilice templo Divi Mercurialis*, memoria videlicet lapsus, ut ea quæ legerat de *Sacello qua picturis, qua statuæ exornato* ad Sancti illius Episcopi honorem ab Hieronymi pietate, & liberalitate magnifice extructo, ad peramplam totam Basilicam S. Mercurialis transferret, qua Sacellum illud continetur, priusquam Hieronymus existeret, ædificatam. Erythræus autem cum ejus Elogium his verbis conclusit, *mortuo cives sui statuam faciendam locavere; qui honor habitus est ante ipsum nemini*; id saltem audiverat, quod ita verum est, ut Bonolus (i) suas in Historias retulerit, nempe ad illum invivendum, cum insuperabili morbo detineretur, ipsos Patriæ Magistratus adiisse, ejusque statuam in Foro ponendi facultatem detulisse: qui certe honor propter excellentiam in litteris, civium ulli neque ante, neque post ipsum est habitus. Attamen hæredes sive negligentia, sive, quod malim credere, modestia, sive alia (certe non angustia rei familiaris, quam ille mirifice amplificaverat) causa prohibiti, ea facultate non sunt uli.

16. Statuæ injecta mentio alterum ad memoriam revocat de duobus Foroliviensibus, qui sæculo XIV. non Patavium dumtaxat, ubi docebant, sed Europam omnem fama sui nominis impleverunt, Raynerio Ar-

sendo J. C. Bartoli Magistro, & Jacobo a Turre Philosopho, & Medico, qui anno demum obiit 1413. tantum ei Gymnasio ingenii sui desiderium reliquit, ut lege jussu sit, ut publice a Professoribus non modo ordo ejus *Questionum* (k) in Medica Galenii Arte interpretanda servaretur, sed etiam (l) *Expositio* ipsa Jacobi cum *Questionibus* prælegeretur. Jacobi igitur hujus, cum superiora illa scriberem, venit in mentem, cujus ut nostrates Historici, sic etiam Salomonius in *Urbis Patavinæ Inscriptionibus* memoravit *magnificum sepulchrum cum statua marmorea e suggestu legentis*. Quæ si, ut illi ajunt, facienda curavit Paulus cognomento Venetus is qui excellenti Philosophiæ, & Theologiæ scientia Ordinem illustravit Eremitarum S. Augustini; non sine animi dolore nunc miraretur, ei monumento quo Amicum, & fortasse Magistrum, suum honestasset, contra accidisse quam ipse sperabat, cum Ciceronem (m) scribentem legeret, ut cætera *extingui solent, sic sepulchra fieri sanctiora vetustate*. Monumentum autem quod sibi suis ipse scriptis Jacobus construxit, tot locis, & toties post ejus mortem reculis, durat adhuc, & quando, ut mortalia omnia, ipsum quoque interierit; tamen vel postea ejus nomen in libris diu superstes erit diligentium Virorum, qui aliquam saltem Jacobi observationem litteris commendarunt. Videtis, exempli causa, Marcellum Donatum (n) inter cæteros qui calculos olim conspexerunt sub lingua concretos, hunc nostrum laudantem. *Jacobus de Forlivo*, inquit, & ipse affirmat, se vidisse sub lingua lapidem *genitum in quodam D. Nicolao de summa Ripa*. Scilicet Observationes diutius quam cætera, in Medicorum, Physicorumque Scriptis servantur. Sic apud eundem Marcellum (o) nomen vivit Joannis Juliani Medici Foroliviensis, qui annis minimum centum priusquam Jacobus decederet, lapidem quem alibi fortasse describam, vomitu ejectum vidit.

17. Quod si alii ex nostratibus Medicis, aut Philosophis peculiare aliquid ab se pariter animadversum, aut visum (quod non uni eorum non accidisse vix potest) sive cum aliis, ut Joannes ille, communicassent qui litteris prodidissent, sive ipsi per se scripssissent; non dubito quin de illorum pluribus honorifica ad hoc tempus extaret mentio, quemadmodum eorum extat, quos aut hac, aut alia olim Epistola (p) merito laudavi. Nam multos præterea, & doctos quidem, Patria nostra habuit vel XIV. & XV. sæculo, quorum vix nomen scimus, ut in Bononiensi dumtaxat Gymnasio cum undeviginti nominet Alidosius (q) nostrates Liberalium Artium Professores; si Jacobum a Turre, & Mercurialem excipias, & duobus hisce interjectum Nicolaum Hastum, qui postea, ut de Blondo agentes scripsimus (r), Episcopus fuit; cæteri quid præterea egerint, ignoremus; & plerique tamen Philosophica, aut Medica docuerunt. Sic enim, ob temporis longinquitatem, fere nominantur, ut Professor ille in Historia Ferrariensis Gymnasii (s) ad annum 1494. *Franciscus de Forlivo, Phil. & Med. Doctor*.

18. Quam Historiam cum haud ita pridem versarem, in eum locum forte incidi (t) quo insignis Pictor Marcus delli *Ambrosi, Melozzo* dictus, non Foroliviensis, ut communiter appellatur, sed Ferrariensis fuisse scribitur testimonio unius Leonardi Pisaurensis, quasi, ut ejusdem ætatis, facile hallucinari non potuerit, præsertim cum *parum Pisaurum Forolivio distet*. Non est opus dicere, Pisaurum inter, & Forum Livii millia passuum esse ad sexaginta, & Ariminum, ac Cæsenam interjici, quando extat præter cætera a Marchesio (u) indicata, sepulchri titulus, qui eximium hunc Pictorem Melocium Foroliviensem fuisse, apertissime demonstrat. Quæ Vir Eruditus, ut Marchesii librum in sua non semel laudat Historia, sic vellem antea perpendisset, quam Pisaurensi illo uno teste niteretur.

19. Non miraberis, opinor, de Pictore hic me fecisse

(b) Vit. Illust. Medicor. (i) Hist. di Forlì l. 12. (k) Statut. Artist. l. 4. c. 18. (l) l. 2. c. 16.  
(m) Philipp. 9. (n) De Medic. Hist. Mirab. l. 4. c. 30. (o) Ibid. (p) Epist. præfixa Advers. Anat. VI.  
(q) Li. Dottori Forest. che in Bologna hanno letto Filos. &c. (r) supra, n. 2. (s) P. 2. l. 1.  
(t) Ibid. l. 5. (u) Vit. Viror. Illust. Forol. l. 2. c. 7.



cisse mentionem; cum excellentes in ea quoque Arte Viros merito posuerim in iis Litteris, quibus, omnes aut singillatim, aut generatim complexus seu pacis, seu belli Artibus egregie de Patria meritos Cives, Patriæ ipsi Anatomica Adversaria Sexta dedicavi. Sed ut eo tempore ex iis qui viverent, fere neminem, nisi qui S. R. E. Cardinales, aut qui essent Episcopi, nominavi, ita nunc pro certo habeas, velim, si aliquando a me iterum (id quod facile accidere potest) idem forte esset faciendum, nihil mihi gratius fore, quam de cæteris dicere tum quos interea, dignos singulari laude, amisimus, tum præsertim quos diutissime ad decus magis magisque augendum Civitatis nostræ servari, optamus CAMILLUM PAULUCIUM, & LUDOVICUM MERLINUM eximiiis utrumque meritis inter Cardinales relatum, Episcopos autem Guidonem Ursellum, post nostratem pariter Joannem Baptistam Ursium, Cæsenati Ecclesiæ,

Franciscum Columbanum Bertinoriensi, & Franciscum Castellinum Tiburtinæ præfectos. Sed longe aliud mihi in hac Epistola propositum fuit, nempe ut si qua de nostris Majoribus tradita occurrissent minus cum historica veritate congruentia, ea tibi significarem. Quod ut potui, hætenus præstiti, alias, si in alia incidero, his additurus. Quin continuo accipe, quale id cunque est, quod facta modo Cardinalium mentio in memoriam reduxit. Volumina hoc tempore omnium manibus versantur Geographica, & Critica, in quibus ut ut digna laude sint, quosdam non semel errores indicavimus. Iis hunc adjice. Christophorus Cardinalis Numajus, qui Patriam nostram magnis suis tum virtutibus, tum dignitatibus illustravit, fuisse scribitur sub Urbano VIII. scilicet anno propemodum postquam objerat, centesimo! Ab Leone enim X. purpura ornatus anno 1517. decessit anno 1528. Vale.

## EPISTOLA ÆMILIANA XII.

**F**Inem tandem de Patria, Civibusque nostris scribendi faciamus. Foro igitur Livii egressis, & Orientem versus pergentibus primum omnium Ronchus fluvius occurrit. Ejus fluvii fontes amniculi sunt duo, qui pluribus capitibus ex altiore Apennino orti, postquam inde alter quatuordecim, alter undecim milia passuum obliquo decursu emensi, Bledam, superiore Epistola (a) memoratam, olim oppidulum, an viculum, nunc Piedam dictum, & vix modo unam Ædem sacram, unamque, haud amplius, domum obtinentem, denique pervenerunt, cumque interceperunt, in unum confluunt alveum, & flumen efficiunt, quod accolæ, ut alias (b) scripsi, Bidentem ibi, & paulo infra etiam, Vitim appellant; ego, cum idem sit quod nostratibus Ronchus dicitur, perspicuitatis gratia Ronchum vocabo. Infra eum confluum, ad occidentalem fluminis ripam Maginus (c) oppida hæc omnia ex ordine posuit Sanctam Sophiam, Galeatam, Civitellam, Meldulam; cum tamen primum, & tertium, in quo & Bonoli Tabella (d) peccat, ad oppositam ripam sint; Galeata autem dumtaxat, & Meldula ad occidentalem. Quibus de oppidis duobus antiquitatis studium quædam ad te scribere hortatur, & primum de primo.

2. Galeatæ, vel potius Galigatæ vocabulum, ita præsertim ut nostratum vulgus pronunciat, in Galliatæ, imo Galliada mutatum, eo plures olim Eruditorum adduxerat, ut Gallianos, aut Galliani, sicut in Plinio (e) legebant, Saltus ibi fuisse, existimarent, Leandro, nec solo, præunte (f), Paulo autem Merula (g), Ferrario (h), & Abrahamo Ortelio (i) sequentibus, aut certe non repugnantibus. Leander autem, quod Ortelius memorat, huc duos alios, a Galeata non ita distitos, adjecerat pagos, seu mavis oppidula, Civitellam, & Cuserculum. Sed Cluverius (k) in ea Tabula quam Gallia inscripsit Circumpadana, supra Mutinam transtulit, posuitque ad Gabelli orientalem ripam oppidum adscripto hoc nomine Saltus Gallianus. Saltus quoque Galliani supra Mutinam leguntur in Tabula, quam Sansonius edidit Italia Antiqua: ut ibidem in alia, quæ eodem titulo prodiit ætate hac nostra, legitur Saltus Gallianus, frustra admonente Cellario (l) Cluverium quidem ad Gabellum ponere Saltum Gallianum, quasi oppidum a Plinio lib. 3. cap. 15. notatum: verum Harduinum e MSS. legere Saltes Galliani, qui cognominantur Aquinates; non enim oppidorum ibi, aut nemorum, sed populorum nomina recenseri. Quibus in verbis illud unum potest desiderari, ut quemadmodum

Cluverii Tabula notata est, ita ejusdem sententia laudata esset, qua eodem in Opere (m) eundem Plinii locum ita e quibusdam exemplaribus emendandum, & ex Auctoris proposito accipiendum censuerat, ut postea agnovit Vir Doctissimus Harduinus: quamvis huic recentissimi quoque Geographi idem tribuant quod Cellarius, Cluverii, ut videtur, obliti. Mihi vero de Gallianis Saltibus minus sollicito esse licet, quando vetustissimum oppidi, seu mavis, ut nunc est, pagi Galeatæ nomen longe aliud olim fuisse, credo, quam ut ex ipso Galliani Saltes in mentem debeant venire.

3. Namque, ut a minus veteribus ad antiquissimam illius appellationem procedamus; invenio apud Rubeum (n) in Litteris Honorii III. Pont. Max. anno 1224. Monasterium Galliatense, & in Litteris Gelasii II. anno 1119. (o) Monasterium S. Hilari in Galliata, & in duobus Testamentis (p), altero, anno 1052. altero, anno 1039. Civitella de Galliada, & totum quod habemus in Galliada restituatur Sancto Hilario: anno autem 996. (q) in Litteris Gregorii V. Canobium D. Hilari in agro, cognomento Gallicata: qua ex voce emendatio repetenda videri potest loci cujusdam (r) Agnelli Ravennatis, qui, ut scis, IX. scribebat sæculo, de valle, quæ dicitur Calle Collata, quæ rustico more Galliata dicitur. Ibi enim facile pro Galligata librarii ineptissimi scripserint Calle Collata; quando etiam in Vita S. Hilari, a Paulo ejus discipulo, ut ajunt, litteris tradita sæculo VI. habemus in Galigatensi Canobio, & juxta vicum Galigatam. Ex his quæ retro pergentes, ad sæculum usque VI. perduximus, necdum quidem ad antiquissimum nomen perventum est; duo tamen colligi possunt, alterum, etsi novissime a Præclaris Geographis scriptum est, Galliata nomen esse Latinum Abbatia, cujusdam Italiae ad Æmilie fines, tamen neque Abbatiam, sed pagum juxta quem Abbatia erat, significare, neque latinum esse nomen, quia Galigata, qua ex voce rustici Galliata fecere, ne ipsa quidem latina est: alterum, etsi Blondus (s), Rubeus (t), Doctique alii Viri Galeatam ipsi quidem scribere consueverunt, quasi latinum hoc nomen in Galliata conversum esset; tamen ubi ad sæculum X. & proxima superiora retrocedimus: non Galliata, sed Gallicata, aut Galigata vocabulum inveniri, quod si qua ex voce latina detortum est, ex Caligata detortum esse videri possit, quæcunque ejus nominis causa fuerit, ut puta si insignis aliqua statua, caligis instructa, in eo quondam loco viseretur.

4. Sunt

(a) n. 5. (b) Epist. II. n. 9. (c) Italia Tav. Romagna. (d) præfixa ejus Historiis.  
 (e) Nat. Hist. l. 3. c. 15. (f) Descrit. di tutta Italia Reg. 14. (g) Cosmogr. P. 2. l. 4. (h) Lexic. Geogr.  
 (i) Synonym. & Thesaur. Geogr. (k) Ital. Antiq. (l) Notit. Orb. Antiq. l. 2. c. 9. n. 81.  
 (m) l. 1. c. 28. (n) Hist. Rav. l. 6. (o) Ibid. l. 5. (p) Ibid. (q) Ibid.  
 (r) Libr. Pontific. in Vita Sergii c. 3. (s) Histor. Dec. 3. l. 6. & Ital. Illustr. Reg. 6. (t) Hist. cit. l. 9.



4. Sunt autem adhuc tum ibi, tum in vicinia non obscura indicia locatarum olim vel grandiorum statuarum. Cum enim de his quærem ex eo quem merito alias laudavi, Verlicchio quo tempore Medicum agebat Galeatensium; rescripsit is, non solum in pago, passus illinc disto circiter octingentos, Planetum vocant, sed & Galeatæ marmoreas bases superesse, magnitudine sua statuarum quæ impositæ olim fuerant, magnitudinem ostendentes. Nam quæ basis Galeatæ est in præcipua sacra Æde, Baptismi fontem nunc sufficiens, altitudine propemodum æquat ulnas grandiores duas, crassitudine autem dimidium superat altitudinis. Basis altera, quæ Planeti est in Templo S. Martini, priorem superat crassitudine, etsi ea minus alta est digitos circiter quatuor. Utraque statua, ut satis apparet, subjecta fuerat. Sed cui statua, ex secunda quidem scire non licet, cum eam faciem quæ litteras gerere debuerat, posteri altius excavaverint; ex priore autem non solum discitur, cujus statuam haberet impositam, verum etiam id quod quærimus, vetustissimum loci nomen, ejusque simul dignitas, id est Mevaniolæ Municipium. Inscriptio enim quæ ea in basi legitur, illa est quam Cluverius (u), & Harduinus (x) commemorarunt, posita cum statua Q. Velcennæ Decurioni Mevaniolæ, Patrono C. C. M. M., hoc est Collegii Centonariorum Municipii Mevaniolæ. Quæ quoniam Inscriptio ut apud Ursatum (y) legitur, & fortasse ut apud eos quoque unde ille sumpsit, non satis tum dispositione, tum litteris cum ea convenit, quam ex ipso marmore, perattente, nec semel inspecto, Verlicchius descripsit; operam non perditurum me credidi, si quomodo se habet, sic tibi exhiberem.

## Q. VELCENNAE

L. F. STEL

PROCVLO DECVRIONI

MEVANIOLAE

C. C. M. M. PATRONO

HONORE CONTENTVS

IMPENDIVM REMISIT. ET

DEDICATIONE STATVAE

NYMER. COLL. IPSORVM

SPORTVL. DEDIT

SINGVL. DENARIOS BINOS

L. D. D. D

5. Nos igitur Cluverio assentimur, ex hac Inscriptione Mevaniolam ibi fuisse, censenti. Nam quod obijcere aliquis posset, aliunde esse illuc fortasse advectam, adnotata a nobis marmoris magnitudo, & quod consequitur, pondus satis repugnant. Loca enim circum sunt montosa, & angustarum viarum; ut non sine magno impendio, & singulari causa ex longinquo illuc trahi potuerit. Nec tamen hodiernis Galeatæ terminis vetus illud Municipium circumscribo. Nam etsi Mevaniolæ appellatio parvum fuisse indicet, si cum Mevania conferretur; tamen quæ antiquitatis monumenta ex contiguis locis eruta dixi Epistola aliâ (z), ex loco videlicet quem Monasterium vocitant, & ex altero quem Sagittam, quorum ille inter Planetum, & Galeatam est interjectus, hic infra Galeatam est ad passus ducentos, eo me facile adducunt, ut intra Mevaniolam credam utrumque locum fuisse.

Caterum qui præter Mevaniam extitisse etiam Mevaniolam, sciunt, iis proclive est Cluverio assentiri in Plinii loco (a), ut erat olim in manu scriptis codicibus, intelligendo, & simul fortasse emendando, *Mevanates*, *Mevanionenses*, *Matelicates* &c. mutata una in secunda voce litterula, ut *Mevaniolenses* legatur. Qui enim *Mevanienses* potius legendum credunt, iis non tam *Mevanienses* dici posse, quod Holstenio (b) facile annuimus, ostendendum est, quam Mevanienses alios esse, quod Holstenius idem negat, ac modo dicti Mevanates. Harduinus tamen (c), qui

nihil horum ignorabat, maluit in Plinio nihil mutatam veterem scripturam retinere, his adnotatis, *Mevanionenses a Mevanione, seu minore Mevania*; neque enim ausus est, ut fatetur, propositam *Inscriptionem sequi*, in qua illæ voces sunt *Decurioni Mevaniolæ*, an quod commentitiam crederet? illa vero, ut diximus, reapse ibi extat, neque ullam habet notam, cur non pro vetere, legitimaque accipiatur. Utinam sicuti *Mevaniolæ* nomen in ea legimus, ita alia proferretur Inscriptio, aut vetus aliquis liber in quo legeremus *Mevanionis*.

6. Neutrum vocabulum apud Baudrandum, Cellariumve, aut apud eos qui nuper Geographiam universam multis Voluminibus sunt complexi, mihi adhuc licuit invenire. Sed Mevaniolam Sansonius pinxerat in Tabula inscripta *Italia Antiqua*: cujus tamen bina inspiciens exempla, neutrum ejus sedem satis accurate indicatam offendi. In altero enim indicatur nimis alte ad Ronchi initia; in altero infra hæc quidem satis, sed distita adeo ab ejus ripa, ut inter ipsam, & Montonum fluvium media conspiciatur. Melius alii qui eodem titulo Tabulam annis superioribus vulgaverunt. Ferrario (d) Mevaniola pro Galeata quidem habetur; sed Galeata esse dicitur in agro Foroliviensi, Meldulæ oppido, & Civitellæ oppidulo ad 2. mill. pass. vicina. Erant certe olim hæc omnia, & multo plura alia in agro, aut in ditione Foroliviensi: nunc Galeata est in Etrusca, Civitella autem, & Meldula in Pontificia quidem sunt; sed alia ad alios attinet; alia autem alio intervallo distat a Galeata, Civitella videlicet millia passuum III. Meldula autem XIII. quæ ut non sit supra Forum Livii ad millia passuum X. ut recentissimi ajunt Geographi; est tamen ad VII. Non abest igitur Galeata, ut Ferrarius idem ait, a Foro Livii 10. m. pass., sed 20.

7. De Meldulæ non ignobili oppido, quod ab Italo quodam Geographo rus dici, miror, nihil habere quod antiquitatis studio, ut sum pollicitus, ad te scriberem, nisi Arx illius prisca Inscriptio abundet. Harum plures; ne omnes dicam; non ante illuc importatas crediderim, quam Leo X. P. M. ut Paulus Merula (e) tradit, concessisset Alberto Pio Comiti Carpeni Meldulam, unaque, ut apud Leandrum (f) legimus, Sarlinam. Ejus rei illud mihi indicio est, quod in earum non paucis Carpi alicujus nomen legitur; ut eo vocabulo quod suam Carpum referret, Comites illi delectati, eo intulisse videantur. Sed has, aliasque unde unde acceperint; nonnullas certe aut ipsi, aut alii Meldulæ simul, & Sarlinæ Domini Sarlina advexere. Antoninius (g) de tribus diserte id docuit, quas etiam protulit, Gigeniæ Verecundæ, M. Valerii Fausti, L. Destimi Epigoni. In his si Antoninium secutus esset Gruterus (h), neque secundam omisisset, putans fortasse, eandem esse, ac Romanam illam quam pag. 1145. 8. descripsit; in illa enim *Valeria Donata* est, in Meldulensi vero est *Vetilia Euterpe* quæ eam M. Valerio Fausto posuit *Conjugi Optumo*; neque primam, & tertiam quemadmodum dedit, protulisset. Primam enim cum dedisset pag. 416. 5. satis, si unam excipias litteram, fideliter descriptam, non iterasset postea pag. 872. 14. iis subitis additis verbis *Heu Mors Invida*, neque sub his quædam exhibuisset quasi vestigia lineolæ duplicis erasæ, quarum rerum neutram unquam fuisse, mecum qui id marmor sæpius inspexi, omnes asseverabunt qui viderint. In postrema autem, quam pag. edidit 402. 2. non *L. Destinio*, sed *L. Destimi* scripsisset, ut superior, quæ adhuc superest, Inscriptionis pars perspicue habet. Neque insuper adnotasset, aliam, quam ab eodem Lucio positam filio puero profert pag. 680. 8. eam quoque, Sarlina translata, in Arce esse Meldulensi. Spectabilem enim ob tria quæ in summo habet, carmina Inscriptio Antoninius non omisisset, neque ea me in quocunque Arcis illius angulo semel, iterum, sæpius quærentem, & quærendam curam.

(u) Ital. Antiq. l. 2. c. 6. &amp; 7. (x) loco mox indicando. (y) De Not. Rom. ad C. C. M. M.

(z) V. n. 6. (a) Nat. Hist. l. 3. c. 14. (b) Annot. in hunc Cluverii locum.

(c) ad Plinii hunc locum n. 27. Vid. in fin. l. 3. n. LXXV. (d) Lexic. Geogr. in Mevaniola, &amp; Galliani Saltus.

(e) Cosmogr. p. 2. l. 4. c. 12. (f) Descript. di tutta Italia Reg. 14. (g) Delle Antichità di Sarlina Disc. 1. c. 5.

(h) Inscript. Antiq.



curantem fugere omnino potuisset. Nam frustra per laudatum alias (i) Meldulensem Medicum Camillum Brunorium, frustra per Arcis incolas nullo non loco indagatam, frustra ipse quoque perquisivi, cum haud semel ibi apud Nobiles Viros Comites Columbanios, qui pro Principe multos jam annos Meldulæ præfunt, ob eorum erga me comitatem, meamque cum eorum Fratribus affinitatem versarer.

8. Sed non frustra eodem tempore lapides cæteros quibus Arx ornatur, perlegi. Nam præter eos quos modo adnotabam, animadverti esse plures, eosque nec apud Antoninium, nec apud Gruterum, nec apud Reinesium, quantum memini, a me visos. Eos tibi hic omnes propterea descriptos dabo, quia si forte quosdam saltem nec ab illis, nec ab aliis adhuc editos esse, comperias, id tibi pergratum fore, scio.

D. M  
L. SCRIBONIO SECUND  
ET SCRIBONIAEVHODIA  
EFL. SCRIBONIOPIO. ERA  
L. SCRIBONIVSFRONTIN  
ET. SCRIBONIAFVSTA  
PARENTIBVSPIENTISSIMIS  
FEC

Minime dubium est, quin ad tot alia Scriboniæ Gentis hoc monumentum addendum sit. Sed ad bene intelligendum, præter alias, difficultas accedit in legendo. Vitiatum enim est marmor injuriis temporis nonnullis locis, ut in ultima etiam littera quarti versus, & quinti. Et quanquam alibi nimia vicinitas, alibi ambigua forma litterarum, cum parvitate ferme ubique conjuncta, ad suspicandum moveant tum alicubi alia, tum in versus quarti fine legendumne sit FRA, in sexto autem IVSTA; nam FAVSTA, aut FVSCA sculptum non fuisse, evidens est; illa tamen superest dubitatio, quomodo hæc Scribonia, & Scribonius Frontinus ejus frater, si Scribonio etiam Pio Fratri hoc monumentum fecissent, abscribere potuissent *Parentibus*; aut si ille non frater, sed parens fuit, tres Parentes habuissent; nisi forte existimas, Scriboniam quidem illam primam utriusque horum qui fecerunt, fuisse matrem, Scribonii autem Frontini fuisse patrem Scribonium Secundum, & sororis Frontini Scribonium Pium.

9. Verum ad planiora veniamus, quale monumentum est quod parens Volusius filia posuit nondum sexenni,

CLODIAE  
PRIMIGENIAE  
V. A. V. M. VI  
L. VOLVSIVS  
ANTIGONVS. F  
CARISSIMAE  
FECIT

aut hoc quod Vir Vxori,

D. M  
T. FL. CHRE  
SIMVS FE  
CITRVTLI  
AESECVN  
DAE CON  
IVGIRARIS  
SIMAEBEN  
MERENTI  
FECIT

Socordiam Sculptoris tantam alias animadvertisse, non memini, ut FECIT bis poneret in lapidis præsertim spatio; ut tibi vel coarctatio litterarum ostendit, angusto. Si quid discrepent in lapidibus T. & TI. cogitaveris; non idem hic significari videbitur *Ti. Fl. Chresimo*, qui Flaviae libertæ monumentum posuit,

ut est apud Gruterum pag. 1151. 3. etiamsi non addas, quid differant *Chresimo*, & *Chresimus*, & Hispania, ubi illud est, & Italia. Ad Chresimum alterum, at servum, hoc marmor attinet in Arce eadem,

CHRESIMVS | CAPTVS  
ATRIENS | A. CORINTHIS

Quænam *Atrienfis* inter Servos essent officia, æque ac ego, ex Latinis Scriptoribus nosti, & ex eorum Interpretibus, & Eruditis aliis Viris, in primisque ex Pignorio (k), & Pitisco (l). Sed & alia legeris marmora ad Atrienes spectantia tum apud Reinesium (m), tum apud Gruterum, qui pag. 579. 5. in eodem lapide proponit cum Batonio *Atrienfi* Lajum a *Corinthis* non dissimili modo ac in nostro factum vides. Sic autem qui Corinthia vasa asservabant, designabantur, ut legeris apud laudatum Pignorium (n), qui illam, aliamque Inscriptionem habet extantem apud Gruterum. Hic inter cæteras illam quoque habet ibidem n. 10. quam hanc Meldulensem omnino esse, crederes, nisi & Romæ esse diceretur, nec *Captus* haberet, sed *C. Aptus*. Sed quanquam Gruterus plures *Aptos* profert, nullum *Captum*; proferri ab aliis fortasse potest, & certe in lapide hoc Meldulensi nec ullum vestigium puncti est, nec spatium ullum inter C & A. Haud procul est aliud marmor huic simile, & simili subobscura interjecta lineola inter libertos duos, subdivisum,

L. CORNELIVS | L. CORNELIVS  
CALLISTVS | GETA

Libertos dixi; certe a L. Cornelio manumissum utrumque fuisse, prænomen, & nomen Patroni indicat utrique commune; proprium autem quod antea, cum servi essent, nomen erat, cognomen nunc factum, Callistus videlicet, & Geta; servile autem utrumque hoc nomen fuisse, & Veterum libri, & Inscriptiones crebræ confirmant. Ad Libertum quoque, & ad Cajæ Libertas lapis attinet,

P. OCTAVIVS. CHRYSEROS  
OSTORIAE. J. L. AVXINI  
CONIVGI. SVAE. ET  
OSTORIAE. J. L. CHIAE

Harum pariter Libertarum alteri nomen fuerat *Auxini*, quod aliis in lapidibus legisse, non memini, alteri autem *Chia*, quod in quibusdam legi. Neque unus modo occurrit, aut alter cui cognomen fuerit Chryseros. Multi vero Hermetes, & Sympherusæ, quæ nomina erant Conservi de quibus hoc marmor Meldulense,

MERMETICONSER  
SVO BENEMEREN  
SYMPHERVSA  
FECIT

10. Denique ad eos lapides in quibus diximus *Carpi* nomen insculptum esse, veniamus. Id nomen servile fuisse, vel ea ostendunt quæ de servo obsoniorum scissore apud Petronium (o) legeris in cæna Trimalcionis. Vides, inquit, illum qui obsonium carpit? *Carpus* vocatur; itaque quotiescunque dicit, *Carpe*, eodem verbo & vocat, & imperat. Inscriptiones autem plures profert Gruterus, in quibus aut diserte scriptum est *Carpus Aug. Lib.* & *Carpus Caesaris Lib.* aut figla L jungitur, aut si prænomina, & nomina Gentium nobilium cognomini *Carpi* præposita attendas, adjectave alia consideres; manumissos eos Carpos fuisse, facile intelliges. Hujusmodi unam Romæ extantem indicat idem pag. 775. 7. in *Palat. Carpenfi* ob eandem fortasse causam propter quam tot Meldulæ quoque conspici, supra a nobis dictum est. Quarum una sic habet,

FLO-

(i) Epist. V. n. 12.

(k) Comment. de Servis Edit. 2. pag. 221. & seqq.

(l) in Atrienfis,

(m) Cl. XI. n. 39.

(n) pag. 104.

(o) Satyric.



FLORAE  
L. LAELIO. CARPO  
TERPSIS. MATRI. ET. VIRO  
SVIS PISSIMIS. POSVIT

Alterā autem sic,

CARPVS. LAINI  
SORORI. ET  
SALVIO. PIST

Sororis nomen ita uti vides, scriptum est. Num ut aliquando AI pro AE positum videmus, puta in *Aimilio* pro *Aemilio*, hic legemus LAENI? Invenitur certe in lapidibus LAENIA quædam. In superiore vero marmore ne suspiceris, litteram deesse propterea quia apud Gruterum pag. 787. 6. scriptum videris *Geminia Therpsidi*; in nostro certe est, ut descripsimus, TERPSIS. Cæterum *Salvius Pistor* fortasse Carpi erat conservus, ut in eo lapide quem habet Reinesius Cl. XI. n. 31. ab Elaphione positum sibi, & *Primo Conservo suo Pistori Marcellæ*. De Servis autem Pistoribus nonnulla attigit Pignorius (p). Et ad Pistorum Inscriptiones spectantes produxit Gruterus, quibus & modo descriptam adjunges. Cogitabis autem, quomodo legendus sit versus secundus in hac tertia.

CARPVS  
SOCIOR. VICENS  
SIBI. ET. HERACLAE  
FRATRI FECIT

Num *Sextum*? num *Sexies* non dico *Censorem*; aut *Censitorem*; sed num *Censualem Sociorum*? Neque intelligo ut in libris Jurisconsultorum; sed ut inter Servos aliquid indicat ubi de Dispensatore agit (q) sæpe laudatus Pignorius. Quo sensu num legemus *Sociorum Sex*? Verum nolo ineptire. Divinare quoque oporteret, si quis supplere vellet Inscriptionem quartam, cujus nimirum dimidia, aut tertia pars deest.

M  
CARPVS  
-CARPO  
NTISSIMO FECIT  
IC LA. LOCO SIBI  
ET GEMINIAEPAN  
M. LVCCEIQHER

Lapis hic sepulchralis Carpo quidem positus fuisse videtur. Nec difficile est conjicere, initium quarti versus fuisse fortasse *Filio*, aut *Fratri Innocentissimo*, aut *Pientissimo*. Videntur autem versus reliqui non ad illum Carpum, sed ad alios pertinuisse, ut puta si qui, *empto loco*, fecit monumentum, hoc sibi quoque, aliisque servasset, & in his *Geminia Pannychi*, si placeat ita supplere, fortasse uxori, & *M. Lucceio Heredi*, cujus nominis ultima littera a Sculptore pro latina

fic græca posita est. Nec tamen hæc, aliaque constant, multoque minus prænomen, & nomina utriusque Carpi quæ fuerint; imo neque hoc ipsum cognomen ejus qui fecit, fuisse Carpum. Fuisse enim dicere, spectato filii cognomine; si tamen is & filius, & Carpus fuit; sed cum versus initia desint; pro certo non scio, fueritne uterque Carpus, an Eucarpus. Nam & Eucarpus in marmoribus quæ Gruterus exhibet, plures leguntur. Quin ultimum quod in Meldulensi Arce spectavi, cæteris & grandius, & ornatius, ad Eucarpum attinet. Hæc enim habet,

D. M  
C. MARIO. EV  
CARPO. FECI  
T. CYPRESSEN  
A. SERVANDA. COIV

Nomen quidem *Servandæ* in lapidibus non semel legi; Cypressenæ vero non recordor. Est autem in hoc lapide non unum indicium jam inclinantium bonarum artium, ut litterarum forma, & magis ipsa; quam vides, earum distributio in marmoris mole alioquin, ut dixi, grandiori, sed cujus modica pars inscribendis verbis est data, multo maxima ornamentis, his quoque non satis affabre sculptis. Quæ tamen sint, dicam. In tympano, ut vocant, aves sunt duæ, an turtures? quarum altera demisso capite videtur pasci. Infra tympanum, ab singulis Inscriptionis lateribus singula prominent bovis, an capri cornuta capita. Ab his utrinque incipiens, magnus deorsum pendet; quasi ex hederæ foliis, baccisque lemniscus; quem inter, & Inscriptionem imaguncula apparet tanquam nudæ foemina in transversum porrectæ, quæ velum, desuper in transversum pariter ductum, ita manibus arripiat, ut velle caput operire videatur. Denique ad singulos inferiores marmoris angulos aves aliæ singulæ spectantur, superioribus majores, & quas, si ex rostro judices; de rapacium genere esse, credas.

II. Ex his omnibus quas descripsi, aut commemoravi, Inscriptionibus nullas pulchrioribus, meliusque distributis litteris esse, scias, quam ex descriptis Clodianam, ex commemoratis autem Valerianam, & quod ex Destimiana restat. Ne vero in his tanto post tempore tibi affirmandis falli possem, non tam memoria, adnotationesque fecerunt meæ ex quo primum inspexi, aut postea contuli, quam ejus quem tibi merito laudavi, & laudo, Meldulensis Medici Camilli Brunorii summa erga me humanitas, & incredibilis diligentia, qua, ut ante oculos habere etiamnum possem jam ab anno usque 1722. ita uti esse videram, & postea etiam vidi anno 1728. & 1733. descripta marmora hæc omnia, litterarum forma, & dispositione servata, & proprio cujusque loco, ac dimensionibus adjectis, ad me misit. Proximis Litteris e diverticulo, tibi, ut opinor, minime injucundo, in viam redibimus. Vale.

## EPISTOLA ÆMILIANA XIII.

Is quæ Roncho adjacent ab occidente sole, expeditis, priusquam ad ea aggrediar quæ ab oriente appositæ sunt, aliquid de nobili, quam illud denique flumen interfluit, pinea Silva attingendum est. Medicus Ravennas Thomajus (a) cum memorat, pulchram silvam duorum Pinetorum, an ad fluvium hunc, intercurrentem, eoque in duas dividentem, respexit? Qui cum interfluat a longo jam tempore Montono conjunctus; error irreperit, necesse est, in libros Geographi recentissimi, ubi Pinetum, inter duo flumina, videtur describi, Montonum videlicet, ac Ronchum; Nec leviter in eo quoque peccatum est, quod in Pineti descriptione, magnum esse tractum refertur, inter Ravennam, & Ferrariam, Morgagni Opusc.

„qui pinis totus confitus sit, idque admiratione magis dignum est, cum eodem in Opere Pinetum dicatur, ab Anemone ad Sapim usque fluvium extendi prope maris Adriatici littus; Quod aut verum, aut propemodum verum est. Namque & ante ostium Anemonis, ut nunc se habent res, incipit, & ultra Sapim ad tria passuum millia a Cluverio (b) producitur ad Templum usque vulgo propterea dictum *S. Maria del Pino*. Interea autem idem Cluverius ut a Classensi portu illuc usque Pinetum extendit, sic oblitus videtur alterius partis quæ ad Anemonem, aut ultra Anemonem pertinet, Paulumque Merulam (c) secutus, qui nemore hoc vastissimo, pinis miræ altitudinis frequenti, a Sapi Ravennam

K

(p) Commentar. cit. de Servis pag. 45. & 248. (q) Ibid. pag. 155. (a) Hist. di Ravenna P. I. c. 11.  
(b) Ital. Antiq. l. I. c. 28. (c) Cosmogr. c. 10. & 12.



nam versus descripto, semel, iterumque ad hunc modum pergit, *Extra Pinetum, Candiani Amnis, nunc Paludis, ostium sequitur.*

2. Pinetum olim tractum illum omnem, quem nunc, occupasse, nemo dixerit, qui Ravennam mare pervenisse, non ignoret. Eam tamen littoris partem, quæ hinc ultra Classensem portum, inde vero inter mare, & Augustam Fossam extendebatur, tenere potuisse, non inficiabitur. Ibi vero ab Romanis constitum fuisse (quæ nonnullorum opinio est) ut materiam construendis ad classem navigiis in promptu a posteris haberetur, a veri similitudine non adeo alienum est, ut Faventini putant Historici Kavina (d), & Tondutius (e). Nam quod Silius (f), qui sub Trajano vivebat, scripserit,

*undique solers*

*Arva coronantem nutrire Faventia pinum,  
de Ravenna autem*

*Quique gravi remo limosis segniter undis*

*Lenta paludosa perscindunt stagna Ravennæ;*

certe neque stagna ibi etiamtum fuisse, significat, ubi hinc & hinc propter littus pinos conseri potuisse, diximus, & ex proximo Faventino agro in quo arbores illæ frequentissimæ erant eo tempore, facultatem summam fuisse, indicat, accipiendi aut nuces pineas, quotquot vellent, aut teneras adhuc pinos, in idque littus transferendi. Huc adde rem Silium potuisse; ne dicam debuisse; spectare, non ut erat, cum scriberet, sed ut fuisse, audiverat, cum bellum Punicum secundum, cuius repræsentabat tempora, gereretur: nec denique (g) silentium ipsius, aut aliorum qui ante Odoacris, & Theoderici pugnas scripserunt, firmum apud Criticos argumentum esse, ut ea quæ illi reticuerint, putemus non extitisse. Quod si cum Odoacris, & Theoderici castra prope Ravennam posita memorantur, ibi Jordanes (h), Paulus Diaconus (i), ut plerique credunt, alique *Pineta*, aut *Pinetum* hoc fuisse tunc, scribunt, ea autem contigerunt ante finem sæculi V. nec potest, nisi longissimo tempore, ejusmodi pinea silva procrefcere; jam satis vides, num recte existimaverit Tondutius (k), Pinetum Ravennas adeo antiquum non esse, ut fuerit priusquam ethnici esse desinerent. Quod cum dico, non tamen judico, quid de Inscriptione censendum sit, vetusta, ut Rubeus (l) scribit, & Romæ effossa, qua *sylvam hanc Classis Ravennatis* Neptuno, & Isidi sacrasse, legebatur L. Antidius Ferox L. F. Præfectus illius Classis: multoque minus astipulor Vecchiazano (m), precariis rationibus statuenti, Ferocem illum, Olixæ Tertullæ Foropopiliensis maritum fuisse, primumque ei Classi Præfectum ab Augusto datum, Pinetum continuo sevisse. Sed ut hæc nullo certo fundamento sunt nixa; ita illud extra dubitationem positum est, ex quo Pinetum esse cœpit, viguisse adeo, ut quamvis anno 1224. quemadmodum tradit Rubeus (n), sive anno 1234. quemadmodum Clementinius (o), præ insolita immanique vi frigoristotum, aut maximam partem exaruerit; redivivum convaluerit postea, exindeque ad hoc usque tempus perennaverit.

3. Nunc age, ad ea transeamus quæ Ronchum flumen transgressis, & ad orientem solem pergentibus occurrunt, alterum in Æmilia via, alterum aliquanto superius, Forum Popilii, & Bertinorium. Abest utrumque ab Roncho illud ad millia passuum duo, hoc totidem, aut aliquanto amplius. Neque alius est amnis qui inter illa, & Livii Forum defluat præter Ronchum, qui ab hoc Foro, ut nosti, millia passuum distat duo. Ex his proclive est intelligere, quot errores in Tabulas plurium Geographorum irrepsent. Nam si Vir Cl. de l'Isle, ut in alia Epistola (p) adnotatum est, nullum omnino Ronchum, qui tamen non ita parvus est fluviu, delineavit; contra Ortelius (q), & Cluverius (r) pro uno duos amnes pinxerunt. Nam præter unum, qui ab oriente (id quod omnino falsum

est) Livii Forum perstringit, alter est apud Cluverium perstringens ab occidente Forum Popilii, apud Ortelium autem ab opposita plaga perstringens Bertinorium; Forum enim Popilii pingitur, si Superis placet, ultra Rubiconem. Cellarius (s) unum quidem proponit; sed non modo procul ab Apennino in planitie ortum, nostroque adsitum Foro ab oriente, Ravennæ autem ab occidente; sed ita ductum, ut Bertinorium medium ferme sit inter illum, & Sapim, Forum autem Popilii magis quidem ab hoc, quam ab illo, distitum; sed Ravennæ multo viciniu, quam Forum Livii. Quod minus in eo mirandum est, qui (t) ab hoc Foro docuit *ad mare vergere Forum Popilii*. Equidem in recenti Braschii Præfulis Tabula (u) viam Æmiliam video ab nostro Foro vergentem oblique mare versus secundum lineam quæ producta incideret propemodum in Cæsenatem portum, itaque Forum Popilii magis, quam Livii, & multo magis Cæsenam, quam Forum Popilii, mari vicinam delineari. Quin etiam alia in Tabula quæ præfixa est Dissertationi *de Italia medii ævi* pictum video *Forum Pupilli*; sic enim inscribitur; longe propius mare, quam Cæsenam, & quod non levius erratum est, in eadem in qua hanc, ripa Sapis orientali. Nos maris quidem littus quo longius ab nostro Foro pergitur Cæsenam versus, propius sensim fieri Apennini radicibus, non negamus sic, ut minus a mari Cæsenam distet, quam Forum Livii, sed & quam Popilii. Hæc tamen ita accipi, nolumus, quasi illa magis quam hæc Fora, in boream vergeret. Cum enim turrim quæ in urbe nostra omnium altissima est, aliquando conscendissemus, & hinc Forum Popilii, & Cæsenam, inde autem Faventiam spectaremus, perattente singulorum positum considerantes, in recta quidem eadem linea Faventiam, Forum Livii, ac Popilii esse, perspeximus, sic tamen ut Faventia magis in boream, Forum Livii magis in austrum, & vel hoc magis vergeret Forum Popilii, & aliquanto magis quam hoc, Cæsenam; ut si hanc ultimam urbem excipias, nostra observatio satis cum Cl. Viri de l'Isle delineatione (x) conveniat.

4. Et si Barbarus (y) asseverat, in bonis Plinii codicibus legi *Forum Pompilii*, in nonnullisque horum *Forum Popillii*, nec desunt qui, ut Ortelius (z), & Ferrarius (a), inter utrumque nomen ambigant; Blondus tamen in Historiis (b) scribere maluerat *Foropopilli*, & *Foropopilio*, & Sigonius (c) *Foro Popillii*, & Cluverius (d) denique, ac Cellarius (e) scripserunt *Forum Popilii*. Sed & ante hos duos Paulus Merula (f) eodem inclinare se, ostendit, idque ob vulgarem appellationem *Forlimpopoli*. Hanc autem multis jam sæculis alia præcesserat, quæ pariter ex Popilii potius quam Pompilii, corrupto nomine videtur initium duxisse, *Forum Populi*. Apud Clementinium (g) tam in Litteris Valentiniani A. 426. quam in Litteris Gregorii Magni A. 595. *Forumpopuli* memini legisse. Produci etiam possent Tabula Peutingeriana, & Iter Hierosolymitanum, in quibus *Foro populi* scriptum videmus, nisi cum Cluverio (h) dubitaremus, ea librorum esse peccata; nec mirum, cum in ipsis locorum intervallis designandis ibi apertissime erraverint. Quorum vel manifestior inscitia est in Ravennatis Anonymi Cosmographia, ubi (i) scripserunt, *Foro Corneli, Faventia, Forum Julii, Forum Populi, & desuper Befania, Cesina, & desuper Sesena, Monte Feletre, Orbino &c.* Ut enim Anonymus iste, quem Guidonem Blondus (k) alique nominant *Presbyterum Ravennatem*, se *idiotam* prædicet (l); tamen cum ibidem Ravennatem sedicat, quis censeat, ignorare potuisse proximæ urbis nomen haud esse *Forum Julii*, sed Forum Livii, aut scribere *Cesina* pro Cæsenam; & *Monte Feletre* pro Mons Feretranus; nisi malis, ibi rescriptum fuisse a quopiam italice *Monte Feltro*: quæ scripturæ menda tam certa miror, ne in recenti quidem Editione (m) fuisse notata. Quin etiam suspicor, illa *desuper Befania*, quam vocem ibi non intelligere me, fateor, & *desuper Sesena*, irrepsisse in textum ex libri

(d) Faventia Rediviva. (e) Hist. di Faenza, Prelud. (f) De Bello Punico l. 8. (g) Vid. Tonduz. Hist. P. 1. (h) Hist. de Reb. Ger. c. 57. (i) Hist. Miscel. l. 15. (k) P. 1. cit. (l) Hist. Raven. l. 3. (m) Hist. di Forlimpop. P. 1. l. 3. (n) Hist. cit. l. 6. (o) Raccolto Ist. di Rimini l. 4. (p) VIII. n. 11. (q) Tabula inscripta Italia Gallica. (r) Tabula quæ inter Ortelii Geogr. Vet. Tabulas Italianas representat. (s) Notit. Orb. Ant. Tabula inscr. Gallia Cisalpina (t) Ibid. l. 2. c. 9. n. 89. (u) De vero Rubic. c. 9. (x) Tab. inscr. l'italie. (y) Correst. Plin. (z) Thesaur. Geogr. (a) Lexic. Geogr. (b) Dec. 3. l. 1. (c) Hist. Bonon. l. 1. (d) Ital. Antiq. l. 1. c. 28. (e) n. 89. cit. (f) Cosmog. P. 2. l. 4. c. 12. (g) Raccolto Ist. di Rimini. l. 2. (h) c. 28. cit. (i) l. 4. n. 33. (k) Ital. Illustr. Reg. 1. (l) n. 31. (m) Lugd. Bat. 1722.



libri ora, in quam alii cautiore librarii, describentes, quid supra *Forum Populi*, & *Cesina* ab aliquo inter lineas scriptum esset, addita, ut hoc significarent, voce *desuper*, recte olim transtulissent. Sed si Presbyter is Ravennas IX. sæculo; nam alii VII. alii post IX. scripsisse, malunt; *Forum Populi*, quod superiores quoque fecisse, vidimus, non *Forum Popilii* nominabat; tanto magis laudandus in eo est Ravennas Abbas Agnellus, IX. sæculi scriptor, quod (n) inter Cæsenses, & Livienfes, *Popilienses viros* nominaverit, cives videlicet Fori non Pompilii, sed *Popilii*: quod Cl. Wesselingius (o) poterat ad hunc, quem produxit, Agnelli locum adnotare. Cæterum etsi non Agnellus dumtaxat, sed & Paulus Diaconus non ita multo antea, ut mox indicabitur (p), haud aliter locutus fuerat; sæculo tamen XII. ad consuetudinem redierant sæculi V. & VI. Itaque ipsa Ravennas Ecclesia, sicut in Documento est, quod in hoc Tabulario Monasterii S. Mercurialis servatur, ad annum spectante 1165. non *Popiliensis*, sed *Populiensis* scribebat, inter cæteros, qui aderant, vicinos Episcopos mentionem faciens *Henrici, Populiensis Ecclesie Episcopi*.

5. Fora alia simili, vel potius, si Cluverium (q) sequimur, eodem cognomento, longe alibi sita, occasionem Geographis, aliisque dedere hoc nostrum cum illis confundendi. Ortelius, qui in Thesauris, eorum plura commemoravit, antea in Synonymia Geographica hoc a Campano illo Halicarnassæi non discreverat. Sed in Thesauris *Foropopulienses*, tanquam Plinio dictos, memorat, & *Forum Populi numeratum a Frontino inter Colonias Romanas*, in eo laudandus, quod hoc, & illos ab iis sejunxit de quibus hic loquimur; secus in eo quod scripsit *Foropopulienses*, & *Forum Populi*. Ferrarius autem (r) cum bene scripserit *Populi Foropopulienses Plinio*, qui tamen haud satis scio, an eorum injiciat mentionem; se credere, ostendit, non alios esse, ac Popilienses nostros. Cujus in sententiam pedibus ivit nuperrime Cl. Geographus, sine ulla dubitatione affirmans, esse hoc *Forum Popilii*, quod non, men dederat *Populis Foropopuliensibus* Plinii. Forum autem illud Popilii, quod apud Frontinum legitur, ut dixi, corrupto vocabulo *Forum Populi*, neque a Cluverio aliud censetur, quam Campanum, de quo paulo ante indicatum est, ansam præbuit Vecchiazzano Popiliensium nostrorum Historico (s), non modo idem ac suum fuisse, credendi; verum insuper, ut id confirmaret, in apertissimum errorem labendi. Cum enim locum Frontini proferat in quo de Foro illo Populi locutus, *Pedes XV. limitibus Augusti* assignat, huc omnino pertinere censet marmor, quod apud suos extat ad Publici Palatii portam, sic inscriptum, ut ipse quidem refert,

M A T R I

I N F O R. P. X V.

I N A G R. P. X V.

Quæ cum legerem; continuo fensi, a sepulchrali Inscriptione, cujus ea verba pars olim fuissent, fucum homini esse factum, neque ad Forum, sed ad sepulchri frontem, id est ad proximam anteriorem aream, neque ad Matrem Magnam quam colerent Popilienses, sed ad ejus Matrem, qui posuerat, illa spectare. Itaque cum a Vincentio Galbanio, Cive, & Auditore olim meo studiosissimo, qui tunc ibi medicinam, merito conductus, faciebat, petiissem, ut marmor diligenter inspiceret; rescripsit is, quod expectabam, non IN FOR. legi; sed IN FRO. Vix rescripserat, cum in Kavina (t) locum incidi, ex quo cognovi, idem quod ego, ipsum quoque *diu suspicatum*, suis tandem oculis non aliter, quam Galbanus, *vidisse*.

6. A quo Popilio conditum fuerit hoc Forum, Sigonio ipso (u) fatente, incertum est. Qua autem amplitudine, quibusve ornamentis, magis procul dubio constaret, ni tantas clades semel, atque iterum perpeffum esset. Nam primum Grimoaldus *Forum Popilii* invadens, maxima strage facta, sic eandem urbem *Morgagni Opusc.*

dejecit, ut usque hodie paucissimi in ea commaneant habitatores. Verbis utor Pauli Diaconi (x), qui mortuus censetur extremo sæculo VIII. Ea autem clades illata fuerat anno 674. ut annos ipsos tercentum septuaginta urbs jacuerit in ruinis; si non nisi anno 1045. a Forolivienfibus instaurata est, ut in Patriæ nostræ Chronicis legitur, manu exaratis Alexandri Paduanii. Multo quidem breviori tempore iterum jacuit, cum excisa ab Ægidio Cardinali anno 1359. ab Sinibaldo Ordelaffo, Forolivii Domino, rursus ædificata est anno 1380. ut in iisdem habetur Chronicis. Sed nunquam tamen in pristinum decus est restituta. Nam neque sacrum recuperavit corpus S. Rufilli, primæ ejus Episcopi, quod anno 1367. e ruinis illis fuerat in urbem nostram translatus, neque Episcopalis sedis honorem, quæ, Ægidio jubente, Bertinorium traducta fuerat.

7. De Bertinorio igitur perperam hoc scripsit Cluverius (y), *episcopalis dignitas loci antiquitatem indicat*, mirum in eo qui dixerit, esse oppidum nunc episcopale. Nec tamen scite contra ejus antiquitatem prolata hæc sunt ab Liceto (z), *Forum Truentinorum, vulgo Bertinoro, tempestate Landini, castrum fuit, & observatu Leandri recens Urbis nomen assumpsit anno Domini MCCCCLXX. ab Ægidio Carilla &c. Nec exo Strabonis, aut Ptolemæi Truentinorum ulla mentio fuit.* Nam Plinius (a), qui ante Ptolemæum certe floruerat, in Regione hac nostra sic habet, *Forum Clodii, Livii, Popilii, Truentinorum, Cornelii.* Landinus autem, qui centum, aut eo amplius, annis scripsit postquam Bertinorium (id quod Licetus agnovit) Urbis nomen assumpserat, equidem nescio, quomodo illa sua loquendi ratione aptum præbere eodem Liceto argumentum potuerit. Ad paulo superiora sæcula redire oportebat. Sic enim apud Rubeum (b), exempli causa, Documentum repertum esset anno 1142. memorans *Castrum Britonarii*, anno autem 1052. Testamentum *Girardi Comitis Castri Britonarii*. Ex Britonorio deinde factum est *Brettinorium*, quamobrem Dantes (c), ut in vetustis ejus Editionibus, & manu exarato Codice vidimus, dixit, *O Brettinoro, & Bretenorium*, ut apud Blondum (d) est, & *Bretonorum*, ut apud Volaterranum (e). Nonnullis, ut Blondo, vetus nomen dici *Britanorum*, ajunt Paulus Merula (f), & Abrahamus Ortelius (g), suspicantes, ex vulgari appellatione latinam illos esse commentos. Ego vero, Blondum in Italia Illustrata (h) video scripsisse, a Plinio inter quatuor Fora cnumerari hoc *Forum Brintanorum*; non *Britanorum*; nam id nomen repetit ab Umbriæ apud Ravennam ultimo oppido, quod modo ab eodem Plinio *Brintum* vocatum esse, dixerat, *Brintum* autem illud *Forum Brintanorum*, hoc est Bertinorium, Plinio fuisse. Itaque apparet, optimum virum a pessimis Plinii codicibus esse deceptum, quod Ortelius quoque in verbo *Brintum* accidisse veretur. Mihi vero, quid imponere potuerit, cogitanti credibile fit, *Brintum* ibi in Blondi codice Pliniano per incuriam scriptum fuisse, ubi nunc legimus (i), *nec procul a mari, Umbrorum Butrium*, de quo inter Ravennam, & Spineticum Padi alveum agnoscendo Epistola alia (k) satis dictum est: ubi autem loco superius producto, cum Volaterrano, Leandro, (l), Ortelio (m), P. Merula (n), Cluverio (o), Liceto (p), Harduino (q) inter Fora illa alia *Forum* legimus *Truentinorum*, ibi a Blondo inventum esse *Brintanorum*. Quod quidem minus mirum est, quando non modo sub Blondi tempus Berlinghierius (r) idem ostendit, se invenisse; verum nostra quoque ætate non defuit qui in tribus codicibus, *Truentinorum* non invenit; sed *Brentanorum*. Nec vero inficias iverim, Plinium memorare *Forobrentanos*. Sed primum dixerim, id facere capite superiore 14. non hoc, de cujus agimus loco, 15. Deinde dixerim, Blondum ipsum non semper legisse *Brintanorum*; sed aliquando *Trienniorum*. Hæc enim habet Historiar. Dec. I. lib. I. *Estque is Pollentie vicus*

K 2

vicus

(n) Lib. Pontific. P. 2. c. 3. (o) in Not. ad Vet. Rom. Itiner. ubi de Irin. ab Urbe Mediolan. (p) n. 6.  
 (q) c. 28. cit. (r) Lexic. Geogr. (s) Hist. di Forlimpop. P. 1. l. 1. e La Verità difesa contra Bertinoro.  
 (t) Faventia Rediviva. (u) Hist. Bonon. l. 1. cit. (x) De Gestis Longobardor. (y) Ital. Antiq. l. 1. c. 28.  
 (z) Apolog. pro Cæsar. Antiqu. (a) Nat. Hist. l. 3. c. 15. (b) Hist. Raven. l. 5. (c) Purgat. c. 14.  
 (d) Ital. Illustr. Reg. 6. & Hist. Dec. 1. l. 1. & Dec. 3. l. 1. (e) Comment. Urb. l. 2. (f) Cosmogr. P. 2. c. 12.  
 (g) Thesaur. Geogr. (h) Reg. 6. cit. (i) c. 15. cit. (k) III. n. 12. (l) Descrip. di tutta Ital. Reg. 14.  
 (m) Thes. cit. (n) c. 12. cit. (o) c. 28. cit. (p) Apolog. cit. (q) in sua Plinii Edit.  
 (r) Geogr. in terza rima l. 3. c. 6.



*picus vetusto Trienniorum Foro, quod nunc dicitur Bretenorium, ad passus II. mill. propinquus. Utraque hac Blondi lectione Brintanorum, & Trienniorum mirifice abusus est Gaudentius Merula (f). Primum namque cum alteram Blondus in altero Opere secutus esset, ut Scriptori licet, tempore, & novis perquisitionibus interjectis, sententiam mutare; utramque Merula lectionem in uno eodemque Opere ita retinuit, ut summae aut inconstantiae, aut oblivionis notam effugere nequeat. Ad hæc utroque loco errores admisit non ferendos. Ubi enim scribit (t), In Apennini colle, Brintanorum Forum visitur: quod alii Forum Pompilii nominant, nunc Bretenorium vulgus appellat. --- Hanc novissime urbem Longobardi vastarunt; vides, ut Forum Pompilii, & Bertinorium non discernat. Quod cum hic vocet Forum Brintanorum; oblitus est sane, fuisse superius ab se scriptum (u), A Pollentia abest duob. fere mill. pass. vetustissimum Triennorum forum: quod hac ætate Bertinorium vocamus. Sed gravius in eo peccat, quod Pollentiam quam esse, fatetur, inter Alexandriam, & Astam, Bertinorio dicit esse vicinam; qui enim illud ajat; quonam is modo inducere in animum possit, non differre Pollentiam illam ab hoc vico, cujus nomen Blondo imposuerat? Est sane Bertinorio proximus collis, cujus summum reliquæ tenent oppidi olim exigui, quod Polentiam adhuc appellant, unde originem, nomenque traxere Polentani illi qui Ravennæ centum quinquaginta annos imperarunt. Sed quid hoc ad oppidum illud prope Tanarum amnem situm?*

8. Cæterum cum reliqui, a me supra (x) laudati sine ulla hæsitazione in Plinio legant *Trucentinorum*, cum iisque ita faciat Kavina (y), ut in cunctis quos inspexit, codicibus haud aliter ab se inventum affirmet; credibile est, in illa ipsa voce *Triennorum* vestigia latere corruptæ vocis legitimæ *Trucentinorum*. Sed Kavina, & Ferrarius (z), alius alia ratione adducti, non credunt tamen, Forum Trucentinorum esse Bertinorium. Et Kavina quidem hoc objicit, Trucentum a Plinio, non in hac nostra, sed in quinta Regione collocari. Quod non modo non negamus; sed ea insuper agnoscimus quæ Cluverius (a), & Harduinus (b) ex Epistola apud Ciceronem, Strabone, & Mela de castro memorant, aut oppido Trucentino. At Trucentinum tamen Forum, aut Forum Trucentinorum ibi non memorant. Quod si quis adhuc scrupulus restat, iis eximi facilius potest, qui ex vetusto lapide ab Ortelio, Paulo Merula, Cluverio, Harduino, ubi de Bertinorio hos agere diximus, commemorato, in quo legitur CUR. REIP. FORODR. non secus ac in altero PATR. MUNICIPIORUM FORODRUENT. &c. arguant cum Cellario (c) veriorum Trucentinorum, de quibus loquimur, orthographiam esse per D. qua ratione hos a Trucentinis illis Regionis quintæ satis differre, intelligatur. Quæres fortasse, ubi extet uterque lapis, suspicans, ad Trucentinos illos alios spectare, aut ad Forum aliquod propter flumen Druentiam situm, eoque dictum Druentinorum. Sed hanc secundam suspicionem deponito. Neuter enim lapis in Gallia est, neque Fori ullius eo nomine apud Druentiam notitiam habemus. Quin in quadam, ab eodem Cellario (d) indicata quæ ad Druentiam attinet, Inscriptione positum videmus PATRONO NAUTARUM DRUENTICORUM; non DRUENTINORUM. Cæterum alter lapis non ita diffusus erat a Bertinorio: alter, ut longe absit; tamen multo longius abest a Truento, quam a Bertinorio. Est Parmæ, & ad Parmensem quoque Coloniam spectat (e): Arimini autem extabat alter, simulque ad Arimini Coloniam atinebat, Vicosque ejus septem; aliud autem Coloniam Ariminensem fuisse, aliud Vicos eos septem, in quos distributam ipsam urbem fuisse Cluverius (f) credit, cum in agro potius aliis extitisse videantur, Inscriptio ista ipsa ostendit, Coloniam, Vicosque illos aperte distinguens Cur. Reip. Forodr. Patr. Col. Arim. Item que Vicanorum Vicorum VII. Aliter autem ac Kavina, ab iis quæ proposita sunt, dissentit Ferrarius

(g). Neque enim hic negat, Forum Trucentinorum in hac Regione extitisse; at ipsum fuisse Bertinorium, negat. Forum Trucentinorum, inquit, oppidum Æmiliæ excisum, apud Britinorium, & Forum Popilii, ab eo 3. mill. pass. distans, a Britinorio 1. Cujus locus adhuc Tro incolis nominatur. Equidem quo auctore hæc dicat, ignoro. Illud scio, partem illam agrorum, quam Tro appellant, ab Roncho fluvio non totos mille passus diffiram, nulla prorsus antiquitatis, aut ruinarum servare vestigia, nec antea, quod loci periti, interrogati a me, possent, ullum ejusmodi rerum indicium exhibuisse. Num igitur levissimæ isti suspitioni, quæ ab nomine Tro videtur pendere, multoque insuper levior sit, si ejus Fori nomen ab littera D, non T, incipiebat, tantum tribuimus, ut adversus notiorum plerorumque hominum Doctorum sententiam, in iis potius agris, quam in Bertinorio, vetus illud Forum agnoscamus? Certe nec Clarissimis Viris qui nuper Geographiam pertractantes, Ferrarii opinionem primo loco proposuerunt, huic assentiendum visum est, cum sententiam oppositam continuo subjicientes, nihil in utramlibet pronunciarint. Illi autem qui annis superioribus Italia Antiquæ Tabulam ediderunt, quid senserint, ex eorum quidem Tabula disci non potest, cum in iis sedibus nihil scripserint, in quorum alterutra Forum Trucentinorum, aut siquod aliud magis placebat, nomen fuerat adnotandum.

9. Non valde quidem vetus, sed vetus tamen ea videtur appellatio, quæ quo primum tempore, quo auctore, & qua de causa imposita Bertinorio fuerit, incertum est, Petra Honorii, quam Ferrarius (h), Baudrandus (i), ac his recentiores commemorant. Illud certum est, hoc Petra nomen tum olim, tum hac quoque ætate Viros cæteroquin Doctos in errorem gravissimum impulsisse. Leonardus Aretinus (\*) primus fuit qui Totilam scriberet Casenam, & Petram oppidum quod hodie corrupto in vulgus nomine Bertinorium appellant, obsidisse, nunquam scripturus, si Procopii integros codices nactus esset. Hunc enim potissimum Auctorem, quamvis eorum ex quibus sumpsit, dissimulaverit nomina, sibi describendum proposuisse, & res indicat, & æqualis Blondus (\*\*) confirmat: ex quo simul intelliges, non ex aliis ipsum quoque Blondum codicibus ea quæ ex Procopio in suas transtulit Historias, hausisse, mutilis videlicet supra quam possit is credere qui eorum libros cum Procopii integrioribus libris non contenderit, jam diu autem est ex quo Rhenanus (k), laudatusque ab hoc Egnatius suspicati erant, in manca Procopii græca exemplaria Interpretem Belli Gothici incidisse. Aretinus igitur cum illud quidem sciret, quod est ex Procopio (l) Totilam Casenam, ac Petram castella cepisse; quæ autem alibi de hac Petra Auctor scripsisset, ignoraret; illa duo, ut simul nominantur, inter se proxima fuisse, credens, Bertinorium, Casenæ vicinum, Petram fuisse, eo facilius existimavit, quod illud Petra Honorii nomine vocari, sciret. Sed Procopius; ut alia præteream; jam antea (m) suam illam Petram ita descripserat, ut nemini cui Bertinorii natura, & sedes paululum modo sint cognita, venire unquam possit in mentem, eam Bertinorio descriptionem convenire. Petra enim proxima via admodum præceps, a dextera alluebatur fluvio ita rapido, ut eum nemo transire posset; a leva vicinam habebat rupem præruptam, editamque adeo, ut si qui forte in vertice stetissent, iis qui ab imo suspicerent, non excedere viderentur minutissimarum avium magnitudinem, Bertinorio autem proxima via neque præceps est, neque habet imminentem altissimam rupem, eamque præruptam, neque alluitur altera ex parte fluvio ullo, nedum ita rapido, ut eum transire possit nemo. Nam etsi non prorsus vera sint quæ recentissimi scripsere Geographi, situm esse Bertinorium, apud parvum Ronchi amnem; neque enim angustus est Ronchi alveus; tamen rapidus non est fluvius, nec, nisi cum aquis præter consuetudinem tumet, perfacile transiri a quovis pedite non potest; & quod maxime attendendum est, a Bertinorio abest ad duo passuum milia,

(f) De Gallor. Cisalp. Antiqu. (t) l. 2. c. 18. (u) l. 1. c. 2. (x) n. 7. (y) Faventia Rediv.  
(z) Lexic. Geogr. (a) Ital. Antiqu. l. 1. c. 11. (b) ad id Plinii caput. (c) Notit. Orbis Antiqu. l. 2. c. 9. n. 89.  
(d) Ibid. (e) Vid. Cluver, Ital. Ant. l. 1. c. 28. (f) l. 2. c. 5. (g) (h) (i) Lexic. Geogr.  
(\*) De Bello Ital. adv. Goth. l. 3. (\*\*) Histor. Dec. 1. l. 4. (k) Præfat. ad Procop. Edit. Basil. 1531.  
(l) De Bello Gotthico l. 3. c. 6. (m) l. 2. c. 11.



lia, aut certe non multo minus, ab eoque tum val-  
le, per quam Avesa fertur parvus torrens, & sæpe  
siccus, tum collibus fructiferis qui eam claudunt val-  
lem, separatur; tantum abest, ut quod Procopius ad-  
dit de sua Petra, prærupta illa altissima rupes *ad ipsum*  
*unquam pertigerit fluminis alveum*. Huc illud accedit,  
quod Petra erat *in Piceno*, interque Ariminum, &  
Romam, ut recensita a Procopio exercituum ostendunt  
itineraria; Bertinorium autem nec in Piceno, & citra  
Ariminum, imo citra Cæsenam est, quippe cum in  
monte sit ad austrum Foro Popilii, huicque propemo-  
dum respondens intervallo passuum bis mille; ut me-  
lius scripserit Cluverius ( *n* ), *haud procul esse a Fo-*  
*ro Popilii versus meridiem*, quam Cellarius ( *o* ) *inter*  
*Cæsenam, & Forum Popilii in occasum vergere*.

10. Quæ de Bertinorio cum ignorare pleraque ob  
vicinitatem non posset Scipio Claramontius; mirum  
est, ipsum quoque ( *p* ) tradidisse, scribere Procopium,  
Cæsenam, & Petram ( *nunc Bertinoro* ) *loca munita*  
*capta*. Sed fortasse ne hic quidem illius Petre des-  
criptionem viderat, aut non diligenter attenderat. At  
Dissertationis Auctor de Italia mediæ ævi quomodo ex-  
cusari possit, non video. Qui de Petra Honorii, *Le-*  
*xicographis Bertinoro*, verba faciens, ( *q* ) hæc ha-  
bet, *exacte describit hunc locum Petre Procopius B.*  
*Goth. l. 2. cap. 11. sub finem*. Quid? quod in ea Pro-  
copii descriptione illud additur quod satis esse debue-  
rat omnibus qui illam perpendere, non modo ne  
Bertinorium describi crederent, verumetiam ut quilo-  
cus revera describeretur, continuo intelligerent. Per  
viam, Petre proximam, *progredienti*, inquit Proco-  
pius, *nullus olim patebat transitus; quoniam extrema*  
*rupes ad ipsum pertinebat fluminis alveum, eo dedu-*  
*ctis impervia*. Quare Veteres, ea ibi perfossa, exiguam  
portam moliti sunt, &c. Sane cum hæc primum legi;  
de Forulo, idest ut nunc loquuntur, *del Furlo* hæc  
verba statim accepi, loco ob viam per saxum mon-  
tem scalpris apertam, a tot Auctoribus memorato,  
quorum nomina, & locos Cluverius ( *r* ) ea diligen-  
tia protulit, ut Cellario, aliisque insequentibus fere  
describendi potius, quam quidquam addendi facultatem  
reliquerit. Idem *mensuras Operis*, Vespasiano digni,  
& alteram de duabus quæ ibi olim fuerant, Inscriptio-  
nibus adhuc superstitem satis accurate protulit, unde  
intelligitur, quo tempore is Imperator rupem exca-  
vandam curaverit, si tertium videlicet Inscriptio-  
nis versum perpendamus; nam quod nonnulli quartum at-  
tendentes, id curasse, ajunt, dum esset Censor, nihi-  
lo plus docent, quam si ex secundo versu dicerent,

dum esset Pontifex Maximus. Utraque enim hæc di-  
gnitas, ut probe nosti, ex quo Augusti nomen, ac  
jus quis habebat, in omnes quoad viveret, annos per-  
stabat. Denique idem Cluverius vetera ejusdem loci  
vocabula non reticuerat, nempe *Intercisa*, id est Saxa,  
& *Petra Pertusa* ex re ipsa, & operis difficultate im-  
posita, non sine maximis impendiis in publicum com-  
modum perfecti; ut pro dignitate non respondeat re-  
centissima Foruli descriptio, antiquus Italiæ locus in  
,, Urbini Ducatu Foruli conspicitur profunda caverna  
,, in saxo excisa. ,, Sed ad Procopium ut redeam,  
quem merito inter Veteres, qui Petram hanc celebra-  
runt, Cluverius, & cæteri ponunt; ne scrupulus ul-  
lus vel tenuissimus restitet, num hanc designaverit:  
minime reticendum est, cum eam nominavit libro quar-  
to ( *f* ), ipso *Petre Pertuse* nomine usum esse; nam  
*Πέτρας τῆς Περτῆς καλεµένης* scripsit. Quæ cum ita sint;  
permirum est, Paulum Merulam ( *t* ), & Ortelium  
( *u* ) quid de Procopii Petra Leonardo Aretino visum  
sit, retulisse, neque tamen refutasse, cum Bertinorium  
scirent non esse *in Piceno*, ubi contra esse *Petram Per-*  
*tusam*, ignorare non poterant, quod neque Auctor  
Dissertationis de Italia mediæ ævi ignorabat.

11. Hæc cum scripsissem, & forte versarem Fori  
Popilii Historiam, a Matthæo Vecchiazzano italice  
scriptam, ubi minus putabam, ibi ( *x* ) inveni, fuisse  
qui ante me hunc sibi laborem sumpserit. Is fuit  
Bernardinus Baldus, cujus etsi ego librum in quo id  
agat, non legi; tamen ea inde Vecchiazzanus profert,  
ut credere debeam: nec me pœnitet hæc ad te fusius  
scripsisse, tum quia eo Baldi libro te quoque carere  
scio, tum quia Baldi labore perfici potuisse, non vi-  
deo, ne iterum nostra ætate id erroris in scripta irre-  
peret hominum Eruditorum. Quibus si forte ex eo  
fucus esset factus, quod ut Procopianum Petre castel-  
lum fuisse sciebant permunitum, ita Bertinorii arcem  
legissent fuisse munitissimam; nullo negotio eam sibi  
poterant hallucinationem discutere quærendo, num  
arx illa extaret Procopii tempore. Invenissent enim ex  
nostratibus qui referrent id quod ego ex Foroliviensi-  
bus Chronicis didici Alexandri Paduanii, Almericum,  
Romandiolæ pro Romana Ecclesia Comitem, anno  
,, 1319. ædificasse admirabilem Bertinorii arcem,, ad-  
mirabilem quidem iis temporibus; his enim nostris  
scribi, miramur, Bertinorium,, Urbem esse cum Arce  
,, bona,, quando hæc ne muro quidem undique cin-  
gitur, & jam diu est ex quo, arcis nomine non usu,  
servato, in Episcopi Aedes conversa est. Vale.

## EPISTOLA ÆMILIANA XIV.

A Spinetico Padi alveo ad Senium; Anemonem;  
Bedesim, & Vitim progressis, iisque urbibus, ac  
oppidis quæ singulis illis fluviis appolita, aut interje-  
cta sunt, quo ad propositi nostri fuit, peragratis,  
unus restat Sapis, ad cujus utrumque latus cum posi-  
tas urbes spectaverimus, scribendi finem faciemus.

2. Ad illud igitur Sapis fluminis latus quod Vitim,  
sive occidentem solem respicit, urbs locata est exigua  
nunc, & infrequens, temporibus autem antiquissimis  
ampla, & civibus abundans Sarsina, ut longo tractu  
latus fluminis utrumque occuparet, quemadmodum ex  
ædificiis, ruderibus, & inter hæc obrutis marmoribus  
intelligi, docuit Antoninius ( *a* ). Cum sit inter mon-  
tes posita haud multo distans ab summo Apennini ver-  
tice; mirum est, apud Geographos recentissimos legi,  
urbem hanc,, ad pedem esse Apennini, & milliariis  
,, aliquot ab Arimino distare,, maritima urbe, &  
*Morgagni Opusc.*

longo præterea millium passuum quinque circiter &  
viginti intervallo non modo in septemtriones, sed  
etiam ad orientem solem disjuncta a Sarsina: quam  
ibidem miror, semel atque iterum *Sarcinam* dici,  
quasi hoc tempore sic vocaremus, quo certe ab no-  
stratum nemine aliter quam *Sarsina* appellatur; ut  
neque alteri eximio Viro relata fuerint veriora, scri-  
benti, *nunc etiam Sassinam* nominari. Antiquissimis  
sane temporibus hoc erat verum hujus urbis nomen,  
ut tot marmora & ibi eruta, & alibi extantia  
præclare docent, Capitolina præsertim, apud An-  
toninium, & Geographos eruditiores videnda,  
quæ triumphos memorant *de Sassinatibus*. Neque  
enim in marmoribus ita corrumpi scriptura po-  
tuit, ut in Græcorum, Latinorumque codici-  
bus, Polybii dico, & Strabonis, tum Plauti,  
Plinii, Silii, Martialis, Festi, quorum loci cum apud  
K 3 Geo-

( *n* ) c. 28. cit. ( *o* ) n. 89. cit. ( *p* ) Cæs. Hist. l. 4. ( *q* ) Sect. 16. ( *r* ) Ital. Ant. l. 2. c. 5.  
( *f* ) c. 28. ( *t* ) Cosmog. p. 2. l. 4. c. 12. ( *u* ) Synonym. & Thesaur. Geograph. ( *x* ) l. 5.  
( *a* ) Delle Antich. di Sarsina Disc. 1. c. 1.



Geographos eosdem occurrant, non est cur hic a me repetantur. Scilicet postquam accidit Sassinæ idem quod Massiliæ nomini, ut pro prima S littera poneretur R, uti Marfiliam, ita & Sarlinam dicere homines assueverunt adeo, ut librarii quoque ipsi crederent quasi errorem in codicibus emendare, si pro *Sassina* scriberent *Sarsina*. Quod tamen ut in uno quidem epigrammate (b) Martialis fecerint; in altero (c) facere obliti sunt; certe editio quæ in manibus est, veterem scripturam servat, quam planissime in meo quoque, antiqua manu exarato, codice reperio, *sassinæ de silva*; in illo autem alio loco idem codex scriptum habet *saxcina*, qua de scriptura mox dicam. Interim enim satis est, ut vel hinc arguas, quam parum hic liceat codicibus fidere, cum unus idemque codex in eodem vocabulo inconstans sit. Nec dicas, marmorum quoque scripturam esse inconstantem, illud mihi obiciens quod a Geographis memoratum videris, in quo legitur CVRATORI SARSINATIVM. Si enim idem, ut puto, est quod, cum sermo esset de Solonatis, alia tibi Epistola (d) exhibui, indicans, a quibus fuerit, & qua diligentia descriptum; fac relegas, & SASSINATIVM invenies; non SARSINATIVM. Fuit & tempus inter hujus nostri Italici sermonis initia, cum existimantes nostrates populi, nomen Sassinæ a saxeis in quibus illa est locis fuisse deductum, quæ *sassi* appellamus, facile in temporum eorum tenebris *Saxenam* dicendam esse, putarunt, aut *Saxinam*. Et *Saxenatis* quidem, aut *Saxxenatis* exempla in Documentis, & Sigillis apud Antoninium habentur ab XI. sæculi initio ad initium sæculi XV: *Saxinæ* autem in vetusta Historiarum Blondi (e) Editione est, ubi *Saxinam* legimus *Plauti Comici patriam*, *Forolivii ad sextumdecimum lapidem vicinam*. Cum enim Blondus in Sarlinæ scribendo nomine antiqua marmora sequeretur, quod locus ostendit *Italix* ab ipso *Illustrata* (f), quo loco inter oppida *vetusti Patriæ nostræ agri*, *jus a Forolivensi Prætoris patrum suorum memoria petere soliti*, ponit *Sassinam*; typographi hanc in Blondi Historiis vocem ab se emendari crediderunt *Saxinam* scribendo. Itaque proclive jam est intelligere, cur in altero illo Martialis loco meus quidem codex eam habeat scripturam quæ ad hanc accedit, *Saxcina*. Sed de vero, & antiquissimo hujus urbis nomine, quam Sarlinam usitato nunc more in hac Epistola vocare pergemus, nihil addendum superesset, nisi de illius, & quarundam aliarum ejus appellationum origine aliquid, ut opinor, hic expectares.

3. *Sassinæ* igitur vocabuli originem ab Umbris, an a Gallis repetendam putabimus? In eum enim tractum, ut multo inferius quoque, se extenderant Umbri priusquam a Gallis pellerentur: qui tractus ad eosdem illos rursus attinuit postquam hi a Romanis expulsi sunt. Itaque S. Hieronymus (g) ad Olympiadem 145. hæc scripsit, *Plautus ex Umbria Sarlinas Romæ moritur*. Quin etiam Festus (h), *Poeta Accius, quia Umber Sarlinas erat, a pedum planitie initio Plotus, postea Plautus est dictus*. Mitto Plauti ipsius jocus in Mostellaria (i), quo ad Patriam respexisse videtur suam, & quæ dicimus, confirmasse, quando hæc omnia, ut Martialis quoque, & Siliii versus, & Strabonis locus Sarlinam Umbris diserte tribuentis, notissima sunt. Ab Umbris igitur potius, quippe eum tractum prius, & diutius incolentibus, sic eam urbem appellatam crediderim, quam a Gallis, quos in Italiam transgressos, Polybius (k) tradidit, *habitavisse vicatim sine muris*. De duobus autem nominibus quæ eidem tractui constat fuisse imposita, *Bobium* videlicet, & *Sapinia Tribus*, si primum diceres a Boiis Gallis aut datum, aut postea deductum; non unum conjecturæ, qualis ea cunque sit, laudare posset auctorem, Blondum puta, Leandrum, Antoninum, alios, quibus ea scriptura favet, qua Blondus ipse, & nostrates alii olim utebantur, nimirum *Boi-*

*bi*; sic enim in Chronicis quoque, nec semel, legi, Alexandri Paduanii manu scriptis, sive ubi inter multa loca, Forolivienfibus quondam subjecta, recenset *Sarsina, S. Arcangelo, il Boibo*, sive ubi ad annum 1433. mentionem injicit *d' un castelletto in Boibo, chiamato Turrite*.

4. Num ergo aliud, inquis, Sarlinæ erat, aliud Bobium? Utique; sed non secus ac aliud pars est, aliud totum. Indicavit id Blondus, cum scripsit (l), *Fuerunt quoque oppida Boibi numero ad viginti a Boiis olim dicta, quorum Sarlinæ, Plauti patria, est caput*. Secuti sunt Antoninius, alique, & in his Archiepiscopus Nisibenus Jo. Baptista Braschius (m), cujus, ut proximi, quippe Cæsenaensis, & nuper scribentis, verba hic proferenda sunt. *Eum regionis tractum*, qui, ut ante dixerat, Sapi interfecante, plusquam centum castra complectitur, in circuitu Sarlinæ posita, *eum igitur tractum, una cum civitate Sarlinæ nunc vulgo Bobium vocant, tamquam Bojum, seu Bojorum agrum*. Sed pluribus negotium facessunt Litteræ illæ Caroli Magni, a Rubeo (n) productæ, in quibus Episcopatus *Sarsenæ, Bobii, Cæsenaensis* memorantur; ut Sarlinæ non posse accipi pro Bobii parte videatur: itaque Rubeus (\*) extare modo Bobium, negavit, propterea a Cæsare Clementinio (o) redargutus, qui Bobium idem ac Sarlinam esse, non dubitans, haud multum Litteris illis tribuebat. Quas alios quoque nuper legi qui spurias esse, suspicarentur, judicium tamen cohibentes donec Antoninum quem necdum reperire potuerant, tandem invenirent; erat enim priusquam Lugduni Batavorum recederetur, ejus liber rarior, ut ne Sertorius quidem Ursatus (p) apud se haberet. Verum Antoninius pariter legitimas credidisse non videtur, minime alioquin dissimulaturus; neque enim credibile est, Rubeum, alicubi certe ab ipso laudatum, non perlegisse qui in urbe haud adeo distita paucis ante lustris Historias scripserat, ad nostram omnem Regionem, & quod consequitur, ad Antoninii quoque propositum attinentes. Nisi igitur spurias credis has Litteras; at mecum saltem suspicare, vocem illam *Sarsenæ* ex ora irrepsisse, in qua tunc addita fuerit, cum Bobio alteri quod in finibus est Insubriæ, & Liguriæ, Episcopus datus est, poteratque ideo alterum pro altero ab iis qui legerent, perperam accipi. Vetustiore autem ævo cum id accidere non posset; qui Sarlinæ erat Episcopus, is sæpe *Bobienfis*, aut Bobii dicebatur Episcopus, ut ex nominibus apparet quæ Romanis adscripta sunt Synodis apud Cl. Auctorem legenda Dissertationis de Italia mediæ ævi (q), qui Acta quoque memorat S. Vicinii, Bobii Episcopi, cujus reliquias scimus Sarlinæ coli, docentia, tempore S. Silvestri PP. venisse *ad Urbem Sassinatam, vulgo Bobium vocatam*, quippe, ut paulo ante cum Blondo explicavimus, Bobii caput. Nec reticet Laurentium, cujus nomen in Synodis Romanis V. & VI. sub Pontifice Symmacho coactis legitur, ut *Episcopi Bobienfis*, in I. sub eodem Pontifice legi, ut *Bojanensis*, creditque propterea, Bobium vocatum etiam esse *Bojanum*: quod si ponis; illam quæ de origine vocis Bobii supra (r) indicata est, conjecturam magis aliquanto comprobabis. Sed de altero etiam illo nomine, id est *Tribus Sapiniæ*, aliquid attingamus.

5. Braschius Archiepiscopus, de quo paulo supra dictum est, Sarlinæ Episcopos, scribit, (s) fuisse olim non modo *Bobienfes*, verum etiam interdum *Sapinenfes* appellatos, ut Joannes ille Episcopus *Sapinenfis*, quem a Luitprando, ait, Hist. l. 6. c. 6. memorari in conventu Vaticano. Nec dubitat quin Sapinenfis diceretur a Tribu Sapiniæ, quo tractu *Diaecesis Sarlinas, & Comitatus Bobii* continetur. Sapiniam autem ab interfluente Sapi flumine dictam esse, vix quenquam reperi qui negaret. Quo posito, cum evidens sit, Sapiniam, non *Sappiniam* esse scribendum; evidens quoque est, attinere huc non posse, ut nostra-

(b) 59. l. IX. (c) 57. l. III. (d) VIII. n. 9. (e) Dec. 3. l. 1. (f) Reg. 6. (g) Chronic. (h) De verbor. signific. l. 14. (i) Act. 3. Sc. 2. v. 83. (k) Historiar. l. 2. (l) Hist. Dec. 2. l. 1. (m) De vero Rubicone c. 30. n. 7. (n) Hist. Raven. l. 5. (\*) Ibid. l. 3. (o) Racc. Ist. di Rimini l. 2. (p) Epist. ad Tondutium in hujus Breviario Favent. Hist. (q) Sect. 16. n. 82. (r) n. 3. (s) c. cit. 30. n. 8.



nostratum aliquis censuit, fragmentum lapidis haud ita procul Foro Livii repertum, & sic, ut ille quidem edidit, inscriptum

BONO

C. SAPPINIVS C. LI.....  
SAPPINIO FAVSTINO.....

An vero alter attineat lapis quem ex Fabretto producit Braschius ( *t* ), bis habentem L. F. SAPINA, secundum quam scripturam intelligis, potuisse *Sapinensem*, ut modo retulimus, Episcopum scribi pro Sapienensi, malim, te inquirere, quam ipse constituere, ne controversia implicet, in qua Eruditorum alii Tribum istam fuisse, scripserunt, unam ex 120. Tribubus Gallorum Bojorum; alii autem, qui multo plures sunt, inter Romanas Tribus referendam esse, existimarunt, quæ aut nomen postea mutaverint, aut non uno appellarentur nomine, aut ad ferenda suffragia simul cum aliqua magis notarum admitterentur. Igitur cum pro ea Tribu intelligi possint tam populi, qui ab Silio sunt secundo loco designati ( *u* )

*cavis venientes montibus Umbri.*

Hos *Æsis*, *Sapisque lavant*, quam tractus ipse quem incolebant; hunc mihi scire satis est a Priscis Scriptoribus Sapiiniam Tribum fuisse vocatum. Sic Livius ( *x* ), P. Ælius Consul in Gallia C. Oppium præfectum *tumultuaria manu per Umbriam* ( *quam Tribum Sapiiniam vocant* ) agrum Bojorum invadere iussit. Sic idem ( *y* ), L. Furius Purpureo Consul *per Tribum Sapiiniam in Bojos venit*. Sed hæc alias quoque ( *z* ) cum ageretur de Castro Mutilo, memoravimus. A Sapiinia autem Tribu nomen accepisse castrum quod in agro Sarfinate vocant *Sapigno*, Sarfinæ ipsi quam proximum, eique, interfluente Sapi, respondens, suspicatus est Antoninus ( *a* ), quem alii deinceps secuti sunt. Erat Antoninus Sarfinas, in eaque urbe Episcopi vice functus erat, & cum ea scriberet, duodecim jam annos peculiariter illi eidem castrum, quod *Sapinium*, inquit, dicunt, in Sacris præfuerat. Ex Collectaneis autem Cæsena-ribus, Antonii Ragonesii manu scriptis, ut Cæsena portam in colle Garampæ fuisse, didici, quæ vocabatur *di Sapigni*; sic an inde illi impositum esset id nomen, quod Sapinium spectaret, illucque duceret, quæri posse, credo: certe ab eodem Sapis latere a quo superius Sapinium, inferius Cæsena posita est. Quæ de urbe nunc pauca dicam.

6. Abrahamus Ortelius ( *b* ) tametsi ipse *Cæsena* scribit, & græce καίσαρα; admonet tamen, docere Aldum, *Cæsenam* esse scribendum, quin etiam ( *c* ) antiquum ibi marmor extitisse, in quo *Cesena* legebatur. Docti autem Viri Cæsena-tes Claramontius, Faccinus Brixii interpres, & qui sub Elchrei Dinundæ anagrammate latere voluit, Amicus, & Collega meus desideratissimus Hercules Dandinus summo omnes consensu Aldi orthographiam sequuntur. Cur autem Cæsena dicta sit, fuisse scio qui existimaverint ( *d* ), quod *exiguo intus amne cæsa, hoc est divisa sit*: & sane torrente intercisa est quem *Cesola* vocant, parvo quidem, sed tanta aliquando aquarum copia tumido, ut exundans, magna, nec semel, attulerit detrimenta, quemadmodum ab Ragonesio ( *e* ) memoriæ mandatum est. Verum cum Cæsena vocabulum antiquum sit, ut apud Q. Ciceronem ( *f* ) occurrat, Cæsena autem primis temporibus, quemadmodum ex vetustis Annalibus proclive est intelligere, in colle Garampæ sita fuerit, ut torrente illo interscindi non posset; apparet, nomen Cæsena aliunde esse repetendum. Quod vero Paulus Merula ( *g* ) urbem hanc, scribit, *hodie plerisque Cæsena dici, aliis Cesnadigo, tertiis denique Cesnam dissyllabicis*; nempe hæc omnia sunt ex Ortelio ( *h* ), qui cum addit, tertiam hanc apud accolæ appellationem se non semel ipso in loco observasse; inde facile deceptus videtur, quod *Cesna* dici

debere, non dubitaret ab iis quos *Cesnadigo* dicentes audiret. Sed ut hoc vulgo, sic illud ab accolarum nemine pronunciatum audiri unquam: neque tamen vox *Cesnadigo* urbem, ut ipse tradidit, sed vicum procul ad mare diffitum illis significat, de quo postea. Nunc ad veteres Cæsena-tes appellationes redeamus.

7. *Curvam Cæsena* ad sæculum usque XII. vocatam esse, ex Vita liquet Sancti ejus Episcopi Mauri, si hanc cum Claramontio ( *i* ) tribuamus Sancto Petro Damiani. Idemque in usu fuisse IX. sæculo, ex Agnello nos alibi ( *k* ) memoravimus. Fuitque etiam sæculo VI. si prisco Auctori credimus Vitæ Sancti alterius Episcopi Cæsena-tes Severi, quam produxit Claramontius ( *l* ). Constaretque, sæculo quoque II. eam usitatam fuisse appellationem, si Itinerarium quod Antonino Augusto tribui solet, ejusdem esse, aut interpolatum non fuisse, certum esset. In eo enim ( *m* ), ut in Peutingeriana etiam Tabula, *Curvam* legimus *Cæsena*. Hanc tamen appellationem ex quo institui cœpisse, ponunt, neque omnibus, nec semper in usu fuisse, manifestum est sive Procopium ( *n* ), sive illud ipsum quod modo diximus, Itinerarium ( *o* ) versantibus. Unde autem ista petita sit appellatio, cum ignorare se, fateantur Cluverius ( *p* ), & Cellarius ( *q* ); Cæsena-ribus quos supra laudavimus, visum est, ab suæ urbis situ, adstipulante Fortunio Liceto ( *r* ), præmonstrante autem quadantenus Dante ( *s* ), cujus de ipsa versum latine sic reddidit Faccinus,

*Ut pars illius jacet, ac pars surgit in altum.*

Nimirum ut nunc civium paucissimi Garampæ montem incolunt, cæterorum domus in adsita planitie sunt; ita olim hanc, illumque occupabant, ut tota urbs *curvam*, gibbamve referret formam: ex qua Dandinus ( *t* ) Sidonii jocum interpretabatur, Candidianum vocantis ( *u* ) *Cæsena-tes furni potius, quam oppidi, vernam*. In eandem causam nominis *Curva*, in eandemque joci Sidonii interpretationem videbis incidisse postea Cl. Wesselingium ( *x* ). Quæ ut ego non improbem; haud satis tamen intelligo, cur epitheton istud *Curva* ad Cæsena-tes appellationem addere necesse fuerit. Nam & aliæ urbes, ad eundem, aliumve modum *curvæ*, non propterea isto nominis additamento in communi quidem sermone auctæ sunt. Sic Brundisium, quo exemplo utitur Wesselingius, a poeta quidem Lucano ( *y* ) dici potuit *curvum*,

*curvique tenens Minoia tella*

*Brundisi*;

neque tamen in Itinerariis; aliisve ejusmodi Scriptis *Curvi* appellatione designatum est: & simplici Cæsena nomine tum antea apud Q. Ciceronem, Strabonem, Plinium, aliosque etiam postquam *Curva* dici cœpta erat, certe non secus ac modo, satis Cæsena intelligebatur. Recentissimis autem Geographis venit in mentem suspicari, pro una quam modo videmus, duas olim inter se proximas fuisse Cæsenas, veterem nimirum, & novam, quarum ut alteram ab altera distinguere, eam quæ curva forma esset, *Curvam Cæsena* vocasse. Quam suspicionem confirmari putant Anonymi Ravennatis Cosmographia ( *z* ), ubi nunc legitur *Cesina*, & *desuper Sesena*, illam in planitie, hanc autem in monte positam intelligentes. Verum & superiore Epistola ( *a* ) indicatum est, videri istum Anonymi locum ab librariis vitiatum esse, interlineare glossema in textum, ut sæpius solebant facere, inferentibus, neque in Cæsena-tem recentibus Scriptis, aut vetustis, quæ versavi, Collectaneis ullum extat indicium, duas unquam fuisse Cæsenas, cum eadem urbs & colli, & planitie insidens agnoscat: ne illud quoque dicam, etsi duæ fuissent urbes; non tamen fuisse necessarium in Itinerariis alteram ab altera distinguere, cum intervalla, quorum designandorum causa ii libelli instituti sunt, eadem futura fuissent inter Cæsena-tem, urbesque ipsi proximas, sive illa una esset, sive

( *t* ) Ibid. n. 5. ( *u* ) De Bello Punic. l. 2. v. 449. ( *x* ) Hist. l. 31. ( *y* ) l. 33. ( *z* ) Epist. VIII. n. 7.

( *a* ) Disc. cit. l. c. 2. ( *b* ) Synonym. Geogr. ( *c* ) Thesaur. Geogr. ( *d* ) Vid. Sipontin. Cornucop.

( *e* ) Collectan. M. S. ( *f* ) l. Epist. 16. ( *g* ) Cosmograph. P. 2. l. 4. c. 12.

( *h* ) Vid. cit. Synonym. & Thesaur. ( *i* ) Hist. Cæsena. l. 4. ( *k* ) Epist. VII. n. 5.

( *l* ) in fin. cit. l. 4. ( *m* ) Iter ab Arimino Derton. ( *n* ) De Bello Gotth. l. 3. c. 6. ( *o* ) Iter a Mediol. per Picen.

( *p* ) Ital. Ant. l. 1. c. 28. ( *q* ) Norit. Orb. Ant. l. 2. c. 9. n. 89. ( *r* ) Apolog. pro Cæsena. Antiq. ( *s* ) Inf. C. 27.

( *t* ) Adnot. XI. in Brixii Descript. Cæsena. ( *u* ) l. 1. Epist. 8. ( *x* ) Adnot. ad Itiner. Antonin. loc. cit.

( *y* ) Pharsal. l. 5. v. 406. ( *z* ) l. 4. c. 33. ( *a* ) n. 4.



sive duplex, sed altera alteri adeo propinqua. Quod sicui forte placeat Curvæ epitheton Cæsena datum conjicere, ut a Cæsena altera distingueretur, non propinqua, sed in longe diffita alia aliqua regione posita; is non modo indicare debet ubi extiterit, sed etiam secum reputare, tractum ipsum per quem iter quodque conficiendum proponitur, satis per se docere, non posse ibi urbem intelligi, quæ ut sit eodem nomine prædita, sedem tamen in longe alia regione habeat.

8. Sed num æque incertas causas quoque illas esse; credemus, quare Cæsena non solum Curva, verum etiam Flavia Curva Papiæ vocata sit? Ita enim legitur in Vita illa S. Severi, quem Claramontius (b) mortuum dicit anno 571. Cum ille Cæsenam venit, hæc alio tunc vocabatur nomine Flavia Curva Papiæ: atque ut alia ejusmodi Documenta omittamus; certe sic habet Agnellus (c) *Sarxena excubet, Cervia æquoris ad novas Papiæ armis Flavia. Instet, quæ curva vocatur, Cæsena*. Quæ verba nisi ita rescribas *Papiæ armis Flaviæ instet, quæ curva vocatur, Cæsena*; Agnelli sententia, ut alibi (d) admonui, non intelligitur. Unde autem Flaviam Papiam dictam putant? Ut commentum mittamus, quod ita Claramontius (e) refert, ut suam non oppignoret fidem, nempe de Colonia Cæsenam missa a Flavio Papiro Tuscorum Rege, & ad sequiora veniamus tempora, quibus Cæsena addita cognomenta ista fuisse, apparet; non improbabilis videtur Brixii (f) conjectura, Flaviam eo forsitan tempore dictam fuisse, quo Longobardorum Reges ipsam obtinebant, qui cognomento Flavii dicebantur. Nam primum Longobardis subjectam fuisse Cæsenam, & Luithprandrum, cum cætera de Emilia, & de Ravennatibus capta redderet, tertiam Cæsena oppidi partem exceperit, quam editiori in tumultu sitam in arcis præsidique locum sibi reservavit, vel ex nostro Blondo (g) licet cognoscere. Ex Paulo autem Diacono (h), cum Langobardi Autharim Clephonis filium regem sibi statuerunt, eum etiam ob dignitatem Flavium appellavisse, quo prænomine, inquit, omnes, qui postea fuerunt, Langobardorum reges feliciter usi sunt. Porro ab aliis quidem antea, ut puta a Vespasiano, ejusque Filiis Gentis suæ Flaviæ nomen, a Valerio autem Constantio, magni Constantini parente; deincepsque a Constantino ipso, & qui eidem in Imperio succedere, non modo ad Theodosios ipsos usque, sed & postea sæpe est Flavii prænomen usurpatum, indeque urbes quædam, & nominatim a Flavio Theodosio, Theodosii filio, dictæ sunt Flaviæ, sed Cæsenam jam eorum tempore Flaviam cognominatam esse, non constat: & si fuisset; tamen cur Papiæ quoque simul diceretur, non appareret: imo appareret, non potuisse sive quos memorat Gaudentius Merula (i), sequi placeat, qui Papiæ urbis nomen ab Regina quadam Langobardorum deducunt, sive qui non ante annum 476. impositum perhibent. At si Flaviam ab Langobardorum Regibus vocatam esse Cæsenam, credas; simul cur Papiam dixerint, facile suspicaberis, qui videlicet Papiæ sedem habere consueverint, quasi alteram Papiam Cæsenam sibi fore, significarent. Sed hæc quibus Brixii conjecturam de Flaviæ cognomento illustrare visum est, meamque simul de Papiæ addere, tanti facies, quanti volueris non secus ac quod de vinis agri Cæsena continuo subjiciam.

9. Plinius (k) de vinis generosis verba faciens, memoravit a supero mari Prætutia, atque Ancone nascentia. In mediterraneo vero Cæsena, ac Meccæniana. In Veronensi item Rhetica. Docti, quos supra laudavi; ex Cæsena Viri non dubitant, quin eadem sint Meccæniana, & Cæsena. Ego vero, si licet ab illis omnibus dissentire, nunquam istum relego Plinii locum, quin duabus istis vocibus duo videar intelligere vina laudari Cæsena, & Meccæniana: neque ita scripturum fuisse Plinium, si eadem esse vo-

luisse, sed ad alium modum; ut puta Cæsena quæ vocant Meccæniana. Quod cum dico, nihil vinis Cæsena detrahere volo, ut neque si dixerem, Varro nis locum (l); in quo tamen de uberi dumtaxat uvarum proventu verba fiunt; non ita fortasse legendum, ut Baccius (m) produxit, *Ager Gallicus Romanus vocatur, qui viritim Cæsena datus est*; quando vetulti etiam codices sunt qui pro Cæsena habent vel a Casare, aut, sicuti nunc editum (n) video, *cis Ariminum*. Cæsena igitur vina quæ Plinius, & Baccius merito celebrant, si quis cum Cæsena non generosa modo, sed delicata adeo esse, dicat, ut Meccænatem exquisiti palati hominem delectare potuerint, & quod ei gratissima essent, ab ejus nomine appellationem referre; minime adversabor. Sed non propterea Meccæniana apud Plinium eadem ac Cæsena esse, fatebor. Quin etiam num Plinius Meccæniana scripserit, dubitabo. Primum namque istam vocem neque apud Plinium alibi, neque apud alium idoneum linguæ Latinæ Auctorem legisse memini: & Gyrardus (o) vina Meccænatica dicta ait, quibus Meccænas delectaretur. Porro cum Plinii locum perpendo, & vinorum vocabula non ab homine, sed ab regione passim desumpta animadverto; post Cæsena aliam vocem, ac Meccæniana, positam fuisse, suspicor. Denique Harduinum ipsum video hic inter Meccæniana, & Mevanatiana ambigentem. Ego, qui nihil huc attinens in Plinio inveniam, nisi (q) *Irtiola vitis Umbria, Mevanatique, & Piceno agro peculiaris est*, nihil definio, dumtaxat dubito.

10. Antequam de Sapi, & Cæsena, quæ occidentali ejus ripæ attigua est, verba facere definamus, nolumus silentio quasi probare hallucinationes Geographorum quorundam in Tabulis apparandis. In illa igitur quam Cellarius proposuit inscriptam Italia Media, sive Propria, Sapis qui ab occidente sole, ut modo indicavi, Cæsenam perstringere deberet, perstringit ab oriente. In ea autem Italia Antiquæ Tabula, quæ Mediolani prodiit non ita pridem, cum tanto majorem diligentiam expectes, quod illius Auctores Cellarium, & quem is fere sequebatur, Cluverium minus diligentes in mediterraneis describendis regionibus fuisse, pronunciaverant, aut omissus videtur Sapis, aut cum Utente; sic enim ad originem inscribunt; confusus; sed cum eo Utente, quem nusquam invenias, nempe a quo non minori intervallo Cæsena distet, quam a flumine, ut Cæsena intelligunt, Rubicone. Denique in Tabula quam Ortelius edidit sub titulo Italia Gallica, sive Gallia Cisalpina, nullus omnino Sapis est; Rubiconi autem, inter quem, & Forum Popillii Sapis deberet interponi, illud ipsum affidet Forum, idque non ab occidente sole, sed ab oriente. Verum his missis, de parva urbe Cervia, quæ propter mare inter Sapi interjicitur, & Rubiconem, aliquid attingamus, mox de Rubicone iterum, cum de Cæsena Portu dicemus, nonnulla fortasse addituri.

11. Cerviam & qui pervetustam, & qui recentior esse urbem tradiderunt, a vero pariter aberraverunt. Primos enim græcum ejus nomen Phycocle non satis adjuvat, quod si ipsi a Thessalis illis, sive Pelasgis repeterent, quos ut Dionysius Halicarnassæus (r) in loca Ravennæ proxima transgressos docuit, ita Strabonem (s) secuti, & Cluverium (t), Ravennam condidisse, arbitrantur; possent alii majore veri similitudine tunc denique a Græcis nomen illud impositum Cerviæ existimare (id quod diserte a pluribus factum video) cum ab anno 568. ad annum usque 752. Ravennæ, & vicinæ regioni imperarunt: quanquam Cluverius Sigonium, imo Anastasium respiciens, quorum alter legit Ficoelæ, alter habet Ficulas, non græco, sed barbaro vocabulo Cerviam sic esse dictam, autumat. Sed neque hanc urbem tunc extitisse, cum Gallia Cisalpina Rubicone finiebatur, ex Appiano liquere, censet, qui postremam ejus Gallia urbem

(b) l. 4. cit. (c) Lib. Pontif. P. 2. in Vita Felic. c. 3. (d) Epist. VII. n. 5. (e) l. 4. cit.  
(f) Urbis Cæsena. Descript. (g) Histor. Dec. 1. l. 10. (h) De Gestis Langobard.  
(i) De Gallor. Antiquit. l. 1. c. 8. (k) Nat. Hist. l. 14. c. 6. (l) De Re Rust. l. 1. c. 2.  
(m) De Vinis Ital. l. 5. (n) in Lipsienf. Edit. G. Sneri (o) De Poet. Dial. 4. (q) l. 14. c. 3.  
(r) Originum &c. l. 1. (s) De Situ Orbis l. 5. (t) Ital. Ant. l. 1. c. 23.



urbem scripsit fuisse Ravennam. Reliquum est igitur, ut primi illi sententiam quadantenus tueri conentur suam Inscriptione quam ex Ligorio descripsit Rubeus (u), ut in Fori Trajani ruinis repertam, unde ejus saltem Imperatoris ætate fuisse Cerviam, ostendant. Illi enim Principi Inscriptionem posuerunt *Ravennati, Caereviani, Caesennati Cur. Viar. Tra.* Verum quis Trajani ævo non concidisse adeo Latinam linguam, ignoret, ut Ravennates, Cæsennatesque sua recte inscribere nomina, jam nescirent? Itaque merito Inscriptionem istam abjicit Wesselingius (x): & fuisse mirarer qui nuper ea uteretur ad viam *Trajanalem* confirmandam, quam tres isti populi muniendam curassent; nisi crederem ab eo exemplum aliquod aliud lectum, quod qui descripsissent, ut veri similis redderent, sic refinxisse, ut ipse indicat, *Ravennates, Cæsennates, & Cerviani*. Sed nihilominus ipsum Cerviæ nomen recentius multo est, quam ut esse in usu posset eo tempore, sicuti vel ex sententiæ eorum examine qui in aliud cucurrerunt extremum, continuo intelliges.

12. Paulusenim Merula (y) antiquam esse Cerviam negat, quum primus omnium, ni fallitur, mentionem ejus faciat Blondus lib. X. Hist. Blondus tamen eo libro (Decad. videlicet I.) laudat Agnellum, qui IX. sæculo scribens, Cerviam memoraverat, quemadmodum ex ejus verbis semel iterumque a me productis (z) cognoscere potuisti, & in re quidem, ut Doctissimus Agnelli Editor (a) censet, quæ non multo post annum acciderat 710. ut tunc urbs illa, seu Cerviam appellarent, seu Phycoclen, extiterit, necesse sit. At quanto, inquis, antea condita? Certe non sero adeo, ut Cluverius (b) credidit ex verbis Anastasii, pervenerunt juxta civitatem *Ravennatem, in locum qui dicitur Ficoclas, duodecimo milliario a civitate*. Non urbem, inquit, sed simpliciter locum tantummodo adpellat, idque in *Vita Theodori, qui Papa factus est anno Jesu Christi 641; imo cum ipse qui scribit, circa annum Christi viveret 860; tamen utitur verbo dicitur, non dicebatur*. Verum jam sæculo VII. imo & VI. & V. jam urbem fuisse, hæc ostendunt. Privilegium, ut vocant, quod ex Rubeo, & Ughellio refert Tondutius (c), in quo S. Gregorius Magnus sic loquitur. *Confirmamus Episcopatus totius Æmilie Provincia, & Civitatum omnium Deo amabilium Episcoporum creationes, & consecrationes, idest Sassinatis, Casenatis, Foripopilii, Forolivii, Faventie, Fori Cornelli, Bononia, Mutina, Regii, Parmæ, Placentie, Brixilli, Vicobabentia, Adriensis, Comaclensis, Ficoclenensis*. Tum idem Pontifex, ut animadvertit Holstenius (d), *Ravennatem Ecclesiam vacantem Ficulino* (in M. S. Vatican. *Ficulino*) *Episcopo* commendavit libro 4. Epistola 20. cujus Episcopi etiam sequenti Epistola 21. meminit. Epistola autem illa 20. S. Gregorii, adnotante Cl. Agnelli Editore (e), ad annum spectat 595. Denique Rubeus (f) ad ultimum sæculi V. annum, in iis, inquit, *Geruntius Ficoclenensis, quem nunc Cerviensem dicimus, Episcopis fuit, haud ita diu post ob Christi Dei fidem, capitali supplicio affectus*. Trecentis igitur & sexaginta annis priusquam Cluverius putabat, urbem fuisse Cerviam, vides. Sed num etiam antea? Non toto, opinor, sæculo. Privilegium enim Clementinius (g) memorat Valentiniani (nimirum Tertii; datum est enim anno 426.) quo in Privilegio cum inter cæteras Ecclesias *Ravennati* subiectas *Ficoclenensis* non nominetur; proclive est intelligere, inter eum annum, & annum 500. quo Episcopum habuisse, vidimus, Cerviam esse urbem factam. Nec pluribus ante sæculis cœpisse ibi esse oppiduli, aut vici instar, licebit tibi ex eadem altera animadversione arguere, ex qua Cluverius (h) recte confect, pervetustam urbem non fuisse. Itinerarium enim illud vetus quod circa postremos annos Magni Constantini, id est circa annum 337. absolutum esse, alibi (i) indicavimus, *Ficoclem* non habet inter *Sapim, & Rubiconem*, cum habeat in eodem tractu lo-

cum, *Ad Novas* dictum: quem ne Cerviam fuisse suspiceris, intervallum vetat inter ipsum, & Ravennam adscriptum, nempe duo & viginti millia passuum. Intra annos igitur illos 163. qui inter annum 337. & annum 500. intercedunt, initia Cerviæ fuisse, apparet, sique oblitum esse Cluverium, cum in Tabula, si recte memini, Umbriæ Antiquæ, *Ficoclas* posuit. Cæterum quod, illac transeunte S. Bassiano, factum esse, refert idem Cluverius (k), Rubeus autem (l) proposuerat circa annum 384. ea quidem parte accipere licet, qua Phycocle tunc fuisse dicitur; sed non ea qua fuisse dicitur urbs pervetusta, nec qua post factum illud traditur, ut jam deinde non amplius Phycocle vocaretur, sed Cervia. Hoc enim vocabulum non inveniri ante annum 710. supra ostensum est. Quin etiam postquam Cervia dici cœpta est, diu promiscue utrumque nomen usurpatum reperies. Sic exempli gratia, apud Rubeum (\*) Documentum memorari videas A. 1116. quo nominatur *Ecclesia Cerviensis*, & apud eundem A. 1119. Litteras Gelasii II. Pont. Max. quibus Episcopatus *Ficoclii* inter cæteros Æmilie recensetur, nec ipse ignoro, in hoc Monasterii S. Mercurialis Tabulario sub A. 1165. sententiam legi, quæ lata est præsentibus Episcopis quatuor, in hisque *Alberto Ficoclenensis Ecclesie Episcopo*.

13. Quæres fortasse, quis locus ille esset, quem in Itinerario appellari, diximus, *Ad Novas*, in isto quidem tractu; nam extra Italiam loca alia, atque adeo urbes fuisse, quæ Novæ aut ad Novas dicerentur, ex Itinerario constat, & ex recentissimis quoque Geographis, qui has nostras tamen non memorant. Post Itinerarium illud, unus, quod sciam, ex Veteribus est qui mentionem hujus loci fecerit, Agnellus. Hic igitur quid fuerit, docet (m). Egressus Ravenna, inquit, *ut properaret Romam, & veniens non longe a Ravenna quasi milliarios* (Cl. Wesselingius (n) legit *milliario*) *XV. ad Novas, ubi olim fuit civitas nunc dirupta, infra Ecclesiam B. Stephani per dies XV. ibi commoratus est*. Hanc tamen urbem non fuisse perantiquam, licet indidem cognoscere, unde perantiquam non fuisse Cerviam, intelleximus (o), nempe ex Appiano, quem secutus Sulpicius, Lucani interpres, *ultima Italiae urbs Ariminum est*, inquit, *prima Gallie Ravenna*. Ne vero urbem istam diruptam, sive dirutam, Phycoclem fuisse, suspiceris, locus alter faciet Agnelli sic, uti & supra (p), & alias (q) indicatum est a nobis, legendus, *Sarxena excubet Cervia. Æquoris ad Novas Papia armis Flavia inflet, quæ Curva vocatur, Casena*. Cur enim Agnellus eandem urbem quam modo Cerviæ nomine memorasset, continuo iterum memoraret? Erat igitur urbs, vel potius oppidulum (neque enim ejus Episcopos usquam legisse nunc memini) quæ dicebatur *Ad Novas*, erat, inquam, ut Itineraria docent, sæculo IV. & videtur etiam sæculis postea duobus fortasse, aut tribus, sed non pluribus extitisse, ex illo altero Agnelli loco, qui cum ajat, *olim fuisse*, apparet, jam ante sæculum quo ipse scribebat, IX. fuisse dirutam. Quamvis autem in ista sua littoralium Locorum commemoratione ab oriente pergat ad occidentem solem; continuo enim subjicit *Sapim, Candianum, Bedentem amnem, Lachernum portum, & Eridani ora, & quod consequitur, oppidulum quo de loquimur, indicare videatur, paulo quam Cerviam, Ravennæ fuisse vicinius, & ab hac non plus abfuisse, dixerit, quam millia passuum quasi XV. quando in Itinerario sic habemus, Ravenna, Sabis XI. Ad Novas XI. Rubico fl. III. Arimino XI.*; tamen Itinerarium potius sequi me juvat, cum alias (r) ostenderim, quam verear, ne Agnelli vetustissimus codex ab recentioribus hoc loco discrepet, præter ea quæ in eodem emendata sunt.

14. Locum igitur *Ad Novas*, si Itinerarium, & Cluverium (s) sequamur, ibi nimirum fuisse, credemus, ubi nunc *Casenaticum vicum*, ut Bembus (t) loquitur, esse conspiciamus, eum videlicet qui adjacet

Cæle-

(u) Hist. Ravenn. l. 2. (x) Adnot. ad Veter. Itinerar. (y) Cosmogr. P. 2. l. 4. c. 12, (z) supra, n. 8. & Epist. VII. n. 5. (a) Observ. ad Vit. S. Felic. (b) c. 28. cit. (c) Prelud. all' Hist. di Faenza (d) Adnot. in Thes. Geogr. Ortel. & in Ital. Ant. Cluver. (e) Observ. ad Vitam Mariniani. (f) Hist. cit. l. 3. (g) Raccolto Istor. di Rimini. l. 2. (h) c. 28. cit. (i) Epist. V. n. 15. (k) c. cit. (l) Hist. cit. l. 2. (\*) Ibid. l. 5. (m) Lib. Pontif. in Vita Martini c. 3. (n) Adnot. ad Veter. Itinerar. (o) supra, n. 13. (p) n. 8. (q) Epist. VII. n. 5. (r) Ibid. (s) c. 28. cit. (t) Rer. Venet. Hist. l. 11.



Cæsenæ portui, de quo etiam aliquid scribere polliciti sumus. Hic enim vicus hinc ab Ravenna, & hinc ab Rubicone tantundem distat, quantum in Itinerario utrinque distat locus *Ad Novas* inscriptus. Nam quod ab illa is vicus distare nunc dicitur XXI. passuum millia, non sicuti Itinerarium indicat, XXII; admonet Cluverius, longiora esse adeo millia ista XXI. ut merito pro XXII. haberi possint: ab Rubicone autem, ut Cæsenates intelligunt, non abesse amplius III. inter omnes convenit. Noli tamen credere, hæc a nobis ita dici, quasi Cæsenates cum oppidulum istud novum extruxere, vetus illud instaurassent. Neque enim Historici nostrates, cum istud extructum, portumque effossum esse, scribunt, sive anno id fuerit 1302. sive, ut alii, 1314. ullam dirutorum olim ædificiorum mentionem injiciunt, quibus Cæsenates usi sint, muros, & propugnacula ædificantes, in quibus turrim quoque illam fuisse, non dubitat Braschius (u), quæ in ipso littore extructa anno 1302. nunc passus illinc distat, sicut alias (x) memoravimus, propemodum mille: quanquam Claramontius (y) tradiderat, cum post eum annum dirutum fuisset oppidulum, Cæsenates iterum anno 1314. ædificasse, & licet nullis mœnibus, fossaque cinxerint, *antiqua tamen arce, & nova turri esse munitum*: sed Braschius fortasse turrim hanc novam pro altera accepit, quam *postea excitatam* esse, dicit (\*), jamque *& ipsam distare ab ostio portus* 400. fere passus: alii autem (z) tum eversionem illam, & nominatim turris quoque, tum instauracionem ad annum retulerunt 1328.

15. Sed neque credas velim, quod Cluverium sequentes diximus, id a nobis satis firmum putari. Ut enim illud seponamus quod ipse vidit, non idem hoc tempore inter vicum Cæsenaticum, & Ravennam intervallum poni, quod inter hanc, & locum *Ad Novas* olim ponebatur; alia sunt quæ minus animadvertit, neque animadvertere ex parte potuit. Scilicet latebant Agnelli Scripta, quæ, ut paulo ante (a) indicatum est, neque locorum ordine, & serie, neque intervallis cum Itinerarii hac parte conveniunt. Sed non latebant Blondi libri, quem Cluverius (b) cum errorum, quos hic non vacat examinare, complurium arguat, hujus præsertim arguit, quod scripserit (c), *ubi Rubico mare ingreditur, esse Cæsenæ portum*. Credo autem ideo arguisse, quod videret, non posse igitur locum qui *Ad Novas* appellabatur, vicum esse Cæsenaticum, si ad hunc esset Rubicon, quem Itinerarium ab loco illo distitum ponebat III. millia passuum. Verum non satis animadvertit, minime esse veri simile, Blondum, cujus Patriam haud multum ab Rubicone abfuisse, adeo non ignorabat, ut hinc occasionem tanto magis redarguendi caperet, Blondum, inquam, nescivisse quo loco is fluvius in mare influeret, aut si forte ille id nescivisset, Cæsenates quoque ipsos ignorasse: quorum silentium argumento esse Cluverio, oportebat, ea in re Blondum a vero non recessisse. Certe autem eorum qui tunc vivebant posteritanti abest ut a Majoribus acceperint, in eo esse Blondum hallucinatum, ut Claramontius, & Braschius ejus hac in re testimonio utantur, idemque confirmant. Ille enim (d), *Rubicon antea*, inquit, *ostio ipse suo in mare excurrerebat, ut ex Statuto nostro elicitur, & tempestate id sua accidisse, memorat Blondus, in eoque tum ostio Portum fuisse nostrum, asseverat*. Braschius autem (e) ad Blondi verba Documenta addit certissima annis 1473. & 1475. perscripta, quibus inspectis, & testibus auditis ante finem XVI. sæculi Romani duodecim Judices universi pronunciarunt, non posse in dubium revocari, quin olim is fluvius ad mare deflueret *prope Tagliatam*, & quod consequitur, *prope Cæsenæ Portum*: perinde autem esse, quantum ad susceptum sermonem attinet, sive per Portum, sive prope Portum, in mare influeret, manifestum est. Insuper ut magis magisque res comprobetur, causam Braschius adjicit, quamobrem inde Rubicon aversus fuerit, videlicet crebras antea ex illo

inundationes, quibus salis confectio vitiabatur: itaque Cæsenates ære suo novum alveum paravisse, veterem autem finitimorum agrorum dominis vendidisse. Nec Documenta indicare omittit, unde hæc pro certo cognosci queant. Utinam autem sua illi pariter indicassent, qui aliorum ære, non Cæsenatum, alveum novum paratum dicunt, cum Rubicon antea in paludem supra Cæsenaticum vicum influeret: quanquam cum iis quæ de crebris inundationibus modo attigimus, componi facile possunt quæ isti tradunt de palude: & quod hic præcipuum est, alvei mutationem hi quoque ponunt. Quæ mutatio quo tempore facta sit, intelligi ex comparatione licet eorum quæ Blondus (f) circa medium sæculum XV. scripsit, cum iis quæ Sabellicus, ut legimus apud Claramontium (g), ad finem ejusdem sæculi testatus est. Cum enim ambo, ut res se haberet suo quisque tempore tradiderint; ille Rubiconem ad Cæsenæ Portum in mare, hic vero, ut nunc videmus, in flumen alterum influentem proponit, cujus ostium III. ab eo Portu passuum millibus in mare patet. Quæ cum ita sint, constare, vides, Rubiconem ante medium sæculi XV. proximum vico Cæsenatico fuisse, itaque hunc esse non potuisse oppidulum, ab Rubicone distans III. passuum millia, quod *Ad Novas* dicebatur, ut Cluverius censuit, & qui ipsi altipulatur, Braschius (h). Quem miror, cum ea quæ modo sunt dicta, non ignoraret, imo ipse proferret, confirmaretque, non attendisse quam repugnarent Cluverii sententiæ, & suæ, neque pro hac tuenda suspicionem saltem aliquam injecisse, an eo tempore quo Itinerarium illud perscriptum est, Rubicon longe ab eo loco, ferme ut nunc videmus, in mare influeret. Igitur ad cætera illa quæ supra indicavimus, hoc quoque accedit, ut eam sententiam non satis firmam credamus, ad quam retinendam tot conjecturis opus sit.

16. Et si vero me extrema hac Epistola nolim controversia illa nec facili, nec brevi implicare, quæ Cæsenates inter, & Ariminenses diu, multumque agitata est, an Rubicon Veterum id sit de quo hæcenus locutus sum, flumen, *Pisatellum* nunc vocitatum, an quod, vel magis ab Ravenna distitum, nunc *Lusum* nominant; tamen quæ de antiquo oppidulo *Ad Novas* supra memorata sunt, eo me ducunt, ut de controversia illa, non pronuncianti, sed dubitanti similior, aliquid attingam. Si enim prisca Itinerarii Rubicon III. passuum millia ab eo oppidulo distabat, hoc autem ab Ravenna, si Itinerarium illud attendas, XXII; tu ipse cogita, num intervallum haud amplius passuum XXV. millibus inter Rubiconem, & Ravennam melius Luso, magis distito, an propiori Pisatello conveniat, præsertim cum Agnellus, ut vidimus (i), vel eo minus intervallum proponat, & locum *Ad Novas* Cerviæ proximum fuisse, significet. Vide jam cæteros, & vetustiores quidem Auctores, qui de Rubicone aliquid attigerunt. Strabo (k), Cæsenæ, inquit, *Isapi fluvio propinqua, & Rubiconi*. Sapis (primam enim litteram temere ab librariis additam esse, etiam Casaubono, ut alias (l) scripsimus, visum est) quam prope Cæsenam sit, constat. Num ergo Rubiconem, qui simul Cæsenæ esse propinquus dicitur, Lusum potius esse, credes, qui XII. passuum millia distat, an Pisatellum, qui II? Lucanus (m) *parvum* dixit Rubiconem, & *fonte cadere modico, parvisque impelli undis*, & Cæsar apud Suetonium (n) pontem Rubiconis *ponticulum* vocavit. Credemusne igitur, Lusum, qui aliquanto uberius, ampliorque est fluvius, ipsum potius, quam exilem Pisatellum, fuisse Rubiconem? Ego quidem miror, Cluverium (o), qui cum vidisset, per hæc sententiam confirmari suam, quæviserit tamen quæ his repugnent, & ex confluxu duorum aliorum amnium paulo supra ejus de quo loquimur, ostium, inde saltem contenderit, aquas esse *copiosissimas, & æstate etiam satis copiosas*. At enim, inquis, idem Lucanus (p) Rubiconem dixit *alpinum*, itemque *puniceum*. Fateor. Sed num Lusum ipse puniceus est? aut e summo Apennini vertice initium ducit? Nimirum poetæ satis est, nasci Rubi-

(u) De vero Rubic. c. 14. n. 19. (x) Epist. VII. n. 9. (y) Hist. Cæsen. l. 11. (\*) c. 6. n. 13.  
(z) Vedi Vecchiazzan, Hist. di Forlimpop. P. 1. l. 20. Padovani Supplem. alle Croniche di Forlì &c. (a) n. 13.  
(b) c. 28. cit. (c) Ital. Illustr. Reg. 6. (d) Appar. Hist. P. 2. (e) c. 6. cit. n. 3. & seqq.  
(f) Reg. 6. cit. (g) P. 2. cit. (h) c. 3. n. 9. & c. 6. n. 7. & seq. (i) supra, n. 13. (k) De Situ Orbis l. 5.  
(l) Epist. V. n. 10. (m) Pharsal. l. 1. (n) in Cæsar. c. 31. (o) Ital. Ant. l. 1. c. 28. (p) l. 1. cit.



Rubiconem ex Apennino, quod utrique fluvio commune est, & nomine videri rubri aliquid significare. At puniceum colorem, inquis, in ejus glareis agnovit Sidonius ( *q* ). *Ravenna progressis ad Rubiconem ventum: qui originem nomini de glarearum puniceo colore mutuatur.* Sic vero illo tempore fuisse, satis est: absumique potuit longo sæculorum cursu ea pars telluris adlitæ, unde ejusmodi glareæ existebant; ut non ita necessarium fuerit eo colore glareas ad ostium de quo dictum est, a Cluverio quæri, & inveniri. Multo autem minus necesse erat ibidem quærere arundinetum, quasi, ni hoc fuisset ad Rubiconem, nemo ibi *arundine canere* ( *r* ) potuisset; si tamen, Cæsare ibi hæsitante, revera aliquis cecinit, nec fabula id, aut præstigia fuit, vel techna potius callide a Cæsare ante parata, ut jactare apud milites posset suum illud *Eatur quo Deorum ostenta vocant.*

17. Pro Luso autem illud certe præcipuum est, quod propius quam Pisatellus, ab Arimino absit: quam Appianus ( *f* ) urbem circa auroram, Plutarchus autem ( *t* ) *nondum illucescente die occupatam* ait a Cæsare, cum Rubiconem transire non potuisset, nisi valde appropinquante jam die, si, quod cæteri præter Braschium ( *u* ) ponunt, sub ejusdem noctis initia Ravenna exierat. Quem ad dissolvendum nodum videas velim, an satis sint quæ, præter illam qua Cæsar conficere omnia solitus erat, incredibilem celeritatem, Viri inter Cæsenates ingeniosissimi animadverterant. Scilicet Claramontius ( *x* ) ex Cæsar's tum Commentariis, tum Epistolis quæ inter eas extant quas Cicero ad Atticum scripsit, ex hisque ipsis Ciceronis, aliisque Pompeii inter easdem servatis, apparere posse, censuit, diem quo Rubiconem trajecit Cæsar, in medium circiter Januarium incidisse. Non est mihi tempus inquirendi, an ratione habita, quam se habuisse, ait Claramontius, anni postea emendati, rem bene ipse constituerit, ut neque obstat quod Sulpicius, Lucani interpretem scripsisse, ajunt, cum is Rubiconis transitus accidit, *appropinquabat Januarii finis*, nec quod Plutarchum tradidisse, ipse quidem Claramontius dicit, eo tempore, scilicet necdum anno emendato, solstitium, id est brumam, circa eum diem fuisse. Certe & Lucanus ( *y* ) tunc hybernium tempus indicavit. *Tunc vires*, inquit, *præbebat hyems.* Attamen, ut dixi, hæc velim a te perpendi, quando Braschio ( *z* ) ob anni correctiones visum est, eum incidisse diem circa medium Novembrem: simulque illud attendas, velim, an eo posito, quod Claramontius statuit, anni tempore, *nox in hac regione fuerit*, ut ipse ait, *horarum 15. & minut. 20. crepuscula autem tum horæ unius, & minutorum quinquaginta.* Quod si huc accessisset solis eclipsis, quam Eruditus Vir memoria nostra ex auctore Dione retulit, Rubiconem transeunte Cæsare, accidisse; quanquam nec apud Dionem legisse id memini, sed hoc dumtaxat apud Lucanum ( *a* ), qui, ut poeta, confingere potuit, exoriente mox die, *mæstam tenuisse nubila lucem*; aucta ea quoque ratione illius noctis longitudo videri potuisset. Sed ista dumtaxat quam Claramontius indicavit, posita & noctis, & crepusculorum longitudine, Dandinus ( *b* ) satis componi inter se posse, censuit, tum quod Lucanus ( *c* ) de Cæsare superato modo Rubicone scripsit, *Sic fatus, noctis tenebris*, tum quæ ab Appiano tradita diximus de Arimino *circa auroram*, a Plutarcho autem *nondum illucescente die*, occupato, tum quod difficilius est, ab Suetonio ( *d* ) autem scriptum de duce a quo Cæsar ad Rubiconem perduceretur, *tandem ad lucem reperto.*

Præterea qui pro Cæsenatum Rubicone sunt, alii alio loco trajectum a Cæsare esse, contendunt; ut ejus tum ab Ravenna illuc, tum inde Ariminum itineris longitudo, &, quod consequitur, etiam temporis minuatur.

18. Sed & alia proferri hic possent quæ pro alterutro flumine disputantur, in iisque ad Pliniani loci ( *e* ) interpretationem spectantia, qui locus initium octavæ Italiæ Regionis ad hunc modum proponit. *In ora fluvius Crustumium, Ariminum colonia cum amniculus Arimino, Aprusa. Fluvius hinc Rubico, quondam finis Italiæ. Ab eo Sapis, & Vitis, &c.* Nam Cæsenates hoc Plinii ordine spectato, post amnem Ariminum, nunc vulgo *Marecchia* dictum, Aprusam cum Blondo ( *f* ), & Leandro ( *g* ) in Luso flumine stantes, hoc igitur esse non posse Rubiconem, contendunt. Ariminenses vero, astipulante hæc in parte Cluverio ( *h* ), qui cæteroquin haud alium, quam Cæsenates, Rubiconem agnoscit, Aprusam esse volunt *Ausam*, qua urbs sua ita ab oriente sole perstringitur, ut *Marecchia* ab occidente: consuevisse enim Plinium, cum propinquos urbi cuiusdam fluvios memoraret, ad eundem modum ad quem isto loco, scribere, *Ravenna cum amne, Pisaurum cum amne, Truentum cum amne*: nec quod Aprusam post flumen Ariminum nominaverit, id aliam ob causam factum videri, quam quia hoc illa multo nobilius est. Verum etsi illud potius adnotari licebat, non semper a Plinio exacte servatum esse ordinem in fluviis nominandis, ut apparet; ne longius abeamus; ex capite ( *i* ) quod paululo præcedit locum de quo sermo est; ibi enim legimus *flumina Albulates, Suinum, Helvinum*, quando hoc in Cluverii Tabula Albulati continuo succedit, tribusque aliis interjectis, denique cernitur Suinum; tamen cum multo omnibus notius est, tum in hac ipsa nostra octava Regione manifestissimum, a Plinio, ubi aliud peculiaris causa aliqua non requirat, ejusmodi amniculos prætermitti, quos inter *Ausa* habet locum; nisi me hic forte memoria fallit; interque torrentes ponenda est, quemadmodum *Ausæ* ponuntur, sive *Avesæ* aliæ duæ, quarum altera a me fuit juxta Popilii Forum memorata ( *k* ), altera autem Bononiam secat; ut sæpe venerit mihi in mentem quærere, unde in Regione hac originem habuerit hoc *Ausæ*, sive *Avesæ* nomen, quod in eadem animadvertebam crebro adeo reperitum. Verum; ne a proposito divertamus; illud denique non est omittendum quod pro Luso contra Pisatellum inculcari solet, parvo huic amni minus convenire, quam Luso, fuisse limitem Gallorum, quos diu ab Italis determinavit. Hæc tamen licet animadvertere, primum non videri pacis conficiendæ, & diutissime servandæ causa fuisse hunc limitem electum; sed casu potius, ut belli tulit fortuna, inter validas utrinque gentes relictum: deinde ex iis quæ supra ( *l* ) attigimus, satis constare, parvum fuisse Rubiconem; ut minime liceat, quacunque is ratione limes fuerit, parvitatem objicere: novissime ut paucis præditus aquis fuerit; tamen & satis altum initium, & proprium olim in mari finem, sicut antea ( *m* ) ostensum est; non cum aliis communem, neque in palude; nam hoc quoque nonnulli objiciunt; habuisse: quamquam palus obstare non poterat ei de qua loquimur, terrarum determinationi.

19. Verum quæ de Rubicone cursim attigi, velim, ut initio ( *n* ) dixi, sic accipias. Neque revera hic aliud feci, nisi ut ingenue faterer, in quibus hæsitaverim locis, cum pleraque utriusque Partis Scripta legerem, ad hunc usque annum edita

( *q* ) l. 1. Epist. 5. ( *r* ) c. 32. ( *f* ) De Bellis Civilib. Roman. l. 2.  
 ( *z* ) in Cæsare ( *u* ) c. 9. ( *x* ) Appar. Hist. P. 2. ( *y* ) l. 1. cit.  
 ( *z* ) c. 8. ( *a* ) l. 1. cit. ( *b* ) Adnot. 3. ad Brixii Descript. Cæsen.  
 ( *c* ) l. 1. cit. ( *d* ) in Cæsare c. 31. ( *e* ) Nat. Hist. l. 3. c. 15.  
 ( *f* ) Ital. Illustr. Reg. 6. ( *g* ) Descript. di tutta Ital. Reg. 14.  
 ( *h* ) Ital. Ant. l. 2. c. 5. ( *i* ) l. 3. c. 13. ( *k* ) Epist. VI. n. 12.  
 ( *l* ) n. 16. ( *m* ) n. 15. ( *n* ) supra, n. 16.



edita 1744. ( o ). Fateor quoque , me non fugere , quot , & qui Viri cum Ariminensibus faciant ; tametsi aliqui ex recentissimis , quasi sui obliti , modo illis , modo Cæsena-  
tibus astipulentur . Ego vero qui apud utrosque Amicos & habui , & habeo non minus

quam ipse , veritatis cultores , si quæ post hæc quæ utrinque jam diu inculcata sunt , nova , ut fore audio , proferentur , in eam libenter sententiam transibo , per quam planius tolli dubitationes , intelligam . Vale .

( o ) Ab eo anno otium Auctori occupatissimo non fuit , ut posset , quemadmodum optabat , non hanc modo , sed & superiores Epistolas tredecim , vix una , aut altera excepta , recensere ; id quod voluit hic adnotari .

Lector emendare hæc poterit .

pag. 10. c. 1. l. ult. hæc - hæ p. 11. c. 2. l. 69. Non - Nam p. 14. c. 1. l. 56. proba - prole p. 21. c. 1. l. 44. quas - quos c. 2. l. 7. sæculo - sæculis p. 22. c. 1. l. 15. Padum dele l. 17. sub - sua l. 70. ablueret - abluerer c. 2. l. 10. servant - servant p. 23. c. 1. l. 68. porphyriticum - porphyreticum p. 26. c. 1. l. 25. indicii - iudicii c. 2. l. 13. significat - significet p. 27. c. 1. l. 58. domos , & octo insequentia verba cursivis litteris scripta intelligantur p. 28. c. 1. l. 58. & - ut p. 30. c. 2. l. 38. disiectum - disiectus p. 31. c. 2. l. 21. aquæductum - aquæductum p. 31. c. 2. l. 54. XXI - XXVII. l. 60. XV . XVII. p. 32. c. 1. l. 63. quia - quin p. 34. c. 2. l. 11. noluisse - voluisse p. 37. c. 2. l. 48. intellectum - intellectam p. 38. c. 1. l. 27. musicum - musivum l. 60. PR - PK c. 2. l. 24. Callario - Cellario l. 44. vallo - A. 378. munitum vallo p. 40. c. 1. l. 45. a - e c. 2. l. 29. pum - pum vulgo p. 41. c. 2. l. 26. qui - qua p. 44. c. 1. l. 40. transilisse - transilisse p. 47. c. 2. l. 50. ceboce - celoce p. 50. c. 1. l. 43. alveo - alveo ad p. 51. c. 2. l. 27. Comitum - Comitum p. 54. c. 2. l. 42. interpellares - interpellabis p. 55. c. 1. l. 65. munimentis - munimenti p. 57. c. 1. l. 74. non - non modo c. 2. l. 57. quas - quos l. 59. quos - quas p. 59. c. 1. l. 56. Stabo - Strabo c. 2. l. 55. partem - partim p. 64. c. 1. l. 7. Claudio Marcello & - Claudio Marcello , & p. 72. c. 1. l. 40. abscribere - adscribere c. 2. l. 56. HERMETI - HERMETI pag. 75. c. 2. l. 33. eodem - eodem

EPISTOLARUM ÆMILIANARUM FINIS.















